


Jusiñamui uai:
Jusiñamui jito rafue
illa rabenico



New Testament in Huitoto, Murui (PE:huu:Huitoto, Murui)

Jusiñamui uai: Jusiñamui jito rafue illa rabenico

New Testament in Huitoto, Murui (PE:huu:Huitoto, Murui)

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022
145a1f66-dca1-5de3-9c00-4e533605e488

Contents

MATEO	1
MARCOS	69
LUCAS	109
JUAN	176
HECHOS	223
ROMANOS	279
1 CORINTIOS	304
2 CORINTIOS	334
GÁLATAS	351
EFESIOS	361
FILIPENSES	371
COLOSENSES	377
1 TESALONICENSES	383
2 TESALONCENSES	388
1 TIMOTEO	391
2 TIMOTEO	398
TITO	403
FILEMÓN	406
HEBREOS	408
SANTIAGO	431
1 PEDRO	438
2 PEDRO	446
1 JUAN	450
2 JUAN	456
3 JUAN	457
JUDAS	458
APOCALIPSIS	461

MATEO JESUCRISTO EN RUEMO ILLA RAFUE CUIAFUE

*Jesucristo ie usumatiai
(Lc 3.23-38)*

¹ Jesucristo rafuena omoimo cue lloiacana jira, naimie cominina nano lloiticue. Jesucristo usumatiai micoriai mameciaina omoimo lloiticue. Naimie usumadi David micori. Jiaie usuma Abraham micori.

² Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori.

³ Judá micori jitodi Fares micori. Jiaie jitodi Zara micori. Iaimaiai micori eidi Tamar micori. Fares micori jitodi Esrom micori. Esrom micori jitodi Aram micori.

⁴ Aram micori jitodi Aminadab micori. Aminadab micori jitodi Naasón micori. Naasón micori jitodi Salmón.

⁵ Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isai micori.

⁶ Isai micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiña ollená, David micori Urías micorina jobaimemo orede. Jobaimemo naimie fiodailla mei, naiñaiña ote.

⁷ Salomón micori jitodi Roboam micori. Roboam micori jitodi Abías micori. Abías micori jitodi Asa micori.

⁸ Asa micori jitodi Josafat micori. Josafat micori jitodi Joram micori. Joram micori jitodi Uzías micori.

⁹ Uzías micori jitodi Jotam. Jotam micori jitodi Acáz. Acáz micori jitodi Ezequías micori.

¹⁰ Ezequías micori jitodi Manasés. Manasés micori jitodi Amón. Amón micori jitodi Josías.

¹¹ Josías micori jitodi Jeconías micori. Jeconías micori amatiai micoriai jiai itimaci. Naie facaiseconi Babilonia railla nairai dine naie nairai soldaduai cai cominina uitimaci.

¹² Naie meinomo Jeconías micori Salatiel micorina comuitate. Salatiel micori jitodi Zorobabel micori.

¹³ Zorobabel micori jitodi Abiud micori. Abiud micori jitodi Eliaquim micori. Eliaquim micori jitodi Azor micori.

¹⁴ Azor micori jitodi Sadoc micori. Sadoc micori jitodi Aquim micori. Aquim micori jitodi Eliud micori.

¹⁵ Eliud micori jitodi Eleazar micori. Eleazar micori jitodi Matán. Matán micori jitodi Jacob micori.

¹⁶ Jacob micori jitodi José micori. José micoridi María ini. Naiñaiñodi Jesús ei. Naimie mameci jiaicidi Cristo.

¹⁷ Abraham micori illa facaise mona David micori jeicia facaisemo Jesús ie catorce nanoramaci mameci jai ite. David micori facaise mona Babiloniam o ite nairai anamo cai jaigai illa facaisemo catorce nanoramaci mameci jiai ite. Babiloniam o ite nairai anamo cai jaigai illa facaise mona Jesús jeicia facaisemo catorce nanoramaci mameci jiai ite.

*Jesús jeicia rafue**(Lc 2.1-7)*

¹⁸ Jesucristo comuilla rafuena lloiticue. Jesús eidi María. Naiñaiñona jicanotimiedi José micori. Naimie micori diga naiñaiño nia iñenia, Jesiñamui Joreño ie uaido naiñaiñona uruesitate.

¹⁹ José micori maremie. María jai uruesillana naimie micori fidianona, naiñaiñona meidaitañellena jira, naiñaiñona bainino dotaacade. Jiaimie diga illamona urueside raillanona comecina facajanona, naiñaiñona dotaacade.

²⁰ Naimie micori comecina iemo facaia, naimie micori nicairillanona, naimie micorimo Jusiñamui jaienici bairiano raite:

—José, David micori jito, Maríaña jaciruiñeno ono, o aina illena. Jusiñamui Joreño naiñaiñona jai uruesitate.

²¹ Himana jocoite. Ie comini naimaci jeacinomona naimie jilloitajaibilla jira, Jesúsna o jitalle naimie mamecidi —raite.

²² Bie rafue suide, Jusiñamuidi ie lloraima micori jaie llotataga uaina suillena.

²³ Jaie llotatate:

Himana uiñoñediñaiñomo comuite uruedi.

Himana jocoite.

Emanuel ie mameci jitalle.

Bie mameci oni dobaiñuamona raite: “Jusiñamui cai diga ite”.

²⁴ José micori casidemo, Jusiñamui jaienici lloga uaina finode. Maríaña ote, ie aina illena;

²⁵ Iadedi nai jitona naiñaiño nia jocoñenia, naiñaiño diga naimie micori nia iñinede. Naiñaiño jito jeicia mei, José micori jítade naimie mamecina Jesúsna.

2*Monamo ite ramo comeциаina facauidino rafue*

¹ Judea railla eniruemo Jesús jeiciga. Naimie jeicianodi Belén. Naie facaiseconi ite illaimadi Herodes micori. Monamo ite ramo comeциаina facauidino naie facaiseconi Jerusalémo jítoma billafo dinena bitimaci. Jerusalémo itinomo jicanotimaci:

² —¿Ninomo como jeiciga omoi judíuai illaimadi? Jítoma bisoillafomo como bairedu ucuduna cidicai. Naiemona naimie jeiciana jai uiñoticaí. Naimiemo iobillacinona fecallena biticai.

³ Herodes micoridi naicinona cacajanona, ie comece jarire ite. Jiaimie naimie meifomo illana jítaiñede. Jerusalémo itinodi jiai jarire itimaci.

⁴ Ie facaise Herodes micori judíuai illaicominina uaiduanona, naimacimo Cristo raillamie jeiciana jicanote.

⁵ Uai otimaci:

—Judea railla eniruemo. Belémo. Iena Jusiñamui facaina micoridi jaie cuega:

⁶ Judea eniruemo Belén nairai ite; ia naie nairai eo janorede.

Naie nairaimona damie jeiciamona, omoi illaimana jaite.

Naimiedi cue Israel railla cominina sedaite.

Iemona Belén nairai Judea illaicomini baifemo faite

cuega.

⁷ Iena cacaja mei, Herodes micoridi monamo ite ramo comeciai facauidino bainino uaidote. Naie ucudu bairia facaise raise uiñollena jicanote.

⁸ Naimacina Belémo orede. Llote:

—Naie uruena raise jeno. Naimiēna omoi cūa mei, cuemo lluaibi, naimie dine cue jaillesa. Naimiemo iobillacinona jiai feacaadicue —lote.

—Jii —fairiotimaci.

⁹⁻¹⁰ Iena naimie micori llua mei, jaidimaci. Ucuduna naimaci dane ciuamona, eo iobidimaci. Naimaci cūa ucududi naimacina ifuanona, monamo naie urue afemo ride.

¹¹ Fo jaillano uruena, ie ei María diga, cioidimaci. Naimiemo iobillacinona fecallena, caiñici ifodo ana rainadatimaci. Naimaci bolsas sebiñuanona, naimiemo rana jamai fecadimaci. Oro fecadimaci. Caimare sorirede rana jiai fecadimaci.

¹² Naimaci inia anamo naimaci nicairillanona, Jusiñamui llote:

—Herodes dine abido jaiñeno —lote. Ie jira Jerusalémo jaiñeno abido naimaci eniruemo jaidimaci.

Egiptomo Jesús jailla rafue

¹³ Naimaci jailla mei, José micori inia anamo nicairite. Nicairillanona, Jusiñamui jaienicidi naimiemo bairiano raite:

—Egiptomo nai o urue diga, ie ei diga, mai jai. Omo cue llua dinori nainomo i. O abido billirui lloiticue. Herodedi nai uruena jenoite, naimiēna meinellena —raite.

¹⁴ José micori raire casillano, nai urue diga, Jesús ei diga, Egiptomo naiona jaide.

¹⁵ Herodes micori fiodaille dinori nainomo ite. Ie muidona Jusiñamui ie facaina lloraima micori llotataga uai jai suide. Jaiie lloga: “Egiptomona cue Jitona jai uaidoticue”.

Mena años itisaiai dierisedena faia rafue

¹⁶ Egiptomo Jesús jaillana Herodes micori fidiñede. Monamo ite ramo comeciaina facauidino naimaci eniruemo abido jaillana naimie micori jiai fidiñede. Naimie micori dine naimaci abido biñena jira, naimie micorina naimaci jifua jira, naimie micori eo icirite. Ie jira mena años itisaiai dierisedena faetate. Nana Belémo ite itisaiai diese faetate. Belén ecimo itino uruiaina jiai faetate. Naie ucudu mena años jaie nano bairena jira, mena años itisaiai dierisedena faetate.

¹⁷ Raquel micori jaie eia isoi, Belén itino birui eedimaci. Jeremías micori iena jaie cuela:

¹⁸ Ramá railla nairai dinena Raquel micori eo eiana cacadicue.

Cai usuño Raquel micori eede.

Naiñaiño micori urui ai micoriai facaina eede.

Jiaie cominimona firaduacinona jitaiñede, naiñaiño urui ai micoriai jai fiodailla jira.

¹⁹ Digarui illanona, Herodes micori fiodailla mei, Egiptomo José micori dane nicairillanona, Jusiñamui jaienicidi naimiemo bairede.

²⁰ Llote:

—O comini eniruemo na o urue diga, ie ei diga, abido mai jai. Nai o uruena meineiacadimie jai fiodaite.

²¹ Ie jira ie eniruemo naie urue diga, ie ei diga, abido jaide.

²² Herodes micori jitodi ie moo ifomo jai illana José micori fidiano, jaciruite. Herodes micori jito mamecidi Arquelao. Nainomo José jaiacaiñede. José micori dane nicairillanona, Jusiñamuidi Galilea railla eniruemo naimie jaillena naimiemo llote.

²³ Nazaret railla nairai dine jaide, nainomo illena. Iemona Jusiñamui facaina lloraini micoriai jaie cuegafuiai jai suide. Cristona jaie cuetimaci: “Naimiedi Nazaret imie”.

3

Jofue iñenanomo Juan Bautista micori illa rafue (Mr 1.1-8; Lc 3.1-9, 15-17; Jn 1.19-28)

¹ Diga años illanona, Juan Bautista raillamie micoridi jofue iñenanomo illanona, cominina dafaifia, Jusiñamui rafuena naimacina llofueuide.

² Comini naimie micori dine billanona, naimacimo llote:

—Omoi jeacinona fainonocaida, omoi comeciai iuailai meido. Jusiñamui dibeimo omoi i. Naimie anamo omoi illana naimie jitailla jira, omoimo iena lloiticue —llote.

³ Isaías micoridi Jusiñamui facaina lloraima. Juan Bautista micori nia iñenia, Isaías micoridi naimie micorina jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite.

Naimie naiso atona raise fino” llote.

Iese llote; iadedi naimie uaina naimaci feiñollena, naimaci comeciai marena finuana ñaite.

⁴ Juan micoridi camello itirai ai ie nilla iniroina jitate. Igoi iena ie moilligaina jitate. Fioduaina rite. Ciifona mete. Jamai rana guite.

⁵ Diga comini naimie micori dine jai jaisoidimaci. Jerusalémoma, nana Judea-mona, nana Jordán fue mona jai jaisoidimaci.

⁶ Jusiñamui naimaci jeacinona naimaci llua meino, naimacidi Juan micori bautizaga.

⁷ Bautizallena, diga fariseuai, diga saduceuai, naimie micori dine bitimaci; iadedi naimaci billana naimie micori ciuano llote:

—Maraiñede rafuena finocana omoi jailla jira, jai o nairai isoidomoi. ¿Niese Jusiñamui ricaiillfue mona jilloitomoi? Cue dine omoi billena, ¿bu omoimo llua?

⁸ Omoi comeciai iuailai meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naiemona omoi comeciai iuailai meiduana uiñoiticaí. Ie mei omoi bautizallomoi.

⁹ Omoi comeciaina fañaeno: “¿Bue ñellena o llua isoi finoiticaí? Jusiñamui Abraham micorina jaie eo raise nabaide. Abraham micori cai moo illa-mona, Jusiñamui ricaiillfue mona jilloiticaí”. Ero, omoimo lloiticue: Cue llua isoi omoi finoñenia, naimie ricaiillfue mona jilloñeitomoi. Abraham micori uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micori facaina uruiaina comuitarede.

¹⁰ Ero, lliñede riará tiedomoi. Tia mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoína jai duere finoacade. Ie ricaiillafue anamo jai itomoi. Omoi comeciai iuai omoi meidoñenia, omoína duere finoite.

¹¹ Jusiñamui dibeimo omoi comeciai iuai omoi meidoia, jinuui diga omoína bautizaiticue. Cue baifemo fatimie bie facause biite. Naimie cue ifo meidoite. Jamai bue cue isoilla jira, naimiena cue canuana uiñoñedicue. Naimie bia, naimie dibeimo omoi jaillamona, Jusiñamui Joreño omoimo itataite. Omoi comeciai iuai omoi meidoñenia, omoína duere finoite.

¹² Trigona omoi betaia, mare trigona eenotomoi. Maraiñede ra oni dota-janona, iena jobaitomoi. Ie isoide. Naimie rafuena lluanona, comeciai iuailla meidotinona ie moo illanomo naimiedi ofitait; iadedi jiaie cominina duere finoite. Iraimo dotaite. Naie irai jaca duiñede —llote.

Jesús bautizaja rafue
(Mr 1.9-11; Lc 3.21-22)

¹³ Juan micori Jordán dine nia ia, Galileamona Jesús bite. Naimiena bautizallena, Juan micori dine bite.

¹⁴ Juan dinena naimiemo llote:

—Bautizallena cuemo bitio; ia dama ite. Cuena o bautizaia, cuemona mare.

¹⁵ Jesús uai ote:

—Cuena mai o bautiza. Nana Jusiñamui jitailla rafue coco finoia, mare.

Juan:

—Jee —raite. Ie facaise naimiena bautizade.

¹⁶ Jesús bautizaja mei, jinuumona bite. Mona bojodena ciode. Jusiñamui Joreño, ucugi isoi, naimie emodomo ana billana ciode.

¹⁷ Ie facaise monamona Jusiñamui llote:

—Bimie cue eo isiruiga Jito. Naimieri iobidicue.

4

Jesúna Taife ramo faia rafue
(Mr 1.12-13; Lc 4.1-13)

¹ Naie facaise nainomo naimiena ramo Taife faillena, jofue iñenanomo Jusiñamui Joreño Jesúna uite.

² Cuarenta digarui Jesús guiñede. Naie facaise fuilla mei, guiñeno illamona, aimetaite.

³ Ie facaise Taife naimie dine bite. Jesús aimetaillana naimie uiñuamona llote:

—Jusiñamui Jitodiodena, naimiemo llono: “Ore Moo, cue guillesa, bie nofici llomenicono jaíta”.

⁴ Jesús uai ote:

—Dama ite. O lluana finoñeiticue. Jusiñamui facaina lloraíma micori iena jaie cueda: “Jiaie rafuedi llomenico guilla baifemo faite. Dama guillemo comecina facañeno; iadedi Jusiñamui lloga uaimo cai comeci facajamona, ie uaido cai jailla” cueda.

⁵ Ie mei Jerusalémo Jusiñamui jofo muidomo Taife Jesúna uite.

⁶ Raite:

—Jusiñamui Jitodiodena, eniruemo mai ana uai. David micori ona jaie cueda:

Ona eenollena, Jusiñamuidi ie jaenisaímo lloite.

Eniruemo o uaiñellena, o abi bofedaiñellena, ona feiñoitimaci

cueda. Naie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

⁷ Jesús uai ote:

—Dama ite. Ana uaiñeiticue. Ero, ie cominimo Moisés micori jaie cueda: “Cai Nama Jusiñamuina facaciñeno”. Naimie cuena raise eenuana jai uiñoiticue. Jamai ebena naimiena facaciñeiticue. O lluana finoñeiticue.

⁸ Ie mei a ite anedumo Taife naimiena uite, naie anedumona nana nairaiaina cioillena. Naie nairaiaí eo ebire eruaide.

⁹ Naimiemo llote:

—Nana bie nairai ai cue anamo birui illamona, cuena o sedaia, nana bie nairai ai omo iiticue. O cañici ifodo ana rainada, cuemo iobillacino o fecallena.

¹⁰ Jesús uai ote:

—Dama ite. Ona sedañeticue. Ie cominimo Moisés micori jaie cuela: “Cai Nama Jusiñamuina seda. Dama naimiemo iobillacinona feca”. Taife, mai cuemona oni jai.

¹¹ —Ie facaise naimiemono Taife jaide. Naimie jailla mei, Jusiñamui jaienisai Jesús ñine bitimaci. Naimiema ecallena bitimaci.

*Galileamo Jesús illa rafue
(Mr 1.14-15; Lc 4.14-15)*

¹² Naie facaise Juan Bautista micorina Herodes gaitajana naimie fidiano, Galilea railla eniruemo Nazaretmo Jesús jaide.

¹³ Nainomo rilla mei, Capernaumo jaide. Capernaum nairai jorai fuemo ite. Nainomo Zabolón railla eniruemo ite. Neftalí railla eniruemo jiaí ite.

¹⁴ Nainomo Jesús jailla jira, Isaías micori jaie cuela guai jai suide.

¹⁵ Naimie micori naie cominina jaie cuela:

Bie eniruemo diga nairai ite.

Zabolón ite. Neftalí ite.

Monailai fuemo nairai ite. Jordán ruicafebeimo nairai ite.

Galileamo nairai jiaí ite. Nainomo judíuñedino jai itimaci.

¹⁶ Jeacino anamo naimaci illamona, naga naie eniruemo ite comini jiti redinomo itimaci isoidimaci

Jusiñamuina uññoño fiadaicana jaidimaci; iadedi eo mare rafue birui caaitimaci.

Naie rafue naimaci comeciaina lligaiñoite. Naie rafuena uitimie bairenite cuela. Jusiñamuina naimaci uññoño jira, naimacina iese cuela. Jesús nainomo birui llofuia jira, mare rafuena jai cacadimaci.

¹⁷ Galileamo rilla mei, Jesús llocana jaide. Llofue:

—Jusiñamui ñibeimo illena, omoi jeacinona fañonocada, omoi comeciaina uaina meido. Ie cominina omoi jaillena birui jitaide.

*Ie llofueoicaiganona jaillena, Jesús ñi nagaamagamiema fetua rafue
(Mr 1.16-20; Lc 5.1-11)*

¹⁸ Jiairuido Galilea railla jorai fuemo Jesús macaritemo, menamiema ciode. Naga ie ama iaimaiaí. Damie Simón. Jiaici naimie mamecidi Pedro. Ie ama Andrés diga ite. Llojina fairaima iaimaiaí. Iese jaca naie iaimaiaí ñi jaidimaci.

¹⁹ Iaimaiaimo llote:

—Cue diga omico jaiocallena, cue diga mai bi. Cue llofueganona omico jaillena jitaicue. Lliciaina birui ocabitomico; iadedi cominina oitomico, cue ñibeimo naimaci illena.

²⁰ Iena cacajanona, ieconi iaimaiaí llojina fañonocada, naimie diga jaidimaci. Ie llofueganona jaillena, jaidimaci.

²¹ Lliai bai Jesús jaidemo, jaie menamiema ciode. Naga ie ama iaimaiaí. Damie Jacobo. Jiaimie Juan Iaimaiaí moodi Zebedeo. Naimie diga botemo itiaimaci. Llojina sigaidimaci. Jesús iaimaiaina uaidote, naimie llofueganona jaillena.

²² Ieconi iaimaiaí moona fañonocada, botemona ari billanona, Jesús diga jaidimaci.

*Jesús ailluena cominina llofuia rafue
(Lc 6.17-19)*

²³ Nana Galileamo Jesús jaide. Judíuai ofiracuaimo llofueuide. Naimie anamo comini illana Jusiñamui jitailla jira, Jesúsdi Jusiñamui díbeimo naimaci comeciái iuaina meiduana llofueite. Ie cominina naimaci illena llofueite. Naga isoide duicono duidinona jillotate.

²⁴ Iemona nana Siria railla enirue mo naimie mameci soride. Naie comini naga isoide duicono duidinona naimie dine atidimaci. Abi isiredinona atidimaci. Jananiai anamo illa cominina atidimaci. Naillidinona atidimaci. Niraidanidinona atidimaci. Nana naimacina jillotate.

²⁵ Ailluena comini naimiena racadimaci. Galileamona, Decápolimona, Jerusalémona, Judeamona, Jordán ruica díbeimona comini bitimaci.

5

*Anedumo naimie ia, Jesús lloga rafue
(Lc 6.20-23)*

¹⁻² Ailluena cominina Jesúsna racadimaci. Naimacina Jesús ciuanona, anedu muidomo jaide. Ie llofueoicaigano naimie díga jaidimaci. Nainomo ana raita, Jesús naimacimo llote:

–Omoína Jusiñamui ie cominina sedaacana rafuena ja llofueitícue. Naimie anamo naimaci illena llofueitícue.

³ Ero, Jusiñamui naimiena jitaidinona sedaite. Comeciaina facadimaci: “Naimie jitaillacinona daní finonidicái; ia naimie caina canuanona, iena finoitícai”. Naimie cominina naie isoidino illamona, naimie naimacina canoite. Iemona caimare iitimaci.

⁴ Jusiñamui sunaitinona sedaite. Ailluena comini jeacino finocana jaidimaci. Iena uñuamona, damierie sunaitimaci. Naimie cominina naie isoidino illamona, Jusiñamui naimaci comeciaina ocuñtotaite. Iemona caimare iitimaci.

⁵ Jusiñamui abina íedoñedinona sedaite. Naimie cominina naie isoidino illamona, Jusiñamui nana enirue naimacimo íite. Enirue mo cominina íco cue sedaia, íese íite. Iemona caimare iitimaci.

⁶ Jusiñamui naimie jitaillacino finodinona sedaite. Jusiñamui mare rafuena naimaci finuana canoite. Iemona caimare iitimaci.

⁷ Jusiñamui cominina duenaitinona sedaite. Naimacina naimie duenaillamona, Jusiñamui naimacina íco duere finoñeite. Iemona caimare iitimaci.

⁸ Jusiñamui jeanide comecidinona sedaite. Naimie cominina naie isoidino illamona, naimie díga jaca iitimaci. Iemona caimare iitimaci.

⁹ Jusiñamui naimie díga uri ítinona sedaite. Naimie cominina naie isoidino illamona, jiaie cominina uri ítataitimaci. Naie isoidino naimie cominina jaca mamecirenítimaci. Iemona caimare iitimaci.

¹⁰ Jusiñamui jitaillacinona finuamona, damierie duere sefuitimaci. Jusiñamui naie isoidinona sedaite. Naimie cominina naimaci illamona, naimie sedajanomo jaca jainaiatimaci. Iemona caimare iitimaci.

¹¹ Cuemo omoi duía, duere sefuitomoi. Jiaie comini omoína jeare ñaitimaci. Omoína duere finoitimaci. Omoi joreñona tainona lloitimaci. Duere sefuitomoi; íadedi Jusiñamui omoína caimare ítaite.

¹² Omoi ísoi omoi jaiagaimona Jusiñamui facaina lloraini micoriai jaie duere sefuidimaci. Iena omoi uñuamona, monamo Jusiñamui mona ailluena íbana íco omoi feiñua jira, birui omoi duere sefuia, íocire omoi jai.

*Jesús comini illa rafue
(Mr 9.50; Lc 14.34-35)*

¹³ Jesús llote:

—Jusiñamui ie cominina sedaacalle rafue nia llofueiticue. Llicisi rifaia, jai maraiñede. Iena rifaiñellena, llicisimo sal joneticai. Sal isoidomoi. Jusiñamui jitailla isoi omoi illamona, jiaie comini maraiñede rafuena ero finoñedimaci. Sal ie caimano jai iñenia, ¿niese dane nibaiamona caimarenite? Jai maraiñede. Jitaiñena jira, iena oni faiga. Ie isoide. Jusiñamui jitailla isoi omoi iñenia, naimie omoina duere finoite.

¹⁴ 'Cuemo omoi duilla jira, jiaie cominina Jusiñamuina omoi uiñotajamona, lligaiñora isoidomoi. Anedumo ite nairai jaca bairede. Ie illanona jaca uiñoticaí. Jusiñamui jitailla isoi omoi illamona, jiaie comini naimiēna uiñoitimaci.

¹⁵ Lamparín unia mei, cirigai anamo buna rainañega. Jaca ie rainarafomo rainaca, nana jofo jeraina lligaiñollena.

¹⁶ Ie isoide. Cue rafuena jamaiñeno; iadedi omoi marena illamona, cominina Jusiñamuina uiñota. Omoi marena illamona, comini omoi mare finoca rafuena uiñoitimaci. Iemona: “Juiñamui maremiēna” raitimaci.

Jesúdi Moisés micorina llofuiā rafue

¹⁷ Jesús llote:

—Jusiñamui ie cominina sedaacalle rafue nia llofueiticue. Iena cue llofuiā jira, omoimona damierie comecina facade: “Bimie Moisés micori lloga rafuedo jaiñede”. Ero: “Moisés micori llogacinuai maraiñede” raiñedicue. “Jusiñamui facaina lloraini micoriai jaiie llogacinuai maraiñede” jai raiñedicue; iadedi omoina naie llogacinaina raise uiñotaacadie.

¹⁸ Biemo omoi comeciaina faca. Mona, enirue diga, nia ia, nana naie llogacinuai jaca suite.

¹⁹ Omoi einamací raitimaci: “Dajerie llogacino jiaie llogacino baifemo faite”. Cue raiticue: Naga llogacino omoi iñofñenia, naga omoi llofueñenia, nana Jusiñamui jitaillacinona finoñedomoi.

²⁰ Ero, Jusiñamui jitailla rafuedo judíuai illaicomini baifemo omoi jaiñenia, Jusiñamui sedajanomo jaca iñeitomoi. Naimaci naie jaiie llogacinuai uiñoitimaci; iadedi naimaci comeciā Jusiñamui dibeimo iñedimaci.

*Jusúdi iciriñena llofuiā rafue
(Lc 12.57-59)*

²¹ Jesús llote:

—Omoi llofuerainimona bie jai cacadomoi. Moisés micori omoi jaiagaimo llote: “Comena meineño. Comena bu meinea, jeacino jai finode. Naimie fiodaillena juez llua”.

²² Naie llogacino jai jaicabidomoi. Omoimo birui jiaie rafue lloiticue. Jaiimie diga bu iciria, jeacino jai finode. Naimie duere sefuillena, juez dine naimie uiga. Jaiimiena bu jeare ñaia, jeacino jai finode. Naimie duere sefuillena, illaicomini dine naimie uiga. Jaiimiena bu faidoia, jeacino jai finode. Jusiñamui naimiēna duere finoite. Iraimo jaite.

²³⁻²⁴ Jerusalémo Jusiñamui jofomo omoi jeacino facaina naimiemo ra fecalena omoi jaia, omoi comini diga uri nano i. Jaiimie omoi diga icirillana omoi uibiñoia, omoi ra fañonocaida, naimie dine nano mai jai. Naie rafue raise finollena, naimie dine jai. Ie mei Jusiñamuimo omoi rana feca.

25 'Omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina oretaitaie.

26 Nana raise ibañenia, juez llua isoi, jino jaiñeitomoi. Iese omoimo suiñellena, jiaimie diga rafuena comuitañeno. Jeacino finoñellena, jiaimie diga iciriñeno.

Jesúdi iima ie añede riño diga illa llua rafue

27 Jesús llote:

—Omoi llofuerainimona bie jai cacadomoi. Moisés micori jaiie llote: “Omoi añede riñoniai diga iñeno. Omoi iniñede iñiaai diga iñeno”. “Iena bu finoia, jeacino jai finode” raitomoi.

28 Jiaie rafue birui lloiticue. Ie añede riñomo eruaillamona naiñaiñona bu nicidoia, naiñaiño diga jamai iniacananona naimie comeci facajamona, jeacino jai finode. Naiñaiño diga iñede; ia naiñaiño diga jamai iniacananona naimie comeci facajamona, jeacino jai finode.

29-30 Biena ñaiticue. Nie isoide rafue omoina jeacino finotaia, iemo eruaiñeno. Iena llinoñeno. Iemo comecina facañeno. Omoi ciua rana jira, omoi jitaillamona jeacino finodomoi. Rana omoi jetaja jira, omoi jitaillamona jeacino finodomoi. Omoi abina omoi namatañenia, omoi uisina juicono. Omoi onolli jaita. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iramo omoi jaiñellena, jeacino finoñeno.

*Jesúdi iima ie aina dotaja llua rafue
(Mt 19.9; Mr 10.11-12; Lc 16.18)*

31 Jesús llote:

—Omoi llofuerainimona bie jai cacadomoi. Moisés micori jaiie llote: “Ie aina bu dotaacania, naiñaiño dotajacanabena fecaja”. Iedo jai jaicabidomoi. Iena bu finoia, omoimona mare.

32 Jiaie rafue birui lloiticue. Jiaimie diga naiñaiño iñenia, ie aina bu dotajia, marañede. Jiairuido jiaimie diga naiñaiño ia, nanodi ie ini muidona naiñaiño jeacino jai finode. Dotaca riñona ie aina illena bu ua mei, naimiedi jeacinona jai finode. Jeacino finoñellena, aina dotañeno.

Jesúdi Jusiñamui mameci jamai ebena llinoñenana llua rafue

33-35 Jesús llote:

—Omoi llofuerainimona bie jai cacadomoi. Moisés micori omoi jagaimo llote: “Taino lloñeno; ia Jusiñamuimo omoi lloga uaina fino”. Iedo jai jaicabidomoi. Omoi lloga uai omoi finollena jiaie comini uinollena, Jusiñamui mamecina llinotomoi. “Iena cai llinoia, cai lloga uaina cai finoñenia, Jusiñamui caina duere finoite” raitomoi. Jusiñamui mameci omoi linoñenia, omoi lloga uai omoi finoñenia, omoimona mare. “Jusiñamui caina duere finoite” raitomoi. Iemona monamo ñe ra mamecina jamai ebena llinotomoi. Eniruemo ite ra mamecina jamai ebena llinotomoi. Jerusalén railla nairai mamecina jamai ebena llinotomoi. Omoi ifogi mamecina jamai ebena jiai llinotomoi. Jusiñamui mamecina jamai ebena llinoñedomoi; ia jiaie ra mamecina jamai ebena llinotomoi. Ero, monamo ite ra mamecina omoi llinoia, Jusiñamui mamecina jiai llinotomoi, nainomo ie illano illa jira. Eniruemo ite ra mameci omoi llinoia, iena Jusiñamui finua jira, iena naimie sedaja jira, naimie mamecina jiai llinotomoi. Jerusalén railla nairai

mamecina omoi linoia, Jerusalén naimie nairaina jira, naimie mamecina jiai llinotomoi.

³⁶ Omoi jitirede ifotiraina usere omoi jaitanina jira, omoi userede ifotiraina jitiere omoi jaitanina jira, omoi ifogi mameci jiai linoñoeno. Dama Jusiñamui iena usere itataja jira, dama naimie iena jitiere itataja jira, ifotirai mamecina omoi linoia, Jusiñamui mamecina jiai llinotomoi.

³⁷ Ie jira Jusiñamui mameci jamai ebena linoñoeno. Jiaie ra mameci jamai ebena linoñoeno; iadedi nie isoide rafuena omoi finoia, omoi lloga uaina taino lloñoeno fino. Uanaicinona jaca lloño. Uanaicinona omoi lloñoenia, Taifemona omoi uaina otomoi.

Jesúdi iba oñenana llofuia rafue

(Lc 6.29-30)

³⁸ Jesús llote:

—Omoi llofuerainimona bie jai cacadomoi. Moisés micori jaie llote: “Fuirillamona o uisina jiaimie jino juiconoia, juez naimie uisina juiconuana llua. O isidona jiaimie oni tainoia, juez naimie isidona oni tainuana llua. Jiaimie ona duere finoia, o duere sefuilla isoi, juez naimiena duere finua”. Iedo birui jai jaicabidomoi;

³⁹ iadedi birui omoimo lloticue: Ibana oñoeno. Maraiñede rafue finodimiemona omoi abina riidoñoeno. Omoi cacaina naimie dutaia, naimie diga iciriñoeno. Enefebeimo omoi uieco dobaño, enefebei omoina naimie dutallesa. Naimie omoina duere finoia, ibana oñoeno.

⁴⁰ Omoi iniroi bairollena omoina bu llogidoia, juez nia omoimo lloñoenia, naimie jitailla iniroi baifemo naimiemo feca.

⁴¹ Daje kilómetro naimaci raruia omoina uillana illaicomini ocuia, iena uiño. Niba omoi comeci jitañede; ia naimacina canollena, iena mena kilómetros uiño. Naimaci ocuilla baifemo uiño.

⁴² Omoimo ite rana bu jicaia, iena caidiñoeno. Omoi rana bu jamai jicuano uia, abido atillena, iena caidiñoeno feca.

Jesúdi omoina gaiñenano isiruillena llua rafue

(Lc 6.27-28, 32-36)

⁴³ Jesús llote:

—Omoi llofuerainimona bie jai cacadomoi. Llotimaci: “Omoi cominina isirui; iadedi omoi nairaiñedinona enoi”. Iedo jai jaicabidomoi.

⁴⁴ Omoimo birui lloticue: Omoi nairaiñedinona isirui. Omoi gaiñenanona isirui. Omoina duere finodino facaina Jusiñamuimo jii. Naimaci comeciai iuai meiduana naimiemo jicano.

⁴⁵ Jusiñamui cominina omoi illamona, naimaci facaina jii. Ero, Jusiñamui nana cominina daje isoi canode. Nana cominina daje isoi isiruilla jira, naimiedi jitomana maraiñedinona lligaiñotade. Mareuidinona jiai lligaiñotade. Maraiñedino dine noci deitate. Mareuidino dine jiai noci deitate.

⁴⁶ Naimie comini omoi illamona, nana comini daje isoi isirui. Omoina isiruitinona omoi isirua, mare; iadedi omoina gaiñenanona omoi isiruiñenia, Jusiñamui omoina: “Mare” raiñeite. Maraiñede finoraini naimacina isiruitinona isiruitimaci. Nana cominina omoi isiruiñenia, maraiñede finoraini baifemo fañedomoi. Naimaci isoi itomoi.

⁴⁷ Dani omoi cominina omoi uaidoia, mare; ia omoina gaiñenanona omoi uaidoñenia, naimaci baifemo fañedomoi. Jusiñamuina inoñedino baifemo fañedomoi. Naimaci isoi itomoi.

⁴⁸ Iena omoi uiñuamona, omoi Moo Jusiñamui finua isoi, mare rafuena finocana omoi jai.

6

Jesúdi mare rafue fnuana llua rafue

¹ Jesús llote:

—Omoína nia llofueiticue. Jiaie comini iena cioillena, mare rafuena omoi finoiadedi, omoína: “Mareuidinodimaci” naimaci raillena, Jusiñamuimona ibana feiñoñeitomoi. Ie jira mare rafuena finoñeno, iena jiaie comini jamai cioillena. Iena ja ñaiticue.

² Dueredinomo rana omoi jamai fecaia, iena uainino feca. Jiaie cominimona iobillacinona omoi feiñollena, iena fecañeno. Ofiracomo maredinona abi caitadino isoi omoi iñeno. Naisomo maredino abi caitadino isoi iñeno. Iena comini cioillena, dueredinomo rana marefodo fecacabidimaci. Cominimona naimaci iobillacino birui jai feiñotimaci. Jusiñamuimona ico feiñoñeitimaci.

³ Dueredinomo rana omoi fecaia, jiaie cominimo iena lloñeno.

⁴ Iena bainino feca. Bainino iena omoi fecaia, Jusiñamui iena uiñote. Naimiemona ibana feiñoitomoi. Omoína: “Mare” raite.

*Jesús Jusiñamuimo jia rafue
(Lc 11.2-4)*

⁵ Jesús llote:

—Jusiñamuimo omoi jiiia, maredinona abi caitadino isoi omoi iñeno. Ofiracomo naimacina comini cioillena, marefodo jiidimaci. Jicabilla fa-caiseconi naisomo naimaci ia, naimacina comini cioillena, marefodo jiai jiidimaci. Naimacina: “Jusiñamuina eo sedadimaci” comini raillana jita-idimaci. Cominimona iobillacinona birui jai feiñotimaci.

⁶ Omoi jiacania, omoi jofomo fo jai. Nainomo Jusiñamuimo anado omoi jii. Iena Jusiñamui uiñuamona, omoi jicaca rafue naimiemona feiñoitomoi.

⁷ Jusiñamuimo omoi jiiia, naimiena ñnoñedino isoi jamaicinona ñiañeno. Naimaci comecina facadimaci: “Daje jiracinona diga icaiño cai jia jira, ja muidomo cai Moo caina raise cacaité”.

⁸ Naimaci isoi iñeno. Nia omoi jicañenia, naimie omoi jitaille rafuena uiñote.

⁹ Naimiemo omoi jiacania, iese jii:

Ore Moo, monamo itio.

Comini ori iobidesa.

¹⁰ O illaimana jira, nana cominina o anamo raire itata.

O jaienisaí o jitaillacinona finua isoi, cominina o jitaillacinona finota.

¹¹ Nagarui guille caimo itata.

¹² Caina jeare jiaíno finoia, iena caimona feilla isoi, cai jeacinona omona feilla jira, cai jeacinona oni dota.

¹³ Caimo ramo bu faia, caina cano, iena cai ñnoi raillano. Jeacinona finuamona caina jillota.

Iese omoi jii.

¹⁴ Omoína jiaie comini jeare finoia, iena omoi feitaia, omoi monamo ite Moo omoi jeacinona iena feitajanona, jiai oni dotaite;

¹⁵ Iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesús guiñenaruina llua rafue

¹⁶ Jesús llote:

—Omoína nia llofueiticue. Raitomoi: “Jusiñamuina eo raise cai sedajanona, birui cai guiñeiticai. Iemona naimie caina eo duenaite” raitomoi.

Iese Jusiñamuina omoi sedajia, sunaiñeno, mareuidinona abi caitadino isoi. Sunaitimaci. Naimaci uieco finobicabicide. Naimaci guiñenarui facaise illana comini uifollena, naimacina comini cioillena, iese itimaci. Naimacina: “Mare” comini raillamona, iobillacinona birui jai feiñotimaci. Jusiñamuimona ico iena feiñoñeitimaci.

¹⁷ Ero, naimaci isoi omoi iñeno; iadedi omoi guiñenarui ia, omoi abiai raise fino.

¹⁸ Iemei cominidi omoi guiñenarui illana uifñoñeitimaci. Naimacimona iobillacinona feiñoñeitomoi. Dama Jusiñamui iena uifñoite. Bainino omoi finoca rafue naimie uifñua jira, naimiemona iba feiñoitomoi.

Jesúdi Jusiñamuimo comecina facaja rafue

(Lc 12.33-34)

¹⁹ Jesús llote:

—Omoi jofomo ailluena rana eenocana uifño. Gaireco iena guicabite. Dajerie ra nemuide. Omoi jofomona jiaie comini iena fiacadimaci. Ailluena ra eenuamo omoi comeciaina facañeno;

²⁰ iadedi Jusiñamui dine monamo omoi ra illa isoi, iemo omoi comeciaina faca. Naimiemo comeciaina cai facajamona, nainomo cai iobillacino iite. Gairecuaimona, nemuillamona, firirainimona, iena nainomo faifñeitomoi.

²¹ Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

Jesús cai comecina llua rafue

(Lc 11.34-36)

²²⁻²³ Jesús llote:

—Cai uisi diga rana ciodicai. Cai uisi maraiñenia, rana raise cioñedicai. Ie isoide. Cai comeci maraiñenia, maraiñedicinona finocana jaidicai. Jusiñamuina uifñoñedicai. Ie rafuena jiai uifñoñedicai. Naimiena nabaiñedicai.

Jesús raruiaina llua rafue

(Lc 16.13)

²⁴ Jesús llote:

—Mena patrones diga daruido buna jaca maijinide. Mena diga bu maijiacania, damiena jiaimie baifemo gaiite. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiaí ollemo comecina omoi eo facaia, Jusiñamui jitaillacinomo comecina raise facañeitomoi.

Jesúdi Jusiñamui cai sedajana llua rafue

(Lc 12.22-31)

²⁵ Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. Jusiñamui omoína itataja muidona, guille omoimo iite. Naimie omoi abi finua muidona, iniroidi omoimo iite.

²⁶ Silliñiaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille iite. Naimaci baifemo omoi faia jira, naimie omoína canoite.

²⁷ Omoimona, ¿bu ie comeci jarire facajamona a sairite? Iese jaca buna a sairine. Dama Jusiñamui omoína a sairitarede.

²⁸ ¿Bue ñellena iniroimo jarire comecina facadomoi? Safiamo omoi comecina faca. ¿Niese sicodimaci? Maijiñedimaci. Iniroina tiforiñedimaci;

²⁹ iadedi Salomón micori naimaci isoi jaie iñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide.

³⁰ Jusiñamui safiana ebiretacabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ino.

³¹ Omoi comeci jarire finoñeno. “¿Buena guiticaí? ¿Buena jítaiticaí?” raiñeno. Iemo comeciaina eo facañeno.

³² Jusiñamuina inoñedino iemo comecina facacabidimaci. Nana omoi jitaillacinona omoi Moodi uñña jira, naimaci isoi iñeno.

³³ Jusiñamui anamo raise omoi i. Naimie jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoimo iite. Iniroi omoimo iite.

³⁴ Jusiñamui omoi birui jitailla ra omoimo iite. Iena uññuamona, jiairuido sulle rafuemo jarire comecina facañeno. Ico omoi jitailla ra omoimo jiai iite.

7

Jesúdi jiaie cominina mameriñenana llua rafue (Lc 6.37-38, 41-42)

¹ Jesús llote:

—Omoína nia llofueiacadicue. Jiaie cominina mameriñeno. Jiaie cominina omoi mameria, omoimo ite maraiñede rafue facaina Jusiñamui omoína duere finoite.

² Jiaie cominina omoi mamerilla diese Jusiñamui omoína duere finoite.

³ Omoi ecimo itimiemo janore maraiñedicino illana omoi uññoia, iemo comecina facañeno; iadedi omoimo ailluena ite maraiñedicinomo nano omoi comecina faca.

⁴ Omoimo maraiñedicino illamona, ¿niese omoi ecimo itimiema mamerit-omoi?

⁵ Omoimo ite maraiñedicinomo omoi comecina facaacaiñena jira, maredinona abi caitadinodomoí. Omoi comeciaina nano raise fino. Iemei omoi ecimo itimiema canorenitomoí. Naimie comecina raise canorenitomoí.

⁶ 'Ero, eo mare rana omoi jiconiaimo fecañeno. Eo raifide rana omoi chanchuaimo fecañeno. Naimacimo omoi fecaiadedi, iena feiñoñeitimaci. Omoína gaiñenamona, jiconiaí omoína ainitimaci. Chanchuai iena jamaillamona, iena saítaitimaci. Ie isoide. Damierie Jusiñamui uaina uaitacabitimaci. Iena naimaci jaca feiñoñena jira, naie rafue naimacimo llocabíñeno. Naimacimo omoi llocabia, omoína duere finoítimaci. Omoi rafuena jamaitimaci.

Jesúdi cai jitailla ra jicaja llua rafue (Lc 6.31; 11.9-13)

⁷⁻⁸ Jesús llote:

—Daje ra omoi faifia, iena jenodomoí. Raise jenoia, iena baitomoi. Damiena omoi jenoia, naimie illanomo jaidomoi. Nainomo naimiena baillamona, omoína feiñoite. Ie isoide. Buena omoi jitaia, Jusiñamuimo jica. Iena omoi jicaja jira, iena naimie cacajamona, omoimo iite.

⁹ Ero, omoimona naimiemo llomeniconna ie moomo ie jito jicaia, noficina fecañede.

¹⁰ Lliciaína jicaia, jaiona fecañede.

¹¹ Jeacina finocabidomoi; iadedi mare ra omoi uruiaimo fecacabillana uiñotomoi. Cai Moo Jusiñamuidi jaca mareuidimie. Cai baifemo naimie faite. Ie muidona naimiemo jicanotinomo mare rana fecaite.

¹² Jusiñamui jitaillacinona omoi finuamona, jiaie cominina marena fino. Jiaie comini omoina finuana omoi jitailla isoi, naimacina fino. Naimaci omoina marena finuana omoi jitaia, naimacina marena fino. Naimaci omoina maraiñeno finuana omoi jitaia, naimacina ie isoi maraiñeno fino. Moisés micori ie isoidicinona jiaie llofue. Jusiñamui facaina lloraini micoriai ie isoidicinona jiaie jiai llofuetimaci.

Jesúdi Jusiñamui dine rille llua rafue

(Lc 13.24)

¹³⁻¹⁴ Jesús llote:

—Jusiñamui dine omoi rillena, janorede naisodo omoi jalla isoi isoilla. Naisomo ite nasedi janorede isoide. Naimie dine naie rilla jira, naiedo omoi jai. Nainomo jaidino jaca iitimaci. Naimie dine rillena eo sefuirena jira, janore comini naiedo jaidimaci. Jiaie naiso ite. Naie naisodi aillue. Naie naisomo ite nasedi jiai aillue. Naiedo jaidino faifitimaci. Jusiñamui dine riñeitimaci. Sefuinina jira, ailluena comini naiedo jai jaidimaci.

Jesúdi abi caitadinomona abi rairuillana llua rafue

(Lc 6.43-44)

¹⁵ Jesús llote:

—Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoi raise jaiñellena, omoina jifueiacadimaci. Naimaci llofuiaicainodo omoi jai, Jusiñamui rafuedo raise jaiñeitomoi.

¹⁶ Naimaci lloga rafuemona naimaci Jusiñamui llorainiñenana uiñoitomoi. Ero, eecuaimona uvas railla riarra oñega. Eecuaimona higos railla riarra jiai oñega.

¹⁷ Mare riarmona mare llisilla comuide. Maraiñede riarmona maraiñede llisilla comuide.

¹⁸ Mare riarmona maraiñede llisilla comuiñede. Maraiñede riarmona mare llisilla comuiñede.

¹⁹ Mare llisilla comuitañena jira, naga maraiñede riarra jaitaca, iena jobailena.

²⁰ Ie isoide. Naimaci finoca rafuemona nie isoide lloraini naimacina uiñoitomoi. Jusiñamui llorainidena uiñoitomoi. Jusiñamui lloraiñedinodena uiñoitomoi. Naimaci maraiñena jira, Jusiñamui naimacina duere finoite.

Jesúdi ie Moo ie comini sedajanomo ille llua rafue

(Lc 13.25-27)

²¹ Jesús llote:

—Naga cuemo: “Odi cue Namadio” raitimiedi Jusiñamui ie cominina sedajanomo iñeite; iadedi dama cue Moo jitailla rafue finodimiedi nainomo iite.

²² Cominimo juez isoi Jusiñamui ico llua facaiseconi, diga cominidi cuemo lloitimaci: “Nama, caina o oretatio cai raillamona, o rafuena llocabitica. O uaido jananiaina oni oredicai. O uai diga siño rafuena finodica” lloitimaci.

²³ Uai oiticue: “Omoina uiñoñedicue. Cue comiñedomoi. Jeacino omoi comecimo nia illa jira, cuemona oni omoi jai. Cue Moo ie comini sedajanomo jaca iñeitomoi”.

Jesúdi naimiema #nuana ñaia rafue

(Lc 6.47-49; Mr 1.22)

²⁴ Jesús llote:

—Cue lluana cacadomoi; iadedi omoimona nana ñnoñedomoi. Cue lluana ñnotimiedi abi uiñotimie. Jofona raise finodimie isoide. Jofona raise finodimiedi ie jofona finodemo, jofona goiñellena, nofici illa ñinori eo ana raite.

²⁵ Noci deidemo, eo jinuidemo, jofomo ille toia, aifi bitemo, jofa raise finua jira, jofa goiñede. Iena faifiñede. Ie isoide. Cue lluana ñnotimie faifiñeite.

²⁶ Cue lluana ñnoñedimiedi abi uiñoñedimie. Jofona raise finoñedimie isoide. Jofona raise finoñedimiedi ie jofona finodemo, conillie emodomo iena finode. Ana raifñede.

²⁷ Noci deidemo, eo jinuidemo, jofomo ille toia, aifi bitemo, jofa goillamona, jai eo judaisite. Iena faifide. Ie isoide. Cue lluana ñnoñedimie faifite —llote.

²⁸⁻²⁹ Moisés micori rafue uiñoraini isoi naimie llofueñena jira, illaimamo ite uai itimie isoi naimie llofuia jira, nainomo ite cominidi naimie lluari rajjicaidimaci.

8

Jesúdi efonaitimiena jillotaja rafue (Mr 1.40-45; Lc 5.12-16)

¹ Naimie llofuia mei, anedumona Jesús ie llofueicoaigano diga ana bite. Ailluena comini naimiena racadimaci.

² Efonaitimie naimie ñine billanona, naimiena raise uaiduamona, caifiñici ifodo ana rañadate. Raite:

—Maestro, o jitaialedi, cuena jillotaredio.

³ Jesús ie onolli naimiemo oni ññuitajanona, naimiena jetade. Raite:

—Ona jillotaiacadicue. Mai o jillo. —Iecon naimie jillode.

⁴ Jesús naimiemo llote:

—O jilluana bummo lloñeno; iadedi Jerusalémo, Jusiñamui jofomo, Jusiñamui diga ñairaima ñine mai jai. O jilluana comini raise uiñollena, naimiemo o abina acatajai. Moisés micori jaiie lloga rana Jusiñamuimo fecá. —Iemei Jesús oni jaide.

Jesúdi capitán mullaimana jillotaja rafue (Lc 7.1-10)

⁵ Capernaum railla nairaimo Jesús ria, capitán raillamie naimie ñine bite. Naie capitán Roma railla nairai imie. Judíuñedimie. Billanona, duere llote:

⁶ —Maestro, cuena cano. Cue jofomo cue mullaima ite. Ie abina nirañanide. Naimie abi eo isirede. Naimiena jillota.

⁷ Jesús uai ote:

—Naimie ñine jaiticue, naimiena cue jilloitallena.

⁸ Naie capitán ñane llote:

—Jaiñeno. Jamai bue isoidicue. Iemo, ¿ñiese cue jofomo biitio? O uaido bene lluanona cue mullaima jilloite.

⁹ Jaiie illaicomini anamo iticue. Naimaci lloga uaina ñnoticue. Cue anamo jaiie soldaduai illanona, cue uaina ñnotimaci. Cue anamo cue mullaima illa jira, naimiedi cue uaina ñnote. O anamo naie ñuico illa jira, o uaina o lloia, cue mullaima jilloite.

¹⁰ Iena cacajanona, Jesús rajjicaide. Naimie diga jaidinomo llote:

—Bie isoi cue uaina ñnotimiena jaca baiñedicue. Cai judíuai cominimona biesedimiena jaca iñede.

¹¹ Ero, Jusiñamui ie cominina sedajanomo naimaci illena, diga judíuaiñedino cue lua uaina ñnoitimaci. Naga nairaiñaimona ñnoitimaci. Jusiñamui cominina Abraham micori, Isaac micori, Jacob micori illamona, naimaci diga Jusiñamui ie cominina sedajanomo bie judíuaiñedino iitimaci. Nainomo caimare nabaitimaci.

¹² Ailluena judíuaiñedino ñnoitimaci. Jusiñamui ie cominina sedajanomo duillanodi omoi judíuai. Naimiena omoi ñnoñena jira, omoína oni dotaite. Dotaja mei, eo duere sefuillamona eitomoi.

¹³ Capitámo Jesús lloste:

—Mai jai. Cue uai siñonana o ñnua jira, o jitailla rafue omo jai suide. —Ieconí naimie mullaíma jillode.

Jesús Pedro jifaiña jillotaja rafue
(Mr 1.29-31; Lc 4.38-39)

¹⁴ Oni jaillanona, Pedro jofomo Jesús ridemo, Pedro jifaiño duillana ciode. Naiñaiño abi cuaride.

¹⁵ Naiñaiño dine jaillanona, naiñaiña jetade. Jetajamona ieconí naiñaiño jillode. Abi cuariñede. Naiñaiño naidacaillanona, guille finuanona, ie jofomo itinona ecade.

Jesúdi ailluena duidinona jillotaja rafue
(Mr 1.32-34; Lc 4.40-41)

¹⁶ Naie naiona naimie dine comini ailluena jananiai anamo itinona atidimaci. Ie uaido naimiedi jananiaína oni oretate. Nana atica duidinona jiai jillotate.

¹⁷ Naimacina Jesús jillotajamona, Isaías micori jaiie ciegafuiai iese jai suide. Naimie micori jaiie cuela: “Caina jilloitajanona, cai duicono oni oretate”.

Jesús ie llofuegamiena damie jaillana ie rafue
(Lc 9.57-62)

¹⁸ Ailluena comini naimie ecimo illana Jesús ciuanona, ie llofueoicaiganomo ruica dine jaillana lloste.

¹⁹ Ieconí Moisés micori rafue llofueraíma naimie dine billanona, lloste:

—Maestro, o jaillinomo o diga jaiacadícue. O llofuegamiena jaiacadícue.

²⁰ Jesús uai ote:

—Janorede ocainaiídi joforedimaci. Silliñai jillainiáredimaci; iadedi jofonidícue. Monamona billanona, imana jaidícue; iadedi buenidícue. Jofonidícue. Cue diga o jaiacania, bue isoidena cuemona oñeitío. Iemo o comequina raise faca.

²¹ Ie facaise jiaie llofuegamie Jesúmo lloste:

—O diga jaitícue; ia cue moo nia fioidañena jira, o diga nia jaiñeitícue.

²² Jesús naimie uai ote:

—Cue diga idai mai bi. Cuena ñnoñedínodi o moona canoredimaci. Naimie fioidaia, naimiena naimaci raiñe. Cue rafue jiaie rafue baiñefemo faite. Cue diga mai bi.

Jesúdi joraina llícaitaja rafue
(Mr 4.35-41; Lc 8.22-25)

²³ Naie llofuegamie diga Jesús ñaia mei, ruica dine jaillana, botemo jaiide. Ie llofueoicaigano jiai jaidimaci.

²⁴ Botemo jailla mei, Jesús inide. Bai jorai motomo jaidimacimo, eo riire aifi billamona, joraidi eo bagode. Baguamona botemo jinui a uaide. Bote oruiacana jira,

²⁵ Jaciruillamona, Jesúsna casitatimaci. Raitimaci:

—Maestro, caina cano. Jai buisaidicai. Jai corobaisaidicai.

²⁶ Jesús uai ote:

—¿Bue ñellena jacinaitomoi? Cuen a raise ñnoñedomoi. Jacinaiñeno.

Iemei Jesús naidacaillano, aifina lletade. Joraina jiai ññcaitade. Ieconí ññcaide. Bagoñeoi.

²⁷ Naimie llofueoicaigano iemona rajicaidimaci. Iemona raitimaci:

—Bimiedi, ¿nie isoidimie? Aifi naimie uaina ñnote. Jorai naimie uaina jiai ñnote.

Bai jaillanona, ruica ñine ridimaci.

Jesúdi Gadara railla eniruemo illa rafue

(Mr 5.1-20; Lc 8.26-39)

²⁸ Ruica ñine naimaci ridemo, Gadara railla eniruemo sijidimaci. Ieconí menamie Jesús ñine bitiaimaiai. Jananiai anamo ite iaimaiai. Comini raioillanomo noñie moto ifuaimona bitiaimaiai. Nai iaimaiai eo ñirena jira, jaca bu nainomo jainide.

²⁹ Jesúna iaimaiai ciua facaise jananiai iaimaiaina cuirioitate:

—Jusiñamui Jitodio. ¿Niese cocona ñbaiacadio? Coco duere sefuelle facaise ñia ññede; iadedi birui cocona duere finuaibidio —cuirioidiaimaiai.

³⁰ Naie bai iaire ailluena chanchuai guillano itimaci.

³¹ Jananiai Jesúmo duere llotimaci:

—Oni caina o oretajanona, chanchuai abimo caina oreta.

³² Jesús uai ote:

—Mai jai.

Ieconí nai iaimaiaimona jananiai oni jaillanona, chanchuai abimo jaide. Iemona iconiaido chanchuai joraimo aisicana jaillanona, corobaiside.

³³ Iena ciuanona, chanchuai sedaraini imaci nairai ñine aisicana jaidimaci. Nana naie rafuena llotimaci. Jaive jananiai anamo illa iaimaiai rafuena llotimaci.

³⁴ Te jira ailluena comini Jesús ñine bitimaci. Naimiena ciuano, naimiemo duere llotimaci, naimaci illanomona naimie jaillena. Naimaci jitailla jira, Jesús oni jaide.

9

Jesús tsitaitimiena jillotaja rafue

(Mr 2.1-12; Lc 5.17-26)

¹ Botemo ie llofueoicaigano diga Jesús jaillano, ruica ñine abido jaide. Capernaumo ie illanomo ride.

² Nainomo rilla meí, naimie ñine comini ie biiramo biide tsitaitimiena atide. Naimiena atidinodi Jesús naimiena jillotajana ñnote. Iena Jesús uiñuanona, tsitaitimiemo llote:

—Moo, o começina ocuiño. O jeacino cue feitaja jira, iena jai oni dotadicue. Ie facai ibana jai oñeiticue.

³ Jesús ñine ofidinomona dajerie Moisés micori llogacinona llofueraini itimaci. Jesús lluaña naimaci cacajano, Moisés micori llogacinona llofueraini começina facadimaci: “Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”.

⁴ Naimaci começaina facajacinona Jesús uiñuamona, Jesús ñinena jicanote:

—¿Bue ñellena omoi começina jeare facadomoi?

⁵ Bimiemo: “O jeacinona jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona macari” cue lloia, cue uai siñonana uiñoitomoi.

⁶ Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uifollena, tisitaitimie mo lloiticue: “Mai naidacai. O biira ferianona, o jofomo mai jai”.

⁷ Iese naimie raillamona, tisitaitimie jillode. Naidacaida, ie jofomo jaide.

⁸ Comini iena cuanona, jacinaitimaci. Bimie mo ie uaina Jusiñamui fecajana naimaci uifuanona, Jusiñamuimo iobillacinona fecadimaci.

Jesúdi Mateona fetua rafue
(Mr 2.13-17; Lc 5.27-32)

⁹ Jesús bai macaritemo, cuena ucubena oranomo cue raillana ciode. Ma-teodicue. Gobierno ucube oraimadicue. Jesús cuemo llote:

—Cue llofuegamiena o jaillena, cue diga bi.

Naidacaida, naimie diga jaidicue.

¹⁰ Nailli cue jofomo Jesús ie llofueoicaigano diga guite. Diga gobierno ucube oraini jiai guisaibitimaci. Diga Moisés micori llogacinodo jaiñedino jiai guisaibitimaci.

¹¹ Nainomo fariseuai comini jamai bitimaci. Moisés micori llogacinodo eo jaidimaci. Jesúna cuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Moisés micori llogacinodo ucube oraini raise jaiñenamona, naie isoidino diga, fariseuai comini nabairiñena jira, iese jicanotimaci.

¹² Iena cacajano, Jesús llote:

—Ecairedinodi médiconaj itaiñedimaci; ia duidinodi médiconaj itaidimaci. Ie isoide. Mareuidino cuena jitañedimaci; ia maraiñedino cuena jitañedimaci.

¹³ Jusiñamui facaina lloraima micori jaie cuega rafuemo omoi comeciaina faca: “Jusiñamui llote: ‘Rana cuemo omoi fecajana jitañedimaci; ia cominina omoi dueruillana jiai jitañedimaci’ llote”. Cominina cue dueruilla jira, Jusiñamui dibeimo naimaci illena, mareuidinona itatajaibitidicue; iadedi Jusiñamui dibeimo naimaci illena, maraiñedinona itatajaibitidicue. Omoi mona maraiñedino diga nabairitidicue; ia naimacina uaibitidicue.

Jesús dine Juan Bautista llofueoicaigano billa rafue
(Mr 2.18-22; Lc 5.33-39)

¹⁴ Naie facaise Juan Bautista llofueoicaiganodi Jesús dine bite. Naimie mo llote:

—Cai einamací llua isoi, Jusiñamuina cai raise iobitallena, guiñenaruillaí illa facaiseconi guiñedicaí. Cai jeacino facaina sunaicabiticaí. Fariseuai comini jiai guiñedimaci; iadedi o llofueoicaigano guitimaci. Cai einamací llogacinodo jaidicaí. ¿Bue ñellena o llofueoicaigano iedo jaiñedimaci?

¹⁵ Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiaí sunaiñedimaci. Iobillamona guitimaci. Jiairuido jai aireiacade conirue naimaci diga ifenia, naimaci comeci sunaillamona, naimaci jitaia, guiñenaruillaídi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guitabitimaci.

¹⁶ Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi, jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite.

¹⁷ Jacagomona finoca bolsa como finoca vino joneñega. Jonegadena, marañena jira, sirillamona, igoi raire cuararite. Vino faifite. Igoi jiai faifite.

Como finoca vino comogomo jonelle. Iemei iena faifñeite. Ie isoide. Omoi einamací rafue ifomo jiaie rafue birui ite. Iena omoimo llocabiticue. Iedo jaidicai –llote.

Jesúdi mena duide riñona jillotaja rafue

(Mr 5.21-43; Lc 8.40-56)

18 Juan Bautista llofueoicaigano diga Jesús llotemo, jiaimie naimie dine bite. Naimiedi judíuai ofiraco sedaraima. Jesúna duere jicanollena, caññici ifodo rainadacaida llote:

–Cue jisa como fodaite. O onolli naiñaiñomo o jonellesa, naiñaiño jilloillesa, cue jofomo cue diga mai bi.

19 Iena cacajano, Jesús naimie diga jaide. Ie llofueoicaigano jiaie jaidimaci.

20 Bai jaillanona, duidiñaiño jinafona jaide. Naimie iniroina jetallena, naimie dine bite. Ie jeraimona doce años jaca diaide. Billanona naimie iniroina jetade.

21 “Naimie iniroi cue jetajamona jilloiticue” comecina facajamona, naiñaiño naimie iniroina jetade.

22 Ieconí Jesús dobaidacaida, abido erodatemo, naiñaiñona ciode. Raite:

–Ñoo, o comecina ocuiño. Cuen a ñnua jira, jai jillodio.

Ieconí naiñaiño jillode.

23 Ofiraco sedaraima jofomo Jesús rillano, naie jofo nama jisa jai fiodailla jira, comini merire fillana cacade. Ailluena failliñailana cacade.

24 Jesús dinena raite:

–Jofomona nana omoi jino jaillana jitaidicue. Cuemona biñaiño fiodañedesa. Jamai inide.

Iena cacajano, naiñaiño jai fodaite uñuamona, Jesúri jaisitimaci.

25 Comini jino oretaja mei, naiñaiño onollina naimie llinuano, fiodaillamona naiñaiño jillode. Jillua mei, naiñaiñodi naidacaide.

26 Naie rafue nana naie enirue itinomo llocana jaide.

Jesúdi uisínide iaímaiaina jillotaja rafue

27 Ofiraco sedaraima jofomona Jesús bai jaidemo, uisínide iaímaiaie naimie jinafona jaidiaímaiaie. Jesúna ado uaidotiaímaiaie:

–Cai illaíma David micorí jitodio. Jusíñamuimona o billa jira, cocona duenai.

28 Uai oñeno Jesús Capernaumo jaide. Naimie fo jailla mei, naimie dine bitiaímaiaie. Iaímaiaimo Jesús jicanote:

–¿Omicona cue jillotajana ñnotomico?

Fairiotiaímaiaie:

–Jii.

29 Iaímaiaie uisina Jesús jetajano raite:

–Cuen omico ñnua ñiese jilloitomico.

30 Ieconí iaímaiaie uisíñi ciode. Jesús naie rafuena llua eo janotade.

–Bumo lloñeno –llote;

31 iadedi iena llocana jaidiaímaiaie. Iemona Jesús mameci nana naie eniruemo itinomo soride.

Jesús ñañedimiena jillotaja rafue

32 Capernaumona Jesús bai jaidemo, naimie dine Janaba anamo illamiena jiaie comini atidimaci. Janaba anamo naimie illa jira, naimie ñañide.

33 Jesús Janabana oni orede. Oretaja mei, naie íma ñaite. Nainomo ite comini rajicaillanona raitimaci:

–Cai comini dine bie isoide íma jilluana jaca cioñedicaie.

³⁴ Ie jira fariseuai comini dinena raitimaci:

—Taife dibeimo Janaba illamona, Jesúdi Taife uaido Janabana oni orede — raitimaci.

Jesúdi cominina duenaila rafue

³⁵ Diga nairaiamo ie llofueoicaigano diga Jesús llocana jaide. Nainomo judíuai ofiracuaimo llofueuide. Naimie anamo comini illana Jusiñamui jitailla jira, Jesúdi Jusiñamui dibeimo naimaci comeciai uaina meiduaana llofueite. Ailluena duidinona jillotate. Naga isoide duicomona jillotate.

³⁶ Naimacina duenaite. Naimaci comeciai iticino oni duiñoitimie iñena jira, naimacina duenaite. Ailluena cominina ciode. Toica llaudaiai isoi ebe isoi jaidimaci. Naimaci comeciai ocuiñonidimaci. Jusiñamui naimacina sedaacana uiñoñedimaci.

³⁷ Naimacina duenailamona, ie llofueoicaiganomo llote:

—Illimo ailluena trigo ia, iena ollena, ailluena maijirainina jitailla. Ie isoide. Ailluena comini ite naimacimo Jusiñamui rafuena cai lllolena; iadedi naie rafuena lloraini eo iñedimaci.

³⁸ Ie rafue naimaci lllolena, ailluena cominina raire naimie oretallena Jusiñamuimo jicano.

10

Jesúdi ie doce llofueoicaiganona fetua rafue

(Mr 3.13-19; Lc 6.12-16)

¹ Ie doce llofueoicaiganona Jesús uaiduanona, naimacimo ie uai iñonocaide, jananiai anamona cominina jilloitallena. Duiconona oni oretallena, iena jiai iñonocaide.

² Ie llofueoicaiganodi iese mameciredimaci: Simón. Naimie mameci jiaicidi Pedro. Andrés. Naimiedi Simón ama. Jacobo. Juan. Iaimaiai Zebedeo jito iaimaiai.

³ Felipe. Bartolomé. Tomás. Cuenajiai uaidote. Mateodicue. Gobierno ucubena oraimadicue. Jiaie Jacobo. Naimiedi Alfeo jito. Tadeo.

⁴ Jiaie Simón. Naimiedi cananista comini facaisemo duide. Judas Iscariote micori. Naimiedi Jesúna gaitatate.

Jesúdi ie llofueoicaiganona oretaja rafue

(Mr 6.7-13; Lc 9.1-6)

⁵ Jesús ie llofueoicaiganona oni oretajanona, raite:

—Judíuaiñedino dine jaiñeno. Samaritano railla comini dine jaiñeno;

⁶ ia cai judíuai comini dine jai. Naimacimona ailluena comini Jusiñamui rafuena nia iñoñedimaci. Faificana nia jaidimaci.

⁷ Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie dibeimo omoi comeciai uaina meido”.

⁸ Duidinona jillota. Fiodaitinona jillota. Efonaitinona jillota. Jananiaina oni oreta. Cue uaina jamai omoi feiñua jira, cominina jilloitajana ibatañeno.

⁹ Ucubena uiñeno. Guille ifo meidollena, rana uiñeno.

¹⁰ Ailluena rana omoi uiñellena, bolsana uiñeno. Abi meidolle iniroina uiñeno. Meidolle zapatona uiñeno. Omoi abi riidollena, jiguidana uiñeno. Jiaie cominina omoi canua isoi, omoina naimaci canua. Naimacimona omoi jitailla rana omoi ono. Ie jira ailluena rana uiñeno.

¹¹ Nie nairaimo omoi ria, omoi rafuena jitaiddimiena jeno, naimie jofomo omoi illena. Naie jofomo omoi i, naie nairaimo omoi ille dinori.

¹² Naie jofomo omoi rillanona, naie cominina marena uaido.

13 Omoína naimaci raise feiñoia, naimaci uri illena, naimacimo marecinona llono; iadedi omoi rafuena naimaci jitaiñenia: “Jusiñamui omoína canoite” naimacimo lloñeno.

14 Omoína bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliaimo ite jearacuaina jaidino. Maraiñede rafuena naimaci finuana naimaci uiñollena, omoi eilliaina jaidino.

15 Omoímo uanaicínona lloticue. Omoína naimaci feiñoñenia, Jusiñamuidi naimacina duere finoite. Sodoma railla nairai jaie jeacínona eo finodimaci. Gomorra railla nairai jaie jeacínona eo finodimaci. Ie jira Jusiñamui naimacina jaie duere finode. Omoína comini birui feiñoñenia, Jusiñamuidi naimacina Sodoma nairai baifemo duere finoite. Gomorra nairai baifemo duere finoite.

Jesús duere sefuillifueña llua rafue

16 Jesús ie llofueoicaiganomo nia llote:

—Naimacina janallari fañellena, naimaci duere sefuiñellena, toica llaudaiaia raise sedajana jitaidimaci. Ie isoide. Eo maraiñede comini motomo omoína oretaiticue. Omoína duere finoacanitimaci. Raise sedajana jitaidomoi. Jaio fiodaiñellena, aiside. Naimiëna bu meineñellena, ie abina eenollena, jaio aiside. Ie isoi omoi abi uiñocana omoi jai. Ucugidi buena jeare finoñede. Ie isoi omoi illa. Jeacino finuamona eneno omoi i.

17 Abina rairui. Dajerie omoína llogidoitimaci. Omoína gaitaja mei, naimaci ofiracomo omoína faitimaci.

18 Cue rafue omoi llua muidona, omoína gaitajanona, illaicomini dine omoína uitimaci. Omoína llogidoitínomo cue rafuena lloitomoi. Naie illaicominimo iena jiai lloitomoi.

19 Naie illaicomini dine omoi ia, omoi riidollicinomo omoi comeciaina jarire facañeno. Naie facaise omoi ñaillicinona uiñoitomoi.

20 Dani omoi comeciái icinodo ñaifeitomoi; ia Jusiñamui Joreño uaido ñaitomoi.

21 Cuena ñnotomoi; ia ailluena cuena ñnoñeitimaci. Cuena omoi ñnua jira, omoína enoitimaci. Iemona dajerie ie amana meinetallena, naimiëna llogidoite. Dajerie moodi ie uruena meinetallena, naimiëna llogidoite. Dajerie uruiáidi naimaci moona, naimaci eina meinetallena, naimacina llogidoitimaci.

22 Cue muidona ailluena comini omoína enoitimaci; iadedi cue uaina fañonocaiñedimie cue Moo diga monamo ja muidomo jaca iite. Naimiëna jillotaiticue.

23 Cue rafue naimaci jitaiñenamona, omoína nie nairai duere finoia, dinomona cue rafuena llollena, jiaie nairaimo raire jai. Cue rafuena omoi llollena, diga judíuái illanuaimo nia jaitomoi. Nana naie comini nia ñnoñenia, Jusiñamui ñnena dane abido biiticue.

24 Ero, ie llofueraíma duere sefuiá, ie llofuegamie daje isoi duere sefuite. Ie eci illamie duere sefuiá, ie mullaíma daje isoi duere sefuite.

25 Ie isoide. Cue cominina omoi jaillamona, cue duere sefuiá, jiai duere sefuitomoi. Taife mameci jiaici llinuanona, “Beelzebúdio” jiaino cuena raitimaci. Iese cuena naimaci jeare ñaia jira, cue cominina omoi illa jira, omoína jiai jeare ñaitimaci.

Jesúdi jaciruiñeno llofuiá rafue (Lc 12.2-9)

26 Jesús nia llote:

—Cuenta #noñedino omoína jeare ñaitimaci; ia nana cue rafuena llocana omoí jailla jira, naimacina jaciruiñeno.

²⁷ Omoímo rafuena anado jai lloticue. Iena nana cominimo marefodo llono. Ado llono.

²⁸ Omoí abina meinedimaci; ia omoí joreñoa meinenidimaci. Omoína naimaci meinea, omoí joreño Jusiñamui dine jaite. Iena uñuamona, omoí meineiacadinona jaciruiñeno. Cue rafuedo omoí raise jaiñenia, Jusiñamuina jacirui. Naimiedi omoí abina, omoí joreño diga, iraimo dotarede.

²⁹ Omoína duere finoacadinona jaciruiñeno. Ero mena janorede sil-lina fecadomoína, eo janore ibaca; iadedi cai Moo Jusiñamui jitañenia, naimacimona daje fioidañede.

³⁰ Ero, niga ifotirai omoímo illana Jusiñamui uñnote.

³¹ Naimiedi omoína sedajana jai uñnote. Silliñiai baifemo Jusiñamui isiruigaomoi. Omoí duere finoacadinona jaciruiñeno. Jusiñamui jitañenia, omoímo jaca buena suiñeite.

Jesús naimiena janoñenana llofua rafue

(Lc 12.8-9)

³² Ie llofueoicaiganomo Jesús nia llote:

—Cue rafuena omoí lluamona, jaiño omoína duere finoitimaci. Cuenta birui omoí janoñenia, nana comini Jusiñamui uicomo ico ia, nainomo omoína janoñeiticue. “Cue cominidomoi” omoína raiticue.

³³ Cuenta birui omoí janoía, nana comini Jusiñamui uicomo ico ia, nainomo omoína janoíticue. “Cue cominiñedomoi” omoína raiticue.

Jesús muidona nana comini uri iñena rafue

(Lc 12.51-53; 14.26-27)

³⁴ Ie llofueoicaiganomo Jesús nia llote:

—Nana cominina uri itatallena eniruemo biñedicue. Cuenta #noñedinodi cuenta #notinona enoitimaci. Enoillamona cuenta #notinona duere finoitimaci.

³⁵ Cue lloga rafuena damierie inua muidona, ie moo illa díbeimo ie jito iñeite. Ie ei illa díbeimo naiñaiño jisa iñeite. Ie jifaiño illa díbeimo naiñaiño mio iñeite. Iese cominina uri itañedicue.

³⁶ Omoí comini coninina enoitomoi. Iemona duere sefuitomoi.

³⁷ Ero, ie moona cue baifemo bu isirua, ie eina cue baifemo bu isirua, cue jitailla ra naimie finoacaiñena jira, cuemo raise duiñede. Ie uruai cue baifemo bu isirua, cuemo raise duiñede.

³⁸ Cue facaina bu fioidacaiñenia, cuemo raise duiñede. Naimiedi cue comini naimiena lloiacañedicue.

³⁹ Cue facaina fioidacañedimie ja muidomo faifite. Cue diga jaca iñeite; iadedi cue facaina fioidaitimie monamo cue diga jaca iite.

Jesús Jusiñamuimona ibana feiñua llua rafue

(Mr 9.41)

⁴⁰ Jesús llote:

—Cue rafuena omoí llocana jaia, diga jofuemo riitomoi. Cue cominina omoí illamona, omoína feiñotino cuenta jai feiñotimaci. Omoína bu feiñoía, cuane jai feiñote. Cuenta feiñotimiedi cuenta oretatimiena jai feiñote.

⁴¹ Naimie cue comini illamona, damierie Jusiñamui facaina lloraimana feiñoitimaci. Jusiñamui facaina lloraimana bu feiñoía, Jusiñamuimona ibana feiñoite, naie lloraima Jusiñamuimona feiñua isoi. Cue jitaillacinona

finodinona bu feiñoia, naimaci Jusiñamuimona feiñua isoi, Jusiñamuimona ibana feiñoite.

⁴² Cue dibeimo itinona bu janore canoia, Jusiñamuimona ibana feiñoite. Naimacimo nibai jamai jinuina fecade; iadedi naimacina canuamona, Jusiñamuimona ibana feiñoite —lote. Iemei Jesús ie llofueoicaiganona, ie rafuena llollena, orede.

11

*Jesús dine Juan Bautista micori ie llofueoicaiganona oretaja rafue
(Lc 7.18-35)*

¹ Ie doce llofueoicaiganona Jesús oretaja mei, iairei ite comini illanuaimo naimiedi ie rafuena llocana jaide.

² Ie facaiseconi cárcelmo Juan Bautista micori Jesús finoca rafuena fidiano, iena raise uñollena, Jesús dine ie llofueoicaiganona orede.

³ Jesúmo llotimaci:

—Juan Bautistamona biticai. Jofue iñenanomo navui naimie ia, “Jusiñamuimona damie biite” naimie llofuecabite. Juan llofuegamiena o illana uñoiacadicaí. Imieñedi odena, jiaimie billemo nia ocuridicaí.

⁴ Jesús uai ote:

—Cue llwana cacadomoi. Cue finoca rafuena ciodomoi. Juan dine abido omoi jaillanona, iena naimiemo llono.

⁵ “Uisínidino jai ciodimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodailamona damierie jai jillodimaci. Dueredino mare rafuena jai cacadimaci” naimiemo llono.

⁶ Jiai llono: “Nibai nana cue rafuena raise cacaiñedio; ia cuena jaca nia ñnocana o jaia, caimare iitio”.

⁷ Juan llofueoicaigano abido jailla mei, naimie ecimo ailluena ite cominimo Jesús i Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoiñede. Nie isoidie rafue naimiemo ia, cue rafuena llocana jaide.

⁸ ¿Bue ñellena naimie dine jaidomoi? Mare iniroina jitadimiena cioñedomoi. Mare iniroina jitadinona omoi cioacaniadedi, llaicomini dine jaidomoi.

⁹ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira.

¹⁰ Malaquíás micori naimiena jaie cuega:

Jusiñamui raitie: “Ero, o uicodo cue rafuena llollena, damiena oretaiticue, comini comecina marecinona duiñollena”
cuega. Malaquíás Juan Bautistana cuete.

¹¹ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofuet; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioñede. Iemona naimie baifemo faitomoi.

¹² Juan llofuaia tainiamona ailluena comini cue rafuena ñnuamona, Jusiñamui dibeimo birui duere iacadimaci.

¹³ Nana Jusiñamui facaina lloraini micoriaidi cue billena jaie llotimaci. Moisés micori iena jiai jaie llote. Juan facaise naie llogacino jai suide.

¹⁴ Jusiñamui facaina lloiraïma jaie llote: “Bie rafue suille facaise Elías isoidimie biite”. Naimie rafuena ñnotomoidena, Juandi naimiena uiñotomoi.

¹⁵ Omoi jeforena jira, raise fueollena, cue llamo cacarei.

¹⁶ Jesús nia llofuate:

—Ero, omoïna ñaiticue. Jifanote uruiaï isoidomoi. Uruiaï jifanoiacania, naimaci nabaiñiaina uaiduanona, raitimaci:

¹⁷ “Omoi diga jifanoiacadicaï; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedicaï” raitimaci.

¹⁸ Ie isoidomoi. Juan jirorainide. Caimare guiñede; ia naimie diga nabairiñedomoi. Naimiena gaiñedomoi. Ie jira omoïmona dajerie naimiena raitimaci: “Janaba anamo naimie illamona, naimie uairico isoi ite” raitimaci.

¹⁹ Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cuenajai gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimedio”. Iese raitomoi; iadedi Jusiñamuina ñnotinodi cue finoca rafuena marenana uiñotimaci.

*Dajerie nairaï Jesúsna ñnoñena rafue
(Lc 10.13-15)*

²⁰ Ailluena comini Jesús dina nia ia, naimacimo ie navui jailla nairaïaina ñaite. Naimie siño finoca rafuena uiñotimaci; iadedi naimaci comeciaï iuai meidoñedimaci. Ie jira naimacina ñaite.

²¹ Llote:

—Omoïmona damierie Corazín railla illanomona bitomoi. Omoïmona damierie Betsaida railla illanomona bitomoi. Cue rafuena omoi ñnoñena jira, duere sefuitomoi. Omoi dine cue navui siño finoca rafuena Tiro railla nairaïmo jaie finodicuena, Sidón railla nairaïmo jaie finodicuena, naimaci comeciaï eo isinotailamona, naimaci comeciaï iuai meidotimaci. Naimaci comeciaï iuaina meiduana uiñotallena, ebinide ñiroina jitajanona, naimaci ifogiaïmo jusefona jonetimaci.

²² Jusiñamui uicomo nana comini ico ia, Tiro nairaï baifemo duere sefuitomoi. Sidón nairaï baifemo duere sefuitomoi.

²³ Omoïmona damierie Capernaum railla illanomona bitomoi. Birui abina ñedoïcadomoi; iadedi jairuido sunaitomoi. Omoi dine navui cue siño finoca rafuena Sodoma railla nairaïmo jaie finodicuena, naie nairaïdi birui niadedi nia ite. Omoi comeciaï iuai omoi meidoñenia, monamo cue Moo diga jaca iñeitomoi; iadedi naimie omoïna duere finollemona sunaitomoi.

²⁴ Jusiñamui uicomo nana comini ico ia, cue rafuena omoi ñnoñena jira, Sodoma railla nairaï baifemo duere sefuitomoi —llote.

*Jesús ie Moo diga ñaia rafue
(Lc 10.21-22)*

²⁵⁻²⁶ Ie facaiseconi Jesús ie Moo diga ñaianona raite:

—Ore Moo, oca mona Namadio. Oca enirue Namadio. Abina uiñotinona bie isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo feaacadicue. Mai.

²⁷ Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitailla diese omoïna naimiena uiñotadicue. Ie muidona naimiena uiñotomoi.

²⁸ Omoí jeacinomona omoí jillobillena, duere jaidomoi. Omoí comeciai marena urí illena, cue díbeimo mai omoí í.

²⁹ Cue llucino anamo omoí í. Cue ríinina jira, cuemona omoí fueo. Iemei omoí comeciai marena urí íite.

³⁰ Omoína cue canua jira, cue llucino anamo omoí iacanano ía, sefuinide. Omoína cue canolle jira, cue llucino finuana sefuinide.

12

Sábadoruimo Jesús llofueoicaigano maijia rafue

(Mr 2.23-28; Lc 6.1-5)

¹ Ie rafue lluamona, íe llofueoicaigano jai abído bitímaci. Ie facaiseconi sábadoruimo Jesús íe llofueoicaigano díga, trigo motodo joide naído jaide. Ie llofueoicaigano aimetailla jira, trigona tíjiano, golluano, guicana jaidímaci.

² Dajeríe fariseuái íena cíuano, llotímaci:

—Ero, o llofueoicaigano rairuica rana finosite. Moisés micorí rairuilla jira, sábadoruimo maijindicái; íadedí trigona naimací tíjiamona, camona jai májídímaci. Iese caí abímo jeacinona jai finodímaci.

³ Ie llofueoicaiganona ríiduano, Jesús uai ote:

—Cuemona jeacino finoñedímaci. David micorí jaie finoca rafuemo omoí comeciai raise facañedomoi. David micorí guille íñenia, naimíe aimetaía, íe nabaiñíai díga, Jusíñamuí jofomo fo jaide.

⁴ Jusíñamuimo fecaca llomeniconona uanona, guitímaci. Jamái bue ísoídino naie llomeniconona guillana Jusíñamuí rairuide. Daní Jusíñamuí díga ñairainí íena guiredímaci. Ie nabaiñíai díga David micorí íena guíte; ía Jusíñamuí naimacína duere finoñede.

⁵ Moisés micorí llogacínomo jiaí raise comeciána facañedomoi. Moisés micorí jaie llua ísoí, sábadoruimo Jusíñamuí jofomo Jusíñamuí díga ñairainí maijuídímaci. Jusíñamuína naimací sedallena, ocaína fatímaci. Íraina bonodímaci. Iese maijuídímaci; íadedí Jusíñamuimona jeacino finoñedímaci. Moisés micorí jaie cuegafuíaína raise cacaiñedomoi. Íena raise facañedomoi.

⁶ Omoímo nía lloítícue. Jusíñamuí jofomo finoca rafue baífemo faitícue.

⁷ Jusíñamuí facaina lloráima íena jaie cuega: “Cuemo rana omoí fecajana jítadícue; ía omoí jítaillamona, jiaíe comínina omoí duenaillacínodí rana cuemo fecajacino baífemo faíte”. Íena omoí uíñotomoidena, cue llofueoicaiganomo: “Maraiñedicinona finodomoi” lloñedomoi. Cuemona cue llofueoicaigano jeacino finoñedímaci.

⁸ Monamona billanona, íimana jaidícue. Ie muidona sábadoruimo finolle rafuena rairuiredícue. Nairuimo finoñelle rafuena jiaí rairuiredícue.

Jesúdí onollína ídisarodímiena jillotaja rafue

(Mr 3.1-6; Lc 6.6-11)

⁹ Bai jaillanona, nairái díne rillanona, naimací ofíracomo Jesús fo jaide.

¹⁰ Nainomo onollína ídisarodímíe íllanona, fariseuái dínena Jesúsomo jícanotímaci:

—¿Sábadoruimo bímíena o jilloítajana mare? —jícanotímaci. Sábadoruimo dúidímíena bu jillotaía, naimacímóna naimíe jai maijide. Uai uanona: “Mare” Jesús raiadedí, naimacímóna naimíe jai maijacana jira, naimíena llogídoiacadímaci.

¹¹ Jesús uai ote:

—Sábadoruimo omoímóna damíe íe toíca llaua ífomo uaidena, nairuído arí íena ote. Naimíemo buena lloñedomoi.

¹² Ero, cominidi llauda baifemo faite. Sábadoruimo mare rafuena finuadi mare. Bimiēna cue jillotaia, mare rafuena finodicue.

¹³ Onollina idisarodimiemo llote:

—O onolli mai oni ñuita.

Iena ñuitajamona jillode.

¹⁴ Iena cūanona, fariseuai jino jaidimaci. Naimiēna meinellena, coniniri siadotimaci.

Isaías micori jaie Jesúna ñaia rafue

¹⁵ Naimiēna naimaci meineiācanana Jesús uifūamona, nainomona oni jaide. Diga comini naimie diga jaidimaci. Naimacimona nana duidinona jillotate.

¹⁶ —Cuenā llocana jaiñeno —naimacimo llote. Naimie mameci are sorillana jitañede. Fariseuai diga ie uai uaitaiacañede.

¹⁷ Iemona Isaías micori jaie cūegafuai jai suide. Jusifūamui Isaías micorina jaie cūetataga:

¹⁸ Ero, cue fetoca mullaīma ite.

Naimiedi cue isiruigamie. Naimieri iobidicue.

Cue Joreño naimiemo cue fecajanona, judiūañēdinomo naimacina cue jilloitaācanana lloite.

¹⁹ Uai uaitañeite. Ie rafuena ado lloñeite.

Nairai illano motomo naimie rafue llocabiñeite.

²⁰ Comeciai ocuinidinona canoite.

Dueredinona canoite. Naimacina duere finoñeite; ia naimacina canoite.

Ie mare rafue lluamona, naimiēna ñnotinona canoite.

Nana comini naimie anamo ille dinori iese naimie canoite.

²¹ Naimaci jillobillena, ie rafue cacajanona, ailluena judiūañēdino naimiēna ñnoitimaci.

Fariseuai Jesúna jeare ñaia rafue

(Mr 3.19-30; Lc 11.14-23; 12.10)

²² Jesús dine damieredi Janaba ie anamo illamiena atidimaci. Janaba anamo naimie illa jira, naie aticamiedi cioñede. Jiai ñañede. Jesús Janabana oni oretajanona, naimiēna jillotate. Naimie uaina botade. Ñaite. Cioide.

²³ Naiēna ciodino rajicaillanona raitimaci:

—Ñibai bimiedi David micori jito. Cai illaimana naimie illena, naimie micori jitomo ocuridicai.

²⁴ Iēna damierie fariseuai cacajano, raitimaci:

—Beelzebúdi Janaba comini. Beelzebú anamo naimie illamona, Beelzebú uaido Janaba illa cominimona Jesús Janabana oni oretate —raitimaci.

²⁵ Naimiēna naimaci enoillana Jesús uifūanona, naimacimo llote:

—Daje isoi comeciaina lloillamo daje nairai facañenia, danomo maijñidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiñidimaci. Oni jaidimaci.

²⁶ Ie isoide. Beelzebú uaido jananiaina omoi llua isoi cue oretaia, Janaba ie ñibeimo itino diga jai nabairñede. Iemona naimie comini danomo ññeitimaci.

²⁷ Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicāno, bie isoide rafuena omoi raise uifñollena. Iemei cue finoca rafuena uaitañeitomoi.

²⁸⁻²⁹ Ero, mairidimie ie jofomo ite rana ñaia ññacadomoi. Iēna fñillena, naimiēna nano raise omoi maiga. Raise maia mei, ie rana fñiredomoi. Ie isoide. Janaba anamona cominina jillotacabiticue. Naimie afemo nano cue ññenia, cominina jillotanidicue. Naimie afemo cue illa jira, iēna finoredicue.

Jusiñamui Joreño uaido naimiena anafefitaticue. Iemona Jusiñamui rafuena cue lluana jai uññotomoi.

³⁰ Cue dibeimo iñedimie cuena enoide. Cue dibeimo cominina itatañedimiedi naie cominina cuena ñnotañede.

³¹ Te jira omoimo lloiticue: Jusiñamuidi nana comini jeacinona dotarede. Naimiedi comini marañedicinona dotarede; iadedi naimiedi ie Joreñona jeare ñaiacinona dotañeite.

³² “Jusiñamui Joreño uaido siño rafuena fiñoñedio; ia Janaba uaido siño rafuena finodio” cuena raitomoi. Jusiñamuimona biticue. Cuena omoi jeare ñaia, Jusiñamui iena feitarede; iadedi naimie Joreñona omoi jeare ñaia, Jusiñamui iena birui feitañeite. Iena ico jaca feitañeite.

Jesúdi riará llisilla llua rafue

(Lc 6.43-45)

³³ Jesús llote:

—Llisillamona nie isoide riará illana uññoticaí. Amena ie llisilla llillamona, amena marena uññoga. Llillamona, amena marañenana jiaí uññoga.

³⁴ Te isoide. Omoi ñaiamona omoína uññoticaí. Cuena omoi marañeno ñaia jira, omoi comeciaí iticinona uññoticaí. Omoi marañena jira, jaio nairaidomoi isoidomoi.

³⁵ Mareuidimie mare ie comecimona ñaite; iadedi marañedimie marañede ie comecimona ñaite.

³⁶ Jamai ebena birui omoi ñaia, Jusiñamui uicomono nana comini ico illa facaiseconi Jusiñamui iba oite.

³⁷ Omoi jeare ñaiaconi duere sefuitomoi; iadedi omoi mare ñaiaconi duere sefuiñeitomoi. Ie jira Jusiñamui dibeimo omoi comeciaí iuai meido.

Dajerie Jesús siño rafuena finuana jitailla rafue

(Mr 8.12; Lc 11.29-32)

³⁸ Naie facaiseconi dajerie Moisés micori llogacinona llofueraíni dajerie fariseuai díga Jesúmo llotimaci:

—Maestro, o lloga uaina caí ñnollena, siño rafuena o finuana cioacadicaí.

³⁹ Jesús uai ote:

—Marañedicinona finocabidomoi. Jusiñamui dibeimo iacaiñedomoi; iadedi siño rafuena cioacadomoi. Iena omoi jamai cioillena, siño rafuena fiñoñeiticue. Ero, Jonás micori jaie ite rafuena uññotomoi. Naiemo omoi comeciaína omoi faca.

⁴⁰ Darui amani aillue lliciaí jeraimo naimie illamona jillode. Ie isoite. Cue fiodailla mei, darui amani raiafomo iiticue. Iemei naiemona jilloiticue.

⁴¹ Lliciaí jeraimona naimie jillua mei, Nínive railla nairai díne Jonás micori jaide. Nainomo Jusiñamui rafuena llote. Naie comini iena cacajano, naimaci comeciaí icinuaina meidotimaci. Cue rafuena omoi cacajamona, omoi comeciaí icinuaina birui omoi meidoñena jira, Jusiñamui uicomono ico nana comini illa facaiseconi: “Cue cominidomoi” omoína raiñeiticue. Jonás micori baifemo birui uaidicue; iadedi cuena ññoñedomoi.

⁴² Ero, Saba railla nairai ie illaiño micoridi Salomón micori díne jaie aarena jaide. Naimie micori uññuacinona nairaiño micori cacareillena, aarena jaide. Salomón micori baifemo birui uaidicue; iadedi cuena ññoñedomoi. Omoi comeciaí icinuaina birui omoi meidoñena jira, Jusiñamui uicomono nana comini ille facaiseconi nairaiño micori omoína ico ñaite: “Naimiedi siño rafue finuana ciodomoi. ¿Bue ñllena naimiena ññoñedomoi?” omoína ico ñaite.

*Janaba anamo illamie rafue**(Lc 11.24-26)*⁴³ Jesús naimacimo nia llote:

—Birui bene ite marañede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue ifnenanomo jaide; iade baiñede.

⁴⁴ Baiñena jira, naimie começina facade: “Navui cue anamo illamie ðine abido jaiticue”. Abido naimie bia, naie iima começi namanidena naimie baite.

⁴⁵ Iemei oni jaillanona, jiaie siete jananiaina naimie ðiga atide, naimaci anamo naie iima illena. Naie siete jananiai naimie baifemo marañeðimaci. Iemona naie iima eo fodo jaide. Ie isoide birui ite marañede comini. Cue rafue naimaci inoñenia, eo fodo jaitimaci.

*Jesús ie comini**(Mr 3.31-35; Lc 8.19-21)*

⁴⁶ Jofomo comini ðiga Jesús nia ñaia, naimie ei, ie amatiai ðiga, bite. Naimie ðiga ñaiacanano, jino naidaide.

⁴⁷ Damie Jesúmo llote:

—O ei, o amatiai ðiga, jino ite. O ðiga ñaiacade.

⁴⁸ Naimiemo Jesús ðinena jicanote:

—¿Bu cue ei? ¿Bu cue amatiai?

⁴⁹ Ie llofueoicaigano ðine ie onolli ñuitajanona, raite:

—Jadi, cue ei, cue amatiai.

⁵⁰ Cue Moo monamo ite. Naimie jitaillacinona finodimiedi cue amana, cue miriñona, cue eina. Imaci ua cue cominina.

13*Trigo judaidimie rafue**(Mr 4.1-9; Lc 8.4-8)*¹ Nai jofomona nairui Jesús jaillanona, jorai fue ðine jaide.

² Ailluena comini nainomo ofilla jira, botemo Jesús jaillano, ana raide; iadedi comini jorai fuedo itimaci.

³ Ailluena rafue naimacimo llote:

—Jusiñamui omoina sedaacana omoi fueollena, bie rafuena lloiticue. Damie trigona judaiaide.

⁴ Naimie judaiamona, naisomo janore iduai juide. Naimie bai jailla mei, silliñiai iena guisaibitimaci. Ie jira sicoñede.

⁵ Nofiemo jiaie iduai juide. Nainomo enirue raise iñede. Sicode; iadedi enirue raise iñena jira,

⁶ raise jainañena jira, ecasillamona duide. Ie jira llisiñede.

⁷ Eecuai illanomo jiaie iduai juide. Eecuai sicuamona, riarra eecuai ibaica. Ie jira llisiñede.

⁸ Mare eniruemo jiaie iduai juide. Sicode. Llisillamona danademo cien ðiga llisillana ote. Jiaianamona sesenta ðiga llisillana ote. Jiaianamona treinta ðiga llisillana ote.

⁹ Omoi jeforena jira, raise fueollena, cue lluomo cacarei. Iena ino.

*Jesús ie como lloga rafuena llofua rafue**(Mr 4.10-12; Lc 8.9-10)*¹⁰ Ie llofueoicaigano Jesúmo jicanuaibiside:

—¿Bue ñellena bie isoide rafuedo cominina llofuetio?

¹¹ Uai ote:

—Jusiñamuidi omoına ie sedaacana rafuena jai uiñotade. Jaie iena uiñofnedomoi. Jiaie cominina iena nia uiñotañede.

¹² Jusiñamuina inotimie Jusiñamui rafuena inocana jaite. Jusiñamui naimiena uiñotaite; iadedi Jusiñamuina inoñedimie Jusiñamui rafuena uiñofnecana jaite.

¹³ Ie jira bie isoidicinodo naimacimo lloticue. Cue siño finoca rafuena cioidimaci; iadedi iena naimaci inoñena jira, uiñofneo jaitimaci. Cue llofuiana jamai cacadimaci; iadedi naimaci inoñena jira, raise cacaiñedimaci. Uiñofnedimaci.

¹⁴ Isaías micori naimacina jaie cuega rafue birui jai suide. Jaie raite: Jusiñamui llote: “Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñofñeitomoi.

¹⁵ Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacacaiñedomoi.

Jai uisindomoi isoidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue dibeimo iacaiñedomoi, omoına cue jilloitai raillanona”.

Isaías micori Jusiñamuina inoñedinona iese jaie cuete;

¹⁶ iadedi bie siño rafuena birui omoi jai cúa jira, cue lloga rafue omoi jai cacaja jira, iena birui omoi inua jira, ni ua omoi marena ille jillaci.

¹⁷ Jusiñamui facaina jaie lloraini micoriai omoi siñona cúa rafuena jaie cioacadimaci; iadedi cioiñedimaci. Iena cacacadimaci; ia cacaiñedimaci. Jusiñamuina jaie inotino micoriai iena cioacadimaci; iadedi cioiñedimaci. Iena cacacadimaci; iadedi cacaiñedimaci.

*Jesúdi trigo judaidimiena llua rafue
(Mr 4.13-20; Lc 8.11-15)*

¹⁸ Jesús llote:

—Ero, omoına trigo iduaina judaidimie rafuena llofueiticue.

¹⁹ Dajerie iduai naisomo juide. Dajerie comini comeciai naie naiso isoidimaci. Jusiñamuidi ie cominina sedaja rafuena cacadimaci; iadedi iena cacaiñedimaci. Ie jira Taifedi naimaci comeciaimo cacaja uaina inotañede.

²⁰ Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacai, iena caimare feiñotimaci.

²¹ Nofiemo riga iduai jainaonidedi raise sicoñede. Naie comini janore inua jira, ie isoidimaci. Dallu nano inotimaci. Jusiñamui uai muidona duere naimaci sefua, abido danomo uaidimaci.

²² Jiaie iduai eecuai illanomo juide. Naie iduai sicua mei, iena eecuai ibaila jira, raise llisñede. Dajerie comini comeciai naie illano isoidimaci. Jusiñamui uaina cacadimaci. Inotimaci; iadedi naimaci comeciai jarire illamona, naimaci raruaina ebruillamona, naie uai naimaci comeciaimo itabiñede. Jusiñamui jitaille rafuena finocana jaiñedimaci.

²³ Jiaie iduai mare enirue mo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Eo lliside isoidimaci. Jusiñamui jitaille rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Raiticiai trigo motomo illa rafue

²⁴ Jesús jiaie rafuena llote:

—Jusiñamui ie cominina sedaacana rafuena lloticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloticue. Damie trigona judaiaide. Ie illimo mare iduaina judaide.

²⁵ Naimie inia mei, ie enoidimie trigona eruaide raiticiaina bainino judaiaide. Iemei oni jaide.

²⁶ Trigo sicuamona lliside. Naie facaise naie raiticiai como raise bairede.

²⁷ Judaïdimie majiraini iena ciuanona, naimiemo llote: “Mare iduai navui ritio. ¿Niesedeta raiticiai eo sicode?”

²⁸ Uai ote: “Cuena enoidimie iese finoca”. Naie majiraini naimiemo jicanotimaci: “¿Birui nai raiticiai cai raitiana jitaïdio?”

²⁹ Uai ote: “Dama ite. Raiticiai omoi raitia, trigona jiai jaitaitomoi. Dama iesede.

³⁰ Danomo sicoite. Ua facaiseconi cue majirainimo lloiticue: “Raiticiai nano jaita. Danomo ofita, jobaïllesa. Trigo uanona, cue jofomo atianona, eeno”.

Jesúdi mostaza ido llua rafue

(Mr 4.30-34; Lc 13.18-19)

³¹ Jesús jiaie rafue llote:

—Jusiñamui dibeimo comini jailla rafuena lloiticue. Jiaie uaido iena omoïmo lloiticue. Damie mostaza idona rillamona, naiemona eo aillue riará sicode.

³² Mostaza ido eo janorede; iadedi sicua mei, eo aillue riará jaillamona, nainomo silliñiai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

Jesús siritate rana llofuia rafue

(Mr 4.33-34; Lc 13.20-21)

³³ Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoïmo lloiticue. Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaita.

³⁴ Naie isoide rafuedo Jusiñamui ie cominina sedaacana rafuena cominimo Jesús llote. Jiaie rafuedo iena lloñede.

³⁵ Jusiñamui facaina lloraïma micori iena jaie cuela:

Jusiñamui llote: “Jiaie isoide rafuedo cominimo lloiticue.

Comini nia uiñoñega rafuena lloiticue. Enirue finua facaise mona jaca bu iena uiñoñede.

Birui naimaci uiñoñena, iena lloiticue”.

Jesús trigo motomo riga raiticiaina llofuia rafue

³⁶ Comini jino faïnonocaida, Jesús ie risoilla jofomo abido jaide. Ie llofueoicaigano naimiemo llotimaci:

—Iena raise cai uiñoñena, trigo motomo riga raiticiai rafuena caimo llono.

³⁷ Uai ote:

—Mare iduai judaïdimiedi cue. Jusiñamui rafuena lloiticue.

³⁸ Naie illidi nana comini. Mare iduaidi Jusiñamuimo duide comini. Raiticiaidi Taifemo duide comini.

³⁹ Naie marañede iduai judaïdimiedi Taife. Ua facaisedi cue abido bille facaise. Trigo otinodi Jusiñamui jaienisaï. Trigodi cuena ñnotino.

⁴⁰ Jobaïllena raiticiai ofitaja isoi, ico abido cue bia, daje isoi iite.

⁴¹ Cue jaienisaïna oretaiticue, nana jecinona finoraini diese ofitallena, cue illanomona iraimo dotallena.

⁴² Nainomo eo duere sefuillamona, eetitimaci. Subicaitimaci.

⁴³ Iemei jitoma lligaiñua isoi, Jusiñamui sedajanomo naimiëna innotinodi marena bairenitimaci. Omoi jeforena jira, raise fueollena, cue lluomo cacarei. Bie isoi omoi duere sefuiñellena, cue lluaana ino.

Jesúdi eniruemo isiruiga reica rana llofua rafue

⁴⁴ Jesús llote:

—Jusiñamui díbeimo comini jailla rafuena lloiticue. Jiaie uaido iena omoimo lloiticue. Eniruemo isiruiga raifide ra bu baia, ie nama jai inena jira, naie eniruena uainino ibaacade, naie ra ollena. Ucube ollena, naie rari iobilla jira, nana naimiemo ite raruiaina fecaite. Iemei eniruena ibaite. Ie isoide. Jusiñamui illanomo omoi illena, jiaie rafue uanona jaiñeno. Dani Jusiñamui rafuena uanona jai. Dani iemo omoi comeciaina faca.

Perlas railla rafue

⁴⁵ Jesús llote:

—Jusiñamui díbeimo comini jailla rafuena lloiticue. Iena omoi raise uiñollena, perlas railla rana ibaraimana lloiticue. Eo mare perlas iballena jenocabide.

⁴⁶ Eo raifide perla naimie baia, naie perlana iballena, nana ie raruiaina fecaite. Ie isoide. Jusiñamui ie cominina sedaacaja rafuena omoi cacaja jira, iena ocana jai.

Jesús lloijina ñaia rafue

⁴⁷ Jesús llote:

—Jusiñamui díbeimo comini jailla rafuena lloiticue. Iena omoi raise uiñollena, lloijina lloiticue. Joraimo lloijina comini faianona, naga isoide lliciaina otimaci.

⁴⁸ Ari sonua mei, mare lliciai diese fetodimaci. Maraiñede lliciai diese oni faitimaci.

⁴⁹ Ie isoide. Ico abido cue bia, iese iite. Jusiñamuina innotinomona naimiëna inoñedino diese oni fetollena, Jusiñamui jaienisai biitimaci.

⁵⁰ Iemei iraimo Jusiñamuina inoñedinona dotaitimaci. Nainomo eo duere sefuillamona eeditimaci. Subicaitimaci.

Jesús llofueoicaiganodi mare rafuena jai uiñua rafue

⁵¹ Ie llofueoicaiganomo Jesús jicanote:

—¿Nana cue lluaana cacadomoi?

Uai otimaci:

—Jii, nana cacadicai.

⁵² Naimacimo llote:

—Ie jofomo comini bia, naimacina raise nafuellena, naimacina caimare itatallena, jofu nama ie mare raruiaimona naimaci jitailla ra naimacimo fecade. Comini comeciaina lloiticue. Jusiñamui facaina lloraini micoriai llogacinona uiñotomoi. Cuemona Jusiñamui ie cominina sedaja rafuena fueocana jiai jai jaidomoi. Comini comeciaina caimare itatallena, birui llofueredomoi.

Nazaretmo Jesús illa rafue

(Mr 6.1-6; Lc 4.16-30)

⁵³ Naie rafuena Jesús llua mei, nainomona Nazaretmo jaide.

⁵⁴ Ie eniruemo rillanona, Nazaretmo ite ofiracomo llofue. Naiemona cominidi rajicauillamona raitimaci:

—¿Niëse naimiedi eo abina uiñote? ¿Niëse siño rafuena naimiedi finode? Naimiedi jamai buë isoidimie.

⁵⁵ Naimie amederaima jito. Naimie eidi María. Naimie amatiaidi Jacobo, José, Simón, Judas.

⁵⁶ Naimie miriñotiaidi cai motomo jiai ite. Naimaci diga nagarui nabairiticaí. Naimieori cai nabairicabilla. Ie jira, ¿ninena ie siño uaina ote?

⁵⁷ “Cai comena naimie ite” raillanona, naimie uaina jamaidimaci. Jesús naimacimo lote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie risoilla jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina iñoñedomoi.

⁵⁸ Naimie uaina naimaci iñoñena jira, Jesús ailluena siño rafue fiñoñede.

14

Juan Bautista micori fiodailla rafue

(Mr 6.14-29; Lc 9.7-9)

¹ Naie facaiseconi Herodes railla gobernador Jesús mamecina cacade.

² Naimie ecimo majiuidinomo lote:

—Fiodaillamona Juan Bautista micori jai jillode. Jesús raillamiedi naimie. Ie jira naimiedi siño rafuena finocabide.

³⁻⁴ Iese raite, Herodes Juan micorina navui meinetaja jira. Juan Bautista micorina nia meinetañenia, Herodedi ie ama Felipe aina ote. Naiñaiño mamecidi Herodías. Ie jira Juan micori naimiemo lote:

—O ama ai diga itio. Maraiñede rafuena finodio. Jusiñamui iena rairuide.

Herodes Juan micori lluna gaiñenano, naimiena duere finode. Herodes Juan micorina gaitatajanona, cárcelmo jonetade.

⁵ Naimie micorina meinetacade; iadedi Herodes dinena cominina jaciruite. Juan micoridi Jusiñamui facaina lloraimana naimaci raillanona, naimie micorina jaciruite.

⁶ Iemei Herodes cumpleños ie rafuena finode. Nainomo jiaie cominina uaidote. Rafuemo Herodías jisa naimaci uicomo saillamona, Herodena iobitade.

⁷ Ie jira naiñaiñomo lote:

—Nie isoide rana o jitaiadedi, omo iiticue. Illaima uai cuemo illa jira, iena ua fiñoiticue.

⁸ Naiñaiño ei naiñaiñomo lluanona, naiñaiño uai ote:

—Juan Bautista ifogi bandejamo jonecaida, cuemo ine.

⁹ Iena cacajano, naimie sunaite; iadedi naimie jino ie llua uaina jira, nainomo naimie uaidogano jiai jai cacaja jira, Juan micorina meinetajana lote.

¹⁰ Ie lloga uaina finollena, cárcelmo soldadona orede. Nainomo Juan micori ifogina jaitade.

¹¹ Bandejamo naimie micori ifogi jonecaida, soldado atiano, Herodías jisamo fecade. Ieconí ie eimo fecade.

¹² Iena fidianona, Juan micori llofueoicaigano naimie micori abina uaibitimaci. Iena naimaci raia mei, Jesúsno lluidimaci.

Jesús cinco mil iññiaina ecaja rafue

(Mr 6.30-44; Lc 9.10-17; Jn 6.1-14)

¹³ Juan micori meiniana Jesús fidiano, nainomona comini iññenomo ie llofueoicaigano diga botedo jaide; iadedi naimie jaillana comini fidiano, naimiena racadimaci. Diga comini illanuaimona eillido bitimaci.

14 Eniruemo Jesús sijiia, ailluena cominina dafaifide. Naimacina ciuanona, naimacina duenaillanona, duidinona jillotate.

15 Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene ifede. Jaca buedi ifede. Jai navuiacade. Cominina mai abido oreta. Ianori ite nairaimo naimaci guille ollena, naimacina oreta.

16 Uai ote:

—Naimacina oretañeiticue. Naimacina omoi eca.

17 Uai onaisite:

—Dani caimo ite cinco llomenico, mena lliciai diga.

18 Uai ote:

—Iena cuemo ati.

19 Raitie illanomo comini ana raillesa llono —raite.

Naie cinco llomeniconona naie mena lliciai diga uanona, monamo eruailanona, Jusiñamui iobillacinona fecade. Iemei taillude. Ie llofueoicaiganomo fecade, cominina ecallena.

20 Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci.

21 Cinco mil iñiaie diese gutimaci. Naimaci aitiai jiai gutimaci. Naimaci uruiaie jiai gutimaci.

Jesús jinui emododo macarilla rafue

(Mr 6.45-52; Jn 6.16-21)

22 Guilla mei, botedo ie llofueoicaigano ruica dine jaillena llote. Naie facaiseconi naimie cominina nia facadote.

23 Cominina facadua mei, aneduaimo dane jaide, Jusiñamui diga ñaillena. Jitibicaidemo nainomo dama ite.

24 Naie facaiseconi ie llofueoicaigano jorai motomo itimaci. Aifi billamona, eo bagode. Naimacimo riire aifi rilla jira, riire jaitimaci.

25 Nia monañedemo, jinui emododo naimaci dine Jesús bite.

26 Naimiena naimaci ciuanona, jacinailamona, raitimaci:

—¿Bu joreño caimo billana cioidica? —Jacinaillamona cuirridimaci.

27 Naie dacaño Jesús naimacimo llote:

—Omoi joreñonicañeno. Cuesa. Jaciruiñeno.

28 Pedro uai ote:

—Uanaie cai Namadio. O dine cue billesa cuemo llono.

29 Jesús uai ote:

—Cue dine bi. —Ie jira botemona jinui emodo Jesús dine Pedro macarite;

30 iadedi aifi billana naimie ciuanona, jacinaitaie. Jinuimo anabaicade. Ado cuirioide:

—Nama, cuena cano.

31 Jesús ie onolli oni ñuitajanona, naimiena llivanona, raite:

—Eo janore cue uaina inotio. ¿Bue ñellena eo inoñedio? Cuena inotiodena, jinui emododo cue dine niadedi ridio.

32 Botemo a iaiaiaie jaillamona, ie facaise aifi llicaiide.

33 Ie jira botemo itino Jesús iobillacinona fecadimaci.

—Odi ua Jusiñamui Jitodio —raitimaci.

Jesúdi duidinona Genesaret eniruemo jillotaja rafue

(Mr 6.53-56)

34 Ruica dine jaillanona, Genesaret railla eniruemo ridimaci.

35 Jesúsna nainomo itino uifnuamona, naimie dine duidinona atillena, nana nairaimo jiaie cominina oredimaci.

³⁶ Naimie dine billanona, daní ie iniroi fuedamo jutadallena naimiemo jicanotimaci. “Naimie iniroimo cai jutadallemona jilloiticaí” raillamo comeciaina facadimaci. Nana jutadate diese jillodimaci.

15

Jesúdi comini comeciaina ñaia rafue
(Mr 7.1-23)

¹ Jerusalémona fariseuai comini Jesús dine bitimaci. Moisés micori llogacinona llofueraini jiaí bitimaci.

² Naimiemo jicanotimaci:

—¿Bue ñellena o llofueoicaigano cai einamaci rafuedo jaiñedimaci? Naimaci guiacania, naimaci onollí cai einamaci llua isoi raise jocoñedimaci. Ie jira cai abimo jeacino finodomoí.

³ Jesús uai ote:

—¿Bue ñellena nana Jusiñamui llogacinodo jaiñedomoí? Omoi einamaci llogacinodo jaidomoí; iadedi nana Jusiñamui llogacinodo raise jaiñedomoí.

⁴ Jusiñamui jaie llote: “O moo uai ñnuanona, naimiena cano. O ei uai ñnuanona, naiñaiñona cano. Ie moori jeare ñaitimie, ie eiri jeare ñaitimie meinelle”.

⁵ Iese Jusiñamui llote; iadedi omoi einamaci llotimaci: “Jusiñamuimo cai ucubena cai fecajamona, cai moona, cai eina jai canonidicaí”.

⁶ Iese omoi finocabilla jira, omoi einamaci llogacinodo omoi jaillamona, Jusiñamui uaina jamaidomoí.

⁷ Mareuidinona abi caitauidinodomoí. Isaías micori omoína jaie raise llote. Naimiedi Jusiñamui llua cuete:

⁸ Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticaí” llotimaci. “Ona sedadicaí” llotimaci.

Jamai ñaitimaci. Naimaci comeciái cue dibeimo raise iñede.

⁹ Cue uai itena, jamai comini lluacinona naimaci llofuecabilla jira, taínona cuena sedadimaci.

¹⁰ Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uiñollena, cue llua mo cacarei.

¹¹ Omoi einamaci isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoí. Omoi guigamona, omoi onollina jocuamona, Jusiñamuina nabaiñedomoí. Omoi jeacino illa jira, Jusiñamuina nabaiñedomoí. Omoi comeciái jearena jira, jeacinona finocabidomoí.

¹² Ie llofueoicaigano naimiemo lluaíbitimaci:

—O llua muidona, fairseuai cominina icidio.

¹³ Naimie dinena uai ote:

—Dama ite. Nana cue Moomona oñega rafuedi jai ieconi duite. Naimaci rafue cue Moomona oñenia, ja muidomo ieconi duite.

¹⁴ Naimacina faínonocai. Uanaicinona naimaci uiñoñena jira, uisínidino isoidimaci. Jiaimiena uisínidimie ifoia, dafomo uaidiaímaiaí. Ie isoide. Uanaicinona fariseuai uiñoñena jira, uanaicinona llofuenidimaci. Uanaicinodo jaiñedimaci. Ja muidomo faífitimaci.

¹⁵ Pedro naimiemo llote:

—Aillinano o llua caimo raise llono.

¹⁶ Uai ote:

—¿Ñiese cue llua jiaí nia cacaiñedomoí?

17 Nie isoide ra guitomoina, omoi jebemo jaide. Ie mei omoi abiaimona jino bite;

18 iadedi omoi comeciaino iticinomona jearedena ñaitomoi. Omoi comeciaino jearena jira, jearede rafuena ñinocabidomoi.

19 Omoi comeciaino jearena jira, jeare comeciaino facacabidomoi. Comena meinecabitomoi. Omoi aiñede riño diga icabitomoi. Omoi iniñede iima diga icabitomoi. Fiiricabitomoi. Tainona llogiricabitomoi. Jiaie comini joreña jeare ñaicabitomoi.

20 Bie isoidicinuai omoi comeciaino illa jira, jearede rafuena ñinocabidomoi; iadedi omoi einamací lua isoi, omoi onolli jocoñenamona jeacino comuiñede.

*Jesúdi judío iñaiñoñediñaiñoña jillotaja rafue
(Mr 7.24-30)*

21 Genesaret railla eniruemona ie llofueoicaigano diga Jesús jaillanona, Tiro railla eniruemo jaide. Sidón railla eniruemo jiai jaide.

22 Ie facaiseconi naie eniruemona judíuñediñaiñoñodi billanona, raite:

—Maestro, David micorí jitodio. Jusiñamuimona o billa jira, cuena duenai. Cue jisa Janaba anamo ite. Naiñaiño eo duere sefuicabide.

23 Jesús uai oñede. Ie jira ie llofueoicaigano naimie ñine billanona, duere llote:

—Naiñaiñoña abido ie jofomo oreta. Caimo duere jicanuaibitesa.

24 Jesús uai ote:

—Faiñcana jaillana naimaci jai jailla jira, ñani cai judíuñediñaiñoñodi cominimo cue Moo cuena oretate. Naimiedi judíuñediñaiñoñomo cuena oretañede.

25 Ie facaise naimie ñine naiñaiñoñodi billanona, naimiemo iobillacinona fecalena, caiñici ifodo ana rainada raite:

—Maestro, cuena cano.

26 Judíuñediñaiñoñodi naimie canoñenana naiñaiñoñodi uifollena, naiñaiñoñomo Jesús llote:

—Uruiaí guillamona jiconiaína ecadicaídena, marañede.

27 Naiñaiñoñodi ñinena uai ote:

—Jii, maestro; iadedi jiconiaídi imaci nama guillamona fiebide guillemona guitimaci. —Iese llote; ia jiaie rafuemo comecina facade. Uruiaína llote; iadedi judíuñediñaiñoñodi comecina facade. Jiconiaína llote; ia judíuñediñaiñoñodi comecina facade. Comecina facade: “O cominimo o rafue duide; ia cai Namana o illa jira, ñibai o rafue caimo janore duide”.

28 Jesús uai ote:

—Cue uaina o ñinua jira, o jitailla rafuena finoitícue. —Ieconí naiñaiñoñodi jisa jillode. Janaba naiñaiñoñomona oni jaide.

Jesús ailluena duidinona jillotaja rafue

29 Nainomona Jesús bai jaillanona, Galilea railla jorai fuedo jaide. Iemei aneduaimo jaillanona, nainomo ana raide. Nainomo rilla mei,

30 ailluena comini naimie ñine bitimaci. Ailluena duidinona atidimaci. Ñuja-ñujacaida macaritinona, onollina idisaruidinona, uisínidinona, uainidinona atidimaci. Diga duidinona naimie ñine atidimaci. Iemei naimacina jillotate.

31 Ailli uainidino jai ñaiana cacajamona, ailli onollina idisaruidino onolli jai marena illana ciuamona, ailli ñuja-ñujacaidino macaritino jai marena macarillana ciuamona, ailli uisínidino jai ciuana ciuamona, nainomo ite comini eo rajicaidimaci. Cai Jusiñamuimo iobillacinona fecadimaci.

*Jesúdi cuatro mil iññiaina ecaja rafue
(Mr 8.1-10)*

³² Jesús ie llofueoicaigano naimie dine uaiduanona, raite:

—Bie comini darui amani bene cue diga illa jira, naimacimo guille jai iñede. Naimacina aimeri oretaiacaiñedicue, naisomo naimaci baii railanona. Naimacina cue duenailla jira, naimacina canoacadieue.

³³ Jicanotimaci:

—¿Ninomona guille oiticaí, naimacina cai ecallena? Ailluena comini ite; iadedi jofue iññenanomo iticaí.

³⁴ Jesús jicanote:

—¿Niga llomenico omoimo ite?

Uai otimaci:

—Siete. Janorede llicisiriaí caimo jiaí ite.

³⁵ Comini ana raillena Jesús llote.

³⁶ Naie llomenico llicisiriaí diga uanona, Jusiñamuimo iobillacino fecade. Tailluanona, ie llofueoicaiganomo fecade, naie cominimo fecallena.

³⁷ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci.

³⁸ Nainomo cuatro mil iññiaí guitimaci. Naimaci ainiaí jiaí guitimaci. Naimaci uruiaí jiaí guitimaci.

³⁹ Iemei cominina naimaci jofuemo orede. Naimacina oretaja mei, botedo Magdala railla eniruemo Jesús jaide.

16

*Fariseuai comini Jesúmo siño rafuena fñuana jicanuano billa rafue
(Mr 8.11-13; Lc 12.54-56)*

¹ Dajerie fariseuai comini Jesús dine bitimaci. Naimiena facacillena, dajerie saduceuai comini jiaí bitimaci. Siño rafuena naimie fñuana jicaacadimaci. Iena naimie finoñedena, naimie ie llua isoi iññenana uiññoitimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

² Jesús uai ote:

—Jitoma sojicaidemo, mona jiairenia, raitomoi: “Ico are maremonanite”.

³ Jiaí raitomoi: “Jitiramo mona jiairenia, ja noci deite”. Monamo omoi eruaiillamona, marena monaillana uiññotomoi; iadedi birui cue finoca rafuena raise uiññoiacaiñedomoi. Omoi motomo birui suide rafuena raise caiñedomoi. Abina uiññotinona abi caitadomoi.

⁴ Jeacinona finocabidomoi. Jusiñamui dibeimo raise iacaiñedomoi. Siño rafuena finoñeiticue. Jonás micorimo jaie suide rafuena uiññotomoi. Jusiñamui naimiemo siño rafuena finode. Naiemo comeciaina omoi faca. Fiodaillamona naimie jillode. Ie isoi cue jiaí jilloiticue. —Ie llua mei, naimacimona Jesús ie llofueoicaigano diga oni jaide.

*Jesús siritate rana llofuia rafue
(Mr 8.14-21)*

⁵ Ruica dine naimaci rillanona, ie llofueoicaigano llomeniconona feillana uibññotimaci.

⁶ Iena naimie uiññuamona, naimacimo Jesús llote:

—Fariseuai siritate ramona abina rairui. Saduceuai siritate ramona abina rairui. —Iese Jesús llote; iadedi naimaci llofuiaicinomona abi rairuillena ñaite.

7 Jesús iese llua jira, iena naimaci raise cacaiñena jira, dani coniniri siadotimaci:

—Llomenicon aca atañena jira, caimo iese llote.

8 Naimaci siaduana Jesús uñua jira, naimie llua naimaci nia raise cacaiñena jira, naimacimo llote:

—Cue uaina nia raise ñnoñedomoi. Omoína canoredicue. ¿Bue ñellena dani omoi llomenico iñenana siadotomoi?

9 ¿Niese ñnoñedomoi? ¿Niese cue navui siño finoca rafuemo comeciaina facañedomoi? Navui cinco mil iññiai cinco diganicodemona guitimaci. Monillamona, guigamona fiebillamona, doce cirigaiaimo iraidomoi.

10 Jiaicaiño cuatro mil iññiai siete diganicodemona guitimaci. Monillamona guigamona fiebillamona, siete cirigaiaimo iraidomoi.

11 Omoína cue ecallena, ¿niese cuena birui ñnoñedomoi? Llomenicon ailli ñañedicue. Fariseuai siritate ramona abina rairuillena ñaiticue. Saduceuai siritate ramona abina rairuillena ñaiticue.

12 Ie facaise naimie llua jai cacadimaci. Llomenico siritate rana naimie ñañede; iadedi fariseui llofuaiacnomona naimaci abina rairuillena ñaite. Saduceuai llofuaiacnomona naimaci abina rairuillena ñaite.

Pedro Jesúsna llua rafue

(Mr 8.27-30; Lc 9.18-21)

13 Cesarea Filipo railla eniruemoo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

14 Uai otimaci:

—Damierie raitimaci: “Odi Juan Bautista micoridio”. Damierie raitimaci: “Odi Elías”. Jiaino raitimaci: “Jeremías micoridio”. Jiaino raitimaci: “Jusiñamui facaina lloraíma micoridio”.

15 Jesús dane jicanote:

—¿Niese omoi cuena raitomoi?

16 Pedro uai ote:

—Odi cai jilloitaraimadio. Cristodio. Jusiñamui facaina lloraíni micoriai o billena jaie llotimaci. Cai cajede Jusiñamui jítodio.

17 Jesús dinena uai ote:

—Simón Pedro, Jonás jítodio. Marena llotio. Comini ona iena uñotañede; iadedi cue Moo Jusiñamui ona iena uñotade.

18 Pedro, o comecina uñotucue. Cuena como o lloga uaina meidoñeitio. Bie rafuena jiaie cominimo o llua mona, jiai ñnoñitimaci. Cuena ñnuamona, cue cominina jaitimaci. Cue dibeimo iñedino iena itatanidimaci.

19 Ailluena cominimo Jusiñamui ie cominina jailla rafuena nano lloraímana jaitio. O llucacnodo jaitino cue cominina jaitimaci. O llucacnodo jaiñeitino cue cominina jaiñeitimaci

20 Iena llua mei, ie llofueoicaiganona rairuide:

—Cue Cristonana bumoo nia lloñeno.

Jesús ie fiodaillena llofuia rafue

(Mr 8.31-9.1; Lc 9.22-27)

21 Naie facaise mona ie llofueoicaiganomo Jerusalémo naimie jaillena marefodo llote:

—Nainomoo cai judíuai illaicomini cuena eo duere finoitimaci. Cuena meineitimaci; iadedi darui amani illanona, fiodaillamona jilloitucue.

22 Pedro dinena lletade:

—Nama, ¡Jusiñamui iena jitañede! Bie isoide rafue omo suiñeite.

²³ Jesús jinafo dine naimiemo erodate. Raite:

—Cuemona oni jai. Iese ñaiño, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio. Iese o comecina facañeno.

²⁴ Ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue ñibeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue ñibeimo naimie iite.

²⁵ Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruiñenamona cue cominina bu jaia, jaca faifñeite.

²⁶ Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿ñiese cue Moo dine riite? Nainomo naimie riño faifite.

²⁷ Cue jaienisai diga cue Moo dinena monamona ico biiticue. Cue Moo uai cuemo illanona, ebirena biiticue. Nagamie imaci finoca rafue ñiese cue iba ollena biiticue. Cue comiñedinona duere finoiticue.

²⁸ Uanacinona omoimo lloiticue. Omoimona dajerie nia fiodañeitomoimo, illaimana cue bairellena cioitomo.

17

Jesús abí meidocaila rafue (Mr 9.2-13; Lc 9.28-36)

¹ Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobona jiai uite. Jacobo ama, Juan, jiai uite. Jiaie llofueoicaiganona uñede.

² Nainomo rilla mei, naimaci uicomo naimie abí meidocaide. Jitoma isoi naimie uieco bairecaide. Naimie iniroi naie dacaiño eo userecaide.

³ Naie facaise naimacimo Moisés micori joreño, Elías diga bairede. Elíadi Jusiñamui facaina jaie lloraíma. Jesús diga ñaitiaímaiaí.

⁴ Jesúsno Pedro llote:

—Nama, bene cai illana mare. O jitaia, daje amani bisaini finoiticue. Daje oue; jiaie Moisés micori ie; jiaie Elías ie.

⁵ Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llote:

—Bimie cue isiruiga jito. Naimieri iobidicue. Naimie llamo cacareil-lanona, iena ñino —llote.

⁶ Jesús llofueoicaigana iena cacajanona, eo jaciruillanona, naimaci uieco dinena ana bitadatimaci.

⁷ Jesús naimaci dine billano, naimacina jetajanona, raite:

—Mai jaciruiño naidacai.

⁸ Naimaci erorillamona, dama Jesúsna ciodimaci.

⁹ Anedumona bitimacimo, naimacimo Jesús llote:

—Omoi ailli ciua rafuena bumo lloño, cue fiodaillamona cue jillua dinori.

¹⁰ Naimiemo llotimaci:

—Moisés micori llogacinona llofueraíni birui raicabitimaci: “Elías raillamie dane biite. Ie mei cai jilloitaraima biite” raitimaci. Jusiñamuimona o billana inoticaí. Odi cai jilloitaraimana inoticaí. Odi cai jilloitaraimadiomo, ¿bue ñelli iese raitimaci?

¹¹ Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise llolena. Jusiñamui dibeimo naimaci illena, comini imaci comeciai meiduana llote.

¹² Ero, naimie jai bite; iadedi bie comini naimiena raise uifioñedimaci. Naimaci jitailla jira, naimiena jai meinetimaci. Ie isoide. Naimacimona duere sefuiticue. Monamona biticue, ñimana cue jaillena; iadedi duere sefuiticue.

¹³ Ie muidona Jesús llofueoicaigano naimiedi Juan Bautista micorina ñaiana jai uifiotimaci.

Jesúdi Janaba anamo itimiena jillotaja rafue

(Mr 9.14-29; Lc 9.37-43)

¹⁴ Ie jiaie llofueoicaigano dine Jesús abido ria, nainomo ailluena comini itimacimo ride. Jesús dine damie billanona, naimiena raise uaiduanona, caifñici ifodo rainadacaida raité:

¹⁵ —Maestro, cue jitona duenai. Janaba anamo naimie ite. Iemona naillcabide. Duere sefuide. Uai-uacabide. Jiaicaiñodedi iraimo uaillanona, uside. Jinuimo jiaí uaillanona, niadedi corobaite.

¹⁶ Naimiena jilloitallena o llofueoicaigano dine naimiena atidicue; iadedi naimiena jillotanidimaci.

¹⁷ Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi ñnollena, ¿nie dinori omoi diga iticue?

Naie duidimie moomo llote:

—O jito cue dine mai ati.

¹⁸ Naimiena atiamona, Jesús naimiemo Janaba illana uifñote. Janabana Jesús lletaja jira, naie uruemonna Janaba oni jaide. Ieconí naie urue jillode.

¹⁹ Ie mei ie llofueoicaigano Jesúmo anado jicanotimaci:

—¿Bue ñellena Janabana oni oretanidicai?

²⁰ Uai ote:

—Raise nia omoi ñnoñena jira, uanaicinsona omoi mo lloticue. Janaba oni oretallena, cue uai navui omoi mo iticue. Birui raise cuena omoi ñnoñena, bie Janaba oni oretanidomoi. Jusiñamuina eo janore ñnotomoidena, diga rana finodomoi. “Oni bai jai” bie anedumo llotomoidena, omoi na naimie canuamona, bie anedu oni liai bai jaite. Jusiñamuina omoi ñnoia, naga rana finoredomoi.

²¹ Jusiñamuimo omoi comeciaina facallena omoi guiñenamona, Jusiñamui diga omoi ñaiamona, bie isoide Janabana oni oretaredomoi.

Jesús ie fodaillena dane llofuia rafue

(Mr 9.30-32; Lc 9.43-45)

²² Galileamo ie llofueoicaigano diga danomo itemo, Jesús naimacimo llote:

—Monamona billanona, ñimana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci.

²³ Naie illaicomini cuena meineitimaci; iadedi darui amani illamona, cue Moo cuena jillotaite. —Iena cacajanona, ie llofueoicaiganodi sunaitimaci.

Jesúmo Jusiñamui jofo facaina damie ibataja rafue

²⁴ Capernaumo naimaci rilla mei, Jusiñamui jofo ucube oraini Pedro dine jicanuaibite:

—Moisés micorí lua isoi, ¿o llofueraima Jusiñamui jofomo ucubena fecacabide?

²⁵ Pedro dinena uai ote:

—Jii, fecacabide. —Ucube oraini jailla mei, jofomo Pedro billanona, Jesúmo iena nia lloñedemo, Jesús dinena naimiemo jicanote:

—Simón Pedro, ¿niése o comecina raitio? ¿Bumona illaicomini di imaci ucubena ocabiti maci? Imaci jitoniamona ocabiñedi maci; ia naimacimo duide cominimona otimaci.

²⁶ Uai ote:

—Raise llotio. Naimacimo duide cominimona ocabiti maci.

Ie jira Jesús raite:

—Naimaci jitoniana ibatañede. Ie isoide. Naie ucube Jusiñamui jofomo comini fecajamona, Jusiñamuimo duide. Jusiñamui Jitona cue illa jira, naimie jofo facaina naimie cuena ibatañede;

²⁷ Iadedi Jusiñamui jofo ucube orainina coco icinellera, ucubena jenuai. Joraimo aimajaitosa jai. Nano o olle lliciai fuena jibui. Nainomo ucubena baitio. Iena uanona, Jusiñamui jofomo coco facaina feca. —Pedro iena finode.

18

Jesús ie llofueoicaigano moto imiēna ille rafue
(Mr 9.33-37; Lc 9.46-48)

¹ Naie facaiseconi naimie dine ie llofueoicaigano jicanuai bitimaci:

—Jusiñamui ie cominina sedajanomo ico cai ia, ¿bu cai moto imiēna ille?

² Iena cacajanona, Jesús daje urue uaiduanona, naimaci motomo jonete.

³ Uai ote:

—Uanaicinona omoimo lloiticue. Jusiñamui dibeimo omoi illena, jeacinona omoi fañonocaiñenia, bie urue isoi omoi moto imieñedi miēna illanona, Jusiñamui sedajanomo iñeitomoi. Cue cominina omoi ia, bie urue isoi iitomoi.

⁴ Bie urue isoi abi iedoñedi miēdi Jusiñamui ie cominina sedajanomo imie moto naimiēna ille.

⁵ Bie isoidimie cuemo duillamona, naimiēna feiñotimiedi cuena jai feiñote;

⁶ Iadedi cuena ñnotimieña jeacinona finotaiacadimie iena finoñellena, jeacinona finotaiacadimie cimaimo aillue nofici maianona joraimo corobaillena, naimiēna dotacadena, cuemona mare.

Jesúdi jeacinona finoñenana llofuiā rafue
(Mr 9.42-48; Lc 17.1-2)

⁷ Jesús llotē:

—Ramo faitino duere sefuillesa. Diga ramo omoi faicana uitinomo riit-omoi; iadedi Jusiñamui omoi ramo faitimieña duere finoite.

⁸⁻⁹ Biena ñaiticue. Nie isoide rafue omoina jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacino finodomoi. Omoi abina omoi namatañeniadedi, omoi onolli jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacinona omoi finoia, iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iramo omoi jaiñellena, jeacino finoñeno.

Jesúdi naimiēna ñnotinomona damie faifillana jitañena rafue
(Lc 15.3-7)

¹⁰ Jesús llotē:

—Urue isoi omoi illena como lloticue. Iena dane lloiticue. Cue Moo naimacina uiñua jira, bie urue isoidinona jamaiñocaiñeno. Monamo cue Moo ecimo naimaci jaienisai jaca ite, naimacina canollena.

¹¹ Jusiñamuimona cue billanona, naimiena iñoñedinona naimaci jeacinomona jilloitallena biticue.

¹² Ero, omoimo iena jiaie rafuedo lloiticue. Damie mo cien diga toica llauda ite. Naiemona daje feiraite. Iena faifiñellena, jiaie llaudaiaina faionocaida, iena jenuaite.

¹³ Iena baillanona, ieri iobite. Baillari oni jaiñedinori bai femo iobite.

¹⁴ Ie isoide. Jusiñamui naimiena iñotinomona damie faifillana jitaiñede. Ie jira naimacina jeacinona finotañeno.

*Jesús omoi ecimo itimie omoina jeare fñuana llofua rafue
(Lc 17.3)*

¹⁵ Jesús nia llote:

—O ecimo itimie ona jeare finoia, naimie dine iena lluai. Daimaia iena omico llono. O uai naimie fairioia, naimie o dibeimo jai iite.

¹⁶ O uai naimie fairioñenia, jiaie menamiena uiño, o llamo iaimaiaiai cacareillesa.

¹⁷ O uai naimie fairioñenia, omoi ofiracomo bicabitinomo iena llono. Naimaci uai naimie fairioñenia, Jusiñamuina iñoñediniena omoi nabaiñena isoi, Moisés llogacino raise jaiñedino omoi nabaiñena isoi, naimiena nabaiñeno. Omoi ofiracomo naimiena feiñoñoeno.

¹⁸ Iese omoi finoia, omoi comeciaie daje isoi lloillamona, Jusiñamuimona mare.

¹⁹ Omoimo nia lloiticue. Daje isoi comecina cue Moo Jusiñamuimo jicallena menamaiaiai facajamona, cue Moomo iaimaiaia jianona, cue Moo iaimaiaiai jitaile rafuena finoite.

²⁰ Menamie cue dibeimo illamona, damie amani cue dibeimo illamona, naimaci motomo iticue.

²¹ Pedro naimie mo jicanuaibite:

—Nama, cue ecimo itimie cuena jeare finoia, ¿niga icaiño ibana cue oñoeno iena feitaicue? Nibai siete digacaiño.

²² Jesús dinena uai ote:

—“Nibai siete digacaiño” raitio. Ona jeare finodimie ie finoca rafuena naga icaiño feita. Iena omoi raise uiñollena, bie rafuena lloiticue.

²³⁻²⁴ Jusiñamui ie dibeimo itinona iese sedaite: Daje nairaie illaimadi ie maijiraiaia uaidote, naimaci cuentas iballena. Damie eo debede. Diez mil ucubena debede.

²⁵ Naimie ucube iñena jira, naie illaimadi ie cuenta iballena, naimie ai, ie uruaiaie diga, nana ie raruiaie diga, fecallena llote.

²⁶ Iena cacajano, ie illaima uicomo caiñici ifodo raita duere jicade: “Nama, dama ite. Fecuisse omo ibaiticue”.

²⁷ Naimie duenaillamona, naie illaima llote: “Ibatañeiticue. Cuemo jai debeñedo. Mai jai”.

²⁸ Ie mei naimie jaide. Bai jaillanona, jiaie maijiraiaie diga dafaifide. Jai debeñedinie mo janore debede. Cien ucubena debede. Jai debeñedinie dinena ie cimiona llinuana llote: “O debia cuemo mai iba”.

²⁹ Ie jira debedinie caiñici ifodo ana rainadacaida, duere jicade: “Ucube cuemo iñede; iadedi cuena duenai. Fecuisse omo ibaiticue”.

³⁰ Uai ote: “Ja raie jitaicue”. Naimiena duenañena jira, cárcelmo naimiena jonetade, ie cuenta iballe dinori.

³¹ Naimie nabaiñiai iena fidianona, sunaitimaci. Ie jira naimaci illaima dine nana naie rafuena lluidimaci.

³² Naie illaimadi nano debedimiena abido uaiduano, naimiemo llote: “Maraiñedio. Navui o cuentana ibatañedicue, cuemo o duere jicanua jira.

³³ ¿Bue ñe o nabaina duenaiñedio, ona cue duenaila isoi?”

³⁴ Icirillamona, naie illaima naimiena cárcelmo jonetade, nainomo duere sefuillena, nana ie cuenta iballe dinori.

³⁵ Ie isoide. Cue Moo Jusiñamui omoina duere finoite, omoi comeciai jitaillamona omoi ecimo itimie ie maraiñede finoca rafuena omoi feitañenia –llote.

19

Jesús iima ie aina dotaja rafuena llofua rafue (Mr 10.1-12; Lc 16.18)

¹ Ie llofueoicaigano diga Galileamona jaillanona, Jordán railla ille ruica dibeiemo Judeamo Jesús jaide.

² Ailluena comini naimiena racadimaci Nainomo duidinona jillotate.

³ Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

–¿Iima ie aina dotajana rairuidio? ¿Ñie isoide rafue muidona damie ie aina dotarede?

⁴ Jesús dinena uai ote:

–Moisés micori jaie cuete: “Enirue finua facaiseconi Jesiñamuidi come iaiaiaiaina finode. Imana finode. Riñona jiai finode”.

⁵ Ie jira Jusiñamuidi jaie llote: “Ie ai diga illena, iima ie moona fainonocajte. Ie eina jiai fainonocajte. Ie ai diga illamona, menade comedi daamiena jai jaide” llote.

⁶ Menade come jai damiena jai ite. Jusiñamui iese iaiaiaiaina itataja jira, iima ie aina dotañellesa. Riño ie inina dotañellesa.

⁷ Dane jicanotimaci:

–¿Bue ñe Moisés micori cuete: “Iima ie aina dotaacania, dotalle rabena nano cueite. Ie mei naiñaiñona dotaite”?

⁸ Jesús uai ote:

–Jusiñamui uaina raise omoi iñoñena jira, Moisés micori iima ie aina dotajana rairuiñede; iadedi nano dofoconi iese iñede.

⁹ Jiaie riño diga naimie illena, ie aina bu dotaia, jiaie iima diga naiñaiño iñenia, naimiedi jeacinona jai finode. Ie aina dotajana rairuidicue.

¹⁰ Naimiemo ie llofueoicaigano dinena llotimaci:

–Iese ia, cai jitaillamona aina jamai cai dotanina jira, damamei ainidicai.

¹¹ Naimacimo Jesús llote:

–Nana comini omoi como llucinodo jainidimaci. Dani Jusiñamuina jitaidino iedo jairedimaci.

¹² Dajerie naimaci jeiciamona aireiacaiñedimaci. Dajerie naimaci abina diamona aireiacaiñedimaci. Dajerie Jusiñamuina eo sedaacanano aireiacaiñedimaci.

Jesús i naimie dine uruiai billana jitailla rafue (Mr 10.13-16; Lc 18.15-17)

¹³ Jesús dine comini naimaci jesanidena atisite. Ie onolli naimacimo naimie joniamona, naimaci facaina naimie Moo diga naimie ñaillena atisite.

“Naimacina raise cano” ie Moomo lollena jitaídímaci. Ie llofueoicaigano iena rairuidímaci;

¹⁴ iadedi Jesús raite:

—Uruiaí cue dine billesa. Naimacina rairuiñeno. Cuen a bie isoide ñnotinodi Jusiñamui ie cominina sedajanomo jainaiáidímaci.

¹⁵ Ie jira ie onolli naimacimo jonete. Naimie facaina Jusiñamui diga ñaite, naimaci marena illena. Ie mei ie llofueoicaigano diga naimie oni jaide.

*Ucuberedimie Jesús diga ñaia rafue
(Mr 10.17-31; Lc 18.18-30)*

¹⁶ Jesús oni jaillanona, conirue Jesús dine bite. Jicanote:

—Maestro, Jusiñamui diga cue jaca illena, ¿nie isoide mare rafuena ñinoiticue?

¹⁷ Jesús dinena uai ote:

—¿Bue ñe cuemo mare rafuena finuana jicanotio? Dama damie maremie. Naimiedi Jusiñamui. Naimiemo jicano; ia jaca o illena, Jusiñamui jai llogacinuaina ñnocana jai.

¹⁸ Uai ote:

—¿Nie llogacinuaina ñnoiticue?

Jesús dinena uai ote:

—Comena meineñeno. O aiñede riño diga iñeno. Fiiñeno. Jiaimiena o llogidoia, tainona lloñeno.

¹⁹ O moo uaina ñno. O ei uaina ñno. O abina o isiruilla isoi, nana cominina isirui.

²⁰ Naie conirue uai ote:

—Nana iena jai ñnoticue. ¿Nie isoide rafuena nia ñnoiticue?

²¹ Jesús dinena uai ote:

—Jusiñamui jitaillacinodo o jaiacania, o raise marebicaiacania, omo ite raruaína feca. Naie ucubena dueredinomo feca. Cuen a o ñnuamona, monamo ico jaca iitio. Cue llofuegamiena o illena, mai cue diga bi.

²² Iena naimie cacajano, sunaite. Naimiemo eo ailluena ra illa jira, iena fecaacaiñede.

²³ Jesús ie llofueoicaiganomo llote:

—Uanaicinona omoimo lloiticue. Ucuberedimiedi Jusiñamui cominina jaillena eo sefuiruite.

²⁴ Iena nia lloiticue. Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jai raise jainide.

²⁵ Iena ie llofueoicaigano cacajano, Jusiñamui cominina ucuberedino raise jainina jira, “¿Niese dueredinodicaidi Jusiñamui cominina jaitica?” raillamo comeciaina facadímaci. Raijicaillanona, raitímaci:

—Nana comini rana jitailla jira, buca jillobiti.

²⁶ Naimacimo eruaillanona, Jesús raite:

—Nana comini dani jillobinidímaci; iadedi Jusiñamuidi naimacina jillobitarede.

²⁷ Pedro uai ote:

—Ero, o llua isoi nana cai rana fañonocaida, o diga jaicabidicaí. ¿Niese Jusiñamuimona ñbana feiñoiticaí?

²⁸ Jesús dinena uai ote:

—Illaimana ico cue ia, eo ebirede illanomona cominina sedaiticue. Cue diga omoi jaicabilla jira, nainomo omoi illanuai jiai iite, nainomona omoi judúuai doce nairaiaína omoi sedallena.

²⁹ Cuenā naimie isiruillamona, ie jofona bu fainonocaia, ie amatiaina bu fainonocaia, ie miriñuaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ie eniruena bu fainonocaia, Jusiñamuimona ailluena ibana feiñoite. Monamo ico caimare iocire jaca iite. Nainomo benomo baifemo iocire caimare iite.

³⁰ Jamai bue isoidomoi. Omoimona jiaño jamai bue isoññedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

20

Jesús Jusiñamui ie cominina sedaacana llua rafue

¹ Jesús llote:

–Jusiñamui ðibeimo comini jailla rafuena lloiticue. Naimie cominina naimaci jaillamona, Jusiñamuimona nana naimie comini daje isoidimaci. Iena raise omoi uiñollena, bie rafuedo iena lloiticue. Jitiramo daje patrón ie illimo maijillena, maijuidinona jenuaide.

² Dajeriena baillanona, “Omoimo daberie ibaiticue” llote. “Jee” raitimaci. Ieconí ie illimo maijillena, naimacina orede.

³ Jitoma nia oni daidemo, mercadomo naimie jiañona cide. Jamai itimaci.

⁴ Ie jira naimacimo llote: “Cue illimo maijiai. Raise ibaiticue” llote.

⁵ Ie mei jaidimaci. Jitoma naidai ia, jiañona ciuanona, naimacimo maijillena llote. Jitoma oni caidemo, jiañona ciuanona, naimacimo maijillena jiai llote.

⁶ Jitoma jasici muido itemo, jiañona ciuanona, jicanote: “¿Bue ñellena namonana jamai itomoi?”

⁷ Uai otimaci: “Jaca caimo maijille rana budi lloñede”. Ie jira naimacimo llote: “Mai. Cue illimo maijiai” llote.

⁸ Jitoma edacidemo, naie patrón ie mullaímamo llote: “Maijirainina uaido. Jinafona maijiaidinona raire nano iba. Ie mei jitiramo maijiaidinona jinafo iba” llote.

⁹ Ie jira jinafona maijiaidinona nano ibade. Dabe ibade.

¹⁰ “Naimaci baifemo feiñoitici” raillamo jitiramo maijiaidino comeciaina facadimaci; iadedi iese feiñoñedimaci. Nana daberie feiñoitimaci.

¹¹ Ie jira naie patrón joreña jeare ñaitimaci:

¹² “Jinafona maijiaidino dallu maijidimaci. Ecasilla facaise maijiñedimaci; iadedi namonana maijidicai. Dani cai ibaja isoi ibadio” ñaitimaci.

¹³ Naimacimona damiemo naie patrón llote: “Ero, ona jeare finoñedicue. ‘Omo daberie facaiticue’ omo lloiticue. O dinena: ‘Jee’ raitio.

¹⁴ O ucubena jai o feiñua jira, mai jai. Cue jitailla jira, da o ibaja isoi dallu maijiaidinona ibadicue.

¹⁵ Cue ucubena jira, cue jitailla isoi cue ibaia, ¿niese cuena jeare ñaitomoi? Jiañona cue duenailanona, ¿bue ñellena uraidomoi? Mai jai” llote. Jusiñamui ie cominina sedaacana omoi raise uiñollena, bie rafue jai lloiticue.

¹⁶ Jamai bue isoidomoi. Omoimona jiaño jamai bue isoññedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

Jesúdi ie fiodaillena dane llua rafue

(Mr 10.32-34; Lc 18.31-34)

¹⁷ Jerusalémo ie llofueoicaigano diga Jesús jaidemo, dani naimaci diga ñaillena, naimacina oni uite.

¹⁸ Raite:

—Ero, Jerusalémo jai jaidicai. Monamona billanona, iimana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci.

¹⁹ Judiañedino illaicominimo cuena fecaitimaci. Cueri jifanoitimaci. Cuena faitimaci. Ie mei cuena coraitimaci; iadedi cue fiodailla mei, darui amani illanona, Jusiñamui cuena jillotaite.

*Jesús dine Jacobo Juan iaiaia ei billa rafue
(Mr 10.35-45)*

²⁰ Naie facaise Jesús dine Jacobo, Juan iaiaia ei diga, bitiaiaia. Iaiaia moodi Zebedeo. Jesús dine iaiaia ei rillanona, naimiena raise uaidollena, caiñici ifodo ana rainadacaida llote:

—Omo daje rafue jicanoiadicue.

²¹ Naiñaño Jesús dinena jicanote:

—¿Bue ñaibitio?

Naiñaño uai ote:

—Illaiana o jailla mei, cue jito iaiaia o ecimo illana o lluaña jitaicue. Damie o nabeimo. Jiaimie o jarifebeimo. —Jiaño baifemo iaiaia illena, naiñaño iese llote.

²² Naimacimo eruaillanona, Jesús dinena uai ote:

—O jitaillacinona raise uñañedio. Cue duere sefuiticue.

Naiñaño jito iaiaiaimo jicanote:

—¿Ie isoi duere sefuicadomico?

Uai otiaiaia:

—Jii.

²³ Jesús dinena raite:

—Cue isoi duere sefuitomico; iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

²⁴ Iena jiaie llofueoicaigano cacajano, naie iaiaiairi iciritimaci.

²⁵ Jesús nana naimacina uaiduanona, raite:

—Nana illaicominidi naimaci anamo itinona ocuicabidimaci;

²⁶ iadedi omoi dine iese iñena. Omoimona bu imiena iacania, omoi mullaiana naimie jaisoillasa.

²⁷ Omoimona bu imiena iacania, omoina naimie canocana jaisoillasa.

²⁸ Cuemona fueo. Biñedicue cominina cue ocuillena; iadedi cominina canuaibidicue. Cue jitailla jira, nana comini facaina fiodaisaibiticue. Naimaci jeacinomona naimaci jillobillena, fiodaisaibiticue. Ailluena comini cuena iñuamona jilloitimaci. Coninina omoi canua —llote.

*Jesús mena uisindiaiaia jillotaja rafue
(Mr 10.46-52; Lc 18.35-43)*

²⁹ Jericó railla nairaiaimona jaidimacimo, ailluena comini naimaci jinafona racadimaci.

³⁰ Ie facaiseconi mena uisindiaiaia nai fueo raidiaiaia. Jesús naiedo jaillano cacajano, naimiena ado uaidotiaiaia:

—David micori Jitona o illamona, Jusiñamuimona o billa jira, cocona duenai. Cocona cano.

³¹ Iaiaia llicaillena, Jesús diga jaidino iaiaia lletade; iadedi eo cuirioidiaiaia:

—Maestro, David micori Jitona o illamona, cocona duenai.

³² Iaiaia Jesús cacajano, ieconí naidadajanona, iaiaia uaidote. Jicanote:

—¿Ñiese omicono cue ñibaiana jitaicomico?

³³ Uai otiaimaiaia:

—Maestro, coco uisina o cioitajana jitaidicoco.

³⁴ Iaimaiaina duenaillanona, iaimaiaia uisina jetade. Ieconia iaimaiaia uisidi ciode. Iaimaiaia jai cuanona, ie llofueganona iaimaiaia jaillena, Jesús diga jaidiaimaiaia.

21

*Jesús illaïma isoi Jerusalémo jailla rafue
(Mr 11.1-11; Lc 19.28-40; Jn 12.12-19)*

¹ Oni jaillanona, Jerusalémo iaireicaidimacimo, Betfagé railla nairaimo Jesús ie llofueoicaigano diga ridimaci. Olivos railla anedumo ite. Ie llofueoicaiganomona Jesús menamiena orede.

² Raite:

—Bie nairai illa uicomo mai omico jai. Nainomo cuinaca burrana baitomico. Ie ecimo ie uruena baitomico. Naie iaimaiaia suiñuano bene ati.

³ Omicomo “¿Bue ñellena bie suiñodomico?” bu jicanoia, llono: “Coco Nama naie iaimaiaia jitaide. Nailli naimie iaimaiaia raire abido oretaite” —raite.

⁴ Jusiñamui facaina lloaïma micori jaie llua isoi, bie rafue suide.

⁵ Naimie micori jaie cuete:

Jerusalén itinomo llono:

“Ero, omoi illaïma omoïna sedallena biite.

Abi iedoñeno biite.

Burra urue emododo naimie biite”
cuete.

⁶ Iaimaiaia jaillanona, Jesús llua isoi finodiaimaiaia.

⁷ Burra ie urue diga atidiaimaiaia. Burra urue emodomo naimie llofueoicaigano naimaci iniroina jobianona, ie emodomo Jesús rainadate.

⁸ Naimiena iobitallena, illaïma isoi naimie jaillena, ailluena comini imaci iniroi diga, naiso motomo jobedimaci. Jiaïno raforono uanona, naiso motomo jobedimaci.

⁹ Dajerie Jesús uicomo jaidimaci. Dajerie naimie jinafona jaidimaci. Ado curiisite:

—¡Cai Jilloitaraïma billa! ¡Naimiedi David micori Jito! ¡Jusiñamui mamecido bitimie eo mare! ¡Jusiñamui caina jilloitajasa!

¹⁰ Jerusalémo naimie ridemo, nana nainomo itino naie rafuena uiñoiacadimaci.

—¿Buta bite? —jicanotimaci.

¹¹ Jesús diga bitino ñinena uai otimaci:

—Jesús bite. Naimiedi Jusiñamui facaina lloaïma. Galileamo ite Nazaret imie.

*Jesús; Jusiñamui jofomona damieriena dotaja rafue
(Mr 11.15-19; Lc 19.45-48; Jn 2.13-22)*

¹² Jerusalémo Jesús rilla mei, Jusiñamui jofomo naimie jaide. Naie jofu eo aillue. Diga cuartos nainomo ite. Jusiñamuimo ofomaiaia fecallena, naimiemo toica llaudaiaia fecallena, nainomo comini jaisoidimaci. Naie cominina ibatajanona, ofomaiaia, toica llaudaiaia diga, damierie fecaudimaci. Iena Jesús cuanona, naimaci mesaiaia oni caicode. Ucugina fecaudino rairacuai jiaï oni caicode.

¹³ Naimacimo llote:

—Ie facaina lloraima Jusiñamui llogacino jaie cuega: “Cue jofo ite, nainomo cuemo comini jillena” cuega. Ero, ailluena omoi ibataja jira, naimie jofona firiruidino jofona omoi finoca.

¹⁴ Ie facaise uisinidino Jusiñamui jofomo naimie dine bitimaci. Ñujañujacaida macaritano jiai bitimaci. Naimaci billanona, Jesús naimacina jillotate.

¹⁵ Nainomo Jesúdi diga mare rafuena finode. Diga cominina jillotate. Iena cianona, nainomo ite uruiái ado cuiriisite:

—David micori Jitori iobidicai. Jusiñamui lloraini micoriai jaie llua isoi, cai jilloitaraima jai ite.

Iena cianona, iena cacajanona, judíuai illaicomini iciritimaci.

¹⁶ Naimiemo jicanotimaci:

—¿Bie uruiái cuiriillana cacadio?

Jesús dinena uai ote:

—Jii, cacadicue. David micori iena jaie cuete. ¿Niese iena cacaiñedomoi? Naimie cuete:

Naimiemo Jusiñamuidi uruiaina mare iobillacinona fecataite.

¹⁷ Naimacina fañonocaida, Betaniamo Jesús jaide, nainomo inillena.

Jesús higuera railla riarana faidua rafue

(Mr 11.12-14, 20-26)

¹⁸ Ie areruido Jerusalémo abido ie llofueoicaigano diga Jesús bia, aimetaite.

¹⁹ Nai fuemo higuera railla riarana cianona, iena jibuide. Naiemo naie llisilladi inede. Dama ie ibena cide. Ie jira naie amenana llote:

—Biemona jaca llisiñeite. —Iese railla dacaiño naie riaradi duide.

²⁰ Ie llofueoicaigano iena cianona, rajjicaillamona raitimaci:

—¿Niese naie riarara raire duide?

²¹ Jesús dinena uai ote:

—Uanaicinona omoimo lloiticue. Cue Moona raise omoi inoia, bie isoide rafuena finoitomoi. Raise omoi inoia, omoi comeci igireñenia, bene ite anedumo omoi lloia: “Monailaimo o illena, benomona mai jai”, Jusiñamui o jitaille rana finoite.

²² Naimie iena finuana omoi inuamona, nie isoide rafue cue Moomo omoi jicajia, iena naimie finoite.

Jesúdi ie siño uaina llua rafue

(Mr 11.27-33; Lc 20.1-8)

²³ Jerusalémo rillanona, Jusiñamui jofomo Jesús fo jailla mei, nainomo ite cominina llofujete. Judíuai illaicomini naimie dine billanona, jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

²⁴ Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue.

²⁵ Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori llua inoñedomoi?”

²⁶ “Comini” cai fairioia, bene itino caina nibai meineitimaci, Juan micoridi Jusiñamui facaina lloraima naimaci railla jira.

²⁷ Ie jira fairiotimaci:

—Uiñoñedicai.

Jesús dinena raite:

—Ie muidona cuemo nie isoide uai illana omoimo lloñeiticue.

Jesúdi mena jito iaimaiaí illa llua rafue

²⁸ Judíuái illaicomínimo Jesús llote:

—Bie rafuemo omoi comeciaina faca. Damiemo mena jito ite. Nano doforamiemo llote: “Moo, cue illímo birui maijiaí”.

²⁹ Uai ote: “Jaiacaiñedicue” llote. Dallu illanona, ie comeciina dane facajano, maijiaide.

³⁰ Jiaie jitomo daje isoi llote. Naimie uai ote: “Jíi, maijiaitícué” llote. Iese llote; iadedi maijiaíñede.

³¹ ¿Nie jitoca ie moo jitailla rana finode? —jicanote.

Uai otimaci:

—Nano doforamie.

Jesús dinena naimacimo llote:

—Uanaicinona omoimo lloiticue. Omoína ñaiticue. Omoimona marañedimaci; iadedi Jusiñamui comínina naimaci jaillamona, gobierno ucube oraini Jusiñamui illanomo iitimaci. Callirediñaiñuaidi nainomo jiai iitimaci; iadedi nainomo jaca iñeitomoi.

³² Marena omoi comeciaina itatallena, Juan micori navui bite; iadedi naimie micorína ñnoñedomoi. Ucube oraini naimie micori rafuena ñnotimaci. Callirediñaiñuái naimie micori rafuena ñnotimaci. Iena uiñotomoi; iadedi omoi comeciái uaillaina meidoñnedomoi. ñnoñedomoi.

Jesúdi marañede maijiraini rafuena llua rafue

(Mr 12.1-12; Lc 20.9-19)

³³ Judíuái illaicomínimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ñbatajanona jiaínomo fecade. Ie mei jiaie eniruemo jaide.

³⁴ Uvas jai einaila facaise riaraiaina sedaraini dine naie patrón janore mullaiaína orede, naimie facaise iedinona naimie feiñollena;

³⁵ iadedi naie sedarainidi ie mullaiaína duere finosite. Daje mullaimana fatimaci. Jiaimiena meinetimaci. Jiaimiena noficina fairinotimaci.

³⁶ Ie mei patrón jiaie mullaiaína orede. Naimacina jiai duere finodimaci.

³⁷ Ja muidomo ie jitona orede. “Cue jitona jaciruitimaci. Naimie uaina ñnoitimaci” comeciina facade.

³⁸ Riaraiaina sedaraini naimiena ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci.

³⁹ Naimiena jino dotajanona, naimiena meinetimaci.

⁴⁰ Naie illi nama íco abido bille mei, ¿nie isoide rafuena naimie naie illina sedarainina finoite? Cuemo llono —llote.

⁴¹ Judíuái illaicomíni uai otimaci:

—Naie marañedinona dueruñeno meineite. Ie mei jiaie comínimo naie illi fecaite, iena sedallena, naiemona riarana feiñollena.

⁴² Naimacimo Jesús llote:

—Naie illi sedaraini isoidomoi. Jusiñamui facaina lloraíma micori omoína jiae cuete. Ie cuela fuena raise facañedomoi. Naimie micori cuela:

Jofó finoraini jitaíñena noficidi nana naie jofomo ite nofici baífemo jai uaide. Jusiñamui iena finotate.

Iena cai uiñuamona, “Eo mare” raiticai

cuega. Jusiñamui cominina damierie jaillana naimie micori cuete. Jusiñamui oretagamiena damierie jitañenamona, naimie cominina jaiñeitimaci; iadedi Jusiñamui oretagamiena ailluena inuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitañena jira, naimie cominina jaiñeitomoi.

⁴³ Jusiñamuidi ie cominina sedajanomo omoina itatañeite; iadedi jiaie cominina nainomo itataite, naimie jitailla rafuena naimaci finua jira.

⁴⁴ Jesús llote:

—Naie noficina dane ñaiticue. Noficimo bu ecaitaia, bofedate; ia naie nofici bumona ana uai, naimiena saitaite. Ie isoide. Cue llua omoi jamaia, duere sefuitomoi. Iena omoi inoñena, ja muidomo faifitomoi.

⁴⁵ Jesús llua naie judíuai illaicomini cacajanona, naimiedi naimacina ñaiana jai uñotimaci.

⁴⁶ Icirillamona, naimiena gaitacadimaci; iadedi cominina jaciruitimaci, cominidi naimie Jusiñamui facaina lloraimana raillanona.

22

Jesúdi illaíma ie jito aína ua llua rafue

¹ Jusiñamui jofomo Jesús nia illanona, nainomo itinona llofuede:

² —Jusiñamui dibeimo comini jailla rafuena omoimo lloiticue. Iena omoi uñollena, bie rafuedo iena lloiticue. Illaímadi ie jito ai ua rafue finode.

³ Naimie ie mullaini orede, rafuemo llogano uaidollena; iadedi nai llogano biacaiñedimaci.

⁴ Dane jiaie mullaini oretajano llote: “Nai lloganomo llono: ‘Rafue guille jai finocasa. Firetaiai, farediretaiai diga, jai faga. Jai nana fuite. Rafuemo mai bi’”.

⁵ Naimaci cacarefiacaiñede. Damie ie illimo jaide. Jiaimie ie chinganamo jaide.

⁶ Jiaíno mullainina gaitadimaci. Gaitajanona naimaciri jifanotimaci. Ja muidomo naimacina meinetimaci.

⁷ Ie jira naie illaíma eo icirite. Naimie soldaduai oretate, naimie mullaini meinetinona meinellena. Naimie naimaci illano jobaitate.

⁸ Ie meinoconi ie fiebie mullainimo llote: “Rafue guille jai nana finoca; ia llogano maraiñedimaci.

⁹ Naiso bojicaillanomo jai. Nana o ciolle diese llono: ‘Rafuemo bi’ llono”.

¹⁰ Ie jira ie mullaini jai naisona jaide. Maraiñedino baillanona diese ofitatimaci. Jiai maredino diese ofitatimaci. Rafue finua jofona naie llogano diga oruide. Illaíma nainomo fecaca iniroina jitañenamaci.

¹¹ Illaíma fo bia, mesamo itino jibuillena, ñinomo daje iima rafue ie mare iniroina jitañenana ciode.

¹² Naimiemo jicanote: “Nabai, ¿niese bene rafue ie mare iniroina jitañeno bitio?” jicanote. Naimie uainicaide.

¹³ Ie jira naie illaíma ie mullaiáimo llote: “Naimie cuena inoñena jira, naimie onolli dajemo nitaicaida maino. Ie eillina daje isoi maino. Cuemona naimie jino dota. Nainomo itino diga duere sefuite. Jiai sunaite” llote.

¹⁴ Ero, naie rafuemonona omoi fueo. Illaíma ailluena uaidote; ia nana biñedimaci. Ie isoide. Jusiñamui ailluena cominina uaidote; iadedi naimacimona janore fetode.

*Jesúmo gobiernomo ucubena fecajana jicanua rafue
(Mr 12.13-17; Lc 20.20-26)*

15 Naimacimo Jesús llua mei, fariseuai comini abido jaillanona, coniniri siadotimaci. Naimie raise uai oñedena, naimiena duere finollena, Jesúsna facaciacadimaci.

16 Ie jira naimie dine naimaci cominimona dajerie oredimaci. Herodianuai railla cominina jiai jaidimaci. Jesús dine rillanona, raitimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio.

17 Omo rafuena jicanoiacadica. Dani Jusiñamuina sedadica; iadedi romanos railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caímo llono —llotimaci.

18 Naimaci comeiaína marañedicinona facajana Jesús uifñuamona, uai ote: —¿Bue ñellena cuena facacitomo? Maredinona abi caitadomoi.

19 Ucube cuemo acata —lote. Ie jira acatatimaci.

20 Jesús dinena jicanote:

—¿Bu ie joreño nainomo ite? ¿Bumo jainaiaide bie cuega radi?

21 Uai otimaci:

—César.

Jesús dinena raite:

—César iena itedi Césarmo ille. Jusiñamui iena itedi Jusiñamuimo ille —raite.

22 Naimie lluaña cacajano, rajicaidimaci. Naimie jeare uai oñena jira, naimie dinomona oni jaidimaci.

*Jesús dine saduceuai railla comini billa rafue
(Mr 12.18-27; Lc 20.27-40)*

23 Naie facaise saduceuai railla comini naimie dine bitimaci. Fiodaillamona jaca buna jilloñellena ñinotimaci. Jesúsno llotimaci:

24 —Maestro, Moisés micori jaie cuega: “Íma fiodailla meinoconi, naimie urue iñenia, ie ama naie feciño olle. Naimiedi uruiaína ie ama facaina comuitaite” cuega.

25 Ero, cai motomo siete amatiaí ite. Nano doforamie ie aína ote. Naimie nia uruiaínide fiodailla. Ie emodo imie ie ama feciñona ote. Uruiaínide jiai fiodailla.

26 Naie siete digamiedemona iese sefuide.

27 Ja muidomo naie riño jiai fiodaite.

28 Fiodaillamona, ico naimaci jilloiadedi, ¿bu naie riño ienite? Naiñaiño siete digamiéna inirede —llotimaci.

29 Jesús uai ote:

—Moisés micori cuegafuiaína raise omoi uifñoñena jira, Jusiñamui uaina raise omoi uifñoñena jira, bie isoide rafuena raise uifñoñedomoi.

30 Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisaí ainidimaci. Ininidimaci. Ie isoi iitimaci.

31 Fiodaitino jilluana omoimo lloiticue. Jusiñamui omoi jaiagaimo jaie llogacinona ñnoñedomoi. Naimie llote:

32 “Abraham ie Jusiñamuídícue. Isaac ie Jusiñamuídícue. Jacob ie Jusiñamuídícue” llote. Jai fiodaitimaci; ia naimaci joreñuai nia itimaci. Jusiñamuidi dani cagedino imaci Jusiñamuina jira, naimaci joreñuai naimie dine itimaci. Ico naimaci abiaína jiai jillotaite —llote.

33 Nainomo ite comini iena cacajano, naimie llofuiari rajicaidimaci; ia saduceuai dinena uainicaidimaci.

*Jesús nanoca llogacinona llofuia rafue**(Mr 12.28-34)*

³⁴ Saduceuai comini uainicaillana fariseuaidi jai fidiano, Jesús dine ofidimaci.

³⁵ Naimacimona damiedi Moisés micori jaie llogacinona eo uiñote. Jesúsna facacillena, naimiemo jicanote:

³⁶ —Maestro, Moisés micori jaie llogacinuaimona, ¿nie llogacino ua nanoca llogacinona?

³⁷ Jesús dinena uai ote:

—Moisés micori jaie cuela: “Omoi jitailla jira, nana omoi comecimona cai Nama Jusiñamuina isirui. Naimiemo omoi comecina eo faca”.

³⁸ Bie ua nanoca llogacino.

³⁹ Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”.

⁴⁰ Bie mena llogacinomona nana jiaie llogacinuai comuide. Nana Moisés micori llogacinuai naiemona comuide. Nana Jusiñamui facaina lloraini micoriai llogacinuai naiemona comuide —llote.

*Jesús dinena fariseuai cominimo jicanua rafue**(Mr 12.35-37; Lc 20.41-44)*

⁴¹ Naimie dine nia fariseuai comini ia, Jesús naimacimo llote:

⁴² —Jusiñamui lloraini micoriai jaie raitimaci: “Jusiñamuidi Cristo raillamiena oretaite, ie cominina sedallena”. ¿Niese naimiena raitomoi? ¿Bu jito naimiedi?

Uai otimaci:

—David micori jito. David micori isoi Cristo ie cominina sedaite.

⁴³ Jesús dinena jicanote:

—Naimiedi David micori isoidena, ¿bue ñellena David micori “Cristodi cue Nama” llote? Jusiñamui Joreñodi David micori ñaitatajanona, David micori llote:

⁴⁴ Jusiñamuidi cue Namamo llote:

“Illaimana o illamona, cue nabei dine ana rai.

Ona ñnoñedino o anamo itataitacue”.

⁴⁵ “Cristodi cue Nama” David micori raita. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama.

⁴⁶ Uaina onidimaci. Naie facaisemona Jesús ie uaina dane uaitañedimaci.

23*Jesúdi judíuai illaicominina ñaia rafue**(Mr 12.38-40; Lc 11.37-54; 20.45-47)*

¹ Jusiñamui jofomo Jesús nia illanona, naimie dine ailluena comini bitimaci. Ie llofueoicaigano nainomo jiai illanona, nana naimacimo llote:

² —Moisés micori llogacinuaina llofuerañidi naie rafuedo jai jaicabidimaci. Fariseuai comini iedo jiai jaicabidimaci.

³ Naimaci llofuacinodo omoi jai. Naimaci llofuiana omoi cacarefi; iadedi naimaci illa isoi omoi iñeno, naimaci llofuacinodo naimaci jaiñena jira.

⁴ Omoi einamaci llogacinuaido raise omoi jaillena, diga rafuena omoi ñnuana jitaídímaci; iadedi iedo omoi jaillena, omoína jaca canoñedimaci. “Jusiñamuina eo raise sedadicaí” comecina facadimaci. Iemo naimaci comecina facajamona,

⁵ iena omoï cioillena, nana naimaci finua rafuena marefodo finodimaci. Jiaie cominimo ite Jusiñamuimo jirabe baifemo faitibena uiacacabidimaci. Iniroi fuedadi aillofena jonegana gaidimaci.

⁶ Rafue ia, naimaci jamai bue isoiñedinomo comecina facajanona, rafue nama ecimo raicadimaci. Ofiracomo uicomo raicadimaci, comini naimaciri acarillena.

⁷ Nine naimaci jaiä, nana comini naimacina uaiduana gaidimaci. Maestrodicinona uaiduana jiai gaidimaci.

⁸ Jusiñamuina eo raise naimaci sedajana omoï uiñuana jitaidimaci. Naimaci isoi iñeno. Omoï damacina jira, omoïmona damie omoï baifemo faiamo comecina facañeno. Naimiena maestrona raiñeno. Omoï baifemo cue illanona, omoï maestrodicue.

⁹ Omoï Moo Jusiñamui monamo illanona, dama naimiena seda. Jiaimiena seditañeno. Jusiñamui isoi jiaimiena “Moo” raiñeno.

¹⁰ Omoï damacina jira, omoïmona damiena “Cai illaima” raiñeno. Omoï illaimana jai iticue.

¹¹ Omoïmona bu imiena jaiacania, omoï nullaimana naimie nano jaillanona, omoïna naimie canua.

¹² Jusiñamuidi “Jiaino afemo iticue” raillano comecina facadimiena jamai bue isoidimiena itataite; ia Jusiñamuidi “Jiaino afemo iñedicue” raillano comecina facadimiena jamai bue isoiñedinomiena itataite.

¹³ Naie facaise Moisés micori llogacinona llofuerañidi fariseuai comini diga illanona, Jesús naimacimo llote:

–Jusiñamui omoïna duere finoite. Mareuidinona abi caitadinodomoï. Jusiñamui dibeimo comini illana jitañedomoï. Naimie dibeimo omoï illana jiai jitañedomoï. Ie muidona Jusiñamuimona duere sefuitomoï.

¹⁴ “Jusiñamuina eo sedadimaci” omoïmo comini comeciaina facajana jitaïdomoï. Ie jira are jidomoï; iadedi iese iñedomoï. Maraiñede rafuena finocabidomoï. Jifuanona feciñuai rana bairocabidomoï. Ie jira Jusiñamui omoïna eo duere finoite.

¹⁵ Damiena omoï dibeimo itatallena, omoï isoi Jusiñamui rafuedo naimie jaillena, diga rafuena finodomoï. Omoï dibeimo illa mei, omoï baifemo omoï einamaci llogacinodo naimie jaillana jitaïdomoï. Omoï diga ico naimie ua faifite. Cominina uanañedicinodo jaitatomoï. Iese omoï illa jira, duere sefuitomoï.

¹⁶ Omoï llofuiacino diga cominina canoñedomoï. Mareuidinona abi caitadinodomoï. Raicabitomoï: “Cai lloga uai cai finollena jiai comini uiñollena, Jusiñamui jofomo ite oro mamecina llinoticaï; iadedi Jusiñamui jofu mamecina cai llinoia, cai lloga uaina cai finoñenia, caïmona mare. Jusiñamuimona duere sefuiñeiticaï” raicabitomoï.

¹⁷ Abi uiñoñedomoï. Omoï llofuiacino diga cominina canoñedomoï. Jusiñamui jofomo naie oro jainaiilla jira, naie orodi mare; iadedi naie oro naie jofu baifemo uaiñede. Abina omoï uiñoñena jira, Jusiñamui omoïna duere finoite.

¹⁸ Jiai raitomoï: “Jusiñamuimo faga toïca ocaina jobaisoillano mamecina cai llinoia, cai lloga uaina cai finoñenia, caïmona mare; iadedi Jusiñamuimo fecaca toïca ocaina mamecina cai llinoia, cai lloga uaina jaca finoiticaï”.

¹⁹ Abi uiñoñedomoï. Omoï llofuiacino diga cominina canoñedomoï. Naie jobaisoillanomo naie ocaina illa jira, naie ocaina mare; iadedi naie ocaina naie jobaisoillano baifemo uaiñede.

²⁰ Ero, Jusiñamui ocaina jobaisoillano mamecina omoi linoia, nainomo ite ocaina mamecina jiai llinotomoi.

²¹ Jusiñamui jofo mamecina omoi linoia, Jusiñamui nainomo illa jira, naimie mamecina jiai llinotomoi.

²² Monamo ite ra mamecina omoi linoia, Jusiñamui illano nainomo illa jira, nainomona cominina naimie sedaja jira, naimie mamecina jiai llinotomoi. Omoi llua rafuena omoi finoñenia, Jusiñamui omoina duere finoite.

²³ 'Mareuidinona abi caitadinona omoi illamona, omoimo nia lloiticue. Nana omoi illimo ite ramona, nana omoimo ite ucubemona Jusiñamui jjanore jisa fecacabidomoi. Nana comini omoi isoi illena jitaïdomoi. Mare; iadedi nanoca rafuena jaca finoñedomoi. Jiaie cominimo omoi comecina facañedomoi. Jiaie cominina duenaiñedomoi. Omoi lloga uaina finoñedomoi. Nana naie isoide rafuena omoi jiai finua. Iena omoi finoñenia, Jusiñamui omoina duere finoite.

²⁴ Abina uiñoñedomoi. Jallecima jiroracomo ia, iena oni faiga; ia aillue ra nainomo ia, iena cioiñoño namo gutadomoi. Ie isoide. Omoi llofuaiacino diga cominina canoñedomoi. Jusiñamui ie eo jitailla rafuedo comini jaillana llofueñedomoi. Nanocafueñededo comini jailla rafuena llofuetomoi. Nanoca rafuedo comini jaillana llofueñedomoi.

²⁵ 'Omoimo nia lloiticue. Omoi einamacì llogacinodo eo jaidomoi; iadedi omoi comeciaina raise finoñedomoi. Eo fiidomoi. Jifuianona comini rana bairodomoi. Jeacinona finocana jaidomoi.

²⁶ Abina uiñoñedomoi. Da pocillos jinafo, da platos jinafo jocodino isoidomoi. Pocillos jerai, platos jerai jocoñedino isoidomoi. Omoi abina finodomoi; iadedi omoi comeciaina raise finoñedomoi. Nano omoi comecina raise fino. Mare rafue finocana jai. Omoi einamacì rafuemo comecina facañeno; ia Jusiñamui rafuemo comecina faca. Iese omoi jaiñenia, Jusiñamui omoina duere finoite.

²⁷ 'Omoimo nia lloiticue. Marena finoca raiafo isoidomoi. Jinofe marena eruaide; iadedi nainomo mare ra iñede. Comini illaici jamai ite. Jai maraiñede.

²⁸ Ie isoidomoi. Marena eruaïdomoi; iadedi maredinona abi eo caitadomoi. Omoi comeciari eo maraiñede. Omoi comecina raise omoi finoñenia, Jusiñamui omoina duere finoite.

²⁹ 'Omoimo nia lloiticue. Naimacimo birui omoi comeciaina raise facallena, Jusiñamui facaina lloraini micoriai raiafona marena eruaillena finodomoi. Mareuidino micoriai raiafo emodo marena eruaillena finodomoi,

³⁰ raillano: "Cai jaiagai Jusiñamui facaina lloraini micoriai micoriai meinetimaci. Naie facaiseconi iticaïdena, naimaci isoi finoñedicaï. Cai jaiagai isoi birui iñedicaï" raitomoi;

³¹ iadedi omoi llamona Jusiñamui facaina lloraini micoriai meinetino uruaï omoina uiñoñeticaï.

³² Omoi jitailla jira, omoi jaiagai isoi jeacinona eo finocana mai jai. Naimaci jai taineca rafuena mai omoi finocana jai.

³³ Omoi maraiñena jira, jai nairaï isoidomoi. Ja muidomo iraimona jillobiñetomoi. Nainomo duere sefuitomoi.

³⁴ Cue rafuena lloïllena, cue facaina llorainina omoi dine oretaiticue. Cue rafuena eo uiñoñinona omoi dine oretaiticue. Cue rafuena omoi raise uiñoñllena, llofueraïni omoi dine jiai oretaiticue. Dajeriena meinetimoi. Naimacina coraïtomoi. Omoi ofiracomo dajeriena faitomoi. Diga nairaïmo naimacina duere finoitomoi.

³⁵ Abel micori jaie ite. Naimie maremie. Ie ama naimiena meinete. Naimie facaisemona omoi jaigai ailluena mare cominina meinetimaci. Ie mei omoi jaigai Zacariana meinetimaci. Naimiedi Berequias jito. Jusiñamui jofomo Jusiñamuimo toica ocaina jobaisoillano ecimo naimiena meinetimaci.

³⁶ Uanaicino omoimo lloiticue. Naimacina omoi jaigai meinia muidona, omoimona Jusiñamui birui ibana oite. Naimaci isoi marañede rafuena finocana jaidomoi. Jusiñamui omoina duere finoite.

Jesús Jerusalémo itinomo llua rafue
(Lc 13.34-35)

³⁷ Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie uruiái sedaja isoi, diga icaiño cue anamo omoina uaidoiacadicue; iadedi omoi dinena cuena jitaiñedomoi.

³⁸ Iemona Jusiñamuidi omoi illanona jai fañonocaido.

³⁹ Cue Moo dine jaiticue. Cue jailla mei, cuena cioñeítomoi. Ico abido cue bia, omoi comini cuena lloitimaci: “Jusiñamui oretagamie eo mare. Naimiedi cai Nama” lloitimaci

24

Jesúdi Jerusalémo ite Jusiñamui jofo judaiana llua rafue
(Mr 13.3-23; Lc 17.22-24; 21.5-24)

¹ Jusiñamui jofomona ie llofueoicaigano diga Jesús jino jaidemo, Jesúsna nai jofona eruaítatimaci.

² Jesús dinena llote:

—Bie jofona ciodomoi. Uanaicinona omoimo lloiticue. Nana bie jofomo ite noficiái ico judaísite —llote.

³ Ie mei Olivos railla anedu dine rillanona, Jesús naie muidomo raidemo, ie llofueoicaigano naimiemo iena anado llotimaci:

—Jusiñamui jofo judaiana omo jicanooiacadicai. ¿Niruido iena suite? Caimo llono. O abido billirui iaírei ia, ¿nie isoide rafue suite, o abido billiruina cai uñollena?

⁴ Uai ote:

—Omoína bie rafuena bu jifueñellena, omoi abina rairui.

⁵ Ailluena comini cue mamecido billanona: “Cristodicue” raitimaci. Diga cominina jifueítimaci. Iemona omoi abina rairui.

⁶ Jobaimiai illena fidiítomoi; iadedi jaciruiñeno. Iese suite; iadedi abido nia bñeíticue.

⁷ Daje nairai jiaie nairai diga jobairítimaci. Daje gobierno jiaie gobierno diga jobairite. Diga illanuaimo comini aime guitimaci. Diga illanuaimo ñuisañuai suite.

⁸ Iese suia, omoi duere sefuillifue omoimo suite.

⁹ Cuen a ñoñedino omoína gaitatajanona, omoína meineítimaci. Cue cominina omoi illamona, nana nairaiái omoína enoítimaci.

¹⁰ Naie facaise cue dibeimo itinomona ailluena abido danomo jaitimaci. Iemona duere omoi sefuillena, omoína janoñeítimaci; iadedi omoína enoillamona, omoína llogidoítimaci.

¹¹ Naie facaise diga comini raitimaci: “Jusiñamui facaina llorainidicai”; iadedi Jusiñamui facaina llorainíñedimaci. Uanaicinona lloñeítimaci. Diga comini naimaci dibeimo itatititimaci.

¹² Jeacino eo comuicana jailla jira, ailluena comini conini isiruiñeitimaci;

¹³ iadedi cuena fainonocaiñedimie ja muidomo monamo jaca iite. Naimiena jillotaiticue.

¹⁴ Diga cominidi Jusiñamui dibeimo comini ille rafuena nana nairaimo lloitimaci, nana nairaiari iena cacaillena. Ie mei abido biititcue.

¹⁵ *Cue lluomo cacarei. Daniel micori Jusiñamui facaina lloraima. Naimie micoridi jiaimie jearede rafue finollena jaie llote. Naie rafue sua, Jusiñamui jofomo Jusiñamuina sedañeitomoi. Nainomo naie jearede rafue finuana omoi ciuanona,

¹⁶ naiemona omoi jillobillena, duere omoi sefuiñellena, Judeamo omoi illamona, aneduai dine omoi aisi.

¹⁷ Jofo emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uiñeno.

¹⁸ Aneduai dine raire rillena, illimo omoi ia, abido jofomo biñeno, omoi inroi omoi diga uillena.

¹⁹ Naie rafuemona jillobillena, naie facaise urueside riño duere sefuite. Uruena nia jirode riñodi jiai duere sefuite.

²⁰ Eo duere sefuiñellena, Jusiñamuimo omoi jicano, rollime facaiseconi bie rafue suiñellena. Moisés micori sábadomo are jaillana jaie rairuide. Sábadoruimo bie rafue suiñellena, Jusiñamuimo jicano.

²¹ Naie facaise comini eo duere sefuitimaci. Enirue finua facaiseмона iese comini nia duere sefuiñedimaci. Ico iese eo duere sefuiñeitimaci.

²² Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

²³ *Ie facaise omoimo bu raia: “Jai, Jusiñamui facaina lloraima benomo birui baireda. Naimiedi Cristo”, iena ñnoñeno. Jiaimie raia: “Oni batine Cristo birui baireda”, iena ñnoñeno.

²⁴ Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci.

²⁵ Ero, bie rafue nia suiñenia, iena omoimo jai llotitcue.

²⁶ Omoimo naimaci raia: “Ero, batine jofue iñenanomo Cristodi ite”, nainomo jaiñeno. Naimaci raia: “Ero, bene bie jofomo Cristo ite”, iena ñnoñeno.

²⁷ Mona borillamona mona jillacidi usere ciode. Nana cominimo baireda. Ie isoide. Cue abido bia, nana comini iena uiñoitimaci.

²⁸ Urujaisai rifaide ramo ofillana uiñua isoi, nana cuena ñnotino cue billena uiñoitimaci.

Jesús abido ie bille rafue

(Mr 13.24-37; Lc 17.26-30, 34-36; 21.25-33)

²⁹ Jesús llote:

—Naie duere sefuilla facaise meinoconi jitoma lligaiñoñeite. Fivui jiai lligaiñoñeite. Monamona ucuai llujite. Nana naie radi jaidisite.

³⁰ Ie mei monamo baireditcue. Ieconi nana nairaiari jarire iitimaci. Jacinaitimaci. Uillie motodo cue billena cioitimaci. Ebire biititcue. Naimacina cue sedallena, illaimana biititcue.

³¹ Cue jaienisaína cue ecimona oretaiticue. Ado trompeta ficiretajano, cue fetocano diese naganomona ofitaitimaci.

³² *Higuera railla riaromona omoi fueo. Bie eniruemo naie riaru firuillamona, fiemona raire illana uiñotomoi.

³³ Ie isoide. Bie rafue ico sua, cue billirui iaerei illena uiñoitomoi.

34 Uanaicinona omoimo lloiticue. Nana bie rafue suille facaiseconi bie nairai nia iite.

35 Mona enirue diga fuite; iadedi cue lloga uai jaca suite.

36 Cue abido billirui jaca bu uiñoñede. Jusiñamui jaienisaí iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote.

37 Abido cue billirui iairei ia, Noé micori facaiseconi itino isoi comini iitimaci. Naimaci duere sefuillemo Noé micori facaise itinodi comeciaina facañedimaci.

38 Naie facaiseconi nia eo noci deiñenia. Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori.

39 Nia noci deiñenia, Noé micori lloga uaina inoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue.

40 Naie facaiseconi menamie illimo danomo iitiaimaiaí. Damie Jusiñamui dine jaite. Jiaimie fiebillanona, Jusiñamuimona duere sefuite.

41 Mena riño danomo doberitaiñuaí. Dañaiño Jusiñamui dine jaite. Jiañaiño fiebillanona, Jusiñamuimona duere sefuite.

42 Cue billirui omoi uiñoñena jira, iemo ocuiri.

43 Bie rafuemo omoi comeciaina omoi faca. Jofo namadi fiiriraíma nie naiona billena uiñotena, ie rana faifñellena, ie jofona raise sedade.

44 Ie isoi cue billemo ocuiri. Monamona ico abido biiticue. Omoi ocuiriñena facaisemo riiticue. Ie jira cue billemo nagarui ocuiri.

*Jesúdi patrón ie mullaimana ie jofona sedataja llua rafue
(Lc 12:41-48)*

45 Jesús llote:

—Cue billena omoi raise cacaillena, jiaie rafuedo iena lloiticue. Patrón daje mullaimana ie jofona sedatate. Naie mullaíma inogamie. Abina uiñotimie. Nainomo itinona raise ecacabide. Naie mullaimana ie jofona sedataja mei, naie patrón oni jaide.

46 Patrón ico abido bia, ie jofona ie mullaíma raise sedaia, mullaímari naimie iobillamona, ie mullaíma marena iite.

47 Iobillamona, patrón ie mullaimana nana ie raruiaína sedatataite;

48 iadedi ie mullaíma maraiñenia, ie comecina facaite: “Cue patrón are biñeite. Naimie lloga uaina finoñeiticue”.

49 Ie comecina iese facaja jira, naimie anamo ite mullaíaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearedo rafuena finoite.

50 Ie ocuiriñena facaise ie patrón abido billanona, naimiena duere finoite.

51 Ie isoide. Cue abido bia, cuena inotinori iobiticue; ia cuena inotinona abi caitadino dine cuena inoñedinona dotaiticue. Nainomo duere sefuillano eitimaci.

25

Jesúdi diez jitaíñuaina llua rafue

1 Jesús llote:

—Abido cue bia, Jusiñamui ie cominina sedaite. Cue billemo ocuiritinona sedaite. Naie facaise ite cominidi diez jitaíñuaimo ite rafue isoidimaci.

Naiñaiñuái lamparíniai llinuanona, ñima ie aina ua meinomo finoca rafuemo jaiacadimaci.

²⁻⁴ Lamparíniai unellena, farena naiñaiñuái uilla jira, cinco diga abina uiñotimaci. Farena naiñaiñuái uiñena jira, cinco diga abina uiñoñedimaci.

⁵ Ñima diga ie rafue dine jaillemo ocuridimaci. Ñima are biñena jira, inidimaci.

⁶ Daje ñiberuise damie ado luana cacadimaci. Llote: “Jadi, naie ñimadi jai bite. Mai bi, naimie uicomo naimiemo cai dafañillesa”.

⁷ Casillanona, naie jitañuái lamparíniai unedimaci.

⁸ Abi uiñoñediñaiñuái dinena abi uiñotiñaiñuaimo jicadimaci: “Farena caimo feca. Cai lamparíniai boacañedesa”.

⁹ Uai otimaci: “Fecaacañedicaí. Omoimo cai fecaiadedi, caimo baiñeite. Omoi jitaia, chinganomo ibajai”.

¹⁰ Naiñaiñuái ibajaila mei, naie ñima ride. Naimiemo ocuridiñaiñuái ñiese naimie diga nainomo guillena, rafuemo jaidimaci. Naimaci fo jaila mei, nase naie ñima ibaide.

¹¹ Ie mei naie farena ibajaidiñaiñuái abido billano, raitimaci: “Nase econo”.

¹² Naie ñima uai ote: “Uanaicnona omoimo lloiticue. Omoína uiñoñedicue. Econoñeiticue”.

¹³ Ie isoide. Cue billiruina omoi uiñoñena jira, nagarui cuemo omoi ocuiri.

Jesúdi patrón ie mullaiaimo ucubena fecaja llua rafue

¹⁴ Jesús llote:

—Abido cue bia, Jesiñamui ie cominina sedaite. Naie facaise ite comini daje patrómo ite rafue isoide. Patrón jiaie enirue jaiacana jira, ie mullaiaina ie ucubena eenotade.

¹⁵ Damiemo cinco diga ucubena fecade. Jiaimiemo menacubena fecade. Jiaimiemo dacubena fecade. Nagamie ie maijille dinori fecade. Ie mei oni jaide.

¹⁶ Cinco diga ucubena feñotimie jaillanona, iena fecallena, rana ibade. Iemona jiaie cinco diga ucubena ote.

¹⁷ Menacubena feñotimie iena fecallena, rana ibade. Iemona jiaie menacubena ote.

¹⁸ Dacubena feñotimie eniruemo naie ucube eenote. Iena fecallena, rana ibañede. Iemona buena oñede.

¹⁹ Digarui illanona, naie patrón abido bite. Naimaci cuentas siadollena, ie mullaiaina uaidote.

²⁰ Cinco diga ucubena feñotimie bite. Ie ucube atiano raite: “Patrón, cinco diga ucubena cuemo fecadio. Jiaie cincona oticue”.

²¹ Patrón uai ote: “Raise marena maijidio. Eo mare mullaímadio. Janore ucube o raise sedaja jira, ona ailluena rana sedataiticue. Cue diga caimare jaca iitio”.

²² Menacubena feñotimie bite. Raite: “Patrón, cuemo menacubena fecadio. Iemona jiaie menacube oticue”.

²³ Naimie patrón uai ote: “Raise marena maijidio. Eo mare mullaímadio. Janore ucube o raise sedaja jira, ona ailluena rana sedataiticue. Cue diga caimare jaca iitio”.

²⁴ Dacubena feñotimie bite. Raite: “Patrón, o riirenana uiñoticue. O mullaiai maijiamona ganacabidio.

²⁵ Ucubena cue faifiñellena ona jaciruiticue. Ie jira eniruemo o cuemo iga ucubena eenoticue. Jadi, iena jai abido atidicue”.

26 Patrón uai ote: “Maraiñedio. Rairaiedio. Cue mullaiaí maijiamona cue ucube uana uiñotio.

27 Bancomo naie ucubena jonetiødena, naie ucubemona jiaie ucube janore uamona, abido cue bia, iena feiñoticue”.

28-30 Ie mullaiaimo llote: “Naimiønona ie ucubena bairo. Diez ucube illamiemo iena feca. Bie maraiñede mullaiaima jitiøedino cuemona oni dota. Nainomo comini duere sefuillanona eetimaci”. Jusiñamui ie jitailla rafuena finodinona: “Mare” raite; iadedi ie jitailla rafuena finoñedinona duere finoite. Jusiñamui omoina duere finoñellena, cue abido billirui omoi uiñoñena jira, Jusiñamui jitaillacinona finocana omoi jai.

Jesúdi cominina duere finolle llua rafue

31 Jesús llote:

—Omoina nia llofueiticue. Abido cue bia, nana cue jaienisaí diga biiticue. Illaimana ico cue bia, illaiaima illa ifomo iiticue. Eo siño uaido biiticue.

32 Cue uicomo nana nairaiái ofitimaci. Toica llaudaiaí sedaraiima ie chivos motomona ie llaudaiaí oni fetua isoi, naimacina fetoiticue.

33 Cue jitaillacinona finodino diese cue fetuanona, cue nabeimo itataiticue. Cue jitaillacinona finoñedino diese cue fetuanona, cue jarifebeimo itataiticue.

34 Cue illaimana jira, cue nabeimo itinomo lloiticue: “Cue Moo omoi iobillanona, omoina jai caimare itatate. Cue Moo cominina omoi illa jira, cue sedajanomo mai bi. Nainomo duidomoí.

35 Cue jitaillacinona omoi finuamona navui aimetaiticue, cuena ecadomoí. Jiroacaducue, jinui cuemo fecadomoí. Omoi nairai dine cue macaria, cuena omoi uiñoñoeno omoi jofomo cuena feiñotomoí.

36 Iniroinidicue, iniroi cuemo fecadomoí. Duidicue, cuena canollena, cuena jibuisaibidomoí. Cárcelmo iticue, cuena canollena, cuena jibuisaibidomoí”.

37 Cue jitaillacinona finodino dinena cuemo jicanoitimaci: “Nama, ¿niruido aimetaitiomo, ona ecadicaí? ¿Niruido jiroacadiomo, jinui omo fecadicaí?

38 ¿Niruido ona ciodicaí, cai jofomo ona feiñoñellena? ¿Niruido iniroina omo fecadicaí?

39 ¿Niruido duidiomo, ona jibuisaidicaí? ¿Niruido cárcelmo itiomo, ona jibuisaidicaí?”

40 Uai oiticue: “Uanaicinona omoimo lloiticue. Cuena inotinomona jamai bue isoidimena canodomoimo, cuena jiaí canodomoí” lloiticue.

41 Temei cue jarifebeimo itinomo lloiticue: “Cuemona oni mai jai. Cue cominiñedomoí. Jai faifidomoí. Duere omoi sefuillena, iraimo mai jai. Naie irai jaca duiñede. Jusiñamuidi naiena Taife iena jai finode. Jusiñamuidi Taife comini iena jiaí jai finode.

42 Cue jitaillacinona omoi finoñenamona, navui aimetaiticue, cuena ecañedomoí. Jiroacaducue, jinui cuemo fecañedomoí.

43 Omoi nairai dine cue macaria, omoi jofomo cuena feiñoñedomoí. Iniroinidicue, iniroi cuemo fecañedomoí. Duidicue, cuena canollena, cuena jibuisaibiñedomoí. Cárcelmo iticue, cue canollena, cuena jibuisaibiñedomoí”.

44 Cuemo jicanoitimaci: “¿Niruido aimetaitiomo, ona ecañedicaí? ¿Niruido jiroacadiomo, jinui omo fecañedicaí? ¿Niruido ona ciodicaí, cai jofomo ona feiñoñellena? ¿Niruido iniroinidiamo, omo fecañedicaí? ¿Niruido duidiomo, ona jibuisañedicaí? ¿Niruido cárcelmo itiomo, ona jibuisañedicaí?”

⁴⁵ Uai oitícue: “Uanaicinona omoimo lloiticue. Diga comini cuena inotimaci. Naimacimona jamai bue isoidimiena omoi canoñena jira, cuena canoñedomoi” lloiticue.

⁴⁶ Naimaci jaca isi cacaitimaci; iadedi cue jitaillacinona finodino cue Moo sedajanomo jaca iitimaci.

26

Judiuai illaicomini Jesúna gaitallena siadua rafue
(Mr 14.1-2; Lc 22.1-2; Jn 11.45-53)

¹ Ie llofueoicaiganona llofua mei, naimacimo Jesús llote:

² —Pascua railla rafue illena, menarui fiebide. Iena uifotomoi. Monamona jaie cue billamona, imana jaidícue. Cue fiodalillena cue Moo cuena oretate. Ilaicomini cuena coraillena, birui cuena gaitaitimaci —llote.

³ Naie facaiseconi Jusiñamui diga nanoca ñairainidi, jiaie illaicomini diga, nanoca ñairaima jofomo ofidimaci Nanoca ñairaimadi Caifás.

⁴ Jesúna jifuiano gaitallena coniniri siadotimaci. Naimiena meinellena jiai siadotimaci.

⁵ Raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuiritimaci. Nia sedaiticai.

Jesúmo riño caimare soride ra totaja rafue
(Mr 14.3-9; Jn 12.1-8)

⁶ Betania railla nairaimo Jesús jaillanona, Simón jofomo jaide. Simódi jaie efonaitimie.

⁷ Naifomo mesamo Jesús guitemo, daje riñodi nificimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide.

⁸ Jesús llofueoicaigano iena ciuanona, iciritimaci. Coniniri dani ñaitimaci:

—Naie caimare soride ra jamai dotade. Jai faifide.

⁹ Iena fecacadena, eo ailluena raifide. Naie ucube dueredinomo fecadena, caimona mare.

¹⁰ Naimaci ñaiana Jesús uifua jira, naimacimo llote:

—¿Bue ñellena naiñaiñoña jeare ñaitomoi? Mare rafuena cuemo finode.

¹¹ Omoi diga dueredino jaca itimaci; iadedi omoi diga jaca iñeiticue.

¹² Cue abimo bie caimare soride ra naiñaiño totajamona, cue fiodalirui facaina naiñaiño iese finode.

¹³ Omoimo uanaicinona lloiticue. Ninomo cue mare finoca rafuena bu lloia, naiñaiñoña uibiñollena, nana cominimo naiñaiño finoca rafuena llote.

Judas micori raillamie Jesúna gaitataiacana rafue
(Mr 14.10-11; Lc 22.3-6)

¹⁴ Ie facaise Jesús llofueoicaiganomona Judas Iscariote micori raillamiedi Jusiñamui diga nanoca ñairaini dine jaide.

¹⁵ Naimacimo jicanote:

—Omoimo Jesúna cue fecaia, ¿niga ucubena cuemo fecaitomoi? —jicanote. Naimaci siadua mei, treinta ucubena naimiemo fecadimaci.

¹⁶ Naie facaiseconimona Jesúna gaitatalliruiomo naimie ocuride.

Jesúdi ie fiodalille rafuena llua rafue
(Mr 14.12-25; Lc 22.7-23; Jn 13.21-30; 1 Co 11.23-26)

17 Pascua railla rafue ia, siritaga rana guiñedimaci. Dani llomenicon guitimaci. Egiptomona cai jaiagai jillobillana comecillena, naie rafue ite. Naie rafue tainiaruimo ie llofueoicaigano Jesús dine billano, jicanotimaci:

—¿Ninomo pascua railla rafue ie guille finuana jitaideo?

18 Uai ote:

—Jerusalémo omoi jaillanona, omoimo cue llogamiena omoi cuanona, naimiemo llono: “Cai llofueraima fiodable facaise iaiei ite. O jofomo ie llofueoicaigano diga pascua rafuena finoacade” llono.

19 Ie muidona ie llofueoicaiganodi ie llwana finodimaci. Pascua railla rafue guille finodimaci.

20 Nairui jitoma ana itemo, Jesús ie doce llofueoicaigano diga nainomo guisaide.

21 Naimaci mesamo guitimacimo, Jesús llote:

—Omoimona damie cuena gaitataite —llote.

22 Iena cacajanona, eo sunaitimaci. Damierie naimiemo jicanoside:

—¿Cuena ñaitio?

23 Uai ote:

—Omoimona damie bie platomo cue diga llomenico diga mutade.

24 Jusiñamui facaina lloaima cuega isoi, monamona jai billamona fiadaiticue; iadedi cuena gaitataitimie eo duere sefuite. Naimie jeicifegadena, cuemona mare.

25 Jesúsna gaitataitimiedi Judas micori. Naimie jicanote:

—Maestro, ¿ona iese finotaiticue?

Uai ote:

—Jii, iese finotaitio.

26 Naimaci nia guitimacimo, llomenicon Jesús llinuanona, Jusiñamuimo iobillacinona fecaja mei, llomenicon tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

27 Ie mei naimie jiroracona jiai llinote. Jusiñamuimo iobillacinona llua mei, naie jiroracomo jai totaca vino naimacimo fecajano, raite:

—Biemona nana omoi jiro.

28 Cue fiodaillamona, dama cue diaillamona, naimaci jeacino anamona ailluena biruimona jilloitimaci. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. Cue llua isoi bie vinona omoi jiruamona, cue fiodaillamo omoi comeci.

29 Omoina bene dane iese caimare nabaiñeiticue. Cue Moo sedajanomo omoi diga cue ia, nainomo omoina dane iese caimare marena nabaiticue. —Iena jirodimaci.

*Jesúdi Pedro naimiena januana llua rafue
(Mr 14.26-31; Lc 22.31-34; Jn 13.36-38)*

30 Naimaci guilla mei, Jusiñamuimo iobilla ruana rotimaci. Ie mei Olivos railla anedumo jaidimaci.

31 Jesús naimacimo llote:

—Cuemo suille rafue muidona, ja naio cuena fañonocaitomoi. Jusiñamui facaina lloaima micori iena jaie cuega: “Toica llaudaia sedaraimana meineitaiticue. Naimie toinaia uaficaida jaitimaci” cuega. Naimie micori caina cuete.

32 Ero, fiodaillamona cue jillua mei, omoi uicodo Galileamo jaiticue, nainomo omoi diga dafai fillena.

33 Pedro uai ote:

—O finolle rafue muidona nana jiaino ona fainonocaia, ona jaca fainonocaiñeiticue.

³⁴ Jesús dinena raite:

—Uanai omo lloiticue. Ja naio iitava nia ñaiñenia, dacaiño amani cuena janoitio.

³⁵ Pedro uai ote:

—O diga cue fioldaiadedi, ona janoñeiticue.

Nana ie llofueoicaigano daje uaido jiai raitimaci.

Jesúdi Getsemanímo Jusiñamuimo jia rafue

(Mr 14.32-42; Lc 22.39-46)

³⁶ Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena, jaiticue.

³⁷ Pedrona uite. Zebedeo ie jito iaimaiaina jiai uite. Naimie sunaicaide. Ie comeci uri iñede.

³⁸ Naimacimo llote:

—Cue comeci sunaicaide. Niadi fioldaiticue. Benomo fiebi; ia nia iniñeno cue facaina omoi jii.

³⁹ Naimie janore bai jaillanona, eniruemo bitadate. Jiide:

—Ore Moo, o jitaia, cuena duere finoñeno; iadedi cue comeci jitaillacinona finoñeno. Cuemo o jitaillacino fino —jiide.

⁴⁰ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—¿Niесе raire inidio? daje hora nia iñedemo.

⁴¹ Iniñeno. Taife ramo omoina fai raillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jii, omoina naimie ocuiñotallena —llote.

⁴² Ie mei dane jiiillena jaide. Raite:

—Ore Moo, o jitaia, cue duere sefuillamona cuena jillota. Cue fioldaillana o jitaia, o jitailla rafuena finoiticue.

⁴³ Ie llofueoicaigano dine dane billanona, naimaci uisi llirioilla jira, naimaci inisitemo ride.

⁴⁴ Abido jaillanona dane jiide. Ailli daje isoidiuidio jiide.

⁴⁵ Ie mei ie llofueoicaiganomo dane billanona, llote:

—Nia inidomoi. Jafaici nia otomoi. Monamona jaie billanona, imana jaidicue; ia ja fioldaiticue. Cuena ja gaitajanona, Jusiñamui jitailla jira, naimiena inoñedino anamo ja iiticue.

⁴⁶ A naidacai. Maiña. Cue gaitataitmie jai bite.

Jesúna gaitalle rafue

(Mr 14.43-50; Lc 22.47-53; Jn 18.2-11)

⁴⁷ Jesús nia ñaitemo, ieconi Judas micori bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Butaralluna jiai atidimaci. Jusiñamui diga nanoca ñairainimona bitimaci. Einamaci dinena jiai bitimaci.

⁴⁸ Jesús dine naimaci nia riñenia, Judas micori naimie diga bitinomo jai llote:

—Jesúna omoi uiñollena, naimiena libanoiticue. Ie mei naimiena gaita —llote.

49 Jesús dine naimaci rillanona, Judas micori Jesús dine raire jaide. Naimiena uaidote:

—Maestro, jai biticue. —Ieconí naimiena llibanote.

50 Jesús dinena raite:

—¿Bue ñiaibitio?

Ie mei Judas micori diga bitinodi Jesúsna gaitadimaci.

51 Iena cüanona, Jesús diga itinomona damie ie lloebi llinuanona, Jusiñamui diga nanoca ñairaima ie mullaíma jefona jaíbonote.

52 Jesús naimiemo llote:

—O fuiriacania, o jiaí fiódaitio. O lloebi dane eeno. Cue riđuanona, fuiriñeno.

53 Cuena riđollena, cue Moomo cue jicaia, eo ailluena jaíenisai cue dine naimie oretaite;

54 iadedi iese cuena riđoia, Jusiñamui facaina lloraini micoriai cuegafuiaí suiñeite. Cue fiódaille rafuena cuetimaci —llote.

55 Ieconí naimie dine bitinomo Jesús llote:

—Omoí butaralluna uitomoi. Omoí lloebi diga jiaí bitomoi. Fñiraimadícüeta cuena omoí gaitajaíbillá. Jusiñamui jofomo nagarui llofuecabiticue; iadedi cuena gaitañedomoi.

56 Nana bie rafue suide, Jusiñamui facaina lloraini micoriai cuegafuiaí suillena —llote. Ie facaise nana naimie llofueoicagano naimiena faínonocaillano, aisidimaci.

Jesúdi judíuái illaicomíni dine illa rafue

(Mr 14.53-65; Lc 22.54-55, 63-71; Jn 18.12-14, 19-24)

57 Jesúsna gaitadinodi Caifás jofomo Jesúsna uitimaci. Caifás Jusiñamui diga nanoca ñairaima. Naimie jofomo jiaie illaicomíni jai ofidimaci. Moisés micori llogacinona llofueraíni ofidimaci. Einamací jiaí ofidimaci.

58 Jesús jinafona Pedro aarena jaide. Caifás jofo nairaíbirimo jaide. Naie rafue fuiduana naimie uiñollena, nainomo ite jofomo maijiraini diga raide.

59 Naimiena meinellena, nana naie illaicomíni Jesúsno nicino illana uiñoiacadimaci.

60 Iena coniniri siadotimaci; iadedi naimiemo jaca nie isoide marañede rafue illana uiñoñedimaci. Diga comíni Jesúsna ñaitimaci; iadedi taino llotimaci. Ie mei menaimie bitiaímaiaí.

61 Raitiaímaiaí:

—Bimie llote: “Jusiñamui jofona judaíredicue. Judaia mei, darui amani illanona, iena dane finoredicue” —lloñiaímaiaí.

62 Jusiñamui diga nanoca ñairaima Jesúsno jicanote:

—¿Ñiese iaímaiaí uai oitio? ¿Nie isoide rafue ona llogidotiiaímaiaí?

63 Jesús uai oñede. Naie ñairaima dinena llote:

—Cai Jusiñamui cajede. Naimie caina uiñua jira, uanaicínona cai lloñenia, caina duere finoite. Uanaicínona caímo llono. “¿Odi Cristodio?” omo jicanoticue. “¿Odi Jusiñamui Jitodio?” omo jicanoticue.

64 Jesús dinena uai ote:

—Jii, naimiedicue. Iena raise llotio. Monamona jaie cue billamona, imana jaidicue; iadedi ico jiaíruido illaímana cue illena, Jusiñamui ecimo cue raillana omoí nairaí cioitimaci. Mona uillie motodo cue abído billena jiaí cioitimaci.

65 Iena cacajanona, naimiemona Jusiñamuina Jesús jeare ñaia jira, naie nanoca ñairaima dama ie iniroina cuaranote. Raite:

—Naimiedi Jusiñamuina jeare ñaite. Jiaie naimiena llogidotinona jai jitañedicai. Ie ñaiamona dama naimie abina llogidote.

⁶⁶ ¿Niese naimiena raitomoi?

Jiai illaicomini dinena uai otimaci:

—Naimie fiodallesa.

⁶⁷ Ie mei naimie uiecona tuallaitimaci. Naimiena ducoiðimaci. Jiai bucoiðimaci.

⁶⁸ Raitimaci:

—O Cristodiodena, ¿bu o bucoia? caimo llono.

Jesús uai ofiede.

Pedrodi Jesúna janua rafue

(Mr 14.66-72; Lc 22.56-62; Jn 18.15-18, 25-27)

⁶⁹ Naie facaise Pedro naie jofo nairaibirimo ite. Naie jofo nama mullaño naimie dine billanona raite:

—Galileamona Jesús bite. Odi ie cominidío. Naimie diga jaicabidío —raite.

⁷⁰ Nana nainomo itinomo Pedro llote:

—O lluana uiñoñedicue.

⁷¹ Nase fuemo Pedro jaidemo, naimiena jiaie mullaño ciuanona, nainomo itinomo llote:

—Bimiedi Nazaret ie Jesús comini imie.

⁷² Pedro uai ote:

—Uanaicinona cue lluana Jusiñamuidi uiñote. O llogamiena uiñoñedicue.

⁷³ Dallu illanona, nainomo itino Pedro dine billano, naimiemo llotimaci:

—Ua Jesús comini imiedío, o uai bairia jira. Naimie isoi ñaitío.

⁷⁴ Uai ote:

—Uanaí cue lloñenia, Jusiñamui cuena duere finoite. Uanaicinona cue lluana naimie uiñote. Ero, Jesúna uiñoñedicue. —Ieconí itava ñaite.

⁷⁵ Iena cacajano, Pedro Jesús lluana uibiñote. Jaive Jesús Pedromo llote: “Fitava nia ñañenia, dacaño amani cuena janoitío” llote. Iena uibiñuanona, Pedro jino jaillano, sure eede.

27

Pilato dine Jesús illa rafue

(Mr 15.1; Lc 23.1-2; Jn 18.28-32)

¹ Monaidemo, nana Jusiñamui diga nanoca ñairainidi, nana einamací diga, Jesúna siadotimaci. Naimiena meinellena siadotimaci.

² Siadua mei, Jesúna maianona, Poncio Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

Judas micori fiodallesa rafue

³ Judas micori Jesúna jai gaitatate. Naie illaicomini Jesúna meiniana lluana naimie micoridi uiñuamona, ie comeci uaina meidote. Illaicominimo ie treinta diga ucubena abido atide.

⁴ Raite:

—Jesús marañede rafuena jaca finoñede. Naimie fiodalñeite. Naimiena cue gaitatajamona, marañedicinona jai finodicue.

Uai otimaci:

—¿Bue ñe caimo lluaibitío? O rafue caimo duiñede.

⁵ Ie mei Judas micori Jusiñamui jofo jeraimo naie ucubena fo jamai faite. Jino jaillanona, oni jaide. Dama naimie abina meinellena, cimaio lliñnote raona.

6-7 Jusiñamui diga nanoca ñairaini naie ucubena iraiia mei, iena siadotimaci. Coniniri raitimaci:

—Naie isoide ucube nainomo joniana Moisés micori jaie rairuilla jira, Jusiñamui jofome ite ucube ocabiranomo jonenidicai. Naie ucube diga damie meinellena ibadicaí. —Ie jira naie ucube diga eniruena ibadimaci. Naie illanodi jiñora ouilla enirue. Jiaie nairaimona bu bia, naimie fiadaia, naie eniruemo naimiena raillena, iena ibadimaci.

8 Naie ucube muidona damie fiadailla jira, birui naie enirue mamecidi dirue ie enirue.

9 Iemona Jeremías micori jaie cuega rafue jai suide. Naimie micoridi Jusiñamui facaina lloraima. Naimie micori cuega: “Cai Israel railla cominimona damerie railla jira, naimiena meinellena, treinta ucubena fecaitimaci.

10 Naie ucube diga jiñora ocabilla eniruena ibaitimaci, cai Nama Jusiñamui llua isoi” cuega.

*Pilato dine Jesús illa rafue
(Mr 15.2-5; Lc 23.3-5; Jn 18.33-38)*

11 Pilato railla gobernador uicomo Jesúsna atia mei, Pilato Jesúsno jicanote:

—¿Judíuai comini illaimadio?

Jesús uai ote:

—Jii. Raise llotio.

12 Ie mei Jusiñamui diga nanoca ñairainidi, einamací diga, naimiena llogidote; iadedi naimie dinena uai oñede. Ie abina riidoñede.

13 Ie muidona Pilato naimiemo llote:

—Diga rafuena ona llogidotimaci. ¿Niése uai oñedio?

14 Jesús nia uai oñede. Ie jira Pilato uainicaide.

*Pilatodi Jesús fiadaillana llua rafue
(Mr 15.6-20; Lc 23.13-25; Jn 18.38-19.16)*

15 Naga año pascua railla rafue facaiseconi cárcelmo itinomona Pilatodi comini jicacamiéna jamai jino orede.

16 Bie año cárcelmo Barrabás raillamie ite. Naimie mameci eo are soride.

17 Naie rafue illa jira, ailluena comini naimie dine ofillano, naimicimo Pilato jicanote:

—Bie año cárcelmona, ¿bumie jino cue oretajana jitaidomoi? Barrabás raillamie ite. Jesús raillamie jiai ite. Naimiedi Cristona jiai mameciredé.

18 Iese jicanote; iadedi naimiedi Jusiñamui diga nanoca ñairaini Jesúsri uradoillana uíñote. Naimiací Jesúsna meineiacanana jiai uíñote.

19 Ie maijiracome naimie nia illanona, naie facaise Pilato ai naimie dine rabe orede. Cuete: “Bimiedi maraiñede rafuena jaca finoñede. Naimiena duere finoñeno. Jaive naio cue nicairillano, naimie muidona cue comeci jarire ite”.

20 Ailluena comini Pilato dine ofillanona, Jusiñamui diga nanoca ñairainidi, einamací diga, cominimo llotimaci:

—Pilato caimo jicanoia, Barrabás jino oretallena jica. Jesús meinellena jica —llotimaci.

21 Comini ofilla mei, naimacimo Pilato dane jicanote:

—¿Nimie cue jino oretajana jitaidomoi?

Uai otimaci:

—Barrabás.

22 Pilato dinena jicanote:

—¿Niese Jesúna cue finuana jitaídomoi? Naimiedi Cristona jiaí mameciredé.

Nana uai otímaci:

—Naimiena cruzo coraí.

²³ Pilato dane jicanote:

—¿Nie isoide marañede rafuena finode?

Naimaci dinena ado ibi llonoidímaci:

—Naimiena coraí.

²⁴ Jesúna jino oretajana jitaíñedímaci. Iena Pilato uiñuamona, comini jai uri iñenana naimie ciuanona, jinui diga ie onollina jocuanona raite:

—Bimie fiodaillana cue muidonañede. Bie rafue cuemo jai duiñede. Naimie fiodaite omoi muidona.

²⁵ Uai otímaci:

—Dama iesede. Naimie fiodaite cai muidona. Jiaí cai uruiaí muidona.

²⁶ Te mei Pilatodi Barrabás naimaci jitailla jira, jino orede; iadedi Jesúna sechedotajanona, naimiena coraillena orede.

²⁷ Dajerie soldaduaídi Pilato jofomo Jesúna uite. Nana soldaduaí nainomo ofidímaci.

²⁸ Naimie iniroi duiñuano, naimiemo jiduirede iniroina jitaídimaci.

²⁹ Eecuaímona niga nuiciraina naimie ifogimo jitaídimaci. Ie nabeillimo radosina jonete, illaimana naimie illa isoi. Caiñici ifodo raídimaci, illaimana naimie illa isoi. Raitímaci:

—Jadi, judíuaí illaíma. —Iese raillanona naimiena jifanododímaci.

³⁰ Naimiena tuallaítímaci. Naimie onollimo ite radosina naimaci llinocaida, naiedo naimie ifogina buta-butadímaci.

³¹ Jesúna naimaci jifanodua mei, naimie jiduirede iniroina duiñodímaci. Nano naimie iniroina dane abido naimiemo jitaídimaci. Ie mei naimiena coraillena oni uitímaci.

Jesúna coraía rafue

(Mr 15.21-32; Lc 23.26-43; Jn 19.17-27)

³² Jerusalémona naimaci jaillanona, Cirene railla eniruemona bitimiemo dafaífidímaci. Naimie mameci Simón. Naimiena Jesús uiga cruzna rocatatímaci.

³³ Gólgota raillanomo jaidímaci. Ifocoraina eruaila jira, iese mameciredé.

³⁴ Nainomo rillanona, ie abi isirena cacaiñellena, vinomo erirede rana faianona, naimiemo fecadímaci; iadedi iena naimie facajano, iena jiroñede.

³⁵ Naimie coraía mei, cruzna naidania mei, naie soldaduaí naimie iniroi dani coninimo fecasite. Naie iniroi bu uille raillanona uiñollena, jifanododímaci.

³⁶ Ie mei ana raídimaci, naimiemo eruaillena.

³⁷ Naimie ifogi afebeimo ie llogiduafuena jonetímaci. Iese cuela: “Bimiedi Jesús. Judíuaí comini illaíma”.

³⁸ Ie mei mena firiruide iaímaiaína coraídimaci. Damie Jesús nabeimo coraica. Jiaímie Jesús jarifebeimo coraica.

³⁹ Naisodo jamai jaidino Jesúna mameritímaci. Mamerillamona, ifogiaína jaididímaci.

⁴⁰ Raitímaci:

—Navui raisoidio: “Jusiñamui jofona judaíticue. Darui amani illanona, iena dane finoíticue” raisoidio. Ie muidona dama o abina mai jilloita. Jusiñamui jitodiodena, cruzmona ana bi.

41 Ie facaise Jusiñamui diga nanoca ñairaini naimiēna mameritimaci. Moisés micori llogacino llofuerañi naimiēna jiai mameritimaci. Einamaci naimiēna jiai mameritimaci. Raitimaci:

42 —Jiaie cominina jillotate; iadedi dama naimie abina jilloitanide. Naimiedi cai judíuai comini illaima raillamiedena, cruzmona naimie ana niade billasa. Ie mei naimiēna ñnoiticaí.

43 “Jusiñamui Jitodicue” naimie railla jira, naimiedi Jusiñamuina ja ñnotena, Jusiñamui jitaia, Jusiñamui naimiēna jillotaite. —Iese naimiēna mameritimaci.

44 Naimie diga coraica iaimaiaí daje isoi naimiēna mameritiiaímaiaí.

Jesús fiodailla rafue

(Mr 15.33-41; Lc 23.44-49; Jn 19.28-30; Heb 9)

45 Jitoma naidai itemona, daje amani horas mona jitibicaide.

46 Ie meinomo judíuai railla uaido Jesús ado jidaioide:

—Elí, Elí, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñllena cuena fañonocaidio?” raite.

47 Iena cacajano, nainomo jamai itinomona damierie raitimaci:

—Naimie jaie Jusiñamui facaina lloraima Elíana uaidote —raitimaci.

48 Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade.

49 Ieconí jiaino raitimaci:

—Ina nai. Dallu seda. Elías naimiēna jilloitajaíbillena sedaiticaí.

50 Ieconí Jesús dane ado cuirioita, fiodaite.

51 Naie facaise Jusiñamui jofomo ie fetaca iniroife ana anaba jillacimo motodo menafe cuararide. Ieconí ñnusaño suide. Iemona nofie oni bojode.

52 Diga raiafuaí econote. Jesús jillua mei, raiafomona, fiodaillamona, ailluena Jusiñamuina ñnotinodi jillodimaci.

53 Ie mei Jerusalémo naimaci jaillanona, diga comini naimacina ciodimaci.

54 Nainomo ite capitán, ie soldaduaí diga, Jesús fiodaillana eruaidimaci. Ñnusaño ñuillana cacadimaci. Nana suide rafuena ciuanona, eo jacinuillamona, naimie raite:

—Uanaí bimiedi Jusiñamui Jito.

55 Ailluena riñoniaí naie rafuena aarena ciodimaci. Naimiēna canollena, Galileamona Jesús diga navui bitimaci.

56 Naimaci motomo María Magdalena ite. Jiaie María jiai ite. Naiñaiñodi Jacobo ei. Naiñaiño jiai José ei. Zebedeo uruaí ei jiai ite.

Jesús raiafomo jonia rafue

(Mr 15.42-47; Lc 23.50-56; Jn 19.38-42)

57 Jitoma ana itemo, eo ucuberedimie Pilato dine jaide. Naimiedi Arimatea nairai imie. Naimie mameci José. Jesús díbeimo jaidimie.

58 Jesús abina jicallena, Pilato dine jaide. Pilato “Jee” raillanona, Jesús abina naimie ollena llote.

59 Ie mei Jesús abina cruzmona ana José uanona, jeanide mare userede iniroi diga naimie abina ferinote.

60 Nofici ie raiafomo jonete. Naie raiafo dama José jaie finoca, naimie iena. Jesús abí nainomo jonia mei, José naifomo noficina ññitade. Naifo ibaide. Ie mei oni jaide.

61 María Magdalena raiafo uico dine jiaie María diga rainadatíiaíñuaí.

Soldaduaí Jesús raiafo sedaja rafue

⁶² Ie areruido, pascua railla rafue illarui, dajerie judíuái illaicomíni Pilato dine jaidimaci.

⁶³ Raitimaci:

—Ero, naie abi caitadimie nia fioldaiñenia, navui llote: “Cue fioldaimona, darui amani illanona, jilloiticue”.

⁶⁴ Ie jira o uai oreta, darui amani raifi naie raiafo raise ibaillena, naimie llofueoicaigano nainomo jaillanona, naimie abi arí oi raillano. Naimie abina naimaci fiianona lloitimaci: “Naimie jai jillode”. Iese suia, cominina eo jifueitimaci.

⁶⁵ Pilato uai ote:

—Soldaduai omoido oreiticue, naie raiafo raise sedallena.

⁶⁶ Ie jira jaidimaci. Raona nitajano, raiafo raise ibaidimaci. Naiena sedallena, soldaduaína nainomo faínonocaidimaci.

28

Jesús fioldaimona jillua rafue (Mr 16.1-8; Lc 24.1-12; Jn 20.1-10)

¹ Sábado fuilla mei, monaiacania, María Magdalena, jiaie María diga, raiafona jibuisaidiaíñuái.

² Ieconí ñuisaño suide. Monamona billanona, Jusiñamui jaienici raiafomo ibaica noficina oni ñuitade. Naie noficimo raide.

³ Eo queniredena eruaide. Naimie iníroi eo userede.

⁴ Nainomo ite soldaduai naimiena eo jacinaillamona, abi docaidimaci. Iemona fioldaitino isoi dallu itimaci.

⁵ Ie facaise naie jaienici di dinena naie riño iaíñuaimo llote:

—Jaciruiñeno. Coraica Jesúna omuiño jenuana uiñoticue.

⁶ Naimie bene iñede. Naimie llua isoi, fioldaimona naimie jai jillode. Naimie ifo jeraimo billano mai jibuisaibi.

⁷ Ie mei ie llofueoicaigano dine raire omuiño jai. Fioldaimona naimie jilluana naimacimo llono. “Galileamo omoi uicomo naimie jaite” llono. Bie rafue omuiño jai lloticue —llote.

⁸ Ie jira raiafomona raíjicaillanona, eo iobillanona, raire jaidiaíñuái. Ie llofueoicaigano dine aisidiaíñuái.

⁹ Ie llofueoicaigano dine iaíñuái nia riñenia, Jesús iaíñuaimo dafaifillano, raite:

—Itomuiño. —Naimie dine iaíñuái rillanona, naimiena sedallena, naimie eillina llinotiaíñuái.

¹⁰ Jesús dinena raite:

—Jaciruiñeno. Cue llofueoicaiganomo llono: “Galileamo jai. Nainomo omoina cioiticue” llono.

Soldaduai raiafona sedademo suide rafue

¹¹ Jaidiaíñuaimo, nainomo ite soldaduaímona dajerie Jerusalémo jaide, nanoca Jusiñamui diga ñairainimo nana naimacimo suide rafue llollena.

¹² Iena cacajano, einamací diga iena siadotimaci. Ie mei naie soldaduaímo ucubena fecadimaci.

¹³ Raitimaci:

—Jiaie cominimo llono: “Cai inia mei, ie llofueoicaigano ie abina fiano uitimaci” llono.

¹⁴ Iena cai gobernador fidiia, naimie diga ñaiticai, omoina naimie duere finoñellena —raitimaci.

¹⁵ Ie jira naie ucubena feiñuanona, cominimo illaicomini llua isoi llotimaci. Naie rafue uiñocana jaide. Birui nia iena uiñocana jaide.

*Jesús ie llofueoicaiganomo iracaiño lloga rafue
(Mr 16.14-18; Lc 24.36-49; Jn 20.19-23)*

¹⁶ Ie mei Galileamo naie once llofueoicaigano jaidimaci. Jesús lloga anedumo jaidimaci.

¹⁷ Naimiena naimaci ciuanona, naimiena sedadimaci; iadedi dajerie Jesús jilluana raise nia iñoñedimaci.

¹⁸ Jesús dinena raite:

—Cue Moo cue uai cuemo iga, monamo cue jitailla rafue cue finollena, eniruemo cue jitailla rafue cue finollena.

¹⁹ Ie jira naga nairaimo jai, cue dibeimo naie cominina itatallena. Cue dibeimo naimaci jailla mei, cue Moo dibeimo naimacina illamona, naimaci cue dibeimo illamona, ie Joreño anamo naimaci illamona, naimacina bautiza.

²⁰ Nana omoimo cue lloga rafuena naimaci iena inollena, llofue. Nia abido cue biñenia, omoina canollena, omoi diga cue Joreño jaca iite –llote. Mai. Macaibaite. Mateodicue.

MARCOS JESUCRISTO ENIRUEMO ILLA RAFUE CUIAFUE

*Jofue iñenanomo Juan Bautista micorì illa rafue
(Mt 3.1-12; Lc 3.1-9, 15-17; Jn 1.19-28)*

¹⁻² Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isaías micorì Jusiñamui facaina jaie lluamona, Juan Bautista micorì llofuellena llote. Iena suillamona, Jesucristo eniruemo ite rafue tainede. Iena nano lloiacadicue. Isaías micorì cuete:

“Ero, o uicodo cue rafuena lloiena, damiena oretaiticue” Jusiñamui raite.

³ Jofue iñenanomo damie jidai-jidaillana cacadicue.

Naimie llote: “Cai Nama biite. Naimie naiso atona raise fino” llote.

Naisona llote; iadedi naimie uaina naimaci feiñollena, naimaci comeciai marena finuana ñaite.

⁴ Isaías micorì llua isoi, Juan Bautista raillamie micorìdi Jusiñamui rafuena jofue iñenanomo llofuecana jaide. Cominina dafaifia, naimacimo llote:

—Omoì jeacinona fainonocaida, Jusiñamui dibeimo omoì comeciai iuaillai meido. Iemona omoì jeacinona feitaite. Omoì comeciai iuaillai omoì meidoia, cominina iena uifnotallena, mai omoì bautizallomoi.

⁵ Diga comini naimie micorì dine jai jaisoidimaci. Jerusalémona, nana Judeamona, nana Jordán fuemona jai jaisoidimaci. Jusiñamuiimo naimaci jeacinona naimaci llua meino, naimacidi Juan micorì bautizaga.

⁶ Juan micorìdi camello itiraiiai ie nilla iniroina jitade. Igoi iena ie moiligaina jitade. Fioduaina rite. Ciifona mete. Jamai rana guite.

⁷ Cominimo llote:

—Cue baifemo faitimie bie facaise biite. Jamai bue cue isoilla jira, naimiena cue canuana uifnoñedicue.

⁸ Jusiñamui dibeimo omoì illamona, jinui diga omoina bautizadicue; ia naimie bia, naimie dibeimo omoì jaillamona, Jusiñamui Joreña omoimo itaite.

*Jesús bautizaja rafue
(Mt 3.13-17; Lc 3.21-22)*

⁹ Jordán dine Juan micorì nia ia, Galileamona, Nazaretona naimie dine Jesús bite. Nainomo Jesúdi Juan bautizaga.

¹⁰ Bautizaja mei, jinui mona billanona, ieconi mona bojodena ciode. Jusiñamui Joreño, ucugi isoi, naimie emodomo ana billana ciode.

¹¹ Monamona Jusiñamui llote:

—Cue isiruiga Jitodio. Ori iobidicue.

*Jesúna Taife ramo faia rafue
(Mt 4.1-11; Lc 4.1-13)*

¹² Jesús bautizaja mei, Jusiñamui Joreño jofue iñenanomo naimiena uite.

¹³ Comini nainomo iñede. Difai ocainaiiai itimaci. Nainomo cuarenta digarui ite. Ie facaise Taife naimiena ramo faite; ia Jusiñamui jaienisai naimiena sedadimaci.

*Galileamo Jesús illa rafue
(Mt 4.12-17; Lc 4.14-15)*

¹⁴ Naie facaise Juan Bautista micorina Herodes gaitaja mei, Galilea railla eniruemo Jesús jaide. Jusiñamui ie mare rafuena llocana jaide.

15 Llote:

—Jusiñamui birui omoïna sedaacade. Ie cominina omoï jaillena birui jitaide. Jusiñamui dibeimo illena, omoï jeacinona fainonocaida, omoï comeciai iuaina meido. Bie rafuena mai omoï ñno.

*Ie llofueoicaigano jaillena, Jesúdi nagaamagamiëna fetua rafue
(Mt 4.18-22; Lc 5.1-11)*

16 Jiairuido Galilea railla jorai fuemo Jesús macaritemo, menamiëna ciode. Naga ie ama iaïmaiaï. Damie Simón. Jiaimie Andrés. Lloijina fairaima iaïmaiaï. Iese jaca naie iaïmaiaïdi maijuidiaïmaiaï.

17 Iaïmaiaïmo llote:

—Cue diga omico jaiocaillena, cue diga mai bi. Cue llofueganona omico jaillena jitaïdicue. Lliciaïna birui ocabitomico; iadedi cominina oitomico, cue dibeimo naimaci illena.

18 Iena cacajanona, ieconï iaïmaiaï lloijina fainonocaida, naimie diga jaidiaïmaiaï. Ie llofueganona jaillena, jaidiaïmaiaï.

19 Lliaï bai Jesús jaidemo, jiaie menamiëna ciode. Naga ie ama iaïmaiaï. Damie Jacobo. Jiaimie Juan. Iaïmaiaï moodi Zebedeo. Botemo iaïmaiaï lloijina sigaidiaïmaiaï.

20 Jesús iaïmaiaïna uaidote, ie llofueganona jaillena. Ie maijiraïni diga iaïmaiaï moona fainonocaida, botemona ari billanona, Jesús diga jaidiaïmaiaï.

*Jesúdi Janaba anamo itimie jillotaja rafue
(Lc 4.31-37)*

21 Bai jaillanona, Capernaumo ie llofuegano diga Jesús ride. Nainomo naimie ia, sábadoruïmo judiaï ofiracomo jaide. Nainomo llofujete.

22 Moisés micori llogacino llofueraïni isoi llofueñede. Illaïma uai isoi naimie llofuaï jira, nainomo ite cominï naimie llofuiamona raïjicaïdimaci.

23 Janaba anamo illamie nainomo ite.

24 Jesús llofuiana cacaita, Janabadi ñmana ado cuirioitate:

—Odi Nazaret ie Jesús. ¿Bue ñeacadiï cai diga? Caïna duere finuaïbidio. Ona uiañoticue. Odi Jusiñamui ie mare fetocamiedio.

25 Jesús naimiëna lletade:

—Llicai. Naimiëmona oni jai.

26 Janaba naimiëna docaitajanona, ado cuirioillanona, naimiëmona oni jaide.

27 Iena ciuanona, nana nainomo itino raïjicaïdimaci. Coniniri siadotimaci:

—¿Niese ite? Bimie jiaie uaido llofujete. Janabamo naimie llua mei, ñimamona Janaba oni jaide. Janaba Jesús uaina ñnote.

28 Iëmona nana Galilea eniruemo Jesús mameci are soride.

*Jesús Pedro jifaiña jillotaja rafue
(Mt 8.14-15; Lc 4.38-39)*

29 Ofiracomona Jesús jaillanona, ie llofuegano diga, Simón jofomo jaide. Andrés nainomo jiaï jainaïaïde. Jacobo, Juan diga jiaï fo jaide.

30 Ie facaïe Simón jifaiña duide. Abi cuaride. Nainomo itino Jesús mo naiñaïño duïllana llote.

31 Iena cacajanona, naiñaïño ñne jaillanona, Jesús naiñaïño onollina llïnote. Naiñaïñaïna naïdacaitade. Ieconï abi cuarilla fainonocaiide. Guille finuanona, ie jofomo itinona ecade.

*Jesúdi ailluena duidinona jillotaja rafue**(Mt 8.16-17; Lc 4.40-41)*

³² Navuida, jitibicaidemo, Jesús dine comini ailluena duidinona atidimaci. Janaba anamo itinona jiai atidimaci.

³³ Nana Capernaum comini naie jofu nasemo ofidimaci.

³⁴ Jesúdi diga duicono ailluena duidinona jillotate. Ailluena comini Janaba anamona jillotate. Naimiena jananiai uifua jira, Jesús naimaci ñaiana rairuide.

*Galileamo Jesús llofuia rafue**(Lc 4.42-44)*

³⁵ Ie areruido nia monañenia, Jesús casillanona, Capernaumona comini iñenanomo Jesús jaide. Nainomo Jusiñamuimo jide.

³⁶ Monaia, casidemo, jofomo Jesús iñena jira, Simón, ie nabaiñiai diga, Jesúsna jenuaide.

³⁷ Baillanona, raite:

—Nana comini ona jenodimaci.

³⁸ Jesús uai ote:

—Jiaie nairaii dine mai cai jailli. Nainomo llofueiacadicue. Ie jira Capernaumona jino biticue.

³⁹ Nana Galileamo Jesús jaide. Judíuai ofiracuaimo llofuecana jaide. Ailluena cominimona jananiaina oni oretate.

*Jesúdi efonaitimiena jillotaja rafue**(Mt 8.1-4; Lc 5.12-16)*

⁴⁰ Ie facaise efonaitimie Jesús dine billanona, naimiena raise uaiduamona, caiñici ifodo ana rainadate. Raite:

—O jitaiadedi, cuena jillotaredio.

⁴¹ Naimiena duenaillamona, Jesús ie onolli naimiemo oni ñuitajanona, naimiena jetade. Raite:

—Ona jillotaiacadicue. Mai o jillo.

⁴² —Iecon naimie jillode.

⁴³ Ie facaise Jesús naimiena oretaiacanano, naimiemo riire llote:

⁴⁴ —O jilluana bumo lloñeno; iadedi Jerusalémo Jusiñamui jofomo Jusiñamui diga ñairaima dine mai jai. O jilluana comini raise uifollena, naimiemo o abina acatajai. Moisés micori jaie lloga rana Jusiñamuimo feca.

⁴⁵ Iese Jesús naimiemo llote; iadedi Jesús finoca rafue llocana eo uite. Ie mudona ailluena comini Jesúsna cioacana jira, Jesús marefodo comini illanomo jaisoiñede; ia comini iñenanomo jaisoide. Iese jaisoide; ia naganomona naimie dine biñoidimaci.

2*Jesús tisitaitimiena jillotaja rafue**(Mt 9.1-8; Lc 5.17-26)*

¹ Nigarui illanona, Capernaumo Jesús dane abido ride. Comini iena fidianona,

² ie risoillacomo naimie dine ofidimaci. Ailluena billa jira, fo illino iñede. Nasemo jiai eo ofidimaci. Jesús naimacimo Jusiñamui rafuena llofuate.

³ Cominina Jesús llofuetemo, naimie dine nagaamagamie ie biiramo biide tisitaitimiena atidimaci.

⁴ Ailluena comini illa jira, Jesús dine naimaci rinidimaci. Naie jofu bibanilla jira, jofu emodomo a jaidimaci. Jofu beicimo ite tidabacuido a jaidimaci. Jofu

emodo econuano, Jesús ecimo naimiena ie bairamo bide diga, rao diga, ana ñuitadimaci.

⁵ Iena Jesús cianona, tisitaitimie jilluana naimaci inuana Jesús uñote. Tisitaitimie mo llote:

—Nabai, o jeacino cue feitaja jira, iena jai oni dotadicue. Ie facai ibana jai oñeiticue.

⁶ Nainomo itinomona damierie Moisés micori llogacinona llofueraini nainomo raidimaci. Comecina facadimaci:

⁷ “¿Niese bimiedi iese llote? Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”.

⁸ Naimaci comeciai facajacinona Jesús uñuanona, naimacimo jicanote:

—¿Bue ñellena omoi comeciaina iese facadomoi?

⁹ Bimiemo: “O jeacinona jai oni dotadicue” cue lloia, cue uai siñonana uñoñeitomoi; ia bimie mo: “Mai naidacaillanona, o bira ferinocaida, mai macari” cue lloia, cue uai siñonana uñoitomoi.

¹⁰ Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uñollena, tisitaitimie mo lloiticue:

¹¹ “Mai naidacai. O bira ferianona, o jofomo mai jai”.

¹² Iese naimie raillamona, tisitaitimie jillode. Naidacaida, ie bira feria mei, naimacimona jino jaide. Nana nainomo itino rajicaidimaci. Iemona Jusiñamuimo iobillacinona fecadimaci. Raitimaci:

—Bie isoide siño comena jaca cioñedicaí.

Jesúdi Levína fetua rafue
(Mt 9.9-13; Lc 5.27-32)

¹³ Jaiaruido jorai fuemo Jesús dane jaide. Ailluena comini naimie dine ofillanona, naimacina llofueite.

¹⁴ Llofuia mei, Jesús bai macaritemo, Leví raillamiena ciode. Levídi Alfeo jito. Gobierno ucube ouillanomo naimie maijuide. Nainomo raidena Levína ciode. Naimie mo llote:

—Cue llofuegamiena o jaillena, cue diga bi. —Naidacaida, Jesús diga jaide.

¹⁵ Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisaibitimaci. Moisés micori llogacinodo raise jaiñedino jai guisaibitimaci.

¹⁶ Ie facaise fariseuai comini, Moisés micori llogacinona llofueraini diga, nainomo jamai bitimaci. Jesúsna cianona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci.

¹⁷ Iena cacajano, Jesús llote:

—Ecairedinodi medicona jitaiñedimaci; ia duidinodi medicona jitaidimaci. Ie isoide. Mareuidino cuena jitaiñedimaci; ia maraiñedino cuena jitaidimaci. Jusiñamui dibeimo mareuidinona uaibiñedicue; iadedi maraiñednona uaibiticue. Omoimona maraiñedino diga nabairiticue; ia naimacina uaibiticue.

Jesúmo comini guiñenana jicanua rafue
(Mt 9.14-17; Lc 5.33-39)

¹⁸ Ie facaise Jusiñamuina raise iobitallena, Juan Bautista llofueoicaigano guiñenaruillai ite. Ie facaise fariseuai comini jai guiñenaruillai ite. Jesús dine comini billanona, naimie mo llote:

—Cai einamaci llua isoi, Jusiñamuina naimaci raise iobitallena, guiñenaruillai illa facaiseconi Juan Bautista llofueoicaigano guiñedimaci. Naimaci jeacino facaina sunaicabitimaci. Fariseuai llofueoicaigano iedo jiai jaidimaci; ia o llofueoicaigano jaca guitimaci. ¿Bue ñellena cai einamaci rafuedo jaiñedimaci?

19-20 Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillamona guitimaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

21 Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite.

22 Jacagomona finoca bolsa como finoca vino joneñega. Jonegadena, maiñena jira, sirillamona igoi raire cuararite. Vino faifite. Igoi jiai faifite. Como finoca vino comogomo jonelle. Iemei iena faifineite. Ie isoide. Omoi einamaci rafue ifomo jiaie rafue birui ite. Iena omoimo llocabiticue. Iedo jaidicai —llote.

*Sábadoruimo Jesús llofueoicaigano maijia rafue
(Mt 12.1-8; Lc 6.1-5)*

23 Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijiano, guicana jaidimaci.

24 Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Iese cai abimo jeacinona jai finodimaci.

25 Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide.

26 Naie facaise Jusiñamui diga nanoca ñairaimadi Abiatar. Jusiñamui jofomo naimaci fo jailla mei, Jusiñamuimo fecaca llomeniconona uanona, guitimaci. Jamai bue isoidino naie llomeniconona guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga, David micori iena guite; ia Jusiñamui naimacina duere finoñede.

27 Jusiñamui sábadona finuamona, sábadu ite, nairui illamona comini caimare illena; ia omoi llofuiamona, iese iñedimaci. Nairuimo rairuica rana finoñellena, comini iese illena llofuecabitomoi.

28 Monamona cue billamona, imana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiai rairuiredicue. Ie jira nairuimo cue jitailla rafuena finoredicue.

3

*Jesúdi onollina idisarodimiena jillotaja rafue
(Mt 12.9-14; Lc 6.6-11)*

1 Jiaie sábadoruimo judiaui ofiracomo Jesús dane jaide. Ie facaise onollina idisarodimie nainomo ite.

² Nainomo itino Jesús eruaidimaci, sábadoruimo Jesús naimie raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Sábadoruimo bu maijia, naimacimona jecinó finode.

³ Onollina idisarodimiemo Jesús llote:

—Cue ecimo mai bai bi.

⁴ Jesús nainomo itinomo jicanote:

—¿Nie isoide rafue sábadoruimo finuadi mare? Bimie birui cue jillotai, birui mare rafuena finodicue. Cuená birui omoi meineiadedi, birui marañede rafue finodomoí. Sábadoruimo, ¿nie isoide rafue finuana rairuidomoí?

Comini dinena uai oñedimaci.

⁵ Naimie uaina naimaci ñnoñena jira, riicaillanona, Jesús naimacimo erodate. Duidimiemo llote:

—O onolli mai oni ñuita.

Iena oni ñuitajamona jillode.

⁶ Iena ciuanona, fariseuai jino jaidimaci. Naimiena meinellena, illaíma Herodes díbeimo itinona baillanona, naimaci díga coniniri siadotimaci.

Jorai fuemo Jesúsdi ailluena cominina llofuia rafue

⁷ Naie nairaimona jorai fuemo Jesús, ie llofueoicaigano díga, oni jaide. Galilea railla eniruemoná ailluena comini naimie díne bitimaci. Judeamoná jaíno bitimaci.

⁸ Jerusalémoná, Idumeamoná, Jordán ruicafabellemoná, Tiro jinofemo ite eniruemoná, Sidón jinofemo ite eniruemoná ailluena bitimaci. Nana naimie siño finoca rafuena cacajanona, naimiena cioacadimaci.

⁹ Comini naimiena meetasí raillanona, ie llofueoicaiganomo daje botemo naimie jaillena eenogana llote.

¹⁰ Ailluena duidinona naimie jai jillotaja jira, nana duidino naimiemo riacadimaci. Jilloillena naimiena jetaacadimaci. Iemoná naimie illa bote eenuana jitaide.

¹¹ Jananiai anamo itino Jesúsna cioia, Jesús uicomo ana bitadajanona, jananiai naimacina ñaitatajamona, raitimaci:

—Jusiñamui Jitodio.

¹² —Ia Jesús naimiena naimaci lluana rairuide.

Jesúdi ie doce llofueoicaiganona fetua rafue

(Mt 10.1-4; Lc 6.12-16)

¹³ Naie facaise anedumo Jesús jaide. Ie jitaillano díese naimie díne uaidote. Naimie díne billa mei,

¹⁴ doce dígamiena fetode. Naimie díga jaicabillena, naimacina fetode. Ie rafuena llollena, naimacina oretaiacade.

¹⁵ Janaba anamo itinomona Janabana oni oretallena, ie uai naimacimo ite.

¹⁶ Iese mameciredimaci: Simón; naimie mameci jiaicidi Jesús jítaca Pedrona.

¹⁷ Jacobo, Juan; iaimaiaí Zebedeo jito iaimaiaí. Jiaie mameci iaimaiaína Jesús jonete Boanergesna. Naie mameci oni dobañuamona moná guruama. Iciruilla jira, iese mamecirediaimaiaí.

¹⁸ Andrés, Felipe, Bartolomé, Mateo, Tomás, jiaie Jacobo; naimiedi Alfeo jito. Tadeo, jiaie Simón; naimiedi cananista comini facaisemo duide.

¹⁹ Judas Iscariote micori; naimiedi Jesúsna gaítatatiemie.

*Fariseuai Jesúna jeare ñaia rafue
(Mt 12.22-32; Lc 11.14-23; 12.10)*

²⁰ Te llofueoicaiganona fetua mei, ie risoilla jofomo naimaci diga Jesús abido jaide. Ailluena comini naimie dine billa jira, naimie guillena, naimie abi juanide.

²¹ Naimiena ie comini fidiano: “Naimiedi jai uarico isoi iacade” raillanona, comecina facadimaci. Ie jira naimiena ie ei jofomo isaibiacadimaci.

²² Jerusalémona Moisés micori llogacinona llofueraini naie facaise bilanona, raitimaci:

–Beelzebúdi Janaba comini. Beelzebú anamo Jesús illamona, Beelzebú uaido Janaba illa cominimona Jesúdi Janabana oni oretate –raitimaci.

²³ Naimaci raillana naimie cacajanona, naimie dine Jesús naimacina uaidote. Llote:

–Janaba díbeimo Beelzebú illamona, dama ie abina oretanide.

²⁴ Ero, daje isoi comeciaina lloñenamo daje nairai facañenia, danomo majinidimaci. Oni jaidimaci.

²⁵ Daje isoi comeciaina lloñenamo daje jofomo itino facañenia, danomo jainaiainidimaci. Oni jaidimaci.

²⁶ Te isoide. Beelzebú uaido jananiaina omoi llua isoi cue oretaia, Janaba ie díbeimo itino diga jai nabairiñede. Iemona naimie comini danomo iñeitimaci. Ie uai ieconi saite.

²⁷ Ero, mairidimie ie jofomo ite rana nibai fiicadomoi. Iena fiillena, naimiena nano raise omoi maiga. Raise maiga mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue.

²⁸ Ie jira bie omoimo lloiticue. Jusiñamui nana comini jeacinona dotarede. Naimiedi naimaci jeare ñaiacinona dotarede;

²⁹ iadedi naimiedi ie Joreñoa jeare ñaiacinona jaca dotañeite. Jusiñamui iena jaca feitañeite –llote.

³⁰ –Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode –Jesúna raitimaci. Iese naimaci railla jira, “Jusiñamui naie isoide ñaiacinona jaca dotañeite” iese Jesús llote.

*Jesús ie comini
(Mt 12.46-50; Lc 8.19-21)*

³¹ Jesús comini naimie dine rillanona, naimie diga ñaiacanano jino naidaidimaci.

³² Ie facaise ailluena comini naimie ecimo raidimaci. Naimie comini rillana naimaci cacajano, naimiemo llotimaci:

–O ei, o amatiai diga jino ite. O diga ñaiacade.

³³ Jesús dinena uai ote:

–¿Bu cue ei? ¿Bu cue amatiai?

³⁴ Naimie ecimo itinomo erodajanona, llote:

–Jadi, cue ei, cue amatiai.

³⁵ Jusiñamui jitaillacinona finodimie cue amana, cue miriñoa, cue eina. Imaci ua cue cominina.

4

*Jesúdi trigona judaidimiena llua rafue
(Mt 13.1-9; Lc 8.4-8)*

¹ Jiairuido jorai fuemo dane jaillanona, ailluena comini naimie dine ofillamona, Jesús naimacina llofue. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itimaci.

² Ailluena rafuena naimacina llofue. Raite:

³ —Omoi fueollena, bie rafuemo raise cacarei. Damie trigona judaiaide.

⁴ Naimie judaiaimona, naisomo janore iduai juide. Naimie bai jailla mei, sillinai iena guisaibitimaci. Ie jira sicoñede.

⁵ Nofiemo jiaie iduai juide. Nainomo enirue raise iñede. Sicode; iadedi enirue raise iñena jira,

⁶ raise jainañena jira, ecasillamona duide. Ie jira llisiñede.

⁷ Eecuai illanomo jiaie iduai juide. Eecuai sicuamona riaru eecuai ibaica. Ie jira llisiñede.

⁸ Mare eniruemo jiaie iduai juide. Sicode. Llisillamona danademo treinta diga llisillana ote. Jiaimamona sesenta diga llisillana ote. Jiaimamona cien diga llisillana ote.

⁹ Omoi jeforena jira, raise fueollena, cue lluamo cacarei. Iena ino.

*Jesús ie como lloga rafuena llofua rafue
(Mt 13.10-23; Lc 8.9-15)*

¹⁰ Ailluena cominimona jailla mei, naimie diga jaisoidinodi, ie doce llofueoicaigano diga, Jesús mo ie llofuiana jicanotimaci.

¹¹ Uai ote:

—Jusiñamuidi omoia ie sedaacana rafuena jai uiñotade. Jiaie iena uiñotedomoi. Jiaie cominina iena nia uiñotañede.

¹² Ie jira bie isoidicinodo naimacimo lloticue. Cue siño finoca rafuena ciodimaci; iadedi iena naimaci inoñena jira, uiñoño jaitimaci. Cue llofuiana jamai cacadimaci; iadedi naimaci inoñena jira, raise cacaiñedimaci. Uiñoñedimaci. Jusiñamui dibeimo naimaci jiacaiñena jira, Jusiñamui naimaci jecinona oni dotañeite. Iena feitañeite.

¹³ Cue como llofuiacinona omoi raise cacaiñenia, dane cue llofua, iena jiaie raise nibai cacaiñeitomoi;

¹⁴ ia iena omoia llofueiticue. Trigona judaidimiedi Jusiñamui rafue lloraima isoide.

¹⁵ Dajerie iduai naisomo juide. Dajerie comini comeciai naie naiso isoidimaci. Jusiñamui uaina cacadimaci; ia Taife naimaci comeciaino cacaja uaina inotañede.

¹⁶ Jiaie iduai nofiero juide. Dajerie comini comeciai naie nofie isoidimaci. Jusiñamui uai nano naimaci cacai, iena caimare feiñotimaci.

¹⁷ Nofiero riga iduai jainaonidedi raise sicoñede. Naie comini janore inua jira, ie isoidimaci. Dallu nano inotimaci. Jusiñamui uai muidona duere naimaci sefua, abido danomo uaidimaci.

¹⁸ Jiaie iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. Inotimaci;

¹⁹ iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaille rafuena finocana jaiñedimaci.

²⁰ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise feiñotimaci. Eo lliside isoidimaci. Jusiñamui jitaille rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

*Jesúdi lamparína ñaia rafue**(Lc 8.16-18)*

²¹ Jorai fueo Jesúdi cominina nia llofue:te:

—Jai uneca lamparín jiaie illanomona atia mei, jiaie ra bñide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainade.

²² Ie isoide. Cue rafue llocana jaia, comini comecia; iticinona uññotade. Uanaicino naimaci cacajamona, damierie ñnotimaci. Damierie ñnoñedimaci.

²³ Omoi jeforena jira, raise fueollena, cue llamo cacarei. Iena ñno.

²⁴ Cue llamo raise cacarei. Omoi cacaja diese Jusiñamui omoína uññotaite.

²⁵ Tena omoi ñnoia, Jusiñamui omoína canoite. Omoína uññocana jaitaite. Jiaimie iena janore cacajamona, iena ñnoñenia, Jusiñamui naimiena faifitaite.

Jesúdi Jusiñamui ie cominina sedaacana llofua rafue

²⁶ Jesús llote:

—Jusiñamui dibeimo comini jailla rafuena nia lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie ie illimo judaiaide.

²⁷ Judaia mei, ie illimo nagarui ie maijicabilla isoi naimie jaide. Niese iduai denuana naimie raise uññode;

²⁸ ia eniruemona nano sicode. Monaila mei, lliside. Iemona naicuai comuide.

²⁹ Jai einaia, iena ote. Ie isoide. Jusiñamui rafuena raise cacaiñedomoi; ia iena ñnocana jaidomoi.

*Jesúdi mostaza ido llua rafue**(Mt 13.31-35; Lc 13.18-19)*

³⁰ Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci.

³¹ Jiaie rafuedo iena omoimo lloiticue. Damie mostaza idona rillamona, naiemona eo aillue riará sicode. Mostaza ido eo janorede;

³² iadedi sicua mei, eo aillue riará jaillamona, ie onogaillai jegairiena jira, icairo anamo manaidinomo sillinñai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

³³ Naie isoide rafuiaido Jesúdi Jusiñamui ie cominina sedaacana rafuena cominimo llote.

³⁴ Naimaci cacaja diese llote. Naimacimo jiaie rafuedo lloñede; ia ie llofueoicaiganomo iena eneno llofue:te.

*Jesúdi jorai baguana llicaitaja rafue**(Mt 8.23-27; Lc 8.22-25)*

³⁵ Ailluena comini llofua mei, jitoma jai sojicaidemo, ie llofueoicaiganomo Jesús llote:

—Ruica enefebeimo mai cai jailli.

³⁶ Cominina fainonocaida, botemo naimie jai illamona, naimie llua isoi, oni jaidimaci. Jiaie botes jiaí jaide.

³⁷⁻³⁸ Bai jaillanona, jillacimo Jesús ññide. Ie ifogi almohadamo bñide. Ie facaise aifi eo riire bite. Joraidi eo bagode. Baguamona, botemo jinui a uaide. Oruiacana jira, jacinailamona, Jesúsna casitatimaci. Raitimaci:

—Maestro, ¿ñiese itio ñnoilla? Caina cano. Jai buisaidicai. Corobaisaidicai.

³⁹ Naimie casillano, aifina lletade. Jinui baguana lliçaitade. Ieconí aifi lliçaide. Bagoñede.

⁴⁰ Ie llofueoicaiganomo jicanote:

—¿Bue ñellena jacinaitomoi? ¿Niese cuena raise iinoñedomoi?

⁴¹ Uai ofeno eo rajjicaidimaci. Coniniri ñaitimaci:

—Bimiedi ¿nie isoidimie? Aifi naimie uaina inote. Jorai naimie uaina jiai inote. —Bai jaillanona, ruica dine ridimaci.

5

Jesúdi Gadara railla eniruemo illa rafue

(Mt 8.28-34; Lc 8.26-39)

¹ Ruica dine naimaci ridemo, Gadara railla eniruemo sijidimaci.

² Botemona ari Jesús jaidemo, naimie dine damie bite. Naimiedi Janaba anamo itimie.

³ Comini raioillanomo nofie moto ifuaimo naimie i-isoide. Janaba anamo naimie illamona, comini diga marena jaca irainide.

⁴ Diga icaíño lloeo diga ie onollidi maíga; iadedi oni ecocaida, lloeona ticonote. Ie eilli jiai maíga; iadedi saitaicaida, lloeona ticonote. Ie jira buna naimiena raise mainide.

⁵ Nagarui nofie motomo ite. Anedumo jaisoide. Cuiricuirisoide. Dama ie abina nofici diga jaidode. Iese naimie isoide.

⁶ Nofiemona Jesúna cuanona, aisicana Jesús dine bite. Naimiena sedalena, ie cañici ifodo ana rainadate.

⁷⁻⁸ Jesús llote:

—Janaba, bimiemona oni jai.

Janabadi imana ado llotatate:

—Nanoca Jusiñamui Jitodio. ¿Niese cuena nibaiacadio? Jusiñamui mamecido cuena duere finoñeno.

⁹ Jesús Janabamo jicanote:

—¿O mameci bu?

Uai ote:

—Aillosiedicai.

¹⁰ Bie illanomona naimacina oretañellena Jesúsno duere jicanotimaci.

¹¹ Naie facaise nainomo ite anedumo ailluena chanchuai itimaci.

¹² Chanchuai abimo naimaci jaillena Jesúsno duere jicanotimaci.

¹³ Jesús dinena:

—Jee —raite. Ieconí iima abimona oni jaillanona, chanchuai abimo jaidimaci. Dos mil chanchuai nainomo itimaci. Iena suidemo, iconí jillacimo joraimo chanchuai aisano corobaisidimaci.

¹⁴ Iena cuanona, chanchuai sedaraini naimaci nairai dine aisicana jaidimaci. Naie rafuena llocana jaidimaci. Ie jira diga comini jaide, naie rafuena raise fidillena.

¹⁵ Jesús dine naimaci ridemo, jaive Janaba anamo illamiena Jesús ecimo raillana ciodimaci. Naimie iniroina jai jitade. Naimie jai uairicoñede. Iena cuanona, Jesúna jaciruitimaci.

¹⁶ Naie rafuena ciodino jaive Janaba anamo illamie jilluana llotimaci. Chanchuai mo suide rafuena jiai llotimaci.

¹⁷ Naie enirue itinodi Jesúsno naimaci eniruemona oni jaillena duere jicanotimaci.

¹⁸ Botemo Jesús jaiacania, jaive Janaba anamo illamie Jesúsno jicanote, naimie diga jaillena;

¹⁹ ia Jesús raite:

—Dama ite. O nabaiñiai dine jai. Nana Jusiñamui omo finoca rafuena naimacimo llono. Jusiñamui ona duenailana naimacimo llono.

²⁰ Te jira oni jaide. Nana Decápolis railla enruemo Jesús nana naimiemo finoca rafuena llocana jaide. Iena cacajamona, nana comini rajicaidimaci.

Jesúdi mena duide riñona jillotaja rafue

(Mt 9.18-26; Lc 8.40-56)

²¹ Ruica dibeimo ie llofueoicaigano diga Jesús abido rilla mei, ailluena comini naimie dine ofidimaci. Jorai fuedo naimie nia ia,

²² Jairona mameciredimiedi Jesús dine bite. Naimiedi judíuai rafue ofiraco sedarima. Jesúmo duere jicanollena, ana bitadate.

²³ Duere jicanote:

—Cue jisa jai fiodaicade. Cue jofomo cue diga bi, o onolli naiñaiñomo o jonellena, naiñaiño jilloillena.

²⁴ Iena cacajano, ie llofueoicaigano diga, naimie diga Jesús jaide. Ailluena comini Jesúmo ñajillanona jaidimaci.

²⁵ Bai jaillanona, duidiñaiño Jesús jinafona jaide. Naiñaiño jeraimona doce años jaca diaide.

²⁶ Diga manorainimona duere sefuide. Jilloñede; ia fodo jaide. Nana ie ucube jai fuite.

²⁷ Jesús duidinona jilluana naiñaiño fidiamona, jinafo dinena billanona, naimie iniroina jetade.

²⁸ “Naimie iniroi cue jetajamona jilloiticue” comecina facajamona, naiñaiño naimie iniroina jetade.

²⁹ Teconi diailladi faimonocade. Ie abi jilluana naiñaiño jai uñote.

³⁰ Te abimona ie uai oni jaillana Jesús uñuanona, dobaicaide. Cominimo jicanote:

—¿Bu cue iniroina jetade?

³¹ Ie llofueoicaigano dinena uai otimaci:

—Ailluena comini o ecimo jaidimaci. Omo ñajidinona: “¿Bu cue iniroi jetade?” raitio.

³² Raise uñollena, Jesús ie ecimo itinomo erodate.

³³ Duidiñaiño ie jilluana uñua jira, Jesús dine jaciruicana bite. Naimie uicomo ana bitadajanona, nana naiñaiñomo ite rafuena llote.

³⁴ Naiñaiñomo Jesús llote:

—Ñoo, cuena o ñnua jira, jai jillodio. Mai marena o jai. O duicomona jai jillobidio.

³⁵ Naiñaiño diga Jesús nia ñaitemo, Jairo jofomona jiaño bite. Jairomo llote:

—O jisa jai fiodaite. Maestrona ñaidoñeno.

³⁶ Iena cacajano, Jairomo Jesús llote:

—O comeci jarire iñeno; ia cuena nia ñno.

³⁷ Ailluena comini naimie diga jaillana rairuide. Dani diese jaillana jitaide: Pedro, Jacobo, Juan. Juandi Jacobo ama.

³⁸ Jairo jofomo rillanona, nainomo itino eecuinaillana cacade. Faillinaillana cacade.

³⁹ Jesús fo jailla mei, nainomo itinomo jicanote:

—¿Ñiese itomoi eecuinailla? Cuemona naiñaiño fiodañedesa. Jamai ñide.

⁴⁰ Iena cacajano, naiñaiño jai fiodaite uñuamona, Jesúri jaisitimaci. Naimacina Jesús jino oretaja mei, nai jitaño moo diga, naiñaiño ei diga, ie llofueoicaigano diga, naiñaiño ecimo Jesús jaide.

⁴¹ Naiñaiño onollina llinocaida, judíuai uaido raite:

—Talita, cumi. —Iena oni dobaiñuamona: “Jitaiñici, mai naidacai” raite.

⁴² Iecon jilluanona naidacaide. Jai jilluano macarite. Naiñaiño mo doce años jai ite. Nana nainomo itino ierí eo raijicaidimaci.

⁴³ —Bumo bie rafuena lloñeno —naimacimo Jesús llote. Guillena naiñaiño na eajana jiai llote.

6

Nazaretmo Jesús illa rafue (Mt 13.53-58; Lc 4.16-30)

¹ Naie illanomona Jesús oni jailla mei, ie llofueoicaigano diga Nazaretmo ride.

² Rilla mei, sábadoruimo nainomo ite ofiracomo llofue. Iena cacajanona, nainomo itino raijicaidimaci. Raitimaci:

—¿Niese eo abina uñote? ¿Bumona ie uaina ote? ¿Niese siño rafuena naimiedi finode? Naimiedi jamai bue isoidimie.

³ Naimiedi amederaima. María jito. Ie amatiñidi Jacobo, José, Judas, Simón. Naimie miriñotiañidi cai motomo jiai ite. —“Cai comena naimie ite” raillanona naimie uaina jamaidimaci.

⁴ Jesús naimacimo llote:

—Naga illanomo cominidi Jusiñamui facaina lloraíma uaina feiñotimaci; iadedi naimie nairaimo naimie ia, ie jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina iñoñedomoi.

⁵ Ie muidona nainomo siño rafuena eo finonide. Damierie duidinona jetajamona, naimacina jillotate;

⁶ ia naimaci iñoñenari raijicaide. Ie mei diga nairaiimo Jesús llofuecana jaide.

Jesúdi ie llofueoicaiganona oretaja rafue (Mt 13.53-58; Lc 4.16-30)

⁷ Ie doce llofueoicaiganona Jesús uaiduanona, naimacimo ie uai iñoñocaide, jananiañi anamona cominina jilloitallena. Ie rafuena lloñena, jiaie illanuaimo naimacina menamierie oretaiacade.

⁸ Raite:

—Ailluena rana uñeno. Omoi abi riidollena, jiguidana uñeno. Llomeniconu uñeno. Ailluena rana omoi uñellena, bolsana uñeno. Ucubena uñeno.

⁹ Zapatona jitajano jai. Abi omoi meidolle iniroina uñeno.

¹⁰ Nie nairaimo omoi jaia, daacomo omoi ri. Naie nairaimo omoi ille dinori, daacomo omoi i.

¹¹ Omoína bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eillaiimo ite jearacuaina oni jaidino. Maraiñede rafuena naimaci finuana naimaci uñollena, omoi eillaiina jaidino.

¹² Jesús naimacimo llua mei, jaidimaci.

—Omoi jeacinona fañonocaillanona, Jusiñamui díbeimo omoi comeciñi iuai meiduana omoi jai —llofuecana jaidimaci.

¹³ Janaba anamo ite cominimona Janabana oredimaci. Duidino abimo farena gia mei, naimacina jillotate.

Juan Bautista micori fiodailla rafue (Mt 14.1-12; Lc 9.7-9)

¹⁴ Jesús mameci are sorilla jira. Herodes railla gobernador Jesús finoca rafuena fidide. Naimie raite:

—Fiodaillamona Juan Bautista micorí jai jillode. Jesús raillamiedi naimie. Ie jira naimie siño rafuena finocabide.

¹⁵ Jiaie comini raisoidimaci:

—Eliás jai bairede.

Jiaino raisoidimaci:

—Fiodaillamona Jusiñamui facaina jaiie lloraima micorí jai jillode.

¹⁶ Jesúna fidiano, Herodes comecina facade: “Juan micorí ie ifogina navui jaitaticue. Fiodaillamona naimie jai jillode”.

¹⁷⁻¹⁸ Iese comecina facade, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño mamecidi Herodías. Ie jira Juan micorí naimiemo llote:

—O ama ai diga itio. Maraiñede rafuena finodio. Jusiñamui iena rairuide.

¹⁹ Ie muidona Herodías dinena Juan Bautista micorina jearuite. Naimiena meinetaiacade;

²⁰ ia finonide, Juan Bautista micorina Herodes jaciruilla jira. Naimiedi Juan micorina mareuidimiena uiñote. Naimie Juan micorí Jusiñamui rafuedo jaillana jiai uiñote. Ie muidona naimie Juan micorina raise eenote. Diga icaiño naimie micorí luana cacade. Iena gaide; ia iena raise cacaiñede. Ie muidona Herodías naimie micorina meinetanide;

²¹ ia ja muidomo naiñaiño sedallirui ride. Herodes cumpleños ie rafuena finode. Ailluena illaicomina ie rafuemo uaidote. Eo ucuberedinona jiai uaidote.

²² Rafuemo Herodías jisa saillamona, Herodena iobitade. Ie uaidoganona jiai iobitade. Iobillamona, Herodes naiñaiñomo llote:

—O jitailla ra cuemo jica. Iena omo fecaiticue.

²³ Illaima uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairai o jicadiodena, atuedo omo iiticue.

²⁴ Iena cacajano, naiñaiño ie ei dine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

²⁵ Herodes dine raire abido billanona, llote:

—Juan Bautista ifogi bandejamo ja jonecaida, cuemo ine.

²⁶ Iena cacajano, Herodes sunaite; iadedi naimie llua jira, nainomo naimie uaidogano jiai illa jira, ie lloga uaina janoiacañede.

²⁷ Ie facaise ie soldaduaimona Herodes damie cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade.

²⁸ Bandejamo naimie ifogi jonecaida, iena atiano, Herodías jisamo fecade. Ieconí ie eimo fecade.

²⁹ Iena fidianona, Juan micorí llofueoicaigano naimie micorí abina uaibitimaci. Iena raítimaci.

*Jesús cinco mil iñiaina ecaja rafue
(Mt 14.13-21; Lc 9.10-17; Jn 6.1-14)*

³⁰ Jesús llofueoicaigano abido bia, Jesúmo nana naimaci finoca rafuena llotimaci.

³¹ Ie facaise ailluena comini naimaci dine biñoidimaci. Ie jira jafaici ollena abi juanide. Guillena jiai abi juanide. Ie jira Jesús ie llofueoicaiganomo llote:

—Jafaici cai ollena, eneno oni mai cai jailli. Comini iñenanomo mai cai jailli.

³² Ie muidona botedo comini iñenanomo dani jaidimaci.

³³ Ailluena comini naimaci oni jaillana cioidimaci. Naimacina uiñuamona, diga nairaiamona aisicana jaidimaci. Jesús nia riñenia, uicodo ie jaillanomo ridimaci.

³⁴ Jesús sijianona, ailluena cominina ciode. Naimacina sedallena bu iñena jira, toica llaudaiaina sedaraima iñena isoi, isoidimaci. Iena uiñuamona, Jesús naimacina duenaite. Ailluena rafuena naimacina llofuete.

³⁵ Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade.

³⁶ Comini mai abido oreta. Ianori ite nairaiamo, ianori ite jofuemo naimaci guille ollena, bie cominina abido oreta.

³⁷ Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana nibai jitaideo.

³⁸ Naimacimo jicanote:

—¿Niga llomenico omoimo ite? Mai jibuisai.

Jibuisailla mei, raitimaci:

—Cinco llomenico mena lliciai diga.

³⁹ Iena cacajano, cominimo raitie illanomo dajerise ana raillena Jesús llote.

⁴⁰ Naimaci cien digamierie ana raisite. Jiaño cincuenta digamierie ana raisite.

⁴¹ Naie cinco llomeniconona, naie mena lliciai diga, Jesús uanona, monamo eruaillanona, Jusiñamuimo iobillacinona fecade. Iemei taillude. Ie llofueoicaigano fecade, cominina ecallena. Iese naie mena lliciai nana cominimo fecade.

⁴² Nana guillanona monidimaci.

⁴³ Monillamona, fiebide guillena iraidimaci. Doce cirigaiaimo oruitatimaci.

⁴⁴ Cinco mil iñiaie diese guitimaci. Naimaci ainiaie, imaci uruiaie diga, jiaie guitimaci.

Jesús jinui emododo macarilla rafue

(Mt 14.22-27; Jn 6.16-21)

⁴⁵ Guilla mei, botedo ie llofueoicaigano ruica dine Betsaidamo jaillena llote. Naie facaiseconi cominina naimie nia facadote.

⁴⁶ Cominina facadua mei, aneduaimo dane jaide, Jusiñamui diga ñaillena.

⁴⁷ Jitibicaidem, nainomo dama ite. Ie llofueoicaigano jorai motomo jaitimaci.

⁴⁸ Aifi naimacimo riire rilla jira, riire jaitimaci. Iena Jesús ciuanona, jinui emododo naimaci dine bite. Naimaci ecido naimie jaisaide;

⁴⁹ ia naimiena naimaci ciuanona, comecina facadimaci: “¿Bu joreño caimo billana cioidicai?”

⁵⁰ Naimiena ciuamona, nana jacinaillamona cuirroidimaci. Naie dacaiño Jesús naimacimo llote:

—Omoi joreñonicaiñeno. Cuesa. Jaciruiñeno.

⁵¹ Botemo Jesús jaide. Ie facaise aifi llicaiide. Ieri eo rajjicaidimaci.

⁵² Janore guillemona ailluena cominina naimie ecajana jaive cioidimaci; ia naimie uai siñonana nia raise uiñoñedimaci. Naimiena nia raise iñoñedimaci.

Jesúdi duidinona Genesaret eniruemo jillotaja rafue

(Mr 14.34-36)

⁵³ Ruica dine jaillanona, Genesaret railla eniruemo ridimaci. Nainomo sijidimaci.

⁵⁴ Botemona ari jaidemo, nainomo itino Jesúna uifnotimaci.

⁵⁵ Nana naie eniruemo aisicana jaidimaci, duidino naimie dine atillena. Naimaci biira emododo duidinona atisite. Jesús illana naimaci fidiano, iese atuidimaci.

⁵⁶ Diga nairaiaimo naimie jaide. Nie nairaimo Jesús ria, naimaci illano motomo duidinona atisite. Jilluana jitaidimaci. Ie iniroi fueda jetallena naimiemo duere jicanotimaci. Nana naimie iniroina jetadino diese jilodimaci.

7

Jesúdi comini comeciaina ñaia rafue (Mt 15.1-20)

¹ Naie facaise fariseuai cominidi Jesús dine bitimaci. Moisés micori llogacinona llofueraini Jerusalémona jiai bitimaci.

² Jesús llofueoicaiganomona damierie naimaci isoi guiñenana cioidimaci.

³⁻⁵ Fariseuai dinena Jesúmo jicanotimaci:

—¿Bue ñellena omoi llofueoicaigano cai einamaci rafuedo jaiñedimaci? Naimaci guacania, naimaci onolli cai einamaci llua isoi, raise jocoñedimaci. Ie jira cai abimo jeacino finodomo.

Iese jicanotimaci, naimaci einamaci rafuedo naimaci jailla jira. Marañede rafue naimacimo suiñellena, iese ailluena judíuai jaidimaci. Naimaci guacania, naimaci einamaci llua isoi, onollina diga icaiño jocuano, guitimaci. Mercadomona bia, naimaci einamaci llua isoi, abina lleredimaci. Naimaci einamaci llua isoi, tazones, ollas, bandejas jiai jocodimaci. Iese jaisoidimaci. Comecina facadimaci: “Iese cai finoia, Jusiñamuimona mare. Iese cai finoñenia, Jusiñamuimona marañede. Naimie caina duere finoite”. Jearede rafue naimaci abimo oñellena, iese finouidimaci.

⁶ Jesús uai ote:

—Mareuidinona abi caitauidinodomo. Isaías micori jaiie omoína raise llote. Naimiedi Jusiñamui lluana cuete:

Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticai” llotimaci.

“Ona sedadicaí” llotimaci.

Jamai ñaitimaci. Naimaci comeciái cue dibeimo raise iñede.

⁷ Cue uai itena, jamai comini lluacinona naimaci llofuecabilla jira, tainona cuena sedadimaci

cuete.

⁸ Isaías micori llua isoi itomoi. Jusiñamui llogacinona fañonocaida, omoi einamaci rafuedo jaidomoi.

⁹ ¿Bue ñellena nana Jusiñamui llogacinodo jaiñedomoi? Omoi einamaci llogacinodo jaidomoi; iadedi nana Jusiñamui llogacinodo raise jaiñedomoi.

¹⁰ Moisés micori jaiie llote: “O moo uai inuanona, naimiëna cano. O ei uai inuanona, naiñaiñona cano. Ie moori jeare ñaitimie, ie eiri jeare ñaitimie meinelle”.

¹¹⁻¹² Iese Moisés micori llote; iadedi omoi einamaci llotimaci: “Jusiñamuimo cai ucubena cai fecajomona, cai moona, cai eina jai canonidicaí”.

¹³ Iese omoi finocabilla jira, omoi einamaci llogacinodo omoi jaillamona, Jusiñamui uaina jamaidomoi. Bie isoide rafuedo jaca jaidomoi.

¹⁴ Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uifollena, cue lluomo cacarei.

¹⁵ Omoi einamací isoi omoi guifñenia, naimací isoi omoi onollina omoi jocoñenia, omoi comeciaina jearetañedomoi. Omoi guillamona, omoi onollina jocuamona. Jusifñamuina nabaiñedomoi. Omoimo jeacino illa jira, Jusifñamuina nabaiñedomoi. Omoi comeciái jearena jira, jeacinona finocabidomoi.

¹⁶ Omoi jeforena jira, raise fueollena, cue lluomo cacarei. Iena ifño.

¹⁷ Cominimona oni jaillanona, Jesús ie risoilla jofomo jaide. Nainomo ie lofueoicaigano aillinano ie lluana jicanotimaci.

¹⁸ Uai ote:

—¿Niese cue lluana jiaí nia cacaiñedomoi? Nie isoide ra gutomoina, omoi comeciaino jeare ifñede.

¹⁹ Omoi comeciaino jaiñede; ia omoi jebemo jaide. Ie mei omoi abiaimona jino bite.

Jesús lluamona, nana guille radi mare uifnoticai.

²⁰ Jesús llote:

—Omoi comeciái jearena jira, jearede rafuena finocabidomoi.

²¹ Omoi comeciái jearena jira, jeare comeciaina facacabidomoi. Omoi aifñede riño diga icabitomoi. Omoi iniñede iima diga icabitomoi. Fñiricabitomoi. Cominina meinecabitomoi.

²² Jiaí comini rana nicidocabitomoi. Jearede rafuena finocabidomoi. Iena eburitomoi. Jifuericabitomoi. Abina uradoicabitomoi. Jiaíe comini joreña jeare ñaicabitomoi. Abina iedocabitomoi. Ebena jaicabitomoi.

²³ Bie isoidicinuai omoi comeciaino illa jira, jearede rafuena finocabidomoi; iadedi omoi einamací llua isoi, omoi onolli jocoñenamona jeacino comuifñede.

*Jesúdi judío ifñaiñofediñaiñona jillotaja rafue
(Mt 15.21-28)*

²⁴ Nainomona Jesús jaillanona, Tiro railla eniruemo jaide. Sidón railla eniruemo jiaí jaide. Nainomo jofomo jaillanona, iena buna fidiana jitaifñede; ia iena janonide.

²⁵⁻²⁶ Ie facaise judío ifñaiñofediñaiño dañó bite. Naiñaiñodi sirofenicia nairai ifñaiño. Ie jisa Janaba anamo ite. Jesúsna fidiana, naimie dine bite. Naimiena raise uaiduanona, naimie ecimo ana bitadate. Ie jisamona Janabana oni oretallena Jesúsno duere jicade.

²⁷ Judíuifñedinona naimie canoñenana naiñaiño uifollena, naiñaiñomo Jesús llote:

—Uruiaí guillamona jiconiaina ecadicaidena, maraiñede. Uruiaí nano ecadicaí.

²⁸ Naiñaiño dinena uai ote:

—Jií, maestro; iadedi jiconiaídi uruiaí guillamona fiebide guillemona gutimaci. —Iese llote; ia jiaíe rafuemo comecina facade. Uruiaína llote; iadedi judíuifñedimono comecina facade. Jiconiaina llote; ia judíuifñedinomo jiaí comecina facade. Comecina facade: “O cominimo o rafue duide; ia cai Namana o illa jira, níbaí o rafue caimo janore duide”.

²⁹ Jesús uai ote:

—Raise llotio. O jofomo mai abido jai. O jisamona Janaba oni jaide.

³⁰ Naimie llua isoi jofomo jaide. Ie jisa bíramo bídena ciode. Janaba naiñaiñomona oni jaillana jai uifñote.

Jesús jefona cacaiñedimiena jillotaja rafue

³¹ Tiro railla eniruemona Jesús oni jaide. Jaillanona, Sidón railla eniruemo jaide. Decápolis railla eniruemo jiai jaide. Ja muidomo Galilea railla jorai fuemo ride.

³² Iena fidiano, naimie dine comini jefona cacaiñedimiena atide. Naimie gogoma. Naimiena jilloitallena, naimiemo ie onolli jonellena Jesús mo jicadimaci.

³³ Ailluena comini naimie dine jai billa jira, jefona cacaiñedimiena eneno oni uite. Nagafebe jefomo onocai ñuitade. Ie onocaimo tuajanona, ima ifena jetade.

³⁴ Jusiñamui dine monamo eruaíta, naimiena duenailamona, jafaicina faite. Judíuai uaido naimiemo llote:

—¡Efata! —Oni dobaiñuamona: “¡Ecoricai!” raite.

³⁵ Ieconí ie jefodi ecoricaide. Jai raise cacade. Jai raise ñaite.

³⁶ Cominimo:

—Bimie jai jilluana bummo lloñeno —Jesús diga icaíño llote; ia naimie uaina inoñedimaci. Iena llocana uitimaci.

³⁷ Naimieri eo rajicadimaci. Coninina naimiena raitimaci:

—Naga rafuena raise finode. Jefona cacaiñedimiena jai jillotate. Gogonaitimiena jai jillotate.

8

Jesúdi cuatro mil iñiaina ecaja rafue (Mt 15.32-39)

¹ Naie facaise naimie dine ailluena comini illanona, naimaci guille jai iñena jira, Jesús ie llofueoicaigano naimie dine uaidote. Raite:

²⁻³ —Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedícue, naisomo naimaci bai raillano. Naimacina cue duenaila jira, naimacina canoiacadicue.

⁴ Jicanotimaci:

—¿Ñiese naimacina bene ecaíticai? Jofue iñenanomo iticai.

⁵ Jesús jicanote:

—¿Ñiga llomenico omoimo ite?

Uai otimaci:

—Siete.

⁶ Comini ana raillena Jesús llote. Naie llomenicona uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci.

⁷ Naimacimo janore llicisiriai jiai ite. Ie facaina Jusiñamuimo iobillacinona fecaja mei, cominimo fecallena Jesús llote.

⁸ Nana gutimaci. Monidimaci. Monillamona, fiebide guillena iraidimaci. Siete cirigaiaimo oruitatimaci.

⁹ Nainomo cuatro mil iñiaia gutimaci. Naimaci ainiaia, imaci uruiaia diga, jiai gutimaci.

¹⁰ Guilla mei, cominina naimaci jofuemo Jesús orede. Ie llofueoicaigano diga, botemo jaillanona, Dalmanuta railla eniruemo jaide.

Fariseuai comini Jesús mo siño rafuena finuana jicanuano billa rafuena (Mt 16.1-4; Lc 12.54-56)

¹¹ Dajerie fariseuai comini Jesús dine bitimaci. Naimie uaina uaitaiacadicimaci. Naimiena facacillena, siño rafuena finuana jicanoiacadicimaci. Iena

naimie finoñedena, naimie ie llua isoi iñenana uifnotimaci. Naimiena duere finoacadimaci. Llotimaci:

—Iena cai cioillena, Jusifñamuina siño rafuena finota.

12 Sunaillanona, Jesús jafaici faite. Raite:

—¿Bue ñellena siño rafuena finuana cioiacadomoi? Omoi facaina iena finoñeiticue.

13 Ie llua mei, naimacimona oni jaidimaci. Ie llofueoicaigano diga, botemo dane jaillanona, ruica dine Jesús jaide.

Jesús siritate rana llofuiia rafue

(Mt 16.5-12)

14 Ruica dine rilla mei, Jesús llofueoicaigano llomeniconona feillana uifnotimaci. Naimacimo daje llomenico ite.

15 Iena naimie uifnuamona, naimacimo Jesús llote:

—Fariseuai siritate ramona abina rairui. Illaíma Herodes siritate ramona abina rairui. —Iese Jesús llote; iadedi naimaci llofuiacinomona abi rairuil-lena ñaite.

16 Jesús iese llua jira, iena naimaci raise cacaiñena jira, daní coniniri siadotimaci:

—Llomeniconona cai atañena jira, caimo iese llote.

17 Naimaci siaduanona Jesús uifnuua jira, naimie lluanona naimaci raise nia cacaiñena jira, naimacimo jicanote:

—¿Bue ñellena iese siadotomoi? ¿Ñiese cuena ifnoñedomoi? Cuemo siño uai illana nia raise cacaiñedomoi.

18 Uisiredomoi. Jeforedomoi. ¿Ñiese cue navui siño finoca rafuemo comeciaina facañedomoi?

19 Navui cinco mil ifñiai cinco diga llomeniconona guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Doce.

20 Jesús llote:

—Jiaicaiño cuatro mil ifñiai siete diga llomeniconona guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Siete.

21 Jesús dinena jicanote:

—¿Ñiese cuena nia raise ifnoñedomoi? Siño uai cuemo illana nia raise ifnoñedomoi.

Jesús uisnidimiena jillotaja rafue

22 Oni macarillanona, Betsaidamo Jesús, ie llofueoicaigano diga, ride. Ie facaise naimie dine comini uisnidimiena atide. Naimiena jilloitallena, naimiena jetallena, Jesúsimo jicanote.

23 Iena Jesús cacajanona, ie onollina llinuanona, nairai illa jinofemo uisnidimiena uite. Ie mei ie uisina tuade. Ie uisina jiai jetade. Naimiemo jicanote:

—¿Buena ciodio?

24 A eruailanona, uai ote:

—Comini macarillana ciodicue; ia amena isoi eruaidimaci. Nia raise cionidicue.

25 Ie uisina Jesús dane jetade. Iemona oni erocaillamona, jai jillode. Jai raise ciodo.

26 Jai jillua jira, ie jofomo naimiena abido orede. Jesús llote:

—Betsaidamo itino o jilluana lloñeno; ia nainomo jaiñeno o jofomo mai abido jai.

Pedro Jesúna llua rafue
(Mt 16.13-20; Lc 9.18-21)

²⁷ Cesarea Filipino eniruemo ite nairaiaimo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

²⁸ Uai otimaci:

—Damierie raitimaci: “Juan Bautista micoridio”. Damierie raitimaci: “Odi Eliadio”. Jaiño raitimaci: “Jusiñamui facaina jaie ite llorainimona damie jai jillode. Imiedio”.

²⁹ Jesús dane jicanote:

—¿Niese omoi cuena raitomoi?

Pedro uai ote:

—Odi cai Jilloitaraimadio. Jusiñamui facaina lloraini micoriai o billena jaie llotimaci

³⁰ Jesús iena bumo luana rairuide.

Jesús ie fiodaillena llofua rafue
(Mt 16.21-28; Lc 9.22-27)

³¹ Ie facaise ie llofueoicaiganona ie duere sefuillena llofue. Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloiticue.

³² Iena marefodo naimacimo llote. Iena cacajano, Pedro dinena lletade:

—Dama ite. Iese lloñeno. Bie isoide rafuena lloñeno.

³³ Ie llofueoicaiganomo erodajanona, Jesús Pedromo riire llote:

—Cuemona oni jai. Iese ñaiñeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio.

³⁴ Naimie dine ailluena comini uaidua mei, ie llofueoicaigano nainomo jiai illanona, naimacimo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue dibeimo naimie iite.

³⁵⁻³⁷ Duere sefuillana jaciruillamona, cue cominina bu jaiacaiñenia, ja muidomo faifite; iadedi duere sefuillana jaciruiñenamona, cue cominina bu jaija, jaca faifñeite. Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿niese cue Moo dine riite? Nainomo naimie riñeno faifite.

³⁸ Birui ite comini Jusiñamuina jitaiñedimaci. Naimiena jai faionocaidimaci. Jeacinona finocana jaidimaci. Cuena bu meiruia, cue rafuena bu meiruia, dane cue bia, naimiena meiruiticue. Cuena meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisai diga, cue Moo dinena, monamona ico biiticue. Cue Moo uai cuemo illanona, ebire biiticue.

9

¹ Omoimo uanaicinona lloticue. Omoimona dajerie nia fiodaiñeitomoimo, illaimana ebire cue bairellena cioitomoí.

Jesús abi meidocailla rafue
(Mt 17.1-13; Lc 9.28-36)

² Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobo jiai uite. Juan jiai uite. Jiaie llofueoicaiganona uifñede. Nainomo rilla mei, naimaci uicomo naimie abi meido caide.

³ Naie daciaño naimie iniroi eo quenirecaide. Eo userecaide. Cai iniroimo jítoma lligaiñuamona ie isoi usere jaca jaiñede.

⁴ Naie facaise naimacimo Moisés micori joreño, Elías diga, bairede. Elíadi Jusiñamui facaina jaie lloraima. Jesús diga ñaitiaimaiaí.

⁵ Iaimaiaí jaiacania, Pedro Jesús mo lloste:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie.

⁶ Eo jaciruilla jira, naimie ñaia rafuena raise uifñoñeno jamai ebena ñaite.

⁷ Ie facaise uillie billamona, naimacina ibaide. Uilliemona Jusiñamui lloste: —Bimie cue isiruiga Jito. Naimie lluomo cacareillanona, iena ñno —lloste.

⁸ Ieconí oni erodajanona, dama Jesúsna ciodimaci. Jiaínona cioifñedimaci.

⁹ Anedumona bitimacimo, naimacimo Jesús lloste:

—Omoi ailli cúa rafuena bumo lloñeno, cue fiodaillamona cue jillua dinori.

¹⁰ Jesús llua isoi finodimaci. Iena bumo lloñedimaci; ia fiodaillamona naimie jilluana naimaci raise nia cacaiñena jira, iemo comecina facadimaci.

¹¹ Naimiemo llotimaci:

—Moisés micori llogacinona llofueraíni birui raicabitimaci: “Elías raillamie dane biite. Ie mei cai jilloitaraima biite” raitimaci. Jusiñamui mona o billana ñnoticaí. Odi cai jilloitaraimana ñnoticaí. Odi cai jilloitaraimadiomo, ¿bue ñelli iese raitimaci?

¹² Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise lollena. Jusiñamui díbeimo naimaci illena, comini imaci comechiaí meiduana lloste. Jusiñamui facaina lloraini micoriaí cue eo duere sefuillena cuetimaci. Comini cue jeare finollena cuetimaci. Iemo omoi comechiaina jiai faca.

¹³ Elías isoidimie jai bite; iadedi Jusiñamui facaina lloraima micori jaie cueba isoi, naimaci jitailla jira, naimiena jai meinetimaci.

Jesúdi Janaba anamo itimiena jillotaja rafue (Mt 17.14-21; Lc 9.37-43)

¹⁴ Ie jiaie llofueoicaigano dine Jesús abido ria, nainomo ailluena comini itimacimo ride. Moisés micori llogacinona llofueraíni dinena ie llofueoicaigano uaina uaitaside.

¹⁵ Jesús billana comini cuanona, jacinaisidimaci. Naimiena feiñollena, naimie dine aisida jaidimaci.

¹⁶ Moisés micori llogacinona llofueraíni Jesús jicanote:

—¿Niese cue llofueoicaigano uaina uaitatomoí?

¹⁷ Uai ofñedimaci; ia cominimona damie uai ote:

—Maestro, Janaba anamo cue jito illa jira, o dine naimiena atidicue. Cue jito Janaba anamo illamona ñainide.

¹⁸ Nagarui Janaba bille díese, naimiena eniruemo uaitate. Iemona fuedi mullede. Ie isidodi murude. Ie abi jaiare jaide. O llofueoicaiganomo jicadicue, Janabana oni oretallena; ia oretanidimaci. Ie jira Moisés micori llogacinona llofueraíni bie rafuena, o llofueoicaigano diga, uaina uaitatimaci.

¹⁹ Iena cacajanona, Jesús ie llofueoicaiganomo lloste:

—Cue uai siñonana nia ñnoñedomoi. Omoi diga are iticue. Raise omoi ñnollena, ¿nie dinori omoi diga iiticue?

Naie duidimie moomo lloste:

—O jito cue dine mai ati.

²⁰ Naie urue Jesús dine atianona, Janaba naimiena naillitate. Iemona urue eniruemo uaide. Jabi-jabide. Fue mullede.

²¹ Jesús dinena naie urue moomo jicanote:

—¿Nie dinori o jitodi bie isoi ite?

Uai ote:

—Naimie uruenamona.

²² Janabadi, diga icaiño iraimo usillena, naimiena uaitate. Corobaillena, diga icaiño jinui mo jia uaitate. Janaba oni o oretarenia, cocona duenaillamona, cocona cano.

²³ Jesús uai ote:

—“O oretarenia” raitio. Ero, o jito jillotaredicue. Cuen a o inoia, o jito jilloite.

²⁴ Naie urue moo ieconi lloste:

—Ona inoticue. Raise nia cue inoñenia, cuena raise inota.

²⁵ Naie facaise ailluena comini naimie dine raire ofillana naimie cianona, Jesús Janabana lletade:

—Bie uruena ñaitañedio. Naimiena cacaitañedio. Naimiemona oni jai. Naimie dine dane biñeno.

²⁶ Ado cuirioillanona, naimiena eo riire naillitajanona, Janaba oni jaide. Iemona naie urue fiodaitmie isoi ero caide. Naimiena cianona, nainomo itino raitimaci:

—Naimie jai fiodaite;

²⁷ —ia Jesús naimie onollina llinocaida, naimiena a naidanete.

²⁸ Iemona oni jaillanona, damie jofomo Jesús nailli ria, naimie mo ie llofueoicaigano anado jicanotimaci:

—¿Bue ñellena Janabana oni oretanidicai?

²⁹ Jesús uai ote:

—Jusiñamui mo jiamona, naimiena raise omoi inuamona, bie isoide Janabana oretaredomoi. Naimiena omoi raise inoñena jira, bie uruemona Janabana oni oretañedomoi.

*Jesús ie fiodaillena dane llofua rafue
(Mt 17.22-23; Lc 9.43-45)*

³⁰⁻³¹ Ie llofueoicaigano diga Jesús oni jaillanona, Galilea railla eniruemo jaide. Ie llofueoicaiganona naimie llofueiacana jira, naimie ie jaillana jiaie comini fidiana jitaiñede. Naimacimo lloste:

—Monamona billanona, imana jaidicue. Jusiñamui jitaila jira, cuena jiaie comini gaitajanona, illaicominimo fecaitimaci. Naie illaicomini cuena meineitimaci; iadedi darui amani illanona, jilloiticue.

³² Ie llofueoicaigano iena raise cacaitimaci; ia naimie mo iena jicanuana meiruitimaci.

*Jesús ie llofueoicaigano moto imiēna ille rafue
(Mt 18.1-5; Lc 9.46-48)*

³³ Capernaumo Jesús rilla mei, ie risoilla jofomo naimie ia, ie llofueoicaiganomo jicanote:

—Naisona cai bia, ¿nie isoide rafuena coniniri siadotomoi?

³⁴ Uai ofedimaci. Naimaci moto imiēna illena, naisodo siadocana bitimaci. Meiruillanona, uai ofedimaci.

³⁵ Naimie ana rainadaja mei, ie ecimo naimacina uaidote. Raite:

—Omoi moto imiēna bu iacania, jamai bue isoidimiēna naimie illa. Omoi muillaimana naimie jailla isoilla.

³⁶ Iena naimaci raise uifollena, nainomo ite cominimona daje urue bai jainanocaida, naimaci motomo naimiena jonete. Naimiena menioita, naimacimo lote:

³⁷ —Jusiñamuimona bie urue jamai bue isoide. Abina iedoñede. Bie isoidimie cuemo duillamona, naimiena feiñotimiedi cuena jai feiñote. Cuena feiñotimie Jusiñamuina jiai jai feiñote, Jusiñamui cuena oretaja jira.

Jesúdi ie dibeimo itinona llua rafue

(Mt 10.42; Lc 9.49-50)

³⁸ Naie facaise ie llofueoicaiganomona Jesúmo Juan llotte:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

³⁹ Jesús uai ote:

—Naimiena rairuiñeno. Cue mamecido siño rafuena bu finoia, cuena jeare raire ñaiñeite.

⁴⁰ Cai dibeimo itimiedi cai facaisena ite.

⁴¹ Ero, cuemo omoi duillamona, omoína bu janore canoia, Jusiñamuimona ibana feiñoite. Omoimo nibai jamai jinuina fecaité; iadedi omoína naimie canuamona, Jusiñamuimona ibana feiñoite. Ie jira naimie isoidino siño rafuena finuana rairuiñeno.

Jesúdi jeacinona finoñenana llofua rafue

(Mt 18.6-9; Lc 17.1-2)

⁴² Jesús nia llofueite:

—Cuena como inotinona jeacinona finotaiacadimie iena finoñellena, naimie cimaiomo aillue nofici maianona, joraimo corobaillena naimiena dotacadena, mare.

⁴³⁻⁴⁸ Biena ñaiticue. Nie isoide rafue omoína jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacino omoi finoia, iraimo jaitomoi. Nana omoi abi diga iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Irimo omoi jaiñellena, jeacino finoñeno. Naimacimo ite aiai fioidañena jira, naie irai jaca duiñenamona, nainomo itino jaca duere sefuitimaci.

⁴⁹ 'Ero, birui omoi duere sefuillamona, cue cominina jai jaidinona uifotitucue.

⁵⁰ Guille caimaretallena, sal mare; iadedi ie caimano jai iñenia, iena dane caimaretañedicai. Ie isoide. Jeacino omoi finoia, omoi comeciai caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

10

Jesús ima ie aina dotaja rafuena llofua rafue

(Mt 19.1-12; Lc 16.18)

¹ Capernaumona ie llofueoicaigano diga, Jesús oni jaillanona, Judea railla enirue dine jaide. Jordán railla ille ruica dibeimo jaide. Ailluena comini naimie dine ofillamona, naimie llofueuilla isoi, naimacina llofueite.

² Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio?

³Uai ote:

—¿Niese Moisés micori llote?

⁴Uai otimaci:

—Moisés micori jaie cuete: “Iima ie aina dotaacania, dotalle rabena nano cueite. Ie mei naiñaiñoña dotaite”.

⁵Jesús uai ote:

—Jusiñamui uaina raise omoi ñnoñena jira, Moisés micori iima ie aina dotajana rairuiñede;

⁶iadedi nano dofoconi iese iñede. Enirue finua facaiseconi Jusiñamuidi come iaimaiaina finode. Iimana finode. Riñoña jiai finode.

⁷Ie jira Jusiñamuidi jaie llote: “Ie ai diga illena, iima ie moona fainonocaite. Ie eina jiai fainonocaite. Ie ai diga illamona, menade comedi daamiēna jai jaide” llote.

⁸Menade come jai daamiēna jai ite.

⁹Jusiñamui iese iaimaiaina itataja jira, iima ie aina dotajana rairuidicue. Riño ie inina dotajana rairuidicue.

¹⁰Jofomo ie llofueoicaigano diga, naimie nailli illanona, naimiemo bie rafuena jicanotimaci.

¹¹Jesús dinena llote:

—Jiaie riño diga naimie illena, ie aina bu dotaia, naimiedi jeacinona jai finode. Ie aina jeare jiai finode.

¹²Ie inina fainonocaillanona, jiaimiēna nie riño uamona, naiñaiño jeacino jai finode.

Jesúdi naimie dine uruiái billana jitailla rafue

(Mt 19.13-15; Lc 18.15-17)

¹³Naie facaise Jesús dine comini naimaci jesanide diese atidimaci. Ie onolli naimacimo naimie joniana jitaidimaci. “Naimacina raise cano” ie Moomo lollena jitaidimaci. Ie llofueoicaigano iena rairuidimaci;

¹⁴iadedi iena cacajano, Jesús icirite. Jesús raite:

—Uruiái cue dine billesa. Naimacina rairuiñeno. Cuen a bie isoi ñnotinodi Jusiñamui cominidimaci.

¹⁵Bie uruiái abina iedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeitimaci. Jusiñamui naimiēna sedallena, Jusiñamui cominina naimie jaiñeite.

¹⁶Naie uruiái dasarie meni-menioicaida, naimaci ifogimo ie onollina joneta:

—Jusiñamui omoína canoite —llote.

Ucuberedimie Jesús diga ñaia rafue

(Mt 19.16-30; Lc 18.18-30)

¹⁷Ie llofueoicaigano diga Jesús oni jai jaillanona, aisicana damie naimie dine bite. Naimiēna raise uaidollena, ie caññici ifodo rainadate. Raite:

—Maestro, odi maremiēdio. Jusiñamui diga ico cue jaca illena, ¿buena finoiticue?

¹⁸Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano.

¹⁹Moisés micori llogacinuaina ñnocana jai. Jaie cuete: “Comena meineño. O aiñede riño diga iñeno. Fiiñeno. Jiaimiēna o llogidoia, tainona lloñeno. O moo uaina ñno. O ei uaina ñno”.

²⁰Uai ote:

—Maestro, uruena cue illa facaisemona nana bie llogacinuaina innoticue.

²¹ Jesús dinena naimiemo eruaillanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacinodo o jaiacania, o raise marebaicacania, omo ite raruiaina feca. Naie ucubena dueredinomo feca. Cuena o inuamona, monamo ico jaca iitio. Cue llofuegamiena o illena, mai cue diga bi.

²² Iena cacajano, naimiedi sunaite. Eo aillue ra naimiemo illa jira, iena naimie feacaaiñena jira, sure jaide.

²³ Naimie jailla mei, ie llofueoicaiganomo eruaillanona, naimacimo llote:

—Ucubereditnodi Jusiñamui cominina jaillena eo sefuiruitimaci.

²⁴ Iena cacajano, iena naimaci raise cacaiñena jira, Jesús dane llote:

—Cue cominidomoi. Ero, ucubereditmiedi Jusiñamui cominina jaillena eo sefuiruite.

²⁵ Igido ifodo camello jaca jainide. Ie isoide. Ie ra isiruillamona, ucubereditmiedi Jusiñamui ie cominina jiai raise jainide.

²⁶ Iena ie llofueoicaigano cacajano, Jusiñamui cominina ucubereditno raise jainina jira, “¿Ni ese dueredinodicaidi Jusiñamui cominina jaiticai?” raillamo comeciaina facadimaci. Raijicaillanona, coniniri raitimaci:

—Nana comini rana jitailla jira, ¿buca jillobiti?

²⁷ Naimacimo eruaillanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁸ Pedro dinena llote:

—O llua isoi jai finodicaí. Nana cai rana fainonocaida, o diga jai jaicabidicaí.

²⁹ Jesús uai ote:

—Unaicino lloiticue. Cuena naimie isiruillamona, cue rafueña naimie llumona, ie jofona bu fainonocaia, ie amatiaina bu fainonocaia, ie miriñuaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ie enruena bu fainonocaia,

³⁰ Jusiñamuimona birui ailluena ibana feiñoite. Duere sefuite; ia naimie isoi cue cominina ailluena jaillamona, naimie jofue iite. Ie amatiai, ie miriñuai, ie eitiai, ie uruiái, ie enruena birui iite. Monamo naimie ico caimare iocire jaca iite.

³¹ Birui damieriemo ailluena ra illamona, Jusiñamuimo eo comecina fa-cañeditimaci. Naimacimona jamai bue isoifeditimaci; ia Jusiñamuimona ico jamai bue isoitimaci. Jainomo ailluena ra birui ifede; ia Jusiñamuimo comecina facadimaci. Naimacimona jamai bue isoidimaci; ia Jusiñamuimona ico jamai bue isoifeditimaci.

Jesús ie fiodaillena dane llua rafue

(Mt 20.17-19; Lc 18.31-34)

³² Jerusalémo nia jaillanona, Jesús uicodo jaide. Nainomo naimie jaciruiñeno jaillamona, ie llofueoicaigano raijicaidimaci. Naimaci diga jaidino jaciruoicaida jaidimaci. Naimacina jiai meiniana jaciruitimaci. Ie llofueoicaigano diga ñaianona, naimiemo suille rafuena llote:

³³ —Ero, Jerusalémo jai jaidicaí. Monamona billanona, imana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci. Judíuainifedino illaicominimo cuena fecaitimaci.

³⁴ Cueri jifanoitimaci. Cuena tuallaitimaci. Cuena faitimaci. Cuena meineitimaci; iadedi cue fiodailla mei, darui amani illanona, jilloiticue — llote.

*Jesús dine Jacobo Juan iaímaiaí billa rafue**(Mt 20.20-28)*

³⁵ Naie facaise Jesús dine Jacobo, Juan díga bitíiaímaiaí. Iaímaiaí moodi Zebedeo. Raitíiaímaiaí:

—Omo coco jícalle rafue cocoena finuana jitaídícoco.

³⁶ Jesús uai ote:

—¿Nie isoide rafuena jitaídómico?

³⁷ Uai otíiaímaiaí:

—Íllaimana o jailla mei, o ecimo coco illena o lluana jitaídícoco. Damie o nabeimo. Jiaímie o jarifebeimo. —Jiaíno afemo iaímaiaí illena, iese llotíiaímaiaí.

³⁸ Jesús dinena llote:

—Ómico jicanuana raise uíñofedómico. Cue eo duere sefuiticue. Llegi cacaiticue. ¿Ie isoi duere sefuiacadómico? ¿Ie isoi llegi cacaiacadómico?

³⁹ Uai otíiaímaiaí:

—Jii. Sefuiacadícoco.

Jesús dinena raite:

—Cue isoi duere sefuitómico. Llegi cacaitómico;

⁴⁰ iadedi cue nabeimo omico illena, cue jarifebeimo omico illena itatanídícue. Naie illano jai cue Moo finoca, nainomo iitino iena.

⁴¹ Iena jiaíe llofueoicaigano cacajano, naie iaímaiaíri icíritímaci.

⁴² Jesús nana naimacina uaiduanona, raite:

—Nana illaicominídi naimaci anamo itinona ocuicabidímaci;

⁴³ iadedi omoi dine iese íñena. Omoímona bu imièna iacania, omoi mullaímana naimie jaisoillasa.

⁴⁴ Omoímona bu imièna iacania, omoína naimie canocana jaisoillasa.

⁴⁵ Cuemona fueo. Biñedicue, comínina cue ocuillena; iadedi comínina canuaibidicue. Cue jitailla jira, nana comini facaina fiodaisaíbiticue. Naimaci jeacinomona naimaci jillobillena, fiodaisaíbiticue. Ailluena comini cuena ínuamona, jilloitímaci. Conínina omoi canua —llote.

*Jesúdi Bartimeona jillotaja rafue**(Mt 20.29-34; Lc 18.35-43)*

⁴⁶ Oni jaillanona, Jericó railla nairaimo Jesús ride. Naiemona ie llofueoicaigano díga jaillanona, ailluena comini Jesús jinafona racadímaci. Naie facaise nai fueo uisínidímie raide. Naimie mameci Bartimeo. Timeo jito. Nainomo jamai raide, ucubena jamai jica-jicallena.

⁴⁷ Nazaret ie Jesús jaillana naimie cacajano, ado cuirioidé:

—David micorí jítóna o illamona, Jusíñamuimona o billa jira, cuena duenai. Cuená cano.

⁴⁸ Naimie líicallena, Jesús díga jaidíno naimièna lletade; iadedi eo cuirioidé:

—Maestro, David micorí Jítóna o illamona, cuena duenai.

⁴⁹ Naimièna cacajano, Jesús naidadajanona, llote:

—Naimièna cue díne uaido.

Bartimeona uaiduanona, raitímaci:

—O começina ocuiño. Mai naidacái. Jesús ona uaidote.

⁵⁰ Tena cacajano, ie emodomo itíroina duiñuanona, raíre naidacáida, Jesús díne bite.

⁵¹ Naimiemo Jesús jicanote:

—¿Niese ona cue níbaiana jitaídío?

Uai ote:

—Maestro, cioacaducue.

⁵² Jesús dinena uai ote:

—Cuenta o inua jira, jai jillodio. Mai jai. —Iecon naimie jai ciode. Jesús diga jaidino diga naimie jiai jaide.

11

Jesús illaima isoi Jerusalémo jailla rafue
(Mt 21.1-11; Lc 19.28-40; Jn 12.12-19)

¹ Oni jaillanona, Jerusalémo iaireicaidimacimo, Betfagé railla nairaimo ie llofueoicaigano diga Jesús ride. Betania nainomo jiai ite. Olivos railla anedumo naga nairai iaimaiaia ite. Ie llofueoicaiganomona Jesús menamiena orede.

² Raite:

—Bie nairai illa uicomo mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati.

³ Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide. Nailli iena raire abido oretaite llote”.

⁴ Naimie llua isoi, jaidiaimaiaia. Naisomo jofo nasemo burritona bailanona, iena suiñodiaimaiaia.

⁵ Ie facaise nainomo itino jicanote:

—¿Bue ñellena burritona suiñodomico?

⁶ Jesús llua isoi uai otiaimaiaia. Ie muidona:

—Jee —raitimaci.

⁷ Burritona atidiaimaiaia. Ie emodomo naimie llofueoicaigano naimaci iniroi jobianona, ie emodomo Jesús rainadate.

⁸ Naimiena iobitallena, illaima isoi naimie jaillena, diga comini, imaci iniroi diga, naiso motomo jobedimaci. Jiaino nai fueмона raforona uanona, naiso motomo jobedimaci.

⁹ Dajerie Jesús uicomo jaidimaci. Dajerie naimie jinafona jaidimaci. Ado cuiirisite:

—¡Cai Jilloitaraima billa! Jusiñamui mamecido bitimie eo mare.

¹⁰ Cai illaima David micori ifomo caina sedallena, damie billemo birui ocuridicai. Jusiñamui caina jilloitajasa.

¹¹ Iese Jerusalémo naimie jaide. Nainomo rillanona, Jusiñamui jofomo jaide. Nainomo eruaide. Jitoma ana illa jira, ie doce llofueoicaigano diga, Betaniamo inillena jaide.

Jesús higuera railla riarana faidua rafue
(Mt 21.18-19)

¹² Ie areruido Betaniamona Jerusalémo abido ie llofueoicaigano diga Jesús bia, aimetaite.

¹³ Arena higuera railla riarana cuanona, iena jibuide. Como firuide; ia naie llisilladi iñede. Ie llisilla facaise nia iñede.

¹⁴ Ie jira naie riarana llote:

—Biemona jaca llisifeite. —Ie llofueoicaigano naimie llua cacadimaci.

Jesúdi Jusiñamui jofomona damieriena dotaja rafue
(Mt 21.12-17; Lc 19.45-48; Jn 2.13-22)

¹⁵ Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamuimo ofomaiaia fecallena, naimiemo toica llaudaiaia fecallena, nainomo comini jaisoidimaci.

Naie cominina ibatajanona, ofomaiaina, toica llaudaia digá, damierie fe-cauidimaci. Iena Jesús cüanona, naimaci mesaiaina oni caicode. Ucugina fe-cauidino rairacuai jiaí oni caicode.

¹⁶ Jofo facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide.

¹⁷ Naimacina llofueat:

—Ie facaina lloraima micorí Jusiñamui llogacino jaie cüega: “Cue jofo ite, nainomo nana comini cuemo jüllena” cüega. Ero, ailluena omoi ibataja jira, naimie jofona firiruidino jofona omoi finoca.

¹⁸ Judíuai illaicomini naimie finoca rafuena fidianona, naimiena meinel-lena, coniniri siadotimaci. Ailluena comini naimie llofuiena ebiruillanona, raijicaidimaci. Ie jira judíuai illaicomini naimiena jaciruillanona, naimiena nia meinenidimaci.

¹⁹ Nairui navuida ie llofueoicaigano digá, Jerusalémona Jesús oni jaide.

Jesús faidoca riará duilla rafue

(Mt 21.20-22)

²⁰ Ie are ie llofueoicaigano digá, Jerusalén dine Jesús jaillanona, higuera railla riará duillana ciodimaci. Nana ie jainao digá duillana ciodimaci.

²¹ Jesús navui are lluaana Pedro uibiñuanona, naimiemo llote:

—Maestro, ero. O faidoca higuera jai duide.

²² Jesús uai ote:

—Jusiñamuina ñnocana jai.

²³ Uanaicinsona omoimo lloiticue. Jusiñamui lluaana raise bu ñnoia, naimie comeci igireñenia, bene ite anedumo naimie lloia: “Monaillaimo o illena, benomona mai jai”, Jusiñamui ie jitaille rana finoite.

²⁴ Nie isoide rafue Jusiñamuimo omoi jicajia, naimie iena finuana omoi ñnuamona, iena naimie finoite.

²⁵ Jusiñamuimo o jiacania, jiaimie digá o rafue ia iena feita. Ie isoi cai Moo Jusiñamui omoimo ite jeacino jiaí feitaite;

²⁶ Iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesúdi ie siño uaina llua rafue

(Mt 21.23-27; Lc 20.1-8)

²⁷ Jerusalémo naimaci rillanona, Jusiñamui jofomo Jesús fo jailla mei, judíuai illaicomini naimie dine bitimaci. Naimacidi Jusiñamui digá nanoca ñairaini. Naimacidi Moisés micorí llogacino llofueraini. Naimacidi einamaci. Dese billanona,

²⁸ jicantimaci:

—¿Nie isoide uaido o finoca rafuena finodio? ¿Bu omo iga uai digá o finoca rafuena finodio?

²⁹ Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue.

³⁰ Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

³¹ Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micorí lluaana ñnoñedomoi?”

³² “Comini” cai fairioia, bene itino caina ñibai meineitimaci, Juan micoridi Jusiñamui facaina lloraima naimaci railla jira.

³³ Ie jira fairiotimaci:

—Uiñoñedicaí.

Jesús dinena raite:

—Ie muidona cuemo nie isoide uai illana omoimo lloñeiticue.

12

*Jesúdi marañede majiraini rafuena llua rafue
(Mt 21.33-46; Lc 20.9-19)*

¹ Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, eniruemoo ifona raite. Naie illina raise eruaillena, tidacana finode. Iena sedallena, ibatajanona, jainomo fecade. Ie mei jiaie eniruemoo jaide.

² Uvas jai einailla facaise riaraiaina sedaraini dine naie patrón ie mullaimana orede, naie illimona dajerie riarailisilla ollena;

³ Iadedi naie sedaraini ie mullaimana fatimaci. Ie mei naimiemo riarafecaño naimiena abido oredimaci.

⁴ Ie mei patrón jiaie mullaimana orede. Naimie ifogina bofedimaci. Naimiena jeare finodimaci.

⁵ Ie mei patrón jaiamiena orede. Naimiena meinetimaci. Ie mei ailluena mullaiana orede. Damieriena fatimaci. Damieriena meinetimaci.

⁶ Patrómo ie isiruiga jito ite. “Cue jitona jaciruitimaci. Naimie uaina inoitimaci. Naimiena oretaiticue” patrón comecina facade.

⁷ Riaraiaina sedaraini naimiena cuanona, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci.

⁸ Naimaci dine naimie rilla mei, naimiena meinetimaci. Ie mei ie abina illimona jino dotadimaci.

⁹ Iena fidia mei, ¿niese naie patrón nibaite? Ero, naimie billanona, ie illina sedarainina fuidoite. Ie mei jainona ie illina sedataite.

¹⁰⁻¹¹ Naimacimo Jesús llote:

—Naie illi sedaraini isoidomoi. Jusiñamui facaina lloraima micori omoina jiaie cuete. Ie cuezafuena raise facañedomoi. Naimie micori cueda: Jofo finoraini jitañena noficidi nana naie jofomo ite nofici baifemo jai uaide. Jusiñamui iena finotate.

Iena cai uiñuamona: “Eo mare” raiticaí

cueda. Jusiñamui cominina damierie jaillana naimie micori cuete. Jusiñamui oretagamiena damierie jitañenamona, naimie cominina jaiñeitimaci; iadedi Jusiñamui oretagamiena ailluena inuamona, naimie cominina jaitimaci. Ero, Jusiñamui facaina lloraima micori caina cuete. Naie jofona finoraini isoidomoi. Naie nofici isoidicue. Cue rafuena omoí jitañena jira, naimie cominina jaiñetomoi.

¹² Judíuai illaicomini iena cacajanona, Jesús naimacina ñaiana naimaci uiñuamona, naimiena gaitacadimaci; ia cominina jaciruitimaci. Ie jira naimiemo oni jaidimaci.

*Jesúmo gobiernomo ucubena fecajana jicanua rafue
(Mt 22.15-22; Lc 20.20-26)*

¹³ Judíuai illaicomini jailla mei, dajerie fariseuai cominina Jesús dine oredimaci. Illaima Herodes dibeimo itinona oredimaci. Naimie raise uai oñenia, naimiena duere finollena, Jesúna facaciacadimaci.

¹⁴⁻¹⁵ Naimiemo llotimaci:

—Maestro, uanaicinona llofuecabitio. Jusiñamui rafuedo cai marena jail-lana raise llofuetio. Nana comini dauaido llofuetio. Cominina iobitallena llofueñedio. Omo rafuena jicanoioacadica. Dani Jusiñamuina sedadica; iadedi romanuai railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —lloñimaci.

Naimaci mareuidinona abina caitadinona naimie uiñuamona, naimacimo llote:

—¿Bue ñellena cuena facacitomo? Ucube cuemo acata.

¹⁶ Ie jira acatatimaci. Naimacimo jicanote:

—¿Bu ie joreño nainomo ite? ¿Bumo jainaiaide bie cuega radi?

Uai otimaci:

—César.

¹⁷ Jesús dinena raite:

—César iena itedi, Césarmo ille. Jusiñamui iena itedi, Jusiñamuimo ille —raite. Naimie llwana cacajano, naimie raise uai ua jira, ieri rajicaidimaci. Naimie iese llua jira, naimiena duere finonidimaci.

Jesús dine saduceuai railla comini billa rafue

(Mt 22.23-33; Lc 20.27-40)

¹⁸ Naie facaise saduceuai railla comini naimie dine bitimaci. Fiodaillamona jaca buna jilloñellena ñnotimaci. Jesúmo lloñimaci:

¹⁹ —Maestro, cai facaina Moisés micori jaie cuega: “Íma fiodailla meinocni, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega.

²⁰ Bie rafuena uiñoiacadica. Siete amatiai ite. Nano doforamie ie aina ote. Naimie nia uruiainide fiodailla.

²¹ Ie emodo imie ie ama feciñona ote. Naimie uruiainide jiai fiodailla. Naie siete digamiedemona iese sefuide.

²² Uruiainide nana fiodailla. Ja muidomo naie riño jiai fiodaite.

²³ Fiodaillamona, ¿ico naimaci jilloiadedi, ¿bu naie riño ienite? Naiñaño siete digamiena inirede —lloñimaci.

²⁴ Jesús uai ote:

—Moisés micori cuegafuaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi.

²⁵ Fiodaillamona jillua mei, Jusiñamui diga ite comini añnitimaci. Ininitimaci. Monamo Jusiñamui jaenisaí ainidimaci. Ininidimaci. Ie isoi naie siete amatiai iitimaci.

²⁶ Fiodaitino ¿ico jilloillena omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ¿ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote.

²⁷ Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite. Fiodaillamona jillwana omoi raise uiñoñedomoi —llote.

Jesús nanoca llogacinona llofua rafue

(Mt 22.34-40)

²⁸ Naie facaise Moisés micori llogacinona llofueraíma Jesús dine billanona, naimiedi comini Jesús uaina uaitajana cacade. Jesús raise uai uana cacajano, Jesúmo jicanote:

—Moisés micori jaie llogacinuaimona, ¿nie llogacino ua nanoca llogacinona?

²⁹ Jesús dinena uai ote:

—Moisés micorí jaie cuega: “Israel comini, bie rafuemo cacarei. Cai Nama Jusiñamui jaca dajede.

³⁰ Omoi jitailla jira, nana omoi comeciai diga, cai Nama Jusiñamuina isirui. Naimiemo omoi comeciaina eo faca”.

³¹ Ie emodomo ite llogacino janore daje isoi: “Dani omoi abi omoi isiruilla isoi, omoi ecimo itinona jiaie isirui”. Bie mena llogacino jiaie llogacinuai baifemo faite.

³² Naie llofueraima dinena uai ote:

—Maestro, raise llotio. Jusiñamui jaca dajede. Jiaimie cai sedallena iñede.

³³ Cai jitailla jira, nana cai comeciai diga naimiema cai isiruia, naimiemo cai comeciaina eo facaia, cai abina cai isiruilla isoi cai ecimo itinona cai isiruia, Jusiñamuina raise sedadica. Bie rafuedo naimiemo toica ocaina fecajana baifemo faite. Bie rafuedi naimiemo cai ra fecajana baifemo faite.

³⁴ Naimie raise uai ua jira, naimiemo Jesús llote:

—Iese o inocana jaia, Jusiñamui jitailla isoi, ie cominina raire jaitio. —Ie facaisemona buna naimiema facaciaibiñede.

Jesús dinena fariseuai cominimo jicanua rafue

(Mt 22.41-46; Lc 20.41-44)

³⁵ Jusiñamui jofomo Jesús jailla mei, nainomo itinomo jicanote:

—¿Niese Moisés micorí llogacinona llofueraini Cristona raitimaci? ¿Niese naimiedi David micorí jitona raitimaci?

³⁶ Jusiñamui Joreñodi David micorina ñaitatajanona, David micorí llote:

Jusiñamuidi cue Namamo llote: “Illaimana o illamona, cue nabei dine ana rai. Ona inoñedino o anamo itataicue”.

³⁷ “Cristodi cue Nama” David micorí raite. Iese naimie micorí railla jira, Cristo David micorí afemo faite. Naimiedi jamai David micorí jitoñede; ia jiaie Nama. —Nainomo itino naimie llofuiana iocire cacareidimaci.

Jesúdi judíuai illacominina ñaia rafue

(Mt 23.1-36; Lc 11.37-54; 20.45-47)

³⁸ Jusiñamui jofomo Jesús nia llofuianona, raite:

—Moisés micorí llogacinona llofueraimona abina rairui. Illacominina naimaci itimaciden, naimacina comini cioillena, eo mare iniroina jitaacacabidimaci. Nine naimaci macaria, naimaci jamai bue isoiñedinona itimaciden, comini naimacina uaiduana gaidimaci.

³⁹ Comini naimacimo acarillena, ofiracomo uicomo raicadimaci. Rafue ia: “Jamai bue isoiñedica?” raillamo comecina facajanona, rafue nama ecimo raicadimaci.

⁴⁰ Feciñuaimona rana ocabillanona, naiñaiñuaina duere finodimaci. Naimiema eo sedadimaciden, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

Jesúdi Jusiñamui jofomo duerede feciño ucube fecajana ciua rafue

(Lc 21.1-4)

⁴¹ Jusiñamui jofomo Jesús nia ia, ucube fecarano uicomo ana raide. Nainomo comini ucubena joniamo eruaide. Ailluena ucuberedino ailluena ucubena jonetimaci.

⁴² Ie facaise eo duerede feciño menaruñu jonete.

⁴³ Iena ciuanona, naimie dine ie llofueoicaiganona uaiduana, naimacimo llote:

—Bie eo duerede feciño nana jiaie comini jonia baifemo jonete.

44 Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiño mo ite ucubena jonete. Ie jira jiaño baifemo jonete.

13

*Jesúdi Jerusalémo ite Jusiñamui jofo judaiana llua rafue
(Mt 24.1-2; Lc 21.5-6)*

1 Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúmo damie raite:

—Maestro, bie jofomo ite noficiái co ebirede. Bico eo ebire ciode.

2 Jesús dinena uai ote:

—Bie jofo birui eo mare; ia nana bie jofomo ite noficiái ico judaisite —llote.

3 Ie mei Olivos railla anedu dine rillanona, Jusiñamui jofo uico dine Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo llotimaci:

4 —Jusiñamui jofo judaisillana omo jicanoiacadicaí. ¿Ñiruido iena suite? Nana o lloga rafue suillena, ¿nie isoide rafue nano suite? Iena caimo llono.

5 Uai ote:

—Omoína bie rafuena bu jifueñellena, omoi abina rairui.

6 Ailluena comini cue mamecido billemona: “Cristodicue” raitimaci. Diga cominina jifueitimaci. Iemona omoi abina rairui.

7 Jobaimiaí illena fidiitomo; iadedi jaciruiño. Iese suite; iadedi abido nia biñeticue.

8 Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo ñuisañuai suite. Diga illanuaimo comini aime gutimaci. Iese sua, omoi duere sefuillifue omoimo suite.

9 Abina rairui. Dajerie omoína llogidoitimaci. Omoína gaitaja mei, naimaci ofiracomo omoína faitimaci. Cuemo omoi duilla jira, omoína gaitajanona, omoína duere finollena, illaicomini dine omoína uitimaci; ia naimacimo cue rafuena lloitoimo.

10 Diga comini cue rafuena nana nairaimo lloitimaci, nana nairaiaí iena caacillena. Ie mei abido biitucue.

11 Naie illaicomini dine omoi ia, juez dine omoi ia, omoi abi riidollicinomo omoi comeciaina jarire facañeno. Naie facaise omoi ñaillicinona uñoitomoí. Dani omoi comeciái icinodo ñaiñeitomoí; ia Jusiñamui Joreño uaido ñaitomoí.

12 Cuena ñnotomoí; ia ailluena cuena ñnoñeitimaci. Cuena omoi ñnua jira, omoína enoitimaci. Iemona dajerie ie amana meinatallena, naimiema llogidoite. Dajerie moodi ie uruena meinatallena, naimiema llogidoite. Dajerie uruiaídi naimaci moona, naimaci eina meinatallena, naimacina llogidoitimaci.

13 Cue cominina omoi illamona, nana nairai omoína enoitimaci; iadedi cuena fañonocañedimie ja muidomo monamo jaca iite. Naimiema jil-lotaicue.

14 Cue lluomo cacareí. Jusiñamui facaina lloraimadi jiaimie jearede rafue finollena jaie llote. Naie rafue sua, Jusiñamui jofomo Jusiñamuina sedañeitomoí. Nainomo ite jearede rafue finuana omoi ciuanona, naiemona omoi jillobillena, duere omoi sefuñellena, Judeamo omoi illamona, aneduai dine omoi aisi.

15 Jofo emodomo omoi ia, ana billanona, aneduai dine raire rillena, jofomo jaiño. Nainomo ite rana omoi diga uñeno.

16 Aneдуаi dine raire rillena, illimo omoi ia, abido jofomo biñeno, omoi iniroi omoi diga uillena.

17 Naie rafuemona jillobillena, naie facaise urueside riño duere sefuite. Uruena nia jirode riñodi jiai duere sefuite.

18 Eo duere sefuiñellena, Jusiñamuimo omoi jicano, rollime facaiseconi bie rafue suiñellena.

19 Naie facaise comini eo duere sefuitimaci. Jusiñamuidi enirue finua facaisemona iese comini nia duere sefuiñedimaci. Ico iese eo duere sefuiñeitimaci.

20 Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

21 'Ie facaise omoimo bu raia: "Jadi, Jusiñamui facaina lloraima benomo birui bairede. Naimiedi Cristo", iena inoñeno, Jaiemie raia: "Oni batine Cristo birui bairede", iena inoñeno.

22 Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci.

23 Ie jira omoi abina rairui. Ero, bie rafue nia suiñenia, iena omoimo jai lloticue.

Jesús abido ie bille rafue

(Mt 24.29-35, 42-44; Lc 21.25-36)

24 'Naie duere sefuilla facaise meinocni, jitoma lligaiñoñeite. Fivui jiai lligaiñoñeite.

25 Monamona ucuai ana llujite. Nana naie radi jaidisite.

26 Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue.

27 Cue jaienisaina cue ecimona oretaiticue. Cue fetocano diese naganomona ofitaitimaci.

28 'Higuera railla riaromona omoi fueo. Bie eniruemo naie riaru firuillamona, fiemona raire illana uifotomoi.

29 Ie isoide. Bie rafue ico suaia, cue billirui iairei illena uifotomoi.

30 Uanaicinona omoimo lloticue. Nana bie rafue suille facaiseconi bie nairai nia iite.

31 Mona enirue diga fuite; iadedi cue lloga uai jaca suite.

32 Cue abido billirui jaca bu uifonede. Jusiñamui jaienisai iena uifonedicue. Jusiñamui jidodicue; iadedi cue abido billiruina jiai uifonedicue. Dama cue Moo iena uifote.

33 Abina rairuicana jai. Naimie omoina canollena, Jusiñamuimo jiai jicabi. Cue billirui omoi uifonena jira, iemo ocuiri.

34 'Iena omoi raise uifollena, bie rafuena lloticue. Patrón jiaie eniruemo jaid. Nia jaiñenia, ie mullaiaia ie jofona sedatate. Nagamie ie maijille ocuide. Jofo nasena sedadimemo naimie billemo raise ocuirillena lloite.

35 Naie patrón abido billena naimaci uifonena jira, naga hora iemo ocuiritimaci. Nibai navuida baife biite. Nibai daferuise biite. Nibai atava ñaia facaise biite. Monai, nibai biite.

36 Ebena naimie biite. Inidimacimo naimaci baisai bi raillanona, naimaci jaca ocuirilla.

37 Ie isoide. Ebena biiticue. Cue abido billirui omoi uifonena jira, iemo jaca omoi ocuiri.

14

Judíuai illaicomini Jesúna gaitallena, siadua rafue
(Mt 26.1-5; Lc 22.1, 2; Jn 11.45-53)

¹ Naie facaise pascua railla rafue illena, menarui fiebide. Naie facaise llomenico guille rafue jiai ite. Naie rafue ia, siritaga rana jaca guiñedimaci. Egiptomona naimaci jaiagai jillobillana começillena, naie rafue ite. Judíuai illaicomini Jesúna jifuiano gaitaacadimaci. Naimiena meineiacadimaci. Iena siadua mei,

² raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuitimaci. Nia sedaitcai.

Jesúmo riño caimare soride ra totaja rafue
(Mt 26.6-13; Jn 12.1-8)

³ Betania railla nairaimo Jesús jaillanona, Simón jofomo jaide, Simódi jaie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide.

⁴ Damierie iena ciuanona, iciritimaci. Coniniri dani ñaitimaci:

—Naie ra jamai dotade. Jai faifide.

⁵ Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare. —Naiñaiñoña iese ñaitimaci.

⁶ Naimaci ñaiana Jesús uiñua jira, naimacimo llote:

—Dama ite. ¿Bue ñellena naiñaiñoña jeare ñaitomoi? Mare rafuena cuemo finode.

⁷ Omoi diga dueredino jaca itimaci. Niruido o jitaia, naimacina canoredomo; ia omoi diga jaca iñeiticue.

⁸ Cue facaina naiñaiño finoacana ñese jai finode. Nia fioidañedicue; ia cue fioidaillirui facaina naiñaiño iese finode.

⁹ Omoimo uanaicinona lloiticue. Ninomo cue mare finoca rafuena bu lloia, naiñaiñoña uibiñollena, nana cominimo naiñaiño finoca rafuena lloite.

Judas micori raillamie Jesúna gaitataiacana rafue
(Mt 26.14-16; Lc 22.3-6)

¹⁰ Ie facaise Jesús llofueoicaiganomona Judas Iscariote micori raillamiedi Jesúna gaitatallena, Jusíñamui diga nanoca ñairaini dine jaide.

¹¹ Iena cacajano, iobidimaci.

—Iena o finoa, omo ucubena fecaitcai —llotimaci. Iemona Jesúna gaitatalliruimo Judas ocuride.

Jesúdi ie fioidaille rafuena llua rafue
(Mt 26.17-29; Lc 22.7-23; Jn 13.21-30; 1 Co 11.23-26)

¹² Llomenico guille rafue illanona, judíuai comini toica llaudaiaina fajarui illanona, Jesúmo ie llofueoicaigano jicanote:

—¿Ninomo pascua railla rafue ie guille finuana jitaideo?

¹³ Naimacimona menamiena oretajanona raite:

—Jerusalémo omico jaillanona, nogodo jinuina uitimiena cioitomico. Naimiena raca.

¹⁴ Naimie jailla jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ”

15 Ie mei omi como afebebamo ite aillue cuartona acataite. Na raruia digá ite. Nainomo cá guille fino.

16 Jesús llua isoi jaidiaimaia. Jerusalémo rilla mei, naimie llua isoi baitiaimaia. Pascua rafue guille finodiaimaia.

17 Nairui jitoma ana itemo, ie llofueoicaigano digá, Jesús nainomo guisaide.

18 Mesamo gutimacimo, Jesús llote:

—Omoimona damie cuena gaitataite. Naimie cue digá bene jai guite.

19 Iena cacajanona, sunaitimaci. Damierie naimiemo jicanoside:

—¿Cuena ñaitio?

20 Uai ote:

—Omoimona damie bie platomo cue digá llomenico digá mutade.

21 Jusiñamui facaina lloraima micori cuega isoi, monamona jai billamona, fiódaiticue; iadedi cuena gaitataitimie eo duere sefuite. Naimie jeiciñegadena, cuemona mare.

22 Naimaci nia gutimacimo, llomeniconá Jesús llinuanona, Jusiñamuimo iobillacinona fecaja mei, llomeniconá tairude. Naimacimo fecajano raite:

—Iena llinuano guiño. Bie llomenicodi cue abí facai ie. Cue abimo omoi comecina facajano, iena guiño.

23 Ie mei naimie jiroracona jiaí llinote. Jusiñamuimo iobillacinona llua mei, naie jiroracomó jai totaca vino naimacimo fecade. Iemona nana jirodimaci.

24 Naimie raite:

—Cue fiodaillamona, dama cue diaillamona, jeacino anamona ailluena jillotaiticue. Jusiñamui jiaie rafue birui itatajamona, naimaci jeacino oni dotajana jai llote. Bie vinodi naie rafue facai ie.

25 Omoína bene dane iese caimare nabaiñeiticue. Cue Moo sedajanomo omoi digá cue ía, nainomo omoína dane iese caimare marena nabaiticue.

*Jesúdi Pedro naimi ena januana llua rafue
(Mt 26.30-35; Lc 22.31-34; Jn 13.36-38)*

26 Iobilla rua Jusiñamuimo naimaci rua mei, Olivos railla anedumo Jesús ie llofueoicaigano digá jaide.

27 Naimacimo llote:

—Cuena faínonocaitomoi. Jusiñamui facaina lloraima micori iena jaie cuega: “Toica llaudaiaí sedaraimana meinetimaci. Naimie toíniaí uaficaida jaitimaci” cuega. Naimie micori caina cuete.

28 Ero, fiodaillamona cue jillua mei, omoi uicodo Galileamo jaiticue, nainomo omoi digá dafai fillena.

29 Pedro uai ote:

—Nana jiaíno ona faínonocaia, ona jaca faínonocaiñeiticue.

30 Jesús dinena raite:

—Uanaí omo lloticue. Ja naío íitava menacaiño nia ñaíñenia, dacaiño amani cuena janoitio.

31 Pedro dinena riire llote:

—O digá cue fiodaíadedi, ona janoñeiticue.

Nana ie llofueoicaigano daje uaido jiaí raitimaci.

*Jesúdi Getsemaní Jusiñamuimo jia rafue
(Mt 26.36-46; Lc 22.39-46)*

32 Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena jaiticue.

³³ Naimie diga Pedrona uite. Jacobona uite. Juan jiai uite. Naimie sunaicaide. Ie comeci uri iñede.

³⁴ Naimacimo llote:

—Cue comeci sunaicaide. Niadi fiodaiticue. Benomo fiebi; ia nia inifieno cue facaina omoi jii.

³⁵ Naimie janore bai jaillanona, eniruemo bitadate. Naimie duere sefuiñellena, Jusiñamuimo jii:

³⁶ —Ore Moo, nana rana finoredio. Cuenallegi cacaitañeno. Cue jitailla isoi cuena finoñeno; iadedi o jitailla isoi cuena fino.

³⁷ Te mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niese raire inidio? daje hora nia iñedemo.

³⁸ Inifieno. Taife ramo omoina fai raillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jii, omoina naimie ocuiñotallena — llote.

³⁹ Te mei dane jii'llena jaide. Ailli naimie jii'a isoi, dane jii:

⁴⁰ Ie llofueoicaigano dine dane billanona, naimaci uisi llirioilla jira, naimaci inisitemo ride. Naimacina casitajano, Jesús naimaci diga ñaite; ia naimaci dinena uai uana uiñoñede.

⁴¹ Dane jii'a mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macaibaite. Cue fiodaille facaise jai ite. Jusiñamui jitailla jira, cuena ja gaitajanona, naimiena inoñedino anamo ja iiticue.

⁴² A naidacai. Maiña. Cue gaitaitimie jai bite.

Jesúna gaitalle rafue

(Mt 26.47-56; Lc 22.47-53; Jn 18.2-11)

⁴³ Jesús nia ñaitemo, ieconí Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaralluna jiai atidimaci. Jusiñamui diga nanoca ñairainimona bitimaci. Moisés micori llogacinona llofuerainimona bitimaci. Naimaci einamacimona bitimaci.

⁴⁴ Jesús dine naimaci nia riñenia, Judas naimie diga bitinomo jai llote:

—Jesúna omoi uiñollena, naimiena llibanoiticue. Ie mei naimiena gaita. Naimiena raise maianona, naimiena oni uiño.

⁴⁵ Jesús dine naimie rillanona, Judas Jesús dine raire jaide. Naimiena uaidote:

—Maestro, jai biticue. —Ieconí naimiena llibanote.

⁴⁶ Ie jira Jesúna gaitadimaci.

⁴⁷ Iena ciuanona, Jesús diga itinomona damie ie lloebi llinuanona, naimiedi nanoca ñairaima ie mullaima jefona jaibonote.

⁴⁸ Naimiena gaitadinomo Jesús llote:

—Omoi lloebina atidomoi. Omoi butaralluna atidomoi. Cuenallegi gaitallena, firiraimadicueta cuemo omoi billa.

⁴⁹ Jusiñamui jofomo nagarui llofuecabiticue. ¿Bue ñe nainomo cuena gaitañedomoi? Cuenallegi jai omoi gaitajamona, Jusiñamui facaina lloraini micoriai cuegafuiai suite.

50 Ie facaise nana naimie llofueoicaigano naimiena fañonocaillano, aisidimaci.

Jesús jinafona conirue racaja rafue

51 Ie facaise daje conirue Jesús jinafona racade. Jamai abimo iniroi ferinocaida racade. Naimiena ciuanona, comini naimiena gaitadimaci;

52 ia ie iniroina fañonocaillanona, taimiena aiseide.

Jesúdi judiúi illaicomini dine illa rafue

(Mt 26.57-68; Lc 22.54, 55, 63-71; Jn 18.12-14, 19-24)

53 Jesúna gaitaja mei, Jusiñamui diga nanoca ñairaima dine naimiena uitimaci. Nana judiúi illaicomini itimaci. Nanoca ñairaini itimaci. Einamaci jiai itimaci. Moisés micori llogacinona llofueraini jiai itimaci.

54 Pedro naimaci jinafona aarena racade. Jusiñamui diga nanoca ñairaima nairairimo jaide. Jofono sedadino diga nainomo ite iraimo agaide.

55 Naimiena meinellena, nana naie illaicomini Jesúmo nicino illana uiñoiacadimaci. Iena coniniri siadotimaci; iadedi naimiemo jaca nie isoide marañede rafue illana uiñoñedimaci.

56 Diga comini Jesúna llogidotimaci; ia tainona llotimaci. Daje isoi lloñedimaci.

57 Damierie billanona, tainona llogiduanona, raite:

58 —Bimie lluana cacadicai. Jusiñamui jofona jeare ñaite. Naimie llotte: “Jusiñamui jofona comini finodimaci; ia iena cue judaíanona, darui amani illanona, jiaie finoiticue. Comini iena finoñeitimaci”.

59 —Iese llotimaci; ia daje isoi lloñedimaci.

60 Naimaci motomo Jusiñamui diga nanoca ñairaima naidadajanona, Jesúmo jicanote:

—¿Niese uai oitio? ¿Nie isoide rafue ona llogidotimaci?

61 Jesús dinena uai ofede. Naie ñairaima jicanote:

—¿Odi Cristodio? ¿Odi Jusiñamui Jitodio?

62 Jesús uai ote:

—Ji, naimiedicue. Monamona jaie cue billamona, imana jaidicue; ia icio jiairuido illaimana cue illena, Jusiñamui ecimo cue raillena, omoi nairai cioitimaci. Mona uilliemmo cue abido billena jiai cioitimaci.

63 Iena cacajanona, icirillanona, naie nanoca ñairaima dama ie iniroina cuaranote. Raite:

—Jiaino naimiena llogidollena jai jitaiñedicai.

64 Jusiñamuina naimie jeare ñaiana jai cacadomoi. ¿Niese naimiena rait-omoi?

Jiaie illaicomini dinena:

—Naimie fiodaillesa —llotimaci.

65 Ie facaise damierie naimiena tuallaitimaci. Ie uiecona ibaila mei, naimiena ducoidimaci. Raitimaci:

—Bu o ducoia caimo llono.

Naimiena gaitadino dinena naimiena jiai ducoidimaci.

Pedrodi Jesúna janua rafue

(Mt 26.69-75; Lc 22.56-62; Jn 18.15-18, 25-29)

66 Naie facaise Pedro nairairimo ite. Naie nanoca ñairaima mullañuaimona dañaiño nainomo billanona,

67 Pedro agaillana ciode. Raite:

—Nazaret ie Jesús cominidio.

68 Pedro iena januano, raite:

—O lluana uifioñedicue. Iena raise cacaiñedicue.
Ie mei nase fue do jaide. Naie facaise itava dacaiño ñaite.

⁶⁹ Naie mullaño naimiena dane cuanona, nainomo jamai itinomo llote:
—Bimiedi Jesús ie llofueoicaigano imie.

⁷⁰ Iena Pedro dane janote. Dallu illanona, nainomo jamai itino Pedromo llote:

—Odi Galilea imiedio. Jesús diga jaicabidio.

⁷¹ Uai ote:

—Uanaí cue lloñenia, Jusiñamui cuena duere finoite. Uanaicinona cue lluaña naimie uifioñote. Ero, omoi llogamienna uifioñedicue.

⁷² Ieconí itava dane ñaite. Iena cacajano, Pedro Jesús lluaña uibiñote. Jaive naio Jesús Pedromo llote: “Itava menacaiño nia ñaifñenia, dacaiño amani cuena janoitio”. Iena uibiñuamona, Pedro eo eede.

15

Pilato dine Jesús illa rafue

(Mt 27.1, 2, 11-14; Lc 23.1-5; Jn 18.28-38)

¹ Jitiramo monaidemo, judíuai illaicomini danomo siadotimaci. Jusiñamui diga nanoca ñairaini itimaci. Naimaci einamaci jiaí itimaci. Moisés micori llogacinona llofueraíni jiaí itimaci. Siadua mei, Jesúsna maianona, Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

² Pilato naimiemo jicanote:

—¿Judíuai comini illaimadio?

Jesús uai ote:

—Jii.

³ Ie muidona Jusiñamui diga nanoca ñairaini Jesúsna llogidotimaci:

—Naimie diga marañede rafuena finode —llotimaci.

⁴ Pilato dinena naimiemo jicanote:

—¿Ñiese uai oñedio? Ona eo llogidotimaci.

⁵ Jesús nia uai oñena jira, Pilato uainicaide.

Pilatodi Jesús fiodaillana llua rafue

(Mt 27.15-31; Lc 23.13-25; Jn 18.38-19.16)

⁶ Naga año pascua railla rafue facaiseconi cárcelmo itinomona Pilatodi comini jicacamienna jamai jino orede.

⁷ Bie facaise cárcelmo Barrabás raillamie ite. Gobierno diga naimie navui jobairilla jira, naie facaise comena naimie meinia jira, cárcelmo ite.

⁸ Ie facaise ailluena comini Pilato dine ofillanona, cárcelmona naimie finocabilla isoí, damie jino jamai oretallena jicadimaci.

⁹ Pilato jicanote:

—¿Bu jino cue oretallena jitaídomoi? Omoi judíuai railla illaimana nibai jitaídomoi.

¹⁰ Iese jicanote; iadedi naimiedi Jusiñamui diga nanoca ñairaini Jesúsni uradoillana uifioñote. Naimaci Jesúsna meiniacanana jiaí uifioñote.

¹¹ Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci.

¹² Iena cacajano, Pilato naimacimo jicanote:

—¿Ñiese bimiena cue finuana jitaídomoi? Naimiedi omoi judíuai illaima raillamie.

¹³ Ado llotimaci:

—¡Naimiena corai!

14 Pilato dane jicanote:

—¿Nie isoide marañede rafuena finode? —Iena cacajano, ado ibi llonoidimaci:

—¡Naimiena corai!

15 Naimacina iobitallena, naimaci jitailla jira, Barrabás jino orede; iadedi Jesúna sechedotaja mei, naimiena coraillena orede.

16 Soldaduai naimiena gobernador jofo fo uillanona, nana soldaduai nainomo ofidimaci.

17 Jiduirede iniroi naimiemo jítadimaci. Eecuaimona niga nuiciraina naimie ifogimo jítadimaci.

18 Naimiena jifanoduanona, naimiena uaidotimaci:

—¡Jadi, judíuai illaíma!

19 Radosi diga ie ifogimo buta-butadimaci. Naimiena tuallaitimaci. Naimie illaímana itena, naimiena sedallena, caññici ifodo raiedimaci.

20 Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jítadimaci. Ie mei naimiena coraillena oni uitimaci.

Jesúna coraía rafue

(Mt 27.32-44; Lc 23.26-43; Jn 19.17-27)

21 Jerusalémoma naimaci jaillanona, jamai bitimiemo dafaifidimaci. Naimiedi Simón. Cirene railla enirue imie. Naimie jito iaímaiaídi Alejandro iaímaiaí Rufo diga. Jerusalén onifemona naimie billanona, naimiemo dafaifidimaci. Naimiena Jesús uga cruzna rocatatimaci.

22 Gólgota raillanomo jaidimaci. Ifocoraina eruaiilla jira, iese mameciredo.

23 Nainomo rillanona, ie abi isirena cacaiñellena, vinomo eriredo rana faianona, Jesúmo fecadimaci; iadedi naimie iena jiroñede.

24 Ie mei naimie cruzmo coraía mei, cruzna naidania mei, naie soldaduai naimie iniroi daní coninimo fecasite. Naie iniroi bu uille raillanona uiñollena, jifanododimaci.

25 Jitoma nia fuiri daidemo, naimiena coraidimaci.

26 Cruzmo ie llogiduafuena jonetimaci. Jai cueba: “Judíuai comini Illaíma”.

27 Ie mei mena firiruide iaímaiaína coraidimaci. Damie Jesús nabeimo coraica. Jiaimie Jesús jarifebeimo coraica.

28 Iemona Jusiñamui facaina lloaíma micori jaie cuegafue suide. Cuega: “Maraiñedino isoi naimie jai ite”.

29 Naisodo jamai jaidino Jesúna mameritimaci. Mamerillamona, ifogiaína jaididimaci. Raitimaci:

—Navui raisoidio: “Jusiñamui jofona judaíticue. Darui amani illanona, iena dane finoíticue” raisoidio.

30 Ie muidona dama o abina mai jillota. Cruzmona ana bi.

31 Ie facaise Jusiñamui diga nanoca ñairaini naimiena jifanododimaci. Moisés micori llogacino llofueraini naimiena jiai jifanododimaci. Raitimaci: —Jiaie cominina jillotate; ia dama naimie abina jillotanide.

32 Naimiedi Cristodena, naimiedi cai judíuai comini illaíma raillamiedena, dama niadedi cruzmona ana ie billa. Iena cai cioia, naimiena inoíticai. — Iese naimiena jifanododimaci. Naimie diga coraicamie iaímaiaí naimiena jiai jeare ñaitiaímaiaí.

Jesús fiodailla rafue

(Mt 27.45-56; Lc 23.44-49; Jn 19.28-30)

³³ Jitoma naidai itemona, daje amani horas mona jitibicaide.

³⁴ Te meinomo judíuái railla uaido Jesús ado jidaioide:

—Eloi, Eloi, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena fañonocaidio?” raite.

³⁵ Iena cacajano, nainomo jamai itinomona damierie raitimaci:

—Naimie jaie Jusiñamui facaina lloraima Elíana uaidote —raitimaci.

³⁶ Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade. Raite:

—Dallu sedaiticai. Elías naimiema jillotajaibillena uiñoiacadicai.

³⁷ Te facaise ado cuirioita fodaite.

³⁸ Naie facaise Jusiñamui jofomo ie fetaca iniroife ana anaba jillacimo motodo menafe cuararide.

³⁹ Jesúna sedallena, nainomo capitán ite. Jesúsno eruailanona, Jesús fiodaillana ciode. Raite:

—Uanaí bimiedi Jusiñamui Jito.

⁴⁰ Dajerie riñoniai naie rafuena aarena cioidimaci. Naimaci motomo María Magdalena ite. Jiaie María jiaí ite. Naiñaiñodi Jacobo ei. Naimiedi jamamie. Naiñaiñodi José ei. Salomé jiaí ite.

⁴¹ Galileamo Jesús navui illa facaise naie riñoniai naimie diga jaisoidimaci. Naimiema canouidimaci. Jerusalémo Jesús billanona, ailluena riñoniai naimie diga jiaí bitimaci. Ie fiodaillana jiaí cioidimaci.

Jesús raiafomo jonia rafue

(Mt 27.57-61; Lc 23.50-56; Jn 19.38-42)

⁴² Jitoma ana itemo, sábado rille jai iaírei illanona,

⁴³ Arimatea nairai imie Pilato dine jaide. Naimiedi José. Naimiedi illaicomini. Maremie. Naimie Jusiñamui ie cominina ico sedajanomo illemo ocuride. Ie comecina ocuiñocaida, Pilato dine jaide. Iena raillena, Jesús abina jicade.

⁴⁴ Iena cacajano, Pilato Jesús fiodaillana raise uiñoiacade. Ie fiodaillana nia fidiñede. Jesúna sedade capitána uaiduanona, naimiemo Jesús fiodaillana jicante.

⁴⁵ —Jesús jai fodaite —capitán railla mei, Pilato Jesús abina Josémo fecalena llote.

⁴⁶ José mare userede iniroi ibaja mei, cruzmona Jesús abi ana ua mei, naie iniroi diga ie abina ferinote. Nofici motomo finoca raiafomo jonete. Naifona ibaillena, aillue nofici nainomo bai ñuitade.

⁴⁷ María Magdalena, jiaie María diga, naimie raiana ciode. María José ei.

16

Jesús fiodaillamona jillua rafue

(Mt 28.1-10; Lc 24.1-12; Jn 20.1-10)

¹ Sábadoruimo jitoma sojicaidemo, María Magdalena caimare soride rana ibade. Jacobo ei, María jiaí ibade. Salomé jiaí ibade. Jesús abimo jonellena, ie abina raise finollena naimaci einamací finocabilla isoi, naiñaiñuái iena ibade.

² Domingo jitiramo jitoma como bairedemo, Jesús raiafo dine naiñaiñuái jaide.

³ Jaillanona, coniañuaimo jicante:

—¿Bu noficina caina oni ñuitalle raiafomona?

⁴ Raiafo dine rillanona, iemo eruailanona, nofici oni ñuitacana ciode. Naie nofici eo aillue.

⁵ Raiafomo jaillanona, naiñaiñuái coniruenta eruaidimiena nabeimo raillana ciode. Naimie are userede iniroina jitade. Naimiedi Jusiñamui jaidenici. Naiñaiñuái jacinaite.

⁶ Nainomo itimie dinena raite:

—Jacinañeno. Nazaret ie Jesúsna jenodomoi. Naimiena coraidimaci; ia fiodaillamona naimie jai jillode. Bene jai iñede. Naimie jonianomo mai eroda.

⁷ Naimie llofueoicaiganomo iena lluai. Ua Pedromo llono. Galileamo omoi ucómo naimie jaite. Ómoimo naimie llua isoi, naimiena cioitomoi.

⁸ Naiñaiñuái jino jaillanona, raiafomona aiscana jaide. Jacinaillamona abi jaidisite. Jaciruillamona, iena bumo lloñede.

*Jesús María Magdalenamo bairia rafue
(Jn 20.11-18)*

⁹ Domingo jítiramo Jesús jillua mei, María Magdalenamo Jesús nano bairede. Naiñaiño Janaba anamo navui illamona, Jesús naiñaiñomona siete janaiái navui oni orede.

¹⁰ Naiñaiño naimie bairia mei, naimie diga jaicabidinomo iena lluaide. Naimacimo iena nia lloñenia, sure eedimaci.

¹¹ —Naimie jai jillode. Naimiena jai ciodicue —naimacimo naiñaiño llua mei, iena iñoñedimaci.

*Mena llofueoicaiganomo Jesús bairia rafue
(Lc 24.13-35)*

¹² Ie meinoconi Jesús mena llofueoicaiganomo bairede. Naimie eruaisoilla isoi, eruaiñede. Iaimaiái naisomo macaria, iaimaiáimo bairede.

¹³ Jerusalémo abido iaimaiái rilla mei, jaiáie llofueoicaiganomo iena llotiaimaiái; ia iñoñedimaci.

*Jesús ie once llofueoicaiganomo bairia rafue
(Mt 28.16-20; Lc 24.36-49; Jn 20.19-23)*

¹⁴ Ie once llofueoicaigano danomo guitimacimo, Jesús naimacimo bairede. Naimie jillua mei, damierie naimiena ciuanona, ie llofueoicaiganomo iena llote; ia iñoñedimaci. Naimaci iñoñena jira, Jesús naimacimo riire llote.

¹⁵ Naimacimo llote:

—Nana nairaiáimo jai. Nana cominimo cue mare rafue llocana jai.

¹⁶ Cuená iñuamona, bautizagano diese Jusiñamuimona duere sefuiñeitimaci; iadedi Jusiñamui cuena iñoñedinona duere finoite.

¹⁷ Cuená iñotino Janaba anamo itinomona Janabana oni oretaitimaci. Naimaci nia uiñoñega uaido ñaitimaci.

¹⁸ Jaiona naimaci linoia, naimacina niese nibaiñeite. Bainode ra naimaci jiroia, naimacina niese nibaiñeite. Duidinona naimaci jetajamona, jilloitimaci.

*Jesús monamo jailla rafue
(Lc 24.50-53)*

¹⁹ Ie llofueoicaigano diga ñaia mei, Jusiñamui cai Nama Jesús monamo uiga. Illaímana Jesús illa jira, Jusiñamui nabeimo naimie raide.

²⁰ Monamo Jesús jailla mei, ie llofueoicaigano, diga nairaiáimo, ie rafuena llocana jaidimaci. Cai Nama naimacina canuamona, naimacina siño rafuena finotate. Iemona comini dinena Cristomona naimaci rafue illana uiñotimaci. Macaibaite. Cue cuega rafue jai fuite. Marcodicue.

LUCAS JESUCRISTO ENIRUEMO ILLA RAFUE CUIAFUE

Lucas Teófilomo cartana orede

1-4 Teófilo, cue isiruga nabai. ¿Nigacino? Omo bie cartana oredicue. Cai motomo birui diga rafue jai suide. Jesucristo rafuena omo cueticue. Naimie billa mei, diga comini naimiemo suide rafuena cioidimaci. Iena llocana jiai jaidimaci. Naimacimona bie rafue raise uifoticue. Bie rafuena fidianona, damierie iena jai cuetimaci. Bie rafuena jiai jai cacadio. Bie rafuena cue raise uifua jira, unaicinona o raise uifollena, bie cartana jai cueticue. Iese birui cue comeci jitaide.

Jusiñamui jaienicí Juan Bautista micorí jeicillena llua rafue.

5 Jesucristo nia jeiciñenia, Zacarías illa facaise Herodena mameciredede illaimadi. Judea railla eniruena sedade. Zacarías Jusiñamui diga ñairaima. Abías raillasie facaimo duillamona, Jusiñamui jofomo maijuiude. Naimie aidi Elisabet. Naiñaiño jaie ite usumadi Aarón micorí. Aarón micorídi Jusiñamui diga nano ñairaima.

6 Jusiñamuimona iaímaiaí mare, nana naimie lloga uaina raise iaímaiaí inua jira.

7 Naiñaiño oiniñona jira, uruenidiaímaiaí. Jiai jai uaicima iaímaiaí.

8 Zacarías facai ite comini maijia facaise ia, Jusiñamui jofu dine naimie maijiaide.

9 Nainomo naimie maijia, caimare soride ra fo jobaillena, naimiena fetodimaci. Naimaci finouilla isoi, jobaillanona dani Jusiñamui diga ñairaini naimiena fetodimaci. Iemei naimie fo jaide.

10 Fo jailla mei, naie caimare soride ra boa facaiseconi, Jusiñamui diga naimie ñaiano, ailluena comini Jusiñamui jofu ecimo itimaci.

11 Ieconí cai Nama Jusiñamui jaienicídi naie ra boano nabeimo Zacaríamo bairede.

12 Naimiena ciuanona, Zacarías jacinaita.

13 Jaienicí naimiemo llote:

—Zacarías, jacinaiño. Jusiñamui o jiacinona jai cacade. Iemona o ai uruesite. fimana jocoite. Juan o jitalle naimie mamecidi.

Iemona o comeci caimare iite. Iobitio. Ailluena comini naimie jeiciari iobitimaci.

15 Jusiñamuimona naimie jamai bue isoiñeitimiena jaite. Jifaitate rana jiroñeite. Naimie jeiciamona Jusiñamui Joreño naimiena namataite.

16 Cai Nama Jusiñamui dibeimo ailluena Israel cominina naimie itataite.

17 Jusiñamui jitaillacinona finocana jaite. Eliamo Jusiñamui Joreño jaie siño uai illa isoi, naimiemo iite. Jusiñamui rafuena naimie luamona, damierie, naimaci jaiagai isoi, Jusiñamuina inoitimaci. Ailluena Jusiñamui uaina jai inoñedimaci; ia damierie birui inoitimaci. Naimaci comeciái Jusiñamui dibeimo meidoitimaci. Iemona cai Nama Jesucristo bia, naimiena inoitimaci.

18 Zacarías dinena jicanote:

—¿Ñiese o llua suillena uifoticue? Jai uaicimadicoco.

19 Jusiñamui jaienicí dinena uai ote:

—Gabrieldicue. Jusiñamuimona biticue. Cuen a oretate, bie mare rafuena omo llolena.

²⁰ Ero, cue uaina o ñnoñena jira, uainitio, o jito jeicille ñnori. Jiairuido bie rafue suite.

²¹ Jusiñamui jofomo jino itino Zacarías jino billena sedadimaci. “¿Bue ñellena naimie are biñede?” comeciaina facadimaci. Naimie jino are biñena jira, rajicaidimaci.

²² Naimie jino bitemo, naimaci diga jai ñainide. Ie onolli diga facajamona, Jusiñamui jaienic naimiemo jai lluaña uñotimaci. Naimie ñañeno ite.

²³ Jusiñamui jofomo naimie maijia facaise fuilla mei, ie jofomo abido jaide.

²⁴ Digarui illanona, ie aidi urueside. Ie jira jofomo naiñaiño cinco fivui fiebide, comecina facajanona:

²⁵ “Cue uruesilla jira, iena nia buna lloiacañedicue. Cue Nama cuena jai duenaillana uñoticue. Navui cue urue ifena jira, meiruiticue. Jai meiruiñeiticue. Comini cue joreña jai ñaiñeitimaci”.

Jusiñamui jaienic Jesús jeicillena llua rafue

²⁶⁻²⁷ Elisabet seis fivui uruesilla mei, Jusiñamuidi Galileamo ie jaienic Gabriela orede. Nazaretmo María ñine naimiema orede. María nia ininide; ia jai José jicanogañaiño. Naimie usumadi David micori.

²⁸ Rillanona, naiñaiñomo llote:

—Itio. Cai Nama Jusiñamui ona eo duenaite. Ona jai fetuamona, nana jiaie riñoniai baifemo naimiedi ona marena itatate.

²⁹ Iena cacajanona, naiñaiño jacinaita. Iena naiñaiño raise cacaiñena jira, iemo comecina facade.

³⁰ Gabriel dinena llote:

—Jacinañeno. Jusiñamui ona duenaite.

³¹ Birui uruesitio. Himana jocoitio. Naimie mamecina jitaítio Jesúsna.

³² Siño Jitona jaite. Nanoca Itimie Jitona jaite. Ie usuma David micori illaima illa isoi, Jusiñamuidi naimiema illaimana itatate.

³³ Illaimana illamona, Israel railla nairaina jaca sedaita. Naimie ifomo jaiamie jaca iñeite.

³⁴ María uai ote:

—Hima diga nia iñedicue. ¿Ñiese bie nibaille?

³⁵ Gabriel llote:

—Jusiñamui Joreño omo iite. Ie siño uai diga iena finoite. Jusiñamui marena isoi naimie jai marenite. Naimiedi Jusiñamui Jito.

³⁶ O comini iñaiño, Elisabet, ie uacitailla facaise jai jai urueside. Naiñaiño jai jionaide; ia jai seis fivui naiñaiño uruesilla ite.

³⁷ Jusiñamui nana bie isoide rafuena finorede.

³⁸ María uai ote:

—Jee. Jusiñamui anamo iticue. O llucacino cuemona mare.

Ie facaise Gabriel naiñaiñomona oni jaide.

Maríadi Elisabet ñine jailla rafue

³⁹ Ie facaiseconi María aneduai ñine Judea railla eniruemo Zacarías illanomo raire jaide. Elisabetna cioillena, jaide.

⁴⁰ Zacarías jofomo rillano:

—Itio —raillanona, Elisabetna uaidote.

⁴¹ Elisabet naiñaiño uaina cacajano, ieconi naiñaiño jeraimo ite urue iena jai uñuamona, niraide. Ie facaise Jusiñamui Joreño anamo Elisabet jai ite.

⁴² Iese illamona, María uruesillana uñote. Naiñaiño ado llote:

—Jusiñamui ona eo marena canoite. O uruena marena itataite.

⁴³ Jamai bue isoidicue; ia, odi cue Jilloitaraíma ei illanona, cue ñine bitio. Iena cuemo nia lloñedio;

⁴⁴ ia, cuena o uaiduanona, iobillamona cue jeraimo ite uruedi niraide.

⁴⁵ Cai Nama omo llotataga uaina suillana o iñua jira, Jusiñamui ona eo marena canoite. —Jusiñamui Joreño naiñaiño mo illamona, iena llote.

⁴⁶ María dinena uai ote:

Caiñai Nama eo mare. Naimiemo iobillacinona fecaacadicue.

⁴⁷ Naimiedi cue Jilloitaraímana jira, naimieri iobidicue.

⁴⁸ Jamai bue isoidicue; iadedi cuena fetode.

Ie jira biruimona nana comini cuena marena ñaitimaci.

⁴⁹ Naimiedi siño. Naimiedi mareuidimie. Cue facaina eo mare rafuena finode.

⁵⁰ Naimiena iñnotinona jaca duenaite. Cai jaiagaina jaca duenaite. Caina birui jaca duenaite. Ua nana naimiena iñnotinona duenaite.

⁵¹ Diga siño rafuena finoite. Abi iedotino comeciái facajacinona llúcaitaite.

⁵² Naimiedi illacomini oni dotaite; ia jamai bue isoidinona jamai bue isoñedinona itataite.

⁵³ Dueredinona eo canoite; ia duenidino mo buena fecañeite.

⁵⁴ Duenailamona, cai Israel comini feitañeite.

⁵⁵ Cai jaiagaimo naimie jaié llua isoi, birui caina canoite.

Abraham micorimo jaié llote: “Ona duenaiticue. O comini jaca duenaiticue”

María llote.

⁵⁶ Elisabet diga davui amani naiñaiño fiebide. Ie mei ie jofomo abido jaide.

Zacarías jito jeicia rafue

⁵⁷ Elisabet jocularui jai ridemo, iimana jocode.

⁵⁸ Naiñaiño ecimo ite comini, naiñaiño comini diga, iena fidiamona, cai Nama naiñaiño na eo duenailana uiñotimaci. Naiñaiño diga iobidimaci.

⁵⁹ Ocho digarui jeicia mei, naimaci finouilla isoi, urue abina dia rafuemo bitimaci. Ie moo mamecina jitaacadimaci;

⁶⁰ iadedi Elisabet llote:

—Dama ite. Jitaiñedicue. Naimie mamecidi Juan cai jitalle.

⁶¹ Uai otimaci:

—¿Bue ñellena iese raitio? O cominimona jaca bu Juan mameciredimiena iñede.

⁶² Jefona cacaiñena jira Zacaríamo onolli diga jicanotimaci, ie jito mamecina jitalle.

⁶³ Onolli diga Zacarías fairiuano, rabena jicade. Cuete: “Naimie mamecidi Juan”. Ieri rajicaidimaci. “¿Bue ñelle iena jitade?” comeciaina facadimaci.

⁶⁴ Teconi Zacarías jai dane ñaite. Ie jira Jusiñamuimo iobillacino fecade.

⁶⁵ Nana iaimaiaí ecimo itino rajicaidimaci.

—Jusiñamui muidona naie rafue suide —llo timaci. Bie rafuena fidiano, nana Judea railla aneduaimo itinodi iena ñaoidimaci.

⁶⁶ Iena cacajano, comeciaina facadimaci: “Bimie jamai bue isoñeitimiena jaiete”. Cai Nama naimiena marena jaca canua jira, iese llotimaci.

Zacarías Jusiñamuimo iobillacinona fecaja rafue

⁶⁷ Ie facaise Jusiñamui Joreño Zacaríana llotatajanona, Zacarías llote:

⁶⁸ Cai Nama Jusiñamuidi mare.

Cai Israel comini ñine biite, caina jilloitallena.

⁶⁹ David micori Jusiñamuina jaié sedade.

David micorí cominimona siño Jilloitaraimana cai dine oretaite.

⁷⁰ Te facaina llorainido naimie jaie lua isoi, cai Jilloitaraimana oretaite,

⁷¹ Taifemona, Janabamona cai jilloillena.

⁷²⁻⁷³ Cai usumatiaí micoriaimo: “Omoína duenaiticue” llote.

Cai usuma Abraham micorímo jaie llogacinona feitañede.

⁷⁴⁻⁷⁵ Taifemona cai jilloillena, cai Jilloitaraimana oretaite. Nana cai ille dinorí Jusiñamuina jaciruiñeno sedajana jitaide.

Naimie jitailla isoi cai illena, naimie jitaillacinona cai finollena, cai Jilloitaraimana oretaite.

⁷⁶ Cue jito, ona lloiticue. Jusiñamui ie lloraimana jaitio.

Cai Nama uicomo jaitio, comini comeciaí o raise finollena.

⁷⁷ Te cominimo jeacinomona jilluacinona lloitio.

Iena naimaci ñnoia, Jusiñamui naimaci jeacinona feitaite.

⁷⁸⁻⁷⁹ Jeacino anamo jai cai illa jira, jitiredinomo iticai isoidicai.

Jusiñamuina cai ña ñnoñenia, fiodaillana jaciruiticai.

Naimie caina duenaillamona, cai Jilloitaraima billena o llofuellena, ona oretaite.

Naimiēna cai ñnoia, jitiredinomo iñeiticai; ia Jusiñamui diga cai comeciaí uri iite.

⁸⁰ Zacarías jito sairide. Jusiñamuina ñnocana jaide. Cominimo naimie ña marefodo lloñenia, jofue iñenanomo ite.

2

Jesús jeicia rafue (Mt 1.18-25)

¹⁻² Jesús jeicia facaise César Augusto anamo ailluena nairaiái ite. Romamona naimacina sedauide. Naie facaise Siria railla enirue gobernadori Cirenio. César Augusto, nie diese comini naga nairaimo illana naimie uiñollena, nana comini mameciaí cuellena ocuide. Jaca bu iese jaie finoñede.

³ Naimaci jaiagái illanomo mameciaí cuiana ocuide.

⁴ Te jira José Galileamona Nazaretmona jaide. Judeamo Belémo jaide. David micorí cominimo naimie jainaiáilla jira, David micorí illanomo jaide.

⁵ Te ai María diga jaide. Naiñaiño fenai jai eo aillue.

⁶⁻⁷ Belémo iaímaiaí rillanona, naie facaise comini jofomo inillino iñena jira, jurareta jofomo ridiaímaiaí. Nainomo ie doforato jito jeicite. Jocua mei, iniroina naimiēna ferinote. Te jito inillena, jurareta ecaranomo naimiēna jonete.

Jusiñamui jaiēnisaí toica llaudaiaí sedaraini dine jailla rafue

⁸ Jesús jeicia facaise naie naió Belén ecimo ite pastomo damierie toica llaudaiaína sedaraini itimaci. Naimaci toiniaína sedadimaci.

⁹ Ieconí cai Nama Jusiñamuimona daje jaiēnici naimacimo ebena bairede. Jusiñamui ie siño uai diga naimacina quetiñote. Jacinaitimaci.

¹⁰ Jaiēnici llote:

—Jacinaiñeno. Mare rafue lloiacadicue. Nana cominina iobitallena, iena lloiacadicue.

¹¹ David micorí illanomo damie como jeiciga. Jusiñamui facaina lloraini micoriaí naimie billena jaie lloudimaci. Naimiedí Cristo cai Nama. Naimie omoí Jilloitaraima. Jeacinomona omoína jillotaite.

¹² Naimiēna jibuisai. Iniroina ferinoga urue jurareta jofomo imaci ecaranomo baitomoi. Temona cue llwana uanaicinona uiñoitomoi —llote.

13 Ie facaise naie jaienici dne ailluena jaienisaí bitimaci. Jusiñamuimo iobillacinona fecajano rotimaci:

14 Monamo Jusiñamui illanona, naimiemo iobillacinona feaacadicaí. Cominina naimie duenaillamona, naimie diga uri iitimaci rotimaci. Ie mei abido jaidimaci.

15 Monamo jaienisaí jailla mei, toica llaudaiaí sedaraini coniniri ñaitimaci: —Belémo mai cai jailli, cai Nama caimo como lloga rafuena cai jibuisaillena.

16 Ieconí raire jaidimaci. María José diga baitimaci. Iaimaiaí urue jurareta ecaranomo biillana cioidimaci.

17 Naimiema cúa mei, nana naimacimo jaienici lloga rafuena llotimaci.

18 Nana naie rafuena cacadinodi ieri rajicaidimaci.

19-20 Iaimaiaí uruena cúa mei, llaudaiaí sedaraini imaci toiniaí dne abido jaidimaci. Naimacimo jaienici llua isoi naimacimo suilla jira, iobidimaci. Nana naimaci cacaja rafueri, nana naimaci cúa rafueri Jusiñamuimo iobillacinona fecadimaci. María naie rafuena feitañede; ia iena comecina facauide.

Jerusalémo Jusiñamui jofomo Jesúna iaímaiaí uilla rafue

21 Ocho digarui illanona, naie urue abina dete. Ie ei jeraimo naimie nia comuiñenia, Jusiñamui jaienici naimie lloga mamecina jitade. Jusiñamui jaienici llua isoi, Jesúna ie mamecina jitade.

22-24 Moisés micorí jaie llua isoi Jerusalémo Jesúna uitiaímaiaí. Moisés micorí jaie cuete: “Cuarenta digarui jocua mei, Jusiñamuimona riño marena illena, Jusiñamuimo mena ficiri naiñaiño fecaja. Jusiñamui diga ñairaíma iena faja mei, riño facaina Jusiñamuimo jobaica”. Jaií cuete: “Naga nano doforamiedi Jusiñamui ie. Ie muidona naimie facaina Jusiñamuimo ucubena fecaja”. Ie muidona Jerusalémo Jesús diga jaidiaímaiaí.

25 Naie facaise Jerusalémo Simeón raillamie ite. Jusiñamuimona naimiedi mareuidimie. Jusiñamuina eo ñnocana jaide. Naimie cominina Cristo jilloitalena, Cristo billemo ocuride. Naie facaise Jusiñamui Joreño anamo naimie ite.

26 Iemona Jusiñamui Joreñodi, naimiema Cristona cioillena, navui uicodo uiñotade. O nia fioidañenia, Cristona cioitio raillanona llote.

27 Jusiñamui jofomo Jusiñamui Joreño naimiema oretate. Jusiñamuimo Jesúna fecallena, Jesús ei, José diga, Jesúna fo uillana Simeón ciode.

28 Naimaci dne jaillanona, Jesúna meniñote. Jusiñamuimo iobillacinona fecajano jiide:

29 Nama, o anamo iticue.

Cuomo o lloga uai jai suilla jira, uri fioidaiticue.

30 O oretaga Jilloitaramana jai cioidicue.

31 Naimiema oredio, nana comini jilloillena.

32 Naimiedi judíuaíñedinona uanaicinona uiñotaite.

O cominina iobitaite jiide.

33 Iena cacajamona, iaímaiaí jitona lloga uairi rajicaidiaímaiaí.

34-35 Simeón iaímaiaímo caímaredicinona llote:

—Jusiñamui omoína raise canoite —llote.

Maríamo llote:

—Ero, ie rafuena llollena, Jusiñamui o jitona jai fetode. Naimie illamona, comini comeciána facajacinona uiñotaite. Naimiemo suille rafuemona o

comeci sure iite. Cai cominimona ailluena naimiena jitaiñeitimaci. Ailluena jitaitimaci.

³⁶ Nairuido Jusiñamui jofomo Ana railla feciño ite. Jusiñamui naiñaiñomo lloga rafuena llouide. Naiñaiño moo Fanuel micori. Naiñaiño nairaidi Aser. Jitaiño facaiseмона ie ini diga siete años illanona, naimie fiodaite.

³⁷ Naiñaiño jai eo uaiçiño. Ochenta y cuatro años naiñaiñodi jai ite. Jusiñamui jofomo jaca isoide. Nagarui Jusiñamuimo jñanona guicabiñeno naimiena sedauide.

³⁸ Simeón ñaiiana cacajano, naiñaiño Jesús comini dine billano, Jusiñamuimo iobillacinona fecade. Naimie billemo naimaci ucuirilla jira, naiñaiño naimaci Jilloitaramana nainomo itinomo llocana uicir.

Nazaretmo abido naimaci jailla rafue

³⁹ Moisés micori lloga uai naimaci fuidua mei, Jesúsna uillanona, Galileamo Nazaretmo naimaci illanomo abido jaidiiaimaia.

⁴⁰ Nainomo Jesús sairicana mairicana jaide. Eo abina uifnote. Naimieri iobillamona, Jusiñamui naimiena canouide.

Jerusalémo Jusiñamui jofomo Jesús illa rafue

⁴¹ Naga año Jerusalémo pascua railla rafue dine Jesús moo iaimaia jaisoidiiaimaia. Egiptomona naimaci jaiagai jillobillana comecillena, naie rafue ite.

⁴² Naimiemo doce años illa facaise Jerusalémo iaimaia jaisoilla isoi, jaidiiaimaia. Naimie doce años illa jira, Jesúsna uitiiaimaia.

⁴³⁻⁴⁴ Rafue fuilla mei, abido bitiaimaia. Ailluena comini jiai billa jira, Jesús billana raise uifnoñediiaimaia. “Cai comini diga naimie bite” raillanona comecina facadiiaimaia; ia Jesús Jerusalémo fiebide. Darui raifi billa mei, iaimaia cominimo naimiena eo jenodiiaimaia.

⁴⁵ Baiñena jira, inia mei, Jerusalémo darui jaillanona, abido jaidiiaimaia.

⁴⁶ Ie are Jusiñamui jofomo naimiena baitiaimaia. Moisés micori llogacinona llofueraini motomo naimie ite. Naimaci llofuiana cacade. Iena naimaci diga jiai siadote.

⁴⁷ Nana cacadino naimie uifnogacinori rajicaidimaci. Naimie raise siadogacinori jiai rajicaidimaci.

⁴⁸ Naimiena iaimaia baia, rajicaidiiaimaia. Ie ei naimiemo jicanote:

—¿Bue ñellena cocona duere finodio? O moocama diga ona eo duere jenodicoco.

⁴⁹ Naimie uai ote:

—¿Bue ñellena cuena duere jenodomico? Cue Moo jofomo naimie rafuena finodicue. ¿Ñiese bene cue illana uifnoñedomico?

⁵⁰ Naimie lluana raise cacaiñediiaimaia.

⁵¹ Iemei iaimaia diga Nazaretmo naimie abido jaide. Iaimaia uai jñuanona, iaimaia anamo ite. Ie ei María nana naie rafue ie comecimo facauide.

⁵² Naimie sairicana abina uifnocana jaide. Jusiñamui naimieri iobide. Comini dinena naimiena jiai gaidimaci.

3

Jofue iñenanomo Juan Bautista micori illa rafue (Mt 3.1-12; Mr 1.1-8; Jn 1.19-28)

¹⁻² Jofue iñenanomo diga años Juan illanona, Jusiñamuimona ie uaina feifnote. Naimiedi Zacarías jito. Naie facaiseconi Romamo quince años Tiberio

Césardi nanoca illaïmana jai ite. Judea railla enirue gobernadorði Poncio Pilato. Galilea railla enirue gobernadorði Herodes. Naimie amadi Felipe. Iturea railla enirue, Traconite railla enirue diga, gobernadorði Felipe. Abilinia railla enirue gobernadorði Lisania. Jusiñamui diga nanoca ñairaima iaimaiaidi Anás, Caifás diga.

³ Jusiñamui llua jira, nana Jordán fuemo ite comini dine Juan llofuecana jaide. Llote:

—Omoi jeacinona fañonocaida, Jusiñamui ðibeimo omoi comeciai iuai meido. Iemona Jusiñamui omoi jeacinona feitaite. Omoi comeci iuai omoi meidoia, comini iena uiñollena, mai omoi bautizallomoi.

⁴ Isaías micori ie rabemo naimiena jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite. Naimie jaillino atona fino.

⁵ Nana iconi oruita.

Naga aneduai ðiese eniruena judai.

Neicairuai joide naisona atona fino.

Naimo itaicuai illa ðiese eniruena oruita, daje facai illena.

⁶ Nana comini Jusiñamui naimacina jillotaicacana uiñoitimaci”

cuete; ia naimaci comeciaina ñaite. Cai Namana iinuana ñaite. Abina iedoñenana ñaite. Jeacino finocana jaiñenana ñaite. Cai Nama Jesús bia, Jesús uaina naimaci feiñollena, naimaci comeciai marena finuana ñaite.

⁷ Naimacina bautizallena, ailluena comini naimie dine bitimaci. Naimacimo llouide:

—Maraiñede rafuena finocana omoi jailla jira, jaijo nairai isoidomoi. ¿Ñiese jilloitomoi? Cue dine omoi billena, ¿bu omoimo lloga?

⁸ Omoi comeciai iuailai meido. Omoi jeacinona fañonocai. Iemona Jusiñamui jitaillacinona fino. Mare rafuena finocana jai. Naiemona omoi comeciai iuailai meiduana uiñoiticai. Ie mei bautizallomoi. Omoi comeciaina facañeno: “¿Bue ñellena o llua isoi finoiticai? Jusiñamui Abraham micorina jaie eo raise nabaide. Abraham micori cai moo illamona, Jusiñamui riicaillifuemona jilloitica?”. Ero, omoimo lloiticue: Cue llua isoi omoi finoñenia, naimie riicaillifuemona jilloñeitomoi. Abraham micori uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micori facaina uruiaina comutarede.

⁹ Ero, lliñe ðe rira tiedomoi. Tia mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoina jai duere finoacade. Ie riicaillafue anamo jai itomoi. Omoi comeciai iuai omoi meidoñenia, omoina duere finoite.

¹⁰ Iena cacajanona, comini dinena naimiemo jicanotimaci:

—Cai bautizaja mei, ¿ñiese iiticai? ¿Ñie isoide mare rafuena finoiticai?

¹¹ Juan uai ote:

—Ailluena iniroredimiedi iniroinidimiemo iniroina feca. Guilleredimiedi guillenidimiemo guillena feca.

¹² Naimacina bautizallena, gobierno ucubena oraini jiai bitimaci. Jicanotimaci:

—Llofueraima, cai bautizaja mei, ¿ñiese iiticai? ¿Ñie isoide mare rafuena finoiticai?

¹³ Uai ote:

—Gobierno facaina omoi ibataia, cominimona gobierno llua baifemo oñeno.

14 Naimie dine billanona, soldadaui jicanotimaci:

—Cai bautizaja mei, ¿niese iitica? ¿Nie isoide mare rafuena finoitica?

Uai ote:

—Cominimona rana bairoñoeno. Riicinodo rana oñoeno. Tainona logiduamona, cominimona rana oñoeno. Omoi ucube illa diese feño. Ie baifemo ucubena nicidoñoeno.

15 Juan llofuiamona naie facaise cominidi Cristo billemo ocurilla jira, “Juandi nbaí Cristo” raillanona, Juanmo comeciaina facauidimaci.

16 Iena fidiano, Juan llote:

—Cristoñedicue. Jusiñamui díbeimo omoi illamona, jinui díga omoína bautizadicue. Cai baifemo faitimie bie facaise biite. Naimie cue ifomo meidoite. Jamai bue cue isoilla jira, naimiena cue canuana uiñoñedicue. Naimiemo omoi duia, naimiedi Jusiñamui Joreño omoimo itataite. Omoi comeciái iuai omoi meidoñenia, omoína duere finoite.

17 Trigona omoi betaia, mare trigona eenotomoi. Maraiñede ra oni dota-janona, iena jobaitomoi. Ie isoide. Naimie rafuena lluanona, naimiedi comeciái iuailai meidotinona ie Moo illanomo ofitaita; iadedi jiaie cominina duere finoite. Iraimo dotaite. Naie irai jaca duiñede —llote.

18 Bie isoidicinodo cominimo ie mare rafuena llofueuide.

19 Naie facaiseconi Herodedi gobernador. Ie ama ai ote, ie aina illena. Naiñaiñodi Herodías. Díga jiaie mariñede rafuena finode. Ie muidona Juan naimiena lletade.

20 Maraiñede rafuena Herodes finocana jaillamona, Juan cárcelmo jonetade.

Juandi Jesúna bautizaja rafue

(Mt 3.13-17; Mr 1.9-11)

21 Ailluena cominina Juan bautizaja facaise, Jesúna jiaí bautizade. Bautizaja mei, Jesúdi ie Moo díga ñaianona, mona bojode.

22 Ieconí Jusiñamui Joreño ucugina eruaillano, naimie emodomo ana bite. Monamona Jusiñamui llote:

—Cue isiruiga Jitodio. Ori iobidicue.

Jesucristo ie usumatiai

(Mt 1.1-17)

23 Jesús treinta años illamona, Jesús ie maijille rafue tainede. “Naimiedi José micori jito” raillano naimiemo cominidi comeciaina facadimaci. Josédi Elí micori jito.

24 Elídi micori Matat micori jito. Matat micori Leví micori jito. Leví micori Melqui micori jito. Melqui micori Jana micori jito. Jana micori José micori jito.

25 José micori Matatías micori jito. Matatías micori Amós micori jito. Amós micori Nahum micori jito. Nahum micori Esli micori jito. Esli micori Nagai micori jito.

26 Nagai micori Maat micori jito. Maat micori Matatías micori jito. Matatías micori Semei micori jito. Semei micori José micori jito. José micori Judá micori jito.

27 Judá micori Joana micori jito. Joana micori Resa micori jito. Resa micori Zorobabel micori jito. Zorobabel micori Salatiel micori jito. Salatiel micori Neri micori jito.

28 Neri micori Melqui micori jito. Melqui micori Adi micori jito. Adi micori Cosam micori jito. Cosam micori Elmodam micori jito. Elmodam micori Er micori jito.

²⁹ Er micorí Josué micorí jito. Josué micorí Eliezer micorí jito. Eliezer micorí Jorim micorí jito. Jorim micorí Matat micorí jito. Matat micorí Leví micorí jito.

³⁰ Leví micorí Simeón micorí jito. Simeón micorí Judá micorí jito. Judá micorí José micorí jito. José micorí Jonam micorí jito. Jonam micorí Eliaquim micorí jito.

³¹ Eliaquim micorí Melea micorí jito. Melea micorí Mainán micorí jito. Mainán micorí Matata micorí jito. Matata micorí Natán micorí jito. Natán micorí David micorí jito.

³² David micorí Isaí micorí jito. Isaí micorí Obed micorí jito. Obed micorí Booz micorí jito. Booz micorí Salmón micorí jito. Salmón micorí Naasón micorí jito.

³³ Naasón micorí Aminadab micorí jito. Aminadab micorí Aram micorí jito. Aram micorí Esrom micorí jito. Esrom micorí Fares micorí jito. Fares micorí Judá micorí jito.

³⁴ Judá micorí Jacob micorí jito. Jacob micorí Isaac micorí jito. Isaac micorí Abraham micorí jito. Abraham micorí Taré micorí jito. Taré micorí Nacor micorí jito.

³⁵ Nacor micorí Serug micorí jito. Serug micorí Ragau micorí jito. Ragau micorí Peleg micorí jito. Peleg micorí Heber micorí jito. Heber micorí Sala micorí jito.

³⁶ Sala micorí Cainán micorí jito. Cainán micorí Arfaxad micorí jito. Arfaxad micorí Sem micorí jito. Sem micorí Noé micorí jito. Noé micorí Lamec micorí jito.

³⁷ Lamec micorí Matusalén micorí jito. Matusalén micorí Enoc micorí jito. Enoc micorí Jared micorí jito. Jared micorí Mahalaleel micorí jito. Mahalaleel micorí Cainán micorí jito.

³⁸ Cainán micorí Enós micorí jito. Enós micorí Set micorí jito. Set micorí Adán micorí jito. Adándi Jusiñamui comuitagamie.

4

Taife ramo Jesús faia rafue (Mt 4.1-11; Mr 1.12-13)

¹ Jusiñamui Joreño anamo Jesús illamona, Jordán railla illemona Jesús jaillano, jofue iñenanomo Jusiñamui Joreño naimiena orede.

² Nainomo cuarenta digarui Taifedi naimiena ramo faite. Naie facaiseconi Jesús jaca guiñede. Naie facaise fuilla mei, guiñeno illamona, naimie aimetaite.

³ Jesús aimetaillana Taife uiñuamona, naimiemo llote:

—Jusiñamui Jitodiodena, naimiemo llono: “Ore Moo, bie noficina llomeniconajaita”.

⁴ Jesús uai ote:

—Iena lloñeiticue. Jusiñamui facaina lloaíma micorí iena jaie cuega: “Jiaie rafuedi llomenico guilla baifemo faite”.

⁵ Ie mei a ite anedumo Taife Jesúsna uillano, dallu illanona, naimiemo nana nairaiaína acatate.

⁶⁻⁷ Llote:

—Nana bie nairaiaí cue anamo ite. Iena cue iacagamie mo itataredicue. Cueno o sedajamona, iobillacinona cuemo o fecaia, nana bie nairaiaí omo fecaiticue. Bie nairaiaí illaímana jaitio.

⁸ Jesús uai ote:

—Dama ite. Ona sedañeiticue. Moisés micorí jaie cuega: “Cai Nama Jusiñamuina seda. Dama naimiemo iobillacinona feca”.

⁹ Ie mei Jerusalémo Jusiñamui jofo muidomo Taife Jesúsna uite. Raite:

—Jusiñamui Jitodiódena, eniruemo mai ana uai.

¹⁰⁻¹¹ David micorí ona jaie cuega:

Ona eenollena Jusiñamuidi ie jaienisaímo lloite.

Eniruemo o uaiñellena, o abí bofedaiñellena, ona feiñoitimaci cuega. Naimie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

¹² Jesús uai ote:

—Dama ite. Ana uaiñeiticue. Ero, ie cominímo Moisés micorí jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O lluaña finoñeiticue.

¹³ Taife naimiena ramo faia mei, naimiemoña ie jitaille dñori oni jaide.

Galileamo Jesús ie rafue llole jillaci

(Mt 4.12-17; Mr 1.14-15)

¹⁴ Jusiñamui Joreño naimiemo illamona, Galileamo Jesús abido jaide. Nana naie eniruemo naimie mameci soride.

¹⁵ Ailluena judíuai ofiracuaimo naimie llufueuide. Iena cacajanona, comíni: “Naimie llufuacino mare” raitimaci.

Nazaretmo Jesús illa rafue

(Mt 13.53-58; Mr 6.1-6)

¹⁶ Macarillamona, Nazaretmo naimie jaide. Navui nainomo naimiedi sairide. Naimie jaisoilla isoi, sábadomo nainomo ite ofiracomo jaide. Jaie cuegafuiaína ado facallena, naimie a naidadate.

¹⁷ Naie lloraco nama mullaimadi Isaías micorí jaie cuegafuiai jai ferinoga rabe naimiemo fecade. Iena oni suiñocaida, bie rafuena baillanona facade:

¹⁸⁻¹⁹ Jusiñamui Joreño cuemo ite.

Dueredinomo mare rafuena lollena, cuena fetode.

Taife anamo ailluena comíni illa jira, Jusiñamui naimacina jillotaiacana uiñoñedimaci.

Jusiñamui rafuena ailluena comíni uiñoñena jira, naimie illanomo rillena uiñoñedimaci.

Jeacino anamo naimaci illa jira, Jusiñamui naimacina jillotaiacana uiñoñedimaci.

Naimie naimacina duenaillana birui uiñuana jitaide.

Naimacimo mare rafue lollena, cuena jai oretate.

²⁰ Naie rafue facaja fuillamona, cuegafuiai abido fecade. Naimacina llufu-ellena, dane ana raide. Nana nainomo ite comíni naimiemo eo eruaidimaci.

²¹ Iemei naimie naimacina llufuete. Raite:

—Omoi como cacaja cuegafuiai omoi motomo jai suide. Cuena ñaite.

²² Naimie lluaña comíni cacajano, coninina raitimaci:

—Naimie fue mare. Naimie marena llufuete. —Iemona rajjicaillamona, coniniri raitimaci—, Naimiedi jamai José jito. ¿Niese naie rafue birui suide?

²³ Iena uiñuamona, Jesús dinena llote:

—Cue lluaña ñinoñedomoi. Comeciaina facadomoi: “Capernaumo naimie siño finoca rafuena fididicai. Siño rafuena cai motomo naimie jiai finoia, naimiena ñinoiticai. ‘Ua médico duia, ie abina dama jillotarede’ cai einamaci

raisoidimaci. Ie isoide. Naimie llua isoi naimie ia, siño rafue cai motomo finorede” comeciaina facadomoi.

²⁴ Uanaicinsona omoimo lloiticue. Naimie comini nairaimo Jusiñamui facaina lloraima ia, ie comini naimie uaina feiñoiacasiñede. Iena jamaisite. Ie isoide. Cue nairaimo cue illa jira, cue uaina iñoñedomoi.

²⁵ Jaie ie isoide. Elías facaiseconi daje amani años abimo atomonado noci deiñede. Aime gutimaci. Naie facaiseconi bie eniruemo cai comini dine ailluena feciñuai itimaci; iadedi omoi jaiagai Jusiñamui uaina iñoñedimaci.

²⁶ Jusiñamuidi Elíana cai comini dine oreñede; iadedi jiaie eniruemo ite feciño dine naimiena orede. Sarepta railla nairaimo orede. Sidón railla eniruemo naie nairai ite. Cai cominiñede feciñoimo orede.

²⁷ Jiaie rafuena lloiticue. Eliseo micoridi Jusiñamui facaina jaie llote. Eliseo micori facaiseconi bie eniruemo diga efonaitino ite; iadedi naimacimona Jusiñamui buna jillotañede. Omoi jaiagai Jusiñamui uaina iñoña jira, Eliseo micori duidinona jillotañede. Naie facaiseconi dama Naamán micorina jillotate. Cai cominimo naimie duñede; ia Siria railla eniruemo duide. Ie isoidomoi. Cue uaina iñoiacaiñedomoi —llote.

²⁸ Jesús lluana cacajano, naie ofiracomo itino eo iciritimaci.

²⁹ Naidacaillano, naimiena jino uitimaci. Naie illanodi iconimo ite. Nainomo naimiena uillanona, iconimona naimiena ana dotaacadimaci.

³⁰ Naimiena meineiacadimaci; iadedi naimaci motomo naimie jaillanona, naimacimona naimie jillobillano oni jaide.

*Jesúdi Janaba anamo itimie jillotaja rafue
(Mr 1.21-28)*

³¹ Jesús Capernaumo jaide, Galilea railla eniruemo ite. Nainomo naimie ia, sábadoruimo judíuai ofiracomo jaide. Nainomo llofuede.

³² Illaíma uai isoi naimie llofua jira, nainomo ite comini naimie llofuaimona rajicadimaci.

³³ Janaba anamo illamie nainomo ite. Jesús llofuiana cacaita, Janabadi imana ado cuirioitate:

³⁴ —Odi Nazaret ie Jesús. ¿Bue ñeiacadio cai diga? Caina duere finuaibidio. Ona uiñoticue. Odi Jusiñamui ie Mare Fetocamedio.

³⁵ Jesús naimiena lletade:

—Llicai. Naimiemona oni jai. —Iena cacajanona, naimaci motomo Janaba imana ana dotade; ia naimiedi bofedaiñede. Ie mei Janaba naimiemona oni jaide.

³⁶ Iena ciuanona, nana nainomo itino rajicadimaci. Coniniri siadotimaci: —¿Nie isoide Jesús uai? Janabamo naimie llua mei, imamona Janabadi oni jaide.

³⁷ Jesús finoca rafue muidona, naimie mamecidi nana naie eniruemo soride.

*Jesúdi Simón Pedro jifaiña jillotaja rafue
(Mt 8.14-15; Mr 1.29-31)*

³⁸ Ofiracomona Jesús jaillanona, Simón Pedro jofomo jaide. Ie facaise Simón jifaiño duide. Abina cuaride. Naiñaiña jilloitallena, nainomo itino Jesús jicante.

³⁹ Naiñaiño dine Jesús jaillanona, ie uai lluamona, naie duicodi oni jaide. Ieconí naiñaiño jillode. Abi cuariñede. Naidacaillanona, guille finuanona, ie jofomo itinona ecade.

*Jesúdi ailluena duidinona jillotaja rafue**(Mt 8.16-17; Mr 1.32-34)*

⁴⁰ Nairuido jitoma ana itemo, comini ailluena duidinona Jesús dine atidimaci. Diga duicuai illanona atidimaci. Naimacina jetajamona, naimacina jillotate.

⁴¹ Jananiaina jiai oni oretajano, jananiai dinena raite:

—Odi Jusiñamui Jitodio. —Naimiena naimaci uñua jira, Jesús naimaci ñaiana rairuide. Naimiedi Jusiñamui Jitona uñotimaci.

*Judeamo Jesús llofua rafue**(Mr 1.35-39)*

⁴² Ie areruido jitiramo jofue iñenanomo Jesús jaide; iadedi comini naimiena jenuaidimaci. Baillanona, naimaci motomona naimie jaiñellena jicanotimaci.

⁴³ Naimacimo llote:

—Jiaie nairaimo cue mare rafuena lloiacadicue. Naimie anamo comini illana Jusiñamui jitailla jira, naimacimo iena lloiacadicue. Ie mare rafuena lollena, Jusiñamui cuena orede. Oni jaiticue. Omoi diga fiebiñeiticue.

⁴⁴ Ie mei Judeamo ite ofiracuaimo Jesús llocana jaide.

5*Jesús muidona, naimaci ailluena lliciaina ua rafue**(Mt 4.18-22; Mr 1.16-20)*

¹ Jiairuido Genesaret railla jorai fuemo Jesús ia, ailluena comini naimie dine bitimaci. Ie rafue raise cacaillena, conini oni ñuicocana naimie ecimo bitimaci.

² Ie facaise jorai fuemo Jesús mena sijide botena ciode. Naimaci llojjina naimaci jocua jira, naie botemo lloiji fairaini iñede.

³ Comini ie llofuiacinona raise cacaillena, Jesús daje botemo jaide. Naie bote namadi Simón Pedro. Naie bote joraimo janore bai ñuitallena Simómo jicanote. Botemo ana raita, botemona cominina llofuede.

⁴ Llofua mei, Simómo llote:

—Aforedinomo jai. Nainomo omoi llojjina faino.

⁵ Simón uai ote:

—Maestro, cue nabaiñiai diga namona naio lloiji faiticai; iadedi jaca buena oñedicaí. ¿Ñiese ja oiticaí? Iadedi o llua jira, llojjina faiticue.

⁶ Iena naimaci faia mei, ailluena lliciaina jitatimaci. Ie jira naimaci lloiji cuaranoiacade.

⁷ Iena cuano, onolli diga imaci nabaiñiaina uaidote, naimiena naimaci canollena. Naimaci canuaibilla mei, lliciaina naga bote oruitate. Eo oruilla jira, buiacade.

⁸ Iena cuano, Simón Pedro Jesúsno iobillacino fecallena, caiñici ifodo rainadate. Raite:

—Odi siño Jitodio; ia cue jamai bue isoilla jira, cuemona oni jai. Jecinona finouidimiedicue.

⁹ Ailluena lliciaina naimaci ua jira, naimaci rajicaillamona, iena naimie llote.

¹⁰ Naimie nabaiñiaimona Zebedeo jito iaiaimai ite. Juan diga Jacobo iaiaimai. Simómo Jesús llote:

—Cuen a jaciruiñeno. Lliciaina birui ocabitomoi; iadedi cue dibeimo naimaci illena, biruimona cominina oitomoi.

¹¹ Eniruemmo sijiano, naimaci raruiaí fainonocaida, Jesús diga jaidimaci.

*Jesúdi efonaitimiena jillotaja rafue**(Mt 8.1-4; Mr 1.40-45)*

¹² Jiairuido Jesúdi jiaie nairaimo ia, efonaitimie naimie dine bite. Naimie eo fodo jaide. Jesúna naimie ciuano, naimiena raise uaiduamona, ana bitadate. Lote:

—Maestro, o jitaiadedi, cuena jillotaredio.

¹³ Jesús ie onolli oni ñuitajanona, naimiena jetade. Raite:

—Ona jillotaiacadícue. Mai o jillo. —Ieconí jillode.

¹⁴ Jesús naimiemo llote:

—Omo suide rafue jaca bumo lloñeno; iadedi Jerusalémo Jusiñamui jofomo Jusiñamui diga ñairaimamo o abina acatajai. O jillua jira, Jusiñamuimo Moisés micorí jaie lloga rana feca Iemona comini o jilluana uiñoitimaci.

¹⁵ Iese Jesús naimiemo llote; iadedi Jesús finoca rafue llocana eo uite. Ie muidona naimie lluana cacaillena, duidinona Jesús jillotallena, ailluena comini naimie dine bitimaci.

¹⁶ Bitimaci; iadedi Jusiñamui diga ñaillena, jofue iñenanomo Jesús jaide.

*Jesúdi tisitaitimiena jillotaja rafue**(Mt 9.1-8; Mr 2.1-12)*

¹⁷ Jiairuido naimie llofueia, diga comini naimie illa jofomo bitimaci. Fariseuai railla comini bitimaci. Moisés micorí llogacinuaina llofueraini bitimaci. Galileamona diga nairaimona bitimaci. Judeamona bitimaci. Jerusalémona bitimaci. Jusiñamui uaido Jesús naimie dine bite duidinona jillotate.

¹⁸ Ie facaise ie biiramo biide tisitaitimiena Jesús dine damierie atidimaci;

¹⁹ iadedi naimaci uillifo iñena jira, ailluena comini illa jira, riñedimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econocaida ifodo naimiena ie biiramo biide diga, comini motomo Jesús ecimo ana ñuitadimaci.

²⁰ Iena Jesús ciuanona, tisitaitimie jilluana naimaci ñnuana Jesús uiñote. Tisitaitimiemo llote:

—Jadí, o jeacinona cue faitaja jira, iena oni jai dotadícue. Ie facai ibana jai oñeicue.

²¹ Nainomo itinomona Moisés micorí llogacinona llofueraini itimaci. Fariseuai jiai itimaci. Comeciaina facadimaci: “Naimie Jusiñamuina jeare ñaite. Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade”.

²² Naimaci comeciai facajacinona Jesús uiñuanona, naimacimo jicanote:

—¿Bue ñellena omoi comeciaina iese facadomoi?

²³ Bimiemo: “O jeacinona jai oni dotadícue” cue lloia, cue uai siñonana uiñoñeitomoi; ia bimiemo: “Mai naidacailanona macarí” cue lloia, cue uai siñonana uiñoitomoi.

²⁴ Monamona jaie cue billanona, ñmana jaidícue. Ie jira jeacino oni dotaja uai cuemo ite. Iena omoi uiñoñellena, tisitaitimiemo lloitícue: “Mai naidacai. O biira ferianona, o jofomo mai jai”.

²⁵ Iese naimie raillamona, tisitaitimie jillode. Ieconí naimaci motomo naimie naidaide. Ie biira feriano, Jusiñamuimo iobillacino fecajano, ie jofomo jaide.

²⁶ Nana naiena ciodino eo rajjicaidimaci. Iemona Jusiñamuimo iobilacinona fecadimaci. Eo rajjicaillamona, raitimaci:

—Bie isoide siño comena jaca cioñedicaí.

Jesúdi Levína fetua rafue
(Mt 9.9-13; Mr 2.13-17)

²⁷ Jesús jino macarillano, gobierno facaina ucube oraimana ciode. Naimie mameci Leví. Ie ucubena ouillanomo raide. Jesús naimiemo llote:

—Cue llofuegamiena o jaillena, cue diga bi.

²⁸ Naidacaida, Jesús diga jaillanona, ie maijana fainonocaide.

²⁹ Nailli ie jofomo Leví aillue rafuena finode, Jesús iena. Diga ucube oraini guisaibitimaci. Diga jiaie comini jiai guisaibitimaci. Jesús diga danomo guitimaci.

³⁰ Nainomo fariseuai cominidi, Moisés micori llogacino llofueraini diga, jamai bitimaci. Jesúna cianona, ie llofueoicaiganomo jicanotimaci:

—¿Bue ñelli ucube oraini diga guitomoi? Marañede comini diga guitomoi.

Moisés micori llogacinodo ucube oraini raise jaiñenamona, naie isoidino diga fariseuai comini nabairiñena jira, iese jicanotimaci.

³¹ Jesús iena cacajano, llote:

—Ecairedino médicona jitañedimaci; iadedi duidinodi médicona jitaidimaci.

³² Jusiñamui dibeimo mareuidinona uaibiñedicue; iadedi marañedinona uaibiticue.

Jesúmo comini guiñenana jicanua rafue
(Mt 9.14-17; Mr 2.18-22)

³³ Naie facaise fariseuai dinena Jesúmo llote:

—Cai einamaci llua isoi, Jusiñamuina cai raise iobitallena, guiñenaruillai illa facaiseconi guiñedicai. Jusiñamuimo jicabidicai. Cai jeacino facaina sunaicabiticai. Cai einamaci rafuedo Juan Bautista llofueoicaigano jaidimaci. Cai llofuegano iedo jiai jaidimaci; iadedi o llofueoicaigano jaca guitimaci. ¿Bue ñellena cai einamaci rafuedo jaiñedimaci?

³⁴ Jesús uai ote:

—Jiaie rafuedo iena lloiticue. Coniruedi ie aina uarui ia iobilla jira, ie nabairiñai sunañedimaci. Iobillamona guitimaci.

³⁵ Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

³⁶ Jiaie rafuedo iena lloiticue: Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai marañeno cioite.

³⁷ Jacagomona finoca bolsa como finoca vino joneñega. Jonegadena, marañena jira, sirillamona igoi raire cuararite. Vino faifite. Igoi jiai faifite.

³⁸ Como finoca vino comogomo jonelle. Iemei iena faifñeite.

³⁹ Navui finoca vino jirua mei: “Navui finoca vino nia mare” raillamona, como finoca vino buna jiroacaiñede. Ie isoide. Omoi einamaci rafue ifomo jiaie rafue birui ite. Iena omoimo llocabiticue. Iedo jaidicai; ia omoi einamaci rafuemo omoi fibilla jira, jiaie rafuedo birui jiacaiñedomoi —llote.

6

Sábadoruimo Jesús llofueoicaigano maijia rafue
(Mt 12.1-8; Mr 2.23-28)

¹ Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijano, golluano, guicana jaidimaci.

² Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijamona, caimona jai maijidimaci. Caimona jeacinona jai finodimaci.

³ Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga Jusiñamui jofomo fo jaide.

⁴ Jusiñamuimo fecaca llomeniconona uanona, guitimaci. Jamai bue isoidino naie llomeniconona guillana Jusiñamui rairuide. Dani Jusiñamui diga ñairaini iena guiredimaci. David micori iena guite; ia Jusiñamui naimacina duere finoñede.

⁵ Monamona cue billamona, iimana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiai rairuiredicue. Ie jira nairuimo cue jitailla rafuena finoredicue.

Jesúdi onollina idisarodimiena jillotaja rafue

(Mt 12.9-14; Mr 3.1-6)

⁶ Jiaie sábadoruimo judíuai ofiracomo Jesús jaillanona, llofuede. Ie facaise nainomo nabellimo idisarodimie ite.

⁷ Moisés micori llogacinona llofueraini, fariseuai diga, Jesúmo eruaidimaci, sábadoruimo Jesús naimiena raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Naimacimona sábadoruimo bu maijia, jeacinona finode.

⁸ Naimaci comeciaina facajacinona Jesús uiñuamona, onollina idisarodimie mo lloste:

—Cue ecimo naidada. —Iemei Jesús ecimo naidadate.

⁹ Jesús nainomo itinomo jicanote:

—¿Nie isoide rafue sábadoruimo finuadena mare? Bimie birui cue jillotaiadedi, birui mare rafuena finodicue. Cuen birui omoi meineiadedi, birui marañede rafue finodomo. Sábadoruimo ¿nie isoide rafue finuana rairuidomoi?

¹⁰ Naimacimo eruaillanona, duidimie mo lloste:

—O onolli mai oni ñuita. —Iena ñuitajanona jillode.

¹¹ Nainomo itino iena ciuanona, eo iciritimaci.

—¿Niese Jesúna nibaiticai? —naimona coniniri siadotimaci.

Jesúdi ie doce llofueoicaiganona fetua rafue

(Mt 10.1-4; Mr 3.13-19)

¹² Nairui aneduaimo Jesús jaide, Jusiñamui diga ñaillena. Namona naio jüide.

¹³ Monaidemo, ie llofueganona naimie dine uaidote. Naimacimona doce digamiena fetode. Naimie diga icabillena, naimacina naimie facaina llorainina naimaci jaillena, naimacina fetode.

¹⁴ Iese mameciredimaci: Simón; naimie mameci jiaicidi Jesús jitaca Pedrona. Andrés; naimiedi Pedro ama. Jacobo, Juan, Felipe, Bartolomé,

¹⁵ Mateo, Tomás, jiaie Jacobo; naimiedi Alfeo jito. Jiaie Simóna fetode. Naimiedi cananista comini facaisemo duide.

¹⁶ Judas; naimiedi Jacobo jito. Judas Iscariote micori; naimiedi Jesúna gaitatimie.

Jesúdi ailluena cominina llofuia rafue

(Mt 4.23-25)

¹⁷ Aneđuaimona siniaidinomo ie doce llofueoicaigano dıga Jesús bite. Ie jıaie llofuegano naimie dine bitımacı. Ailluena jıaie comını bitımacı. Nana Judeamona bitımacı. Jerusalémona bitımacı. Tironona bitımacı. Sidómona bitımacı. Tiro monaillai fuemo ite. Sidón monaillai fuemo jıaı ite. Naimie lluomo cacareillena bitımacı. Naimacı duicomona jıaı jilloiacadımacı.

¹⁸ Jananıaı anamo itinomona Jesús jananıaına oni orede.

¹⁹ Nana comını naimiena jetaacadımacı. Naimiemo sıño uai illa jıra, naimiena jetajamona, naimacı duicomona jillođımacı.

Jesús lloga rafue (Mt 5.1-12)

²⁰ Ie llofueganomo eruaıllanona, Jesús llote:

—Naimie anamo omoi jai illamona, Jusiñamui omoina sedaacana rafuena omoina llofueitıcue. Naimiena jıtaidomoina, omoina sedaite. Comeciaina facadomoi: “Jusiñamui jıtaiıllacınona danı finonıdıcaı; ia Jusiñamui caina canuamona, iena finoıtıcaı”. Naimie comını omoi illamona, naimie omoina canoite. Iemona caımare iıtomoi.

²¹ Naimie jıtaiıllacino omoi finuamona, Jusiñamui omoina sedaite. Naimiedi mare rafuena omoi finuana canoite. Iemona caımare iıtomoi. Omoi sunaıa, Jusiñamui omoina sedaite. Ailluena comını jeacino finocana jaidımacı. Iena uıñuamona, sunaitomoi. Naie isoidino omoi illamona, Jusiñamui omoi comeciaina ocuiñotaite. Iemona iocire iıtomoi.

²² Cuemo omoi duia, duere sefuitomoi. Jıaie comını omoina enoitımacı. Omoina oni dotaitımacı. Omoina jeare ñaitımacı. Cuemo omoi duılla jıra, omoina jamaitımacı; ia Jusiñamui omoina caımare itaitaite.

²³ Omoi isoi omoi jıagaimona Jusiñamui facaina lloraini micoriaı jıaie duere sefuidımacı. Iena omoi uıñuamona, monamo Jusiñamuimona ailluena ibana ıco omoi feiñua jıra, birui omoi duere sefuıa, iocire omoi jai.

²⁴ Iese iıtomoi; ia Jusiñamuına jıtaiñedıno ıco duere sefuitımacı. Comeciaina facadımacı: “Jusiñamuına jıtaiñedıcaı. Marena birui itıcaı. Nana cai comeCIAI jıtaiıllacino birui caımo ite”. Iese birui itımacı; ia Jusiñamui naimacına ıco duere finoite.

²⁵ Jusiñamuimona buena birui jıtaiñedıno ıco duere sefuitımacı. “Nana cai comeCIAI jıtaiılla rafue caımo birui illa jıra, Jusiñamuimona buena jıtaiñedıcaı” raitımacı. Iese birui itımacı, ia Jusiñamui naimacına ıco duere finuamona, buenitımacı. “Cai comeCIAI iocire itatallena, Jusiñamuına jıtaiñedıcaı” damıerie birui raitımacı. Naimacı jeacino facaina sunaiñedımacı. Birui ite rafuena ebiruitımacı. Iese birui itımacı; ia Jusiñamui naimacına ıco duere finuamona, sunaitımacı. Eeitımacı.

²⁶ Naimacırı iobıllamona, omoi jıaıgaıdı Jusiñamui facaina llorainına abi caıtadinona marena ñaitımacı. Damıerie birui daje isoidımacı. Jusiñamuına iobıtaiacaiñedımacı; ia comınına iobıtaiacadımacı. Iemona comını naimacına marena ñaitımacı; ia Jusiñamui naimacına ıco duere finoite.

Jesúdı iba oñenana llua rafue (Mt 5.38-48; 7.12)

²⁷ Jesús llote:

—Cue lluaana cacajamona, iena ñino. ñnuamona omoina enoidinona isirui. Naimacına cano.

²⁸ Omoi jeare ñaitınona marena ñaino. Omoina jeare finodıno facaina Jusiñamuımo omoi jıı.

²⁹ Omoï cacaina bu dutaiade, iba oñeno; iadedi enefebeimo dobaida, enefebeimo jiai dutallena. Omoï iniroina bu bairoiacania, omoïmo naimie nia jicañenia, naimie jitailla iniroi baifemo naimiemo feca.

³⁰ Omoïmo ite rana bu jicaia, iena caidiñeno feca. Omoïmona rana bu bairoia, iena abido jicañeno.

³¹ Jusiñamui jitaillacinona omoï finuamona, jiaie cominina marena fino. Jiaie comini omoïna finuana omoï jitailla isoi, naimacina fino. Naimaci omoïna marena finuana omoï jitaia, naimacina marena fino. Naimaci omoïna maraiñeno finuana omoï jitaia, naimacina ie isoi maraiñeno fino. O finoacaga ra isoi jiaie cominimo fino.

³² Naimie cominina omoï illamona, nana comini daje isoi isirui. Omoïna isiruitinona omoï isirui, mare; iadedi omoïna gaiñenanona omoï isiruiñenia, Jusiñamui omoïna: “Mare” raiñeite. Maraiñede rafuena finoraini naimacina isiruitinona isiruitimaci. Nana cominina omoï isiruiñenia, maraiñede rafuena finoraini baifemo faiñedomoi. Naimaci isoi itomoi.

³³ Naimie cominina omoï illamona, nana comini daje isoi cano. Omoïna canodinona omoï canoia, mare; iadedi omoïna canoñedinona omoï canoñenia, Jusiñamui omoïna: “Mare” raiñeite. Maraiñede rafuena finoraini naimacina canodinona canodimaci. Nana cominina omoï canoñenia, maraiñede rafuena finoraini baifemo faiñedomoi. Naimaci isoi itomoi.

³⁴ Naimie cominina omoï illamona, nana cominimo daje isoi rana feca. Omoïmo ra fecadinomo rana omoï fecajia, mare; iadedi omoïmo rana fecañedinomo rana omoï fecañenia, Jusiñamui omoïna: “Mare” raiñeite. Maraiñede rafuena finoraini naimacimo rana fecadinomo rana jiai fecadimaci. Nana cominimo rana omoï fecañenia, maraiñede rafuena finoraini baifemo faiñedomoi. Naimaci isoi itomoi.

³⁵⁻³⁶ Omoïna gaiñedinona isirui. Naimacimo mare rafuena fino. Naimacimo rana jamai feca. Naimacimona iba uamo ocuirñeno; ia Jusiñamui omoï raise ibaite. Jusiñamui maraiñedinona canocabide. Naimieri lobiñedimaci; ia naimacina canocabide. Naimacina duenaicabite. Ie jira maraiñedinona omoï duenai. Naimie isoi omoï illamona, maraiñedinodi naimie cominina omoï illana uifñoitimaci. Jusiñamuidi cominina duenailla isoi, cominina omoï jiai duenai.

*Jesúdi jiaie cominina mameriñenana llua rafue
(Mt 7.1-5)*

³⁷ Jesús llote:

—Duenaillacinona nia llofueiacadicue. Jiaie cominina mameriñeno. Jiaie cominina omoï mameria, omoïmo ite maraiñede rafue facaina Jusiñamui omoïna duere finoite. Omoïmo maraiñede rafuena bu finoia, iena feita. Iena omoï feitañenia, Jusiñamui omoïmo ite maraiñede rafuena feitañeite.

³⁸ Jiaie rafuedo iena lloiticue. Rana omoï fecaia, iena raise omoï gaieia, ico ibana omoï oia, raise gaiecana feiñoitomoi. Ie isoide. Jiaïnomo maraiñede rafuena finoñeno; ia naimacina duenaillamona, naimacimo rana jamai feca. Iena raise feca. O fecaja diese Jusiñamuimona eo raise ibana feiñoitomoi.

³⁹ Naimacina iena nia llofuiamona, naimacimo Jesús jiaie rafuena llote:

—Cue cominina omoï illamona, bie rafuena cacarei. Uanaicinodo omoï jaiñenia, uasinidimie isoi iitomoi. Uisinidimie jiaie uisinidimiena ifonide. Ifo iade, nagamaiai dafomo uaidiaimaiai.

⁴⁰ Fueotimie ie llofueraima baifemo uaiñede; iadedi naimie raise fueoia, ie llofueraima isoi jaite. Raise fueollena, cue uaimo cacarei.

41 Omoï ecimo itimiemo janore maraiñedicino illana omoï uiñoaia, iemo comecina facañeno; iadedi omoïmo ailluena ite maraiñedinomo nano omoï comecina faca.

42 Omoïmo maraiñedicino illamona, ¿niесе omoï ecimo itimiēna mamer-tomoi? Omoïmo ite maraiñedinomo omoï comecina facaacañēna jira, maredinona abi caitadinodomoi. Omoï comeciaina nano raise fino. Iemei omoï ecimo itimiēna canorenitomoi. Naimie comecina raise canorenitomoi.

Jesúdi riará llisilla lilla llua rafue

(Mt 7.17-20; 12.34-35)

43 Jesús nia llofuete:

—Mare riará maraiñede riará isoi llisiñede. Maraiñede riará mare riará isoi jiaí llisiñede.

44 Llisillamona nie isoide riará illana uiñoticaí. Amena ie llisilla llilla-mona amena marena uiñoga. Llillamona, amena maraiñēnana jiaí uiñoga. Eecuaïmona uvas railla riarana oñedicaí. Monaigimona higos railla riarana jiaí oñedicaí.

45 Ie isoide. Naimaci comeciámo iticinomona comini ñaitimaci. Mare comeci iticinomona maremiedi mare rafuena finocabide. Maraiñede comeci iticinomona maraiñedimie maraiñede rafuena finocabide.

Jesúdi naimiēna ñnuana ñaia rafue

(Mt 7.24-27)

46 Jesús nia llofuete:

—Omoïmona damierie cuena: “Cai Nama” raitomoi; iadedi cue llogacinona finoñedomoi.

47 Diga comini cue dine bitimaci. Cue uaina cacadimaci.

48 Cue uaina ñnotimie jofona raise finodimie isoide. Jofona raise finodimiedi ie jofona finodemo, jofona goñēllena, nofici illa dinori eo ana raite. Noci deidemo, eo jinuidemo, jofomo ille toia, jofa raise finua jira, jofa goñēde. Iena faifiñede. Ie isoide. Cue lluaña ñnotimie faifiñeite.

49 Cue uaina ñnoñedimie jofona raise finoñedimie isoide. Jofona raise finoñedimiedi ie jofona finodemo, enirue emodomo iena finode. Ana raiñede. Noci deidemo, eo jinuidemo, jofomo ille toia, jofa goillamona, jai eo judaísite. Iena faifide. Ie isoide. Cue lluaña ñnoñedimie faifite —llote.

7

Jesúdi capitán mullaïmana jillotaja rafue

(Mt 8.5-13)

1 Ie llua fuillamona, Jesús Capernaumo jaide.

2 Nainomo romanos railla nairámo duide illaïma ite. Cien soldaduaina sedauide. Naimiedi capitán. Judiuñedimie. Ie mullaïma eo duide. Niade fiodaiacade. Capitán naimiēna eo gaide.

3 Capernaumo Jesús illana capitán fidiano, Jesús dine judíuai einamacina orede. Naimie dine Jesús billena jitaide. Ie mullaïmana jillotajaïbillena jitaide.

4 Jesús dine naimaci rillano, capitán dine naimie billena, naimiemo duere jicanotimaci. Raitimaci:

—Naimiedi caïmona maremiēna jira, naimiēna o canuana jitaidicaí.

5 Cai nairaina isiruite. Ie ucube diga cai ofiracona finotate.

6 Iena cacajamona, Jesús naimaci diga jaide. Capitán jofomo iairei Jesús ria, capitádi Jesús dine ie nabaiñiaïna orede, Jesúmo llollena:

—Maestro, biñeno. Jamai bue cue isoilla jira, cue jofomo biñeno.

7 Jamai bue cue isoilla jira, o dine jiaí jaiñedicue. O illanomona o uaido cue mullaíma jilloita.

8 Jiaie illaicomini anamo iticue. Naimaci lloga uaina ñnoticue. Cue anamo jiaie soldaduái illanona, cue uaina ñnotimaci. Cue anamo cue mullaíma illa jira, naimiedi cue uaina ñnote. O anamo naie duico illa jira, o uaina bene o lloia, cue mullaíma jilloite.

9 Iena cacajano, Jesús raijicaide. Oni dobaidajano, naimie diga jaidinomo llote:

—Bie isoidimie cue uaina ñnotimiena jaca baiñedicue. Cai juduái cominimona bie isoidimiena jaca ññede. Mai abido jai.

10 Capitámona bitino abido capitán jofomo rillano, mullaíma jai jilluana cioidimaci.

Jesús dice jirona jillotaja rafue

11 Jiaíruido Naín railla nairaimo Jesús jaide. Ie llofueoicaigano jiaí jaidimaci. Ailluena comini jiaí jaidimaci.

12 Naie nairai ie nasemo naimie laireicaia, jai fioidaitimiena comini jino atiana ciode. Naie fioidaitimiedi conirue. Ie eidi feciño. Dajede ie jitodi jai fioidaite. Ailluena Naín itino naie feciño diga jaidimaci.

13 Jesús naiñaiñona ciuanona, naiñaiñona duenaite. Naiñaiñona raite:

—Mai eñeno.

14 Fioidaitimie dine Jesús jaillanona, naimaci ieconi naidadallena, ie uiga rana jetade. Naimiena uitinodi ieconi naidadatimaci. Fioidaitimie mo Jesús llote:

—Mai a rainada.

15 Iena Jesús llua mei, naie fioidaitimie ie uiga ramona a rainadate. Ie meinoconi naimie ñaite. Jesús naimiena ie eimo abido ite.

16 Naieri nana jacinaitimaci. Jusiñamui mo iobillacinona fecadimaci. Raitimaci:

—Jusiñamui facaina lloraíma cai motomo ite. Naimie uai eo siño. Naimiena Jusiñamui oretaja jira, Jusiñamui caína birui canoacana jira, iobidicai.

17 Nana Judeamo itino Jesús finoca rafuena fididimaci. Judea enirue fuemo ite nairaiadi jiaí fididimaci.

Jesús dice Juan Bautista micori ie llofueoicaiganona oretaja rafue (Mt 11.2-19)

18 Juan Bautista micori llofueoicaiganodi nana Jesús finoca rafuena fidiano, iena naimie mo llote. Ie llofueoicaiganomona Juan micoridi menamiena uaidote.

19 Llote:

—Jofue ññenanomo navui cue ia, jiaimie billena llofuecabiticue. Jesús dine omico jai: “¿Buudio? ¿Odi Juan llofuegamiedio? ¿Jiaimie billemo nia ocuiriticaí?” naimie mo jicano.

20 Jesús dine iaímaiaí rillano, Jesús mo llotiaímaiaí:

—Juan Bautista cocona orede. Jofue ññenanomo navui naimie ia: “Jusiñamui mona damie biite” naimie llofuecabite. Juan llofuegamiena o illana uíñoiacadicaí. Imieñedi odena, jiaimie billemo nia ocuiriticaí. Cocomo llono.

21 Jesús dine iaímaiaí billa facaiseconi, Jesús diga isoide duicuaí illanona jillotate. Jananiaí anamo itinomona jananiaína oni jiaí orede. Uisínidinona uisina dane ciotate.

22 Ie jira Jesús iaímaiaí mo llote:

—Cue lluana cacadomíco. Cue finoca rafuena ciodomíco. Juan dine abido omíco jaillanona, iena naimiemo llono. “Uisínidino jai ciodímaci. Ñujañujacaida jaidinodi jai raise macaritimaci. Efonaitino jai jillodímaci. Jefona cacaiñedinodi jai jefona cacasite. Fiodaillamona damierie jai jillodímaci. Dueredino mare rafuena jai cacadímaci”. Iese naimiemo llono.

²³ Jiai llono: “Ñibai nana cue rafuena raise cacaiñedio; ia cuena jaca nia ñinacana o jaia, caimare iitio”.

²⁴ Iaimaiaí abido jailla mei, naimie ecimo ailluena ite cominimo Jesúsí Juan rafuena llote:

—Jofue ñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoiñede. Nie isoide rafue naimiemo ia, cue rafuena llocana jaide.

²⁵ ¿Bue ñellena naimie dine jaidomoi? Mare ñiroina jitadimiena cioiñedomoi. Mare ñiroina jitadinona omoi cioacaniadedi, illaicomini dine jaidomoi. Naimacimo ailluena ra ite.

²⁶ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira.

²⁷ Malaquías micori naimiema jaie cueba: “Jusiñamui raite: ‘Ero, o uicodo cue rafuena llollena, damiena oretaiticue, comini comeaiña marecinona duiñollena’” cueba. Malaquías Juan Bautistana cuete.

²⁸ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofuate; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioiñede. Iemona naimie baifemo faitomoi.

²⁹ Naimacina navui Juan bautizaja jira, nainomo ite comini iena cacajano, Jusiñamuimo iobillacinona fecadímaci. Gobierno ucube orainidi jiai fecadímaci;

³⁰ iadedi fariseuai iobillacinona fecañedímaci. Moisés llogacinuaina llofueraini jiai fecañedímaci. Jusiñamui naimacina jillotajana naimaci jamailla jira, naimaci jeacinona Jusiñamuimo lloñena jira, Juan naimacina navui bautizañede.

³¹ Jesús llote:

—Cuena ñinoñedinona lloiticue: Ero, omoína ñaiticue.

³² Jifanote uruiaí isoidomoi. Uruiaí jifanoiacania, naimaci nabaiñiaina uaiduanona, raitimaci: “Omoi diga jifanoiacadicaí; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedicaí” raitimaci.

³³ Ie isoidomoi. Juan jirorainide. Caimare guiñede; ia naimie diga nabairiñedomoi. Naimiema gaiñedomoi. Ie jira omoimona dajerie naimiema raitimaci: “Janaba anamo naimie illamona, naimie uairico isoi ite” raitimaci.

³⁴ Monamona billanona, ñimana jaidicue. Omoi isoi guiticue. Caimataidicue; ia cue diga nabairiñedomoi. Cuena jiai gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimedio”.

³⁵ Iese raitomoi; iadedi Jusiñamuina ñnotinodi cue finoca rafuena mare-nana uñotimaci.

Jesús Simón jofomo illa rafue

³⁶ Jiairuido fariseuai cominimona, ie jofomo naimie diga guillena, damiedi Jesúna uaidote. Naimiedi Simón. Naimie dine Jesús jaillanona, naimie diga guite.

³⁷ Jesús guitemo, daje riño fo jaide. Naiñaiñodi maraiñede rafuena finoraiño. Naicomo Jesús guillana fidiano, naiñaiño fo jaide. Noficimona finoca frascona atide, na soride ra illa diga.

³⁸ Judíuai aciata jaca guisoidimaci. Jinafo dine eilli jonesiuidimaci. Fo jailano, naie riño Jesús abimo naidaide. Naiñaiño eiamona, naiñaiño uisimona uaide uillinociái diga Jesús eillina jocode. Safenaillena, naimie eillina ie ifotie diga dote. Ie eillina jiai llibanote. Ie mei ie eillimo frascomona soride rana totade. Naimiena naiñaiño isiruillamona, iese naiñaiño finode.

³⁹ Iena cuanona, Simón dama comecina facade: “Bimie Jusiñamui facaina lloraímadena, nie isoide naimiena jetade riñona niade uiñote. Naimiedi naiñaiño maraiñede rafuena finoraiñona uiñote. Iena naimie uiñuamona, naiñaiñona jino raire orede. Naimiedi Jusiñamui facaina lloraímañede”.

⁴⁰ Jesús naimie comecina facajacinona uiñuano, naimiemo llote:

—Simón, naiñaiño finoca rafuena o raise fueollena, omo bie rafuena lloiacadicue.

Simón uai ote:

—Maestro, mai cuemo llono.

⁴¹ Jesús llote:

—Damie menamaiaimo ucubena fecade. Damie mo quinientos diga ucubena fecade. Jiaimiemo cincuenta diga ucubena fecade.

⁴² Ie iade, naiena abido meidonidiaímaiai. Ie jira ucubena fecadimiedi raite: “Dama omico meidoñega. Naiena jai feitaticue”. Ero, Simón, ¿nimieca ucubena fecadimiena eo isiruite?

⁴³ Simón dinena uai ote:

—Cue comeci raite: Ailluena ucube feitaja jira, eo ailluena ucubena igamie.

Jesús dinena raite:

—Raise cue uaina fairiotio.

⁴⁴ Iemei Jesúdi riño dine dobaidajanona, Simómo llote:

—Biñaiñona ja lloiticue. O jofomo biticue; ia cuena raise nafueñedio. O nabai o dine bia, naimiena raise nafuecabitio. Ie jearede eilli jocollena, comini finocabilla isoi, jinui fecadio. Safenaillena eilli dora fecadio. Naimiena llibanotio. Ie abi caimare sorillena, janore soride ra naimiemo jonetio. Iese cuena nafueñedio; ia bie riño cuena isiruillamona, ie uillinociái diga cue eillina jocode. Ie ifotie diga dote.

⁴⁵ Naiñaiño cue ecimo fo billanona, cue eillina diga icaiño llibanote.

⁴⁶ Naiñaiño cue eillimo soride rana totade.

⁴⁷ Naiñaiño mo eo jeacino ite; ia cuena naiñaiño eo isiruillamona, nana ie jeacinona jai oni dotajana uiñoticaí. “Jeaicno cuemo raise iñede” comecina bu facaia, Jusiñamui naimie jeacina oni dotajamona, naimie Jusiñamuina janore isiruite. Iemo o comecina faca.

⁴⁸ Naiñaiño mo llote:

—O jeacino jai oni dotaca. Iena jai feitaticue.

⁴⁹ Jiaino nainomo guillanona, coniniri ñaitimaci:

—Bimiedi ¿nie isoidimie? Bimie jeacino oni dotanide.

⁵⁰ Jesús dinena riño mo llote:

—Cuena o ñnua jira, o jeacinomona jai jillodio. Mai uri o jaillano o i.

8

Dajerie riñoniai Jesúna canua rafue

¹ Ie facaise diga nairaimo Jesúsdi mare rafuena llocana jaide. Naimie anamo comini illana Jusiñamui jitailla jira, Jesúsdi Jusiñamui ðibeimo naimaci comeciai iuaina meiduana llofujete. Ie doce llofueoicaigano naimie diga jaidimaci.

² Dajerie riñoniai jiai jaidimaci. Naiñaiñuaimona dajerie Jesús navui jananiai anamona orecañaiñuai. Dajerie duicomona jilloitagañaiñuai. María Magdalena ite. Naiñaiñomona siete diga jananiai oni oretate.

³ Juana ite. Naiñaiño inidi Chuza. Herodes railla illaíma ecimo naimie maijiuide. Susana ite. Jiaie riñoniai jiai itimaci. Naiñaiñuai ramona Jesúna canouidimaci.

*Jesúdi trigona judaidimiena llua rafue**(Mt 13.1-9; Mr 4.1-9)*

⁴ Diga nairaiaimona ailluena comini Jesús dine billanona, naimacimo llote: —Jusiñamui omoína sedaacana omoi fueollena, bie rafuena lloiticue.

⁵ Damiedi trigona judaiaide. Naimie judaiaimona naisomo janore iduai juide. Comini nainomo jaillano, iena saítadimaci. Bai jailla mei, sillíñiai iena jiai guisaibite. Ie jira sicoñede.

⁶ Nofiemo jiaie iduai juide. Sicode; iadedi jinui raise iñena jira, duide.

⁷ Eecuai illanomo jiaie iduai juide. Eecuai sicuamona, riarra eecuai ibaica. Ie jira llisiñede.

⁸ Mare eniruemo jiaie iduai juide. Sicode. Llisillamona danademo cien diga llisillana ote.

Bie rafuena naimie llua mei, naimacimo llote:

—Omoi jeforena jira, raise fueollena, cue lluamo cacarei. Iena ñno.

*Jesús ie como lloga rafuena llofuiá rafue**(Mt 13.10-23; Mr 4.10-20)*

⁹ Jesúmo ie llofueoicaigano ie como lloga rafuena jicanotimaci:

—¿Bue ñellena bie isoide rafuedo cominina llofuetio?

¹⁰ Uai ote:

—Jusiñamuidi omoína ie sedaacana rafuena jai uiñotade. Jiaie iena uiñofedomoi. Jiaie cominina iena nia uiñotañede. Ie jira bie isoidicinodo naimacimo lloticue. Cue siño finoca rafuena cioidimaci; iadedi iena naimaci ñnoñena jira, uiñoñoeno jaidimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci.

¹¹ Omoína cue como lloga rafuena llofueiticue. Naie iduai; Jusiñamui uai.

¹² Dajerie comini comeciai naisomo juide iduai isoidimaci. Jusiñamui uaina cacadimaci; ia naimaci naie uaina ñnoi raillano, naimaci naitemona jilloi raillanona, Taife naimaci comeciaimo cacaja uaina ñnotañede.

¹³ Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci. Nofiemo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefuiá, abido danomo uaidimaci.

¹⁴ Jiaie iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruaiána ebiruillamona, naie uai naimaci comeciaimo itabiñede. Jusiñamui jitailla rafuena finocana jaiñedimaci.

¹⁵ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Mare jeanide comeciaimona inocana jaidimaci. Eo lliside isoidimaci. Jusiñamui jitailla rafuena sefuiruñeno inocana jaidimaci.

Jesús ie rafue llocana jailla luu rafue

(Mr 4.21-25)

¹⁶ Jesús nia llote:

—Lamparín bu unia meinoconi, jiaie ra biide anamo rainañega; iadedi jofo jeraimo lligañollena, nainomo bite comini raise cioillena, ie rairanomo rainaca.

¹⁷ Ie isoide. Cue rafue llocana jaia, comini comeciai iticinona uñnotade. Uanaicino naimaci cacajamona, damierie inotimaci. Damierie inoñedimaci.

¹⁸ Cue lluomo raise cacarei. Iena omoi inuamona, Jusiñamui omoína canoite. Omoína uñnocana jaitaite. “Jusiñamui rafuena uñnoticue” raitimiedi inoñenia, Jusiñamui naimiena faifitaite.

Jesús dibeimo itinona ñaia rafue

(Mt 12.46-50; Mr 3.31-35)

¹⁹ Cominina Jesús nia llofuia, naimie dine Jesús ei, ie amatiai diga bitimaci; ia ailluena comini illa jira, naimiemo riñedimaci.

²⁰ Nainomo itino naimiemo llote:

—O ei, o amatiai diga jino naidaidimaci. O diga ñaiacadimaci.

²¹ Jesús uai ote:

—Jusiñamui uaina cacajamona, iena inotino ieca cue eidi, cue amatiaidi.

Jesúsdi jorai baguana llúcaitaja rafue

(Mt 8.23-27; Mr 4.35-41)

²² Jiairuido botemo Jesús jailla mei, ie llofueoicaganomo llote:

—Ruica dibeimo mai cai jailli. —Ie mei jaidimaci.

²³ Naimaci jaidemo, Jesús inide. Bai jaidimacimo, eo riire aifi bite. Baguamona botemo jinui a uaide. Oruiacana jira, eo jacinaitimaci.

²⁴ Jesúsna casitajano, naimiena raitimaci:

—Maestro, jai buisaidicai. Jai corobaisaidicai.

Naimie casillano, aifina lletade. Joraina llúcaitade. Ieconí aifi llúcaide. Bagoñede.

²⁵ Naimacimo jicanote:

—¿Bue ñellena cuena inoñedomoi? —Naimiena jacinailamona uai oñedimaci. Raijicaillamona, coniniri ñaitimaci:

—Bimiedi, ¿nie isoidimie? Aifi naimie uaina inote. Jorai naimie uaina jiai inote.

Jesúsdi Gadara railla eniruemo illa rafue

(Mt 8.28-34; Mr 5.1-20)

²⁶ Ruica dibellemo ridemo, Gadara railla eniruemo sijidimaci. Galilea facaisemo ite.

²⁷⁻²⁹ Botemona ari Jesús jaidemo, damie Jesús dine bite. Naie nairai imie. Janaba anamo illamie. Taimiena jai jaicaisoide. Jofomo naimie irainide; ia comini raoillanomo nofie moto ifuaímo i-isoide. Ebena cominina naimie faei raillanona, lloeo diga ie onollidi maiga. Ie eilli jiai maiga; iadedi lloeo oni ticonote. Ie mei jofue inenanomo Janaba naimiena jaitate. Iese suisoide.

Jesúna naimie ciuanona, cuirioide. Jesús ecimo uaide. Janaba naimiena ado llotatate:

—Jesús, nanoca Jusiñamui Jitodio. ¿Niese cuena nibaiacadio? Cuena duere finoñeno.

Iese raite, Janaba naie iimamona oni jai oretajana Jesús llua jira.

³⁰ Jesús naimiemo jicanote:

—¿O mamaci bu?

Uai ote:

—Aillosiedicai. —Ailluena jananiai naimie ecimo illa jira, iese naimiedi raite.

³¹ Jesúmo duere jicanoside, iraimo naimacina nia oretañellena.

³² Naie facaise nainomo ite anedumo ailluena chanchuai itimaci. Chanchuai abimo naimaci jaillena Jesúmo duere jicanotimaci. Jesús dinena:

—Jee —raite.

³³ Ieconí iimamona jaidemo, chanchuai abimo jaidimaci. Iena suidemo, iconi jillacimo joraimo chanchuai aisidimaci. Dinomo corobaiside.

³⁴ Iena ciuanona, chanchuai sedaraini naimaci nairai dine aisicana jaidimaci. Naie rafuena llocana jaidimaci.

³⁵ Ie jira diga comini jaide, naie rafuena raise fidillena. Jesús dine naimaci ridemo, jaive Janaba anamo illamiena Jesús ecimo raillana ciodimaci. Naimie iniroina jai jitade. Naimie jai uairicoñede. Iena ciuanona, Jesúsna jaciruitimaci.

³⁶ Naie rafuena ciodinodi como bitinomo naimie jilluana llotimaci.

³⁷ Naimiena naimaci jaciruillanona, naimacimona oni jaillena nana naie eniruemo ite nairaidi Jesúmo jicanotimaci. Ie jira botemo Jesús jaide, ruica díbeimo abido jaillena.

³⁸ Ieconí jaive Janaba anamo illamie Jusúmo jicanote, naimie diga jaillena; iadedi Jesús raite:

—Dama ite.

³⁹ Mai o jofomo o jai. Nainomo itinomo nana Jusiñamui omo finoca rafuena llono.

Ie mei jaide. Nana naimie nairaimo Jesús naimiemo finoca rafuena llocana jaide.

Jesúdi mena duide riñona jillotaja rafue

(Mt 9.18-26; Mr 5.21-43)

⁴⁰ Ruica díbeimo Jesús abido ria, naimie abido billemo naimaci ocurilla jira, ailluena comini naimiena feiñotimaci.

⁴¹ Jairona mameciredimiedi Jesús dine bite. Naimiedi judíuai rafue ofiraco sedaraima. Jesúmo duere jicanollena, ana bitadate. Naimie jofomo Jesús billena duere jicanote.

⁴² Dañaiñode ie jisa. Doce años naiñaiñodi ite. Niadedi fiodiaicade. Ie jira Jesúmo jicanuai bite. Iena cacajano, naimie diga Jesús jaide. Ie llofueoicaigano jiai jaidimaci. Jesús jaillano, diga comini naimiemo ñajisaside.

⁴³ Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. Naiñaiño jaca buna jillotanide.

⁴⁴ Jinafo dinena billanona, Jesús iniroi fueda jetade. Iemona diailladi fainocaide. Jillode.

⁴⁵ Jesús dinena jicanote:

—¿Bu cuena jetade?

Naimie ecimo ite comini uai otimaci:

—Ona jetañedicai.

Ie nabaiñiai diga Pedro dinena raite:

—Maestro, ailluena comini o ecimo jaidimaci. Omo ñajidimaci.

46 Jesús uai ote:

—Damie cuena jetade. Cue abimona cue uai jaillamona, naimie jai jillode.

47 Jaive duidiñaiñodi Jesús naiñaiñona uñuana uñote. Ie jira Jesús dine jaciruicana bite. Naimie uicomo ana bitadajanona, nana comini uicomo naimiena jetaja rafuena llote. Naiñaiño ieconi jilluana llote.

48 Jesús dinena naiñaiñona raite:

—Ñoo, cuena o ñnua jira, jai jillodio. Mai jaillanona, uri o i.

49 Naiñaiño diga Jesús nia ñaitemo, Jairo jofomona damie bite. Jairomo llote:

—O jisa jai fiodaite. Maestrona ñaidoñeno.

50 Iena Jesús cacajano raite:

—O comeci jarire iñeno; ia cuena nia ñno. Naiñaiño jilloite.

51 Jairo jofomo naimaci rillano, ailluena comini naimie diga fo jaillana rairuide. Dani diese fo jaillana jitaide: Pedro, Jacobo, Juan, nai jitaibici moo, naiñaiño ei. Jaca diese fo illana jitaide.

52 Nana nainomo itino eecuinaidimaci. Faillinaidimaci. Jesús dinena raite:

—Omoi eeñeno. Cuemona naiñaiñodi fiodañedesa. Jamai inide.

53 Jai fiodaite: “¿Bue ñelli inide raitio?” raillanona jaisitimaci.

54 Jesús fo jailla mei, naiñaiño onollina llinocaida, raite:

—Jitaibici, mai naidacai.

55 Ieconi naiñaiño joreño abido bite. Naidacaide. Jesús llote:

—Guillena naiñaiñona eca.

56 —Naiñaiño moo, ie ei diga, rajicaidiaimaia. Jesús iaiaimaiaimo llote:

—Bie rafuena bumoo lloñeno.

9

Jesúdi ie llofueoicaiganona oretaja rafue (Mt 10.5-15; Mr 6.7-13)

1 Ie doce llofueoicaiganona naimie dine Jesús uaiduanona, naimacimo ie uaina iñonocaide, jananiaina anamona cominina jilloitallena. Duicuaína oni oretallena, iena jai iñonocaide.

2 Naimacimo llote:

—Omoi jaillanona, cominimo llono: “Jusiñamui facaina jaiie lloraini micoriai llogamie jai bene ite. Naimie anamo omoi illana Jusiñamui jitailla jira, naimie dibeimo omoi comeciai iuaina meido”. Duidinona jillota.

3 Omoi jaia, buena uñeno. Omoi abina riidollena, jiguidana uñeno. Ailluena rana omoi uñellena, bolsana uñeno. Llomenicono uñeno. Ucubena uñeno. Guille ifo meidollena, rana uñeno. Meidolle iniroina uñeno.

4 Nie nairaimo omoi jaia, daacomo omoi ri. Naie nairaimo omoi ille dinori, daacomo omoi i.

5 Omoína comini feiñoñenia, naimaci nairaimona omoi jaia, omoi eilliaimo ite jearacuaina oni jaidino. Nicino naimacimo illana naimaci uñollena, omoi eilliaína oni jaidino.

6 Jesús naimacimo llua mei, jaidimaci. Jusiñamui rafuena lluanona, diga nairaimo jaidimaci. Diga comini imaci duicomona jillotatimaci.

Juan Bautista micori fiodailla rafue (Mt 14.1-12; Mr 6.14-29)

7 Naie facaise Herodes railla gobernador nana Jesús finoca rafuena fidide. “Fiodaillamona Juan Bautista micori jai jillode” dajerie railla jira, ie comeci uri iñede.

8 Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraima micori jai jillode.

⁹ Jesúna fidiano, Herodes comeci uri iñede. Comecina facade: “Juan micori ie ifogina navui jaitataticue. Ie muidona ¿birui bu ie rafuena fididicue?” Raise uñollena, Jesúna cioacade.

*Jesús cinco mil iññiaina ecaja rafue
(Mt 14.13-21; Mr 6.30-44; Jn 6.1-14)*

¹⁰ Jesús llofueoicaigano abido bia, Jesúsno naimaci finoca rafuena llotimaci. Ie mei dani ie llofueoicaigano diga Jesús Betsaida railla nairai dine jaide;

¹¹ iadedi comini iena fidianona, naimiena racadimaci. Naimie dine naimaci rilla mei, naimacina feñuanona, naimie anamo comini illana Jusiñamui jitailla jira, Jesúsdi Jusiñamui dibeimo naimaci comeciai iuaina meiduaana llofue. Duidinona jiai jillotate.

¹² Jitoma ana itemo, ie doce llofueoicaigano naimie dine billanona, raitimaci:

—Jofue bene iñede. Bene jaca buedi iñede. Ianori ite nairaiaimo, ianori ite jofuemo naimaci inillena, naimaci guille ollena, bie cominina abido oreta.

¹³ Jesús uai ote:

—Naimacina bene eca.

Uai onaisite:

—Dani caimo ite cinco llomenico mena lliciai diga. Nana naimaci guillena, ¿guille cai iballena nibai jitaideo?

¹⁴ Cinco mil iññiaino nainomo illa jira, ailluena guille jitaillana uñotimaci. Naimaci ainiai, imaci uruijai diga, jiai itimaci. Ie llofueoicaiganomo Jesús lote:

—Comini ana raillesa llono. Cincuenta digamierie ana imaci raillesa llono.

¹⁵ Iena finodimaci.

¹⁶ Naie cinco llomenicono, naie mena lliciai diga Jesús uanona, monamo eruailanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena.

¹⁷ Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci.

*Pedro Jesúna llua rafue
(Mt 16.13-19; Mr 8.27-29)*

¹⁸ Jiairuido Jesús ie Moomo jiaa facaiseconi, ie llofueoicaigano naimie diga illanona, naimacimo jicanote:

—¿Niese cominidi cuena raitimaci?

¹⁹ Uai otimaci:

—Damierie raitimaci: “Juan Bautista micoridio”. Damierie raitimaci: “Odi Elíadio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

²⁰ Jesús naimacimo jicanote:

—¿Niese omoi cuena raitomoi?

Pedro uai ote:

—Odi cai jilloitaraimadio. Jusiñamui facaina lloraini micoriai o billena jaie llotimaci. Jusiñamui ona orede.

*Jesús ie fiodaillena llofuia rafue
(Mt 16.20-28; Mr 8.30-9.1)*

²¹ Jesús naimaci como llogacino bumo lluana rairuide.

²² Llote:

—Cai judíuai illaicomini cuena eo duere fnoitimaci. Cuena jitaiñellemona, cuena meineitimaci; iadedi darui amani illanona, fodaillamona jilloiticue.

²³ Nana ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaita. Nibai naiemona fodaite. Bu iese jaiacania, cue dibeimo naimie iite.

²⁴ Duere sefuillana jaciruillamona cue cominina bu jaiacaiñenia, ja mudimo faifite; iadedi duere sefuillana jaciruiñenamona cue cominina bu jaiia, jaca faifñeite.

²⁵ Cue cominina bu jaiñenia, nibai eo duere sefuiñeite. Nibai aillena ra naimiemo iite; ia, ¿niese cue Moo dine riite? Nainomo naimie riñeno faifite.

²⁶ Cuena bu meiruaia, cue uaina bu meiruaia, dane cue bia, naimiena meiruiticue. Cuena meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisai siño uai isoi illanona, cue Moo dinena monamona ico biiticue. Cue Moo uai cuemo illanona, ebire biiticue.

²⁷ Uanaicinona omoimo lloticue. Omoimona dajerie nia fiodaiñeitomoimo, illaimana cue bairellena cioitomoio.

Jesús abí meidocaila rafue

(Mt 17.1-8; Mr 9.2-8)

²⁸ Ocho digarui illanona, Jusiñamuimo jiiillena, anedumo Jesús jaide. Naimie diga jaillena, Pedrona uite. Juan jiai uite. Jacobona jiai uite. Jiaie llofueoicaiganona uiñede.

²⁹ Naimie jiiamona naimie abí meidocaide. Naimie iniroi naie dacaño eo userecaide.

³⁰ Ieconí menamie bairiano, Jesús diga ñaitiaimaiai. Moisés micorí joreño ite. Elías jiai ite.

³¹ Ebire bairediaimaiai. Jesús Jerusalémo fiodaille rafuena ñaitimaci.

³² Ie facaiseconí Pedro ie nabaiñiai diga jai inidimaci; ia casillamona, Jesús ebirenana ciodimaci. Jesús ecimo itiaimaiaina jiai ciodimaci.

³³ Iaimaiai jaiacania, Pedro Jesúsomo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micorí ie, jiaie Elías ie. —Iese raite; ia ie ñaia rafuena raise uiñoño jamai ebena ñaite.

³⁴ Iena naimie nia lluanona, uillie billamona, naimacina ibaide. Uillie ibaibillaconí jacinaitimaci.

³⁵ Uilliemona Jusiñamui naimacimo llote:

—Bimiedi cue Jito. Naimiena fetodicue, cue jitaille rafue finollena. Naimie lluaña omoi cacareillanona, iena iino —llote.

³⁶ Jusiñamui llua mei, dama Jesúsna dane ciodimaci. Jesús diga itino naimaci cúa rafuena naie facaiseconí jaca bumo lloñedimaci.

Jesúsí Janaba anamo itimiena jillotaja rafue

(Mt 17.14-21; Mr 9.14-29)

³⁷ Ie areruido anedumona ana bitimacimo, ailluena comini naimacimo dafaifide.

³⁸ Cominimona damie ado llote:

—Maestro, cue dajede cue jito duillana jibuisaibi.

³⁹ Janaba naimie anamo illamona, cue jito cuiritate. Cue jitona naillitacabite. Iemona ie fue mullecabide. Naimiena bofedaicabite. Naimiemona oni jaiacaiñede.

40 Janabana oni oretallena, o llofueoicaiganomo jıcanoticue; ia oretanıdımacı.

41 İena cacajanona, Jesús ie llofueoicaiganomo llote:

—Cue uai sıñonana nia #noñedomoi. Cue mare rafuedo nia raise jaiacaiñedomoi. Omoi diga are iticue. Raise omoi #nollena, ¿nie dinori omoi diga iticue? —Naie duidimie moomo llote—, O jito cue dine mai atı.

42 Naie urue billano, Janaba naimiena enıruemo ana dotade. Naimiena naillitate; ia oni jaillena Jesús Janabana lletade. İeconı naie urue jillode. İemei Jesús ie moomo naimiena fecade.

43 Comıni İena cıuanona, Jusiñamui sıño uai naimiemo ilları rajıcaıdımacı.

Jesús ie fiodaillena dane llofuia rafue

(Mt 17.22-23; Mr 9.30-32)

Naimacı nıa rajıcaıa, Jesús ie llofueoicaiganomo llote:

44 —Cue lluana feitañeno. Monamona billanona, iımana jaidicue; ia Jusiñamui jitaılla jıra, jııruıdo illacıcomıni cuena meıneıtımacı.

45 Jesús lluana raise cacaiñedımacı. Naimie İena llofueñena jıra, İena raise uıñoñedımacı. Naimiemo İena jıcanuana jııı meıruıtımacı.

Jesús ie llofueoicaigano moto imienna ille rafue

(Mt 18.1-5; Mr 9.33-37)

46 İe facaise Jesús llofueoicaigano conıni uaitajanona raitımacı:

—¿Bu caı moto imienna ille?

47 Jesús naimacı comecıaı facajacınona uıñuamona, nainomo İte comınımona daje urue bı jainanocaida, naimacı motomo naimiena jonete.

48 Raite:

—Comıni dınena bıe urue jamai bue isoıde; ia bıe isoıdımie cuemo duıllamona, naimiena feiñotımıedi cuena jai feiñote. Jusiñamui cuena oretaja jıra, cuena feiñotımıe Jusiñamuına jııı jai feiñote. Jamai bue isoıdımıedi omoi moto imienna ille.

Jesúdı ie dıbeımo itınona llua rafue

(Mr 9.38-40)

49 Naie facaise ie llofueoicaiganomona Jesúsımo Juan llote:

—Maestro, o mamecido jananiaina oretacabitımienna cıodıcaı. Caı diga naimie jıacabiñena jıra, İena fınuana rıruıdıcaı.

50 Jesús dınena uai ote:

—Naimiena rıruıñeno. Caı dıbeımo itımıedi caı facaisena İte. İe jıra naimie isoıdınona rıruıñeno.

Jesús dınena Jacobo, Juan iaımaıaı lletaja rafue

51 Monamo abıdo Jesús jaıllıruı İaireı İa, İerusalémo jaiacanamo naimie comecına facade.

52 İe jıra dajerienna uıcodı oretate. İe İııllınona İenollena, Samarıa raılla nıraıımo jaidımacı;

53 İadedı İerusalémo naimacı jaılla jıra, judııııñedınona samarıtanodı gaıñena jıra, Jesús llofueoicaıganona feiñoıacıñedımacı.

54 İena fıdıanona, Jacobo, Juan diga, Jesúsımo jıcanotııımaıaı:

—Nama, ¿bıe comıni jobaıllena, monamona İrıı billena Jusiñamuımo coco jıcanuana jıtadıo?

55 İaımaıaımo eruııllanona, Jesús dınena İaımaıaıımo rııre lletade:

—Dama İte. İena jıtadıedıcue.

56 İe meı İıllena jıııe İıllanomo jaidımacı.

Jesús ie llofuegamiena damie jaillena ie rafue

(Mt 8.19-22)

⁵⁷ Naisona ie llofuecaigano diga, Jesús oni jaillanona, Jesúmo damie llote:
—O jaillinomo o diga jaiacadícue. O llofuegamiena jaiacadícue.

⁵⁸ Jesús uai ote:

—Janorede ocainaiáidi joforedimaci. Silliñiai jillainiáiredimaci; iadedi jofonidícue. Monamona billanona, imana jaidícue; iadedi buenidícue. Jofonidícue. Cue diga o jaiacania, bue isoidena cuemona oñeitío. Iemo o comecina raise faca.

⁵⁹ Jiaimíemo Jesús llote:

—Cue llofuegamiena o jaillena, cue diga mai bi.

Naimie uai ote:

—O diga jaitícue; ia cue moo nia fiodañena jira, o diga nia jaiñeitícue.

⁶⁰ Jesús naimíemo dane llote:

—Dama ite. Cue diga mai bi. Cuena inoñedinodi o moona canoredimaci. Naimie fiodaia, naimiena naimaci raiile. Cue rafue jiaie rafue baifemo faite. Naimie anamo comini illana Jusiñamui jitailla jira, naimie díbeimo naimaci comeciai iuaina meiduaana llocana cue diga mai o bi.

⁶¹ Jiaimie Jesúmo llote:

—O llofuegamiena jaiacadícue: iadedi cue jofomo nano jaiacadícue, cue cominina facadollena.

⁶² Jesús uai ote:

—Cue llogamiena jaiacania, jiaie ramo naimie comecina eo facañena. Jiaie ramo naimie comecina eo facaia, Jusiñamui facaina raise majinide.

10

Ie rafuena lollena, Jesús setenta digamiena oretaja rafue

¹ Ie llofueganona llofuia mei, naimacimona Jesús setenta digamiena fetode. Naga naimie jaiacana nairaiáimo menamieriena oretate.

² Naimacimo llote:

—Diga comini ite, naimacina Jusiñamui rafuena inotallena; iadedi eo janore lloraini ite. Jusiñamui mo jicano, jiaie llorainina naimie oretallena.

³ Mai jai; iadedi abi rairuicana jai. Toica llaudaiaí janallari illanomo illa isoi, omoína oredícue.

⁴ Ucubena uiñeno. Ailluena rana omoi uiñellena, bolsana uiñeno. Meidolle zapatona uiñeno. Naisomo bu omoímo dafaiífa, are ñaiñeno.

⁵ Bu ie jofomo omoi ria, jofomo itinomo marena uaido.

⁶ Nainomo maremie ia, o uaina fairioite. Maremie iñenia, o uaina fairioñenia: “Jusiñamui ona canoite” naimíemo lloñeno.

⁷ Nie nairaimo omoi ria, daacomo omoi ri. Omoi ecalle rana guiño. Cue facaina omoi majia jira, comini omoína ecajia, cue facaina omoi majia facaina omoi guiño. Naga jofomo guicana jaiñeno.

⁸ Nie nairai omoi ria, omoína naimaci feiñoia, omoi ecalle rana uaitañeno guiño.

⁹ Duidinona jillota. Nainomo itinomo llono: “Naimie anamo omoi illana Jusiñamui jitailla jira, naimie díbeimo omoi comeciai iuaina meido”.

¹⁰ Nie nairaimo omoi ria, omoína naimaci feiñoñenia, ie naiso motomo jaillanona llono:

¹¹ “Omoi naisomo cai eillimo ite jearacuai jai jaidinoticaí, marañede rafue omoímo illana omoi uiñollena. Jusiñamui omoína sedaacade; ia iena jitañedomoi” llono.

¹² Sodoma nairai jaie eo marañede. Jusiñamui iena jaie fuidode; ia nana comini naimie uicomo ico ia, Jusiñamuidi omoina feiñoñedinona Sodoma railla nairai baifemo duere finoite.

*Jesús ie ñnoñedinona llua rafue
(Mt 11.20-24)*

¹³ Ie fetocanomo Jesús nia llote:

—Corazín railla illanomo navui iticue. Betsaida railla illanomo navui jiai iticue. Naimaci dine diga siño rafuena finodicue; iadedi ñnoñedimaci. Ico duere sefuitimaci. Tiro railla nairaimo, Sidón railla nairaimo naie isoide siño rafuena finodicuena, naimaci comeciai eo isinotailamona, naimaci comeciai uai meidotimaci. Naimaci comeciai uai meiduana jiaie comini uifnotallena, ebinide iniroina jitajanona, jusefo naimaci ifogiaimo jonetimaci.

¹⁴ Jusiñamui uicomo nana comini ico ia, Corazímo itino Tiro nairai baifemo duere sefuitimaci. Sidón nairai baifemo duere sefuitimaci.

¹⁵ Capernaumo itino jiai duere sefuitimaci. Birui abina iedoiacadimaci; iadedi jiairuido sure iitimaci. Monamo cue Moo diga jaca iñeitimaci; iadedi naimie naimacina duere finollemona, sure iitimaci.

¹⁶ Omoi lluana naimaci cacaacania, cuena cacadimaci. Omoi lluana naimaci jitaiñenia, cuena jitaiñedimaci. Cuena jitaiñedinodi cuena ore-tagamiena jiai jitaiñedimaci. —Jesús naie fetocanomo iese llua mei, oni jaidimaci.

Ie setenta fetocano abido billa rafue

¹⁷ Jiairuido Jesús ie setenta fetocano abido caimare bitimaci. Raitimaci:

—Nama, o facaido cominimona jananiaina oni oredicai.

¹⁸ Jesús naimacimo llote:

—Monamona Taife borilla isoi jaie ana dotajana cidodicue. Iemona cue uai naimie uai baifemo faiana uifnoticue.

¹⁹ Jaiomona ramo omoi jiriñena uai omoimo jai itataticue. Acaiduaimona ramo omoi jiriñena uai omoimo jiai jai itataticue. Nana cue dibeimo iñedino omoi anamo jai itataticue. Omoina niese nibañeitimaci;

²⁰ iadedi omoi uaina jananiai ñnua jira, iobiñeno; iadedi Jusiñamui cominina omoi illamona, omoi mameciai monamo Jusiñamui rabenicomo jai cuiamo iobi.

*Jesús ie Moo diga ñaia rafue
(Mt 11.25-27; 13.16-17)*

²¹ Ie facaiseconi ie Moo Joreño naimiemo illa jira, Jesús iobide. Raite:

—Ore Moo, oca mona Namadio. Oca enirue Namadio. Abina uifnotinona bie isoide rafuena uifnotañedio; iadedi jamai bue isoidinona iena uifnotadio. O jitailla jira, iese uifnotadio. Ie jira iobillacinona omo fecaacadicue. Mai.

²² Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uifnote. Dama cue Moona raise uifnoticue. Cue jitaillie diese omoina naimiema uifnotadicue. Ie muidona naimiema uifnotomoi.

²³ Ie llofueoicaigano diga eneno ia, naimacimo llote:

—Cue finoca rafuena omoi ciua jira, ni ua omoi marena illino jillaci.

²⁴ Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie ñnotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

Jesús cai ecimo itimiema isiruillana llua rafue

²⁵ Jesús ecimo itinomona Moisés micori llogacínuaína llofueraimadi Jesúna facaciano, naimiemo jicanote:

—Maestro, Jusiñamui illanomo jaca cue illena, ¿bue finoiticue?

²⁶ Jesús uai ote:

—¿Niese Moisés micori llogacínuaí iena raite?

²⁷ Uai ote:

—Moisés micori jaie cuega: “O jitailla jira, o comecina facajamona, cai Nama Jusiñamuina nana o comeci jitaillamona naimiēna eo isirui. O abina o isiruilla isoi, o ecimo itinona isirui”.

²⁸ Jesús dinena raite:

—Marena cue uai otio. Iena o finoía, Jusiñamui illanomo jaca iitio.

²⁹ Naie llofueraima Jesúmo dane jicanote:

—¿Bu cue ecimo itino?

³⁰ Jesús uai ote:

—Jiaie rafuedo iena omo lloiticue. Jerusalémona Jericómo damie jaide. Naimie jaillano fiiredino naimie dine bitimaci. Ie iniroina bairosite. Naimiēna fatimaci. Niade ie meinianona ie ecimona jaisite.

³¹ Dallu illanona, Jusiñamui diga ñairaima naie ñaisona jaide. Fagamiena cide; iadedi ecido jaide.

³² Dallu illanona, Jusiñamui jofomo maijiraíma jiaí jaide. Fagamiena ciuanona, ecido jiaí jaide.

³³ Ja muidomo Samaria nairai imie jaide. Naie nairaina enoidomoi. Fagamiena naimie ciuanona, naimiēna duenaitie. Iemona naimie canoacade.

³⁴ Naimie dine jaillano, ie bofellañona manode. Jiaí maítade. Ie burro emodomo jonecaida, naimiēna uite. Inillinomo rilla mei, nainomo naimiēna sedade.

³⁵ Ie areruido ie inia jofo namamo janore ucubena fecade. Raite: “Naimiēna seda. Naimie facaina jiaie rana o oia, abido cue bia, iena ibaiticue”. Ie mei oni jaide.

³⁶ —Naie llofueraimamo Jesús dinena jicanote— ¿Fagamie ecimo itimiedi bu?

³⁷ Uai ote:

—Fagamiena duenaitimie.

Jesús raite:

—Jai raise uiñotio. Mai jai. Ie isoi finocana o jai.

Jesúdi Marta iaíñuaí María jofomo illa rafue

³⁸ Nia macaritimacimo, comini illanomo Jesús ie llofueoicaigano diga ridimaci. Marta raillañaiño ie jofomo naimiēna feiñote.

³⁹ Naiñaiño euiñodi María. Jesús ecimo llaribamo María ana raide, naimie llofuiacinona cacarellena;

⁴⁰ iadedi Martamo maijille eo illa jira, naiñaiño naimie llofuiacinona cacareñiede. Ie jira Jesúmo llote:

—Nama, cue euiño cuena canoacaiñena jira, daño maijidicue. “O euiñona cano” naiñaiñomo llono.

⁴¹ Jesús uai ote:

—Ero, Marta, jarire itio. Diga o ramo comecina facadio; ia Jusiñamui rafuemo comecina faca.

⁴² María iemo comecina jai facade. Naiñaiño cue llofuiana nano cacaia-cade. Ona canollena naiñaiñomo lloñeiticue.

11

*Jusiñamuimo Jesús jüia rafue
(Mt 6.9-15; 7.7-11)*

¹ Jiairuido ie Moo diga Jesús ñaia, ie llofueganomona damie naimiemo llote:
—Nama, jüiana caina llofue, ie llofueoicaiganona Juan Bautista micori llofuia isoi.

² Jesús uai ote:

—Omoi jüia, iese omoi jüi:

Ore Moo, comini ori iobidesa.

O illaimana jira, nana cominina o anamo raire itata.

O jaienisaí o jitaillacinona finua isoi, cominina o jitaillacinona finota.

³ Nagarui guille caimo itata.

⁴ Caina jeare jüino finoa, iena caimona feilla isoi, cai jeacinona omona feilla jira, cai jeacinona oni dota.

Caina ramo bu faia, caina cano, iena cai üinoñellena.

⁵ Iena naimacina nia llofuellena, Jesús jüaie rafuena llote:

—Ñaiona mona moto llomenicono jicallena, o nabai dine o jaia, ado lloitio: “Nabai, daje amani llomenicono jitaídícue.

⁶ Jüaie nabai cue jofomo como ride. Jaca cuemo buedi iñede, naimiena cue ecallena”.

⁷ Ie jofo jeraimona o nabai fairioite: “Cuena uaidoñeno. Cue nasedí jai cue ibaicasa. Cue uruiaí jai inidimaci. Jüaí inidícue. Llomenicono omo fecallena casiacañedícue”.

⁸ Ja muidomo casillano, omo iena fecaite. Ie nabaina o illa jira, fecañeite; iadedí o eo jitailla jira, o jitaillé rana fecaite.

⁹⁻¹⁰ Daje ra omoi faíña, iena jenodomoí. Raise jenoia, iena baitomoí. Damiena omoi jenoia, naimie illanomo jaidomoí. Nainomo naimiena bail-lamona, omoína feiñoite. Ie isoide. Buena omoi jitaia, Jusiñamuimo jica. Iena omoi jicaja jira, iena naimie cacajamona, omoímo iite.

¹¹ 'Ero, omoímona ie moomo llomenicono ie jito jicaia, noficina fecañede. Lliciaína jicaia, jaiona fecañede.

¹² Jígina jicaia, acaidona fecañede.

¹³ Jeacinona finocabidomoí; iadedí omoi uruiaímo mare rana fecacabil-lana uñotomoí. Cai Moo Jusiñamui jaca mareuidimie. Cai baifemo naimie faite. Ie muidomo naimacina canollena, naimiemo jicadinomo ie Joreñaona itataite.

*Comini Jesúna jeare ñaia rafue
(Mt 12.22-30; Mr 3.19-27)*

¹⁴ Jiairuido Janaba anamo illamiemona Jesús Janabana oni orede. Janabana nia oreñaenia, Janaba anamo naimie illamona, naie üima ñainide. Janaba oni jailla mei, naimie ñaite. Ie jira comini rajicaídímaci;

¹⁵ iadedí dajerie raitimaci:

—Beelzebú anamo bimie illamona, Beelzebú uaido jananiaina oni orede —raitimaci. Beelzebúdí Janaba comini.

¹⁶ Jüaíno naimiena facaciacasite. Raitimaci:

—Siño uai omo ia, Jusiñamuina siño rafuena finota.

¹⁷ Naimaci comeciaina Jesús uñua jira, naimacimo llote:

—Daje isoi comeciaina lloillamo daje nairai facañenia, danomo maijínidímaci. Oni jaidímaci. Daje isoi comeciaina lloillamo daje jofomo itino facañenia, danomo jainaiínidímaci. Oni jaidímaci.

¹⁸ Ie isoide. Beelzebú uaido jananiaina, omoi llua isoi, cue oretaia, Janaba ie dibeimo itino diga jai nabairiñede. Iemona naimie comini danomo iñeitimaci.

¹⁹ Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uñollena. Iemei cue finoca rafuena uaitañeitomoi.

²⁰⁻²² Jiaie rafuedo iena lloiticue. Ero, ie rana raise riiduamona, mañridimie ie rana raise enoite. Ie jofomo ie ra illanona, iena raise sedaita. Jamai bue isoidimie ie rana finide; iadedi naimie baifemo mañridimie bia, naimiena emodofillamona, ie rana fiirede. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui uaido jananiaina cue oretaia, Jusiñamui rafuena cue llua uñotomoi.

²³ 'Cue dibeimo iñedimie cuena enoide. Cue dibeimo cominina itañedimiedi naie cominina cuena iñotañede.

Janaba anamo illamie rafue

(Mt 12.43-45)

²⁴ Jesús naimacimo nia llote:

—Birui bene ite marañede cominidi Janaba anamo illamie isoidimaci. Naimiemona Janaba oni jiaie illanona baillena, jofue iñenanomo jaide; iade baiñede. Baiñena jira, naimie comecina facade: “Navui cue anamo illamie dine abido jaiticue”.

²⁵ Abido naimie bia, naie iima comeci namanidena naimie baite.

²⁶ Iemei oni jaillanona, jiaie siete jananiaina naimie diga atide, naimaci anamo naie iima illena. Naie siete jananiaina naimie baifemo marañedimaci. Iemona naie iima eo fodo jaide. Ie isoide birui ite marañede comini. Cue rafue naimaci iñonñenia, eo fodo jaitimaci.

Daje riño Jesús eina marena ñaia rafue

²⁷ Cominimo Jesús llotemo, comini motomona dañaiño Jesúmo llote:

—O ei caimare illesa. Naiñaiñomona comuidio. Naiñaiño monoi jirodio. Naiñaiño caimare illesa.

²⁸ Jesús uai ote:

—Marena llotio; ia Jusiñamui uaina naimaci cacajamona, iena iñnuamona, jiaino eo caimare iitimaci.

Dajerie Jesús siño rafuena finuana jitailla rafue

(Mt 12.38-42; Mr 8.12)

²⁹ Ie facaise diga comini Jesús dine biñoidimaci. Naimacimo llote:

—Birui ite cominidomoi marañedomoi. Siño rafuena cue finuana cioacadomoi; iadedi iena omoi jamai cioillena, siño rafuena finofñeiticue. Ero, Jonás micori jaie ite rafuena uñotomoi. Naiemo omoi comeciaina omoi faca.

³⁰ Naimiemo suide rafuemona Nínive railla nairaidi Jusiñamui naimiena oretajana jaie uñotimaci. Ie isoide. Fiodaillamona cue jilluamona birui ite cominidi Jusiñamui cuena oretajana uñoitimaci.

³¹ Ero, Saba railla nairai ie illaiño micoridi Salomón micori dine jaie aarena jaide. Naimie micori uñuacinona naiñaiño micori cacareillena, aarena jaide. Salomón micori baifemo birui uaidicue; iadedi cuena iñonñedomoi. Omoi comeci iñuainana birui omoi meidoñena jira, Jusiñamui uicomo nana comini ille facaiseconi naiñaiño micori omoina ico ñaite: “Naimiedi siño rafue finuana ciodomoi. ¿Bue ñellena naimiena iñonñedomoi?” omoina ico ñaite.

³² Lliciaí jeraimona naimie jillua mei, Nínive railla nairai dine Jonás micori jaide. Nainomo Jusiñamui rafuena llote. Naie comini iena cacajano, naimaci comeciaí icinuaina meidotimaci. Cue rafuena omoi cacajamona, omoi comeciaí icinuaina birui omoi meidoñena jira, Jusiñamui uicomo ico nana comini ille facaisecon: “Cue cominidomoi” omoína raiñeiticue. Jonás micori baifemo birui uaidicue; iadedi cuena iñoñedomoi.

Jesús comini illa rafue
(Mt 5.15; 6.22-23)

³³ Jesús llote:

—Lamparín bu unia mei, jofo anamo bainino rainañega. Cirigai anamo rainañega. Ie rairanomo rainaca, comini nainomo bia, jofo jerai lligaiñollena.

³⁴ Omoi uisi diga rana cidomoi. Omoi uisi marañenia, rana raise cioñedomoi. Ie isoide. Omoi comeci marañenia, marañedicinona finocana jaidomoi. Jusiñamuina uñoñedomoi. Ie rafuena jiaí uñoñedomoi.

³⁵ Ie jira omoi comeciaina raise fino, cue rafuena omoi raise ñollena.

³⁶ Nana omoi comeciaí marena ia, cue rafuena iñocana jaitomoi. Iena raise uñoitomoi. Jofomo lamparín raise lligaiñua isoi, cue rafuena raise uñoitomoi.

Jesúdi judíuái illaí cominina ñaía rafue
(Mt 23.1-36; Mr 12.38-40; Lc 20.45-47)

³⁷ Cominina Jesús llofuia mei, daje fariseo imie naimie dine bite. Raite:

—Cue diga cue jofomo mai guisabi. —Jesús fairiua mei, naimie diga guisaide.

³⁸ Naimie nia guiñenia, naimaci einamaci llogacinodo naimie jaiñenamona, Jesús ie onollina jocoñede. Ie jira naie fariseo imie rajicaide. Ie comecina facade: “Naimie eo mare llofueraima. ¿Ñiese cai einamaci llogacinodo jaiñede?”

³⁹ Jesús naimiemo llote:

—Da platos jinafo, da pocillos jinafo jocodino isoidomoi. Da platos jerai, da pocillos jerai jocoñedino isoidomoi. Omoi abina finodomoi; iadedi omoi comeciaina finoñedomoi. Rana eo nicidotomoi. Omoi comeciaí jearede.

⁴⁰ Abi uñoñedomoi. Jusiñamui omoi abiaina omoi comeciaí diga finode. Omoi finoca rafuena uñote. Omoi comeciaina facajacinona jiaí uñote.

⁴¹ Omoi comeciaí marena ia, jiaie cominina canodomoi. Iemona Jusiñamuimona omoi abi jiaí mare.

⁴² Fariseuái, omoimo rafuena lloiticue. Nana omoi illimo ite ramona Jusiñamuimo janore jisa feca-fecacabidomoi; iadedi jiaie cominimo mare rafuena raise finoñedomoi. Jusiñamuina jiaí raise isiruiñedomoi. Nana naie isoide rafuena omoi jiaí finua.

⁴³ Comini omoiri acarillena, ofiracomo uicomo raiacadomoi. Nine omoi macaria: “Jamai bue isoñedicaí” omoi comeciaina facajamona, jiaie comini omoína uaiduana gaidomoi. Iese omoi jailla jira, Jusiñamui omoína duere finoite.

⁴⁴ “Bainino ite raiáfo emodomo comini uñoñoeno macarillamona, naimaci abi jai jearede” raitomoi. Bainino ite raiáfo isoidomoi. Omoi diga jiaie cominidi omoimo ite jeacinona uñoñoeno nabairillamona, jeacinona jiaí finodimaci. Iese omoi finocana jaia, Jusiñamui omoína duere finoite.

⁴⁵ Naie facaise Moisés llogacinuaina llofueraimona damie Jesúmo llote:

—Iese o lloia: “Jecino finodomoi” caína jiaí llotio.

⁴⁶ Jesús uai ote:

—Jusiñamuimona jiai duere sefuitomoi. Omoi einamací llogacínuaído raise naimací jaillena, diga rafue comíni finuana jítáidomoi; iadedi iedo naimací raise jaillena, naimacina jaca canoñedomoi. “Jusiñamuina eo raise sedadicaí” comecina facadomoi.

⁴⁷ Omoi jaíagaidi Jusiñamui facaina llorainina meinetimaci. Naie lloraini micoriai raíafuai birui marena finodomoi;

⁴⁸ iadedi naimací micoriai llogacínuaído omoi birui jiai jaíñena jira, omoi jaíagai finoca radi: “Mare” raitomoi. Jusiñamui rafuedo birui omoi raise jaíñena jira, omoi jaíagai isoi itomoi. Iese omoi jailla jira, Jusiñamui omoína duere finoite.

⁴⁹ Omoína Jusiñamui abí uíñuamona jai llote: “Cue rafuena lloñena, naimací ñine cue facaina llorainina oretaiticue. Cue rafuena eo uíñotínona jiai oretaiticue. Dajeriena meinetimaci. Jaiñona duere finoitimaci”.

⁵⁰ Enirue finua facaisemona ailluena Jusiñamui facaina llorainina meinetimaci. Omoimona Jusiñamui iba oite.

⁵¹ Abel micorí jaie ite. Ie ama naimiena meinete. Naimie facaisemona omoi jaíagaidi diga llorainina meinetimaci. Zacaríana jiai meinetimaci. Jusiñamui jofomo Jusiñamuimo toíca ocaina jobaisoillano motomo naimiena meinetimaci. Omoimona Jusiñamui birui iba oite.

⁵² Omoi llofuíamona comíni Jusiñamui rafuena uíñoñedimaci. Jusiñamui rafuena raise uíñoñedomoi. Jaiño iena raise uíñuana jítaíñedomoi. Iese omoi jailla jira, Jusiñamui omoína duere finoite.

⁵³ Fariseo jofomona Jesús jailla meí, fariseuai comíni icirillamona, Jesús mo diga rafuena jícanotimaci, naimie uaina uaitallena. Moisés micorí llogacino llofueraíni daje isoi uai uaitatimaci.

⁵⁴ Naimie raise uai oñedena, naimiena duere finoacadimaci.

12

Jesúdi mareuidínona abí caitadínona llofuía rafue

¹ Ie facaiseconí eo ailluena comíni Jesús ñine ofidimaci. Ailluena illa jira, coníni eilliaimo naidadatimaci. Ie llofueoicaiganomo Jesús llote:

—Fariseuai siritate ramona abína rairui. Biena ñaiticue. “Maredicaí” raitimaci; iadedi mareuidínona abí caitadimaci. Naimacimona abína rairui.

² Naimací biruí finoca rafuena biruí bainino finodimaci; ía Jusiñamui naimací comeciaí iticinona íco uíñotaite.

³ Ero, cue rafuena biruí anado llocana jaidomoi; ía íco marefodo iena llocana jaitomoi.

Jesúdi jacíruíñeno llofuía rafue (Mt 10.28-31)

⁴ Ie llofueganomo Jesús llote:

—Cue nabaiñiaídomoi. Omoína meineiacadínona jacíruíñeno. Omoi abína meineredimaci; íe iadedi omoi joreño meinenidimaci. Omoína naimací meinia, omoi joreño Jusiñamui ñine jaite. Iena uíñuamona, omoi meineiacadínona jacíruíñeno.

⁵ Cue rafuedo omoi raise jaíñenia, Jusiñamuina jacíruí. Omoi fiodailla meí, omoi abína omoi joreño diga iraimo íe dotalle uai naimiemo íte. Ie jira naimiena jacíruí.

⁶ Ero, dabecuiro janorede sillina fecadomoina, eo janore íbaca. Sillíñiaí eo janore raífide; iadedi Jusiñamui naimací illana uíñote.

⁷ Ero, niga ifotirai omoimo illana Jusiñamui jiaí uifnote. Naimiedi omoína sedajana jiaí uifnote. Silliñiaí baifemo Jusiñamui isiruigaomoi. Omoi duere finoacadinona jaciruiñeno. Jusiñamui jitañenia, omoimo jaca buena suiñeite.

Jesús naimiena janoñenana llofua rafue
(Mt 10.32-33; 12.32; 10.19-20)

⁸ Ie llofueoicaiganomo Jesús nia llote:

—Cue rafuena omoi lluamona, jiaíno omoína duere finoitimaci. Cuená birui omoi janoñenia, nana comini Jusiñamui jaienisaí uicomo íco ía, nainomo omoína janoñeiticue. “Cue cominidomoi” omoína raiticue.

⁹ Cuená birui omoi janoía, nana comini Jusiñamui jaienisaí uicomo íco ía, nainomo omoína janoiticue. “Cue cominiñedomoi” omoína raiticue.

¹⁰ Jusiñamuidi naga cuena jeare ñaitimie jeacinona feitarede; iadedi Jusiñamuidi íe Joreñoña jeare ñaitimie jeacinona feitañeite.

¹¹ Cue rafuena omoi llua muidona, duere sefuitomoi. Ilaicomini dine omoína llogidollena comini uia, omoi abí riidollicinomo omoi comeciaina jarire facañeno.

¹² Naie facaiseconi Jusiñamui Joreño omoi abí riidollicinona uifnotaite.

Jesúdi raruiáí eo uamona abí rairuillana llofua rafue

¹³ Nainomo ite cominimona damie Jesúmo llote:

—Maestro, cue moo jai fiodailla mei, cue ama doforamie cue facaina ite rana cuemo iacañede. Naimiemo llono, cuemo illena.

¹⁴ Jesús uai ote:

—Juezñedicue. Bie isoide rafue cuemo duiñede.

¹⁵ Ie ecimo itinomo llote:

—Ero, rana nicidoñeno. Ailluena ra omoimo illamona, Jusiñamui illanomo riñeitomoi.

¹⁶ Iena omoi raise uifollena, jiaíe rafuedo iena lloiticue. Ucuberedimiedi íe illimona ailluena rana ote.

¹⁷ Ie jira comecina facade: “Cue illimona ailluena rana oticue; iadedi ¿ninomo iena enoiticue?”

¹⁸ Birui cuemo ite eenoracona judaíticue. Ie mei aillue eenoracona finoiticue. Nainomo cue rana enoiticue”.

¹⁹ Ie comecina facaite: “Cuemo ailluena ra jai ite. Diga años nia iiticue. Jamai iiticue. Marena guiticue. Caímare iiticue”.

²⁰ Iese comecina facade; iadedi Jusiñamui naimiemo llote: “Abí uifñoñedio. Cue llua jira, ja naíona fiodaíto. Ie mei omo ite ra omo fiebiñeite”.

²¹ Dama ramo íe comecina bu facaía, Jusiñamui jitaillacinomo íe comecina bu facañenia, faifite.

Jesúdi Jusiñamui caí sedajana llua rafue
(Mt 6.25-34)

²² Ie llofueoicaiganomo Jesús llote:

—Jusiñamui jitaillacinomo omoi comecina facaía, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno.

²³ Jusiñamui omoína itataja muidona, guille omoimo íite. Naimie omoi abí finua muidona, iniroidi omoimo íite.

²⁴ Silliñiaímo comecina faca. Buena riñedimaci. Nie isoide guillena enoñedimaci; iadedi omoi Moo Jusiñamui naimacina sedajamona, naimaci guille íte. Naimaci baifemo omoi faía jira, naimie omoína canoite.

²⁵ Omoïmona, ¿bu ie começi jarire facajamona a sairite? Iese jaca buna a sairifede. Dama Jusiñamui omoïna a sairitarede.

²⁶ Omoï começiaina facajamona omoï a sairifëna jira, jiaie ramo omoï começiaina jarire finoñeno.

²⁷ Safiamo omoï começiaina faca. ¿Ñiese sicodimaci? Maijiñedimaci. Iniroina tiforiñedimaci; iadedi Salomón micori naimaci isoi jaië ifede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide.

²⁸ Jusiñamui safiana ebiretacabide. Dallu facaise illanona, safiadi duide. Safia baifemo omoï uaila jira, Jusiñamuidi iniroina omoïmo jaca iite. Safiana naimiedi ebiretaja muidona, omoïmo iniroidi jaca iite. Omoï ra omoïmo illena, naimiëna ino. Jusiñamuina eo janore inotomoi.

²⁹ Omoï começiaina jarire icana jaiñeno. “¿Buena guitica?” raiñeno. Iemo começiaina eo facañeno.

³⁰ Jusiñamuina inoñedino iemo começina facacabidimaci. Nana omoï jitaillacinona omoï Moo Jusiñamuidi uifua jira, naimaci isoi ifeno.

³¹ Jusiñamui jitaillacinona finocana omoï jai. Naimiemo omoï começi facaia, omoï illamo omoï começina jarire facañeitomoi. Iemona guille omoïmo Jusiñamui iite. Iniroi omoïmo jiaï iite.

*Jesúdi Jusiñamuimo começina facaja rafue
(Mt 6.19-21)*

³² Jesús llote:

—Cue cominina omoï illanona, uri omoï i. Omoï Moo Jusiñamui jitailla jira, naimie anamo omoïna itatajamona, omoïna sedaite.

³³ Omoï raruiaïna fecajanona, ucubena dueredinomo feca. Sabiñeite bolsana ono, omoï ra faifi raillano. Monamo omoï ra illa isoi ñaiticue. Monamo omoï ra illa isoi, iena faifiñeitomoi. Firiraïma nainomo jaiñede. Gireco nainomo jiaï ifede.

³⁴ Aillue ra omoïmo ia, Jusiñamuimo começiaina facañedomoi; iadedi naimie jitaillacinona omoï finoia, naimiemo começiaina facadomoi.

Jesús ie abido billemo ocurillana llofua rafue

³⁵⁻³⁸ Jesús nia llofuite:

—Monamona ico cue abido billemo ocuri. Iena omoï raise cacailena, bie rafuede iena lloiticue. Damie ie nabai ie ai ua rafue dine naïona jaië. Ie mullaiaï naimie abido billemo ocurillana ocuide. Naimie billemo naimaci raise ocuria, iniroina jitanona, lamparïnaï unianona, ocuritimaci. Iese naimaci ia, nasena naimie tuia, iena raire econoitimaci. Nie hora naimie abido bia, naimiëna naimaci iniñeno ocuria, ieri naimie iobite. Iobillamona, mullaïmana naimie itena, mesamo naimacina ecaite. Naimie bille hora naimaci uifoiñena jira, jaca ocuricana naimaci illa.

³⁹ Ero, firiraïma bille facaiseconi jofo namadi uifotena, nia caadote, ie ra faifi raillanona.

⁴⁰ Monamona ico abido biiticue. Omoï ocuriñena facaisemo biiticue. Ie jira cue billemo raise ocuri.

*Jesúdi patrón ie mullaïmana ie jofona sedataja llua rafue
(Mt 24.45-51)*

⁴¹ Ie como lloga rafuena cacajano, Jesúmo Pedro jicanote:

—¿Bumo bie rafuena llotio? ¿Caïmo llotio? ¿Nana cominimo?

⁴² Uai ote:

—Bie isoide cominimo lloticue. Ie mullaiaimona patrón damiena fetode, ie jiaie mullaiaina sedallena. Naimacina sedajanona, naimie naimacina jiai ecade.

⁴³ Ie mei patrón oni jaide. Jofomo abido naimie bia, ie nanoca mullaima raise maijiana fidiia, naimiena raise ibaite.

⁴⁴ Iobillamona, nana ie raruiaina sedataite;

⁴⁵ iadedi naie mullaima maraiñenia, comecina facaite: “Cue patrón are biñeite. Jiaie rafuena finoiticue”. Ie comecina iese facaja jira, naimie anamo ite mullaiaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finote.

⁴⁶ Ie ocuriñena facaise ie patrón abido billanona, naimiena meinetaite. Ie uaina inoñedino isoi, duere finoite.

⁴⁷ Naie mullaima ie patrón jitailla rafuena finuana uiñote; iadedi iena finoñede. Ie jira eo duere sefuite;

⁴⁸ iadedi maraiñede rafuena raise uiñoñeno jiaie mullaima finoia, janore duere sefuite. Ie isoide. Jusiñamui rafuena raise uiñotino iedo raise jaiñenia. Jusiñamui naimacina eo duere finoite. Iena janore uiñotino iedo raise jaiñenia, Jusiñamui naimacina janore duere finoite. Iese omoimo suiñellena, mare mullaima isoi, Jusiñamui jitaillacino finocana omoi jai.

Jesús muidona nana comini uri iñena rafue

(Mt 10.34-36)

⁴⁹ Jesús llote:

—Cuena naimaci inollena, eniruemo comini dine biticue. Cuena dajerie inuamona, cue cominina jaitimaci. Cuena jiaino inoñenamona, cue cominina jaiñeitimaci. Iemona cominina duere finoiticue. Cue maijia raire fuiduana jitaidicue.

⁵⁰ Cue nia eo duere sefuiticue. Iena raire suillena jitaidicue.

⁵¹ Nana cominina uri itatallena eniruemo biñedicue. Cuena inoñedinodi cuena inotinona enoitimaci. Enoillamona, cuena inotinona duere finoitimaci.

⁵² Cue billamona, daje jofomo itino diese danomo iñeitimaci. Dabecuiro comini nainomo ia, menamie cue dibeimo iite. Daje amani cue dibeimo iñeite. Iese iñenia, daje amani cue dibeimo iite. Mena cue dibeimo iñeite.

⁵³ Cue lloga rafuena damierie inua muidona, ie moo illa dibeimo ie jito iñeite. Ie jito dibeimo ie moo iñeite. Ie ei illa dibeimo naiñaño jisa iñeite. Ie jisa dibeimo ie ei iñeite. Ie jifaiño illa dibeimo ie miodi iñeite. Ie mio dibeimo ie jifaiño iñeite. Iese cominina uri itatañedicue.

Jesúdi monamo ite rana llofuia rafue

(Mt 5.25-26; 16.1-4; Mr 8.11-13)

⁵⁴ Cominimo Jesús dane llote:

—Bie eniruemo afai dine uilliena omoi cioia, raicabitomoi: “Noci deiacade”. Iese omoi ciua meinomo, ua noci deide.

⁵⁵ Bie eniruemo beici dinena aifi bia: “Eo ecasiite” raicabitomoi. Iese aifi bia, ua eo ecasite.

⁵⁶ Abina uiñotinona abi caitadinodomo. Monamo eruaillamona, rafue suillana uiñotomoi; iadedi omoi ecimo suiacalle rafuena raise uiñoñedomoi. Cue lloga rafuena raise cacaiñedomoi.

⁵⁷ Iemo omoi comeciaina raise facañedomoi.

⁵⁸ Ero, omoína bu llogidoia, juez dine nia omoí riñenia, omoína llogidotimie díga naie rafuena raise fino. Iena raise finoñenia, juez dine omoí ria, nainomo duere sefuitomoi. Calabozomo omoína jonetaite.

⁵⁹ Nana raise ibañenia, juez llua isoi, jino jaiñeitomoi. Ie isoide. Cue rafue omoí cacajamona, naimiemona duere sefuiñellena, Jusiñamui díga omoí rafuena raise fino.

13

Jesúdi comeciái iuai meiduana dana llua rafue

¹ Cominina Jesús nia llofuetemo, jiaie comini Jesús dine billanona, raitimaci:

—Jerusalémo Jusiñamui jofomo dajerie Galileamona navui bitimaci. Ocainaiaina fatimaci, Jusiñamuina naimaci sedallena. Ie facaiseconi Pilato railla gobernadori soldaduaina orede, naie cominina fallena.

² Jesús uai ote:

—¿Niese comeciaina facadomoi? “Bie comini iese duere sefuilla jira, jiaie Galilea comini baifemo jeacinona finodimaci” comeciaina facadomoi.

³ Iese omoí comeciaina facañeno; ia omoí comeciái iuai meiduamo comeciaina faca. Omoí comeciái iuai omoí meidoñenia, omoídi jiaí faifitomoi.

⁴ Siloé railla tidacana navui ana goillamo, dieciocho dígamie saitabidimaci. Iena fididomoi. ¿Niese naimacimo omoí comeciaina facadomoi? “Nana Jerusalémo ite comini baifemo jeacinona finodimaci” comeciaina facadomoi.

⁵ Iese omoí comeciaina facañeno; ia omoí comeciái iuai meiduamo comeciaina faca. Omoí comeciái iuai omoí meidoñenia, omoídi jiaí faifitomoi.

Jesúdi ie Moo comini comeciái iuai meiduamo fecuise ocurilla llua rafue

⁶ Iena comini raise uiñollena, Jesús bie rafuena llote:

—Damie ie illimo higuera railla riarana rite. Sicua mei, riarana ollena jibuisaide; iadedi nia llisiñede.

⁷ Ie jira ie illina sedaraimamo llote: “Ero, daje amani años bisoidicue, riarana ollena. Nia llisiñede. Iena mai tie. Naie illanomo jiaie riarana coco rillesa”.

⁸ Ie illina sedaraima uai ote: “Dama ite. Daje año nia seda. Riarana abina caigaiticue. Eniruena camaretaiticue.

⁹ Jiaie año llisia, mare. Llisiñenia, iena tieiticoco”. Ie isoide. Jusiñamui omoí comeciái iuai meiduamo are ocurite; ia meidoñenia, omoína duere finoite.

Jesúdi jicaidiñaiñona jillotaja rafue

¹⁰ Jiairuido sábadoruimo judíuai ofiracomo Jesús llofuate.

¹¹ Nainomo duidiñaiñodi ite. Janaba anamo naiñaiño illa jira, naiñaiño jicaiide. Atona naidainide.

¹² Naiñaiñona Jesús cianona, naiñaiñomo llote:

—Ñoo, o duicomona jai jillodio.

¹³ —Ie mei naiñaiñona jetade. Ieconi naiñaiño atona naidadate. Ie jira Jusiñamuimo iobillacinona fecade.

¹⁴ Naie ofiraco sedaraima icirite, sábadoruimo Jesús naiñaiñona jillotaja jira. Nainomo itinomo llote:

—Seis dígarui ite majillena. Nairuido omoí bi, omoí duicomona omoí jilloillena. Sábadoruimo biñeno. Sábadoruimo majiñedicaí.

¹⁵ Jesús uai ote:

—Maijiñedinona abi caitadinodomoí. Sábado iruimo maijicabidomoí. Sábado iruimo omoi toiniaina imaci illanomona suiñodomoí, jinui illanomo naimaci jiruaillena. Naie isoide maijia omoímona mare.

¹⁶ Ie isoide. Bie riñodi Abraham micori comini. Omoi nairai iñaiño. Dieciocho años Janaba anamo jai illamona, duere sefuide. Naiñaiñoa canollena, sábado iruimo naiñaiñoa Taife anamona cue jillotaia, cuemona mare.

¹⁷ Iena Jesús lluamona, nana naimie dibeimo iñedinodi meidaitimaci; iadedi jiaie comini iobidimaci, diga mare rafue naimie finua jira.

Jesúdi mostaza ido llua rafue

(Mt 13.31-32; Mr 4.30-32)

¹⁸ Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci.

¹⁹ Jiaie rafuedo iena omoímo lloiticue. Mostaza railla ido eo janorede. Ie illimo damie iena rillamona, eo aillue riaradi sicode. Ailluena jira, nainomo silliniái jicaiciaina finodimaci.

Jesús siritate rana llofuia rafue

(Mt 13.33)

²⁰ Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoímo lloiticue.

²¹ Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

Jesúdi Jusiñamui dine rille llua rafue

(Mt 7.13-14, 21-23)

²² Jesús diga nairaimo llofuecana jaide. Jerusalén dine jaide.

²³ Jesús oni jaillanona, damie naimiemo jicanote:

—Nama, ¿niga comini o uaina inoitimaci? —Jesús uai ote:

²⁴ —Monamo cue Moo dine jaille nasedi janorede isoide. Naie nasedo llicana o jai. Ailluena comini naiedo jaicanitimaci; iadedi fo jaitimaci.

²⁵ Naie jofo nama nase ibailla mei, ¿niese fo jaitomoi? Jino naidaillamona, nasena tutajanona, raitomoi: “Nama, o nase econo”. Naimie uai oite: “Omoína uiñoñedicue”.

²⁶ Dane lloitomoi: “O diga navui guiticaí. Cai illanomo llofuetio”;

²⁷ iadedi naimie uai oite: “Omoína uiñoñedicue. Cue cominiñedomoi. Jacino omoi comecimo nia illa jira, mai jai”.

²⁸ Jusiñamui illanomo Abraham micorina, Isaac micorina, Jacob micorina, nana Jusiñamui facaina lloraini micorina cioitomoi; ia omoi jino illamona, duere sefuillamona, eitomoi.

²⁹ Diga comini Jusiñamui illanomo iitimaci. Ailluena judíuainedino naga nairaiamona Jusiñamui illanomo biitimaci. Nainomo coninina caimare nabaitimaci.

³⁰ Naga nairaimona Jusiñamui cominina jillotarede. Cue rafuena cadomoi; ia cue cominina omoi jaicania, abi iedoñoeno cuena inocana omoi jailla.

Jesús Jerusalémo itinomo llua rafue

(Mt 23.37-39)

³¹ Ie facaiseconi dajerie fariseuai comini Jesús dine billano raitimaci:

—Benomona mai o jai. Cai illaima Herodes ona meineiacade.

³² Jesús uai ote:

—Herodedi eo jifueraima. Naimie dine jai. Naimiemo llono: “Janaba anamo ite cominimona Janabana oni orecahidicue. Duidinona jillota-cabiticue. Birui siño rafuena finocahidicue. Ico iese nia finoiticue. Iese cue maijille fuite.

³³ Nia oni jaiticue. Ailluena Jusiñamui facaina lloraini micoriai nainomo jai fiodailla isoi, Jerusalémo cue rafue jiai raire fuite” llono.

³⁴ Jerusalémo itinomo comecina facajano, Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie uruiaí sedaja isoi, diga icaíño cue anamo omoína uaidoiacadicue; iadedi omoi dinena cuena jitaiñedomoi.

³⁵ Iemona Jusiñamuidi omoi illanona jai fainonocaide. Cue Moo dine jaiticue. Cue jailla mei, cuena cioñeitomoi. Ico cue abido bia, comini cuena lloitimaci: “Jusiñamui oretaganie eo mare. Naimiedi cai Nama” lloitimaci.

14

Jesúdi abina siridimiena jillotaja rafue

¹ Jiairuido sábadoruimo Jesúdi fariseo imie jofomo guisaide. Naie fariseo imiedi illacomini. Nainomo itino Jesúsno eo eruaidimaci.

² Guille facaise naie jofomo duidimie bite. Naimie abina siridimie.

³ Nainomo itinomona damieriedi fariseuai comini. Moisés micori llogacinuaina llofueraíni jiai itimaci. Naimacimo Jesús jicanote:

—Sábadoruimo comena cue jillotaia, ¿omoimona jeacino finodicue? ¿Niese Moisés micori llogacinuai iena llote?

⁴ Uaina oñedimaci. Ie jira Jesús duidimie onollina llinuamona, naimiena jillotate. Ie mei naimiena jino orede.

⁵ Nainomo itinomo llote:

—Sábadoruimo maijicabidomoi. Sábadoruimo omoi jurareta pozomo uaidena, iena jillotallena, nairuimo iena ari otomoi. Omoimona naie isoide maijia mare. Bimiéna cue jillotaja jira, ¿niese cuena jeare ñaitomoi?

⁶ Iena cacajanona, uainicaidimaci.

Jesúdi guillena uaidoganona llua rafue

⁷ Jesúsdi naimaci guisabiliana ciode. Jiaíno baifemo illena, jofo nama abimo nana raicadimaci. Iena ciuamona, naimacimo Jesús rafuena llofuate:

⁸ —Rafue dine guillena omoína bu uaidoia, jofo nama abimo raíñeno, omoi baifemo itimie bi raillano.

⁹ Jofo nama abimo omoi raia, omoi baifemo itimie bia, jofo nama omoimo lloite: “Bimiemo omoi raillanona feca”. Meidaillanona, oni raínadaitomoi.

¹⁰ Ie jira rafue dine omoína uaidoia, naie jofomo omoi ria, oni raí. Ie mei jofo nama jitaia, omoimo lloite: “Cue abimo raí”. Ie mei nana naie itino omoi iobillana cioitimaci.

¹¹ Ie isoide. Jusiñamuidi jiaimie afemo iacadimiena jiaimie afemo iñenana itataite. Jusiñamuidi jiaimie afemo iacaiñedimiena jiaimie afemo itataite.

¹² Naimiena uaidotimiemo Jesús llote:

—Guille rafuena o finoia, naga icaíño o nabaiñiaína uaidoñeno. Naga icaíño o cominina uaidoñeno. Naga icaíño o ecimo itino ucuberedinona uaidoñeno. Naimacina o uaidotona, jiairuido guillena ona uaidoitimaci, naie iba o ollena;

13 ia rafuena o finoia, dueredinona uaido. Ñuja-ñujacaida macaritinona uaido. Uisnidinona uaido.

14 Naimacimona iba ico o oñenamona, Jusiñamui ona caimare itataite. Jiairuido fiodaillamona mareuidino jilloia, monamo Jusiñamui ona ibaite.

Jesúdi ailluena guille finoica rafuena llua rafue

15 Jesús abimo itinomona Jesús lluaña damie cacajano, raite:

—Monamo Jusiñamui illanomo itimiedi marena iite.

16 Jesús uai ote:

—Iena omoi raise uifollena bie rafuena lloiticue. Damie aillue rafuena finode. Ailluena cominina uaidote.

17 Rafue illaruimo ie mullaïmana orede, cominina dane uaidollena. Raite: “Mai bi. Nana guille finuadi jai fuite”;

18 ia biacaiñedimaci. Damie llote: “Eniruenta como ibadicue. Iena jibuisaiacadicue. O rafuemo jaiñeiticue. Ie jira cue joreñoña icifeitiosa”.

19 Jiaimie llote: “Diez diga juraretana como ibadicue. Naimacina jibuisaiacadicue. O rafuemo jaiñeiticue. Ie jira cue joreñoña icifeitiosa”.

20 Jiaimie llote: “Riño como oticue. Ie jira o rafuemo jaiñeiticue”.

21 Ie nama dine naie mullaïma abido jaide. Comini biacaiñenana llote. Iena cacajano, rafue namadi icirite. Ie mullaïmamo llote: “Cai nairai naisona jai. Dueredinona uaido. Ñuja-ñujacaida jaidinona uaido. Uisnidinona uaido”.

22 Ie mei naie mullaïma jaide. Abido naimie bia, ie namamo llote: “O lluaña finodicue. Ailluena comini jai bitimaci. O jofomo illino nia ite”.

23 Rafue namadi uai ote: “Naisomo itinona bene atillena, cue jofona oruitallena, cai nairaimona jino jai.

24 Cue nano uaidogano cue guillena guiñeitimaci”. Ie isoide. Jusiñamui rafuena feiñotino monamo Jusiñamui illanomo ico iitimaci; ia naimie rafuena jitañedinonainomo ico iñeitimaci.

Jesúdi naimie llofueganona jaiacadino rafue

25 Naie facaise ailluena comini Jesús diga jai jaisoidimaci. Naimacimo llote:

26 —Cue llofuegamiena jaiacadimie cuena ie moo baifemo isiruilla. Cuena ie ei baifemo isiruilla. Cuena ie ai baifemo isiruilla. Cuena ie uruiaï baifemo isiruilla. Cuena ie amatiaï baifemo isiruilla. Cuena ie miriñotiaï baifemo isiruilla. Cuena ie abi baifemo isiruilla. Iese cuena isiruiñenia, cue llofuegamiena raise jainide.

27 Cue llofuegamiena bu jaillamona, duere sefuicana jaite. Nibaï naiemona fiodaite. Bu iese jaiacaiñenia, cue llofuegamiena naimie raise jainide.

28 ‘Ero, jiaie rafuedo iena lloiticue. Jofona bu finoacania, ie ucubena bailla diese uifollena: “¿Niga raifite?” comecina nano facade.

29 Iese naimie comecina facañenia, goguirai naidania mei, ie ucube riñenia, taiguanona, naimieri jaisitimaci.

30 Raitimaci: “Ie jofo finua tainede; iadedi fuidonide”.

31 ‘Ero, jiaie rafuedo iena lloiticue. Illaïma jobaimena finoacania, nano comecina facade: “Cuemo ite diez mil soldaduai. Cue bacauaimo ite veinte mil soldaduai. ¿Niese emodofiticue?” Comecina facaja mei: “Emodofiticue” naimie comecina facajia,

32 nia are naimie bacauai ia, daguelli uicodo orede, ie fairiconi diga ñaillena. Raite: “Jobairiacaiñedicue; ia o diga bie rafuena raise finoacadicue”.

³³ Biemo comecina omoï faca. Ie raruiaïmo bu comecina eo facaia, cue llofuegamiena jainide.

³⁴ 'Sal mare; iadedi ie caïmano jai iñenia, ¿dane niese nïbaïamona caïmarenite?

³⁵ Jai maraiñede. Eniruemo jonegadena, jiai maraiñede. Oni dotaca. Ie isoïde. Cue llua isoï omoï iñenia, cue llofueganona jainidomoï. Omoï jeforena jira, raise fueollena, cue lluomo cacarei. Iena ñno.

15

Jesúdi naimiena ñnotinomona damie faifillana jitaiñena rafue (Mt 18.10-14)

¹ Naimaci bisoïlla isoï ie rafuena cacaïllena, diga gobierno ucubena oraini Jesús dine ofidimaci. Jusiñamui llogacinona raise jaiñedino jiai ofidimaci.

² Iena ciuano, fariseuai cominidi, Moisés micori llogacinuaina llofueraini diga, Jesús joreñona ñaitimaci:

—Bimie maraiñedicinona finorainina feiñote. Naimaci diga jiai guite.

³ Naimaci ñaiana uñuanona, Jesús naimacimo bie rafuena llote:

⁴ —Omoïmona damiemo cien toïca llaudaïaï nïbaï ite. Naimacimona daje feiraiti. Ie noventa y nueve llaudaïaïna faïnonocaida, iena jenuaite, ie baille ñnori.

⁵ Baïllanona, ie fecanicomo rocanocaida, iobicana biite.

⁶ Jofomo naimie ria, ie nabaiñiaïna uaidoite. Ie ecimo itinona jiai uaiduana, raite: “Cue diga iobi. Cue feiraiti llaudana jai baiticue”.

⁷ Ie isoïde. Cue rafuena cue llumona, damie ie comeci jeacinona faïnonocaïllamona, ie comeci iuai meïduamona, monamo itino eo iobitimaci; iadedi noventa y nueve comini marena illamona, janore iobitimaci.

Jesúdi faifide ucubena bailla llua rafue

⁸ Jesús llote:

—Jiaïe rafuena omoïmo lloiticue. Dañaiñodemo diez diga ucube ite. Naiemona daje ucube naiñaiño faïfia, lamparín unianona, ie jofona gallaite. Eo jenoite, ucube ie baille ñnori.

⁹ Iena naiñaiño baïa, ie nabaiñiaïna uaidoite. Ie ecimo itinona jiai uaiduana, raite: “Cue diga iobi. Cue faifide ucubena jai baiticue”.

¹⁰ Ie isoïde. Cue rafuena cue llumona, damie ie comeci jeacinona faïnonocaïllamona, ie comeci iuai meïduamona, Jusiñamui jaienisai eo iobidimaci.

Jesúdi damie ie moo faïnonocaïlla llua rafue

¹¹ Jesús llote:

—Jiaïe rafuena omoïmo lloiticue. Damiemo mena jito ite.

¹² Ie moomo jamamie llote: “Moo, o fiodaïlla mei, o raruiaïmona janore feiñoiticue. O fiodaïllana sedaçaiñedicue. O raruiaïna cue facaina birui jitaïdicue. Cuemo ine”. Ie jira ie moo naimiemo fecade.

¹³ Ie mei nano nie ñnori illamona, nana ie raruiaï iraiñanona, jiaïe eniruemo jaide. Nainomo ie ucube jamai buruemo faïaïde.

¹⁴ Nana naimie ucube fuidua facaise, naie eniruemo guille iñede. Aime guitimaci. Naimie jiai aime guite.

¹⁵ Ie jira nainomo ite patrón dine maijiaïde. Naie patrón ie chanchuaina sedallena naimiena orede.

¹⁶ Naimiena jaca buna ecarainina jira, chanchuai guillemona guiacade.

17 Iese naimie duere sefuilla jira, ja muidomo abina uifocailamona, comecina facade: “Cue moo jofomo nana naimie mullaiaia raise guitimaci. Guille fiebicabite; iadedi bene aimeri fiodaiticue.

18 Cue moo dine abido ja jaiticue. Naimiemo lloiticue: Jusiñamuimo jeacinona finodicue. Omo jeare jiai finodicue.

19 Odi: ‘Cue jito’ cuena raiñeno. O mullaiaia illa isoi, cuena abido feiño”.

20 Ie facaise ie moo dine jai jaide. Nia aare naimie ia, ie moo naimiena ciode. Ie jitona duenaillanona, naimie dine aiside. Naimiena caimadote. Jiai libanote.

21 Ie jito naimiemo llote: “Moo, Jusiñamuimo jeacinona finodicue. Omo jeacino jiai finodicue. Odi: ‘Cue jito’ cuena raiñeno”.

22 Ie moo iena cacajano, ie mullaiaimo llote: “Cue jitona naimie eruaillena, eo mare iniroina ati, naimie jitallena. Cue jitona naimie illa jira, iena jitallena, anillona ati. Naimie jitallena, zapatona jiai ati.

23 Janoreta farediretana fano. Iena raise finuanona, iena mai cai guilli. Iobillamona, caimare ebirede rafuena finoiticai.

24 Navui cuemona cue jito fodaite isoide. Cajе cuemo dane abido rilla. Navui cuemona naimiedi faifide; iadedi birui naimiena dane ciodicue”. Naimie llua isoi, rafuena finodimaci.

25 Naie facaise nano doforamie illimo ite. Jofomo abido naimie bia, comini iraisillana cacade.

26 Daje mullaimana uaiduanona, naie rafuena jicanote.

27 Naie mullaima uai ote: “O ama abido jai bite. O ama ramo jiriñeno abido billa jira, o moo ie janoreta farediretana jai fatatate”.

28 Iena cacajano, icirite. Fo jaiacaiñede. Ie jira ie moo jino bite. Naimiena fo uaidote.

29 Ie moomo llote: “Ero, diga años o diga maijidicue. O uaina jaca inoticue; iadedi cue nabaiñiaia diga, rafuena cue finollena, chivo cuemo jaca fecañedio.

30 O jito jamamie ie ucube callirediñaiñuaimo fuidode; iadedi abido naimie billano, naimie facaina janoreta farediretana fatatatio”.

31 Ie moo uai ote: “Moo, nagarui cue diga itio. Nana cue radi oienite.

32 Cuemona o ama navui fodaite isoide; iadedi naimiena dane ciodicue. Naimie navui faifide raiticue; iadedi cajе cuemo dane abido rilla. Cue iobillanona rafuena finodicue”. Bie rafuemona omoi fueollena, iena jai lloticue —Jesús llote.

16

Jesúdi patrón ie mullaima finoca rafuena llua rafue

1 Ie llofueoicaiganomo Jesús jiaie rafuena llote:

—Ucuberede patrón ie mullaimana ie rana sedatate. Naie patrón eneno oni illanona, ie mullaima ie rana raise sedañenana fidade.

2 Naimiena uaiduanona, naimiemo jicanote: “¿Maraiñede o finoca rafuena niese fididicue? Omo ite cuentas cioacadicue. Cuemo ati. Cue diga jai maijiñeítio”.

3 Iena cacajano, naie mullaima comecina facade: “¿Niese nibaiticue? Cue nama cuena jai dotaacade. Maijiana ocuinidicue. Jiaie cominimona ucube jamai jicajana meiruiticue.

4 Cue finuana jai uifoticue. Naimaci jofomo comini cuena ico feiñollena cue dotaja mei, nana cue patrón debedinona uaidoiticue”.

5 Ie jira naimacina uaidote. Damiemo jicanote: “¿Cue patrómo niga debedio?”

6 Uai ote: “Cien bidones raifi aceitunamona oga aceitena debedicue”. Naie mullaíma raite: “O rabemo jarire ja cueno: cincuenta bidones”.

7 Jiaimemo jicanote: “¿Niga debedio?” Uai ote: “Cien digagai trigo raifi debedicue”. Naie mullaíma dinena raite: “O rabemo ochentana cueno”.

8 Iena fidiano, naie mullaímamo ie patrón raite: “Jiairuido marena o illemo o comecina raise facadio. Eo abina uifnotimiedo” raite. Ero, Jusiñamuiña inoñedinodi naimiēna inotino baifemo ra fecajana baitadimaci.

9 Naiemona omoi fueollena, omoimo lloiticue. Omoimo ite ra diga dueredinona cano. Iemona omoi nabaiñiaina jaitimaci. Omoi fiodaia, omoi ra bene fiebite; ia Jusiñamui illanomo naimaci diga omoi ia, naimacina birui omoi canuamona, nainomo omoína marena ñaitimaci.

10 Janore ra omoimo illamona, Jusiñamui facaina birui omoi raise majjia, ailluena ra omoimo itedena, Jusiñamui facaina jiaí raise majjítomoi. Janore ra omoimo illamona, marañede rafuena birui omoi finoia, ailluena ra omoimo itedena, marañede rafue nia jiaí finoítomoi.

11 Omoimo birui ite ra diga Jusiñamui facaina omoi raise majjiñenia, naimiemona jiaie rana feiñoñeitomoi.

12 Omoi anamo ite ra diga Jusiñamui facaina omoi raise majjiñenia, Jusiñamui ie rafue omoimo itatañeite.

13 Mena patrones diga daruido buna jaca majjinide. Mena diga bu majiacania, damiēna jiaimie baifemo gaitē. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiái ollemo comecina omoi eo facaía, Jusiñamui jitaillacinomo comecina raise facañeitomoi.

Jesúdi fariseuai comini diga dane ñaia rafue

14 Jesús llofuiana fariseuai comini cacajano, ucubena eo gaia jira, naimie uaina jamadimaci.

15 Naimacimo Jesús llote:

—Omoi finoca rafuemonona comini omoína: “Mare” raillana jitaídómo; iadedi Jusiñamui omoi comeciái marañenana uifnote. Iese omoi illana Jusiñamui gaiñede.

16 Jusiñamui facaina lloraini micoriai cuegafuiai mona Jusiñamui rafuena cacacabidomoi. Moisés micori cuegafuiai mona iena jiaí cacacabidomoi. Juan Bautista micorimona naimie anamo omoi illana Jusiñamui jitaillana cacadomoi. Jusiñamui díbeimo omoi comeciái iuaina meíduana cacadomoi. Iena jiaí llocabiticue. Iena ailluena inuamona, Jusiñamui díbeimo birui duere iacadimaci.

17 Mona enirue diga nia ia, nana Jusiñamui llogacinuai suicana jaite.

Jesús ima ie aina dotaja rafuena llofuia rafue (Mt 19.1-12; Mr 10.1-12)

18 Jesús llote:

—Naga aina dotadimiedi, jiaíñaiño ollena, jeacinona jai finode. Dota-cañaiño bu oia, jeacinona jai finode.

Jesúdi ucuberedimie iaímaiaí Lázaro ie rafuena llua rafue

19 Jesús jiaie rafuena llote:

—Cue llogacinona omoi raise uifollena, bie rafue lloiticue. Ucuberedimie ite. Eo mare iniroina jitade. Eo caímare raise guicabite.

²⁰ Naimie nasemo Lázaro raillamie jamai biide. Naimiedi dueredimie. Efonaitimie.

²¹ Naimiedi ucuberedimie guiga allamona guiacade; ia guiñede. Jiconiaidi naimie efociaina mecabite.

²² Ie mei naimie fiodaite. Jusiñamui cominina naimie illamona, Jusiñamui jaienisa; naimie joreño monamo Abraham micori joreño illanomo uitimaci. Ucuberedimie jiai fiodaite. Comini naimiena raitimaci.

²³ Jusiñamui cominina naimie iñenamona, naimie joreño iraimo jaide. Nainomo naimie duere sefuillamona, Abraham joreñoa aarena ciode. Naimie ecimo Lázaro micori ie joreñoa jiai ciode.

²⁴ Abraham joreñoa uaidote: “Cue moo Abraham, cuena duenai. Lázaronna cue dine oreta, ie onocai diga, jinuina cue fuemo llocatallesa, cue fuedo manare jaillena. Bie iraimona jai eo llegi cacadicue”.

²⁵ Abraham joreñodi uai ote: “Moo, o illa dinori naga ra omo ite. Marena itio; iadedi Lázaro duere sefuide. Birui naimie marena ite; iadedi o duere sefuidio.

²⁶ O dine jainidicai. O enefebetuemo itio. Cai enefebetuemo jiai iticai. Caimona omoi dine bu jaiñellena, omoimona cai dine bu biñellena, iese ite”.

²⁷ Ucuberedimie micori joreño dinena uai ote: “Cue moo jofomo Lázaronna oreta.

²⁸ Cuemo cinco amatiai ite. Naimacimo riire llollena, bie iraimo naimaci riñellena, naimiena oreta”.

²⁹ Abraham joreñodi uai ote: “Naimacimo Moisés micori cuegafuiai ite. Jusiñamui facaina jaiie lloraini micoriai cuegafuiai jiai ite. Iemo naimaci comeciaina facallesa”.

³⁰ Uai ote: “Iese lloñeno. Iemo comeciaina facañeitimaci; iadedi fiodaillamona jilluanona, naimaci dine bu jai, naimiena ñnoitimaci. Naimaci comeciiai uai meidoitimaci”.

³¹ Abraham joreñodi uai ote: “Moisés micori cuegafuiai, Jusiñamui facaina jaiie lloraini micoriai cuegafuiai naimaci ñnoñenia, fiodaillamona bu jilloia, naimiena jiai ñnoñeitimaci” —Jesús llote.

17

Jesúdi jeacinona fiñoñenana llofuia raufe (Mt 18.6-7, 21-22; Mr 9.42)

¹ Ie llofueoicaiganomo Jesús llote:

—Diga ramo omoi faicana uitinomo riitomo. Omoi ramo faitimie duere sefuite. Jusiñamui omoi ramo faitimiena duere finoite.

² Como creyentena jaidimiena ramo bu faia, naimie cimaimo aillue nofici maianona, joraimo corobaillena naimiena dotacadena, mare.

³ Como creyentena jaidimiena ramo omoi faiñellena, abina omoi rairui. O ecimo itimie ona jeare finoia, naimiemo iena llono. Ie comeciina meidoiacania, naimie jearede finoca rafuena feita.

⁴ Nagarui diga icaiño ona jeare naimie finoia, naga icaiño o diga naimie marena dane ñaiacania, naie rafuena feita.

Jesúdi naimiena ñnuana llua rafue

⁵ Ie doce llofueoicaigano Jesús llote:

—Ona ñnoticai; ia caina o uaina eo ñnota.

⁶ Uai ote:

—Jusiñamuina eo janore ñnotomoidena, bene ite amenamo omoi lloia: “Benomona jai. Joraimo sico”, naie amena omoi uaina ñnote.

Jesúdi ie facaina llofueoicaigano maijia llua rafue

⁷ Ie llofueoicaiganomo Jesús llote:

—Bie rafuemono omoi fueollena, iena lloiticue. Illimo ie mullaïma maijiamona, ie toinïaï sedajamona jofomo abido naimie ria, ie patrón naimiemo lloñeite: “Mai nano guisaïbí”;

⁸ Iadedi naimiemo llote: “Cueïena guillena nano fino. Cueno eca. Ie mei guitio”.

⁹ Naie mullaïma ocuica rana finua muidona, mullaïmana naimie illa jira, ie mullaïmamo patródi iobillacinona fecañeite.

¹⁰ Ie isoide. Nana cue llua omoi finodomoina, dani omoi maijiadi, cue cominina omoi illa jira, cuemono iobillacinona feiñoñeitomoi.

Jesúdi diez efonaitinona jillotaja rafue

¹¹ Jerusalémo ie llofueoicaigano diga Jesús jaidemo, naimie nabeimo Samaria enirue ite. Naimie jarifebeimo Galilea enirue ite.

¹² Nairai dine naimie riacana, diez efonaitinodi naimiemo dafaïfidimaci. Eno oni naidaidimaci.

¹³ Naimiena ado uaidotimaci:

—Jesús, Maestro, caina duenai. Caina ja jillota.

¹⁴ Naimacina Jesús ciuanona, naimacimo llote:

—Mai jai. Jusiñamui diga ñairainimo omoi abina acata. —Jaidimacimo, jillodimaci.

¹⁵ Ie abi jilluana ciuano, naimacimona damie Jesús dine abido bite. Jusiñamuimo iobillacinona ado fecade.

¹⁶ Naimiemo iobillacinona jiai fecallena, Jesús uicomo ana bitadate. Naimiedi judiñedimie. Samaritano imie.

¹⁷ Jesús llote:

—Diez digamiedomoi. Omoïna jai jillotaticue. ¿Ninomo jiaïnodï nueve digamie itimaci?

¹⁸ ¿Niese Jusiñamuimo iobillacinona fecaacaiñedimaci? Dama bimie fecade. Naimiedi judio imieñedimie.

¹⁹ Jesús naimiemo llote:

—A naidada. Mai jai. Cueno o ñnua jira, jai jillodio.

*Jesúdi Jusiñamui ie cominina sedajana llofua rafue
(Mt 24.23-28, 36-41)*

²⁰ Naie facaise fariseuai comini Jesúmo jicanotimaci:

—¿Ñiruido Jusiñamui caina bene sedaite?

Jesús uai ote:

—Ñiño rafuena omoi ciuamona, Jusiñamui omoïna sedallena uifñoñeitomoi.

²¹ Buena ciuamona raiñeitomoi: “Jai, Jusiñamui bene caina jai sedade”. “Jai, batine caina jai sedade”; iadedi omoi motomo itinomona Jusiñamui ðibeimo damerie illamona, Jusiñamui omoi motomo jai illana uifñoitomoi.

²² Ie llofueoicaiganomo llote:

—Jairuido duere sefuillamona cue diga janore jisa iacanitomoi; iadedi iese nia iñeitomoi.

²³ Damerie raia: “Ero, batine Cristo jai bairedo” nainomo jaiñeno. Naimaci raia: “Ero, bene Cristo jai bairedo” iena ñnoñeno.

²⁴ Mona borillamona mona jillacidi usere ciode. Ie isoide. Cue abido bia, nana comini iena uifñoitimaci.

²⁵ Birui iese nia suiñeite. Nano duere sefuiticue. Birui ite comini cuena jiai feiñoñeitimaci.

²⁶ Abido cue billirui iairei ia, Noé micori facaiseconi itino isoi, comini iitimaci. Naimaci duere sefeuillemo Noé micori facaise itinodi comeciaina facañedimaci.

²⁷ Naie facaiseconi nia eo noci deiñenia, Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. Nia noci deiñenia, Noé micori lloga uaina inoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue.

²⁸ Lot micori facaiseconi daje isoidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Rana ibauidimaci. Iena fecauidimaci. Illimo maijuidimaci. Jofona finouidimaci. Naimaci isoilla isoi icana jaidimaci.

²⁹ Dani iemo comeciaina facadimaci. Jusiñamuimo comeciaina facañedimaci. Iese icana jaidimaci, Sodomamona Lot micori jailla dinori. Nairui monamona boode azufre ebena billanona, nana Sodomamo itino jobaide. Ebena nana faifidimaci.

³⁰ Ie isoide. Abido cue billiruimo comini iitimaci. Cue bia, ebena biiticue.

³¹ Naie facaise bu ie jofo emodomo ia, ie raruiana ollena, naimie diga uillena, bu fo jaiñena. Illimo bu ia, ie raruiana ollena, ie jofomo bu jaiñena.

³² Iemona fueollena, Lot ai micori rafuemo comecina faca. Naiñaiño ie raruiaimo daño comecina facajamona, na ie abi diga faifide.

³³ Dama ie raruiaimo ie comecina bu facaia, ja muidomo faifite. Cue diga jaca iñeite; iadedi cue jitaillacinona finuamo ie comecina bu facaia, monamo cue diga jaca iite.

³⁴ Cue bille facaise menamie daje cuartomo iniano iitiaimaiai. Damie jaite. Jiaimie fiebite.

³⁵ Mena riño danomo doberillanona iitiaiñuai. Dañaiño jaite. Jiañaiño fiebite.

³⁶ Menamie illimo maijiano iitiaimaiai. Damie jaite. Jiaimie fiebite.

³⁷ Ie llofueoicaigano jicanotimaci:

—¿Nine jaitimaci?

Uai ote:

—Urujaisai rifaide ramo ofillana uiñua isoi, nana cuena inotino cue abido billena uiñoitimaci. Cuemo duillamona, cue diga jaitimaci.

18

Jesúdi feciñona llua rafue

¹ Ie llofueoicaiganomo Jesús rafuena dane llote:

—Jusiñamuimo jicabi, omoi jicaca rafue omoi feiñolle dinori. Raire feiñoñenia, abina jafueño.

² Iena omoi raise uiñollena, bie rafuena lloiticue. Jiaie nairaimo juez ite. Jusiñamuina jaciruiñede. Cominina jiai jaciruiñede.

³ Nainomo naimie dne daje feciño jai-jaicabillanona, raite: “Cuena duere finodimiamona cuena cano”.

⁴ Naimie dinena raite: “Dama iesede. Ona canoñeiticue”. Ie mei ie comecina facade: “Jusiñamuina jaciruiñediticue. Cominina jiai isiruiñediticue;

⁵ ia naiñaiño cuemo sefuire bi-bina jira, naiñaiño canoiticue, cue rairaiñiñellena”.

⁶ Jesús llote:

—Maraiñede juez lluana cacadomoi. Ja muidomo naiñaiño canode.

⁷ Ero, biemo omoi comeciaina faca. Jusiñamui naie juez isoifede. Nagarui Jusiñamuimo naimaci jacaia, ¿niese naimie ie fetocanona canoñeite? Jaca canoite.

⁸ Raire fairuanona, naimacina raire canoite; iadedi abido cue bia, ¿niga cuena ñnotino iitimaci? Nibai ailluena cuena ñnoñeitimaci.

Jesúdi Jusiñamuimo menamie j#a llua rafue

⁹ “Mareuidicai” dajerie railla jira, “Jiaie comini baifemo faiticai” dajerie railla jira naimacimo Jesús bie rafuena lote:

¹⁰ —Jusiñamui jofomo, nainomo j#llena, menamie jaidiaimaiai. Damie fariseo imie. Jiaimie gobierno ucubena oraíma.

¹¹ Fariseo imie naidadacaida, dama anado j#ide: “Jusiñamui, jiaie comini isoifedicue. F#idimaci. Marañedimaci. Naimaci añede riño diga itimaci. Cue ecimo ite ucubena oraíma isoí ifedicue.

¹² Naga semana menarui guicabiñedicue, ona raise cue sedajanona. Cue ramona omo fecacabidicue. Macaibaite” j#ide.

¹³ Gobierno ucubena oraíma eneno naidadacaida, j#ide. Monamo eruañede; iadedi jamai bue isoillanona, jogobena farode. Raite: “Jusiñamui, jeacínona finoraímadicue. Cuena duenai. Macaibaite” j#ide.

¹⁴ Jusiñamuidi jiaimie afemo iacadimiena jiaimie afemo ifenana itataite. Jusiñamuidi jiaimie afemo iacañedimiena jiaimie afemo itataite. Ie jira gobierno ucubena oraíma ie jofomo Jusiñamuimona jai marebicailanona jaide; ia fariseo imie iese jaifede.

Jesúdi naimie dine uruiai billana jitailla rafue

(Mt 19.13-15; Mr 10.13-16)

¹⁵ Naie facaise Jesús dine comini naimaci eisaiaina atisite. Ie onolli naimacimo naimie joniana jitaídímaci. “Naimacina raise cano” ie Moomo lollena jitaídímaci. Iena cíanona, ie llofueoicaigano comínina Jesús dine billana rairuidímaci;

¹⁶ iadedi Jesúdi eisaiaina uaiduano raite:

—Uruiai cue dine billesa. Naimacina rairuñeno. Cuena bie isoí ñnotinodi Jusiñamui cominidímaci.

¹⁷ Bie uruiai abina iedoñedimaci. Einamacimona jamai bue isoidímaci. Naimaci isoí bu ifenia, Jusiñamui comínina jaifñeite. Jusiñamui naimiena sedallena, Jusiñamui comínina naimie jaifñeite.

Ucuberedimie Jesús diga ñaia rafue

(Mt 19.16-30; Mr 10.17-31)

¹⁸ Ie facaise illaicominimona damie Jesúmo jicanote:

—Maestro, odi mareuidimedio. Jusiñamui diga ico monamo cue jaca illena, ¿nie isoide rana finoiticue?

¹⁹ Jesús uai ote:

—¿Bue ñllena cuena: “Mareuidimedio” raitio? Dama damie mareuidimiena. Naimiedi Jusiñamui. Naimiemo jicano.

²⁰ Moisés micori llogacinuaina ñnocana jai. Jaie cuete: “O añede riño diga ifñeno. Comena meineñeno. Rana fññeno. Jiaimiena o llogidoia, tainona lloñeno. O moo uaina ñno. O ei uaina ñno”.

²¹ Uai ote:

—Cue uruena illa facaisemona nana bie llogacinuaina ñnoticue.

²² Tena cacajano, Jesús raite:

—Daje rana nia finoñedio. O raise marebicaiaçania, omo ite raruiaia feca. Naie ucubena dueredinomo feca. Cuena o #nuamona, monamo ico jaca iitio. Cue llofueoicaiganona o illena, mai cue diga bi.

²³ Jesús lluana naimie cacajano, sunaicaide. Naimiemo eo ailluena ra illa jira, iena fecaacaiñede.

²⁴ Naimiemo eruaillano, Jesús raite:

—Ucuberedinodi Jusiñamui cominina jaillena eo sefuiruite.

²⁵ Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui cominina jiai raise jainide.

²⁶ Jesús lluana cacadino jicanote:

—¿Iemona buca jillobiti?

²⁷ Jesús uai ote:

—Nana comini dani jillobinidimaci; iadedi Jusiñamuidi naimacina jillobitarede.

²⁸ Pedro raite:

—Ero, o llua isoi cai jofuena faionocaida, o diga jaisoidicai.

²⁹ Uai ote:

—Uanaicinona lloticue: Jusiñamui cominina naimie jaillamona, ie jofona bu faionocaia, ie aina bu faionocaia, ie amataina bu faionocaia, ie moona bu faionocaia, ie eina bu faionocaia, ie uruiaina bu faionocaia,

³⁰ Jusiñamuimona ailluena ibana birui feiñoite. Monamo ico jiai jaca iite.

Jesúdi ie fiodaillena dane llua rafue

(Mt 20.17-19; Mr 10.32-34)

³¹ Ie doce llofueoicaigano eneno uillanona, dani naimacimo llote:

—Ero, Jerusalémo jai jaidicai. Monamona billanona, iimana jaidicue. Jusiñamui facaina lloraini cuena jaie cuetimaci. Nana naie rafue ja suite.

³² Judíuainedino judíuai illaicomini cuena fecaitimaci. Cueri jifanoitimaci. Cuena jeare finoitimaci. Cuena tuallaitimaci.

³³ Cuena faitimaci. Cuena meineitimaci; ia darui amani illanona, cue fiodaillamona jilloiticue.

³⁴ Naimie lluana raise cacaiñedimaci. Naimacina iena Jesús nia raise llofueña jira, iena raise uiñoñedimaci.

Jesúdi uisnidimiena jillotaja rafue

(Mt 20.29-34; Mr 10.46-52)

³⁵ Jericó railla nairaimo ie llofueoicaigano diga Jesús riacademo, uisnidimie naiso fuemo raillana ciode. Ucubena jamai jica-jicade.

³⁶ Ailluena comini Jesús diga jaillana naimie cacajano, naie cominimo nie isoide rafue illana jicanote.

³⁷ Uai otimaci:

—Nazaret ie Jesús como bene bite.

³⁸ Ie jira naimie cuiroide:

—David micori Jitona o illamona, cuena duenai. Cuena cano.

³⁹ Uicodo jaidino naimiena lletade, naimiena llícaitallena; iadedi naimie eo cuiroide:

—David micori Jitona o illamona, cuena duenai.

⁴⁰ Naimiena cacajano, Jesús naidadate.

—Cue dine naimiena ati —llote. Naimiena atianona, naimiemo Jesús jicanote:

⁴¹ —¿Niese ona cue nibaiana jitaidio?

Uai ote:

—Maestro, cioacadicue.

⁴² Jesús raite:

—Mai eroda. Cuen a o ñnua jira, jai jillodio.

⁴³ Iecon naimie uisidi ciode. Jusiñamuimo iobillacinona fecajano, Jesús diga jaidino diga naimie jaide. Naimie jilluana ciuamona, nana comini Jusiñamuimo iobillacinona jiai fecadimaci.

19

Jesús Zaqueo diga illa rafue

¹ Jericómo Jesús rillanona, nainomo macaritemo,

² naie facaise nainomo Zaqueo raillamie ite. Gobierno ucubena nanoca oraima. Naimiedi eo ucuberede.

³ Jesús bai macaritemo, Zaqueo naimiena cioacade; iadedi ailluena comini illamona, Zaqueo ianorina jira, Jesúsna cionide.

⁴ Ie jira uicodo aisicana jaide, amenamo a jaillena, naimiena cioillena.

⁵ Naimie dine Jesús rillano, Zaqueomo a erodate. Naimiena uaidote:

—Zaqueo, raire ana bi. O diga danomo illena, o jofo dine jaiticue.

⁶ Ie jira raire ana bite. Ie jofomo Jesúsna iocire feiñote.

⁷ Iena jiaie comini ciuanona, Jesús joreñona jeare ñaianona raitimaci:

—Mariñedicinona finoraima jofomo naimie jaide.

⁸ Jesúsna naimie feiñua mei, Zaqueo Jesús ecimo naidaita, naimiemo llote:

—Nama, atuedo cue raruiana dueredinomo biruimona fecaiticue. Buma navui cue fiia, cuatro diga ra abido iiticue.

⁹ Jesús uai ote:

—Iese o llua jira, o comini diga Jusiñamuina jai o ñnuana uifoticaí. —Jamai bitinomo llote:

—Zaqueodi Abraham micori jito; ia Jusiñamuina navui ñnoñede.

¹⁰ Naimie isoidino jillobitallena, biticue. Monamona billanona, ñmana jai jaidicue. Jusiñamuina ñnoñedinona jenuaibidicue, naimacina jillobitallena.

Illaima ie mullaiaimo ucubena fecaja rafue

¹¹ Zaqueo jofomo itino Jesús llofuiana cacajano, comecina facadimaci: “Jerusalén ianori ite. Nainomo Jesús rilla mei, illaima isoi nainomo Jusiñamui ie cominina raire sedaite”.

¹² Tena naimaci raise uifollena, Jesús bie rafue naimacimo llote:

—Illaima jito ie nanoca illaima dine jiaie nairaimo jaide. Ie cominina sedallena, nanoca illaimamona ie uaina feiñoiacade. Iemei abido biacade.

¹³ Nia naimie jaiñenia, diez diga ie mullaiaina uaidote. Nagamierie daberie ucubena fecade. Naimacimo llote: “Bie ucube diga jiaie ucube ocana omoi jai”. Ie mei oni jaide.

¹⁴ Ie comini naimiena enoidimaci. Jiañona nanoca illaima dine oretajano, raitimaci: “Bimie caina sedajana jitaiñedicaí”; ia nanoca illaima dinena naimaci lluaña jaca cacaiñede. Ie jira naie nanoca illaima naie illaima jitomo ie uaina ite.

¹⁵ Ie uaina feiñua mei, abido ie eniruemo jaide. Rilla mei, ie mullaiaina uaidote. Nie diese ucubena ocana naimaci jaillana uifoiacade. Ie jira naimacina uaidote.

¹⁶ Nano bitimie raite: “Nama, o cuemo dabe fecadio. Dabedemona jai cuemo ite diez digabe”.

¹⁷ Naie illaima naimiemo llote: “Eo marena maijidio. Mare mullaamadío. Janore ra raise o sedaja jira, ona diez nairaiaina sedataiticue”.

18 Ie mei jiaie mullaïma billanona, raite: “Nama, o cuemo fecaca dabedemona jai cuemo ite cinco digabe”.

19 Illaïma llote: “Ona cinco nairaïaina sedataitucue”.

20 Ie mei jiaie mullaïma bite. Raite: “Nama, jadi, o cuemo iga o ucube. Iniroimo tilliano, iena eenoticue.

21 Ona cue jaciruillano, odi eo riimiena jira, iena jamai eenoticue. Jiaie cominimona ie rana bairocabidio. O maijiñena ramona ocabitio”.

22 Illaïma ñinena raite: “Eo marañede mullaïmadio. Cuena o llua isoi, ona duere finoiticue. Cue riimienana uiñotio. Jiaie comini ie rana cue bairuana uiñotio. Cue maijiñena motomo ra cue uana uiñotio; ia buena maijiñedio.

23 ¿Bue ñellena bancomo cue ucube joneñedio? Bancomo itena, jiaie ucubena ocana jaide. Ie mei abido cue bia, omo cue fecaja ucube baifemo feiñoticue”.

24 Nainomo itinomo llote: “Naie ucube naimiemonona bairuano, diez digabe itimiemo feca”.

25 Uai otimaci: “Naimiemo ailluena ucube jai ite. ¿Bue ñellena dane jiaie fecaitio?”

26 Illaïma ñinena uai ote: “Ailluena raredimie jiaie rana feiñoite; iadedi janore raredimie ie rana faifite.

27 Cuena enoidinona bene ati. Naimacina cue sedajana jitañedimaci. Naimacina meine”.

Jesús nia llote:

—Ie isoide. Iese omoïmo suiñellana, Jusiañamui ie comini sedalliruina omoi uiñoñena jira, cue jitaillacino finocana jai.

*Jesús Jerusalémo jailla rafue
(Mt 21.1-11; Mr 11.1-11; Jn 12.12-19)*

28 Naie rafuena llofua mei, Jerusalén ñine comini uicodo ie llofueoicaigano diga Jesús jaide.

29 Jerusalén iaireicaidemo, mena nairaïmo riacade. Betfagémo railla nairaïmo ride. Betania nainomo jiaï ite. Olivos railla anedumo naga nairaï iaïmaïaï ite. Ie llofueoicaiganomona mena orede.

30 Raite:

—Bie nairaï illa uicomo mai omico jai. Nainomo cuinaca burritona baitomico. Naie burrito emodomo nia buna jaiñena. Iena suiñuano bene ati.

31 Omicomo: “¿Bue ñellena iena suiñodomico?” bu jicanoïa, llono: “Coco Nama iena jitaide”.

32 Naimie llua isoi jaidiaïmaïaï. Naimie llua isoi burritona baitiaïmaïaï.

33 Ie facaise ie naniaï iaïmaïaïmo jicanote:

—¿Bue ñellena cai burritona suiñodomico?

34 Uai otiaïmaïaï:

—Coco Nama iena jitaide.

35 Ie mei Jesúmo iena atidiaïmaïaï. Burrito emodomo iniroina jobianona, ie emodomo Jesúdi ñainadate.

36 Jesús iese jaidemo, naimiena iobitallena, illaïma isoi naimie jaillena, comini imaci iniroi diga, naiso motomo jobedimaci.

37 Jerusalémo joide naiso ite nafai muidomo naimie rillanona, naie ituemo ana jaillanona, nana Jesús diga jaidino caimare itimaci. Nana Jesús siño finoca rafuena naimaci jai ciua jira, iena naimaci uibiñuamona, Jusiañamuimo iobillacinona ado eo fecadimaci.

38 Raitimaci:

—¡Cai Illaïma billa! ¡Jusiñamui mamecido bitimïemo cai iobicabillasa! O muidona Jusiñamuidi comini diga uri ite. ¡O finoca rafue muidona Jusiñamuimo iobicabillasa!

³⁹ Naie cominimona dajerie fariseuai raitimaci:

—Maestro, o diga jaidinona llicaillena, naimacina lleta.

⁴⁰ Uai ote:

—Naimaci llicaiïa, biso fuemo ite noficidi cuena marena ñaite.

⁴¹ Jerusalémo Jesús iaïrei ria, iena ciuano, eede.

⁴² Raite:

—Jerusalén itino, Jusiñamui diga omoi uri illena jai biticue. Omoïna naimie cominina itataiacadicue; iadedi iena jitaïñedomoï. Iena jitaïdomoïdena, ico duere sefuiñeitomoï.

⁴³ Jiaïruido omoi bacauai jobaimena finuanona, omoïna cirinoitimaci. Omoi ecido llaïtamaci.

⁴⁴ Omoïna meineitimaci. Omoi uruiaina meineitimaci. Omoi illanona judaïitimaci. Jusiñamui omoi motomo birui illana omoi uiñoña jira, iese omoïmo suite.

Jesúdi Jusiñamui jofomona damieriena dotaja rafue

(Mt 21.12-17; Mr 11.15-19; Jn 2.13-22)

⁴⁵ Jerusalémo Jesús rilla mei, Jusiñamui jofomo jaide. Jusiñamuimo ofomaïaina fecallena, naimïemo toïca llaudaïaina fecallena, nainomo comini jaisoidimaci. Naie cominina ibatajanona, ofomaïaina, toïca llaudaïaiïa diga, damierie fecauïdimaci. Iena ciuanona, naimacina jino orede.

⁴⁶ Raite:

—Ie facaina lloïaïma micori Jusiñamui llogacino jaie cuela: “Cue jofu ite nainomo cuemo comini jüllena” cuela. Ero, ailluena omoi ibataja jira, naimie jofona firiruidino jofona omoi finoca.

⁴⁷ Jusiñamui jofomo nagarui Jesús llofujete. Judüuai illaïcominidi Jesúna meïneiacadimaci;

⁴⁸ iadedi nieïe nibaïñedomaci, nana comini naimie llofuiana eo jitaïlla jira.

20

Jesúdi ie siño uaina llua rafue

(Mt 21.23-27; Mr 11.27-33)

¹ Jusiñamui jofomo Jesúdi cominina llofujete. Jusiñamui rafuena llofujete. Judüuai illaïcomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamaci. Dise billanona,

² jïcanotimaci:

—¿Nie isoïde uaido o finoca rafuena finocabidio? ¿Bu omo iga uai diga o finoca rafuena finocabidio?

³ Jesús dinena uai ote:

—Omoïmo nano jïcanoiticue.

⁴ Juan Bautista micoridi cominina navui bautizade. ¿Bu naimie micorina cominina bautizatate? ¿Jusiñamui? ¿Comini? Cuemo llono.

⁵ Dani coniniri iena siaduanona raitimaci:

—“Jusiñamui” cai fairioïa, caïmo jïcanoite: “¿Bue ñellena naimie micorina ñnoñedomoï? ¿Bue ñellena naimie micori llua isoï bautizañedomoï?”

⁶ “Comini” cai fairioïa, bene itino caina meïneitimaci, Juan micoridi Jusiñamui facaina lloïaïma naimaci raïlla jira.

⁷ Ie jira Jesús uai otimaci:

—Uiñoñedicaí.

⁸ Jesús dinena raite:

—Ie muidona cuemo nie isoide uai illana omoimo lloñeiticue.

Jesúdi marañede maijiraini rafuena llua rafue

(Mt 21.33-44; Mr 12.1-11)

⁹ Nainomo itinomo Jesús llote:

—Jiaie rafue omoimo lloiticue. Iemo cacarei. Daje patrón uvas railla riaraiaina rite. Ie mei ibatajanona jianomo fecade, iena sedallena. Ie mei jiaie eniruemo are illena jaide.

¹⁰ Uvas jai einaila facaise riaraiaina sedaraini dine daje mullaimana orede, naimie facaise iedinona naimie feiñollena; iadedi naie sedaraini naie mullaimana fatimaci. Uvas naimiemo fecañeno abido oredimaci.

¹¹ Ie mei patrón jiaie mullaimana orede. Naimiena fatimaci. Jeare finodimaci. Uvas naimiemo fecañeno abido oredimaci.

¹² Naie patrón jiaimiena orede. Naimiena eo bofedaitajanona jino dotadimaci.

¹³ Iemei patrón comecina facade: “¿Niese nibaíticue? Cue isiruiga jitona oretaiticue. Naimiena nibai jaciruitimaci. Naimie uaina ñinoitimaci”.

¹⁴ Riaraiaina sedaraini naimiena ciuanona, coniniri ñaitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” ñaitimaci.

¹⁵ Naimiena jino dotajanona, naimiena meinetimaci. Iena fidia mei, ¿niese naie patrón nibaíte?

¹⁶ Naimie biite, naie sedarainina meinellena. Ie mei jianona ie illina sedataite.

Naie rafuena cacadino raitimaci:

—Bie isoide rafue suillana jitaiñedicaí.

¹⁷ Naimacimo Jesús eruailano, llote:

—Naie illi sedaraini isoidomoi. Jusiñamui facaina lloraima micori omoina jiaie cuete. Ie ciegafuena raise facañedomoi. Naimie micori cuela:

Jofo finoraini jitaiñena nofici nana naie jofomo ite nofici baifemo jai uaide. cuela. Jusiñamui cominina damierie jaillana naimie micori cuete. Jusiñamui oretagamiena damierie jitaiñenamona, naimie cominina jaiñeitimaci; iadedi Jusiñamui oretagamiena ailluena ñnuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi.

¹⁸ Naie noficina nia ñaiticue. Noficimo bu eicaitaia, bofedate; ia naie nofici bumona ana uai, naimiena saitaite. Ie isoide. Cue llua omoi jamaia, duere sefuitomoi. Iena omoi ñnoñenia, ja muidomo faifitomoi —llote.

Jesúmo gobiernomo ucubena fecajana jicanua rafue

(Mt 21.45-46; 22.14-22; Mr 12.12-17)

¹⁹ Jesús como lloga rafuedo naimacina ñaiana uiñotimaci. Ie jira naie facaiseconi judíuai illaicomini naimiena gaitaacadimaci; iadedi cominina jaciruitimaci.

²⁰ Ie jira naimiena uiñododimaci. Mare rafuedo abi caitadinona oredimaci. Naimie raise uai oñenia, naimiena duere finollena, naimiena facaiacacimaci. Gobernadormo naimiena llogidoiacadimaci.

²¹ Jesúmo llotimaci:

—Maestro, uanaicinona marena llofuecabitio. Nana cominina dauaido llofuecabitio. Jusiñamui rafuedo cai marena jaillana raise llofuetio.

²² Omo rafuena jicanoiacadicaí. Dama Jusiñamuina sedadicaí; iadedi romanos railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —llotimaci.

²³ Naimiena naimaci jifuiana uiñuanona, Jesús dinena uai ote:

²⁴ —Ucube cuemo acata. ¿Bu ie joreño nainomo ite? ¿Bumo jainaiide bie cuega radi?

Uai otimaci:

—César.

²⁵ Jesús raite:

—César iena itedi, Césarmo ille. Jusiñamui iena itedi, Jusiñamuimo ille —raite.

²⁶ Jesúsdi uai raise ua jira naimie llua mona jeare rafuena uiñoñedimaci, naimiena llogidollena. Naimie lluari rajicaillamona, llícaidimaci.

*Jesús dine saduceuai railla comini billa rafue
(Mt 22.23-33; Mr 12.18-27)*

²⁷ Naie facaise dajerie saduceuai railla comini naimie dine bitimaci. “Fiodaillamona jaca buna jilloñeite” raisoidimaci.

²⁸ Jesús mo llotimaci:

—Maestro, cai facaina Moisés micori jaie cuega: “fima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega.

²⁹ Bie rafuena uiñoiacadicaí. Siete amatiai ite. Nano doforamie ie aina ote. Naimie nia uruiainide fiodailla.

³⁰⁻³¹ Ie emodo imie ie ama feciño ona ote. Naimie uruiainide jiai fiodailla. Naie siete digamiedemona iese sefuide.

³² Ja muidomo naie riño jiai fiodaite.

³³ Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

³⁴ Jesús uai ote:

—Birui aina otomoi. Inina otomoi;

³⁵ iadedi fiodaillamona, Jusiñamui diga jaca itino jillua mei, ainitimaci. Ininitimaci;

³⁶ ia Jusiñamui jaienisai isoi illanona, dane fiodaiñeitimaci.

³⁷ Fiodaitino jilluana omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote.

³⁸ Jai fiodaitimaci; ia naimaci joreñuai nia itimaci. Jusiñamuidi dani cagedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite. Naimiemo naimaci duillamona, naimaci abiai diga jilluanona, naimie diga jaca itimaci —llote.

³⁹ Iena cacajano, Moisés micori llogacinuaina llofuerañimona dajerie raite:

—Maestro, raise llotio.

⁴⁰ Ie facaise naimiemo nie isoide rafuena dane jicanuana jaciruitimaci.

*Jesús dinena fariseuai cominimo jicanua rafue
(Mt 22.41-46; Mr 12.35-37)*

⁴¹ Iemei naimie ecimo itinomo Jesús jicanote:

—¿Niese Moisés micori llogacinona llofuerañi Cristona raitimaci? ¿Niese naimiedi David micori jitona raitimaci?

⁴² Salmos railla cuegafuiaimo David micori jaie cuega: Jusiñamuidi cue Namamo llote: “Illaimana o illamona, cue nabeimo ana rai.

⁴³ Ona ñnoñedino o anamo itataitícue”.

⁴⁴ “Cristodi cue Nama” David micorí raite. Iese naimie micorí railla jira, Cristo David micorí afemo faite. Naimiedi dama David micorí jitoñede; ia jiaie ra Nama.

Jesúdi judíuái illaicominina ñaia rafue

(Mt 23.1-36; Mr 12.38-40; Lc 11.37-54)

⁴⁵ Nana comini cacajano, ie llofueganomo Jesús lloste:

⁴⁶ —Moisés micorí llogacinuaina llofuerañimona abina rairui. Illaicominina naimaci itimacidená, naimacina comini cioillena, eo mare iniroina jitaacacabidimaci. Nine naimaci macaria, naimaci jamai bue isoñedínona itimacidená, comini naimacina uaiduana gaidimaci. Comini naimaciri acarillena, ofiracomo uicomo raicadimaci. Rafue ia, naimaci jamai bue isoñedínona comecina facajanona, rafue nama ecimo raicadimaci.

⁴⁷ Feciñuaimona rana ocabillanona, naiñaiñuaina duere finodimaci. Naimiena eo sedadimacidená, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

21

Jesúdi Jusiñamui jofomo duerede feciño ucube fecajana ciua rafue

(Mr 12.41-44)

¹ Jusiñamui jofomo Jesús nia ia, a erodatemo, nainomo ite eenoranomo ucuberedino ucubena joniana ciode.

² Eo duerede feciño menaruñu joniana jiaie ciode.

³ Ie llofueoicaiganomo Jesús lloste:

—Bie eo duerede feciño nana ucuberedino jonia baifemo jonete.

⁴ Naimacimo ailluena ite; iadedi naie ucubemona janore jonetimaci. Naiñaiño eo duerede; iadedi nana naiñaiñoimo ite ucubena jai jonete. Janore jonete; ia Jusiñamuimona naiñaiñodi jiaino baifemo jonete.

Jesúdi Jerusalémo ite Jusiñamui jofo judaiana llua rafue

(Mt 24.1-28; Mr 13.1-23)

⁵ Naie facaise Jesús llofueoicaiganomona dajerie Jusiñamui jofona eruaillanona, raite:

—Mare nofici díga finoca. Eo mare ra nainomo jiaie ite.

⁶ Jesús lloste:

—Birui bie rana ciodomoi; iadedi íco jiairuido nana bie jofomo ite noficiái oni judaisite.

⁷ Jicannotimaci:

—Jusiñamui jofo judaisillana omo jicanoiadacái. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁸ Uai ote:

—Omoína bie rafuena bu jifueñellena, omoi abina rairui. Ailluena comini cue mamecido billanona: “Cristodicue” raitimaci. “Cristo jai bairedé” raitimaci. Naimaci dibeimo iñeno.

⁹ Jobaimiaí illena fidiitomoi; iadedi jaciruiñoeno. Iese suite; iadedi abido nia biñeiticue.

¹⁰ Daje nairai jiaie nairai díga jobairite. Daje gobierno jiaie gobierno díga jobairite.

¹¹ Eo aillena ñuisañuái suite. Díga illanomo cominidi aime guitimaci. Duicuaí eo iite. Monamo comini díga jacirede rana cioitimaci.

12 Bie isoide rafue nia suiñenia, cuena ñnoñedino omoína llogidoitimaci. Omoína gaitatajanona, omoína duere finoitimaci. Naimaci ofiracomo omoína uitimaci. Cárcelmo omoína jonetimaci. Cuemo omoí duilla jira, omoí duere sefuillena, illaicomini dine omoína uitimaci.

13 Naie facaiseconi cue rafuena naimacimo lloitomoi.

14 Omoí abina omoí riidoia, omoí llwana uicodo jarire iñeno.

15 Omoí raise lloillena, omoína canoiticue. Uifloracinona omoímo iiticue. Iemona omoí dibeimo iñedino o uaina uaitanitimaci.

16 Cuena ñnotomoi; ia ailluena cuena ñnoñeitimaci. Cuemo omoí duilla jira, omoína enoitimaci. Iemona dajerie mootiai, dajerie eitiai, dajerie amatai, dajerie nabaiñiai; omoína llogidoitimaci. Omoímona dajeriena meineitimaci.

17 Cue cominina omoí illamona, nana nairai omoína enoitimaci; iadedi cuena fainonocaiñedimie ja muidomo monamo jaca iite. Naimiēna jil-lotaiticue.

18 Omoí ille dinori Jusiñamui omoína raise sedaite.

19 Duere omoí sefuia, cuena fainonocaiñeno jai. Ja muidomo monamo jaca iitomoi.

20 Jerusalén fuedo ruicabene icaifona soldadaui ia, ie judaílle facaiseconi iairei iite.

21 Naiemona omoí jillobillena, duere omoí sefuiñellena, Judeamo omoí illamona, aneduai dine aisi. Jerusalémo omoí ia, naiemona oni jino omoí jai. Jino omoí ia, Jerusalémo omoí jaiñeno.

22 Ie facaina lloraini micoriai cuegafuiai suillanona, naie facaiseconi naimiēna ñnoñedinomona Jusiñamui ibana oite.

23 Naie rafuemo jillobillena, naie facaise urueside riño duere sefuite. Uruena nia jirode riñodi jiai duere sefuite. Naie facaise comini duere sefuitimaci. Llegi cacaitimaci.

24 Lloebi diga meinecana uitimaci. Jiaie nairai dine naimacina jai-iaidoitimaci. Judiañedino sedalle facaise dinori, naimaci anamo Jerusalémo itino iitimaci.

Jesús abido ie bille rafue

(Mt 24.29-35, 42-44; Mr 13.24-37)

25 Jesús nia llofuate:

—Jitoma nagarui illa isoi iñenamona, fivui nagarui illa isoi iñenamona, ucuaí nagarui illa isoi iñenamona, comini jiaie rafue suillena uifnoitimaci. Monailai eo baguamona, comini comeciai eo jarire iitimaci.

26 Nana monamo ite radi jaidisite. Iena raise naimaci uifnoñena jira, nie isoide rafue suillena naimaci uifnoñena jira, jaciruillamona, comini fi-daitimaci isoi iitimaci.

27 Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue.

28 Bie isoide rafue suia, omoína cue jilloitajabillirui iairei illa jira, cue billirui mo raise ocuiri.

29 Iena omoí raise uifnoñena, bie rafuena omoímo lloiticue. Higuera railla riaramo omoí comeciaina faca. Nana amenamo comeciaina faca.

30 Bie eniruemo amena firuillamona, fiemona raire illana uifnotomoi.

31 Ie isoide. Bie rafue ico suia, Jusiñamui ie cominina raire sedajana uifnoitomoi.

32 Uanaicinona omoímo lloiticue. Nana bie rafue suille facaiseconi bie nairai nia iite.

33 Mona fuite. Enirue jiai fuite; iadedi cue lloga uai jaca suite.

³⁴ Jifaillacinona omoi ebirui raillano, omoi ecimo ite rana ebirui raillano, abina rairuicana jai. Cuen a ñnoñedinona duere finollena, ebena abido biiticue.

³⁵ Cue bia, illaimana cue illamona, nana cominimo juez isoi lloiticue.

³⁶ Je jira nagarui abi rairuicana jai. Naie duere sefuille facaise omoi jilloillena, Jusiñamui jai. Ja muidomo monamo cue diga jaca iitomo —lote.

³⁷ Jusiñamui jofomo Jesús nagarui llofueuide. Naiona Olivos railla anedumo, nainomo inillena, jaisoide.

³⁸ Nagarui jiramo naimiena cacareillena, Jusiñamui jofomo comini bisoidimaci.

22

*Judíuai illaicomini Jesúna gaitallena siadua rafue
(Mt 26.1-5, 14-16; Mr 14.1-2, 10-11; Jn 11.45-53)*

¹ Naie facaise pascua railla rafue iairei ite. Naie facaise llomenico guille rafue jai ite. Naie rafue ia, siritate rana jaca guñedimaci. Egiptomona naimaci jaiagai jillobillana comecillena, naie rafue ite.

² Judíuai illaicomini Jesúna meineiacadimaci; iadedi cominina jaciruillanona, naimiena nia meñedimaci.

³ Je facaiseconi Taife ie anamo Judas Iscariote micorina itatate. Judadi Jesús ie doce llofueoicaigano imie.

⁴ Jusiñamui diga nanoca ñairaini dine jaide. Jusiñamui jofona sedaraini dine jai jaide. Jesúna gaitatallena, naimaci diga ñaiaide.

⁵ Iobillanona, naimiemo ucubena fecaacadimaci.

⁶ Judas dinena:

—Jee —raite. Jesús diga ailluena comini ñena facaiseconi naimiena gaitatallena sedade.

*Jesúdi ie fiodaille rafuena llua rafue
(Mt 26.17-29; Mr 14.12-25; Jn 13.21-30; 1 Co 11.23-26)*

⁷ Llomenico guille rafue illanona, judíuai comini toca llauda fauillarui ride.

⁸ Jesúdi Pedro iaiaiaia Juan diga oretajano, raite:

—Cai rafue guille uicodo finollesa omico jai.

⁹ Naimiemo jicanotiaiaiaia:

—¿Ninomo naiena coco finuana jitaideo?

¹⁰ Uai ote:

—Ero, Jerusalémo omico ria, nogodo jinuina uitimiena cioitomico. Naimie jailla jofomo naimiena raca.

¹¹ Jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guticue, cue llofueoicaigano diga?’ ” Iese llono.

¹² Je mei omico afebebamo ite aillue cuartona acataite. Na raruiaia diga ite. Nainomo cai guille fino.

¹³ Jaidiaiaiaia. Naimie llua isoi baitiaiaiaia. Pascua rafue guille finodiaiaiaia.

¹⁴ Guille facaiseconi ia, Jesús ie llofueoicaigano diga nainomo guisaide.

¹⁵ Mesamo gutimacimo, ie llofueoicaiganomo lote:

—Nia cue fiodañenia, omoi diga bie rafue guillena eo jitaideo.

¹⁶ Je cominina cue Moo ico sedalle facaise ia, nana bie rafue fuite.

¹⁷ Jiroracomo jai totaca vino llinocaida, Jusiñamui iobillacinona fecaja mei, raite:

—Mai llino. Biemona nana dajena omoi jiro.

¹⁸ Omoína bene dane iese caimare nabaiñeiticue. Cue Moo sedajanomo omoi diga ico cue ia, nainomo omoína dane iese caimare marena nabaiticue. —Iena jirodimaci.

¹⁹ Llomenicono llinuanona, Jusiñamuimo iobillacinona fecaja mei, iena tairude. Naimacimo fecajano raite:

—Biedi cue abi facai ie. Omoi facaina fioidaiticue. Cue abimo omoi comecina facajano, iena guiño.

²⁰ Naimaci guilla fuilla mei, jiroracomo vino diga dane oruitajanona, naimacina jirotrate. Raite:

—Cue fioidaillamona, dama cue diaillamona, jeacino anamona jilloitomoí. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. —Iena jirodimaci.

²¹ Jesús llote:

—Ero, cuena gaitataitimie cai diga guite.

²² Monamona billanona imana jaidicue. Jusiñamui jitailla isoi jai jaiocaidicue; iadedi Jusiñamuimona cuena gaitataitimie eo duere sefuite.

²³ Temei: “¿Nimie Jesúsna gaitatalle?” daní coniniri siadoside.

Naimaci moto imiëna bu ille rafue

²⁴ Te facaise coniniri siaduana raitimaci:

—¿Cai moto imiëna bu ille?

²⁵ Iena cacajanona, Jesús raite:

—Naimaci jitailla ra finollena, judíuainñedino illaimaiaidi naimaci anamo itinona ocuicabide. “Cai anamo itinona canocabidicaí” raitimaci;

²⁶ iadedi omoimo iese iñede. Omoi moto itimie omoi moto imieñedimiena jailla. Omoimona bu imiëna iacania, omoi mullaïmana naimie jaicabillasa. Omoimona bu imiëna iacania, omoína naimie canocana jaicabillasa.

²⁷ Ero, jiaie rafuedo iena lloiticue. Naimiëna ecallena, naimiëna canollena, patrón anamo ie mullaïai itimaci. Naimaci baifemo patrón illamona, naimacina canollena, ie mullaïai facaina maiñede. Cue anamo itomoi; ia omoína canollena, omoi mullaïma isoi iticue.

²⁸ Birui duere cue sefuidicuemo, cuena fañonocaiñedomoi.

²⁹ Cue Moo cuena illaimana jai itatate. Omoína fetodicue,

³⁰ jiairuido cue illaima illa facaiseconi cue ecimo omoi caimare marena iocire illena. Nainomo omoi judíuai doce nairaiaïna sedaitomoi.

Jesúdi Pedro naimiëna januana llua rafue

(Mt 26.31-35; Mr 14.27-31; Jn 13.36-38)

³¹ Jesús llote:

—Simón Pedro, ero, Taifedi Jusiñamuimo ona jicanote, o ramo faillena;

³² iadedi ori jai jidicue, cuena nia ñnocana o jaillena. Ico cuena raise o ñnoñena mei, cue dibeimo o comeci uai dane o meidoia, iemona jiaie creyentiaï comeciaina ocuiñotaitio.

³³ Pedro uai ote:

—Nama, cárcelmo o ia, nainomo jiaï iiticue. O fiodaia, jiaï fioidaiticue. Ona fañonocaiñeiticue.

³⁴ Jesús uai ote:

—Pedro, jitramo itava nia ññañenia, dacaiño amani cuena janoitio.

Jesús fiodailla facaise iaïrei illa rafue

³⁵ Te llofueoicaiganomo Jesús llote:

—Omoimo ite rafuena uiñoiacadicue. Cue rafue llovena, navui omoína oredicue. “Ucubena uiñoeno, bolsa uiñoeno, meidolle zapatos uiñoeno” omoimo loticue. Naie facaiseconi omoi, ¿bue rana jitaídomoi?

Uai otimaci:

—Cai buena jitaíñedicai.

³⁶ Jesús raite:

—Birui mona omoi duere sefuitomoi. Ie jira abina rairuicana jai. Birui ucube omoimo ia, nine omoi jaia, iena uiño. Bolsa bumo ia, iena uiño. Abina riidollena, omoimo lloebi iñenia, janore iniroina feca, lloebi ollena.

³⁷ Cuenajaie cuegafuiai ja suite. Isaías micori cuena jaie cuega: “Maraiñede rafue finoraima isoi naimie duere sefuite”.

³⁸ Raitimaci:

—Ero, Nama, mena lloebi caimo birui ite.

Jesús uai ote:

—Mena ia, macaibaite.

Jesúdi Getsemanímo Jusiñamuimo jüa rafue

(Mt 26.36-46; Mr 14.32-42)

³⁹ Guille mei, ie llofueoicaigano diga, Jesús jino jaide. Olivos railla anedumo naimie jaisoilla isoi jaide.

⁴⁰ Nainomo ria, naimacimo llote:

—Taife omoína ramo fai raillano, iena omoi iñoñellena, Jusiñamuimo jüi — llote.

⁴¹ Naimie janorede nofici bai faia uaila dinori bai jaide. Caiñici ifodo ana raita, Jusiñamuimo jüide:

⁴² —Ore Moo, o jitaia, cue duere sefuillamona cuena jillota. Cue jitailla isoi cuena finoñeno; iadedi o jitailla isoi cuena fino.

⁴³ Naimie comecina ocuiñotallena, ie facaiseconi monamona Jusiñamui jaienci bite.

⁴⁴ Jesús comeci jarire illamona, naimie rioci faitemo, difai diruena eniruemo uaide.

⁴⁵ Jüa mei, ie llofueoicaigano dine abido bite. Ocosinaillamona, jai inidimaci.

⁴⁶ Naimacimo jicante:

—¿Bue ñellena inidomoi? Mai casi. Taife ramo omoína fai raillano, iena omoi iñoñellena, Jusiñamuimo jüi.

Jesúna gaitalle rafue

(Mt 26.47-56; Mr 14.43-50; Jn 18.2-11)

⁴⁷ Nia Jesús lloia, diga comini naimie dine bitimaci. Judas Iscariote micori naimacina ifode. Naimiedi Jesús llofueoicaigamie. Naimiena llibanollena. Jesús dine iaerei bite.

⁴⁸ Jesús raite:

—Judas, cuena llibanuanona, cuena gaitataiacadio.

⁴⁹ Ie llofueoicaigano naie rafuena jai ciodimaci. Jicantomaci:

—Nama, ¿cai atica lloebi diga ona riidoiticaí?

⁵⁰ Ie facaise naimacimona damiedi Jusiñamui diga nanoca ñairaima ie mullaíma ie nabei jefona jaíbonote.

⁵¹ Jesús dinena raite:

—Dama ite. —Ie jefona naimie jetajamona, naimiena jillotate.

⁵² Diga illaicomini Judas diga Jesús dine bitimaci. Naimacimo Jesús llote:

—Fíriraímadicueta cuena omoi gaitajaíbillá. Omoi lloebina atidomoi. Omoi butaralluna jiaí atidomoi.

⁵³ Nagarui Jusiñamui jofomo omoi motomo llofuecabiticue; iadedi cuena gaitañedomoi. Jusiñamui jitailla jira, cuena omoi gaitaja facaise jai ride. Taife anamo jai itomoi.

Pedrodi Jesúna janua rafue

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Naimiëna gaitaja mei, Jusiñamui diga nanoca ñairaima jofomo uitimaci. Pedro aarena naimaci jinafona racade.

⁵⁵ Nairairiri motomo irai bonua mei, ana raïdimaci. Pedro naimaci diga jiai raide.

⁵⁶ Nainomo ite mullañodi irai bouamona, Pedromo eruaillano raite:

—Bimiedi Jesús diga jaisoidimie.

⁵⁷ Pedro abi janote:

—Naimiëna uiñoñedicue.

⁵⁸ Dallu illanona, jiaimie Pedrona ciuanona llote:

—Jesús ie llofueoicaigano imiedio.

Pedro dinena uai ote:

—Imieñedicue.

⁵⁹ Daje hora illanona, jiaimie raite:

—Bimie galileo imiëna jira, bimiedi Jesús diga ua jaisoidimie.

⁶⁰ Pedro dinena raite:

—O lluana uiñoñedicue. —Ieconì naimie ñaitemo, itava ñaite.

⁶¹ Jesús dobaidacaida, Pedromo erodacaide. Iemei Pedro Jesús lluana uibiñote. Jesús naimiemo jaive llote: “Itava nia ñaiñenia, dacaiño amani cuena janoitio”.

⁶² Pedro jino jaillanona, eo sunaillamona, eo eede.

Jesúna jifanodua rafue

(Mt 26.67-68; Mr 14.65)

⁶³ Ie facaise Jesúna gaitadino naimiëna jifanododimaci. Naimiëna jiai fatimaci.

⁶⁴ Te uisina maitimaci. Llotimaci:

—Siño jitodiosa, ¿bu o faja? caimo llono.

⁶⁵ Iese jifanodocana uitimaci.

Jesúdi judíuai illaicomini dine illa rafue

(Mt 26.59-66; Mr 14.55-64; Jn 18.19-24)

⁶⁶ Monaidemo judíuai illaicomini ofidimaci. Jusiñamui diga nanoca ñairaini ofidimaci. Moisés micori llogacino llofueraini ofidimaci. Naimaci dine naimiëna gaitadino Jesúna uitimaci. Naie illaicomini dinena raitimaci:

⁶⁷ —Ua Cristodiona, iena caimo llono.

Jesús uai ote:

—Omoimo iëna cue lloia, inoñeitomoi.

⁶⁸ Buena omoimo cue jicanoia, cue uaina oñeitomoi.

⁶⁹ Monamona jaie billanona, imana jaidicue. Cuena omoi meiniamona, illaima isoi Jusiñamui ecimo raire iticue.

⁷⁰ Nana jicanotimaci:

—“¿Jusiñamui Jitodicue” raitio?

Uai ote:

—Raise cacadomoi. Imiedicue.

⁷¹ Iëna cacajano, raitimaci:

—Naimie lluana jai cacadicaì. Jiaie comini naimiëna llogiduana jai jitañedicai. “Jusiñamui Jitona iticue” naimie llua jira, Jusiñamuina jai jeare ñaite. Naimie Jusiñamui Jitoñede.

23

*Pilato dine Jesús illa rafue**(Mt 27.1-2, 11-14; Mr 15.1-5; Jn 18.28-38)*

- 1 Judíuái illaicomini naidacaillanona, Pilato dine Jesúsna uitimaci.
 2 Naimiēna llogidotimaci:
 —Cai cominimo marañēdifuena llote. Gobiernomo ucubena cai fecajana rairuide. Naimie jiai raite: “Cristodicue. Illaimadicue”.
 3 Pilato dinena naimiemo jicanote:
 —¿Judíuái comini illaimadio?
 Uai ote:
 —Jii, judíuái illaimadicue.
 4 Jusifiamui diga nanoca ñairainimo Pilato llote. Nainomo bite cominimo jiai llote:
 —Nicinodi naimiemo ifēde.
 5 Uai otimaci:
 —Gobierno joreño comini comeciai jeare feidocana naimie uite. Nana Judeamo uite. Galileamona tainede. Bene jai caimo ride.

Herodes dine Jesús illa rafue

- 6 Iena cacajano, naimie llogidotinomo Pilato jicanote:
 —¿Naimiedi Galilea imie?
 7 —Jii —raitimaci. Galilea enirue illaima Herodes. Naie facaiseconi Jerusalémo naimie illa jira, naimie dine Pilatodi Jesúsna orede.
 8 Jesúsna Herodes cianona, iobide. Naimie finoca rafuena naimie fidia jira, naimiēna cioacade. Siño rafuena naimie finuana jiai cioacade.
 9 Jesúsno ie finoca rafuena are jicanote; iadedi Jesús dinena uaina ofēde.
 10 Ie facaiseconi judíuái illaicomini Jesúsna riire llogidotimaci.
 11 Herodes ie soldaduái diga naimiēna eo jeare ñaitimaci. Illaima jitauga iniroina jitatatimaci. Ie mei Pilato dine naimiēna abido orede.
 12 Iemona nairuido Herodes Pilato diga nabairite. Jaie conimana enoidiamaiai.

*Pilatodi Jesús fodaillana llua rafue**(Mt 27.15-26; Mr 15.6-15; Jn 18.39-19.16)*

- 13 Pilatodi judíuái illaicomini, nainomo ite comini diga, uaidote.
 14 Raite:
 —Bimie cue dine atidomoi. Raitomoi: “Comini comeciai feidocana naimie uite”. Naimiemo jai jicanoticue; ia naimiemo nicinodi ifēde.
 15 Herodes cue dine naimiēna como abido orede. “Naimiemo nicinodi ifēde” jiai raite. Naimiēna cue meinetalena, naimie jaca nicinona finoñede.
 16 Ie jira naimiēna cue sechedotajanona, naimiēna oni oretaiticue.
 17 Naie rafue facaiseconi naga año cárcelmona damiēna jino jamai oretauide.
 18 Pilato llua cacajano, nana comini ado cuiriidimaci:
 —¡Naimiēna oni uiño, naimiēna meinellena! ¡Barrabás cárcelmona jino oreta!
 19 Gobierno diga jobaimena naimie navui finua jira, naie facaise comena naimie meinia jira, Barrabás cárcelmo ite.
 20 Jesúsna naimie jamai oretaiacana jira, comini diga Pilato dane ñaite;
 21 iadedi cuiriidimaci:
 —¡Naimiēna corai! ¡Naimiēna meine!
 22 Pilato dane jicanote:

—¿Nie isoide maraiñede rafuena finode? Naimiena cai meinellena, naimie jaca nicinona finoñede. Naimiena sechedotaiticue. Ie mei naimiena jamai oretaiticue.

²³ Eo riire cuiriidimaci:

—¡Naimiena corai! —Ja muidomo Pilato dinena:

—Jee —raite.

²⁴ Naimaci jitailla isoi Pilato fairiote. Jesúna meinellena lloste.

²⁵ Ie mei Barrabásna cárcelmona jino oretate, naimiena comini jicaja jira; iadedi Jesúna naimacimo fecade, naimiemo naimaci jitailla ra naimaci finollena.

Jesúna coraia rafue

(Mt 27.32-44; Mr 15.21-32; Jn 19.17-27)

²⁶ Jesúna soldaduai oni uitemo, Simón raillamie diga dafafidimaci. Naimiedi Cirene railla enirue imie. Jerusalén onifemona bite. Jesús jinafona naimiena cruzna rocaoicaida sonotate.

²⁷ Ailluena comini Jesúna racadimaci. Ailluena riñoniai eo eecana jaisite.

²⁸ Iena cacajano, Jesús naiñaiñuai dine dobaidacaida, naiñaiñuaimo lloste:

—Jerusalén itiñaiñuai, cue facaina eeñeno; iadedi omoi facaina mai omoi ee. Omoi uruiai facaina mai omoi ee.

²⁹ Ero, jiairuido duere sefuillemona comini raitimaci: “Oiniñuai jiaie riñoniai baifemo duere sefuiñena jira, marena itimaci”.

³⁰ Jusiñamui ricaiillafuemona jilloiacanamona, comini jiai raitimaci: “Ane-duai caimo jaicorillana jitaidicai”.

³¹ Maraiñede rafuena finoñedicue; iadedi jai duere sefuidicue, Maraiñede rafuena finodimaci. Ie jira cue baifemo eo duere sefuitimaci.

³² Naie iaimaiaina meinellena, mena maraiñede iimana jiai uitimaci. Gobierno llogacinona inoñediiamaia.

³³ Hfocoraia eruaila illanomo naimaci ria, Jesúna coraidimaci. Naie maraiñede iaimaiaina jiai coraidimaci. Damie Jesús nabeimo. Jiaimie Jesús jarifebeimo.

³⁴ Jesús ie Moomo lloste:

—Ore Moo, naimaci finoca rafuena naimaci raise uiñoñena jira, bie soldaduai cuena duere finua rafuena feita —lloste. Bu dajerie uille uiñollena, Jesús iniroina jifanoduano soldaduai facasite.

³⁵ Ailluena comini eruaidimaci. Judíuai illaicominidi naimiena jifanoduanona, coniniri raitimaci:

—Naimiedi jiaie cominina duicomona jillotate. ¿Niese dama naimie abina birui jillotañede? Naimiedi Jusiñamui oretagamiedena, Jusiñamui fetocamiedena, fiodaillamona dama naimie abina jillotarede.

³⁶ Soldaduai naimiena jiai jifanododimaci. Ie abi isirena cacaiñellena, naimiemo vino fecajanona,

³⁷ raitimaci:

—Judíuai illaimadiodena, fiodaillamona dama o abina jillota. —Naie vino Jesús jiroñede.

³⁸ Jesús ifogi afeconi rabicimo Pilato cuetatate: “Bimiedi judíuai comini illaima”.

³⁹ Jesús diga coraica iaimaiaimona damie naimiena taigode:

—Jusiñamuiomona bitiodena, nia fiodaiñenamona dama o abina jillota. Cona jiai jillota.

⁴⁰ Jiaimiedi naimiena lletade:

—¿Bue ñellena bimiena taigodio? ¿Ñiese jearede rafuena nia finoacadio? Ja fiodaitio. Iemei Jusiñamui uicomo ja iitio. ¿Ñiese Jusiñamui uicomo o illena jaciruiñedio?

⁴¹ Maraiñede rafuena coco finua jira, duere sefuidicoco; iadedi bimie maraiñede rafuena finoñede.

⁴² Iemei Jesúmo llote:

—Illaimana o illa facaise cuena comeci.

⁴³ Jesús uai ote:

—Uanaicino lloticue. Birui cue diga cue Moo illanomo iitio.

Jesús fiodailla rafue

(Mt 27.45-56; Mr 15.33-41; Jn 19.28-30)

⁴⁴ Jitoma naidai jai itemo, daje amani horas mona jitibicaide.

⁴⁵ Jitoma raise lligaiñoñede. Jusiñamui jofo ie fetaca iniroife ana anaba jillacimo motodo menafe cuararide.

⁴⁶ Jesús ado llote:

—Ore Moo, cue joreñoña feiño. —Ie mei naimie jai fiodaite.

⁴⁷ Soldaduai imaci capitán bie rafuena ciuano, Jusiñamuina jaciruillamona, raite:

—Bimie maraiñede rafuena finoñede.

⁴⁸ Ailluena comini Jesús fiodaillana ciodimaci. Ie mei eo sunaillamona, jogobemo fairuanona, jofomo abido jaidimaci.

⁴⁹ Jesús nabaiñiai bie rafuena aarena ciodimaci. Galileamona bite riñoniai bie rafuena aarena jiai ciodimaci.

Jesús raiafomo jonia rafue

(Mt 27.57-61; Mr 15.42-47; Jn 19.38-42)

⁵⁰⁻⁵² Pilato dine José raillamie jaide, Jesús abina jicallena. Naimiedi illaicomini. Maremie. ñnogamie. Jesúsna meiniana jitaiñede. Arimatea railla nairai imie. Judeamo naie nairai ite. Naimiedi Jusiñamui ie cominina ico sedajanomo illemo ocuride.

⁵³ Pilato:

—Jee —railla mei, Jesús abina cruzmona ana uanona, iena useroi diga ferinote. Nofici ie raiafomo jonete. Nia bu raiafomona jonete.

⁵⁴ Nairui viernes. Sábadorui rille jai iairei illa jira, Jesús abina raiafomo raire jonete.

⁵⁵ Galileamona navui bite riñoniai racadimaci. Raiafona ciodimaci. Naimie abi finuana ciodimaci.

⁵⁶ Ie jira caimare soride rana finollena, naimie abimo jonellena, jofomo jaidimaci. Naie ra finua mei, ie abina raise finollena, raiafomo abido jaidimaci. Ie mei sábadoruimo jafaici otimaci, Moisés micori jai llua isoi.

24

Jesús fiodaillamona jillua rafue

(Mt 28.1-10; Mr 16.1-8; Jn 20.1-10)

¹ Domingo jitiramo monaidemo, naie riñoniai raiafomo jaidimaci, iñaiñuai finoca soride rana uillena.

² Raiafo ibailla nofici oni joillana ciodimaci.

³ Fo jaidemo, Jesús abina cioiñedimaci.

⁴ Uainicaidimaci. Ieconí menamie naiñaiñuai ecimo bairediaimaiaí. Iaimaiaí iniroi eo ququirede.

5 Iaimaiaina jacinailamona, ifogi ana jítadacaidimaci. Naie iaimaiaí dinena jicanote:

—¿Bue ñellena fiódaitimie illanomo cajedimiena jenodomoí?

6 Galileamo navui naimie omoímo llogacinona comeciñedomoí.

7 Naimie raite: “Monamona billanona, imana jaidicue. Jusiñamui jitailla jira, marañede rafue finoraini anamo iiticue. Cuená coraitimaci. Darui amani illanona, fiódailamona jilloiticue” raite.

8 Iemona ie llogacinona jai comecitimaci.

9 Raiafomona abido jaidimaci. Ie once llofueoicaiganomo naiñaiñuai ciua rafuena llotimaci. Naie llofueoicaigano diga itinomo jiai llotimaci.

10 Naie riñoniaimona María Magdalena ite. Juana ite. María ite. Naiñaiñodi Jacobo ei.

11 Naie riñoniaidi iena llotimaci; iadedi ie rafuena cacadinodi iena inoñedimaci.

—Jamaifuena ñaitomoí —raitimaci.

12 Iena cacajano, Pedro aisicana raiafomo jaide. Nainomo ria, ana jítadacaida, fo erodate. Useroi joillana ciode. Iemo ie comecina facajano, jofomo abido jaide.

Mena llofueoicaiganomo Jesús bairia rafue

(Mr 16.12-13)

13 Jesús jilluarui mena llofuega iaimaiaí Emaús railla nairaímo jaidiaimaiaí. Jerusalémóna ñibai once kilómetros ite.

14 Nana Jesúmo suide rafuena ñaiano jaidiaimaiaí.

15 Iaimaiaí ñaianona, Jesús iaimaiaí diga dafaiñillanona, iaimaiaí diga jaide.

16 Jusiñamuidi iaimaiaina naimiena uiñotañena jira, naimiena uiñodiaimaiaí.

17 Iaimaiaímo Jesús jicanote:

—¿Buena ñaitomíco? —Ieconí naidadatiaimaiaí. Sunaitiaimaiaí.

18 Naie iaimaiaimona damiedi Cleofas. Naimie uai ote:

—¿Niese Jerusalémo birui suide rafuena uiñoñedio? Ñibai como ridio. Nana jiai comini iena uiñotimaci.

19 Uai ote:

—¿Nie isoide rafue suide?

Uai otiaimaiaí:

—Nazaret ie Jesús rafue. Naimiedi Jusiñamui facaina lloraíma. Diga siño rafuena finode. Cominina raise llofue. Jusiñamui mona naimiedi maremie. Cominimona naimie maremie;

20 iadedi cai illaicomini naimiena gaitatatimaci. Naimiena cruzmo coraitatimaci.

21 Jusiñamui naimie cai ñine orecamiemo comecina facadicoco. Naimie cai illaimana illemo ocuridicoco; ia naimie jai fiodaite. Naimie fiódailamona darui amani jai ite.

22 Cai cominimona dajerie riñoniaibirui caina jacinaitadimaci. Jitiramo Jesús raiafomo jaidimaci;

23 iadedi naimie abina cioñedimaci. Abido naimaci bia: “Jusiñamui jaienisaína ciódicaí” raitimaci. Naie jaienisaí naimacimo llote: “Naimiedi caje”.

24 Iemei caimona dajerie raiafomo jaidimaci. Riñoniaí llua isoi ciódimaci. Jesús abina cioñedimaci.

25 Jesús dinena uai ote:

—Abi uifnoñedomico. Nana Jusiñamui facaina lloraini micoriai cuegafuiaina inoiacaiñedomico.

²⁶ Cristo duere sefuillena cuetimaci. Jusiñamui iena jitaillena cuetimaci. “Naimie nia illaimana jaiñenia, duere sefuite” cuetimaci.

²⁷ Iemei Jesús iaimaiaina llofujete. Moisés micori cuegafuiaina jiai llofujete. Nana Cristona cuegafuiaina llofujete.

²⁸ Emaús dine iairei naimaciria, Jesús nia jaiacademo,

²⁹ naimiena caididiaimaiaia. Raitiaimaiaia:

—Coco diga fiebi. Jitoma jai ana ite. Jai abi juanide, nia o jaillena. —Ie muidona iaimaiaia diga fiebillena fo jaide.

³⁰ Nailli guitimacimo, llomenicono Jesús llinuano, Jusiñamuimo iobil-laciona fecade. Iena tairuano, iaimaiaimo fecade.

³¹ Jusiñamui jitailla jira, ieconi Jesúsna uifnotiaimaiaia. Iemei iaimaiaimona naimiena jai cioicaiñena.

³² Daimaiaia ñaitiaimaiaia:

—Coco diga naimie ñaia, coco comeci caimare ite.

³³ Naie dacaiño Jerusalémo abido jaidiaimaiaia. Jesús llofueoicaigano naimaci nabaiñiaia diga danomo illana baitiaimaiaia.

³⁴ Iaimaiaimo llotimaci:

—Cai Nama fiodaillamona jai jillode. Simón Pedromo jai bairede.

³⁵ Ie mei naisona iaimaiaia jailla rafuena llotiaimaiaia:

—Cai guiticaimo, naimiena uifnoticoco —llotiaimaiaia.

Jesús ie llofueoicaiganomo bairia rafue

(Mt 28.16-20; Mr 16.14-18; Jn 20.19-23)

³⁶ “Jesúna ciodicoco” llotiaimaiaimo, ie llofueoicaigano motomo Jesús bairede. Llote:

—Jai biticue. Uri omoi i.

³⁷ Naimiena ciuamona, jacinaitimaci. “Joreñoña ciodicai” comeciaina facajona, jiai jaciruitimaci.

³⁸ Naimacimo Jesús jicanote:

—¿Bue ñellena jaciruitomoi? ¿Bue ñellena cue bene illana inoñedomoi?

³⁹ Cue onollimo eruai. Cue eillimo eruai. Jesúsdicue. Cuena jeta, raise uifnollena. Cuemo llicisi ite. Cuemo illaici ite. Jamai joreño isoifnedicue.

⁴⁰ Iena llua mei, coraiafona naimaci cioillena, ie onolli ie eilli diga acatate.

⁴¹ Iobiacadimaci; iadedi nia raise inoñedimaci. Iemo comeciaina nia facadimacimo, naimacimo jicanote:

—¿Bue illa, cue guillena?

⁴² Naimiemo janorede jai ruica lliciaina fecadimaci.

⁴³ Iena feiñuanona, rite. Iena ciodimaci.

⁴⁴ Naimacimo llote:

—Navui omoi diga cue ia, diga rafue omoimo lloticue. Moisés micori cuena cuete. Jusiñamui facaina lloraini micoriai cuena cuetimaci. Jusiñamui jitailla jira, iena jai suide.

⁴⁵ Naie facaiseconi naimacina naie cuegafuiaina raise uifnotade.

⁴⁶ Naimacimo llote:

—Jusiñamui facaina lloraini micoriai cuena jaie cuetimaci: “Cristo duere sefuite. Fiodaillamona darui amani illanona, jilloite.

⁴⁷ Naimie muidona comeciai iuai meidumona, Jusiñamui naimaci jeacinona oni dotaite. Naimie rafue nana nairaimo damierie lloitimaci". Omoimo biena lloiticue. Cue rafuena lollena, Jerusalémo taineitomoí.

⁴⁸ Bie rafuena ciodomoi. Iena lloitomoi.

⁴⁹ Ero, navui naimie llua isoi, cue Moo Joreño omoi dine oretaiticue. Jerusalémo fiebi, naimie Joreño omoi feiñolle dinori. Cue rafuena omoi lollena, naimie Joreño omoi comeciaina ocuiñotaite.

Jesús monamo jailla rafue

(Mr 16.19-20)

⁵⁰ Betania railla nairai dine Jesús naimacina ifode. Marecinona naimacimo llote.

—Jusiñamui omoína raise marena canoite —llote.

⁵¹ Iena naimacimo lluanona, monamo jaide.

⁵² Jerusalémo eo caimare abido jaidimaci.

⁵³ Jusiñamui iobillacino fecajano, Jusiñamui jofomo nagarui itimaci. Mai. Macaibaite. Lucadicue.

JUAN JESUCRISTO ENIRUEMO ILLA RAFUE CUIAFUE

Jesucristo rafue iese tainede

¹ Jaca bue nia iñenia, Cristo jaca ite. Jusiñamui uai naimiemo illamona, naimie caina Jusiñamuina birui uiñotade. Jusiñamuimo jaca duide. Naimiedi Jusiñamui.

² Jusiñamui diga jaca nano ite.

³ Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede.

⁴ Naimie muidona iticai. Naimiena cai iñuamona, jaca iiticaí. Lligaiñora diga rana cai ciua isoi, caina Jusiñamuina uiñotade.

⁵ Naimiena iñnoñedino jitiredinomo itimaci isoidimaci. Naimaci comeciai jitirede. Ie uaido naimaci comeciaina lligaiñote, naimaci comeciaino ite jeacino oni jaillena.

⁶⁻⁷ Naimaci comeciaina lligaiñotimiena lollena, Juan micori lluacinodo Jusiñamuina nana comini iñollena, Jusiñamuidi Juan Bautista raillamie micorina oretate.

⁸ Juan naie lligaiñoñedimie; iadedi Juan naimiena lluaibite.

⁹ Nanoca lligaiñotimiena llote. Nanoca lligaiñotimiedi eniruemo billanona, nana comini comeciaina lligaiñote.

¹⁰ Naimie muidona comini comuidimaci; iadedi naimie bene billa meinoconi, comini dinena naimiena uiñoñedimaci.

¹¹ Ie nairai illanomo naimie ride; iadedi nana cai nairai naimiena feiñoñedimaci.

¹² Damierie naimiena feiñotimaci. Naimiena iñnotimaci. Ie uaido naimiedi naimacina Jusiñamui uruiaina itatate.

¹³ Iena Jusiñamui jitailla jira, Jusiñamui uruiaina jaidicai. Comemona jeiciamona iena jaiñedicai. Comini jitaillamona iena jaiñedicai. Buena cai finuamona iena jaiñedicai.

¹⁴ Iemo caina Jusiñamuina uiñotallena, Jusiñamui Jito comena jaide. Naie faise cai comini motomo naimie ite. Cai cominina eo duenaite. Uanaicinona llouide. Ie siño uaina uiñocana jaidicai. Jusiñamui dajede ie Jitona ciodicai.

¹⁵ Juan micori naimiena cominimo jaie llote:

—Birui omoimo lloticue; iadedi jiaimie cue ifo meidoite. Cue baifemo faite. Cue nia jeiciñenia, naimiedi jaca ite —llote.

¹⁶ Jesucristo caina eo duenaillamona, birui caina eo canocabide.

¹⁷ Moisés micori Jusiñamui uaina jaie llote; iadedi iemona Jusiñamui caina duenaillana jaie raise uiñoticaí. Jesucristo lluamona Jusiñamui caina duenaillana jaie raise uiñoticaí. Naimiemona uanaicinona jaie raise cacadicai.

¹⁸ Jaca buna Jusiñamuina cioñede; iadedi dajede ie Jito caina naimiena uiñotade. Ie Moo diga danomo illamona, Jesús naimiena uiñote.

Juan Bautista micoridi Jesúna llua rafue

(Mt 3.11-12; Mr 1.7-8; Lc 3.15-17)

¹⁹ Jerusalémona Juan micori dine judíuai illaicominidi Jusiñamui diga ñairainimona dajerie oredimaci. Jusiñamui diga ñairaini canorainimona dajerie jiaie oredimaci. Naimiemo:

—¿Budío? —raillano jicanotadimaci. Juan dine rillanona, raitimaci:

—Cai Jilloitaraïma biite raillamiemo ocuridïcai. Cristo raillamie billemo ocuridïcai. ¿Odi naimiedio? —raillanona jïcanotïmaci.

²⁰ Naimie dinena janofiede; ia:

—Imieñedicue —raite.

²¹ Dane naimiemo jïcanodosite:

—¿Budïo? ¿Elías?

Juan micori dinena uai ote:

—Eliañedicue.

Raitïmaci:

—Moisés micori Jusiñamui facaina lloraïma ïco billena jaie llote. ¿Odi naimiedio?

Juan dinena raite:

—Ieñedicue.

²² Dane jïcanotïmaci:

—¿Budïo? Caimo llono, cai oretatinomo cai lollena. ¿Nïese naimacïmo ona lloïticai?

²³ Juan dinena raite:

—Jofue iñenanomo ado llotïmedicue. Isaías micori jaie llua isoi llocabitïcue: “Cai Nama biite. Naimie naiso atona raise fino”. Iese llotïcue; ia naimie uaina omoi feiñollena, omoi comecïai raise finollena ñaitïcue.

²⁴ Juan dine bitinodi fariseuai comini.

²⁵ Nia jïcanoïacadiïmaci:

—Odi cai Jilloitaraïmañenia, o Eliañenia, o Moisés micori llotïmieñenia, ¿bue ñellena cominina bautizadiïo? ¿Nïe isoïde uai omoïte? ¿Nïnomona o uaina otïo?

²⁶ Juan dinena uai ote:

—Cominina bautizadicue; iadedi omoi motomo omoi uiñoñegamie jai ite.

²⁷ Naimie cue ifo meïdoïte. Cue baïfemo faïte. Jamai bue cue isoïlla jira, naimie illafomo cue riñena jira, naimïena canonidïcue.

²⁸ Naïe rafuedi Betábaramo suïde. Jordán raïlla ille ruïcafebeïmo ite. Nainomo Juan bautizauïde.

Juan micori Jesúna dane llua rafue

²⁹ Ie areruido Juan micoriði Jesús naimie dine billana ciuano, naimïena raite:

—Ero, Jusiñamui Jito toïca llauða mamecido jai bite. Cai jeacino facaina faga llauða ifomo Jusiñamui ie Jitona jai orede. Naimie fallemona comini jeacinona dotaite.

³⁰ Navui naimïena ñaitïcue. Llotïcue: “Cue ifo jiaïmie meïdoïte. Jamai bue isoïdicue; iadedi naimie jamai bue isoïñede. Cue nia jeicïñenia, naimïedi jaca ite”.

³¹ Cue dine naimie nia biñenia, naimïedi cai Jilloitaraïmana uiñoñedicue; iadedi cominina bautizallena bene itïcue, cai cominïmo naimïena lollena.

³² Juan jiaï llote:

—Monamona ucugi isoi Jusiñamui Joreño ana billana cioidïcue. Jesúmo baïte.

³³ Naimïedi cai Jilloitaraïmana nia uiñoñedicue; iadedi cominina bautizallena, cuena oretagamïedi jaïe cuemo llote: “Cue Joreño ana billana damïemo baïllana ïco cioïtio. Cue Joreño baïllamïedi cue Joreño omoïmo fecaïte”.

³⁴ Naïe rafuena cioidïcue. Iemona naimïedi Jusiñamui Jitonana llotïcue.

Jesús ie fetoacaga comini ie rafue

³⁵ Ie areruido Juan micori llofueoicaiganomona menamie Juan micori diga ia,

³⁶ Juan micori Jesús macarillana ciuano, raite:

—Ero, Jusiñamui Jito toica llauda mamecido jai bite.

³⁷ Juan micori diga itiaimaiaia naiena cacajano, Jesús racadiaimaiaia.

³⁸ Jinafo dine erodajanona, Jesús iaimaiaia ciede. Iaimaiaimo jicanote:

—¿Buena jitaicomico?

Iaimaiaia dinena uai otiaimaiaia:

—Rabbi, ¿ni o jofo? ¿Ninomo itio? —uai otiaimaiaia. Rabbi oni dobañuamona: “Llofueraima raillamie”.

³⁹ Jesús nai iaimaiaia uaina ote:

—Mai. Cue diga bi, omico uifollena. —Ie jira jaidiaimaiaia. Jesús illanona ciodiaimaiaia. Jitoma nia a illa jira, nairuido naimie diga fiebidiaimaiaia. Jitirecaidemo oni jaidiaimaiaia.

⁴⁰⁻⁴¹ Naie iaimaiaimona damie Andréna mameciredimie. Jesús dinena naimie jaidemo, ie ama nano jenuaide. Naimie amadi Simón Pedro. Naimiena baillanona, lloste:

—Jai cai cominina Jilloitaraimana baiticue. Cristo raillamiena baiticue.

⁴² Ie mei Jesús dine naimiena uite. Jesús naimiena eo eruailanona, raite:

—Birui o mamecidi Simón. Juan ie jitodio. Biruimona Cefana jiai mamecirenitio —raite. Oni dobañuacidi Pedro.

Jesús menamie uaidua raufe

⁴³ Ie areruido Jesús Galileamo jaiacade. Felipeba baillanona raite:

—Cue llofegamiena o jaillena, cue diga coco jaillesa, mai cue diga bi.

⁴⁴ Felipe di Betsaida nairai imie. Andrés iaimaiaia Pedro diga daje nairai iaimaiaia.

⁴⁵ Jesús naimiemo llua mei, Felipe di Natanaelna oni jenuaide. Higuera railla riarana naimiena baillanona, raite:

—Moisés micori jaie ciegamiena jai baiticue. Jusiñamui lloraini micoriaidi naimiena jai jiai cuetimaci. Naimiedi Jesús. Nazaret imie. Ie moodi José.

⁴⁶ Natanael naie nairaina uaitajanona raite:

—Nainomo mare comedi iñede.

Felipe dinena raite:

—Naie o uifollena, cue diga mai bi.

⁴⁷ Jesúmona iaimaiaia iaie ia, Jesús dinena lloste:

—Ero, buna jifueñegamie billa. Nanoca Israel imie bite.

⁴⁸ Natanael dinena uai ote:

—¿Bu cuena llogao? ¿Niese cuena uifotio?

Jesús uai ote:

—Felipe ona ailli nia baiñenia, higuera railla riarana anamo o illana jai uifoticue.

⁴⁹ Jacinaillamona, Natanael dane uai ote:

—Maestro, odi Jusiñamui Jitodio. Cai comini illaimadio.

⁵⁰ Jesús dinena uai ote:

—Amena anamo o illana cue uifua jira, cuena ñnotio. Diga siño rafuena ciojito. Bie rafue baifemo finuana ciojito.

⁵¹ Jusiñamuimona baillanona, imana jaidicue. Unaicino omo lloticue. Mona ecorillana o cioia, Jusiñamui jaienisaie cue dine billena cioitio. Cuemona abido jaillena jiai cioitio.

2

Jinuimona Jesús vino finua rafue

¹ Menarui illanona, Galileamo Canámo iima ie ai uarafue ite. Rafue nama uaidua jira, nainomo Jesús ei jaide.

² Jesús jiai uaidoga. Ie llofueoicaiganodicaí jiai uaidogacai.

³ Vino cueillamona, Jesús ei Jesúmo llote:

—Vino jai iñede.

⁴ Jesús dinena uai ote:

—Quei, ¿bue ñellena iese cuemo llotio? Siño rafue cue finolle facaisedi nia riñede.

⁵ Iemei ie eidi rafue nama mullaiaimo llote:

—Naimie omoimo lluaña fino.

⁶ Jinui nainomo eenollena, nainomo seis noficimona finoca llerodana raisoide. Naimona jinuína ouidimaci. Marena illena, cai einamací llua isoi, jofomo naimaci ria, naimaci abiaína llereuidimaci. Naga lleroda nibai cinco latas totaca.

⁷ Mullaiaimo Jesús llote:

—Naie llerodaiaina jinui diga oruita. —Pozomona jinui atiano, naie llerodamo toidimaci.

Iena finua mei,

⁸ Jesús naimacimo llote:

—Llerodamona janore jisa uanona, rafue nama dine uiño.

⁹ Naie facaiseconi naie jinuidi vinona jaide. Rafue nama naiena facade. Naimiedi ninomona naie vino uana uiñoñede. Dani nainomo ite mullaiaí uiñotimaci. Jirua mei, ai otimie uaiduano,

¹⁰ raite:

—Rafue bu finoia, eo caimarede vino nano fecade. Comini ailluena jirua mei, janore caimarede vino fecade; iadedi iese fecañedio. Eo mare vino jinafona fecadio —raite.

¹¹ Galileamo Canámo Jesúsí siño rafuena nano finode. Iemona caína ie uai siñona uiñotade. Ie muidona naimie siño Jitonana iñoticaí.

¹² Rafue fuilla mei, Capernaumo Jesús ie ei diga, ie amatiaí diga, ie llofueoicaiganodicaí diga jaide. Nano nigarui nainomo iticaí.

Jusiñamui jofomona Jesúsí rana fecarainina dotaja rafue

(Mt 21.12-13; Mr 11.15-18; Lc 19.45-46)

¹³ Pascua railla rafue iaire iacana jira, Jerusalémo Jesús cai diga jaide. Egiptomona cai jaiagai jillobillana comecillena, naie rafue ite.

¹⁴ Rillano, Jusiñamui jofomo diga rana fecarainina ciode. Ucube ollena, nainomo juraretaiaí, toica llaudaiaí, ucugiaí fecauidimaci. Ucubena meidorainidi jai itimaci.

¹⁵ Naimaci ocainaiaí diga naimaci jino juillena, rao Jesús uanona, iena lleride. Naimaci ucubena judaide. Mesaiaína oni caitade.

¹⁶ Ucugiaína fecarainimo llote:

—Omoi ucugiaína jino uiño. Cue Moo jofomo ra feca-fecajana jitaiñedicue —llote.

¹⁷ Iemo Jusiñamuina lloraini micoriai cuegafuaina jai comeciticaí. Iese jaie cuela: “O jofona cue riiduamona, jiaíno cuena meinetaítimaci”.

¹⁸ Nainomo ite judíuaí illaicomini dinena raitimaci:

—¿Ñie isoide uaido naimacina jino oredio? Siño rafuena fino, siño uai omo illana cai uiñollena.

¹⁹ Jesús uai ote:

—Bicona judai. Darui amani maijiamona iena dane nillana fuidoiticue.

²⁰ Dane raitimaci:

—Cuarentiséis años bicomo maijidimaci, iena finollena. ¿Niese iena darui amani illanona, iena dane nillana fuidoitio?

²¹ Iese raitimaci; ia Jesúdi Jusiñamui jofona ñaiñede. Dama ie abina ñaite. Fiodaillamona ie jilloillena ñaite.

²² Jesús fiodaillamona naimie jillua mei, ie llofueoicaiganodicai bie lluacinona comeciticai. Ie jira naie ciegafuena innoticai. Jesús lluacinona jiaí innoticai.

Jesúdi comini comeciaimo iticinu llua jitañena rafue

²³ Pascua railla rafue facaiseconi Jerusalémo Jesús ia, diga siño rafuena finode. Ie jira ailluena comini naimie uaina innotimaci. Coniniri raitimaci:

—Naimiedi cai Jilloitaraima.

²⁴ —Naganomo comeciaina naimaci facaja jira, naie cominina naimie uiñuamona, Jesús naimaci motomo iacaiñede.

²⁵ Naimaci comeciaimo iticinuaina naimie eo raise uiñua jira, comini rafuena naimiemo bu llua jitañede.

3

Nicodemo Jesús diga ñaia rafue

¹⁻² Judíuai illaicominimona damiedi Nicodemo. Naimiedi fariseo imie. Naiona Jesús dine billanona, raite:

—Maestro, cai cominina llofuellena, Jusiñamui ona orede. Iena uiñoticue. Siño rafuena o finua jira, Jusiñamui uai omo illana uiñoticue.

³ Jesús dinena uai ote:

—Raise llotio; ia daje rafue omo lloticue: Uanaí omo lloticue. Dane abido comonori o jeiciñenia, Jusiñamui ie cominina sedajanomo jaca initio.

⁴ Nicodemo abido jicanote:

—¿Niese eimie ie ei jeraimo dane iite? ¿Niese dane comonori jeiciite?

⁵ Jesús uai ote:

—Uanaí omo lloticue. Jusiñamui ie comini sedajanomo o illena, dama o eimona jeiciñellio. Jusiñamui Joreñodo bu dane comonori comuitañenia, Jusiñamui ie cominina sedajanomo jaca iñeite.

⁶ Comemona cai comuitaia, jaca comedicaí; iadedi Jusiñamui Joreñodo cai comuitaíadedi, Jusiñamui uruedicaí.

⁷ Omo dane lloticue: Comonori jeicia. Ieri rajicaiñeno.

⁸ Iena o raise cacaillena, jiaie rafuedo iena lloticue. Aifidi ie jitailla dine sairide. Iena cacadio; iadedi ninena billana uiñoñedio. Nine jaillana jiaí uiñoñedio. Ie isoide. Niese Jusiñamui Joreño cominina comuitajana jiaí uiñoñedio.

⁹ Nicodemo dane jicanote:

—¿Niese biedi dane iite? Raise cacaiñedicue.

¹⁰ Jesús uai ote:

—Jusiñamui rafuena omoí cominina llofuecabitio. Jusiñamui rafuena omo lloticue; ia iena raise cacaiñedio.

¹¹ Uanaicinona omo lloticue. Abi uiñuamona omo lloticue. Cue cúa rafuena lloticue; iadedi cue llua innoñedio.

¹² Bene ite rafuena cue lloia, iena innoñediota, monamo ite rafuena cue lloia, iena jiaí raise innoñeitio.

¹³ Eniruemona monamo jaca buna jaiñena jira, monamo ite rafuena bu raise uiñoñede. Monamona cue billa jira, nainomo abido jaiticue. Ie muidona nainomo ite rafuena uiñoñoticue.

¹⁴ Monamona biticue; ia amenamo fiодaiticue. Jofue iñenanomo Moisés micori jaio joreño amenamo jaie cuinade. Jaioniaí ainillamona comini fiодaiñellena iena cuinade. Comini ie isoi jilloillena, ie isoi cuena coraitimaci.

¹⁵ Cue fiодaillamona bu cue uaina iñoia, monamo jaca iite.

Jusiñamuidi cominina eo isiruilla rafue

¹⁶ Jusiñamuidi cominina eo isiruilla jira, comini dine ie damiede Jitona orede. Ie Jitona naimaci iñollena, naimiena orede. Naimiena iñuamona, monamo jaca itimaci. Jiaí faifiñeitimaci.

¹⁷ Naimacina duere finotallena ie Jitona oreñede; iadedi naimaci jeacinomona jilloillena, naimiena orede.

¹⁸ Jusiñamuidi Jesús uaina iñotinona jaca duere finoñeite; iadedi ie dajede Jitona uaina naimaci iñoñena jira, Jusiñamui duere finollicinono anamo jai itimaci.

¹⁹ Comini comeciaina lligaiñollena, Jusiñamui Jito bite. Jeacino comeciaino illana naimaci uiñoñollena, naimaci comeciaina lligaiñuabite; iadedi naimaci comeciái jitiredinomo iacana jira, jearede rafue naimaci finua muidona, naimiena jitañedimaci. Ie jira Jusiñamui naimacimo duere finollicinona anamo jai itimaci.

²⁰ Naimie finoca rafue bai raillano, naga jeacino finoraíma ie comeci lligaiñuana jitañede;

²¹ Ia Jusiñamui jitaillacinona finodino naimaci finoca rafue baillena, lligaiñotimie dine marefodo bitimaci.

Juan micoridi Jesúsna dane ñaia rafue

²² Digarui illanona, Jesús ie llofueoicaiganodicaí diga, Judea railla eniruemo macaricana jaídicaí. Nainomo diga irui fiebidicaí. Llofuiamona iñotinona bautizacana uiticaí.

²³⁻²⁴ Nia cárcelmo iñenia, ailluena jinui nainomo illa jira, Enón railla naíraímo bautizajanomo Juan micori jiaí ite. Salim railla naíraí iaírei ite.

²⁵ Naie facaise Juan micori llofueoicaigano judíuaí imie diga bautizajana siadotimaci.

²⁶ Ie muidona Juan micori dine billanona, raitimaci:

—Maestro, navui Jordán ruica dine damie billena llotio. Naimiena o bautizallena, o dine navui bite; iadedi birui naimiedi cominina bautizade. Ailluena comini naimie dine jaioidimaci. O dine jai raise biñedimaci.

²⁷ Juan uai ote:

—Jusiñamui ie uai fecañedena, Jusiñamui facaina buna jaca buena finonide.

²⁸ Cue lluana navui cacadomoi. Lloticue: “Cai comini jilloitaraímañedícue. Cristoñedícue. Naimie billena cue lloillena, Jusiñamuidi naimie uicomo cuena orede”.

²⁹ Jiaíe rafuedo iena lloticue. Damie ie aina ua mei, dama naimiemo duide. Ie aina ua rafue facaise, naimie nabai iena ciuano, ieri jiaí iobide. Ie isoide. Comini cue dine navui biñoidimaci. Birui Jesúsno jaioidimaci. Naimiemo jai duidimaci. Iena cue cacajamona, ieri iobidícue.

³⁰ Comini naimie uai siñona uiñuana jitaídícue. Comini cue jamai bue isoidimiena uiñuana jiaí jitaídícue.

³¹ Jamai comedícue. Ie jira eniruemo ite rafuena llocabiticue. Jusiñamuimona Jesús billa jira, cai baifemo faite.

³² Ie Moo illanomo cıua rafuena llote. Ie Moo illanomo cacaja rafue jıai llote; iadedı eo janore comını naimıena ınotımacı.

³³ Naimıena ınotımıedi Jusiñamui uanaicinona luana raise uıñote.

³⁴ Jusiñamuidi ie Joreño ie Jitomo caidıñeno fecaja jira, naimıe Jusiñamui uaina llocabite.

³⁵ Jusiñamuidi ie Jitona isiruite. Ie jira naga rafue naimıemo fecade.

³⁶ Bu Jusiñamui Jitona ınoia, Jusiñamui illanomo jaca iite; iadedı bu naimıena ınoñenia, Jusiñamui illanomo jaca ıñeite. Jusiñamui rıcaıllafue anamo jai ite.

4

Galileamo Jesús jailla rafue

¹⁻² Naie facaise aılluena comını Jesúmona fueotımacı. Iemei naimıe dıbeıdo bautızadımacı. Naimacına naimıe bautızallena, janore comını Juan dine jaide. Jesúdi bautızañede. Dani ie llofueoıcaıganodıcaı bautızadıcaı. Farıseuıaı bie rafuena fıdıano, iena Jesús uıñua jira,

³ Judeamona Galileamo Jesús caı dıga dane abıdo jaide.

Samaria ıñaiño dıga Jesús ñaia rafue

⁴ Galileamo jaıllena, Jesúdi Samaria raılla enıruıe dıbeıdo jaiacade.

⁵ Samarıamo caı rıa, Sicar raılla nairıımo iareı rıllano, daje pozomo rıdıcaı. Naie pozodı Jacob mıcorı jaie fınoıa. Jacob mıcorı naie pozo illano ie jıto José mıcorımo jaie fecade.

⁶ Jıtoma nıdadı itemo, naie pozo fuemo caı rıllano, Jesús ana raıde. Are macarıllanona, jafaıcı ote.

⁷⁻⁸ Jesús pozomo fıebıcaılla meınona, Sıcarımo jadıcaı, guılle ollena. Caı jaılla meı, Samaria ıñaiñodı jınuı ollena, pozomo bıte. Jesús nııñaiñoımo jıcade:

—Jınuına cue ine, cue jırollesa.

⁹ Nııñaiñodı uai ote:

—Judıo ımıedıo. Samaria ıñaiñodıcue. ¿Nıese cuemo jınuına jıcadıo? — Nııñaiño ıese raıte, judıuıaı Samarıa comını dıga ñairıınına jira.

¹⁰ Jesús dınena dane uai ote:

—Jusiñamui omo fecaacalle ra uıñotıodena, o dıga ñaitımıena uıñotıona, cuemo jaca itataıte jınuına cuemo jıcadıo. Iemeı omo iena fecadıcue.

¹¹ Nııñaiño uai ote:

—¿Nıese bıe pozomona jınuına oıtıo? Eo ana ite. ¿Nınomona jaca itataıte jınuına oıtıo?

¹² Caı usuma Jacob mıcorı bıe pozo caımo jaie ıñonocaıga. Nıemona naimıe mıcorı jaie jırode. Ie uruıaı mıcorıaı jıaı nıemona jırodımacı. Ie ocadınaıaı dajemona jıaı jırodımacı. Caı usuma mıcorı baıfemo faıñedıo —raıte.

¹³ Jesús uai ote:

—Nagamıaıaı bıe jınuı jırua meı, dane jıroacanıte;

¹⁴ İadedı cue fecalle jınuına jırua meı, dane jıroacıñenıte. Cue fecalle jınuı, torafo ılla ısoı, naimıemo jaca iite. Jusiñamui dıne ıllena, naimıena jaca itataıte.

¹⁵ Nııñaiño naimıe uai ote:

—Ero, cue dane jıroacıñellena, bene dane cue bıñellena, o lloga jınuı cuemo ıne.

¹⁶ Jesús dınena uai ote:

—O jofomo maı jaı. O ıni dıga abıdo bene bı.

17 Naiñaiño uai ote:

—Inidicue.

Jesús dinena uai ote:

—Uanai llotio. Ua ininidio.

18 Cinco diga inina jai faicaidio. Birui o diga itimiedi jiai o iniñede. Uanaicinona ua llotio.

19 Temona abina uiñocailamona, naiñaiño dinena uai ote:

—Odi Jusiñamui ie lloraimadio. Iena uiñoticue.

20 Cai jaiagai bai bene ite anedumo Jusiñamuina sedauidimaci. Ie jira nainomo Jusiñamuina nia sedadica; iadedi omoi judiuai dinena raitomoi: “Jerusalémo Jusiñamuina cai sedauilla”.

21 Jesús dinena dane uai ote:

—Cuena iino. Jiairuido bai bene ite anedumo cai Moona sedañeitomoi. Jerusalémo naimiena jiai sedañeitomoi.

22 Raise uiñoño Jusiñamuina biruido sedadomoi; iadedi cai nairaimona cai jilloitaraima illa jira, naimiena raise uiñuana sedadica.

23 Jiairuido, ua birui, cominidi: “¿Ninomo Jusiñamuina sedaitica?” raillamo comeciaina facañeitimaci. Naimaci comeciai jitaillamona, naimaci illanomo Jusiñamuina ua sedaitimaci. Naie isoide comini naimiena sedajana Jusiñamui jitaide.

24 Jusiñamui comeñede. Naimiedi jafaici. Omoi comeciai jitaillamona naimiena omoi sedajana jitaide.

25 Riño uai ote:

—Cai jilloitaraima billena uiñoticue. Naimiedi Cristo. Naimie bia, nana bie isoide rafuena caina raise uiñotaite.

26 Jesús raite:

—Naimiedicue.

27 Teconi abido ridicai. Riño diga Jesús ñaia jira, rajicaidicai; iadedi: “¿Buena naiñaiño jitaide?” raillano jicanoñedicai. “¿Buena ñaitomico?” raillano jai jicanoñedicai.

28 Ie lleroda pozo ecimo rainanocaida, Jesús llua isoi, naie facaise naiñaiño ie nairaimo abido jaide. Nainomo abido rillanona, naiñaiño cominimo llote:

29 —Ailli pozo fuemo cue jaca cioiraininamie diga dafaidicue. Nana cue finouiga rafue diese cuemo llote. Mai, cai jibuisailli. Naimiedi pozo fuemo ite. Nibai naimiedi cai jilloitaraima. Naimiedi nibai Cristo.

30 Ie jira Jesús dine ailluena comini bitimaci.

31 Naie riño ie nairai dine jailla mei, abido cai dine nia riñenia, Jesúsna raiticai:

—Maestro, mai guiño.

32 Naimie uai ote:

—Cuemo guille illana uiñoñedomoi.

33 Coniniri siadotica:

—Jai nibai bu ecajai biga.

34 Jesús uai ote:

—Jusiñamui cuena oretate. Naimie jitailla rafuena finocana jaidicue. Naimie rafuena cue llumona, jai guiticue isoidicue.

35 Comecina facadomoi: “Jusiñamui uaina nia lloñeiticai. Ico iena lloiticai”. Ie isoide. Illimo riará nia lliñenia, comeciaina facadomoi: “Riará einallena, naga amaga fivui fiebite. Naie facaise majiitica”. Omoimo lloticue: Omoi ecimo eruai. Riará jai einate isoide. Naimacimo Jusiñamui rafue lllena, iena naimaci inollena, ailluena comini jai itimaci.

36 Naie llisillamo maijiiitimiedi ie ucubena feiñoite. Ie isoide. Jusiñamui rafuena damerie llocabillamona, comini iena cacajamaci. Jiaino billamona, iena dane cacajamona, iena inotimaci. Naie mare rafue lloraini ibana feiñoitimaci. Jusiñamui dibeimo naimaci dajena maijia jira, dajena iobitimaci.

37 Cai comini iena raicabitimaci: “Damie iduaina rite; ia jiaimie llisillana ote”.

38 Ie isoide. Omoina oredicue, comini cue dibeimo itatallena. Naimacimo cue uaina nano lloñedomoi; iadedi nano jiaino naimacimo cue uaina llotimaci. Ie jira nana omoi llofuiamona cue uaina inotimaci.

39 Samaria iñaiño lluamona, naiñaiño nairaimona ailluena comini Jesúna inotimaci. “Naimiedi nana cue finoca rafuena cuemo llote” naimacimo naiñaiño llote. “Naimiedi cai Jilloitarama” raillanona Jesúna inotimaci.

40 Jesús dine naimaci rillanona, naimaci diga naimie fiebillena, Jesúsmo jicanotimaci. Ie jira Jesús menarui naimaci dinomo fiebide.

41 Naimie llofuiamona, jiaie ailluena comini naimiena inotimaci.

42 Riñomo llotimaci:

—Daño o lluamona, navui inotica; iadedi naimie uaina cai cacajamona, birui raise inotica. Naimiedi comini ua Jilloitarama.

43 Menarui illanona, nainomona Galileamo Jesús cai diga jaide.

44 Caimo llote:

—Jusiñamuina lloramadi ie nairai illanomo ia, naie comini naimie lluamo cacarefiacaiñedimaci;

45 iadedi Galileamo cai rillanona, nainomo itino naimiena caimare feiñotimaci. Pascua railla rafue facaise Jerusalémo nana naimie finoca rafue navui naimaci cúa jira, naimiena caimare feiñotimaci.

Jesúdi illaicomini jitona jillotaja rafue

46 Galileamo Jesús cai diga macaria, dane Canámo ridica. Nainomo jinuimona vino navui finode. Nainomo cai ia, Capernaum railla nairaimo itimie jito duide. Duidimie moodi gobierno diga maijuide.

47 Judeamona Galileamo Jesús illana naimie fidiano, Canámo bite. Jesús illanomo billena, ie jito jai fioldaiacana jira, ie jitona jillotallena Jesúsmo duere jicanote.

48 Jesús naimiemo llote:

—Siño rafuena omoi cioñenia, cuena inoñedomoi.

49 Uai ote:

—Maestro, cue diga bi, cue jito fioldaiñellesa.

50 Jesús uai ote:

—Mai jai. O jito jai fioldaiñeite —llote. Naie ima Jesús uaina inuano, ie jofomo abido jaide.

51 Naisona naimie jaidemo, ie mullaia; diga afeedo beici dafaifide. Llotimaci:

—O jito jai jillode.

52 Ie jira naimie jicanote:

—¿Nino jitoma itemo, jillode?

Uai otimaci:

—Navui are jitoma oni lluai caidemo, abi cuarilladi fainonocaide.

53 Ie comecina facade: “Navui are naie facaise Jesús cuemo llote: ‘O jito jai jillode’”. Ie mullaia; lluana cacajamona, naimiedi Jesúdi cai Jilloitaramana inote. Nana naimie jofomo itino jiai inotimaci.

54 Judeamona Galileamo Jesús abido billano, siño rafuena iese jai finode.

5

Joraibimo tisitaitimie jillua rafue

1 Digarui illa mei, cai judíuai rafue iacana jira, Jerusalémo Jesús abido jaide.

2 Jerusalémo toica laudaiaí jaisoilla nase facaimo joraibí ite. Cai judíuai uaimona nai joraibí mamecidi Betesda. Naie jorai fueido ite cinco jifocotiai.

3 Nainomo diga duidino buidimaci: uisinidimaci, ñuja-ñujacaidino, tisitaitino. Jinuina begollena sedadimaci.

4 Feide isoidemona dacaíño Jusiñamui jaenicidi jinuina begotallena bite. Iemei nai jinuimo nano jaidimie ie duicomona jillode.

5 Duidino motomo tisitaitimie ite. Treintiocho años duide.

6 Naimiena ciuano, naimie are duillana uiñuamona, Jesús naimiemo jicanote:

—¿Jilloiacadio?

7 Duidimie uai ote:

—Jii; iadedi jinuina begoia, jaca buna iñede cue canoitena. Ie jira jaaimiedi cue uicodo jinuimo jaide. Ie jirari nia jilloñedicue.

8 Jesús uai ote:

—Mai naidacai. O biira ferinocaida macari.

9 Ieconí naimie jillode. Ie biira ferianona oni jai macarite.

Sábadoruimo duidimie jilloitajana siadua rafue

Sábadoruimo, judíuai jafaici ouillarumo, naimie jillode.

10 Ie jira judíuai illaicominidi jillodimie llote:

—Birui sábado. O biira abinocaida o uilla jira, Moisés micori rairuica rana jai finodio. Sábado mo maijinidicai. Birui jafaici uaruimo jaca buena jetanidicai.

11 Naimie uai ote:

—Cuen jilloitatimie cuemo llote: “O biira mai ferinocaida macari”.

12 Judíuai dinena jicanote:

—¿Bu iena omo llote? —Naimie uiñoñena jira, uai oñede.

13 Jesús comini motomo itabilla jira, ailluena comini illa jira, jai jillodimie ie jilloitatimien a uiñoñede.

14 Ie meinoconi dallu illanona, Jusiñamui jofomo Jesús dinena naimiena baite. Llote:

—Jai jillodio. Abido dane eo duere o sefuisa, dane jeacinona finoñeno.

15 Ie mei judíuai illaicominimo jillodimie luuaidé. Llote:

—Jesús raillamie cuena jillotate.

16 Sábadoruimo Jesús bie rafuena finua jira, judíuai illaicominidi naimiena duere finoacasite.

17 Jesús abina riiduano llote:

—Cue Moodi ie jitailla rafue jaca finode. Ie isoi cue jitailla rafue finocana jaca jaidicue —llote.

18 Sábadoruimo naimacimona Jesús maija jira: “Jusiñamuidi cue Moo” naimie railla jira: “Jusiñamuidicue” naimie railla jira, judíuai illaicominí naimie meinellena eo jitaidimaci.

Jesús ie Moo isoi finua rafue

19 Naimacimo Jesús llote:

—Uanaicinona lloticue. Buena dama finonidicue. Cue Moo finua rafuena ciuano finocabidicue. Cue Moo finua isoi finodidicue.

²⁰ Cue Moo cuena isiruillanona, nana ie finoca rafuena cuena jai uifnotade. Naimie Jitona cue illa jira, bie imana cue jilloitaja baifemo jiaie siño rafuena finoiticue, omoi rajjicaillena.

²¹ Fiodaitinona jilloitallena, cue Moomo ie uai ite. Naie uai cuemo jiai ite.

²² Cue Moo juez isoi naimie inoñedinomo lloñeite; iadedi naimacimo juez isoi cue lollena, naimaci duere sefuillena, ie uai cuemo iga.

²³ Omoi dine naimie cuena oretate. Naimiedi omoi cuena iobitajana jitaide, naimiena omoi iobitaja isoi. Cuena omoi iobitañenia, cue Moona jiai iobitañedomoi.

²⁴ Uanaicinona lloticue. Cue uaina bu cacaia, cuena oretatimiena bu inoia, monamo jaca iite. Jearede rafue naimie finua facaina duere sefuifneite. Faifneite; ia monamo Jusiñamui diga jaca iite.

²⁵ Uanaicino lloticue. Jusiñamui Jitodicue. Ua birui cuena inoñedino cue uaina cacareitimaci. Cuena cacajamona, cuena inuamona, jaca iitimaci.

²⁶ Cominina jaca itatallena, cue Moomo uai ite. Comini jaca itatallena, cuemo ie uai jiai iga.

²⁷ Cuena inoñedinomo juez isoi cue lollena, naimiemo cue duillamona, ie uai cuemo jiai iga.

²⁸ Ieri rajjicaifne. Jiairuido nana jai fiodaitino diese cue llwana cacatimaci.

²⁹ Fiodaillamona naimaci abiai jilloitimaci. Ie mei cue jitaillacinona finodino jaca illena lloticue. Cue jitaillacinona inoñedino diese duere sefuillena lloticue.

³⁰ Naimacimo cuena oretatimie jitailla isoi lloticue. Dama cue comecimo ite rafuena cue lloñena jira, bie llwacinodi uanaicino.

Jusiñamui ie Jito uaina comini inoñena rafue

³¹⁻³² Jesús nia llote:

–Dama cue abina cue lloiadedi, bu cuena jaca inoñede; iadedi Jusiñamui cue facaina jiai llote. Naimie llwacino uanaicino. Iena uifnoticue.

³³ Naimiena cacareillena, Juan Bautista micori dine cominina navui oretatomo. Abido naimaci bia, naimaci cacaja rafuena omoimo lollena, naimacina oretatomo. Juan llwacinodi uanaicino.

³⁴ Naimie micori cue rafuena llouide; iadedi naimie micori llogacinomo omoi comeci eo facajana birui jitaifnedicue. Cuena omoi inollena, naimie mamecina jai llinoticue.

³⁵ Lamparín raise lligaiña isoi, ie rafuedo Juan micori omoi comeciaino iticinona raise uifnotade. Dallu ieri iobidomo.

³⁶ Cue finoca rafue Juan micori finoca rafue baifemo faite. Cue siño finoca rafuena ñaiticue. Cuena naimie oretajamona, cue Moo uaido iena finodicue. Ie jira naiemona naimie dinena cue billana jai uifnotomo.

³⁷ Cue finoca rafue muidona cuena uifnotomo; iadedi naimie llwana jaca cacaiñedomoi. Naimiena jiai jaca cioñedomoi.

³⁸ Cuena omoi inoñena jira, naimie uaina feiñoñedomoi.

³⁹ Jusiñamui dine omoi rillena, Jusiñamui facaina lloraini micoriai cuela-fuaina facacabidomo. Naifuiaidi cuena ñaite;

⁴⁰ iadedi Jusiñamui dine omoi rillena, cue uaina inoiacaiñedomoi.

⁴¹ Cuemo iobillacinona omoi fecallena sedañedicue.

⁴² Jusiñamuina isiruiñedomoi. Iena uifnoticue.

⁴³ Cue Moo mamecido cue billanona, cuena feiñoñedomoi; iadedi dama ie mamecido jaiamie bia, naimiena feiñoitomo.

⁴⁴ Jaca ñnoiacañedomoi. Iobillacino coninimo fecadomoi; iadedi ua Jusñamuidi omoina “Mare” raillana jitaiñedomoi.

⁴⁵ “Cue Moomo omoi marañede finoca rafuena lloiticue” raillanomo comeciaina facañeno. Moisés micori cuegafuiaimo omoi llogiduafue jai ite. Moisés micori cuegafuiai muidona Jusñamui dine omoi jaca illemo ocuridomoi.

⁴⁶ Moisés micori cuegafuiaina ñnotomoina, cuena naimie micori cuia jira, cuena jiai ñnoitomoi.

⁴⁷ Naimie cuegafuiaina ñnoñedomoi. Ie jira cuena jiai ñnoñeitomoi —llote.

6

Jesús cinco llomenicomona ailluena cominina ecaja rafue

(Mt 14.13-21; Mr 6.30-44; Lc 9.10-17)

¹ Jiaruido Galilea railla jorai ie ruica ñibeimo Jesús ie llofueoicaiganodicaí diga jaide. Naie joraidi jiai Tiberiana mameciredede.

² Duidinona naimie jillotauillana naimaci cúa jira, ailluena comini naimiena racadimaci.

³⁻⁴ Naie facaiseconi pascua railla rafuedi jai iaire ite. Jesús cai diga anedumo a jaillanona, ñnomo ana raide.

⁵ Oni erodatemo, ailluena comini naimie dine billana cüde. Felipemo jicánote:

—Naimaci guillena, ¿ninomona llomeniconona oiticaí?

⁶ Naimiena facacillena, iena jicánote; iadedi Jesús ie finolle rana jai uññote.

⁷ Felipe uai ote:

—Janore naimaci guillena, doscientos ñigarui ie maijia ucube diese llomenico oticaina, baññede.

⁸ Naie facaise caimona ñaimie iena cacade. Naimiedi Simón Pedro ama. Andréna mameciredede. Naimie raite:

⁹—Cinco cebadomona finoca jenide llomenico daje uruemo bene ite. Mena lliciai jiai ñbaññiticaí? Baññeite.

¹⁰ Jesús caimo llote:

—Cominimo llono, ana imaci raillesa.

Ie jira raitire illanomo ana raññimaci. Cinco mil iññiai itimaci.

¹¹ Llomeniconona Jesús ua meinoconi, Jusñamuijimo iobillacinona fecajano, Jusñamuijimo jüde. Iemei cominimo caina naie llomeniconona fecatate. Comini jitaiilla ñierise lliciai daje isoññ fecatate.

¹² Naimaci monillamona, caimo Jesús llote:

—Buena jaca fañññellena, fiebide guille danomo irai.

¹³ Ie jira iena iraññicaí. Naie cinco llomenicomona, comini guigamona fiebidemona, doce cirgaiaimo oruitaticai.

¹⁴ Jesús finoca rafuena naie cominidi cüanona, llotimaci:

—Jusñamui facaina lloraini micoriaidi cai Jilloitaraima ico billena jai llotimaci. Bimiedi naimie.

¹⁵ Naimaci illaimana naimie illena, naimiena gaitacadimaci. Iena naimie uññua jira, iena naimie jitaiñena jira, aneduaimo naimie oni jaide.

Capernaumo Jesús abido jailla rafue

(Mt 14.22-27; Mr 6.45-52)

¹⁶ Jitoma ana itemo, jai navuidemo, ie llofueoicaiganodicaí joraimo jaidicaí.

¹⁷ Cai botemo cai jaillano, ruica Capernaumo jaiacadica; iadedi Jesús nia biñede. Jesúna sedadicaimo, naimie biñena jirari, jai jitirena facaiseconi jai jaidicai.

¹⁸ Raire aifi illa jira, jorai eo bagode.

¹⁹ Nibai cinco, nibai seis kilómetros jaidicaimo, damie cai dine jinui emodo billana ciodicai. Bote dine naimie billana ciuanona, jacinaiticai.

²⁰ Jesús caimo llote:

—Jesúdicuesa. Jacinañeno.

²¹ Iena cacajanona, botemo naimiena a billana jitaidicai. Ieconí ruica dine cai jaiacananomo ridicai.

Comini Jesúna jenua rafue

²²⁻²⁴ Cai jailla mei, daje bote nairuido illa jira, jinafomo fiebidino Jesús cai diga jaiñenana uiñotimaci. Cai Nama iena Moomo iobillacinona fecajanomo, cominimo guille fecajanomo, Tiberiamona dajerie botes naie facaise iaire bite. Monaidemo, Jesúna naimaci cioñena jira, cai jiai iñena jira, naie botiaido Capernaumo Jesúna jenollena, jaidimaci.

Jesús: “Llomenicodicue” railla rafue

²⁵ Ruica dine Jesúna comini baillanona, jicanotimaci:

—¿Niruido bene ridio?

²⁶ Jesús uai ote:

—Navui are omoína cue ecajamona, iemona omoi monillamona, cuena jenodomoí. Siño rafuena cue finuana ciodomoi; iadedi cuena nia iñoñedomoi.

²⁷ Guille raire cueicabide. Cueiruide ramo comeciaina eo facañeno. Cueiruiñede ramo comeciaina eo faca. Jusiñamui diga omoi jaca illemo comeciaina eo faca. Cue Moo Jusiñamui, iimana cue jaillena, cuena oretate. Ie uai cuemo illanona, cue uaina omoi iñuamona, Jusiñamui diga jaca iitomoi.

²⁸ Jicanotimaci:

—Nia Jusiñamui dibeimo iticaina, ¿nie isoidifue finodicaina mare?

²⁹ Jesús uai ote:

—Naimie oretagamie uaina omoi iñuana jitaide.

³⁰ Naimaci dinena dane jicanotimaci:

—¿Nie isoide rafuena finoitio? iena cai ciuano, o uaina cai iñollesa.

³¹ Cai jaiagai jofue iñenanomo Jusiñamuimona bite guilla ra guisoidimaci. Moisés micori iena jaié cuela: “Jusiñamuimona bite guiga ra naimacimo nagarui fecauide”. Iemo jiai birui ocuridicai. Naie isoide siño rafuena o finuana jiai cioacadica —llotimaci.

³² Jesús uai ote:

—Uanaí lloticue. Moisés micori naie guiga ra jaca fecañede. Cue Moo iena fecauide. Birui naimiedi monamona bite ua llomeniconona omoi jai feacaade.

³³ Jusiñamui feacaacalle llomenico monamona jai bite. Comini iena guillamona, jaca iitimaci.

³⁴ Llotimaci:

—Nagarui caimo bie isoide llomeniconona feca.

³⁵ Jesús uai ote:

—Llomenico guillamona iticai. Omoi llomenico isoidicue. Cuena iñuamona, monamo jaca iitomoi. Cuena iñotimie dane aimetañeite. Cuena isiruitimie jaca dane jiroacaiñenite. —Iese llote; ia naimaci comeciaina ñaite. Naimaci comeciái jitaillacino naimacimo jaca illena ñaite—.

³⁶ Cuena ciodomoi; iadedi cuena #inoñedomoi.

³⁷ Nana cue dibeimo cue Moo itatallinodi cuena #noitimaci. Cuemona naimacina jaca oni dotañeiticue.

³⁸ Cuena oretatimie ie jitaila rafuena finollena, monamona jai biticue. Dama cue jitaila rafuena finoiticuena biñedicue.

³⁹ Cuena oretatimiedi cue dibeimo itatallinomona buna faifillana jitañede. Jusiñamui lluaruimo fiodaillamona nana naimaci abiaina cue jilloitajana jiai jitaide.

⁴⁰ Jusiñamui Jitona cue illana bu #noia, cuena bu #noia, monamo jaca iite. Jusiñamui lllorruimo fiodaillamona naimie abina jillotaiticue. Iese cue Moo jitaide.

⁴¹ Jesúsdi: “Monamona bite llomenicodicue” railla jira, judíuai illaicomínidi naimie uaina jamaillano #nosñede.

⁴² Raitimaci:

—Bimiedi Jesús. José jito. Ie moona uññoticaí. Ie eina jiai uññoticaí. ¿Niese naimiedi: “Monamona biticue” raite?

⁴³ Jesúsdi uai ote:

—Iese omoi naiñeno.

⁴⁴ Naimiena cue Moo #notañenia, bu cuena #nonide. Cuena bu #noñenia, Jusiñamui lllorruimo fiodaillamona naimie abina jillotaiticue.

⁴⁵ Jusiñamuina lloraini micoriai jaie iena cuetimaci: “Jusiñamuidi nana cominina ico llofueite” cuetimaci. Birui naie rafue jai suide. Naga cue Moomo cacarefidimie, naga cue Moomona fueotimie cuena jiai #noite.

⁴⁶ Buna cue Moona jaca cioñede. Naimiemona cue billamona, dama cue cúa.

⁴⁷ Uanaicinona lloticue. Cue uaina #notimie monamo jaca iite.

⁴⁸ Jesús dane llote:

—Llomenico guillamona iticaí. Omoi llomenico isoidicue. Cuena #nuamona, monamo jaca iitomoi.

⁴⁹ Jofue iñenanomo omoi jaiagai Jusiñamuimona bite rana guisoidimaci; iadedi fiodaitimaci.

⁵⁰ Birui jiaie guille ra ite. Monamona ite. Iena bu guia, monamo jaca iite.

⁵¹ Bie llomenicodi cue. Monamo cominina jaca itatallena, monamona biticue. Bu bie isoide llomenicono guia, jaca iite. Bie llomenicodi cue abi. Comini facaina fiodaiticue.

⁵² Iena cacajano, judíuai illaicomini coniniri naiena siadotimaci. Raitimaci:

—¿Niese bimie abina riiticaí?

⁵³ Ie jira Jesús dinena raite:

—Uanaí lloticue. Cue abina omoi riñenia, cue diruena omoi riñenia, cue Moo diga jaca iñeitomoi.

⁵⁴ Bu cue abina riia, bu cue diruena riia, cue Moo diga jaca iite. Fiodaillamona naimie abi irairuimo jillotaiticue.

⁵⁵ Cue abidi ua rille. Cue diruedi ua rille.

⁵⁶ Bu cue abina riia, bu cue diruena riia, cuena nabaide. Naimiena jiai nabaidicue.

⁵⁷ Cue Moo cuena orede. Naimiedi jaca ite. Cue Moo jaca illa jira, cue jaca iticue. Daje isoide. Bu cue abina riia, cue illamona, naimie jiai iite.

⁵⁸ Bie isoide guille ra monamona jai bite. Omoi jaiagai jaie guiga ra isoñede. Jaie fiodaitimaci; iadedi bie guille ra birui bu guia monamo jaca iite. —Iese llote; iadedi naimie fiodaillamona, naimiena comini #nuamona, Jusiñamui diga naimaci jaca illena ñaite.

⁵⁹ Capernaumo judíuai ofiracomo Jesús buena llote.

Jesús diga jaisoidino naimie lluana siadua rafue

60 Jesús diga jaisoidino naimie lluana cacajano, coniniri siadotimaci:

—Bie llua eo irirede. Bu iena cacaiñede.

61 Jesúsdi naimaci iese siaduana uiñote. Ie jira llote:

—Cue lluana raise inoñedomoi.

62 Jusiñamuimona imana jaillena jai biticue. Monamo abido ico cue jaillena cioitomoína, iena jiai nibai raise inoñeitomoi.

63 Cai joreño caimo illamona, iticai. Dani cai abi diga iñedicaí. Ie isoide. Cue llogacino Jusiñamuimo duide. Iena omoi inuamona, jaca iitomoi;

64 ia omoimona nana inoñedomoi —llote. Nano dofoconimona Jesúsdi naimiena inoñedinona uiñote. Naimiena gaitataitimiena jiai uiñote.

65 Jesús dane llote:

—Ie jira omoimo lloticue: Cue Moo jitaiñenia, cuena jaca bu inonide.

66 Iena cacajano, Jesús diga jaisoidinomona, diga comini naimiena fainonocaidimaci.

67 Ie jira ie doce llofueoicaiganodicaimo Jesús jicanote:

—¿Jiai cuena fainonocaida, abido jaitomoi?

68 Simón Pedro uai ote:

—Nama, o diga cai jaiñenia, ¿bu diga jaiticai? Jusiñamuimo cai rillena, o isoi jillotaraíma iñede. Jaiimiemo jaca itatajaracinodi iñede.

69 O lluana jai inoticaí. Jusiñamui mare Jitodio. Iena uiñoticaí.

70 Jesús dane uai ote:

—Doce digamie fetocaomoi; iadedi omoimona damie Taifemo jainaiaide —llote.

71 Caimona Judas Iscariote micorina ñaite. Judas micori Jesúsna gaitataiacadimie.

7

Jesús amatiai naimiena inoñena rafue

1 Jiairuido Galileamo ite nairaiamo Jesús macarite. Judíuai illaicomini naimiena meineiacana jira, Judeamo jaiñede.

2 Jifocotiaiai railla rafue iaire ite. Judíuai ie rafue.

3 Ie jira Jesús amatiai naimiemo llote:

—O diga jaicabidino o finua rafuena raise cioillena, beno fainonocaida, Judeamo jai.

4 Bu ie mameci are soriacania, bainino majjirainina. Ie isoide. Siño rafuena o finoiá, ailluena comini illa motomo iena fino.

5 Jesús amatiai naimiena inoñena jira, iese raite.

6 Jesús dinena uai ote:

—Jerusalémo nia jaiñeiticue; iadedi nainomo omoi jaiacalliruido omoi jai.

7 Comini omoína enoñedimaci. Naimaci finoca jearede rafuena cue llua jira, cuena jaca enoidimaci.

8 Jerusalémo rafuemo jai. Cue jaillirui nia riñena jira, nia jaiñeiticue.

9 —Iese lluaño, Galileamo naimie fiebide.

10 Naimie amatiai rafuemo jailla mei, Jesúsdi naimaci jinafona dama baino jaide.

11 Nai rafuemo judíuai illaicomini Jesúsna jenuano baiñenano, cominimo jicanotimaci:

—¿Ninomo naimie ite? —Uiñoñena jira, comini uai oñedimaci.

¹² Nainomo ailluena comini itimaci. Comini illa motomo naimiena anado siadoside. Jiaino dinena: “Naimiedi mare” raitimaci. Jiaino dinena: “Naimiedi cominina jifuate” raitimaci.

¹³ Judíuai illaicominina iciana comini jaciruillanona, anado siadoside. Jesúna marefodo buna ñaññede.

Sábadoruimo Jesús maíjia rafue

¹⁴ Jifocotiaiaí railla rafue atuedo fuitemo, Jesús Jusiñamui jofomo jaillano, llofuate.

¹⁵ Illaicomini naimie llofuiamona rajicaidimaci:

—¿Niese naimie abi uiñote? Eo rafuena uiñotimimona jaca fueoñede — raitimaci.

¹⁶ Jesús uai ote:

—Dama cuemona oñega cue llofuiacinodi. Cuen a oretatimie ie.

¹⁷ Jusiñamui jitaillacinona finoiacadimiedi ninomona cue llofuiacinona cue uana uiñoite. Jusiñamuiamona cue uana uiñoite. Dama cue comecimona cue oñenana jiaí uiñoite.

¹⁸ Bu dama ie comecimona ie llofuiacinona uanona lloia, naimiedi comini naimiemo iobillacinona fecajana jitaide; iadedi bu ie oretatimiena iobitaia, uanai llote. Marañedicinona finoñede.

¹⁹ Moisés micori Jusiñamui uaina jaie llote; iadedi birui naie llogacinuainana raise ñnoñedomoi. Iena raise ñnotomoidena, cuena niade meineiacaññedomoi.

²⁰ Comini dinena uai ote:

—Ñibaí uairitaidio. ¿Bu ona meineiacade?

²¹ Jesús uai ote:

—Dacaiño sábadoruimo damiena jillotaticue. Ie jira cue uaina uaitatomoi.

²² Sábadoruimo jiaí maíjicabidomoi. Moisés micori isaiaí abiaí diana omoimo jaie llote; iadedi naimie micori naiena nano lloñede. Naimie micori usumatiaí naiena nano llotimaci. Sábadoruimo isana abi dellirui ia, detomoi.

²³ Moisés micori llogacinona ñnollena, sábadoruimo isaiaína detomoi. Sábadoruimo imana raise jillotaticuemo, ¿bue ñellena cue diga iciritomoi?

²⁴ Cominimo jamai eruailanona, naimacina jeare ñaññeno; ia naimaci finoca rafuena raise uiñuamona, naimacimo comecina faca. Cue finoca rafuemo comecina faca.

Jesúna comini siadua rafue

²⁵ Ie jira Jerusalémo itino coniniri siadotimaci:

—Illaicomini bimiena meineiacadimaci;

²⁶ Iadedi beno marefodo naimie llofuate. Jaca buena lloñedimaci. Illaicominidi: “Bimiedi cai Jilloitaraíma” raillano ñibaí comeciaina facadimaci.

²⁷ Bimie ie billanona cai uiñua jira, naimiedi cai Jilloitaraímaññedimie. Cai Jilloitaraíma baireia, jaca budí naimie billanona uiñoñeite —siadotimaci.

²⁸ Ie jira Jesús Jusiñamui jofomo naimie llofuiamo llote:

—Cuen a uiñotomoi. Ninena cue billana jiaí uiñotomoi. Cue jitailla jira biñedicue; iadedi jiaimie cuena oretate. Naimiedi uanai llote. Naimiena uiñoñedomoi.

²⁹ Naimiemona cue billa jira, naimiena uiñotocue. Cuen a oretate —llote.

³⁰ Ie jira illaicomini Jesúna gaitaacadimaci; iadedi naimie fiódaille facaise nia riñena jira, buna naimiena gaitañede.

³¹ Nairuí ailluena comini naimie uaina ñnotimaci. Raitimaci:

—Cai Jilloitaraíma bia, ¿niese naimiedi bimie baífemo jaie rafuena finoite?

Jesúna gaitaiacana rafue

³² Fariseuaidi comini iese ñaiana cacajano, Jesúna gaitallena, Jusiñamui diga nanoca ñairainidi ailluena policiana orede.

³³ Ie jira naimacina Jesús dinena raite:

—Dallu omoi diga nia iiticue. Ie mei cuena oretatimie dine abido jaiticue.

³⁴ Cuena jenoitomo; iadedi cuena baiñeitomo. Cue dine binitomo.

³⁵ Ie jira nainomo ite illacomini dani siadotimaci:

—¿Ñine jaite? ¿Ñiese naimiena baiñeitica? Judúaiñedinona llofuellena, jiaie eniruemo cai comini dine nibai jaite.

³⁶ ¿Ñiese naimie raite: “Cuena jenoitomo; iadedi cuena baiñeitomo”? ¿Ñiese raite: “Cue dine binitomo”? —iese siadotimaci.

Jesúdi Jusiñamui Joreña ñaia rafue

³⁷ Jifocotiaiai railla rafue fuillarumo, ua rafue ie nairuimo, Jusiñamui jofomo itinomo Jesús ado lloste:

—Bu jiroacania, cue dine bi.

³⁸ Jusiñamui facaina lloraini micoriai jaie cuela: “Naimiena inotimie comecimo jaca itatate jinui isoi iite, torafomona jinui tonooilla isoi”.

³⁹ Jesúdi iese lloste; ia Jusiñamui Joreña ñaite. Jusúna inotinomo Jusiñamuidi ie Joreña ico illena ñaite. Jesús nia fiadañena jira, iena nia iñega.

Comini Jesúna dane siadua rafue

⁴⁰ Jesús llwana comini cacajano, raitimaci:

—Jsiñamui facaina lloraini micoriai Jusiñamui facaina lloraíma ico billena jaie llotimaci. “Cristo nia baireñena, naimie biite” llotimaci. Bimiedi naimie.

⁴¹ Jiaíno raitimaci:

—Naimiedi cai Jilloitaraíma. Naimiedi Cristo.

Jiaíno raitimaci:

—Cai Jilloitaraíma Galileamona biñeite.

⁴² Jusiñamui facaina lloraíma micori cuela: “Cai Jilloitaraímadí David micori jito. Belémo David micori illanomo jeicille”.

⁴³ Ie jira daje isoi naimiemo comeciaina facañedimaci.

⁴⁴ Jiaíno naimiena gaitaacadimaci; iadedi buna naimiena jetañede.

Judúai illacomini Jesúna inoñena rafue

⁴⁵ Ie mei policías naimaci illacomini dine abido jaidimaci. Fariseuai dinena jicanotimaci:

—¿Bue ñellena Jesúna atiñedomoi?

⁴⁶ Policías dinena uai ote:

—Naimie llofuia isoi jaca buna llofueñede. Iena jacinailanona, naimiena atiñedicaí.

⁴⁷ Fariseuai dane llotimaci:

—Cominina jifua isoi, omoína jiaí jifueite.

⁴⁸ Cai illacomini dinena naimiena jaca inoñedicaí. Moisés micori llogacinodo raise jaidicaí;

⁴⁹ ia Jesús llofuiana cacadino Moisés micori llogacinuaido jaca raise jaiñedimaci. Ie jira jaca faifitimacisa.

⁵⁰ Naie illacomimona Nicodemo raillamie ite. Naimie naína Jesús dine navui jaide. Fariseo imie.

⁵¹ Jesúna riiduanona, naimie lloste:

—Cai einamací llocabitimaci: “Bu duere cai finoacania, nano naimie llamo cacarefiticai. Jearede rafue naimie finuana cacareillano, naimiena duere finoiticai”. Iena cai cacaiñenia, naimiena duere finoñeiticai.

⁵² Nicodemomo llotimaci:

—Galileamona bitino isoi ñaitio. Naimie llofuegamienna nibai jai jaiacadio. Jai euegafuiaina raise faca. Jusiñamui facaina lloraini micoriaidi cai nairaina jilloitaraima Galileamona billena jai eueñedimaci. Bie Jesús raillamedí cai nairaina jilloitaraimañedimie.

⁵³ Ie meinocni damierie imaci jofomo jaidimaci.

8

Ie iniñede iima diga riñodi rafuetailla ie rafue

¹ Naie facaise Jesúsdi Olivos railla anedumo jaide.

² Ie areruido jítiramo Jusiñamui jofomo abido dane jaide. Ailluena comini naimie dine billa jira, naimie ana raita, naimacina llofue.

³ Naie facaise Moisés micori llogacina llofueraimona dajerie bitimaci. Fariseuaimona dajerie jiai bitimaci. Daje riño atidimaci. Ie iniñede iima diga naiñaiñoa jai eidañimaci. Comini illa uícomo atiano,

⁴ Jesúsimo llotimaci:

—Llofueraima, biñaiño ie iniñede iima diga eidañimaci.

⁵ Moisés micori jai euega: “Bie isoidiñaiñodi noñici diga fairinoga, meinelena”. ¿Niese naiñaiñoa o raitio?

⁶ Naimiena facacillena, naimie raise uai oñenia, naimiena llogidollena, iese jicanotimaci. Iena cacajano, Jesús ana jítadacaida, eniruemo ie onocai diga cuete.

⁷ Naimiemo diga icaiño jica-jicanuano, naimie naidacaida, naimacimo llote:

—Omoimona jeacino iñedimie naiñaiñoimo nano noñicina fairino.

⁸ Dane ana jítadacaida, eniruemo dane cuete.

⁹ Naimie lluaana cacajano, dajerie jino jaidimaci. Nano eo einamacidi jino jaidimaci. Ie mei conirueni jino jaidimaci. Nana comini tuua mei, nainomo Jesús fiebide, naie riño diga ñaillena.

¹⁰ Eruaillano naiñaiñoimo jicanote:

—¿Ni nai o llogidotino?

¹¹ Naiñaiño uai ote:

—Jaca iñedimaci. Cuena jai llogidoiacaiñedimaci.

Jesús uai ote:

—Jiai ona duere finoñeiticue. Mai jai. Jeacino dane finoñeno.

Jesúdi comini comeciai lligaiñua rafue

¹² Jesúsdi cominina dane llofuianona, raite:

—Jeacino oni jaillena, comini comeciaina lligaiñoticue. Cuena inotimie jítiredinomo jaca iñeite. Jeacino anamo jai iñedimie Jusiñamui diga íco jaca iite.

¹³ Fariseuai dinena uai otimaci:

—Dama o abina ñaitio. Ie jirari uanaicinona lloñedio.

¹⁴ Jesús uai ote:

—Dama cue abina lloticue; iadedi uanaicinona lloticue. Ninena cue billanona uiñoticue. Nine cue jaillinona jiai uiñoticue. Ninena cue billanona uiñoñedomoi. Nine cue jaillinona jiai uiñoñedomoi.

¹⁵ Abi raise uiñoñeno cuena jeare ñaitomoi. Iese omoína ñañedimie;

16 iadedi omoína cue ñaia, uanaicínona lloticue. Dama cue uaina omoína lloñedicue. Cuena oretatimie omoína jiai llote.

17 Moisés micóri iena jiai jaie cuela: “Menamie daje isoi lloia, naie iaiaiaia llucacínodi omoi ñnua” cuela.

18 Cue facaina lloiena, menamie jai ite. Cue facaina lloticue. Cue Moo cue facaina jiai llote.

19 Fariseuai ñnena jicánote:

—¿Ni o moo?

Jesúdi uai ote:

—Cuena uiñoñedomoi. Cue Moona jiai uiñoñedomoi. Cuena uiñoñedomoi, cue Moona jiai uiñoñedomoi.

20 Jusíñamui jofomo ucube eenoracomo bicinona siadotimaci. Jesús fiódaille facaise ñaia ñnena jira, jaca buna naimiema gaitañede.

Jesúna comini ñnoñena, naie jeacino diga fiódaille rafue

21 Naimacimo Jesús dane llote:

—Íco oni jaiticue. Cuena jenoitomo; iadedi cuena baiñeitomoi. Na omoimo jeacino ñaia itemo, fiódaitomo. Cue jaillinomo jainitomo.

22 Ie jira judíuái illaicomini ñnena iena siadotimaci:

—Dama ie abina meineite.

“Cue jaillinomo jainitomo?” Jesús railla jira, iese siadotimaci.

23 Jesúdi uai ote:

—Jusíñamui ite rafuemo ñnoñedomoi. Naimiemo ite rafuemo ñnoñedomoi. Naimie ñnoñedomoi; ia naimie ñnoñedomoi iticue.

24 Cue Jusíñamui Jitonana omoi ñnoñena jira, na omoi jeacino diga fiódaitomo.

25 Jicanoside:

—¿Budío?

Jesús uai ote:

—Nano omoi motomo cue illamona bumiedicuena omoína raicabiticue.

26 Diga rafue omoimo lloiacadicue. Marañede rafuena omoi ñnena omoimo ñaia lloiacadicue; iadedi omoimo cuena oretatimie uaina dama lloticue. Nai uaidi uanaicino —llote.

27 Naimiedi ie Moo Jusíñamuina llote; iadedi cacañedimaci.

28 Ie jira Jesús llote:

—Cuena omoi ñnena mei, bumiedicuena uiñoñedomoi. Cue uaido dama lloñedicue; iadedi cue Moo cue lloñe uaido lloñedicue.

29 Cuena oretatimie cue diga ite. Naimie jitaile rafuena cue ñnena jira, cuena ñnena ñnena.

30 Iese Jesús llotemo, diga illaicomini naimie uaina como ñnoñedomoi.

Comini Taife anamo illa rafue

31 Jesúdi naimie uaina como ñnoñedomoi llote:

—Cue llana ñnena omoi ñnena, cue ua cominidomoi.

32 Uanaicínona uiñoñedomoi. Ie mei jiaimie anamo dane ñnoñedomoi.

33 Uai otimaci:

—Abraham micóri ie uruaídica. Jiaimie anamo jaca ñnena. ¿Bue ñnena llotio: “Jiaimie anamo ñnoñedomoi?”

34 Jesúdi uai ote:

—Uanaí lloticue. Jeacino ñnena. Naga jeacino ñnena ie jeacino anamo jai ite. Omoi jeacino anamo omoi ñnena ñnena.

35 Jiaie rafuedo iena lloticue. Ie patrón anamo itimie ie patrón rafuedo ñnena; iadedi ñnena patrón jito ie rafuedo ñnena.

³⁶ Ie isoide. Jusiñamui Jitona cue illamona, naimie rafuemo duidicue. Ie jira omoimo cue lloia, omoi jeacino anamo ua iñeitomoi.

³⁷ Abraham micori ie uruiaidomoi. Iena uiñoticue; iadedi cue lluana omoi raise iñoñena jira, cuena meineiacadomoi.

³⁸ Cue Moo diga jaie cue illamona, cue cúa rafuena llocabiticue. Omoi moomona cacaja rafuena finocabidomoi.

³⁹ Uai otimaci:

—Cai moodi Abraham micori.

Jesús dane uai ote:

—Abraham micori uruiaidomoidena, Abraham micori finoca rafue isoi finodomoi. Abraham micori uruiaidomedomoi. Ie jira Abraham micori finoca rafue isoi finoñedomoi.

⁴⁰ Uanai cue llua jira, cuena meineiacadomoi; iadedi Abraham micori iese finoacaiñede. Cue llucino Jusiñamuimona oticue.

⁴¹ Jusiñamui uruai finoca rafuena finoñedomoi; iadedi omoi moo finoca rafuena finocabidomoi.

Uai otimaci:

—Jamai nairai ie uruiaidedicai. Cai Moodi Jusiñamui.

⁴² Jesús dane llote:

—Jusiñamuidi omoi moodena, cuena isiruitomoi, naimiemona cue billa jira. Cue jitaila jira, biñedicue; iadedi cuena oretate.

⁴³ ¿Bue ñellena cue lluana cacaiñedomoi? Cacareirainidomoi.

⁴⁴ Omoi moodi Taifena jira, cue lluana iñoñedomoi. Naimie jitaila rafuena finoacacabidomoi. Nano dofomona naimiedi comena meineraima. Naimie taino jaca llua jira, uanaicinona naimie jaca gaiñede. Naimie tainona lloia, ie comeci llua isoi llote. Naimiemona taino llucinodi comuicabide. Naimie isoidomoi.

⁴⁵ Uanai cue llua jira, cuena iñoñedomoi.

⁴⁶ ¿Nie isoide jeacino finodicue? Cuemo llono. Uanai cue llia, ¿bue ñellena cuena iñoñedomoi?

⁴⁷ Jusiñamuina mooredimiedi Jusiñamui uaina cacade. Jusiñamui uruiaidomedomoi. Ie jira cue lluana cacaiñedomoi.

⁴⁸ Naimiena jearuillanona, naie illaicomini dinena iese raitimaci:

—Samaritano nairai imedio. Janaba illamedio. Uairitaidio.

⁴⁹ Jesús uai ote:

—Janaba illamieñedicue. Cue finoca rafuemona cue Moona iobitadicue; iadedi iese cuena omoi ñaiamona cuena iobitañedomoi.

⁵⁰ Omoimona iobillacinona feiñollena, cue rafuena finoñedicue; ia cue Moo iena oiacade. Cuena omoi iñoñenia, cuemo iobillacinona omoi fecañenia, cue Moo omoina duere finoite;

⁵¹ ja bu cue lluana ua iñoia, jaca ua fiodaiñeite.

⁵² Naie illaicomini dinena uai otimaci:

—Janaba illamediona jai uiñotica. Abraham micori jaie fodaite. Jusiñamuina lloraini micoriai jiai jaie fodaitimaci; iadedi: “Bu cue lluana iñoiadedi, fiodaiñeite” raitio.

⁵³ Cai usuma Abraham micori baifemo faiñedio. Jusiñamuina lloraini micoriai baifemo faiñedio. ¿Bumiediota?

⁵⁴ Jesúsdi uai ote:

—Dama cue abina biriñedicue; ia cue Moo cuena marena ñaiamona, cuena iobitate. “Cai Moodi Jusiñamui” raicabitomoi;

55 iadedi naimiena uiñoñedomoi. Naimiena uiñoñoticue. “Naimiena uiñoñedicue” cue raia, omoi isoi taino lloticue. Naimiena uiñoñoticue. Naimiena jiai ñnoticue.

56 Omoi usuma Abraham micori eniruemo cue ico billena jaie uiñote. Iena uiñuamona, naimie iobide.

57 Illaicomini dinena uai otimaci:

—Odi cincuenta años nia iñedio. ¿Niese Abraham micorina ciodio?

58 Jesús uai ote:

—Abraham micori nia iñena facaiseconi jaca iticue.

59 Iena cacajanona, naimie fairinollena, naie illaicomini noficina llinotimaci; iadedi Jesús reirillanona, Jusifamui jofomona oni jaide.

9

Jesús uisnidimiena jillotaja rafue

1 Jaiaruido ie llofueoicaiganodicai diga Jesús macaria, uisnidimiena ciode. Iese nanomona jaca naimiedi jeiciga.

2 Jesúmo jicanotici:

—Llofueraima, ¿bue ñellena naimiedi iese jeiciga? ¿Nie isoide ra ie moo jetajamona, naimie iese jeiciga? ¿Nie isoide ra ie ei jetajamona, naimie iese jeiciga? Caimo llono.

3 Jesús uai ote:

—Naimie jeacino finua muidonañede. Ie moo muidonañede. Ie ei muidonañede. Jaca bue jetajamona, iese comuiñede. Jusifamui uai siñonana comini uiñollena, iese jeiciga.

4 Nia userena jira, cuena oretatimie ie jitailla rafuena finoacadicai. Raire jitreñite. Ie mei bu jaca maiñite.

5 Eniruemo cue nia ia, comini comeciaina lligaiñoticue. —Iese Jesús llote; iadedi jiaie rafuena ñaite. Naimie nia fiodañenia, Jusifamui rafuena llocana naimie jaillana ñaite. Ie fiodañirui jai iaie iacanana ñaite. Comeciaina lligaiñuana llote, jeacino oni jaillena.

6 Tena lluanona eniruena tuajano, enirue idiai finuanona, uisnidimie uisina naie enirue diga riginote.

7 Raite:

—Siloé railla joraibimo mai noisai —raite. Siloé oni dobañuamona: “Ore-tarabi”.

Ie jira naimie noisaide. Uisi jai ciodemo, abido bite.

8 Billa mei, naimie ecimo itino, jiai naimiena cocabidino diga, naimie jilluana coniniri siadotimaci:

—¿Buuta naimiedi? Bene ucube jicallena raicabidimie isoide.

9 Jiaño raitimaci:

—Jii, naimie.

Jiaño raitimaci:

—Ieñede. Naimiena eruaide isoide.

Naimie dinena raite:

—Uisnidimiedicue; iadedi jai ciodicue.

10 Naimiemo jicanotimaci:

—¿Niese jai birui ciodio?

11 Uai ote:

—Jesús raillamie enirue idiai finuano, cue uisina riginote. Cuemo llote: “Siloé railla joraibimo noisai”. Ie jira noisaidicue. Jai ciodicue.

12 Jicanotimaci:

—¿Ninomo ite nai Jesús?

Naimie uai ote:

—Uiñoñedicue.

Comini uisinidimie jai jilluana siadua rafue

¹³ Navui uisinidimie jai jillua mei, fariseuai dine comini naimiena uitimaci.

¹⁴ Sábadoruimo Jesúdi naimiena jillotaja jira,

¹⁵ fariseuai naimiemo jicanotimaci:

—¿Niesenamona jai ciodio?

Uai ote:

—Jesús raillamie enirue idiai finuano, cue uisina riginote. Ie mei Siloé railla joraibimo noidicue. Iemona jai ciodicue.

¹⁶ Fariseuaimona jaiño raitimaci:

—Sábadoruimo bimiena Jesús jillotaja jira, caimona jai maijide isoide. Jesús maijia jira, Jusiñamuimona naimie biñede.

Jaiño raitimaci:

—¿Niese jearede ra finouidimiedi uisinidimiena jillotate? —Ie jira daje isoi comeciaina facañedicuaci.

¹⁷ Ie jira navui uisinidimie dane jicanotimaci:

—Naimie ona jillotaja jira, ¿niese odi Jesúna raitio?

Uai ote:

—Naimiedi Jusiñamui uai lloraima.

¹⁸ Naimie moo, naimie ei iaimaiaimo nia jicanoñenia, judíuai illaicomini nai ima jaca cioñenano inosiñede. Ie jira iaimaiaina uaiduanona,

¹⁹ jicanotimaci:

—¿Bimiedi omico jito? ¿Naimie jaca uisinino jeiciga?

²⁰ Uai otiaimaiaia:

—Jii, bimie coco jito. Jaca uisinino jeiciga. Iena uiñoticoco.

²¹ Niese jai naimie uisina ciuana uiñoñedicoco. Bu naimiena jilloitajana jiaí uiñoñedicoco. Naimiemo jicano. Naimiedi jai eimiesa. Dama ie facaina jai ñaite —uai otiaimaiaia.

²² Bie rafue nia suiñenia, judíuai illaicomini navui llotimaci: “Jesúdi cai jilloitaraima bu loia, cai ofiracomo naimiena fo billana rairuiticai”. Iena jaciruillanona,

²³ llotiaimaiaia: “Naimie jai eimiesa. Naimiemo jicano”.

²⁴ Ie jira illaicomini dane naimiena uaiduano, llotimaci:

—Jusiñamuimo iobillacinona feca. Jesúmo fecañeno. Naimie jearede rafuena finouidimiena uiñoticai.

²⁵ Uai ote:

—Naimie jearede rafuena finouillana uiñoñedicue. Daje rafuena uiñoticue. Navuidi cioirainidicue. Birui jai ciodicue. Iena uiñoticue.

²⁶ Jicanotimaci:

—¿Niesede ra diga finuamona odi uisina ciodio? ¿Niese ona jillotate?

²⁷ Uai ote:

—Omoimo jai lloticue; iadedi cacaiacañedomoi. ¿Bue ñellena omoimo dane lloticue? ¿Ie llofueganona jaiacadomoi?

²⁸ Riire uai otimaci:

—Naimie ie llofuegamedio. Caidi Moisés micori ie llofueganodicai.

²⁹ Jusiñamui Moisés micorimo jaie lluaña uiñoticai; iadedi bimiena uiñoñedicai. Naimie ninena billana jai uiñoñedicai.

³⁰ Nai ima uai ote:

—Jadi, naimie ninena billana uiñoñedomoi; iadedi cuena jillotate.

31 Jusiñamuidi jearede rafuena finodino ñaia uaina cacarefiñede. Naie isoidino siño rafuena finoñenana uiñotica; iadedi Jusiñamuidi naimiena sedadimie ñaia uaina cacade. Ie jitailla rafuena finodimie ñaia uaina cacade. Naie isoidino siño rafuena finuana uiñotica.

32 Enirue finua facaisemona jaca buna uisino jeicigamiëna jilloitañede.

33 Jesúdi Jusiñamuimona biñedimiedena, jaca buena finonide.

34 Uai otimaci:

—Jamai cai nairai imiedio. ¿Niese caina llofueitio?

Ie jira naimaci ofiracomona naimiena jino dotadimaci.

Jesús uisnidimie diga ñaia rafue

35 Uisnidimiena jino dotajana fidianona, Jesús naimiena jenode. Baillano, jicanote:

—¿Omoí cominina Jilloitaraimana innotio?

36 Uai ote:

—¿Bumai naimie? Cuello lono, naimiena cue inolllesa.

37 Jesús uai ote:

—Naimiena ciodio. O diga ñaite. Cue.

38 Caiñici ifodo rainadajanona, iobillacinona fecallena, uai ote:

—Nama, jai o uaina inoticue.

39 Jesús uai ote:

—Uisnidino ciotallena, eniruemo biticue. Jai uisina ciodino uisina cioitañellena biticue. —Iese Jesús raite; ia naimaci comeciaina ñaite. Jesús “Jai marañedica” raitinona jillotajaibite. Jesús “Jai maredica” raitinomo ite jeacino naimaci uiñollena bite.

40 Naimie ecimo ite fariseuai iena cacajano, jicanotimaci:

—¿Uisnidomoi caina raitio?

41 Jesús uai ote:

—Uisnidino isoi itomoina, omoimo ite jeacino omoí muidonañede; ia “Jai ciodica” omoí railla jira, omoimo ite jeacino omoí muidona.

Iese raite; ia naimaci comeciaina ñaite. Jeacino naimacimo illana naimaci uiñoiacañena jira, iese ñaite. Naimaci jeacino oni dotajana jitañedimaci.

10

Toica llaudaiaí sedaraima rafue

1-2 Jesús dane llofueite:

—Cue rafuena omoí raise uiñollena, toica llaudaiaina ñaiticue. Llaudaiaí jino uicabilla isoi, llaigafomo nasedo fo jaidimiedi naie llaudaiaí sedaraima; ia jinofebei dinena bitimiedi firiraima.

3 Llaigafu llaudaiaí sedaraima fo jaillena, nase sedaraimadi nase econote. Llaudaiaí naimie uaina uiñotimaci. Imaci mameciaido uaiduamona, llaigafomona jino bitimaci.

4 Nana ie llaudaiaí jino bia, naimacina ifode. Naimie uaina uiñuanona, naimiena racadimaci.

5 Naimaci uiñoñegamiëna racañedimaci; iadedi naimie uaina naimaci uiñoñena jira, naimiemona oni aisidimaci.

6 Bie isoidicinona Jesús llofueite; iadedi naie comini iena cacañedimaci.

7 Ie jira Jesús dane llofueite:

—Llaigafu ie nase isoidicue.

8 Damierie firirainina bitimaci. Ie jira llaudaiaí naimaci uaina cacañedimaci. —Iese Jesús llofueite; ia naimiena innotinona ñaite. Naimiena

abi caitadinona ñaite. Naimie ñnotino naimiena abi caitadino llogacinomo cacareñña ñaite.

⁹ Nia llofujete:

—Llaigafo isoidicue. Bu cue nasedo fo bia, jilloite. Llaudaiaí isoi fo biite. Jino jaite. Mare guille baite isoite. —Iese llofujete; ia naimiena ñnotino marena illana ñaite. Naimiemona naimaci jitailla rafuena uana ñaite.

¹⁰ Nia llofujete:

—Llaudaiaína fiñllena, meinellena, faifillena, firiraima bite; iadedi cominina jaca raise itatallena, biticue.

¹¹ Llaudaiaí marena sedaraimadicue. Mare sedaraimadi ie toiniaí facaina riiduanona ie abina faifite.

¹² Janallari bia, llaudaiaí naimie ieñena jira, jamai maijidimiedi, llaudaiaína fainonocaillano, ecimona aiside. Llaudaiaína janallari gaitaacanamona, llaudaiaí tuudimaci.

¹³ Jamai ucube oiacanano, isiruiñenano, jamai maijidimie aiside.

¹⁴ Iese iñedicue. Mare sedaraimadicue. Cue llaudaiaína uifotocue.

¹⁵ Cue Moo diga conimana coco uifua isoi, naimaci cuena jiaí uifotimaci. Cue llaudaiaí facaina fioidaiticue. —Iese Jesús llofujete; ia naimiena ñnotinona ñaite. Jamai maijidimie isoi naimacina sedañede. Naimacina raise riidote. Naimaci facaina jiaí fioidaiacade.

¹⁶ Nia llofujete:

—Jiaie llaigafomo jiaie llaudaiaí cuemo ite. Naimacina jiaí atiacadicue. Cue uaina cacaitimaci. Ie mei danomo nana cue llaudaiaí iitimaci. Naimacina dama sedaiticue. —Iese Jesús llofujete; ia jiaie nairaiaimo naimiena ñnotinona ñaite. Dajena naimacina sedajana ñaite.

Jesús fioidaille rafue

¹⁷ Jesús nia llofujete:

—Cue jai fioidaiacanamona, cue Moo cuena isiruite. Fioidaillamona dane jilloiticue.

¹⁸ Cue jitañña, jaca buna cuena meineñeite. Cue jitailla jira, fioidaiticue. Siño uai cuemo illa jira, cue jitailliruimo fioidaiticue. Cuemo cue Moo siño uaidi jai illa jira, dane jilloiticue.

¹⁹ Jesús iese llofua jira, judúuai illaicominidi daje isoi comeciaina fañedimaci.

²⁰ Jiaínodi:

—Naimiemo Janaba illamie —raitimaci—. Uairico. Naimiena cacareia-cañedicai —raitimaci.

²¹ Jiaíno raitimaci:

—Bie isoidicinona Janaba illamie llofueñede. Janaba illamie uisimidimiena jillotanide.

Jesús ie Moo diga daje isoi comeci lloilla rafue

²² Rollime facaise Jerusalémo Jesús ite. Naie facaiseconi Jusiñamui jofo ie finua comeci rafue ite.

²³ Salomón micori finotaga jofo abi ibirimo Jesús macarite.

²⁴ Naie facaise judúuai illaicominí naimie dine bitimaci. Jicanotimaci:

—¿Niruido caimo ona lloitio? Odi cai jilloitaramania, caimo marefodo llono.

²⁵ Jesús uai ote:

—Omoimo jai lloticue; iadedi ñnoñedomoi. Cue Moo mamecido cue finoca rafuemonona cuena uifotomoi.

²⁶ Cue toica llaudaiaímo omoi jainaiañña jira, cuena ñnoñedomoi.

²⁷ Cue toica llaudaia; cue uaina cacadi;maci. Naimacina uifnoticue. Cuena racadi;maci.

²⁸ Naimaci; jaca itataticue. Jaca abina faifñeitimaci. Cue anamona jaca budi naimacina bairoñeite.

²⁹ Cue Moo naimacina cuemo fecade. Naimaci; jai;no bai;femo faitimaci. Naimiemona jaca budi naimacina bai;ronide.

³⁰ Cue Moo diga daje isoi come;cina lloidicoco. —Iese llote; ia naimiena inotinona ñaite. Naie illaicomini naimiemo jainaiañena jira, naimiena inoñedimaci. Iena Jesús ñaite.

³¹ Jesús llofuiana cacajano, naie illaicomini noficina llinotimaci, naimiena meinellena.

³² Iena ciuanona, Jesús llote:

—Cue Moo uaido diga mare rafuena finodice. ¿Nie isoide rafuena cue finua muidona, cuena meineiacadomoi?

³³ Uai otimaci:

—Mare rafuena o finua muidona, ona meineñeitica; jama; imadio. “Jusiñamudice” o railla jira, ona meineitica;. Jusiñamui Joreña jai; jeare ñaitio.

³⁴⁻³⁶ Jesús dinena uai ote:

—Jaie ciegafuiaina jamainidica;. Nainomo Jusiñamuidi naimie uaina cacadinomo jaie llote: “Omo;di jusiñamuilla;domoi”. Jusiñamui ie uaina cacadinomo jaie iese lloide, ¿niese cuena jeare ñaitomoi? Jusiñamui cuena fetuano, cuena bene oretate. “Jusiñamui Jitodice” cue railla jira, “Jusiñamui Joreña jeare ñaitio” raitomoi.

³⁷ Cue Moo isoi cue finoñenia, cuena inoñeno;

³⁸ iadedi; cuena omoi inoiacaiñenia, cue Moo isoi cue finoia, naie rafuena ino. Iemei; cue Moomo cue jainaiaillana uifnotomoi. Cuemo cue Moo jainaiaillana jai; uifnotomoi.

³⁹ Iena cacajano, naimiena dane gaitaacadi;maci; iadedi; naimacimona jillode.

⁴⁰ Ie mei Jesús Jordán railla ille ruica di;beimo jaide. Nainomo Juan micori cominina nano bautizade. Nainomo rillanona, nainomo Jesús fiebide.

⁴¹ Ailluena comini Jesús dine bitimaci. Coninina raitimaci:

—Juan micori; siño rafuena finoñede; iadedi; nana Juan micori; Jesúsna llucinodi; uanaicino.

⁴² Nainomo ailluena cominidi; Jesús naimaci; Jilloitaraimana inotimaci.

11

Betaniamo Jesús abido jailla rafue

¹ Naie facaise Betaniamo Lázaro raillamiedi; duide. Naimie miriñodi; Marta, María ia;ñuái.

² Naie Mariadi; jai;ruído Jesús eillimo; caimare soride rana totade. Ie mei naiñaiño; ie ifotie diga naimie eillina safenaillena dote.

³ Naie ia;ñuái Jesús dine uaina oredia;ñuái, naimie billena. Naimie jibuisa;billena llotatati;ia;ñuái:

—Nama, o isiruigamie; duide —llotatati;ia;ñuái.

⁴ Jesús naie rafuena fidiano, llote:

—Jama; fi;daillena naimie duñede. Jusiñamui uaina siñonana comini uifñollena, naimie duide. Iemona comini; dinena: “Ua Jusiñamui Jitodio” cuena raitimaci.

⁵ Jesúsdi; Lázaron a isiruite. Ie miriño; ia;ñuái;na jai; isiruite;

⁶ iadedi Lázaro duillana Jesús fidiano, naimie dine jaiñede. Naimie illanomo menarui nia fiebide.

⁷ Ie mei ie llofueoicaiganodicaïmo llote:

—Judeamo abido dane mai cai jailli.

⁸ Uai oticai:

—Llofueraïma, judïuai illaïcomini birui noficina ona fairinoiacadimaci. ¿Niese naimaci dine dane jaitio?

⁹ Uai ote:

—Nagarui userede. Userenia bu macaria, raise ciua jira, eïcaïtaiñede;

¹⁰ iadedi bu naiona macaria, raise cioïñena jira, eïcaïtaide. —Iese llofuate; ia naimie rafuedo jaillena ñaite. Raite:

—Cue rafue suicana jaite. Cue jitaille dinori nia llofueticue. Cue rafuedo omoi jaiia, marena jaitomoi. Iedo omoi jaiñenia, duere sefuitomoi.

¹¹ Dane llote:

—Lázaro jai inide; iadedi naimiena casitallena, jaiticue.

¹² Uai oticai:

—Nama, naimie jamai inïa, nia dama casite.

¹³ Naimie jafaïci uanona inïamo começiaina facadicaï; iadedi Jesús naiena lloñede. Lázaro fiodaillana ñaite.

¹⁴ Ie jira Jesús caïmo marefodo llote:

—Naimie jai fodaite.

¹⁵ Nainomo cue iñena jira, cue siño uai omoi ñnollena, omoi facaina iobidicue. Naimie dine mai cai jailli.

¹⁶ Caïmona Tomás caïmo llote:

—Maïña. Naimie diga fiodaisaiticai —llote. Tomás mameci jiaïcidi Dídimio. Naimiedi gorasa.

Jesús Marta diga ñaia rafue

¹⁷ Betaniamo cai ria, Lázaro raïafomo jai nagaamagarui illana fididicaï.

¹⁸ Jerusalémona Betaniamo tres kilómetros dinori illa jira,

¹⁹ diga judïuai illaïcomini eedollena, Marta iaïñuiai María dine bitimaci.

²⁰ Jesús billana Marta fidiano, cai dine naisomo bite; iadedi jofomo María fiebide.

²¹ Jesúmo Marta llote:

—Nama, o bene itiona, cue iio fiodaïñede;

²² iadedi Jusiñamuiimo buena o jicaia, naimie iena finoite. Iena uiñoticue.

²³ Jesús dinena uai ote:

—O iio abido jilloite.

²⁴ Naiñaiño uai ote:

—Nana comini jilloilliruiimo naimie jiaï jilloite. Iena uiñoticue.

²⁵ Jesús uai ote:

—Fiodaillamona comini abiaïna Jilloitaraïmadicue. Jusiñamui diga jaca illena, cominina itataraïmadicue. Bu cuena ñnuanona, fiodaïadedi, iemona ico jilloite.

²⁶ Cuen a ñnotimïena Jusiñamui illanomo jaca illena itataiticue. ¿Iena ñnotio?

²⁷ Naiñaiño uai ote:

—Jii, Nama; odi cai jilloitaraïmadio. Odi Jusiñamui Jitodio. Jusiñamui dinena o billamo jaie ocuïridicaï.

²⁸ Iese raïllanona, jofomo Marta abido jaide. Ie euïñoa uaiduano, anado llote:

—Llofueraïma jai ride. Ona uaidote.

29 Iena cacajano, raire cai dine María bite.

30 Marta diga ie ñaianomo Betania ecimo Jesús nia ite.

31 Jesús dine María nia jaiñenia, judíuai illaicominidi Maríana nia eedotimaci. María jino jaillana ciuano, racadimaci. “Raiafomo eellena naiñaiño jaide” raillanona comeciaina facadimaci.

32 María Jesús dine rillano, naimiena duenaillano, caiñici ifodo rainadacaida, llote:

—Nama, bene itona, niadedi cue iiodi fioidañede.

Jesús Lázaron a jillotaja rafue

33 María eiana Jesús ciuano, naiñaiño diga bitino eiana ciuano, naimie comeci eo sunaite. Sunaillamona, jafaicina faite.

34 Jicanote:

—¿Ninomo Lázaron raitomoi?

Uai otimaci:

—Nama, mai jibuisaibi.

35 Lázaron duenaillanona, Jesús eede.

36 Iena ciuanona, judíuai illaicomini dinena llotimaci:

—Ero. Naimiena eo isiruite.

37 Jiaino raitimaci:

—Navui uisnidimiena jillotate. ¿Bue ñellena bimiena jilloitañede, naimie nia fioidañenia?

38 Iena cacajanona, ie siño uai finuana naimaci nia raise iinosiñena jira, Jesús comeci dane sunaite. Oni jaillanona, raiafomo ridicai. Nofici motomo ite naie raiafo. Ifodi jiaie noficina ibaica.

39 Jesús llote:

—Nofici oni ñuita.

Marta dinena naimie uai ote:

—Nama, naimie abi jai sorirede. Nagaamagarui raiafomo jai ite.

40 Jesús uai ote:

—Cuen a o ñnoia, Jusiñamui uai siñonana uiiñoitio.

41 Iemona cominidi noficina oni ñuitadimaci. Jesús monamo eruailano, llote:

—Moo, cue uaina o cacaja jira, iobidicue.

42 Jaca cuena cacadio. Iena uiiñoticue; iadedi cue diga bene itino illa muidona, iese ado lloticue. Cuen a o oretajana naimaci ñnollena, o diga ado ñaiticue.

43 Ie mei eo ado llote:

—Lázaro, jino bi.

44 Nai fioidaitimie nia naimie abi nana ferinua ra diga jino bite. Jesúsdi cominimo llote:

—Naimie abi ferinua oni suiño. —Ie jira suiñodimaci.

45 Ie muidona María diga bitinomona ailluena comini Jesúsna ñnotimaci. Naimie finoca rafuena ciuanona, ñnotimaci.

Jesúsna meinellena, illaicomini comeciaina facaja rafue

(Mt 26.1-5; Mr 14.1-2; Lc 22.1-2)

46 Jesúsna iinoñedinomona damierie Jesús finoca rafuena fariseuai dine lluidimaci.

47 Ie jira Jusiñamui diga nanoca ñairaini, fariseuai diga, danomo ofdidimaci. Jesús rafuena siadotimaci:

—¿Ñiese naimiena nibaiticaí? Diga siño rafuena ua finocabide.

⁴⁸ Naimiēna niese cai nībaiñēnia, nana comīni naimiēna iinoitīmaci. Nana comīni naimiē dibeimo jaia, naimaci illaimana naimiē jaillana jitaitīmaci. Iemei romanos soldaduai biitīmaci. Jusiñamui jofona judaiaibitīmaci. Cai nairaiaina jiai fuidoitīmaci. Iena jitaiñēdicai.

⁴⁹ Naie facaise nanoca Jusiñamui diga ñairaimana Caifás illamona, naimacimo llote:

—Naimiē rafuena raise uiñoñedomoi.

⁵⁰ Iese cai nairaimo suiñellena, damiē cai nairai facaina fiodaitena, mare. Iena nībai nia raise uiñoñedomoi.

⁵¹ Ie comecina dama facajano, iese lloñede; ia Jusiñamui diga nanoca ñairaimana naimiē illamona, Jusiñamui naimiēna biena llotatate:

—Jesúdi cai comīni facaina fiodaite.

⁵² Cai comīni facaina dama fiodaiñede; iadedi nana Jusiñamuina iinoitīnona facaina fiodaite. Diga nairaiaimo itīmaci; iadedi naimiēmo dajena nana naimaci duillena, naimiē fiodaite.

⁵³ Caifás luana naimaci cacajamona, judíuai illaicomīni comeciaina nia facadīmaci, naimiēna meinellena.

⁵⁴ Te jira Jesús judíuai illaicomīni illa motodo marefodo macariñede. Jofue iñena dofodo jaidīcai. Efraín railla nairai dīne ridīcai. Nainomo diga irui itīcai.

⁵⁵ Pascua railla rafue iaire iacana jira, ailluena comīni Jerusalémo naimaci nairaiaimona jaidīmaci. Rafue nia taineñēnia, naimacimo ite rafue oni jaillena, cai einamaci llua isoi finodīmaci.

⁵⁶⁻⁵⁷ Jusiñamui diga nanoca ñairainīdi fariseuai diga navui ñaitīmaci:

—Bu Jesúna cioia, naimiēna cai gaitallena, caimo llono.

Rafuemo bitino illamona, Jesúna jenodīmaci. Jusiñamui jofomo naimaci ia, coninimo jīcanododīmaci:

—¿Niese comeciaina facadomo? ¿Jesús bene biite? Cai illaicomīni llua jira, nībai jai biñeite. Illaicomīni llua n fidiāno, naimiē biñeite.

12

Betaniamo Lázaro jofomo Jesús guilla rafue (Mt 26.6-13; Mr 14.3-9)

¹ Pascua railla rafue rilledi seis digarui fiebidemo, Jesús cai diga Betaniamo jaide. Betania Lázaro illano. Jesús Lázaronā fiodaillamona navui jillotate.

² Jesúri iobillano, Lázaro ie guille rafuena finode. Marta guille bai jonega. Jesús diga guitino motomo Lázaro ite. Jesús llofueoicaiganodīcaidi jiai motomo guitīcai.

³ Iemei Mariadi nardomona finoca caimare soride ra Jesús eillimo totade. Daje botella raifi totade. Safenaillena naiñaiño ifotie diga ie eillina dote. Nai caimare soride ra eo raifide. Daje botella ite. Iemona nana jofo jeraidi soride.

⁴ Caimona Judas Iscariote micorīna mameciredimie ite. Jesúna gaitataitīmie. Llote:

⁵ —¿Bue ñellena bie soride radi fecañede, ucubena ollena? Fecacadena, trescientos digarui maijia ucube diese raifide. Ie mei nai ucube dueredinomo fecadena, mare —llote.

⁶ Dueredīnona naimiē duenaiñede; iadedi naimiē cai ucubena sedade. Naimiēdi fiirraima. Naie ucubemona fiuilla jira, iese naimiē llote.

⁷ Jesús uai ote:

—Dama ite. Bie soride ra naiñaiño jai eenoga cue fiodaillirui iena.

⁸ Dueredīno omoi diga jaca iitīmaci; iadedi omoi diga jaca iñeitīcue.

Ailluena comini Lázaron a ciua rafue

⁹ Lázaro jofomo Jesús illana ailluena cai illaicomini fidiano, bitimaci. Navui fiodaillamona Lázaron Jesús jillotaja jira, Jesúna dama cioiacañedimaci; iadedi Lázaron jiai cioiacadimaci.

¹⁰ Ie jira Jusiñamui diga nanoca ñairainidi Lázaron jiai meinellemo comeciaina facadimaci.

¹¹ Lázaro muidona ailluena judíuai illaicomini naimaci illa dibeí fañonocaida, Jesúna ñnotimaci.

*Jerusalémo illaíma isoi, Jesús marena jailla rafue
(Mt 21.1-11; Mr 11.1-11; Lc 19.28-40)*

¹² Pascua railla rafue illa jira, ailluena comini Jerusalémo itimaci. Egiptomona cai jaiaagai jillobillana comecillena naie rafue ite. Jesús Lázaro diga guillarui ie areruido Jesús Jerusalémo billana naie comini fididimaci. Fiodaillamona Lázaron Jesús navui jilloitajana diga comini ciodimaci. Iena llocana uitimaci. Ie jira ailluena comini Jesús dine jaidimaci.

¹³ Raforona uanona, naimiena feñollena, naimie uicomo jaidimaci. Ado curiisite:

—¡Cai jilloitaraima billa! ¡Jusiñamui mamecido bitimie eo mare! ¡Cai Illaíma eo mare! —curiisite.

¹⁴ Jesúsdi ailli baiga burrito emododo jaide. Jusiñamui facaina lloraima micori jaie llua isoi jaide. Jaie llote:

¹⁵ “Jerusalén imaci, jacinaiñeno. O Illaíma burrito emododo biite”.

¹⁶ Naie facaise bie rafuemo comeciaina facañedicaí; iadedi Jesús jillua mei, bie rafuena comeciticaí.

¹⁷⁻¹⁸ Lázaron Jesús jillotaja jira, ailluena comini Jesús dine jaidimaci.

¹⁹ Iena ciuano, fariseuai coniniri ñaitimaci:

—Jaca buena birui finoñedicaí. Ailluena comini Jesús dibeimo jai jaidimaci.

Judíuaiñedino Jesúna cioiacana rafue

²⁰ Judíuaiñedino Jusiñamuina sedallena, pascua railla rafuemo jiai bitimaci.

²¹ Naie facaise cai dine bitimaci. Felipedi Galilea ie Betsaida nairai imiena jira, Felipe dine bitimaci. Felipemo llotimaci:

—Jesúna cioiacadicaí.

²² Felipe iena Andrémo llote. Ie mei Jesúsmo lluidiaímaiaí.

²³ Jesús uai ote:

—Monamona biticue; ia jai cue fiodaílle facaise ride. Comini cue uaidi siñonana uíñua facaise jai ride.

²⁴ Jiaie rafuedo iena lloiticue. Ido rilla mei, naie ido sicoñenia, buena iñede; iadedi sicuamona, ailluena llisilladi iite. Ie isoide. Cue fiodaíñenia, jaca bu jillobiñeite. Cue fiodaíllemona ailluena comini jillobitimaci.

²⁵ Ie abimo ite rafuemo comeciaina dama bu facaía, ja muidomo faíñite; ia cuemo ite rafuemo comeciaina bu facaía, monamo jaca iite.

²⁶ Cuena bu raise sedaacania, cue rafuedo naimie jaite. Cue llofuegamiena naimie jaillamona, cuemona fueoite. Iemona cue Moodi naimiena caimare itataite.

²⁷ Cue comeci jai rucaicuerite; iadedi, ¿ñiese raiticue? Raiñeiticue: “Moo, cue fiodaíllemona cuena jillote”. Fiodaíllena biticue. Ie jira raiticue:

²⁸ “Moo, cominina o uai siñonana uíñota”.

Ieconí monamona Jusiñamui llote:

—Jai iena finodicue. Dane iena finoiticue.

29 Jusiñamui ñaiana nainomo ite comini raise cacaiñenano, raitimaci:

—Mona gurude.

Jaino raitimaci:

—Naimiemo Jusiñamui jaienici llote.

30 Jesús uai ote:

—Cue facaina naie lluana cacaiñedomoi; iadedi omoi facaina iena cadomoi.

31 Cuena uiñoñedino duere sefuilla facaise ja taineite. Taife anamo comini jai itimaci; ia Jusiñamui Taifena ja anafeditaite.

32 Cruzmo cue fiodaia, naimacina jilloitallena, ailluena cominina cue dibeimo itataitcuc.

33 —Naimie fiodaillana naimaci uiñoñellena, iese llote.

34 Naie comini uai otimaci:

—Jusiñamui facaina lloraini micoriai jaie cuela: “Cai Jilloitaraïma jaca fiodaiñeite”. ¿Ñiese raitio: “Jusiñamuimona biticue; ia fiodaitcuc”?

35 Jesús dane uai ote:

—Cue llofuaia ñinori omoi comeciaina nia lligaiñotcuc. Cue lluomo cacarei. Omoi diga cue nia ia, cue llofuiamo cacarei. Jitiredemo bu macaria, nai llana raise uiñoñede. Ie isoide. Jeacino anamo itinodi jitiredinomo itimaci isoidimaci. Uanaicinona uiñoñedimaci.

36 Jeacino anamona omoi jilloillena, cue llofuaia uaido omoi comeciaina birui lligaiñotcuc. Cue uaina ñno, cue cominina omoi jaillena.

Bie llua mei, Jesús oni jaillano, naimacimona reirite.

Comini Jesús uaina ñnoñena rafue

37 Jesús diga siño rafuena finode; iadedi ailluena comini: “Naimiedi cai jilloitaraïma” raillana nia ñnosifede.

38 Iemona Isaías micori jaie cuela; iadedi ailluena comini: “Naimiedi cai Jusiñamui, cai lluacinona cacadimaci.

O siño uaido o finoca rafuena jiai cioidimaci; iadedi ñnoñedimaci.

39-40 Isaías micori dane cuela:

Naimaci cioi raillano, Jusiñamui naimacina uisindino isoi itatate.

Naimaci comeciaina abina uiñoi raillano, naimaci comeciaina faitate.

Naimiena ñnoi raillano, iese naimacina jai itatate.

Ie jira jai ñnonidimaci.

41 Jusiñamui ie ebirede rafuena naimie ciuamona, Isaías micori iena llote. Isaías micori Jesúsna llote.

42 Isaías micori iese llote; iadedi ailluena judíuai illaicomini Jesús uaina ñnotimaci. Fariseuaina jaciruillanona, iena janotimaci. Naimaci ofracomona naimacina jino dotajana jaciruitimaci.

43 Comini naimacina iobitajana naimaci eo jitailla jira, dotajana jitañedimaci. Jusiñamuimo ite iobillacinona raise oiacañedimaci.

Jesús ie Moona ñaia rafue

44 Naie facaise Jesús eo ado llote:

—Cuena ñnotimie cuena oretatimiena jiai jai ñnote.

45 Cuena cioidimie cuena oretatimiena jiai cide isoide.

46 Comini comeciaina lligaiñollena biticue. Ie muidona naga cuena ñnotimie jitiredinomo jai ññede. Jeacino anamo jai ññede.

47 Cue uaina cacajano ñnoñedimemo juez isoi birui lloñedcuc. Cominina duere finollena, biñedcuc; iadedi naimaci jeacinomona naimacina jilloitallena biticue;

48 ia cuena bu ñnoñenia, cue uaina naimie ñnoñenia, ja muidona faifite. Cue uaina naimie ñnoñellemona, nana naimiena ñnoñedino janafefilliruimo Jusifamui naimiena ico duere finoite. Cuena jitafedimie, cue uaina jitañedimie comini janafefilliruimo janafefite.

49 Dama cue comeci facaja uaido lloñedicue. Cue Moo cuena oretaja muidona, cue Moo cuemo lloga uaido lloticue.

50 Cue Moo lloga uaidi naimie ñibeimo cominina jaca itatate. Iena uifnoticue. Ie jira cue Moo cuemo lloga uaina jaca lloticue.

13

Jesúdi ie llofueoicaigano eilliana jocua rafue

1 Pascua railla rafue riacana areruido ia, Jesús ie Moo ñine abido jaiacana uifnote. Naimaci diga naimie ñia ia, ie cominina jaca eo isiruute.

2 Jesúsna gaitatallena, ñaie facaise Taifedi Judas Iscariote micori comecina feidote. Judas micori Simón jito.

3 Jesúsdi ie uai ie Moomona feiñuana uifnote. Ie Moo ñinena billana uifnote. Ie Moo ñine abido jaillena jiai uifnote.

4 Nairuido Jesús cai diga guite. Guilla meinoconi, Jesús a ñaidacaida ie abimo ite ñiroina ñuiñode. Abi dora diga ie moillina ferinote.

5 Janorede nogomo jinuina totaja mei, cai eilliana jocode. Safenaillena, ie dora diga dote.

6 Simón Pedro ñine naimie ñia, Pedro jicanote:

—Nama, ¿cue eillina jiai jocoitio?

7 Jesús uai ote:

—Cue finoca rafuena birui uifnoñedio; iadedi jiairuuido uifnoitio.

8 Pedro uai ote:

—Cue eillina jaca jocoñeitio.

Jesús uai ote:

—O eillina cue jocoñenia, cue facaina iñeitio.

9 Pedro uai ote:

—Nama, dama cue eillina jocoñeno. O facaina raise cue illena, cue onolli, cue ifogi diga, jiai joco.

10 Jesús uai ote:

—Nana o abina jocoñeiticue. Da o eillina jocoiticue. Jai ñoidimie mena icaiño ñoñede. Ie abi jai ñeande. Dama ie eillina ñibai ñane jocoacade. Omoi comeciai jiai jai ñeande; iadedi omoimona ñamie comeci ñia jearede.

11 Naimiena gaitataiacadimiena naimie uifña jira, iese llote.

12 Cai eilliana jocua mei, ie ñiroi ñane jitaja mei, ñane ana ñañadajanona, caimo jicanote:

—Omoimo ailli cue finoca rafuena ñibai raise cacaiñedomoi.

13 Cuena “Cai Nama” raicabitomoi. “Cai llofueraima” cuena jiai raicabitomoi. Iese cuena omoi raia, mare. Ie isoí iticue.

14 Omoi Namadicue. Omoi llofueraimadicue; iadedi omoi mullaíma isoí iticuedena, omoi eilliana jai jodicue. Omoi jamai bue isoidinomona, omoi eilliana ñañirie jocua.

15 Cuemona fueo. Abi ñedoñeno cue isoí omoi jai. Cue afemo iñedomoi.

16 Uanaí omoimo lloticue. Mullaíma ie ñame afemo iñede. Oretagamie ie oretatimie afemo iñede. Ie isoide. Cue afemo iñedomoi; ia omoi eilliana jodicue. “Jiaimie afemo iticai” raillanomo comecina omoi facañeno.

17 Bicino omoi uifñuamona, iese omoi finoa, caimare iitomoi.

¹⁸ Nana omoïna iese ñaiñedicue. Nana cue fetocanona uiñoticue. David micori jaië llote: “Cue diga gutinomona damie cuena enoidimie ite”.

¹⁹ Bie nia suiñenia, iena jai lloticue. Iena cuemo suilla mei, David micori llogacino raise ñinoitomoï.

²⁰ Uanai lloticue. Cue oretagamiena bu feiñoia, cuena jiai feiñote. Bu cuena feiñoia, cuena oretatimiena jiai feiñote.

Jesúdi ie gaitataitimiëna llua rafue
(Mt 26.20-25; Mr 14.17-21; Lc 22.21-23)

²¹ Jesús iese llua mei, ie começi sunaite. Llote:

—Uanai lloticue. Omoïmona damie cuena gaitataite.

²² Caimona çnimie naimiena gaitataite? raillanona, começina facajano, coninimo eroridicai.

²³ Cuena Jesús eo gaia jira, Jesús abimo iticue.

²⁴ Cuena uaiduanona, Pedro cuemo llote:

—“¿Bu ona gaitataite?” Jesús mo jicano.

²⁵ Ie jira Jesús mo jicanoticue:

—Nama, çbu ona gaitataite?

²⁶ Jesús uai ote:

—Bie llomeniconona mutajanona, naimiemo fecaiticue —raite. Mutaja mei, Judas micorimo fecade. Naimie micoridi Simón Iscariote jito.

²⁷ Llomeniconona guilla meinocoçi, Taife anamo Judas micori illamona, Taife naimie começina feidote. Jesús naimiemo llote:

—O finoacaga rana raire fino.

²⁸ Jesús Judas micorimo llua na raise uiñoñedicai.

²⁹ Judas micori ucubena sedaja jira, jiaïno começina facade: “ ‘Cai jitaïlle guille ibarisai’ Jesús naimiemo llote”. Iese lloñenia, “ ‘Janore ucube dueredinomo feca’ nïbai naimiemo llote”.

³⁰ Guilla mei, Judas micori jino jaide. Naie facaise jai jitreñicaide.

Jesús ie fiodaïllena ñaia rafue

³¹ Judas micori jailla mei, Jesús llote:

—Jusiñamui mona billanona, ñimana jaidicue; ia cue fiodaïlle facaise jai ride. Cue fiodaïllemona cominidi Jusiñamui uai siñonana uiñoitimaci.

³² Iemona Jusiñamui uai siñonana comini uiñoia, Jusiñamuidi cominina cue siño Jitona jiai uiñotaite. Iese ja finoite.

³³ Cue comini, dallu omoï diga bene iticue. Jaiticue. Cue diga iacanitomoï. Judïuai illaicomini navui cue llua isoi, omoïmo ja lloticue. Cue jaïllinomo nia jaiñeitomoï.

³⁴ Ie jira jiaie rafuena omoïmo ja lloticue. Omoïna cue isiruilla isoi, coninina omoï isirui.

³⁵ Coninina omoï isiruillamona, jiaie cominidi cue cominidomoïna uiñoitimaci.

Pedro Jesús diga ñaia rafue
(Mt 26.31-35; Mr 14.27-31; Lc 22.31-34)

³⁶ Naie facaise Pedro naimiemo jicanote:

—Nama, çnine jaitio?

Jesús uai ote:

—Cue jaïllinomo cue diga ja jaiñeitio. Jiaïruido jaitio.

³⁷ Pedro uai ote:

—Nama, çbue ñïllena ja jaiñeticue? O jitaia, o facaina ja fiodaïticue.

³⁸ Jesús dinena uai ote:

—Cue facaina fiodaiacadío. Uanai omo llotícue. Nia monaiñenia, iitava nia ñaiñenia, dacaño amani cuena janoitiosa.

14

Jesús ie Moo dínomo rille rafue

¹ Jesús ie llofueoicaiganodicaina nia llofujete:

—Rucaicueriñeno uri i. Jusiñamuina ñinocana jai. Cuena jiai ñinocana jai.

² Cue Moo illanomo diga comini illanuai ite. Iese iñedena, omoimo jai llotícue. Omoi illinuaina raise finollena, nainomo jaitícue.

³ Fuiduanona, dane abido biitícue. Omoína cue dine uillena, cue dine omoi illena, biitícue.

⁴ Cue jaillinona birui uiñotomoi. Nainomo omoi rillena jiai uiñotomoi.

⁵ Tomás uai ote:

—Nama, o jaillinona uiñoñedícaí. ¿Níese nainomo riitícaí?

⁶ Jesús uai ote:

—Omoi naiso isoidícue. Uanaicinona llotícue. Cue Moo díbeimo comínina jaca itataticue. Cue Moo dine joide naiso isoidícue. Jaca dasode cue Moomo duide naídi. Cue Moo dine o ría, cuena ñno.

⁷ Cuena uiñotomóina, cue Moona jiai uiñotomoi. Biruidemona naimiëna uiñoitomoi. Naimiëna jai ciodomoi.

⁸ Felipe uai ote:

—Nama, o Moona caimo acata. Iemo jai macaibaite.

⁹ Jesús uai ote:

—Felipe, are omoi diga itícue; íadedí cuena nia uiñoñedomoi. Cuena ciódimíe cue Moona jiai jai ciode isoide. ¿Níese llotío: “O Moona caimo acata”? Cue Moona jai ciodio isoidío.

¹⁰ Cue Moo diga daajedicoco. Iena nia ñnoñedio. Cue lluaí cue Moo uai. Cue lluaí cue comeí iuaíñede. Cue motodo naimíe maijide.

¹¹ Cue Moo diga daajedicocona ñno. Cue uaina omoi ñnoñenia, siño rafuena cue finua jira, cuena ñno.

Jesús ie Moo Joreña llua rafue

¹² Jesús nia llofujete:

—Uanai llotícue. Cuena omoi ñnoia, cue finoca rafuena jiai finoitomoi. Cue Moo dine cue jailla jira, cue Moo Joreña omoi dine cue oretaja mei, cue finua baífemo finoitomoi.

¹³ Cue Moo uai siñonana omoi uiñollena, buena cue díbeido cue Moomo omoi jicaia, nana iena finoitícue.

¹⁴ Cue díbeido omoi jicaia, iena finoitícue.

¹⁵ Cuena omoi isirua, cue llogacinuaina ñnoitomoi.

¹⁶ Ie Joreño omoimo fecallena cue Moomo jaitícue. Naie Joreñodí omoína canoite. Omoi diga jaca iite.

¹⁷ Uanaicinona llocabite. Naimiëna naimací uiñoñena jira, cuena ñnoñedíno naimiëna feiñonidímáí; íadedí naimíe omoi diga illa jira, naimiëna uiñotomoi. Omoi diga jaca iite.

¹⁸ Omoína faínonocaiñeítícue; ía dane biitícue.

¹⁹ Nano nigarui illanona, cuena ñnoñedíno cuena nia cioítímáí. Ie mei cuena cioíñeítímáí; íadedí fiodaillamona cue jillua mei, cuena nia cioítomoi. Cue jaca illa jira, jiai jaca iitomoi.

²⁰ Fiodaillamona cue jillua mei, cue Moomo cue duillana raise uifioitomoí. Cuemo omoí duillana jiai raise uifioitomoí. Omoímo cue duillana jiai raise uifioitomoí.

²¹ Cue llogacinuaina omoí isirua, cuena isiruitomoí. Ie jira cue Moodi omoína jiai isiruite. Omoína jiai isiruiticue. Omoína cuena uifiotaiticue.

²² Iscariotena mamecifeñede Judas naimiemo jicanote:

—Nama, ¿bue ñellena daní caína ona uifiotaitio; iadedí jiaie cominina ona uifiotaitio?

²³ Jesús uai ote:

—Cuena isiruitinona cue rafuena uifiotadicue. Bu cuena isirua, cue llogacinuaina ifioite. Cue Moo naimiema isiruite. Iemona naimiema nabaiticoco.

²⁴ Bu cuena isiruiñenia, cue llogacinuaina ifioñede. Cue llogacinodi cuejeñede. Cue Moo ie. Naimie cuena oretate.

²⁵ Omoí diga nia cue illamona, bie llogacinuai omoímo jai lloticue.

²⁶ Cue Moodi omoína canollena, naga rafuena omoína llofuellena, cue facaina ie Joreña ona omoímo oretate. Omoína nana omoímo llogacinuaina comecitaite.

²⁷ Cue Moo ñine jaiticue; iadedí omoí comeciaina uri itataiticue. Cuena ifioñedino omoí comeciaina iese itatanidimaci. Jarire ifieno. Jaciruiñeno.

²⁸ Ailli cue lluaana cacadomoí: “Cue Moo ñine jaiticue; iadedí dane biiticue”. Cue Moo ñine cue jailla jira, cuena omoí isirua, cueri iobitomoí. Cue Moo cue afemo ite.

²⁹ Bie rafue cuemo nia suiñenia, uicodo omoímo iena jai lloticue. Naie suia, cuena fañonocaiñeno omoí jaillena jitaidicue.

³⁰ Omoí diga are nia ñaifieticue. Cuena ifioñedino anamo itimie cuena jai duere finoacade. Taifena ñaiticue. Naimie anamo ifiedicue;

³¹ iadedí cue Moona cue isiruillana cuena ifioñedino uifioñena, cue Moo cuemo llua isoi, finoitocue. Mai cai jailli.

15

Uvas railla riará ie rafue

¹ Jesús nia llofuete:

—Cue ñibeimo marena omoí illena omoí raise uifioñena, jiaie rafuedo iena llofueitocue. Uvas railla ua riaradicue. Cue Moodi uvas railla riará sedaraima.

² Cue amena igailaidomoí. Llisñede igai cue Moo cugaica. Eo llisillena, naga lliside igaina janore muido jaigaica. Ie isoide.

³ Cue llogacinuaido jaillamona, jai jaigaica isoidomoí. Iemona omoí comeciái jai jeanide.

⁴ Cuena nabai. Ona jiai nabaiticue. Naie amenamo jai ñuiñena jira, daje ñibegaise jaitaca igaidí jai llisñede. Ie isoide. Cuena omoí nabaicabiñenia, llisñede igai isoidomoí. Ie jira cuena nabai.

⁵ Uvas railla riaradicue. Cue amena igailaidomoí. Cuemo omoí ñuiadedí, omoímo cue ñuiadedí, eo lliside isoidomoí; iadedí cuemo omoí ñuiñenia, jaca llisñede isoidomoí. Cuemo omoí ñuiñenia, cue jitailla isoi mare rafuena jaca ifioñeitomoí.

⁶ Jai ñuide igailai safenaila mei, marañena jira, jobaillena, danomo ofitaticai. Cuemo ñuiñedimie jai ñuide igai isoide. Jusifiamuimona duere sefuite.

⁷ Cuen a omoi nabaia, cue uaina omoi feitañenia, omoi jitaille rana jica. Ie mei feiñoitomoí.

⁸ Eo lliside omoi isoia, cue Moo iobide. Iese omoi ia, ua cue cominidomoí. –Iese Jesús llofuede; ia naimie díbeimo naimaci raise illena ñaite. Mare rafuena naimaci finocana jaillena ñaite.

⁹ Nia llofuede:

–Cuen a cue Moo isiruilla isoi, omoína isiruiticue. Cuen a nabaicabi.

¹⁰ Cue Moo llogacinuaina cue ñinuamona, naimie isiruillacino anamo iticue. Cue Moo llogacinuaina omoi ñinuamona, cue isiruillacino anamo itomoí.

¹¹ Cue isoi omoi comeciaí eo caimarellena, bicinuai omoimo lloticue.

¹² Dane bie rafuena lloticue. Omoína cue isiruilla isoi, coninina omoi isirui.

¹³ Naimaci o isiruillamona, o nabaiñiaí facaina o fiodaia, naimacina eo ua isiruitio.

¹⁴ Cue llogacinuaina omoi ñinoia, cuena nabaidomoí.

¹⁵ Omoína “Cue mullaiaídomoí” jaca raiñedicue; iadedi omoína “Cue nabaiñiaídomoí” birui raiticue. Mullaiaí imaci patrón finoca rafuena uifñoedimaci. Ie jira nana cue Moomona cue cacaja rafuena omoimo jai lloticue. Ie jira nana cue rafuena jai uifñotomoí.

¹⁶ Cuen a fetofñedomoí; iadedi omoína fetodicue. Omoi lliside isoicabillana omoimo jai lloticue. Ie mei buena cue mamecido cue Moomo omoi jicaía, omoimo fecaite.

¹⁷ Coninina omoi isiruillena jai lloticue.

Comini Jesúna enoilla rafue

¹⁸ Jesús nia llofuede:

–Cuen a ñinoñedino omoína enoia, nano cuena jai enoidimaci. Iena uifñotomoí. Omoína nia enoiñenia, cuena jai enoidimaci.

¹⁹ Naimacimo jainaiaídomoína, omoína isiruitimaci; iadedi naimacimo omoi jainaiaíñena jira, omoína cue fetua jira, omoína enoidimaci.

²⁰ Omoimo jai lloticue. Illaíma duere sefua, naimie anamo itino jiaí duere sefuidimaci. Ie isoide. Cuen a comini duere finua isoi, omoína jiaí duere finoitimaci. Cue llofuiacinona naimaci ñnua isoi, omoi llofuiacino jiaí ñnoitimaci.

²¹ Cuen a oretatimiena naimaci uifñoñena jira, cue muidona iese finoitimaci.

²² Naimacimo ite jeacinona naimacimo lloñedicuena, naimacimo ite jeacinona uifñoñedimaci. Cue rafuena naimaci cacajamona, naimacimo ite jeacinona jai uifñotimaci. Naimacimo jeacino nia ia, naimaci muidona.

²³ Cuen a enoidimiedi cue Moona jiaí enoide.

²⁴ Eo siño rafuena naimaci motomo finodicue. Buna cue isoi jaca finofñede. Iena finofñedicuena, naimacimo ite jeacinona uifñoñedimaci. Cue siño finoca rafuena jai ciodimaci. Ie jira cuena enoidimaci. Cue Moona jiaí enoidimaci.

²⁵ Naimacina David micori jai lloite: “Naimacimo buena finofñedicue; ia cuena enoidimaci”. Naie cuegafuiai jai suide.

²⁶ Cue Moo ie Joreño omoimo oretaite. Ie Joreño omoína canoite. Omoína uanaicinsona uifñotaite.

²⁷ Cue nano lluaruimona cue diga omoi illa jira, cue facaisena jiaí raise lloitomoí.

¹ Jesús nia llofuate:

—Danomo abido omoi jaiñellena, cue uaina omoi fainonocaiñellena, bicinuai omoimo ja lloticue.

² Omoi ofiracomona illaicomini omoina dotaitimaci. Jiairuido omoina meiniamona: “Jai Jusiñamuina marena sedadica”, comeciaina facaitimaci.

³ Cuen a naimaci ñnoñena jira, cue Moona jai naimaci ñnoñena jira, iena finoitimaci.

⁴ Bie rafue omoimo suia, naie facaise cue llua na omoi comecillena, omoimo birui lloticue. Omoi diga cue illa jira, navui iena lloñedicue; iadedi omoimona birui oni jaiticue.

Jesús Jusiñamui Joreño na llua rafue

⁵ Jesús nia llofuate:

—Cuen a oretatimie dine ja jaiticue; iadedi omoimona buna: “¿Ñine jaitio?” cuemo jaca nia jicanoñede.

⁶ Omoimo bie rafue cue llua jira, omoi comeci ai eo sure ite. Ie jira cue jaillinona jicanoñedomoi.

⁷ Uanai lloticue. Cue jaia, mare. Cue jaiñenia, omoina canoraíma omoi dine biñeite. Cue jaia, omoi dine naimiena oretaiticue. Jusiñamui Joreñodi omoi canoraíma.

⁸ Naimie bia, cuena ñnoñedinona naimacimo ite jeacinona uiñotaite. Naimiedi Jusiñamui marena naimaci illana jitaillana uiñotaite. Naimiedi Jusiñamui naimacina duere finollena jai uiñotaite.

⁹ Cuen a naimaci ñnoñenia, naimacina naimacimo jeacino nia illana uiñotaite.

¹⁰ Cue Moo dine abido cue jaillinona, cuena cioiñeitimaci; ia iemona Jusiñamui Joreño cue uaina siñonana uiñotaite.

¹¹ Fiodaillemona jilloiticue. Iemona cuena ñnoñedino anamo itimiedi cue Moo janafellacino anamo iite. Taifena ñaiticue. Cue finoca rafue muidona, cue Moo Joreñodi cominina, cue Moo Joreñodi cominina naie janafillemona jilluana uiñotaite.

¹² Diga rafue omoimo nia lloiacadicue; iadedi jai rairafaidomoi.

¹³ Jusiñamui Joreño bia, omoimo nana uanaicinuana llofueite. Dama ie facaina llofueñeite; iadedi ie cacajacino llofueite. Jiairuido suille rafuena llofueite.

¹⁴ Omoina cue rafuena uiñotaite. Ie jira cuena iobitaite. Nana cue Momo ite uaidi cueje.

¹⁵ Ie jira bie rafuena lloticue. Jusiñamui Joreño omoina cue rafuena raise uiñotaite.

Sunaillamona caimare illa rafue

¹⁶ Jesús nia llofuate:

—Dallu illanona cuena cioiñeitomoi. Ie mei dallu illanona, cuena dane cioitomoi.

¹⁷ Ie llofueoicaganodicaimona damierie dan coninimo jicanodosite:

—¿Ñiese caimo lote: “Dallu illanona, cuena cioiñeitomoi. Ie mei dallu illanona, cuena dane cioitomoi. Cue Moo dine jaiticue?”

¹⁸ ¿Buena caimo llote? Raise cacañedicaí.

¹⁹ Cai jicanuana Jesús uiñuanona, naimie jicanote:

—¿Cue llua na raise uiñoiacadomoi?

²⁰ Cuemo suille rafue suia, eo eitomoi; iadedi cuena ñnoñedino eo iobitimaci. Sunaitomoi; iadedi jiairuido caimare itomoi.

²¹ Jiaie uaido iena lloiticue. Riño jocoacania, naiñaiño jigico isirede. Jocua mei, naiñaiño urue jeiciamona, isirenadi feibicaide. Iemona jai iobide.

²² Ie isoide. Ja sunaitomoi; iadedi dane omoina cioiticue. Fiodaillamona cue jillua mei, dane cuena cioitomoi. Ie mei caimare iitomoi. Iemona omoina buna sure itatañeite.

²³ Nairuimo cuemo buena jicañeno; iadedi cue Moomo jica. Ie mei cue muidona naimie omoimo fecaite.

²⁴ Cue mamecido cue Moomo buena jaca nia jicañedomoi. Jica. Ie mei feiñoitomoi, omoi comeci eo caimare illena.

Jiairuido Jesús marefodo llua rafue

²⁵ Jesús nia llofuete:

—Jiaie uaido bicinona omoimo jai lloiticue. Jiairuido iese lloñeiticue. Omoina cue Moona marefodo lloiticue.

²⁶ Nairuimo cue Moomo omoi facaina jicañeiticue. Cue mamecido cue Moomo omoi jitaillacinona dani jicaítomoi.

²⁷ Omoina naimie isiruillamona, omoimo fecajite. Cuena omoi isiruilla jira, cue Moomona cue billana omoi ñnua jira, cue Moo omoina isiruite.

²⁸ Cue Moomona eniruemo biticue. Naimie dine abido jaiticue.

²⁹ Lloticaí:

—Jai marefodo caimo llotio. O uaina meidocana jai uifedio.

³⁰ Nana rafuena o uifnuana uifnoticaí. Cai comeciaino iticinona o uifnuamona, caina raise uifnotio. Iemona Jusifnamuimona o billana jai ñnoticaí.

³¹ Jesús uai ote:

—Cuena jai ñnotomoi.

³² Jiairuido, ua birui, oni tuuitomoi. Nagamiiaí jofomo omoi jailla mei, dama ifocoini fiebiticue; iadedi dama ifeiticue. Cue Moo cue diga iite.

³³ Cuena omoi ñnuano, omoi uri illena, omoimo bie lloiticue. Eniruemo omoi ia, jaca duere sefuitomoi; iadedi omoi comeciaina ocuiño. Omoina duere finodinona jai cue emodofilla jira, omoi comeciaina ocuiño. Naimaci baifemo faiticue.

17

Jesús ie Moo diga ñaia rafue

¹ Jesús bicinona llua mei, monamo eruaillano, jide:

—Moo, cue fiodaiacananui jai ride. Cue uai siñonana uifnota. Iemei o uai siñonana jiaí uifnotaiticue.

² Nana comini afemo cuena jai itatatio. Iimana cue jaillamona, nana comini afemo cuena jai itatatio. Comini comeciá iuaina o meidotajamona, cue fiodaillamona, ailluena comini o diga jaca iitimaci.

³ Ona nanoca Jusifnamuina uifnoitimaci. Jai cuena o oretajana jiaí uifnoitimaci.

⁴ Ailluena siño rafuena jai finodicue. Nana o cuemo lloga rafuena cue finuamona, bene ona jai iobitadicue.

⁵ Ore Moo, enirue nia ifena facaiseconi o diga iticue. Illaima isoi o ecimo dane ebire iacadicue. Dane cuemo ine, daje isoi coco illesa.

⁶ Comini comeciá iuaina o meidotajamona, naimacina jai llofuecabiticue. O anamo naimaci illamona, omo ite rafuena llofuecabiticue. Iemona o rafuena ñnocana jaidimaci.

⁷ Nana cuemo ite rafue omona feiñoticue. Iena jai uifnoitimaci.

8 Nana cuemo o llogacínuaína naimacimo jai lloticue. Jai ñnotimaci. Omona cue billana jiai jai ñnotimaci. Cuena o oretajana jiai ñnotimaci.

9 Naimaci facaina birui jüdicue. Naimacina cuena ñnotadio. Ie jira omo jai duidimaci. Ona ñnoñedino facaina birui jüññedicue.

10 Nana o dibeimo itinodi cueje. Nana cue dibeimo itinodi oie. Nana naimaciri iobidicue.

11 Bene eniruemo fiebitimaci. Eniruemona monamo jaiticue. O dine abido jaiticue. Ore Moo, jeacino naimaci finoí raillano, o anamo o uai diga naimacina seda. Coco comeci lloilla isoi, naimaci daje isoi comeciaina lloita.

12 Naimaci diga nia cue ia, naimacina cue anamo sedadicue. Naimacina raise sedadicue, naimaci feirai raillano. Naimaci motomona dama Judas feiraita. Jusiñamui lloraima micori cuegafuiai suillena, naimie ua faifite.

13 O dine ja jaiticue. Cue isoi naimaci comeciai eo caimare illena, naimacimo ailluena rafuena jai lloticue.

14 O llogacínuaína jai lloticue. Ona ñnoñedinomo naimaci jainaiainena jira, ona ñnoñedino naimacina enoidimaci. Ona ñnoñedinomo jiai jainaiainedicue.

15 Eniruemona birui o naimacina uana jicanoñedicue; iadedi Taifemona naimacina o sedajana birui jicanoticue.

16 Ona ñnoñedinomo jainaiainedicue. Ona ñnoñedinomo jiai jainaiainedicue.

17 O llogacínuaído naimacina marena itata. O llogacínuaídi uanaicino. O jitaillacinona naimaci finollena, o uai naimaci comeciaino raise itata.

18 Bene cuena o oretaja isoi, ona ñnoñedino dine naimacina oretaticue.

19 Uanaicinona naimaci uññuamona, naimaci comeciai marebicaillena, cuena ñnotino facaina fiodiaicadicue.

20 Bimacina birui dane jüññedicue; iadedi bimaci cue rafuena ico lloia, jiaie comini cuena ñnoitimaci. Cuena ico ñnoitino facaina birui jiai jüdicue.

21 Daajedicoco. Coco illa isoi, naimaci comeciaina daje isoi lloillena, nana naimaci facaina jüdicue. Daje isoi comeciai lloillamona, cuena nia ñnoñedinodi ñnoitimaci. Iemona cuena o oretajana ñnoitimaci.

22 Cuemo o iga uaidi ebirede. Naimaci comeciai lloillena, naimacimo o uai jai cue iga.

23 Naimaciri dajedicai. O diga daajedicoco. Naimaci comeciai daje isoi lloillana jitaidicue. Iemona cuena ñnoñedino bene cuena o oretajana uñnoitimaci. Cuena o isiruilla isoi, naimacina o isiruillana jiai uñnoitimaci.

24 Ore Moo, naimaci cue dine illena jitaidicue. Enirue nia iñenia, illaíma isoi o ecimo ebire jaie iticue. Dane ie isoi ebire birui cue ia, naimaci cuena ciuana jitaidicue.

25 Ore Moo, mareuidimedio. Jiaie comini ona uñnoñedimaci; iadedi ona uñnoticue. Cue llofueoicaiganodi o cuena oretajana jai uñnotimaci.

26 Naimacimo ona jai lloticue. O cuena isiruilla isoi coninina naimaci isiruillena, naimacimo nia lloticue —jüde.

18

Jusúna gaitalle rafue

(Mt 26.47-58; Mr 14.43-54; Lc 22.47-54)

1 Jiaí meí, Jesús ie llofueoicaiganodicaí diga, Cedrón railla iconi enefebeimo ruica aceituna railla riaraiái illanomo naíona jaide.

2 Jesús caí diga nainomo jaisoilla jira, Judas micori naie illanona jiai uñnote. Jesúsna gaitatallena nainomo Judas jaide.

³ Soldaduai diga policías diga jaide. Naimacina ifode. Jusiñamui diga nanoca ñairaini naimacina oredimaci. Fariseuai naimacina jiai oredimaci. Soldaduai di lamparíaiiri bitimaci. Reinaiairi jiai bitimaci. Sidaniairi jiai bitimaci. Judas naimacina ifode.

⁴ Jesúsdi nana naimiemo suille rafue uiñuanona, naimaci dine billano, jicanote:

—¿Buna jenodomoí?

⁵⁻⁶ Uai otimaci:

—Nazaret ie Jesús.

Jesús uai ote:

—Imiedicue.

Iena cacajano, jacinailamona, abido ñaijillamona, eniruemo uaidimaci. Jesúsna gaitatallena, Judas micori naimaci diga ite.

⁷ Jesús dane jicanote:

—¿Buna jenodomoí?

Uai otimaci:

—Nazaret ie Jesús.

⁸ Jesús uai ote:

—Omoímo jai lloticue: “Imiedicue”. Cuen a omoí jenoia, cue diga itino oni jaillena rairuiñeno.

⁹ Naimie ie Moomo como lloga uai suillena, iese llote. Iese ie Moomo como llote: “Cuen a oñnotaganomona jaca buna faifñedicue”.

¹⁰ Ie daacaiño Simón Pedrodi ie lloebi llinocaida, Jusiñamui diga nanoca ñairaima mullaíma jefona jai bonote. Naie mullaíma mamecidi Malco.

¹¹ Iena ciuanona, Jesús Pedromo llote:

—O lloebina eno. Cue Moo jitailla isoi, fioidaiticue.

¹² Ie mei soldaduai, imaci capitán diga, judíuai imaci policías diga, Jesúsna gaitajano, naimiena maitimaci.

¹³ Anás dine nano uitimaci. Anásdi Caifás jifai. Caifásdi Jusiñamui diga nanoca ñairaima.

¹⁴ Navui Caifás judíuai illaicomini mo llote: “Damie nana cai comini facaina fioidaitena, mare”.

Pedro Jesúsna nano janua rafue

(Mt 26.69, 70; Mr 14.66-68; Lc 22.55-57)

¹⁵ Simón Pedro Jesús jinafo racade. Jiai racadicue. Cuen a Jusiñamui diga nanoca ñairaima uiñua jira, ie nairai birimo Jesús diga jaidicue;

¹⁶ iadedi Pedro nasemo fiebicaide. Ie jira jino abido jaillano, Pedro fo atillena, nasena sedaraiño mo jicanoticue.

¹⁷ Naiñaiño Pedromo llote:

—Jesús llofueoicaigano imiedio.

Pedro uai ote:

—Ieñedicue.

¹⁸ Rosirena jira, naie jofo mullaíai, policías diga, cooci diga irai bonodimaci. Agaillena irai ecimo naidaidimaci. Agaillena Pedro naimaci motomo jiai ite.

Jesús Anás dine illa rafue

(Mt 26.59-66; Mr 14.55-64; Lc 22.66-71)

¹⁹ Ie facaise Anás Jesúsno ie llofueoicaiganodicaina jicanote. Ie llofuaci nuaina jiai jicanote.

²⁰ Jesús dinena uai ote:

—Nana cominimo marefodo lloticue. Omoi ofiracuaimo jaca llofuecabiticue. Jusiñamui jofomo jiai jaca llofuecabiticue. Nainomo nana o comini oficabidomoi. Bainino buena jaca lloñedicue.

²¹ ¿Bue ñellena birui cuemo jicanotio? Cuenca cacadinomo iena jicano. Cue llofuiana uiñotimaci.

²² Iese Jesús llua jira, daje policía naimie uiecona butade. Jesúsno jicanote:

—¿Bue ñellena iese uai otio?

²³ Jesús dinena naie uai ote:

—Naimie uai jeare oticuenca, cuemo llono. Jeare oñedicuemo, ¿bue ñellena cuena butadio?

²⁴ Jesús uai oñede. Iemei Anásdi Caifás jofomo Jesús maianona orede.

Pedro Jesúsna dane janua rafue

(Mt 26.71-75; Mr 14.69-72; Lc 22.58-62)

²⁵ Ie facaise Pedro irai ecimo nia agaide. Nainomo itino naimiemo llote:

—Jesús llofueoicaigano imiedio.

Pedro janote:

—Ieñedicue.

²⁶ Naie facaise daje nullaima Pedromo llote:

—Aceitunas railla riaraiailanonomo ona ciodicue —llote. Jesúsna soldaduai gaitaja facaiseconi Pedro naie nullaima ie come jefona ailli jaiñbonote, soldaduai Jesúsna gaitaja ie daacaño.

²⁷ Pedro dane janote. Iecon iitava ñaite.

Jesús Pilato dine illa rafue

(Mt 27.1-2, 11-14; Mr 15.1-5; Lc 23.1-5)

²⁸ Ie mei Caifás jofomona gobernador jofomo Jesúsna jitiramo uitimaci. Naie facaise gobernadori Pilato. Naimiedi judiuañedimie. Naimaci einamaci rairuilla jira, judiuañedimie jofomo naie facaise fo jaiñedimaci. Fo jaiadedi, pascua railla rafue guiledi guiñega.

²⁹ Te jira Pilato jino bite. Naimacimo jicanote:

—¿Ñie isoide rafue muidona llogidotomoi?

³⁰ Uai otimaci:

—Bimie marañede rafue ñoñedena, o dine naimiema atañedicaí.

³¹ Pilato llote:

—Naimiema uiño. Omoi einamaci llogacinuaido naimiema duere fino.

Uai otimaci:

—Come meinellena caimona rairuidomoi. Naimie coraiana jitaídicaí —llotimaci.

³² Navui Jesúsdi: “Cuenca cruzmo coraiitimaci” llote. Naie llucino jai suisaide.

³³ Pilato fo abido jaillano, Jesúsna uaiduano, naimiemo llote:

—Judíuai illaima raillamedio.

³⁴ Jesús dinena jicanote:

—¿O comecina dama iese facajano llotio? Iese comecina o facañenia, jiaimie omo lloga.

³⁵ Pilato uai ote:

—Judío imieñedicue. O rafue raise uiñoñedicue. Omoi comini cuemo ona fecadimaci. Jusiñamui diga nanoca ñairaini cuemo jiai fecadimaci. ¿Ñie isoide marañede rafuena finodio?

³⁶ Jesús uai ote:

—Eniruemo cominina sedañedicue. Judíuai illaicomini cuena gaitañellena, eniruemo cominina sedadicedena, cue comini cue facaina fuiridimaci.

³⁷ Pilato uai ote:

—Ie jira odi illaimadio.

Jesús uai ote:

—Jaca railla. Uanaicino lllollena, jeicigacue. Nana uanaicinona jítaidino cue lluaana cacadimaci.

³⁸ Pilatodi Jesús uaina uaitajamona, raite:

—¿Nie uai naidi uaina?

Ie mei dane jino billano, cominimo llote:

—Jaca nicino naimiemo ñede.

Jesúna coraiacana rafue

(Mt 27.15-31; Mr 15.6-20; Lc 23.13-25)

³⁹ Pilato nia llote:

—Naga año pascua railla rafue illa facaise, damie cárcelmona jino ollena, cuemo jicanuaibisoidomoi. Bie año omoi jitaia, omoi illaima raillamiena marena oretaiticue.

⁴⁰ Comini dinena cuiriidimaci:

—Dama ite. Bimienna jítaiñedicaí. Barrabásna cárcelmona marena jino oreta.

—Iese cuiriidimaci. Barrabásdi fíiriraima.

19

¹ Ie mei Pilato Jesúna oni uillanona, naimienna sechedotade.

² Jifanodosillena, soldaduai eecuaímona finoca nuiciraina naimie ifogimo jítadimaci. Jiduirede iniroina jítatajano raitimaci:

³ —Judíuai illaimadio. —Iemei ie uiecona bucoidimaci.

⁴ Pilato dane jino billano, raite:

—Naimie omoi dine jino ja biite. Naimiemo nicinodi ñede —raite.

⁵ Ie facaise Jesús jino bite. Eecuaímona finoca nuiciraina jítaca. Jiduirede iniroina jítaca. Pilato naimacimo llote:

—Jadi, naimie.

⁶ Jusiñamui diga nanoca ñairainidi, jiaie illaicomini diga, naimienna cuano, cuiriidimaci:

—Naimienna corai.

Pilato llote:

—Naimiemo nicinodi ñede; ia oni uillanona, naimienna omoi corai.

⁷ Uai otimaci:

—Moisés micori jaie cuega: “Bu Jusiñamuina jeare ñaianona, fiodailla”. “Jusiñamui Jitodicue” naimie railla jira, naimie fiodailla. Naimie Jusiñamui Jitona abina caitadimie. Caimona naimiedi marañede rafue jai finode.

⁸ “Naimiedi Jusiñamui Jito” comini raillana Pilato cacajano, eo jacinaite.

⁹ Jesúna dane fo uite. Jesúsdi Jusiñamui Jitona naimie raise uñollena, Jesúmo jicanote:

—¿Ninena bitio?

Jesús uai ñede.

¹⁰ Ie jira Pilato dane jicanote:

—¿Bue ñellena cue uaina oiacañedio? Uai cuemo ite, o marena oretallena. Uai cuemo ite, ona coraitallena.

¹¹ Jesús uai ote:

—O anamo Jusiñamui cuena itataja jira, o uai ite, cuemo lllollena. Ie jira omo cuena fecadino o baifemo jeacino finodimaci.

¹² Ie facaimona Pilato Jesús marena jino oretaiacade; iadedi judíuai illaicomini dinena cuiriisite:

—Bimie o jino marena oretaia, cai nanoca illaïma ie nabaiñedio. “Illaïmadicue” Jesús lluamona, cai nanoca illaïma ðibeimo naimiedi iñede. Cai nanoca illaïmadi César.

¹³ Comini lluana cacajano, Pilato Jesúsna jino atide. Ie cominimo lloranomo raide. Naie illano nofinina mameciredede. Judíuái uaido Gabatana mameciredede.

¹⁴ Pascua rafue guilla finoraruímo jitoma naidai illanona, Pilato dinena llote:

—Jadi, omoi illaïma.

¹⁵ Iemona cominidi cuiirisite:

—¡Naimie oni uillanona, naimiena meine! ¡Naimiena coraï!

Pilato jïcanote:

—¿Bue ñellena omoi illaïmana coraïticue?

Jusiñamui ðiga nanoca ñairaini uai otimaci:

—Cai illaïmadi César. Jiaie illaïmadi caimo iñede. Jaca dallaimade cai illaïmadi.

¹⁶ Ie mei Pilato naimacimo naimiena fecade, coraïllena.

Jesúna coraïacana rafue

(Mt 27.32-56; Mr 15.21-41; Lc 23.26-49)

Pilato lua jira, Jesúsna uitimaci coraïllena.

¹⁷ Jesúsdi ie cruzna rocaïcaida sonode. Ifocoraïna eruaïlla mameciredede illanomo jaidimaci. Judíuái uaido naie illano Gólgotana mameciredede.

¹⁸ Nainomo naimiena coraïdimaci. Naimie abïmo menamie coraïca. Damie Jesús nabeïmo. Jiaïmie jarifebeïmo.

¹⁹ Cruzmo jonellena, Pilato rabicimo cuetatate: “Nazaret ie Jesús. Judíuái Illaïma”.

²⁰ Judíuái uaido cuela. Romanos comini uaido jiaï cuela. Griego uaido jiaï cuela. Jesús coraïano Jerusalén ianori illa jira, aïlluena comini iena cioidimaci.

²¹ Iena ciuamona, naie rabicina meïdöllena, Jusiñamui ðiga nanoca ñairaini Pilatomo llotimaci:

—“Judíuái Illaïma” raïllano jai cuetatatio. Iena meïduana jitaïðicai. Bimie dinena raisoide: “Judíuái Illaïmadicue” raïllanona, o cuetatajana jitaïðicai

²² Pilato uai ote:

—Jai cuetataticue. Jiaie rabicimo dane cuetatañeiticue.

²³ Jesúsna coraïa mei, soldaduái naimie iniroi uanona, naga soldado ðigamie jonega iniroi. Nagaamaga soldaduái ite. Ie camisa fiebide. Naie daje jamai nigaroi.

²⁴ Ie jira danï coniniri ñaïtimaci:

—Bie camisa cuaranoñeiticai, danï cai fecallena. Mai. Conima jabomaiticai, iena ollena. —Iese finuano Jusiñamuina lloraïma micori cuela fuaï suide. Jiaie cuela: “Cue iniroi danï naimacimo fecaitimaci; iadedi cue camisa ollena, conima jabomaitimaci”. Iese finodimaci.

²⁵ Cruz abïmo Jesús ei, ie euïño ðiga ite. Cleofas aïdi ite. Naiñaiño mameci María. María Magdalena jiaï ite.

²⁶ Jesús ie eina ciode. Cuenai naiñaiño ecimo jiaï ciode. Cuenai eo gaïde. Ie jira ie eïmo llote:

—Jadi, o jito isoi itimie anamo iitio.

²⁷ Cuemo llote:

—Jadi, o ei isoidiñaiño anamo iitio.

Naie dacaiño naiñaiñoña cue jofomo uillanona, naiñaiñoña sedadicue.

28 Ie mei Jesús nana rafue jai fuillana uiñuano, llote:

—Jiroacaducue. —Iese lluanona, Jusiñamuina lloraíma micorí jaie cuegafuiai jai suide.

29 Nainomo llerojímo vino ite. Radosimo fibecode rana joniano, vinomo faíte. Iemei Jesúmo fecade jaronollena.

30 Iena jaronuano, Jesús llote:

—Cue maijía jai fuite. Jai macaíbaite. —Ie ifogí ana jítadacaida, fiodaite.

Jesús sida diga ducia rafue

31 Pascua railla rafue guille finuarui illa jira, judíuai illaicomini Pilato dine jaidimaci. Raire fiodaillena, coraicano idaiaina uellullena naimiemo jicanuaidimaci. Sábado rafue ie nairui nia illanona, sábadorui jai raire taineacana jira, coraicano cruzmo sábadoruimo illana jitañedimaci.

32 Soldaduai jaillano, Jesús ecimo coraíca íaimaíai idaiaina uellude.

33 Jesús dine billano, naimie jai fiodaillana ciódimaci. Ie jira naimie idaiaina uelluñedimaci;

34 iadedí daje soldado Jesús ciraigíconi sida diga ducide. Naifo diaide. Naifomona jinui jai bite.

35 Nana iena ciódicue. Uanai llotícue. Omoí ñnollena, iena llotícue.

36 Soldaduai iese finuamona, jaie cuegafuiai jai suide. Jaie Jesúsna cuega: “Naimie illaicina tainoñeitimaci”.

37 Jíai jaie cuega: “Judíuai dinena naimaci ducítagamíemo íco eruaitimaci”.

Nofici ifomo Jesús raia rafue

(Mt 27.57-61; Mr 15.42-47; Lc 23.50-56)

38 Naie facaise Pilato dine José raillamie jaide. Cruzmona Jesús abí oni ollena, Pilatomo jicanuaide. Josédí Arimatea nairai imie. Pilato fairiote. Ie jira José Jesús abí ana uanona, iena oni uite. Judíuai illaicomínina naimie jacirullanona, Jesúsna bainino ñnote.

39 Nicodemo jai bite. Siorede rana atide. Mirra áloe diga jai tamiano atide. Níbai treinta kilos atide. Naimiedí Jesús dine naíona navui bite.

40 José, Nicodemo diga, Jesús abina useroina ferinotíaimaíai. Naimaci comini finouilla isoi, naie siorede radi iniroimo jonega.

41 Amenaíai iaire illanomo Jesúsdí coraíca. Nainomo nofici ie raiafodí ite. Nia buna naifomo raíñenafo.

42 Naifo iaire illa jira, sábadorui jai riacana jira, jiaie raiafo jenollena abí juanina jira, nainomo naimiena jonetiíaimaíai. Nofici diga raiafo raise íbailla mei, jofomo jaidíaimaíai.

20

Fiodaillamona, Jesús jillua rafue

(Mt 28.1-10; Mr 16.1-8; Lc 24.1-12)

1 Domingo jítiramo nia monañenia, raiafomo María Magdalena jaide. Raiafo íbailla nofici oni joillana cióde. Jesús abina cioññede.

2 Ie jira aisicana Pedrona jenuaide. Cuena jai jenuaide. Baillano, llote:

—Cai illaicomini cai Nama abina raiafomona otimaci. Naimiena jonianona uiññedicue.

3 Ie mei raiafomo jaidicoco.

4 Aisicana jaidicoco; iadedí riire cue aisicana jailla jira, nano ridícue.

5 Ana bitadacaida, fo erodaticuemo, useroi joillana ciódicue; iadedí fo jaññedicue.

6 Ie mei Simón Pedro rillano, fo jaide. Useroi joillana jiai ciode.

7 Ie ifogimo ferinoga iniroi eneno illana ciode. Raise nacuana ciode.

8 Iemei jiai fo jaidicue. Iniroina ciuamona, Jesús jai jilluana inoticue.

9 Jaiie cuegafuiaí llotte: “Fiodaillamona jilloite”. Naie cuegafuiaína como raise inoticoco.

10 Ie mei jofomo jaidicoco.

María Magdalenamo Jesús bairia rafue

(Mr 16.9-11)

11 Raiáfomo abido billano, coco jailla mei, nainomo María fiebide. Eede. Ana bitadacaida, fo erodatemo,

12 Jusiñamui mona mena jaienici jai billana ciode. Userede iniroi jitadiamaiaí. Jesúsna navui jonianomo ana raidiamaiaí. Damie ifogi dibeimo raide. Jiaimie eilli dibeimo raide.

13 Naiñaiño mo jicanotiamaiaí:

—¿Bue ñellena eedio?

Naiñaiño uai ote:

—Cue Namana bu oni uillanona, naimiena jonianona jai uifioñedicue.

14 Naie facaise jinafo dine erocaillanona, Jesúsna ciode; iadedi naimiena uifioñede.

15 Naiñaiño comecina facade; “Naimiedi bie illano sedaraima”. Jesús naiñaiño mo jicanote:

—¿Bue ñellena eedio? ¿Bu jenodio?

Naiñaiño uai ote:

—Jesúsna o uia, naimie jonianona cuemo llono. Ie mei naimiena oni uiticue.

16 Jesús dinena uai ote:

—¡María!

Naimie dine naiñaiño como raise dobaicaide. Judíuai uaido llotte:

—¡Raboní! —Naie uai oni dobaifuamona: “Llofueraima”.

17 Jesús uai ote:

—Cuenalioñoeno cuena faícaí. Cue Moo dine nia a jaiñedicue. Cue amataí dine mai jaillanona, cue rafuena lluai. Cue Moo dine jaiticue. Naimiedi cue Jusiñamui. Naimie jiai omoi Moo. Jiai omoi Jusiñamui.

18 Ie jira María Magdalena Jesús llofueoicaiganodicaímo lluaibite:

—Caí Namana jai ciodicue. —Iemei caímo naimie naiñaiño mo lluaína llotte.

Jesús ie llofueoicaiganomo bairia rafue

(Mt 28.16-20; Mr 16.14-18; Lc 24.36-49)

19 Domingo naio Jesús llofueoicaiganodicaí jofomo ofidicaí. Judíuai illaicominina caí jaciruillamona, nasiaí nana caí ibaica. Nase econoñeno ieconí Jesús caí motomo billanona, caína uaiduano, llotte:

—Urí omoi í.

20 Ie onollina acatate. Ie ciraigina jiai acatate. Caí Namana jai caí ciuari eo iobidicaí.

21 Jesús dane llotte:

—Urí omoi í. Cue Moo cuena oretaja isoi cue rafuena lollena, omoina oretaiticue.

22 Ie facaise caína firaiñuanona, raite:

—Jusiñamui Joreñoña omoi feiñuana jitaidicue.

23 “O jeacinoa jai dotade” bumoo omoi lloia, Jusiñamui jai dotaca. “O jeacinoa nia dotañede” bumoo omoi lloia, Jusiñamui nia dotañega.

24 Naie naio Tomásna mameciredede llofueoicaigamie caí diga iñede. Dídimona jiai mameciredede. Naimiedi gorasa.

²⁵ Naimiemo lloticaí:

—Cai Namana ailli ciodicaí.

Tomás uai ote:

—Clavo ifona naimie onolli jeraimo cue cioñenia, naie ifona cue jetañenia, naimie ciraigí ifona cue jetañenia, ññoñeíticue.

Jesús ie llofueoicaiganomo dane bairia rafue

²⁶ Ocho digarui illanona, Jesús llofueoicaiganodicaí dane ofillano, Tomás cai diga ite. Nana nasiaí ibaica; iadedi nase econoñeno ieconi Jesús cai motomo dane fo billano, uaiduano, lote:

—Uri omoi i.

²⁷ Iemei Tomásmo llote:

—Eroda cue onollimo. Naifo jeta. Ciraigí ifona jiaí jeta. ññoñeno jaiñeno. Mai ñno.

²⁸ Tomás uai ote:

—Cue Namadio. Cue Jusiñamuidio.

²⁹ Jesús dane uai ote:

—Cuena o cúa jira, cuena ñnotio; iadedi cuena cioñedino cuena ñnoia, jiaí caimare iitimaci.

³⁰ Jesús diga siño rafuena finode. Iena ciodicaí. Nana naie rafuena bie rabenicomocueñedicue;

³¹ iadedi dajerie cueticue. Jesúsdi cai Jilloitaraímana omoi ñnollena, iena cueticue. Naimiedi Jusiñamui Jitona omoi ñnollena, iena jiaí cueticue. Naimiena omoi ñnuano, naimie diga jaca iitomoí.

21

Jesús ie llofueoicaiganomo ane bairia rafue

¹ Diga irui illanona, Tiberiana mameciredede jorai fuemo Jesús ie llofueoicaiganodicaímo dane bairedede.

² Nainomocueñeíticaí: Simón Pedro, Tomás, Natanael, cue ama Jacobo, cue, jiaíe íaimaiaí. Tomás mamecí jiaicidi Dídimocue. Natanael Galilea ie Caná nairai ímie.

³ Simón Pedro caímo llote:

—Lloiji faiaíticue.

Naimie uai oticaí:

—O diga jaiticaí. —Iese raillano, botemo jaidicaí. Namona naio lloijina faíticaí; ía jaca buena oñedicai.

⁴ Monaiacademo, Jesús jorai fuemo bite; iadedi naimiena uiñoñedicai.

⁵ Jesús caímo jicanote:

—Caimaci, ¿ñie ñiese lliciaína jai otomoi?

Uai oticaí:

—Jaca oñedicai.

⁶ Naimie dane uai ote:

—Omoi bote nabei ñine omoi lloijina faíno.

Ie jira faíticaí. Ailluena lliciaí naíemo jilla jira, a aiñonidicaí.

⁷ Iena cuamona, Pedromo lloticue:

—Cai motomocai Namadi ite.

Pedro iena cacajano, naimie taimiena jira, ie iniroi jitate. Jesús ñine naimie raíre rillena, joraímo daíade;

⁸ iadedi botedo biticaí. Enírué íaire illa jira, na lliciaímo sonocana, lloijina atidicaí. Nibaí cien metros oni ite.

⁹ Jorai fuemo cai ría, coocimona bonoca iraina ciódicai. Lliciaí iraimo ruica jai ite. Llomenico jiaí ite.

¹⁰ Jesús caimo llote:

—Omoi oga lliciaimona janore ati.

¹¹ Ie jira Simón Pedro botemo jaillano, lloijina llinuanona, eniruemo ari sonode. Ciento cincuenta y tres jemierie jitaticai. Ailluena ite; iadedi lloiji cuarariñede.

¹² Jesús llote:

—Mai guisaiíbi. —Jesúna cai uifua jira: “¿Budío?” jaca buna raiñena.

¹³ Jesúdi llomenico diga lliciaína caína ecade.

¹⁴ Fiodaillamona jillua facaisezona dacaiño amani caimo Jesús jai abina bairetate.

Jesús Pedro diga ñaia rafue

¹⁵ Guilla mei, Jesús Simón Pedromo llote:

—Simón, odi Juan jitodio. —Jiaí jicánote— ¿Nana o nabaiñiaí bai femo cuena isiruitío?

Simón uai ote:

—Jii, Nama, ona cue isiruillana uifotío.

Jesús uai ote:

—Toica llaudaiaí uruiaína omoi raise sedaja isoi, cuena inotinona raise seda. Naimacina cue rafuena raise llofue.

¹⁶ Dane llote:

—Simón, odi Juan jitodio. —Dane jicánote— ¿Cuena isiruitío?

Simón uai ote:

—Jii, Nama, ona cue isiruillana uifotío.

Jesús dinena uai ote:

—Toica llaudaiaí uruiaína omoi raise sedaja isoi, cuena inotinona seda.

¹⁷ Dane jicánote:

—Simón, ¿cuena isiruitío? —Jesús naimiemo dane jicánua jira, “Jesús cue uaina inoñede” raillanona, Pedro comeci sunaite.

Uai ote:

—Nama, naga rafuena uifotío. Ona cue isiruillana uifotío.

Jesús uai ote:

—Toica llaudaiaí uruiaína omoi raise sedaja isoi, cuena inotinona seda.

¹⁸ Daje rafue omo nia lloiticue. O nia conirue facai o iniroi dama jitadio. Ie mei o jitaillanomo jaidío. O uaciroma facaiseconi o onolli oni ñuitaitío. Ie mei jiaimie o iniroi ona jitajano, o jitañenanomo ona uite. Cue lluaña inocana o jai.

¹⁹ Fiodaillena Pedro uifollena, uicodo Jesús iese llote. Cristo llua isoi, Cristo rafue muidona, illaicomini Pedrona jiairuido meinetimaci. Naimie fiodaillanona, Jusiñamuina iobitade.

Jesús ie gaia llofueoicagamiemo llua rafue

²⁰ Pedro diga Jesús nia ñaia facaise, Pedro dobaicaillanona, cuena ciode. Iaimaiaí jinafona racadicue. Jesús gaíamiedicue. Navui cai guía, Jesús nia fiodañenia, Jesús abimo cue ia, Jesúmo jicánoticue: “¿Bu gaítatallío?”

²¹ “Cuena inotinona seda” Pedromo Jesús llua mei, Pedro dobaicaillanona, cuena ciuano, Jesúmo jicánote:

—Nama, ¿niese naimie fiodaite?

²² Jesús uai ote:

—Naimie nia itemo, cue abido bia, dama iesede. Naimie rafuedi omo duiñede; ia cue llwana inocana o jai.

²³ Ie jira creyentiai naie llwana fidiano cuena raitimaci:

—Naimie fioidaiñeite. —Iese raitimaci; iadedi Jesús iese raiñede. Jesús llote: “Naimie nia itemo, cue abido bia, dama iesede. Naimie rafuedi omo duiñede”.

²⁴ Nana rafuena cuano lloticue. Iena cueticue. Uanaicinuaina cueticue.

²⁵ Jesús ailluena jiaie rafuena finode. Nana ie rafue cuedadena, enirue baiñede, naie libros eenollena. Mai. Juandicue.

JESUCRISTO ORETAGANODI NAIMIE RAFUE LLOCANA UILLA RAFUE

Jesús Jusiñamui Joreño billena llua rafue

¹ Teofilo, o dine, ¿nigacino? ¿Nie isoidio? Omo jiaie rabe birui dane oretaiacadie. Lucadie. Navui jiaie cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiai cueticue.

² Monamo naimiena Jusiñamui nia uñenia, Jesús ie llofueoicaiganona llofueuide. Ie llofueoicaiganona jaiie naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaigano naimie oretaganona mameciredimaci.

³ Naimie fiodaillamona ie jillua mei, naimacimo bairedede. Naimie ua jilluana naimaci raise uñollena, diga icaiño cuarenta digarui naimacimo baireuide. Naimacina Jusiñamui dibeimo ie comini jai illa rafuena llofueuide. Naimiemo jai suide rafuena llofueuide. Naimiemo nia suiñede rafuena llofueuide.

⁴ Naimaci diga Jesús guilla facaise, naimie Jerusalémona naimaci oni jailana rairuide. Raite:

—Cue Moo ie Joreño omoimo fecallena, omoimo jai lloticue. Naiena omoi feiñollena, Jerusalémo nia fiebi.

⁵ Naimie rafuena comini inuamona, Juan Bautista micori jinui diga bautizade; iadedi cue rafuena omoi inuamona, nano nigarui illanona, cue Moo ie Joreñona feiñoitomo —raite.

Monamo Jesús jailla rafue

⁶ Ie llofueoicaigano diga Jesús dane ofillanona, naimiemo jicanotimaci:

—Nama, ¿birui cai judiui cominina jai sedaitio, David micori cai usumatiai micoriai jaiie sedaja isoi?

⁷ Naimie uai ote:

—Naie rafue suille facaiseconi jaca uññoñeitomo. Naimie siñona illamona, dama cue Moo naie rafue suilliruina uñnote;

⁸ Iadedi cue Moo ie Joreña omoi feiñua mei, siño uai omoimo iite. Ie jira Jerusalémo cuena lloito moi. Judeamo, Samariamo, ua nana eniruemo ite nairaimo lloito moi —raite.

⁹ Naimie iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiena cioisñede.

¹⁰ Monamo nia eruaidemo, ieconi naimaci dine Jusiñamui jaienici, mena ima bairia isoi, bairediaimaia. Naie iaimaia iniroi userede.

¹¹ Raitiaimaia:

—Galileo imaci, ¿bue ñellena monamo eruaidomo? Omoi motomona Jesús monamo jaillana jai ciodomo. Naimie jai jailla isoi, dane abido ico biite —raitiaimaia.

Matiana fetua rafue

¹² Naimacimo Jusiñamui jaienici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros dinori illanona, sábadoruimo Moisés micori lloga dinori macaritimaci.

¹³ Rillano imaci cuartomo jaidimaci. A dibebamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiaie Jacobo. Naimiedi Alfeo jito. Simón ite. Naimiedi cananista comini facaisemo duide. Judas ite. Naimie jiaie Jacobo jito. Diese nainomo itimaci.

¹⁴ Naimaci jitaillamona, Jusiñamuimo jüllena, nagarui danomo ofidimaci. Jüllena, jiano naimaci diga jiai ofisoidimaci. Diga riñoniai jiai ofisoidimaci. Jesús ei, María, jiai ofisoide. Jesús amatiai jiai ofisoidimaci.

¹⁵ Comini ofilla motomo Pedro naidaita, rafuena lloste. Nibai ciento veinte comini nainomo itimaci. Pedro lloste:

¹⁶ —Amatiai, David micorí jaie lloga rafue birui jai suide. Jusiñamui Joreño jaie David micorína Judas micorína ñaitatate. Salmos rabenicomo naie ñaiacinodi cuega. Iena uiñoticaí. Judas micorína uiñoticaí. Naimie Jesúsna gaitadinona ifode.

¹⁷ Naimiedi da cai llofueoicaigano imie. Cai diga maijiuide.

¹⁸ Ie marañeno finoca rafueмона ucubena feiñua mei, ie comeci iuaina meiduanona, naie ucubena oni judaide. Judíuaí illaicomini naie ucube diga eniruena ibadimaci. Nainomo Judas micorí ie cimaio cuinajanona, ie abina dama meinete. Rifaiillamona, ana uaiillamona, ie jebegi boficaillamona, nana ie jebegi jino uaide.

¹⁹ Nana Jerusalémo itino iena fididimaci. Ie jira cai uaido naie enirue mamecired Acéldama. Oni dobaiñuamona dirue toillanie.

²⁰ Ero, Salmos rabenicomo Judas micorína iese David micorí jaie cuega: Naimie illano taino iite.

Buna jaca iemo iñeite.

Naimie maijille jiaimiemo iite.

Iese cuega.

²¹⁻²² Ie jira cai diga itinomona damiena fetoiticaí. Cai Nama Jesús cai diga illa facaiseconi, nagarui diga iñiaí cai diga jaisoidimaci. Juan Bautista micorí Jesúsna bautizaja facaisemona, Jesús monamo caimona jaillarui facaiseconi, naimaci cai diga jiai itimaci. Naimacimona damiena fetoiticaí, Jesús jilluana cai diga lollena. —Iese Pedro raite.

²³ Ie mei mena imana fetodimaci. Damiedi José Barsabas. Jiaici mameci Justo. Jiaimiedi Matías.

²⁴ Ie mei Jusiñamuimo jiidimaci:

—Nama, nana comini imaci comeciaina uiñotio. ¿Nie imana jitaidio? Caina uiñota.

²⁵ Naimiedi Judas ifo meidoite. Jesús ie oretagamiena naimie jaillamona, cai diga maijijite. Ie fiodaillamona Judas micorí ie maijiana jai faínonoicaide —jiidimaci.

²⁶ Ie jira conima jabomaside, uiñollena bu ille. Matíamo baite. Iemei jiaie once diga oretagano isoi naimie ite.

2

Cristo oretagano Jusiñamui Joreñoña feiñua rafue

¹ Pentecostés railla rafue irui ria, nana creyentiaí diese danomo itimaci. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite.

² Danomo ia, ebena illacinomona monamona riire aifi billa isoi buena cacadimaci. Nana jofomo itino naiena jiai cacadimaci.

³ Iena naimacimo bairedede. Iena cioidimaci. Irai boua isoi eruaide. Nana naimacimo baite.

⁴ Iese Jusiñamui Joreñoña feiñotimaci. Nana naimaci comeciaina namatade. Iemei diga nairai uaillado ñaitimaci, Jusiñamui Joreño naimacina ñaitatajamaña. Naimaci ñaia uaillaina uiñoñedimaci.

⁵ Naie facaiseconi Jerusalémo Jusiñamui rafuedo eo jaide judíuaidi itimaci. Diga nairaiamaña bitimaci.

⁶ Creyentiaí ñaiana naimaci fidiano, ailluena comini jino tainomo ofidimaci. Nagamiiaidi ie nairai uaina cacade. Ie jira jacinaitimaci.

⁷ Eo rajjicaidimaci. Coninimo jicanotimaci:

—¿Buta ñaite? Nana Galileos imaci.

⁸ ¿Ñiese naimacina cacadicaí? Cai uaido dajerie ñaiana cacadicaí —raitimaci.

⁹ Diga comini imiaí itimaci: Partos, Medos, Elamitas, Mesopotamia imaci, Judea imaci, Capadocia imaci, Ponto imaci, Asia imaci,

¹⁰ Frigia imaci, Panfilia imaci, Egipto imaci, Libia imaci. Libia imaci enirue Cireneo ruica eruaide. Romamona jamai macaritano jiaí itimaci.

¹¹ Judíuái itimaci. Judíuáiñedino jiaí itimaci. Judíuái isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede finoca rafuena cacadicaí —raitimaci.

¹² Nana eo rajjicaidimaci. Daniríe jicanododimaci:

—¿Bue ite?

¹³ Jiaie comini jifanoduano, raitimaci:

—Jifaidimaci. Ie jira iese ebena ñaitimaci.

¹⁴ Ie facaise ie once nabaiñaí naimie ecimo illanona, Pedro nainomo como ofidinomo ado llote:

—Caimaci, ua nana Jerusalén imaci, cue lluomo cacarei. Naie rafuena lloiticue.

¹⁵ Omoi comeciaina omoi facaja isoi, jifaiñedicaí. Jitoma nia fuiri daidemo, bu jaca jifairainina.

¹⁶ Joel micori bie rafuena jaie llote. Joel micori Jusiñamui rafuena lloraíma. Naimie jaie lloga rafue birui caímo jai suide.

¹⁷ Llote:

Jusiñamui caímo llote: “Jairuido bie rafue suite.

Cue Joreñoña diga cominimo fecajiticue.

Iedo omoi uruaí cue lluana lloitimaci.

Iemona omoi coniruaína nicairitaiticue.

Iemona omoi einamacina jiaí nicairitaiticue.

¹⁸ Ua nana cuena sedadinomo cue Joreñoña fecajiticue.

Naimaci cue lluana lloitimaci.

¹⁹ Monamo eo jacirede rafuena ico suiñotaiticue.

Eniruemo eo jacirede rafuena ico jiaí suiñotaiticue.

Comini jobairillemona, eniruemo comini diruedi eo iite.

Naie facaise daje diese enirue boojite. Bouamona uillie eo iite.

²⁰ Jitoma lligaiñoñeite. Fivui diruena eruaite.

Nana bie suite, Cristo billa facaise nia iñenia.

Naie facaise diga jacirede rafue suite;

²¹ Iadedi birui cumeo bu jicaia, ie jeacinomona naimiena jillotaiticue”
Jusiñamui llote.

Ie Joreño caímo birui illamona, Joel micori llogacino jai suide.

²² Caimaci, bie uaina omoi cacarei. Nazaret ie Jesúsna ñaiticue. Jusiñamuidi omoi motomo naimiena siño rafuena jai finotate. Iena jai uiñotomoi.

23 Jusiñamui comeci jaie facaja isoi, Jusiñamui jitailla isoi, Jusiñamui naimiena omoimo fecade. Jesúna coraitatomoí. Jusiñamuina ñnoñedinona naimiena meineta domoí;

24 Iadedi fiodaillamona naimiena Jusiñamui jillotajano, legi ie cacajamona naimie jillobide. Naimie fiodaite; iadedi fiodaillamona nainomo iñoñede.

25 David micori naimiena jaie llote: Jusiñamui cue diga jaca illana uiñoticue. Cue ecimo naimie ite, cue comecina ocuiñotallena.

26 Ie jira cue comeci caimare ite. Eo iobidicue. Cue marena illemo jai jiai ocuiridicue,

27 raiafomo cue joreña naimie faínonocaiñena jira, ie mare Jito abi rifaillana naimie jitaiñena jira.

28 Naimie cuena jilloitallena uiñoticue. Cue diga naimie illa jira, cue comeci caimare iite.

29 'Caimaci, cai usuma David micorina marefodo ñaiticue. David micori ñaia, dama naimie facaina ñaiñede. Jesúna ñaite. David micori jaie fiodaite. Raiafomo jonega. Naifo bene nia illamona, naimiedi Jesúna ñaiana uiñoticai.

30 Ie ia David micori Jusiñamui rafuena llote. Naimie micoridi Jusiñamui naimiemo uanaicinona luana uiñote. Jaie Jusiñamui naimiemo llote: "O uruiaimona damie illaimana illanona, ie cominina sedajite" llote.

31 Cristona ñaite. David micori nia suiñede rafuena llote. Naimie micori Cristo jilloillena llote: "Raiafo Jusiñamui fiodaillanomo Cristo joreño faínonocaiñeite. Cristo abi rifaíñeite" llote.

32 Jesúna ñaite. Jusiñamui Jesúna jai jillotate. Nana cai iena ciodicai. Ie jira iena lloticai.

33 Ie ecimo Jesúna jai dane itatajanona, Jusiñamui naimiena iobitade. Ie Moo llua isoi, Jesús jai ie Moo joreño caimo jai fecade, omoí birui ciua isoi, omoí birui cacaja isoi.

34 Naimie abi monamo jaiñena jira, David micori dama naimie facaina ñaiñede; ia Cristona ñaite. Ero, jaie David micori raite: Jusiñamui Cristomo llote: "Cue ecimo ana raí.

35 Ona ñnoñedinona o anamo itataiticue" raite. David micori llua isoi, birui jai suide.

36 Pedro nia ñaite:

—Jesúna coraidomoí; iadedi Jusiñamui naimiena cai Namana itatate. Naimiena cai jilloitaraimana jai itatate. Nana judíuai comini naiena uiñuana jitaidicue.

37 Pedro llua cacajano, naimaci comeciaino riire baite. Pedromo iena jicanotimaci. Ie nabaiñaimo jiai jicanotimaci:

—Caimaci, o llua jai cacadicai. ¿Bue finoiticai?

38 Pedro uai ote:

—Omoí comeciaino iuaina meido. Iemei Jusiñamui omoimo ite jeacinuaina dotajite. Jesucristo facaina omoí bautizallomoí. Jusiñamui Joreña jiai feiñoitomoi.

39 Omoimo ie Joreño fecallena navui llote. Omoí uruiaimo jiai fecaite. Jiaie nairaiaí itinomo jiai fecaite. Ua nana Jusiñamui fetocanomo jiai fecaite.

40 Diga uai naimacimo Pedro llote. Raite:

—Ailluena comini maraiñede rafuena birui finocana jaidimaci. Fafitimaci. Naimaci isoi jaiñeno; iadedi cue llua omoí cacajamona, iena ñno.

41 Diga comini ie lloga uaina feiñuano, bautizadimaci. Nairuido nibai tres mil comini creyentiaina jaidimaci.

⁴² Cristo oretagano llofuiana fueouidimaci. Cristo oretaganona eo nabaidimaci. Nagarui ofillanona, Jesús fiodaillana comeciuidimaci. Jusiñamuimo jiiuidimaci.

Cristona #notino illa rafue

⁴³ Cristo oretaganodi diga siño rafuena finuamona, nana comini jacinaitimaci.

⁴⁴ Nana creyentiai damacina itimaci. Naimaci raruiai coninimo fecauidimaci.

⁴⁵ Dueredino ia, naimacina canollena, raruiairedino naimaci raruiaina vendidimaci. Iemei naie ucube dueredinomo fecadimaci.

⁴⁶ Jusiñamuina sedallena, nagarui Jusiñamui jofomo ofisoidimaci. Daniricimaci jofuemo Jusiñamuina jiai sedauidimaci. Nainomo danomo guillanona, Jesús fiodaillana comeciuidimaci. Caimare imaci comeciai illamona, caidiñeno guisoidimaci.

⁴⁷ Jusiñamuimo iobillacinona fecacana jaidimaci. Nana cominidi naimacina: “Mare” raitimaci. Naimacina Jusiñamui itataja isoi, nagarui comini creyentiaina jaidimaci.

3

Jusiñamui jofomo Pedro lluacino

¹ Jusiñamui jofomo jiaa facaise Pedro iaiaiaiai Juan diga jaide. Jitoma ana ia, comini jiiuidimaci.

² Iaiaiaiai jaillanomo jiaie comini tisitaitimiena atiana ciodiaiaiaiai. Tisitaitimiena naimie jaca jeiciga. Naimiena nagarui atiano, Jusiñamui jofu ie ebiredena railla nase fuemo rainauidimaci. Nainomo naimiena rainauidimaci, fo jaidinomona ucube jica-jicallena.

³ Iaiaiaiai fo jaiacania, ucube jicallena, ie onolli ñuitade.

⁴ Iaiaiaiai naimiemo eruaiillano, Pedro raite:

—Cocomo eruai.

⁵ Ie jira iaiaiaaimo eruaide. Ra feiñoitena, ocianona sedade.

⁶ Pedro raite:

—Ucube cuemo ifede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaritaicue.

⁷ Pedro naimie onollido llinuano, a naidanete. Ieconinaimie eillidi jillode. Ie taisicoñuai jiai jillode.

⁸ Daiacaillanona naidacaide. Macarillanona, iaiaiaiai diga fo jaide. Jusiñamuimo iobillacinona fecajano, daiacaillanona macarite.

⁹ Nana comini naimie macarillana ciodimaci. Naimie iobillacinona fecajana jiai cacadimaci.

¹⁰ Naimie nase fuemo ana raisoilla jira, naimiena uiñotimaci. Naimiemo jai suide rafuena eo rajjicaidimaci.

¹¹ Naimiedi Pedro iaiaiaiai Juan diga nia llinuano, naimaci dine Salomón micori finotaga jofu abi ibirimo comini aisidimaci. Rajjicaidimaci.

¹² Iena cuano, Pedro naimacina raite:

—Caimaci, ¿bue ñellena biemo rajjicaidomoi? ¿Bue ñellena caimo iese eruaidomoi? “Daiamaiaiai iaiaiaiai uaido naimiena jilloitate” raillanona cocomo eruaidomoi.

¹³ Iena finoñedicoco; iadedi Jusiñamui iena finuano, ie Jito Jesúsna iobitade. Cai usumatiaiai micoriaiai, Abraham, Isaac, Jacob, ua nana cai usumatiaiai micoriaiai bie Jusiñamuina sedadimaci; iadedi Jesúsna birui fecadomoi,

coraillena. Pilato naimiena jino marena oretaiacana jira, Pilato ecimo naimiena llogidotomoi.

¹⁴ Mareuidimiena jitaiñedomoi; iadedi come fatimiena cárcelmona jino bilana jitaidomoi. Barrabás raillamiena jitaidomoi.

¹⁵ Jusiñamui dibeimo caina itatamiena meinotomoi. Naimie fiodaite; ia Jusiñamui naimiena jillotate. Iena ciodicoco. Ie jira iena lloticoco.

¹⁶ Tisitaitimie jilluana jai ciodomoi. Naimiena uifnotomoi. Jesúna naimie inua jira, Jesús naimiena mairitate. Naimiena raise jillotate. Iena jai ciodomoi.

¹⁷ 'Caimaci, ero, omoi finoca rafuena abina uifnoñeno finodomoi. Omoi illaicomini jiai daje isoi finodimaci.

¹⁸ Jaie Jusiñamuidi ie facaina llorainina jairuido suille rafuena llotatate. Naimacina Cristo llegi cacajana llotatate. Birui naie llogacino suide.

¹⁹ Omoi comeciai iuaillai meido. Jusiñamui dibeimo omoi comeciaina meido. Iemei Jusiñamui omoi jeacinona dotaite. Iena jaca feitaite.

²⁰ Omoi uri illa facaise illena, Jusiñamui omoi diga illena, iena fino. Jusiñamui Jesucristona omoi dine dane oretallena, iena fino. Naimiedi omoi jilloitaraíma.

²¹ Jusiñamui facaina lloraini micoriai jaie lloga rafue suille dinori monamo naimie fiebiite. Jaie Jusiñamuidi ie mare lloraini micoriai uaido buena llote.

²² Moisés micori raite: "Omoi cominimona naimie rafue lloraimana jaillena, cai Nama Jusiñamui cue isoi damiena fetoite. Nana naimie omoimo lluaana cacarei.

²³ Bie lloraimana bu cacareñenia, Jusiñamui naimiena duere finoite. Iemona faifite".

²⁴ Nana Jusiñamui ie lloraini micoriaidi birui suille rafuena llotimaci. Samuel micori illa facaisemona naimaci buena llotimaci.

²⁵ Jusiñamuidi cai usumatiai micoriaimo rafuena llote; ia bie rafue birui omoimo jiai duide. Jusiñamui Abraham micorimo jaie llote: "Nana cominidi o uruiai muidona caimare iitimaci".

²⁶ Ie rafue suiñollena, Jusiñamui ie Jitona omoi dine navui orede. Omoi caimare illena, nano omoi marañedicinona faionocaitallena, omoi dine naimiena nano jai oretate.

4

Cristo oretagamaiai llaicomini motomo illa rafue

¹ Comini diga Pedro iaímaiai Juan diga ñaia facaise, Jusiñamui diga ñairainidi naie iaímaiai dine bitimaci. Jusiñamui jofona sedaraini illaíma diga, saduceuai railla comini diga jiai bitimaci.

² Fiodaillamona Jesús jai jilluana llofuetiaímaiai. Cominina iaímaiai llofuia jira, naie iaímaiai diga iciritimaci.

³ Iaímaiana gaitajanona, jai navuilla jira, cárcelmo jonetimaci, ie jitiramo naie rafuena siadollena.

⁴ Iese suide; ia Pedro llogacinona cacadinomona ailluena comini naiena inotimaci. Cinco mil digamie creyentiana jai itimaci.

⁵ Icoiti Jerusalémo nana judíuai illaicomini siadollena ofidimaci.

⁶ Anás jiai bite. Naimiedi Jusiñamui diga nanoca ñairaima. Caifás bite. Juan bite. Alejandro jiai bite. Nana Jusiñamui diga nanoca ñairaima cominidi ofidimaci.

⁷ Naimaci motomo Pedro iaímaiai Juan diga atianona, iaímaiaimo jicanotimaci:

—¿Bu uai diga buena finodomico?

⁸ Jusiñamui Joreño nana Pedro comecimo namatajano, Pedro naimacimo llote:

—Illaicomini, bie rafuena omoimo lloiticue.

⁹ Tisitaitimie jilluana birui cocomo jicanotomoi. “¿Bueмона naimie jillode?” raillanona cocomo jicanotomoi.

¹⁰ Jesucristo uai diga jillode. Omoi buena uiñuana, ua nana judíuai comini buena uiñuana jitaidicue. Jesucristodi Nazaret imie. Naimiena jai coraidomoi; ia Jusiñamui naimiena jai jillotate. Ie jira omoi uicomo Jesús muidona tsitaitimie jai benoconi naidaillana ciodomoi.

¹¹ Omoi jofa finoraini isidomoi. Omoi jitaiñede noficidi jiaie nofici baifemo jai jaide. Jesúdi naie nofici isoide. Naimie rafuena omoi jitaiñena jira, naimiena meinetomoi.

¹² Cai jeacinomona jiaimie caina jillotanide. Nana eniruemo ite cominimona jiaimie buna jaca jillotanide. Dama Jesús caina jillotarede —llote.

¹³ Jaciruiñeno marefodo llofuetiaimaiaia. Nainomo itino iena cacajano, comecina facadimaci: “Abina uiñoñedíaimaiaia. Jamai bue isoidíaimaiaia”. Ie jira rajicaidimaci; iadedi Jesús llofueoicaigaiaimaiaina illana uiñotimaci.

¹⁴ Jilloitagamie iaimaiaia diga naidaillana ciodimaci. Ie jira naimaci uai iñede.

¹⁵ Naie rafuena siadollena, naie illaicomini iaimaiaina bai oredimaci.

¹⁶ Coninimo jicanotimaci:

—¿Niese naie iaimaiaina nibaiticai? Nana Jerusalémo itino iaimaiaia siño rafuena finuana jai fididimaci. Iena janonidicai.

¹⁷ Jiaie comini iena fidií raillano, Jesús rafuena iaimaiaia llofuiana rairuiticai.

¹⁸ Ie mei iaimaiaina naimaci dine dane uaidotimaci. Iaimaiaimo Jesús rafuena llofueñellena riire llotimaci.

¹⁹ Pedro iaimaiaia Juan diga naimaci uai ote:

—Ie rafuena coco llolena Jusiñamui jitaide. Omoi uaina coco iñoia, Jusiñamui jitailla rafuena finoñeiticoco. Cocomo llono. ¿Bu uaina iñoiticoco? ¿Jusiñamui? ¿Omoi? Cocomo iese llono.

²⁰ Daimaiaia coco ciua rafuena lloticoco. Daimaiaia coco cacaja rafuena lloticoco —raite.

²¹ Iaimaiaina jacinaitajamona, iaimaiaina jino oretatimaci. Iaimaiaina duere finoñedimaci, nainomo ite comini icirinañellena. Jusiñamuimo nana nainomo itinodi iobillacinona fecadimaci, tsitaitimie jai jillua jira.

²² Jai jillodimie mo cuarenta años baifemo ite. Siño uaido naimie jillua jira, comini iobidimaci.

Naimacina Jusiñamui canollena, naimiemo jiacino

²³ Iaimaiaia jino jailla mei, iaimaiaia nabaiñiaia dine jaidiaimaiaia. Illaicomini iaimaiaimo lluaana llotiaimaiaia.

²⁴ Naimaci iena cacajano, Jusiñamuimo damie llua isoi jiidimaci:

—Ore Moo, mona finodio. Eniruena finodio. Monaillaina finodio. Nana naiemo ite rana jiai finodio.

²⁵ Cai usuma David micorina raise uiñotica. Naimiedi ona sedadimie. Naimiena bie rafuena o Joreño jai llotatajama, naimie llote:

¿Bue ñellena Jusiñamui diga judíuaiñedino iciritimaci?

¿Bue ñellena Jusiñamuimo comini tainomo comeciaina facadimaci?

²⁶ Illaicomini ofidimaci, Jusiñamui diga fuirillena.

Jusiñamui facaisena iñedimaci.
Cristo facaisena jiai iñedimaci
llote.

²⁷ Naie rafue birui bene suide. Bie nairaimo Herodedi, Poncio Pilato diga, judíuainedino diga, judíuai comini diga, ofide. O mare Jito Jesús facaisena iñedimaci. Naimacimo o oretagamie facaisena iñedimaci.

²⁸ Naimaci ofillamona, nana o jitaile rafuedi, o jaielloga rafue diga, jai suide.
²⁹ Nama naimaci jaciruitajacinona jai uñotio. Cai comeaiaina ocuiñota, o rafuena jacitaiñeno cai llolesa.

³⁰ Duidinona jilloita. O mare Jito Jesús uaido caina siño rafuena finota — jiidimaci.

³¹ Jusiñamuimo jiiacino fuilla meinoconi, naimaci ofiracodi jaidisite. Jusiñamui Joreño nagamiiai comecimo namatade. Iemona Jusiñamui uai jacitaiñeno llocana jaidimaci.

Creventiaí damacina illa rafue

³² Nana creventiaí damacina itimaci. Naimacimo raruiiai ia, dajena naimacimo duide.

³³ Naie facaise siño uaido naimie oretagano cai Nama Jesús jilluana llofueuidimaci. Iemona cominidi naimacina: “Mare” raitimaci. Nagarui Jusiñamui naimacina eo canode.

³⁴ Naimaci dine buna buena jaca jitañedimaci. Ucube ollena, enirueredino imaci eniruena fecadimaci. Ucube ollena, joforedino imaci jofona fecadimaci. Ucubene atianona,

³⁵ Cristo oretaganomo fecadimaci. Ie mei dueredinomo imaci jitailla isoi fecauidimaci.

³⁶ Naimaci motomo José mameciredimie ite. Cristo oretagano jitaca mamecidi Bernabé. Ie mameci oni dobaiñuamona firadotimie. Naimie nairaidi levita. Naimiedi Chipre railla uiasi imie.

³⁷ Jerusalémo naimie fecalle eniruedi ite. Iena fecajamona, ucube atiano, Cristo oretaganomo fecade.

5

Ananías micori ie ai micori diga Jusiñamuina jifuia rafue

¹ Naie facaise Ananías ie ai diga iaimaiai eniruena jiai fecade. Ie ai mamecidi Safira.

² Naie iba naimiemo dabeí fiebide. Ie ai iena uñote. Atuedo atianona, Cristo oretaganomo fecade, “Nana ucube atidicue” raillanona.

³ Jusiñamui Joreño Pedrona naie rafuena uñotajamona, Ananíamo Pedro jicanote:

—¿Niese Taife o comecimo namatade? Jusiñamui Joreñomo taino llotio, dabeí ucube omo fiebilla jira.

⁴ Enirue nia fecañenia, nia oie. Fecaja mei, naie ucubedi nia oie. ¿Bue ñellena o comecina marañeno facadio? Cominimo taino llotio. Jusiñamuimo tainona jiai llotio.

⁵ Ananías bie uaina cacajano ieconí fiodaillamona oni caide. Nana iena ciodino eo jacinaitimaci.

⁶ Iemei nainomo ite conirueniaí naimiena feridimaci. Jino uillano, raiafomo jonetimaci.

⁷ Naie rafue daje amani horas illanona, naimie ai ie inimo suide rafuena uññoño bite.

⁸ Pedro naiñaiño mo jicanote:

—¿Nie diese o fecaca o enirue? Cuemo llono.

Naiñaiño uai ote:

—Jii, ie diese coco fecaca.

⁹ Pedro jicanote:

—¿Bue ñellena Jusiñamui Joreño na jifuetomico? Ero, o ini raiafomo jonetino saisia jai nasemo cacade. Naimaci ona jiai jino ja uitimaci.

¹⁰ Naimie ecimo ieconi naiñaiño fiodaillamona, oni caide. Coniruenia: fo billano, naiñaiño fiodaillana cioidimaci. Jino uillano, ie ini abimo dafomo jonetimaci.

¹¹ Iena fidiamona, nana creyetia: eo jacinaitimaci. Nana bie rafuena fididinodi jiai eo jacinaitimaci.

Cristo oretagano ailluena siño rafuena finodimaci

¹² Comini motomo Cristo oretaganodi ailluena siño rafuena finoudimaci. Naie facaise nana naimacidi Jusiñamui jofomo Salomón micori finotaga jofu abi ibirimo ofisoidimaci.

¹³ Jiaie cominidi jaciruillanona, naimacina nabaiñedimaci; iadedi naimacina raite:

—Cristo oretagano fue eo mare.

¹⁴ Jaciruitimaci; iadedi creyentia:na ailluena comini jaidimaci. Ailluena iñia: i, ailluena riñonia: i, diese creyentia:na jaidimaci.

¹⁵ Imaci biiramo duidinona jonecaida, naisomo atidimaci. Pedro nainomo macarillano, o lloti naimie joreño naimacimo ibailamona, “Jillobitica:” raillano, atidimaci.

¹⁶ Jerusalémo ie fuemo ite nairaia:mona comini biadedi, duidinona jiai atidimaci. Janaba anamo ite cominina jiai atidimaci. Nana jillodimaci. Ie isoi Cristo oretagano siño rafuena finoudimaci.

Cristo oretagano duere sefuilla rafue

¹⁷ Cristo oretagano finoca rafueri Jusiñamui diga nanoca ñaira:ma eo uradoide. Nana naimie dibeimo itino jiai eo uradoidimaci. Saduceuai railla cominimo duidimaci.

¹⁸ Eo uradoillamona, Cristo oretaganona gaitajano, cárcelmo jonetimaci.

¹⁹ Naiona Jusiñamui jaienididi cárcel nasena econote. Cristo oretagano jino atiano, naimacina raite:

²⁰ —Jusiñamui jofomo mai abido jai. Cominimo Jusiñamui dine naimaci ille rafuena llono.

²¹ Tena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñaira:ma, ie comini diga billano, danomo ofillena illaicominina uaidote. Cárcelmo policia:na oretate, Cristo oretaganona atillena.

²² Cárcelmo jaidemo, naimacina cioiñedimaci. Abido billanona, llotimaci:

²³ —Cárcel ie nase jaca ibaicana cioidica: i. Raise llaveca. Nase fuemo jaca soldaduai itimaci; iadedi econotica:mo, jaca buna cioiñedica: i.

²⁴ Jusiñamui jofu nanoca sedara:ma, Jusiñamui diga ñaira:ni diga, bie llua:na cacajano, uainicaidimaci. Comecina facadimaci: “¿Nie isoide rafue naimacimo jai suide?”

²⁵ Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

²⁶ Iena cacajano, Jusiñamui jofu nanoca sedaraima ie policías diga jibuisaide. Cristo oretaganona atide. Fecuisse atide, comini dinena policiaiana noficiado fairinoi raillano.

²⁷ Naimacina atiano, illaicomini motomo jonetimaci. Iemei Jusiñamui diga nanoca ñairaima naimacimo llote:

²⁸ —Omoimo Jesús rafuena llofuiana rairuidicai; iadedi nana Jerusalén cominina jai llofuetomoi. Iese omoi llofuecaba, “Cai illaicomini Jesúsna meinetimaci” llotomoi.

²⁹ Pedrodi jiaie oretagano diga uai ote:

—Jesús rafuena cai llofuiana jai rairuidomoi; iadedi omoi llua baifemo Jusiñamuina ñnoiacadicai.

³⁰ Cai usumatiai micoriai Jusiñamuina sedauidimaci. Naie Jusiñamuidi Jesúsna jai jillotate. Jesúsna meinellena, cruzmo coraidomoi; ia Jesúsna omoi meinia mei,

³¹ Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaraimana naimiena jiai jai itatate. Cai judíuái comini comeciai iuai meidollena, naimaci jeacinuai dotallena, iese naimiena itatate.

³² Bie rafuena llofuecabiticai. Jusiñamui Joreño uaido iena jiai llofueticai. Jusiñamuina ñnotinomo Jusiñamuidi ie Joreñoña jai fecade —raite.

³³ Iena cacajano, illaicomini eo iciritimaci. Cristo oretaganona meineiacadimaci;

³⁴ ia ieconí illaicomini motomo damie naidaide. Naimie mameci Gamaliel. Moisés micori llogacinona uiuicaide. Nana cominidi naimie uaina ñnotimaci. Cristo oretaganona dallu bai oni oretajanona, naimie llote:

³⁵ —Caimaci, omoi bie cominimo omoi finolle rafuemo comeciaina raise faca.

³⁶ Jai Teudas micori illaimana jaiacade. “Jai uaina baitimedicue” raillano, naimie dibeimo cuatrocientos iññiai jaidimaci. Iemei naimie fiodaite. Naimie micori dibeimo itinodi oni tuusite. Jai naie rafuedi jaca ieconí duide.

³⁷ Naimie micori illa mei, comini mameciaina cuana gobernador llua facaise, Galileo ie Judas micoridi jobairiacade. Jiaie comini naimie dibeimo illena fuemo faite. Naimie jiai fiodaite. Naimie micori dibeimo itino oni tuusite.

³⁸ Ie jira ja omoimo lloiticue: Bie cominina faionocai. Jamai cominimona naimaci llogacino iade, jamai cominimona naimaci finuacino iade, ieconí duite.

³⁹ Jusiñamuimona bie rafue ia, jaca niese nibañeitomoi. Jusiñamuimona bie rafue ia, Jusiñamui diga omoi rafuedi iite.

Naimaci naimie lluaña feñuano,

⁴⁰ Cristo oretagano fo atiano, naimacina fatimaci. Naimaci Jesús rafuena llofuiana eo rairuide. Ie mei jino imacina oredimaci;

⁴¹ iadedi illaicomini illanomona Cristo oretagano caimare jaidimaci. “Jesús dibeimo cai illa jira, caína duere finodimaci” raillano, caimare jaidimaci. Jusiñamui naie facaise naimacina riidoñena jira, jiai caimare itimaci.

⁴² Jusiñamui jofomo nagarui Jesucristo rafuena llofuetimaci. Comini jofuemo nagarui jiai llofuetimaci. “Jesúdi cai Jilloitaraima” llofueuidimaci.

6

Creyentiaína canollena, siete digamie diáconuaina illena, fetua rafue

¹ Naie facaise ailluena comini creyentiaína jaidimaci. Uradoillamona griego uaido ñaite comini dinena, judíuái uaido ñaite cominina jeare

ñaitimaci. Grieguai feciñuai judíuai feciñuai isoi nagarui rana feiñoñena jira, jeare ñaitimaci.

² Ie jira naie doce oretaganodi creyentiai danomo ofillena, nana naimacina uaidotimaci. Naimacimo llotimaci:

—Jusiñamui uaina lollena, ra fecalle diga, abi juanide. Jusiñamui uaina llofuiana cai fañonocaiadedi, maraiñede. Ra jamai cai fecaiadedi, jiai maraiñede.

³ Ie jira, amatiai, omoimona siete digamiena fetó. Hñoganona fetó. Jusiñamui Joreño nana comecimo namatadinona fetó. Eo abi uñotinona fetó. Ie isoiđe iñiaina fetó. Bie ra fecarainina maijiitimaci.

⁴ Ie mei cai abi juarenite, Jusiñamuimo cai jüllena, Jusiñamui uaina cai llofuellena.

⁵ Nana cominidi:

—Jee —raitimaci. Esteban micorina fetodimaci. Naimie Jusiñamuina eo ñnote. Jusiñamui Joreño nana naimie comecimo namatade. Jiai fetodimaci: Felipe, Prócoro, Nicanor, Timón, Parmenas, Nicolás. Nicolásdi Antioquía nairai imie. Judíuai comini isoi naimiedi Jusiñamuina ñnote.

⁶ Fetua mei, oretagano dine atidimaci. Jusiñamuimo oretagano jia mei, fetocanomo imaci onolli jonetimaci, Jusiñamui naimacina marena itatallena.

⁷ Naie facaise Jusiñamui uaidi cominido uñotacana jaide. Jerusalémo ailluena comini creyentiaina jaidimaci. Jusiñamui diga ñairainimona creyentiaina ailluena jiai jaisite.

Esteban micori ie rafue

⁸ Esteban micori fue eo mare. Jusiñamui Joreño naimiema namatajamona, naimie uai eo siño. Comini motomo ailluena siño rafuena finouide.

⁹ Naie facaise daje judíuai comini ofiracomona damierie Esteban micori dine bitimaci. Patrón anamona jillobidinomo naie ofiraco jainaiaide. Naimaci diga damierie Cirene nairai imaci bitimaci. Damierie Alejandría nairai imaci danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban conini uaina uaitatimaci;

¹⁰ iadedi naimaci uaitalle uaidi iñede. Naimacimo Esteban uai isoiduaidi iñede. Jusiñamuimona ie uaina ua jira, Esteban abina uñuano ñaite.

¹¹ Ie jira jiaie cominimo bainino ibajano, naimiema llogidotadimaci. Raitimaci:

—Esteban Moisés micori jinafomo jeare ñaiana cacadicaí. Naimiedi Jusiñamui jinafomo jeare ñaiana jiai cacadicaí.

¹² Iese luamona, comini comeciaina feidocana jaidimaci. Ilaicomini comeciaina feidocana jiai jaidimaci. Esteban dine billanona, naimiema gaitadimaci. Naie rafuena siadollena, naimaci ofiracomo naimie micorina uitimaci.

¹³ Tainona llogidotinona jiai atidimaci. Llotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite.

¹⁴ Naimiedi Jesús bie jofona judaillena llote. Moisés micori caimo llogafuiai fañonocallena jiai llote. Iena cacadicaí.

¹⁵ Iemo nana illaicomini naimiemo eruaidimacimo, naimie uieco Jusiñamui jaienicí isoi eruaiđe.

¹ Jusiñamui diga nanoca ñairaima Esteban micorimo jicanote:

—¿Ua ie isoí naimaci llucino ite?

² Naimie uai ote:

—Caimaci, cacarei. Cai jaiagaimona cai fueollena, naimaci micoriaina lloiticue. Jusiñamui maremiëna jira, naimiedi cai eirue jitomo jaie bairede. Cai eirue jitodi Abraham micori. Mesopotamiamo naimie micori ñia ia, Harámo naimie micori ñia jaiñenia, Jusiñamuidi naimie micorimo bairiano

³ llote: “O eniruëmona mai jai. O cominimona mai jai. Omo cue acatalle eniruëmo jaitio”.

⁴ Ie jira Caldea railla eniruëmona naimie micori jaide. Harámo rillanona, diga iruillaí nainomo ite. Naimie moo micori fiodailla mei, omoi birui illa eniruëmo Jusiñamui naimie micorina oretate.

⁵ Nainomo rillanona, Jusiñamuidi naie enirue naimie micorimo fecañede. Ua janore jisa fecañede; iadedi: “Omo iena ico fecajiticue” raite. “O uruiaimo fecajiticue” jiai llote; iadedi naie facaise Abraham micori uruenide.

⁶ Jusiñamui jiai llote: “O uruiaí jiaie comini eniruëmo jaianiitimaci. Egip-tomo jaianiitimaci. Naimacina duere finoitimaci. Cuatrocientos años legi cacajitimaci.

⁷ Naimacina maijitaite ñairaina duere finoiticue. Ie mei o uruiaí naie eniruëmona biitimaci. Bie illanomo cuemo iobillacinona fecajitimaci” llote.

⁸ Ie cominina naimaci jaillena, Jusiñamui Abraham micorimo ñisaíai diese abina diana llote. Ie facaise Abraham micori Isaac micorina comuitate. Ie jeiciamona ocho digarui illamona, Abraham micori naimie micorina dete. Isaac micori Jacob micorina comuitate. Jacob micori doce uruiaina comuitate. Naimaci micoriaina cai doce diga ñairai comuidimaci.

⁹ Caimaci, José micorina Jacob micori uruiaí micoriaí uradoillamona, Egipto cominimo naimiëna fecadimaci;

¹⁰ iadedi Jusiñamui naimiëna eo sedade. Ie legi ie cacajamona naimiëna jillotate. Naimiëmo uiñoracinona fecade. Ie jira Faraón micori naimiëna jiai gaide. Faraón micoridi Egipto illaima. Ie muidona Faraón Joséna fetode, nana Egiptomito itinona sedallena. Ie jofona jiai sedatate.

¹¹ Naie facaiseconi nana Egipto comini aime gutimaci. Canaámo Jacob micori illanona, nana nainomo itino diga aime jiai guite. Eo duere sefuidimaci. Cai usumatiaí micoriaí naimaci illanomo guillena baiñedimaci.

¹² Egiptomito guille illana Jacob micori fidiano, guille ollena, nano facaise ie uruiaí micorina nainomo oretate.

¹³ Ie mei José ie amatiaina naimiëna uiñotade. Faraóni José comini illana fidade.

¹⁴ Ie jira Josédi ie moona uaidote. Nana ie cominina uaidote. Setenta y cinco digamie ite.

¹⁵ Ie jira Egiptomito Jacob micori jaide. Nainomo fiodaite. Ie uruiaí micoriaí nainomo jiai fiodaitimaci.

¹⁶ Siquem railla ñairai illanomo naimaci comini naimaci micoriaina uillano, nofici ie raiafomo jonetimaci. Siquemmo Abraham micori ñaifona Emmor uruiaí micoriaimona jaie ibade.

¹⁷ Caimaci, Jusiñamui Abraham micorimo lloga rafue sulle iaírei illa facaiseconi, Egiptomito cai cominidi eo jebuidimaci. Abraham micorimo: “Egiptomona o uruiaí biitimaci” Jusiñamui jaie llote.

¹⁸ Naie facaise jiaie illaima Egiptona sedade. José micorina uiñoñede.

¹⁹ Ie jira cai cominina jifuiano maijitauide. Uruiaí fiodaillena, naimacina imaci uruiaina fañonocaitate.

20 Ie facaiseconi Moisés micori jeiciga. Jusiñamuimona naimie micori eo ebire eruaide. Ie moo jofomo daje amani fivui ite.

21 Ie mei naimiedi fainonocaiga. Faraón jisa micoridi naimie micorina unona, naiñaiño jito isoi naimie micorina uiuicaide.

22 Naimie micori nana Egipto comini uiñuacina fueote. Illaima uai isoi naimie uaidi ite. Eo abina uiñotimie.

23 Caimaci, naimie micori cuarenta años illa facai, ie comini dine ie jaillemo ie comecina facade. Naimie cominidi cai judíuai comini.

24 Egipto imiemona damie legi cacajana ciuano, naimiena riidote. Riiduanona, Moisés micoridi Egipto imiena meinete.

25 Moisés micori comecina facade: “Cue muidona Egiptomona Jusiñamuidi cue cominina oretaita”, “Cue comini buena uiñotimaci” raillanona comecina facade; ie iadedi iena uiñoñedimaci.

26 Ie arediruido Moisés micoridi mena come iaimaiai fuirillana ciode. Iaimaiaina marena itataiacade. Raite: “¿Bue ñellena conimana duere finoacadomico? ¿Bue ñellena o come diga fuiridomico?”

27 Duere finoacadimie naimiena oni ñuitade. Jicanote: “¿Bu odi cai illaimana jonegao? ¿Bu caimo ona llotatate juez isoi?”

28 ¿Na are Egipto imie o meinia isoi cuena jiai meineiacadio?”

29 Iena cacajano, come fajana naimie llinua jira, jacinailanona, Moisés micori aiside. Madián railla eniruemo jamai ua illafuena ite. Dinomo ie aina ua mei, nainomo mena jitona comutate.

30 Caimaci, cuarenta años illa mei, jofue iñenanomo Moisés micori illanona, Jusiñamui jaienici naimie micorimo bairede. Sinaí railla anedu ianori ite. Amena boua isoi amenamo bairede. Naie boode amenadi fuiñede.

31 Iena ciuano, Moisés micori rajicaide. Naie iaireise naimie micori jibuisaidemo, naimiemo Jusiñamui llote:

32 “O usumatiai imaci Jusiñamuidicue. Abraham, Isaac, Jacob, imaci Jusiñamuidicue” llote. Jacinaillamona Moisés micori abi docaide. Jaciruillanona, erodañede.

33 Jusiñamui naimiena raite: “Jamai bue o isoilla jira, o zapatona duiño. Benomo cue illa jira, o naidaillanodi eo mareno.

34 Egiptomo cue comini legi cacajana raise cidicue. Naimaci duere sefuillana uiñoticue. Ie jira omo bairedicue, naimacina Egiptomona jilloitallena. Mai jai. Egiptomo ona oretaiticue” llote;

35 iadedi comini dinena Moisés micorina jaije jitañenamona, naimiena raitimaci: “¿Bu illaimana odi jonegao? ¿Bu o juezna jonegao?” Comini dinena naimiena jitañedimaci; iadedi Jusiñamui naimiena illaimana itatate. Naimiena Egiptomona cominina jilloitaraimana jiai itatate.

36 Egiptomona Moisés naimacina atide. Egiptomo nia ia, diga siño rafuena finode. Jiairede monaillai fuemo naimaci rillanona, siño rafuena jiai finode. Jofue iñenanomo cuarenta años siño rafuena finocana jaide.

37 Caimaci, Moisés micoridi cai judíuai cominimo llote: “Omoimona Jusiñamuidi damiena ie rafue lloaimana ico oretaita, naimie cuena oretaja isoi”.

38 Jofue iñenanomo naimaci ia, Moisés Jusiñamui jaienici diga anedumo ñaite. Anedu mamecidi Sinaí. Iemei cai usumatiai micoriai diga naie jaienici facaina Moisés ñaite. Caimo fecallena, naimiedi cominina itatate uaina feiñote;

39 iadedi cai usumatiai micoriai naimiena ñnoiacañedimaci. Naimiena jitañedimaci. Egiptomo abido jaillemo naimaci comeciai facadimaci.

40 Ie jira comini dinena Aarón micorimo llotimaci: “Egipto eniruemona Moisés caina atide; iadedi naimie cai diga illana ja uiñoñedicaí. Cai facaina Jusiñamuina eruai de jiraraina fino, Egiptomo abido caina ifollena”.

41 Iemo jurareta urue joreña finodimaci. Iena sedallena, faga toica ocainaiaina fecadimaci. Naimaci finoca rafueri eo caimataidimaci.

42 Ie jira Jusiñamui naimacimona oni jaillanona, naimacina fainonocaide. Iemona jitomana sedauaidimaci. Fivuina jiai sedauaidimaci. Ucuaina jiai sedauaidimaci. Jusiñamui rafue lloraima ie rabenicomo buena jaie iese cuega: Jusiñamui llote: “Judíuai imaci, cuarenta años jofue iñenanomo omoi ia, cuemo omoi faga toica ocainaiaí fecañedomoi;

43 iadedi cuemo omoi comeciaina facañeno Moloc railla jiraraina sedadomoi. Refán railla ucuduna jiai sedadomoi. Naimacina sedallena, jiraraina finodomoi.

Ie jira Babilonia nairai baifemo omoína oretaiticue”

cuega. Naie facaise cai usumatai micoriai Jusiñamuina jitañedimaci.

44 ‘Caimaci, bie rafuena cai fueollena, cai usumatai micoriai motomo Jusiñamui illana lloticue. Jofue iñenanomo cai usumatai micoriai motomo daje jofu aillocona nitimaci. Nainomo Jusiñamuina sedallena, Jusiñamui Moisés micorimo acataja isoi, iena nitimaci. Jusiñamui jaie cuega noficidi naicomo eenoga.

45 Josué diga bie eniruemo naimaci billa facaise, cai usumatai micoriai naicon a tidimaci. Bie enirue jiaie nairaiamo jainaiaide; iadedi Jusiñamui naie nairaiaina dotajano, cai usumatai naie eniruena bairodimaci. Naico nainomo ite David micori facaiseconi.

46 Jusiñamui David micorina eo canode. Ie jira David micoridi cai usuma Jacob micori ie Jusiñamui jofona finollena jicanote:

47 ia Salomón micoridi jofona Jusiñamui iena finode;

48 iadedi Jusiñamuidi iima finoca jofomo i-iñede. Jusiñamui facaina lloraima micoridi Jusiñamuina iese cuete:

49-50 Cai Nama raite: “Monamo cue illamona, nana comini cue anamo itimaci. Jafaici oticuedena, naga rana cue finua jira, nainomo cuena omoi sedallena, nie isoide jofona omoi finuana jitañedicue” raite.

51 ‘Ero, omoi comeci jiaairede. Omoi comeci iñoñede. Jefonidomoi isoidomoi. Ie jira Jusiñamui Joreño anamo iacañedomoi. Omoi usumatai micoriai isoi itomoi.

52 Omoi usumatai micoriaidi nana Jusiñamui rafue lloraima micoriaina duere finodimaci. Mareuidimie billena llotinona meinetimaci. Mareuidiema gaitatatomoi. Naimiema jai meinetomoi. Jesúsna ñaiticue.

53 Jusiñamui jaieniciaimona Moisés micori llogacina feiñotomoi; iadedi iena iñoñedomoi.

Judíuai Esteban micorina meinia rafue

54 Esteban llofuiana naimaci cacajano, eo iciritimaci. Icirillamona, isiduai muru-muru raite.

55 Jusiñamui Joreño nana Esteban micori comecimo namatajamona, monamo eruai llano, naimiedi Jusiñamui ebirenana ciode. Naimiedi Jusiñamui nabeimo Jesús naidallana ciode.

56 Raite:

—Mona ecuaillana ciodicue. Jusiñamui Jito Jusiñamui nabeimo naidallana ciodicue.

57 Esteban lluna cacajano, jefo oroisite. Eo cuiirillano, naimie dine aiscaidimaci.

⁵⁸ Jerusalémona naimiena jino dotadimaci. Naimacimo ite emodomo itiroina duiñuanona, Saulo railla conirue ecimo iniroina joneside. Iemei Estebana noficido fairinoside.

⁵⁹ Estebana nofici diga fairinuano, Estebadi Jusiñamuimo ado jüide:

—Cue Nama Jesús, cue joreño feño.

⁶⁰ Ieconí caiñici ifodo rainadacaida ado jüide:

—Naimaci bie jeacino finua muidona, ibana oñeno.

Iese naimie jüia mei, fiodaite.

8

Saulo creyentiaina duere finua rafue

¹⁻² Saulo dinena Esteban meiniana jüai jitaide. Cristo rafuena eo ñnotinomona damierie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentiaí duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jiainodi Samaria railla eniruemo jaidimaci; iadedi Cristo oretagano nine jaiñedimaci.

³ Ie facaiseconi Saulodi creyentiaina eo duere finode. Diga jofomo jamai jaillano, iñiaina gaitade, cárcelmo jonellena. Riñoniaina jüai gaitade.

Felipe Samariumo illa rafue

⁴ Tuficaida jaidino naga illanomo Jesús rafuena llocana uitimaci.

⁵ Samariumo Felipedi daje nairaimo jaide. Nainomo Cristo rafuena llofueuide.

⁶ Ailluena cominidi Felipe llofuiana eo raise feñotimaci, naimie siño rafuena finua jira.

⁷ Felipedi diga jananiaí anamo ite cominimona jananiaina oretate. Riire cuirioillano, jaidimaci. Ailluena tisitaitinona jillotate. Ailluena ñujajacaidinona jüai jillotate.

⁸ Ie jira naie nairaimo ite comini eo iobidimaci.

⁹ Naie nairaimo Simóna mameciredimie ite. Naimie siño rafuena finouide. Iemona Samaria cominina rajjicaitate. Naimie raite:

—Siñomedicue.

¹⁰ Nana comini naimiena ñnotimaci. Abina uiñofedino ñnotimaci. Abina uiñotino jüai ñnotimaci. Raitimaci:

—Naimie uaidi Jusiñamui ie. Naimiedi siño jito —raitimaci.

¹¹ Iese naimacina are jifueete. Naimaci rajjicailla jira, naimaci naimiena cacadimaci.

¹² Ie mei Felipe Cristo ie mare rafuena llote. Naimie anamo naimaci illana Jusiñamui jitailla jira, Jusiñamui díbeimo naimaci comeciaí iuaina meiduana llote. Naimaci Felipe llofuiana ñnotimaci. ñnuamona, Felipe naimacina bautizade. Iñiaina bautizade. Riñoniaina jüai bautizade.

¹³ —Jüai ñnoticue —Simóndi raite. Naimie bautizaja mei, Felipe diga jaijoicaide. Felipedi diga siño rafuena finua jira, Simón naimena ciuano, rajjicaide.

¹⁴ Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaímaiaí Juan diga, batine oredimaci.

¹⁵ Iaímaiaí rillano, naimaci Jusiñamui Joreñoña feiñollena Jusiñamuimo jüdiaímaiaí,

¹⁶ naimacimo Jusiñamui Joreño nia iñena jira. Cai Nama Jesús facaina jai bautizadimaci; ia Jusiñamui Joreñoña nia feiñofedimaci.

17 Ieconí iaimaiaí onollí naimacimo joniano, Jusiñamui Joreñoña feiñotimaci.

18 Naimaci Jusiñamui Joreño feiñuana Simóndi ciuano, ucubena iaimaiaimo fecaacade.

19 Raite:

—Cuemo omico uaina ine, bumo cue onollina cue joniamona, naimie Jusiñamui Joreñoña feiñollena.

20 Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadío; iadedi Jusiñamui naina jamai fecade.

21 Bie rafuedi omo duñede. Jusiñamuimona o comeci nia marañede.

22 O comeci iuai meido. Naimie o comecimo ite marañede facajacuina oni dotallena, cai Namamo jica.

23 Omo ailluena marañedicino illana uñoticue. O comeci eo uradoide. Marañedicinona o comecimo namaredío.

24 Simón uai ote:

—O llua cuemo suiñellena, o Nama diga cue facaina ñaino.

25 Cristo rafuena iaimaiaí llua mei, Jerusalémo abido bitiaimaiaí. Abido billano, Samariamo diga comini illanuaimo Jesús ie mare rafuena llocana bitiaimaiaí.

Etiopía imie creyentena jailla rafue

26 Naie facaise Jusiñamui jaienisaímona damie Felipemo llote:

—Beicido joide naido mai jai. Jerusalémona Gazamo joide naisona jai — llote. Naie naiso jofue iñenanodo joide.

27 Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaiño diga maijuide. Naiñaiño mamecidi Candace. Naimiedi nana naiñaiño gobierno ucubena sedade.

28 Naimie jai abido jaillano, ie carretamo raita, Isaías micori cueda rabenicono ado facade.

29 Jusiñamui Joreño Felipemo llote:

—Naimie dine iairei jai. Carreta dine jai.

30 Naimie dine Felipedi aisicana jaillanona, rabe ado facajana cacade. Felipe dinena naimiemo jicanote:

—¿O facaca rabenicono uñotio?

31 Naimie uai ote:

—¿Niese uñoticue, bu cuena canoñenia?

Felipemo jicanote, naimie diga a jaillano danomo raillena.

32 Naimie facaca cuedafue iese raite:

Toica llaua fallena uilla isoi, naimienua uitimaci.

Toica llaua itirai garedino dine eñena isoi, naimie ñañede.

Ie abina riidollena, uaina oñede.

33 Marañede rafuena naimie finoñede; ia naimienua duere finodimaci.

Naimie uruiaí iñededí, ¿bu naimie rafuena lloite?

Meinia meinoconi, naimie jai iñede.

34 Etiopía imie Felipemo jicanote:

—¿Bie lloraíma bu iena llote? ¿Dama naimie iena llote? ¿Jiaimienena iena llote?

Cuomo llono.

35 Iemei Felipedi bie cuedafuiamona naimiemo Jesús ie mare rafuena llote.

36 Naisona jaidiaimaiaímo, jinui illanomo ridiaimaiaí. Etiopía imie dinena raite:

—Ero, bie jinui itemo, ¿bue ñe cuedi bautizañelicue?

³⁷ Felipe uai ote:

—O começimona o ñinoia, cuemona mare.

Naimie uai ote:

—Jesucristodi Jusiñamui Jitonana ñnoticue.

³⁸ Naimie ie carreta jorodate. Iemei jinuï dine jaidiiaimaia. Felipedi naimiena bautizade.

³⁹ Jinuimona iaïmaiaï bia, Jusiñamui Joreño Felipena oni uite. Etiopía imie Felipena dane cioñede; iadedi Etiopía imie iobicana jaide.

⁴⁰ Jusiñamui Joreño Azotomo Felipena uite. Cesarea dine naimie jaillanona, naga nairaiaïmo Jesús ie mare rafuena llocana uite. Ie mei Cesareamo ride.

9

Saulo creyentena jailla rafue

(Hch 22.6-16; 26.12-18)

¹ Naie facaise Saulo cai Nama Cristona ñnotinona eo duere finoacade. Icirillamona, naimacina meineiade. Ie jira Jusiñamui diga nanoca ñairaïma dine jaide.

² Judíuai comini naie ñairaïma anamo illamona, creyentiaïna duere finollena, Saulo cartana naimiemo jicajaide. Damasco mo ite judíuai ofiracuaimo dajerie cartana uiacade. Naie ofiracuai sedaraini naimie canollena jitaide. Jesucristona ñnotinona naimie baia, naimacina gaitajano, Jerusalémo atillena, naimiena canollena, cartana jitaide. Iñiaï baia, riñoniaï baia, naimacina Jerusalémo atiacade.

³ Cartana ua mei, naimie jaillano, Damasco mo iaire ia, ieconi monamona damie naimie abina quetiñote.

⁴ Eniruemo naimie ana uaillano, monamona damie naimiemo lluaana cacade:

—Saulo, Saulo, ¿bue ñellena cuena duere finodio?

⁵ Naimie uai ote:

—¿Budío?

Monamona damie raite:

—Jesúdicue. Cuenas duere finodio. Iemona o abina duere finodio, ricacillamona raise maïga jurareta suiñoacana isoi. Ie isoidio. Ricacillamona, cuena duere finoacadio.

⁶ Naidacai. Damasco mo mai jai. Nainomo o finolle rafue omo lloiticue.

⁷ Saulo diga jaidinodi ñañeno naidaidimaci. Naie uaina cacadimaci; iadedi buna cioñedimaci.

⁸ Ieconi Saulo naidacaide. Ie uisicoricaillamona, erodatemo, jai buena cioñede. Ie onollina llinocaida, naimiena Damasco mo uitimaci.

⁹ Darui amani cioñede. Jusiñamuimo começina facajamona, guiñede. Jiaï jiroñede.

¹⁰ Damasco mo Ananíasna mameciredimie ite. Naimiedi creyente. Iñiñenamona, Ananías nicairilla isoi cacaillena, Cristodi naimiemo rafuena llote:

—Ananías.

Naimie uai ote:

—Jii, bene iticue.

¹¹ Cai Nama Cristo naimiemo llote:

—Naidacai. Atona joide raila naisona jai. Judas ie jofomo jai. Naicomo Tarso ie Saulona jicano. Naimie cuemo jai jide.

12 Naimie damiena jai nicairite isoide. Ananiana mameciredimiena nicairite isoide. Ona nicairite isoide. Naimie dine o jaillena ona nicairite isoide. Naimiemo o onolli joniamona, naimie dane ciuana nicairite isoide.

13 Ananias uai ote:

—Nama, diga cominimona naimiena fididicai. Jerusalémo naimiedi maraiñede rafuena ona ñnotinomo finode.

14 Jusiñamui diga nanoca ñairaima uai naimiemo ite, nana bene ite creyentiana gaitallena.

15 Cai Nama naimiemo llote:

—Mai. Naimie jai cue fetoca, judíuaiñedinomo cue rafuena llollena, illaicominimo cuena llollena, judíuai cominimo cue rafuena jiai llollena.

16 Cuena naimie jai ñnua muidona, naimie nie isoi llegi cacajite. Naimiemo iena lloiticue.

17 Ie jira Ananias naie jofomo jaide. Ie onolli Saulomo joniano, raite:

—Saulo, jai cue amana jai itio. Naisomo cai Nama Jesús omo jai bairede. Naimie cuena o dine orede, dane o cioillena, Jusiñamui Joreño nana o comecimo namatallena.

18 Iecon Saulo uisimona licicai ico isoide ra uaide. Dane ciuana, naidaide. Ie mei jai bautizaga.

19 Ie mei jai guite. Dane mairide. Diga irui Damascómo ite creyentiaí diga naimie ite.

Damascomo Saulo illa rafue

20 Judíuai ofiracómo naimie jaillanona, Jesús ie rafuena llofujete. “Jesúdi Jusiñamui Jito” raillanona llofujete.

21 Nana naimiena cacadinodi rajicaide. Raitimaci:

—Bimie Jerusalémo Jesúsna ñnotinona duere finouide. Naimacina gaitallena, Jusiñamui diga nanoca ñairainimo uillena, naimie bene bite; ia Jesús díbeimo jai ite.

22 Saulo nagarui jacitaiñeno llofuiamo fibioicaide. Llofueuide:

—Jesúdi cai Jilloitaraima. —Naimie raise llofuia jira, judíuai dinena iena uaitanidimaci.

23 Digarui illa mei, judíuai comeciaina facadimaci, naimiena meinellena.

24 Naimie aisií raillano, aremona nairai nasiaina sedadimaci. Naiona nasiaina jiai sedadimaci, naimiena meinellena; iadedi Saulo iena fidiano,

25 naiona creyentiaí naimiena oni uitimaci. Naimie jillobillena, llaigafó jinofebeimo cirigaimo rainajanona, naimiena ana ñuitadimaci.

Jerusalémo Saulo illa rafue

26 Jerusalémo naimie jaide. Naimie ria, creyentiaína nabaiacade; ia naimiena jaciruitimaci. Creyentena naimie jaillana ñnoñedinaci.

27 Ie jira Bernabé naimiena Cristo oretagano dine uillano, naimacimo naiso motomo Saulo cai Namana ciuana llote. Naiso motomo cai Nama Saulomo lluaña jiai llote. Damascómo naimie ia, Jesúsna jacitaiñeno llofuiana jiai llote.

28 Ie jira Saulona nabaidimaci. Jerusalémo jaisoillanona, cai Nama ie rafuena jacitaiñeno lloouide.

29 Iena cacajanona, griego uaina ñaite judíuidi naimie llofuiana uaitatimaci. Naimiena meineiacadimaci.

30 Creyentiaí iena fidiano, Cesareamo Saulona uitimaci. Ie mei Tarsomo naimiena oredimaci.

31 Judeamo, Galileamo, Samariamo nana creyentiaí uri itimaci. Cai Namana ñnocana jaidimaci. Cai Namana jaciruiocaidá jaidimaci. Jusiñamui

Joreño naimaci comeciaina eo ocuifnotade. Ailluena comini creyentiaina jaidimaci.

Eneas jillua rafue

³² Naie facaise diga illanuaimo Pedro macarite. Lidamo ite creyentiaí dine ride.

³³ Nainomo damie biiramo biidena ciode. Naimiedi Eneas. Ocho años tsitaitallamona biide.

³⁴ Naimiena ciuano, Pedro naimiemo llote:

—Eneas, Jesucristo ona jai jillotade. Mai naidacai. O biira ferí. —Ieconí naimiedi naidadate.

³⁵ Nana Lidamo ite comini, nana Sarónmo ite comini diga, naimiena jilluana ciuanona, creyentiaina jaidimaci.

Fiodaillamona Dorcas jillua rafue

³⁶ Jopemo Tabitana mamecrediñaiño ite. Griego uaimona oni dobañuamona naie mameci Dorcas. Naiñaiño creyente. Ailluena mare rafuena finouide. Ailluena duerede cominina canouide.

³⁷ Naie facaise naiñaiño duicotaide. Ie mei fiodaite. Naimaci einamací finua isoi, ie nabaiñiaí naiñaiño abina jocodimaci. Iemei aneba ie cuartomo naiñaiñona jonetimaci.

³⁸ Lidamona Jope iaire ite. Pedro Lidamo creyentiaí illana fidiano, menamié naimie dine oredimaci. Iaimaiaina llotatitimaci:

—Buena sedañeno cai dine raire bi.

³⁹ Ie jira Pedro naidacaida, naie iaimaiaí diga jaide. Naimie ria, aneba ie cuartomo naimiena uitimaci. Nana feciñuai Pedro ecimo eecana naidaidimaci. Dorcas finouiga iniroina naimiemo acatatimaci.

⁴⁰ Dorcas finouiga rafuena Pedro fidiano, Pedro nana naimacina jino orede. Caiñici ifodo naimie raíta, Jusifñamuimo jüide. Abido dobaicaida, naiñaiñomo erodate. Raíte:

—Tabita, mai rainaicai.

Ieconí naiñaiño uisi oni erodate. Pedrona ciuano, a rainadate.

⁴¹ Naiñaiño onolli llinuanona, a naidanete. Ie mei Pedrodi feciñuaina, jiaie creyentiaí diga, uaidote, naiñaiño jai cajenana naimaci cioillena.

⁴² Nana Jopemo ite comini naie rafuena fididimaci. Ie jira ailluena comini cai Namana innotimaci.

⁴³ Jopemo Pedro diga irui Simón jofomo ite. Simóndi ocaina igoina cuidoraima.

10

Cornelio comeci uai meidua rafue

¹ Cornelio raillamiedi Cesareamo ite. Naimiedi capitán. Italamona bite soldaduai naimie anamo itimaci.

² Naimiedi Jusifñamui llogacinodo jaide. Nana ie comini diga Jusifñamuina innote. Judíuai cominimo ailluena rana jamai fecauide. Jusifñamuimo jüuide.

³ Jitoma ana ia, naimiemo jai nicañilla isoi ite. Naimiedi Jusifñamui jaienicina naimie dine billana ciode. Jaienicidi uaidote:

—Cornelio.

⁴ Naimiena Cornelio jaciruioicaida eruaide. Jicanote:

—Nama, ¿buena jitaídoi?

Naimie uai ote:

—Jusifñamui o jiaicinuaina jai cacade. Jusifñamuidi duerede cominina o canuana jiaí feitañede.

⁵ Mai, Jopemo damierie o mullaiaimona oreta, Simón raillamiena atillena. Naimie jiaie mamecidi Pedro.

⁶ Naimiedi igoi cuidoraima jofomo ite. Naie cuidoraima mamecidi Simón. Monailai fuemo naimie jofo ite.

⁷ Jusiñamui jaienici jailla mei, Corneliodi ie mullaiaimona mena uaidote. Naimie anamo ite soldaduaimona damie jiai uaidote. Naie soldadodi Jusiñamuina jiai ñnote.

⁸ Nana naimiemo Jusiñamui jaienici lluana naimacimo llua mei, Jopemo oretate.

⁹ Ie are naimaci jaillano, Jopemo ianori riacanano, jitoma naidai ia, jofo emodomo Pedro jaide, Jusiñamuimo jillena.

¹⁰ Naimie aimetaite. Guiacade. Guillena comini finodemo, naimiemo nicaïrilla isoi ite.

¹¹ Mona oni econuana ciode. Aillue sábana isoi, buena ana billana ciode. Eniruemo naga muiduedo maigado ana bite.

¹² Naiemo jiaiforie eruaide ocainaia ite. Diga eniruemo jorode raniai ite. Diga nuiciniai jiai ite. Nana Moisés micori fimaidoga rille radi ite.

¹³ Naimiedi monamona damie lluana cacade:

—Pedro, naidacaida, fajano, buena rino.

¹⁴ Pedro uai ote:

—Nama, dama ite. Moisés micori fimaidoga rille rana jaca riñedicue.

¹⁵ Monamona damie lluana dane cacade:

—Jusiñamui jai fimaidoñede. Ie jira iese lloñeno.

¹⁶ Dacaiño amani iese suide. Ie mei naie radi monamo abido jaide.

¹⁷ Pedro ie comecina facade: “¿Ñiese illana ciodicue?” Ie daacaiño Cornelio oretagano bite. Simon illa jofo jicanuano, naie nasemo ride.

¹⁸ Simón Pedrona naie jofomo illana jicanotimaci.

¹⁹ Pedro ie nicaïrillana isoidemo comecina facajano, Jusiñamui Joreño naimiemo llote:

—Ero, daje amani ñima ona jenode.

²⁰ Naidacaida, ana jai. Naimaci diga buena sedaño mai jai. O dine naimacina oredicue.

²¹ Pedrodi comini dine ana jaide. Raite:

—Omoi jenocamiedicue. ¿Bue ñiaïbitomoi billa?

²² Uai otimaci:

—Cornelio raillamie anamo iticai. Cornelioimo Jusiñamui jaienici birui llote: “Pedro dine damieriena oreta, naimiena o jofomo atillena. Jusiñamui rafuena raise cacaillena, naimiena ati” llote. Corneliodi capitán. Naimiedi mareuidimie. Jusiñamuina ñnotimie. Nana judiaï comini dinena naimiedi mareuidimie.

²³ Iena Pedro cacajano, naimie jofomo inillena naimacina fo uaidote. Ie are naimaci diga jaide. Damierie Jopemo ite creyentiai naimie diga jiai jaidimaci.

²⁴ Ie are Cesareamo ridimaci. Cornelio naimaci billemo ocuride. Nana ie cominina jai uaidote. Ie nabaiñiai jiai jai uaidote.

²⁵ Pedro fo jaja, Cornelio dinena naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecallena.

²⁶ Pedrodi naimiena a naidanete. Raite:

—Mai a naidada. Cue jiai jamai ñimadicue.

²⁷ Naimie diga ñaïano fo jaidiaïmaïai. Ailluena comini ofillana ciode.

²⁸ Naimacimo llote:

—Moisés micorí judío imie judíuñedimie nabairillana rairuide. Iena uiñotomoi. Judíuñedimie jofomo illana jiai rairuide. Ie areruido Jusiñamui nicairilla isoidifuenta cuemo acatate. Iemona jai fueotícue. Jiaie nairai diga cue nabairillana, Jusiñamuimona marenana jai uiñotícue. Jusiñamui omoína cue jearuillana jai jitaíñede.

²⁹ Ie jira buena seditaño bitícue, cuena o uaidua jira. ¿Bue ñellena cuena uaidotomoi? Cuemo llono.

³⁰ Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jiidícue. Ieconí Jusiñamui jaienici cuemo bairedede. Naimie iniroi quenirede.

³¹ Cuena raite: “Jusiñamui o jiana cacade. Naimiedi dueredede cominina o canuana feitañede.

³² Ie jira Jopemo damierena oreta, Simón Pedrona uaidollena. Jiaie Simón jofomo ite. Simón di igoí cuidoraíma. Ie jofo monaillai fuemo ite”.

³³ Iemona ona uaidotícue. O comeci marena jira, bene bitío. Jai nana bene iticai. Jusiñamui cai diga jiai ite. Cai Nama nana omo llana cacareillana, bene iticai.

Corneliomo Pedro llua rafue

³⁴ Pedro uai ote:

—Jusiñamui nana comini naimie inuana jitaillana jai uiñotícue.

³⁵ Naga nairaímona Jusiñamuidi cominina jai jitaide. Bu naimiena inoia, bu mare rafuedo jai, Jusiñamui naimiena jai jitaide.

³⁶ Cai judíuai cominimo Jesucristo llua mona, Jusiñamui díbeimo cai illena jai uiñotícai. Iemona Jusiñamui diga cai uri illana jai jiai uiñotícai. Jesús di nana cai Nama. Bie rafuena navui janore fididomoi.

³⁷ Nana Judeamo bie rafue llocana jai jaide. Juan micorí bautizajana llua mei, Galileamo Jesús naimie llofuiana tainede.

³⁸ Jusiñamuidi ie Joreña Jesús mo fecade. Jesús di Nazaret imie. Naimiemo ie uaina jiai fecade. Ie jira Jesús mare rafuena finocana uite. Jusiñamui naimie diga illa jira, diga Taife anamo itinona jillotate.

³⁹ Judíuai eniruemo nana naimie siño finoca rafuena ciodicai. Iena birui llocabiticai. Cruzmo jonianona, cai illaicomini naimiena meinetimaci;

⁴⁰ Iadedi darui amani illa mei, Jusiñamui naimiena jillotate. Jusiñamui jitailla jira, Jesús jillua mei, ailluena comini naimiena ciodimaci. Cajedimiena ciodimaci. Jiai ciodicai.

⁴¹ Nana comini naimiena cioiñedimaci; iadedi Jusiñamui fetocano diese naimiena ciodimaci. Fiodaillamona naimie jillua mei, naimie diga guiticai. Naimie diga jamai jirodicai. Naimiena cai raise uiñua jira, Jusiñamui caina fetode, naie rafuena llollena.

⁴² Cominimo bie rafuena llua caimo llote. Jusiñamui Jesús jai fetode, naimiena inoñedinona duere finollena. Nia fiodaiñedinona duere finoite. Jai fiodaitinona jiai duere finoite. Ie jira Jesús rafuena llocana jaidicai.

⁴³ Jesús muidona naga naimiena inotimie ie marañedicinodi Jusiñamui dotalle. Iena nana Jusiñamui facaina lloraíni micoriai jai llotimaci.

Judíuaiñedino Jusiñamui Joreña feiñua rafue

⁴⁴ Pedro buena nia llofueia, Jusiñamui Joreño nana bie rafuena cacadinomo bite.

⁴⁵ Iena cianona, Pedro diga bite creyentiai raíjcaidimaci. Naimacidi judíuai comini. Judíuaiñede cominimo Jusiñamui ie Joreño jai fecaja jira, raíjcaidimaci.

⁴⁶ Jusiñamui Joreño naimacimo illamona, judíuafñedinodi jiaie nairai uaillado ñaitimaci. Naie ñaia uaillaina uiñoñedimaci. Jusiñamuimo iobillacinona jai fecadimaci. Pedro diga bitino iena cacajano, rajjicaidimaci. Iemei Pedro raite:

⁴⁷ —Cai feiñua isoi, Jusiñamui Joreñoña jiai feiñotomoi. Omoi bautizallena jaca budi rairuiñeite.

⁴⁸ Ie jira naimiedi naimaci Jesucristo facaina bautizallena llote. Bautizaja mei, naimaci diga fiebillana naimaci jitailla jira, diga irui nainomo fiebide.

11

Jerusalémo Pedrodi naimiemo jai suide rafuena llote

¹ Judeamo ite Cristo oretagano, jiaie creyentiai diga, judíuafñede comini Jusiñamui uaina feiñuana fididimaci.

² Pedro Jerusalémo abido ria, judíuai comini naimiema icidimaci.

³ Jicanotimaci:

—¿Bue ñellena judíuafñedino jofomo jaidio? ¿Bue ñellena naimaci diga guitio?

⁴ Pedro uai uanona, naimacimo naie rafuena nagacinuaina llote:

⁵ —Jopemo navui cue ia, Jusiñamuimo cue jiaia, ñicairilla isoi iticue. Aillue sámana isoi ana billana ciodicue. Monamona ana lloride, ie muiduai maiga diga. Cuemo ana ride.

⁶ Nainomo eruaidicuemo, diga rana ciodicue: ocainaiaina, eniruemo jorocana jaidinona, nuicinaiaina. Iena ciodicue.

⁷ Monamona damie cuemo lluaña cacadicue. Raite: “Pedro, naidacailanona, fajanona, rino”.

⁸ Naie uai oticue: “Nama, dama ite. Moisés micori fimaidoga rille rana jaca riñedicue”.

⁹ Monamona dane cuemo llote: “Jusiñamui iena jai fimaidoñede. Ie jira iese lloñoño”.

¹⁰ Dacaiño amani iese suide. Ie mei monamo nana abido dane jaide.

¹¹ Ieconí daje amani iima cai illa jofomo ridimaci. Cesaremona cue ñine damie naimacina orede.

¹² Jusiñamui Joreñodi naimaci diga buena sedañoño cue jaillena cuemo llote. Cue diga seis creyentiai jiai jaidimaci. Cuena uaidotimie jofomo jaidicai.

¹³ Nainomo cai rilla mei, naimie ie jofomo Jusiñamui jaienicina navui cuana caimo llote. Naie jaienicí naimiemo llote: “Jopemo cominina oreta, Simón Pedrona atillena.

¹⁴ O jitaille rafuena omo lloite. Naie rafuena o cacajamona, jeacinomona jilloitio, nana o jofomo ite comini diga” llote. Ie jira naimie cuena uaidote.

¹⁵ Nainomo cue llofuia façaiseconi, nano dofoconi caimo billa isoi, Jusiñamui Joreño naimacimo bite.

¹⁶ Iena cue cuamona, cai Nama Jesús lloga uaina comeciticue. Naimie navui llote: “Juan micori rafuena comini feiñuamona, Juan naimacina bautizade; iadedi cue rafuena omoi feiñuamona, cue Moo ie Joreñoña birui feiñoitomoi”.

¹⁷ Cai Nama Jesucristona cai iñuamona, Jusiñamuidi ie Joreñoña caimo navui fecade. Naimacimo daje isoi birui fecademo, ¿ñiese Jusiñamui ñibeimo iñeiticue?

¹⁸ Iena Cristo oretagano cacajano, jai naimaci uaina uaitallicino iñede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidi judíuainede comini comeciai iuai meid-uana jai jitaide. Naimie dibeimo naimaci illana jai jitaide. Ie jira naimieri iobidicai.

Antioquíamo ite creyentiai illa rafue

¹⁹ Esteban micorina duere finua facaise, creyentiai tuficaida jaidimaci. Feniciamo damierie jaidimaci. Chipremo damierie jiai jaidimaci. Antioquíamo damierie jiai jaidimaci. Dani judíuain cominimo naimaci rafuena llotimaci;

²⁰ iadedi tuficaidinomona jiaino Chipremona billanona, Cirenemona billanona, Antioquíamo rillano, judíuainñedinomo cai Nama Jesús rafuena llotimaci.

²¹ Cristo uai naimacimo illamona, ailluena comini inotimaci. Cai Nama dibeimo jaidimaci.

²² Jerusalémo ite creyentiai iena fidiano, Antioquíamo Bernabéna oretatimaci.

²³ Naimie ria, naimaci marena illamona, naimiedi Jusiñamui naimacina dueruillana uñote. Ie jira iobide. Imaci comeciai ocuiñocana inocana jaillana naimacimo llote.

²⁴ Naimiedi maremie Jusiñamui Joreño nana naimie comecimo namatadimie. Jusiñamuina eo inotimie. Naie facaise ailluena comini creyentiaina jaidimaci.

²⁵ Ie mei Tarsomo Bernabé Saulona jenuaide. Naimiena baillanona, Antioquíamo naimiena uite.

²⁶ Daje año creyentiai diga nabairillanona, naimacina llofuetiaimai. Antioquíamo creyentiaidi cristianona nano mameciredimaci.

²⁷ Iemei Jerusalémona Antioquíamo damierie Jusiñamui rafuena lloraini bitimaci.

²⁸ Naimacimona Agabo raillamie ite. Jusiñamui Joreñodi naimiena llotatate:

—Nana comini ico aime guitimaci. —Claudio illaimana illa facaiseconi iese jai suide.

²⁹ Ie jira Antioquíamo ite creyentiaidi, Judeamo ite creyentiamo, ucubena oretaiacadimaci.

³⁰ Nagamiai imacimo illa dierise ucubena oredimaci. Creyentiaina llofuerainimo Bernabé diga, iaimaiai Saulo diga, naie ucubena oredimaci.

12

Herodes Agripadi creyentiaina duere finua rafue

¹ Naie facaise Herodes railla illaimadi creyentiamona damieriena gaitatate, naimacina duere finollena.

² Lloebi diga Jacobo cimaiona jaitatate. Jacobodi Juan ama.

³ Ieri judíuain illaicomini iobidimaci. Iena uñuamona, Herodes Pedrona jiai gaitatate.

⁴ Naie facaiseconi judíuain comini llomenico guilla rafue ite. Naimiena gaitatajanona, cárcelmo jonete. Soldaduaina orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedauidimaci. Naie llomenico guilla rafue fuilla mei, comini illa uicom naimiena meineiacade.

⁵ Ie jira Pedro cárcelmo fiebide; iadedi creyentiai naimie facaina eo juidimaci.

⁶ Herodes naimiena meineiacanarui naio Pedro soldaduai motomo inide. Mena lloeo diga maiga. Soldaduai cárcel nasena jiai sedadimaci.

⁷ Ieconí cai Nama ie jaienici dí cárcelmo bairede. Cárcelmo lligaiñote. Naimiena casitallena, jaienici Pedro ciraigina jetade. Raite:

—Raire naidacai.

Ie mei naimie onollimo ite lloeo dí oni uaide.

⁸ Jaienici naimiena raite:

—O iniroina jita. O zapatona jiai jita— Iena jitaja mei, naie jaienici dane raite—. O iniroi o abimo ferino. Cue diga mai bi.

⁹ Naie jaienici jinafona Pedro jino jaide. Pedro dí naie jaienici naimiemo finoca rafuena uiñoñede.

—Nicairilla isoi comecina facadicue —raite.

¹⁰ Naga nasena sedade soldadomona jaide. Jino jaillena, nanoca nasemo ride. Nai nasedi lloema ie; iadedi nase dama ecoride. Jino jaidiaimaiai. Daje calle jaillanona, jaienici naimiena fainonocai.

¹¹ Iemona Pedro naimiemo suide rafuena jai uiñoñede. Raite:

—Cue Nama ie jaienici na uanai oretate. Herodemona cuena jillobitade. Judíuai illaicomini cue meinellena cue sedajamona cuena jillobitade.

¹² Iena jai naimie uiñuano, María jofomo jaide. Maríadi Juan Marcos ei. Jusiñamuimo jillena, naicomo ailluena comini ofidimaci.

¹³ Rillanona calle fuemo ite nasena tute. Daje mullaño bite. Naiñaiño mamecidi Rode.

¹⁴ Naimie uaiduamona, naiñaiño Pedro uaina uiñote. Iobilla jira, nase econoñede; iadedi abido fo aiside. Pedro nasemo illana llote.

¹⁵ Raitimaci:

—Odi uairico isoidiosa.

Naiñaiñodi:

—Pedro dí jaca ieseuide —raite.

Uai uamona:

—Naimie joreño ite —raitimaci.

¹⁶ Pedro nasena nia tua jira, nasena econuaibitimaci. Econuamona naimiena naimaci cuamona, rajicaidimaci.

¹⁷ Fo jaillano, Pedro ie onolli jaidide, naimaci llucaillena. Cárcelmona cai Nama naimiena jino ua rafuena llote. Raite:

—Jacobomo iena llono. Jiaie creyentiaimo iena jiai llono.

Ie mei Pedro jino jaillano, jainomo jaide.

¹⁸ Monaidemo, Pedro nainomo iñena jira, soldaduai rajicaillanona, siadotimaci.

¹⁹ Herodes iena fidiano, naimiena jenotate. Naimiena baiñenia, soldaduaimo jicanote. Baiñena jira, naimacina meinellena llote. Iemei Judea-mona Cesareamo Herodedi jaide.

Herodes micorí fiodailla rafue

²⁰ Naie facaise Herodedi Tiro railla nairai diga, Sidón railla nairai diga, eo icirite. Naimaci uri ille rafuena siadollena, naimie dine bitimaci. Herodes ecimo maijidimiedi Blasto. Blasto diga naie cominidi nabairite, naimaci dibeimo naimie illena. Herodes eniruemona naimaci guille billa jira, uri illena naimiemo jicanote.

²¹ Naie cominina Herodes feiñollena, ie ebirede iniroina jitade. Naimacina feiñollena, ie rairabicimo raide. Iemona raíta, rafuena are llote.

²² Iena cacajano, comini ado cuiriidimaci:

—Jamai imadi ñaiñena. ¡Jusiñamui ñaia!

23 “Jusiñamuiñedicue” naimie raiñena jira, ieconi cai Nama jaienici naimiena iracotaitate. Jusiñamuimo iobillacino naimie fecañena jira, aiai naimiena aite. Iemona naimiedi fiodaite.

24 Naie facaiseconi Jusiñamui uai llocana jaide. Ailluena comini iena inotimaci.

25 Iaimaiai uiga ucube illanona, Bernabé, Saulo diga, Jerusalémona Antioquíamo abido bitiaimaiai. Juan Marcos jiai atidiaimaiai.

13

Bernabéna, iaimaiai Saulo diga, fetua rafue

1 Antioquíamo creyentiai motomo Jusiñamui facaina lloraini itimaci. Llofueraini jiai itimaci: Bernabé, Simón. Simón di jiaie mameci Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla enirue gobernador. Saulo jiai ite.

2 Naimaci Jusiñamuina sedajamona, guiñenaruillai ia, Jusiñamui Joreño naimacimo llote:

—Bernabé iaimaiai Saulo diga feto, cuejena. Cue rafuena iaimaiai lollena, iaimaiaina jai fetodicue.

3 Jusiñamuimo naimaci jia mei, Jusiñamui iaimaiaina fetuana naimaci uñuamona, naimaci onolli iaimaiaimo jonía mei, iaimaiaina naimacimona oni oretatimaci.

Pablo, iaimaiai Bernabé diga, Chipremo illa rafue

4 Iaimaiaina Jusiñamui Joreño oretaja jira, Seleuciamo jaidiaimaiai. Nainomona botedo Chipremo jaidiaimaiai. Chipredi uiasi.

5 Chipremo ria, Salaminamo judiaiai ofiracuaimo Jusiñamui uaina llofuetiaimaiai. Juan Marcos iaimaiai diga jiai jaide.

6 Nana naie uiasimo jaillanona, Pafos railla nairaimo ridimaci. Nainomo Barjesúna mameciredimiena baitimaci. Naimie judío imie. Naimiedi aima. Naimiedi diga siño rafuena finoraíma. “Jusiñamui rafuena lloticue” raite; iadedi taino lloraima.

7 Gobernador diga maijuide. Gobernador di Sergio Paulo. Gobernador di abina uñnotimie. Jusiñamui uaina cacaacana jira, naimie Bernabé iaimaiai Saulo diga uaidote.

8 Barjesús ie jiaie mamecidi Elimas. Naie iaimaiai llofuiana uaitate. Gobernador inuana jitañede.

9 Saulodi jiaie mameci Pablo. Pablo dinena naimiena eo eruaillano, Jusiñamui Joreño nana Pablo comecimo namatajamona,

10 naimiemo llote:

—¡Eo jifueraimadio! ¡Eo marañedio! ¡Taife díbeimo itio! Nana mare rafue díbeimo ñedio. Cai Nama ie mare uanaicinona dobairaidodio.

11 Cai Nama ie uaido ona ja iracotaitaiticue. Nano nigarui useredinona cioñeitió.

Ieconí naimie cioñede. Cominina jenuaide, ie onollido llinocaida ie uillena.

12 Iena ciuamona, gobernador creyentena jaide. Cai Nama Jesús rafue siñonana ciuanona, naimie jacináite.

Jesús rafuena llocana jaidiaimaiai

13 Pafomona botedo Pablo ie nabaiñiai diga jaide. Perge railla nairaimo ride. Perge Panfilia railla eniruemo ite. Juan Marcos iaimaiaina fañonocaida, Jerusalémo abido jaide.

14 Pergemona Antioquíamo jaidiiaimaiai. Pisidia raila eniruemo Antioquíate. Sábadoruimo judíuai ofiracomo jaillano, ana raidiiaimaiai.

15 Moisés micori cuegafuena facaja mei, Jusiñamui facaina lloraini micoriai cuegafuena facaja mei, judíuai ofiraco sedadino iaímaiaimo llotimaci:

—Caimaci, cominimo bue omillo loiacania, mai llono.

16 Pablo naidadajano, ie onollina jaidide, comini llicaillena. Raite:

—Jusiñamuina sedallena bene itomoi. Omoimona damierie judíuaidomoi. Jaiino judíuainfedomoi; iadedi judíuai isoi Jusiñamuina sedadomoi. Cue lluomo mai cacarei.

17 Iemona omoi fueollena, cai jaiagai rafuena lloiticue. Cai judíuai comini Jusiñamuina birui sedadicaí. Naimiedi cai jaigaina jaie fetode. Egiptomo naimaci ia, naimacina eo jebuitate. Nainomona ie siño uai diga naimacina atide.

18 Jofue iñenanomo cuarenta años naimacina canode.

19 Canaán eniruemo siete nairaina cuenode. Cai jaigaimo, naimaci uruiai diga, naie eniruena fecade, naimaci iena.

20 Cuatrocientos cincuenta años cai jaigaina fetuamona, naie eniruena naimacimo fecade. Naie facaise Jusiñamuidi jueces fetode, cai jaigaina naimaci canollena. Naimie dibeimo naimacina itatallena, Jusiñamui naie jueces fetode; iadedi Samuel micori illa facaise juecesna jai jitañedimaci. Samuel micoridi Jusiñamui facaina lloraíma.

21 Illaímana naimaci jitailla jira, Jusiñamui Saúl micorina fetode. Naimiedi Cis micori jito. Naimie micori nairaidi Benjamín. Cuarenta años Saúl micori cai usumatiai micoriaina sedade.

22 Naimie ifo meidollena, naimaci illaímana illena, Jusiñamui David micorina fetode. Naimiedi Isaí micori jito. Jusiñamui naimie micorina llote: “Bimie eo cue comecido jaidimie. Nana cue jitaill rafuena finoite”.

23 Jusiñamui llua isoi, David micori uruaímona Jesúdi cai judíuai comini jilloitaráimana jaide.

24 Jesús nia llofueñenia, Juan Bautista micori llofueuide. Juan micori cai cominimo llouide: “Omoi jeacinona faínonocaida, Jusiñamui dibeimo omoi comeciai iuaillai meido. Iena omoi meidoia, comini iena uiñotallena, mai omoi bautizallomoi”.

25 Juan micori ie llofuaí fuillamona, raite: “Omoi comeci facajamieñedicue. Cue ifomo jiaímiena meidoite. Naimie isoíñedicue. Jamai bue isoidicue. Jamai bue cue isoilla jira, naimiena cue canuana uiñofedicue”.

26 Caimaci, cai eirue jito Abraham micorimona comuidicaí. Jusiñamuina birui sedadicaí. Ie jira cai jeacinomona naimie jilloitalle rafue caímo duide. Jesúna ñaiticue.

27 Jerusalémo itinodi, cai illaicomini diga, Jesúna jaie meinetimaci. Naga sábado Jusiñamui facaina lloraini micoriai cuegafuíaína facadimaci; iadedi iena raise cacaiñedimaci. Jesúna naimaci meiniamona, Jusiñamui lloraini micoriai cuegafuíaína jai suitatimaci.

28 Jesús marañede rafuena finoñede; iadedi naimiena meinetimaci. Pilatomo jicanotimaci, naimiena meinellena.

29 Nana Jusiñamui facaina lloraini micoriai cuegafuíaína suilla mei, cruzmona naimie ana uano, nofici ie raíafomo naimiena jonetimaci;

30 iadedi fiodaillamona Jusiñamui naimiena jillotate.

31 Galileamona Jerusalémo naimie diga jaidino naimiena diga icaiño ciodimaci. Iemei cominimo naimie rafuena jai llocabitimaci.

³² Jusiñamui cai jaiagaimo jaie lloga rafue jai suide. Iena omoimo ja lloiticoco.

³³ Jusiñamuidi cai jaiagaimo llogafue birui jai suide. Jesúna cai dine jai orede. Naiena salmos dosmo cuela: "Jusiñamui llote: 'Cue jitodio. Birui ona jilloitaraimana itataicue'".

³⁴ Fiodaillamona Jusiñamui naimiena jai jillotate. Ie abi jaca rifaiñede. Iena Jusiñamui jiai raite: "Davidmo cue llogacinona omoi facaina jaca finojiticue".

³⁵ David micori jiaie salmomo iena cuete: "O mareuidimie jaca rifaillana jitaiñedio" raite.

³⁶ Jusiñamui David micorina ñaiñede. Ie illa dinori David micoridi Jusiñamui jitaille rafuena finode. Ie mei naimie fodaite. Ie raiafomo naimie comini naimiena jonetimaci. Ie mei David micori abi rifaide;

³⁷ iadedi Jusiñamui Jito abidi ie isoi rifaiñede.

³⁸ 'Caímaci, daje rafue omoimo lloiacadicue. Jesús fodailla jira, Jusiñamui omoi jeacino oni dotaacade. Moisés micori llogacinodi omoi maraiñedicinomona omoína jillotañede;

³⁹ iadedi Jesúna birui omoi ñnoia, omoi jeacino anamona jilloitomo.

⁴⁰ Abina omoi rairui, Jusiñamui facaina lloraini micoriai jaie ciegafuia; omoimo sui raillano. Jaie cuetimaci:

⁴¹ Ero, Jusiñamui uaina jamaidomoi. Ieri raajicaidomoi; iadedi faifidomoi.

Omoi motomo siño mare rafuena birui finodicue.

Bu omoimo iena iese lloia, bie rafuena ñnoñeitomoi.

Ie isoi omoimo suiñellena, Jesúna birui omoi mai ñno.

⁴² Ie mei Pablo llñcaide. Iaimaia; jino jaidemo, comini iaimaiaimo jicanotimaci, jiaie sábadoruimo bie rafuena naimacimo dane llollena.

⁴³ Comini jino jailla mei, ailluena comini Pablo, iaimaia; Bernabé diga, ñaicana jaidimaci. Judíuai iese jaidimaci. Judíuaiñedinno iese jiai jaidimaci. Naie judíuaiñedinodi judíuai isoi Jusiñamuina ñnotimaci. Pablo, iaimaia; Bernabé diga, ñaicana jaillanona, naimacimo llotiaimaia;

—Jusiñamui omoína duenaillana omoi jai uíñua jira, Jesús rafuena mai omoi ñno.

⁴⁴ Jiaie sábadoruimo ailluena comini ofidimaci, Jusiñamui uaina cacareil-lena.

⁴⁵ Ailluena cominina ciuano, judíuai comini dinena eo uradoidimaci. Pablo joreñona ñaitimaci. Naimie llofuiacinuaina uaitatimaci;

⁴⁶ iadedi Pablo, iaimaia; Bernabé diga, jacitaiñeno llofuetiaimaia;

—Omoimo Jusiñamui uaina nano lloiacadicoco. Iena jitaiñedomoi. Jusiñamui diga omoi jaca illena jitaiñedomoi. Ie jira judíuaiñedinno dine jaiticoco.

⁴⁷ Iese Jusiñamui jaie llote:

Judíuaiñedinomo ona oretaiticue, naimacimo cue rafue llollena, naga eniruemo ite cominimo jeacinomona jilluana llollena.

⁴⁸ Iena cacajano, judíuaiñedinno iobidimaci.

—Jusiñamui rafue mare —raitimaci. Jusiñamui jaca illena fetocano diese Jesúna ñnotimaci.

⁴⁹ Nana bie eniruemo cai Nama Jesús uaina llocana jaide;

⁵⁰ iadedi judíuai dinena diga cominina fuemo faicana uitimaci. Jusiñamuina sedade riñoniaina fuemo faicana uitimaci. Naie riñoniai mameciai are soride. Illaicomini fuemo faicana uitimaci. Ie jira Pablo, iaimaia; Bernabé diga, duere finodimaci. Naimaci illanomona iaimaiaina jino dotadimaci;

⁵¹ iadedi jioracuai iaímaiaí eillimona jaidinotíiaímaiaí, naimacimo ite jeacinuaina naimaci uíñollena. Ie mei Iconio railla nairaimo jaidíiaímaiaí;

⁵² iadedi Antioquíamo ite creyentiaí eo iocire itimaci. Jusiñamui Joreño nana naimaci comecimo namatade.

14

Iconiomo Pablo, iaímaiaí Bernabé diga, illa rafue

¹ Iconiomo judíuai ofiracomo, iaímaiaí Antioquíamo jailla isoi, jaidíiaímaiaí, Cristo rafuena duere llotíiaímaiaí. Ie jira ailluena comíni creyentiaína jaidímaci. Judíuai comínimona ailluena inotimaci. Judíuaiñede comínimona ailluena jiaí inotimaci;

² iadedi inoñede judíuaiði judíuaiñedinona fuemo faitimaci. Naimacimo creyentiaína tainona llotimaci;

³ iadedi nainomo are fiebidíiaímaiaí. Cai Nama facaisena jacitaiñeno llotíiaímaiaí. Cai Nama Jesús iaímaiaína siño rafuena finotate. Ie jira comínidi cai Nama Jesús naimacina dueruillana fididímaci;

⁴ iadedi nana comíni naiena inoñedímaci. Comeciaina daje isoi lloisiñede. Damíerie judíuai facaisena itimaci. Damíerie naie iaímaiaí facaisena itimaci.

⁵ Judíuaiñedinodi, judíuai diga, naimaci illaicomíni diga, naie iaímaiaína duere finoacadímaci. Noficina iaímaiaína fairigílacadímaci.

⁶ Iena fidiano, Licaoniamó ite nairaimo aisicano jaidíiaímaiaí. Litra railla nairaimo jaidíiaímaiaí. Derbe railla nairaimo jiaí jaidíiaímaiaí. Naie nairai ecimo ite eníruemo jiaí jaidíiaímaiaí.

⁷ Nainomo Jesús ie mare rafuena llofuetíiaímaiaí.

Listramo iaímaiaímo suilla rafue

⁸ Listramo damíe tísitaite. Nanomona naimíe íese jeicia jira, jaca macaríñede.

⁹ Pablo llofuiana naimíe raise cacajamona, “Jusiñamui cuena jillotarede” raillanona, tísitaitímíe inote. Pablo dinena naimíemo eruaíllano, naimíe inuana uíñote.

¹⁰ Naimíemo ado llote:

—A naidada.

Iemei daiacaida naimíe macarite.

¹¹ Ailluena comíni Pablo finoca rafuena ciodímaci. Naimaci uaido ado cuiríidímaci:

—Íiñiaí isoi Jusiñamui cai dine bite.

Naie comínidi Júpiter railla jusiñamuina sedauídímaci. Mercurio railla jusiñamuina jiaí sedauídímaci.

¹² Ie jira Bernabé mamecídi jiaícina jonega Júpiter. Pablo mamecídi jiaícina jonega Mercurio, naimíe ñairaimana illa jira.

¹³ Naie nairai nanoca nase ruica facai Júpiterna sedauilla jofó ite. Iaímaiaína sedallena, safia diga juraretaiína abina finoduanona, Júpiter facaina ñairaima naimacina atide. Ailluena comíni diga bite. Juraretaiína fallena, “Naie iaímaiaíði cai Jusiñamui” raillano, iaímaiaímo feaacadímaci.

¹⁴ Iaímaiaí iena cíanona, “Comíni maraiñede rafuena finoacade” raillano, iaímaiaí iníroina cuaranotíiaímaiaí. Comíni motomo aisicana jaidíiaímaiaí. Ado llotíiaímaiaí:

¹⁵ —Nabaiñiaí, ¿bue ñellena cocomo íese finodomoí? Jamai íimadícoco. Omoí isoidícoco. Jusiñamuina omoí sedallena, jamai rana omoí sedañellena, mare rafuena omoímo jai llotícoco. Cajede Jusiñamuina sedadícoco. Naimíedi

mona finode. Eniruenta finode. Monailaina jiai finode. Nana nainomo ite rana jiai finode.

¹⁶ Jaiie Jusiñamuidi nana omoi judíuainfedino omoi jitailla rafuena finuana rairuiñede;

¹⁷ Iadedi naimie finoca rafuemono naimiena uññoredomoi. Omoi facaina mare rafue naimie finocabide. Noci deitate. Omoi riaro sicutate. Omoimo guille itatate. Iemona omoi comeciaina caimare itatate. Iemona Jusiñamuina uññoredomoi.

¹⁸ Iese Pablo llote; iadedi iaímaiaimo juraretaiaína fecajana jaca faínonocaiacaiñedimaci.

¹⁹ Nano nigarui illamona, Pisidiamo ite Antioquíamona judíuai comini bitimaci. Iconiomona jiai bitimaci. Judíuai dinena fuemo faíamona, naimaci dibeimo comini jaidimaci. Iemona noficido Pablona fairigite. Naie nairaimona naimiena sonocana uitimaci, fiodaítimiena naimie eruaila jira.

²⁰ Naimiena iese faínonocaila mei, creyentiai naimie ecimo billamona, naimie a naidadate. Nai nairaimo abido jaide. Ie are Derbemo, Bernabé diga, jaide.

²¹ Naie nairaimo Jesús ie mare rafuena llotiaímaiaí. Diga comini creyentiaína jaidimaci. Ie mei Listramo abido jaidiaímaiaí. Iconiomo abido jiai jaidiaímaiaí. Pisidiamo ite Antioquíamo jiai abido jaidiaímaiaí.

²² Creyentiai comeciaina ocuiñotadiaímaiaí. Cristona nia inuana llotiaímaiaí. Raitiaímaiaí:

—Jusiñamui dine cai nia riñenia, eo duere sefuitcai.

²³ Naga creyentiai illanomo creyentiaína sedarainína fetodiaímaiaí. Guiñeno Jusiñamuimo jia mei, guiñena facaise mei, naimiena naimaci jai inua jira, cai Nama illa anamo naimacina faínonocaidiaímaiaí.

Siriamo ite Antioquíamo abido jaidiaímaiaí

²⁴ Pisidiamo jaillanona, Panfiliamo ridiaímaiaí.

²⁵ Pergemo Cristo uaina llua mei, Ataliamo jaidiaímaiaí.

²⁶ Nainomona botedo Siriamo ite Antioquíamo abido ridiaímaiaí. Nano naie iaímaiaí illanomo abido ridiaímaiaí. Nainomona iaímaiaí navui nia jaiñenia, creyentiai dinena Jusiñamui iaímaiaína duenaillana uññuamona, iaímaiaína oredimaci. Jusiñamui rafuena iaímaiaí llollena, iaímaiaína oredimaci. Naie maijia fuilla jira, jai abido bitiaímaiaí.

²⁷ Iaímaiaí rilla mei, creyentiaína ofitadiaímaiaí. Nana Jusiñamui iaímaiaímo finoca rafuena llotiaímaiaí.

—Jusiñamuidi judíuainfedino naimiena inuana jai jitaide —llotiaímaiaí.

²⁸ Dinomo creyentiai diga are itiaímaiaí.

15

Jerusalémo Moisés micori llogacinona siadua rafue

¹ Antioquíamo Jerusalémona janore comini billano, creyentiaína iese llofuetimaci:

—Moisés micori caimo llua isoi, omoi abina omoi detatañenia, jeacinomona jillobiñeitomoi.

² Ie jira creyentiai uri iñedimaci. Pablo, iaímaiaí Bernabé diga, Jerusalémona bitino llofuiana eo uaitatiaímaiaí. Ie muidona creyentiai dinena iaímaiaína, jaiie creyentiai diga, Jerusalémo jaillena fetodimaci. Cristo oretagano diga, Jerusalémo ite creyentiaína sedaraini diga, bie rafuena siadoiacasite.

³ Creyentiaí naimacina oretaja mei, Fenicia railla enirue dibeido jaidimaci. Ie mei Samaria railla enirue dibeido jiaí jaidimaci. Creyentiaí illanuaimo llofuecana jaidimaci. Judíuáiñedino creyentiaína jai jaillana naimacimo jiaí llotimaci. Ie jira naie creyentiaí caimare itimaci.

⁴ Jerusalémo ria, creyentiaídi naimacina feñotimaci. Cristo oretagano itimaci. Creyentiaína sedaraini jiaí itimaci. Naimacimo nana Jusiñamui iaímaiaimo finoca rafuena llotiaímaiaí. Cristo rafuena iaímaiaí llofuiamona, judíuáiñedino Cristona iñuana llotiaímaiaí.

⁵ Iena cacajano, fariseuai dibeimo ite creyentiaímona jiaíno naidaita raitimaci:

—Moisés micorí llogacinuaina iñuamona, judíuáiñede creyentiaí abina diana jitaidicai.

⁶ Bie rafuena siadollena, Cristo oretaganodi, creyentiaí sedaraini diga, danomo ofidimaci.

⁷ Iena are siadua mei, Pedro naidacaillano, raite:

—Amatiaí, judíuáiñedinodi cuemona Jesús ie mare rafuena cacaillena, jaie omoimona Jusiñamui cuena fetode. Iena uiñotomoi. Cue llofuiamona iñotimaci.

⁸ Nana comini comeciaina naimie uiñuamona, judíuáiñedino naimiena iñuana Jusiñamuidi uiñote. Caimo fecaja isoi, ie Joreño naimacimo fecaja jira, Jusiñamuidi judíuáiñedinona jitaillana jai uiñoticai.

⁹ Jusiñamuidi naimacina cai isoi jai feiñote. Naimiena naimaci iñua jira, naimie naimaci comeciámona jeacinona jai dotade.

¹⁰ ¿Bue ñellena Jusiñamuina iñoiacaiñedomoi? Jusiñamui jitaillacino omoi finoacaiñena jira, naimie omoína duere finuana jitaidomoi. Cai jaigai Moisés micorí llogacinodo jaidimaci; iadedi iena raise iñoñedimaci. Nana ie llogacinona jaca finonidimaci. Iedo jaie jiaí jaidicai; iadedi iena jiaí finonidicai. ¿Bue ñellena iedo birui cai jaillana jitaidomoi?

¹¹ Jesucristo caina duenailla jira, cai jeacinomona jilloiticai. Judíuáiñedino cai isoi jilloitimaci.

¹² Iena cacajano, nana ofidino uai llicaidimaci. Iemei Bernabé lluaana cacadimaci. Pablo lluaana jiaí cacadimaci.

—Jusiñamui judíuáiñedino motomo cocona siño rafuena finotate — llotiaímaiaí.

¹³ Iaímaiaí ñaia mei, Jacobo raite:

¹⁴ —Amatiaí, cuemo cacarei. Judíuáiñedinomo Jesús rafue Simón Pedro nano lua rafuena jai cacadicaí. Creyentiaína naimaci jaillena, Jusiñamui naimacina jai fetode.

¹⁵ Jusiñamui facaina lloraini micoriaí iena jaie cuetimaci:

¹⁶⁻¹⁸ Jusiñamui jaie llote: “David micorí illaíma isoi illaímana illena, cue Jitona ico oretaiticue.

David jicorí jito illaímana birui iñede;

iadedi David micorí ifomo illaímana cue Jito iite.

Iemona judíuáiñedino cuena iñoitimaci.

Naimaci cue cominina jaillena jiaí jitaidicue.

Iena cue llua jira, iena finoíticue” llote.

¹⁹ Te muidona cue comeci raite: Judíuáiñedinomona creyentiaína jaidinona duere finoñeíticai.

²⁰ Naimacimo rabena oreta, dama buena llollena: “Jiraraímo fecaca llicisina riñeno. O aiñede riño diga iñeno. O iñiñede iima diga iñeno. Llerinoga rana riñeno. Diruena jiaí riñeno”.

21 Jaiemona naga sábadó naga judúuai ofiracomo judúuaidi Moisés micóri cuegafuiai mona naie isoide lletarafuena cacadimaci. Ie jira naie isoide rafuedo nia jaiticai: iadedi jiaie Moisés micóri lletarafuedo jaiñeiticai.

22 Ie mei Cristo oretaganodi, creyentiaina sedaraini diga, comeciaina facadimaci, naimacimona cominina fetollena, Antioquíamo oretallena. Nana creyentiaí comeciaina facajano: “Jee” raitimaci. Pablo, iaímaiaí Bernabé diga, naimacina oretaiacadimaci. Judana fetodimaci. Naimie mameci jiaicidi Barsabás. Silana jiaí fetodimaci. Jiaie comini baifemo rafuena baitadiiamaiaí.

23 Rabena cuetimaci, iaímaiaí diga oretallena. Iese raillano, cuetimaci:

“Antioquíamo itino, Siriamo itino, Ciliciamo itino, omoimo cueticai. Jerusalémo iticai. Cristo oretaganodicai. Creyentiaina sedarainidicai. Omoidi cai amatiaí. Omoimo jai cueticai. Judúuainediomoi; iadedi cai amatiaidomoi.

24 Cai motomona jiaie comini naimaci llofuiado omoína uri itatañenana fididicai. Omoi jeacinomona omoi jilloillena, Moisés micóri llogacinodo omoi jaillana jitaidimaci. Ie jirari omoi comeciái rucaicuerite. Naimacina oretañedicai.

25 Danomo cai ofilla mei, menamiéna fetodicai, omoimo oretallena, Bernabé, iaímaiaí Pablo diga. Bernabéna isiruiticai. Pablona jiaí isiruiticai.

26 Iaímaiaí cai Nama Jesucristo muidona navui niadedi fiódaitiaímaiaí.

27 Ie jira Judas, iaímaiaí Silas diga, oretaiticai. Omoimo bie rabe cuia isoi lloitiíamaiaí.

28 Jusíñamui Joreño caímo illamona, bie rafuena omoimo lloiticai. Ailluena rafue omoi finuana lloñeiticai. Dani bie rafuena finojitomoi.

29 Jiraraimo fecaca rana riñeno. Diruena riñeno. Llerinoga rana riñeno. O añede riño diga iñeno. O iñíede iima diga iñeno. Iese omoi iñenia, marena iitomoi. Macaibaite” cuetimaci.

30 Ie mei Antioquíamo jaidimaci. Ailluena cominina ofitaja mei, naimacimo cartana fecadimaci.

31 Iena facajano, naie llucaciori iobidimaci.

32 Judas Jusíñamui facaina lloraima. Silas daje isoide. Diga rafuena creyentiaímo llofuetiaímaiaí. Naimaci comeciaina jiaí ocuiñotadiíamaiaí.

33 Diga irui nainomo illa mei, iaímaiaína oretatinomo creyentiaí iaímaiaína marena abido oretatimaci.

34 Nainomo Silas comecina facajano, fiebide. Ie jira Judas dama abido jaide.

35 Antioquíamo Pablo, iaímaiaí Bernabé diga, cai Nama Jesús rafuena llofuellena fiebidiaímaiaí. Diga comini jiaí iese llofuetimaci.

Pablo jiaie eniruego ite creyentiaí dine dane jailla rafue

36 Diga irui illa mei, Pablo Bernabémo llote: p —Naga navui coco llua nairaimo creyentiaí dine abido mai coco jai. Cai Nama ie mare rafuena dane lloiticoco. Nie isoi naimaci illana jibuíticoco.

37 Bernabédi, naie iaímaiaí diga, Juan Marcos uiacade.

38 Panfiliamo iaímaiaína navui Juan faínonocaide. Iaímaiaí diga llofuellena jaiñena jira, Pablo naimiéna dane uacañede.

39 Riire ñaitiaímaiaí. Comecina daje isoi lloifediaímaiaí. Ie jira dajena jaiñediaímaiaí. Bernabé Juan Marcona uillanona, Chipremo aillue botedo jaidiaímaiaí.

40 Ie mei Pablo Silana uite. “Jusíñamui omicono canoite” creyentiaí dinena raillanona, iaímaiaína oredimaci.

41 Siria railla eniruemo Jesús rafuena llocana jaidiiaimaia. Cilicia railla eniruemo jiai llocana jaidiiaimaia. Creyentiaí comeciaina ocuiñotacana jaidiiaimaia.

16

Timoteo iaímaiaí diga jailla rafue

1 Nano Derbemo Pablo, iaímaiaí Silas diga, ridiiaimaia. Iemona Listramo ridiiaimaia. Nainomo Timoteo railla creyente ite. Naimie eidi judía íñaiño. Jiai creyente. Ie moo micoridi griego imie.

2 Listramo ite creyentiaí, Iconiomo ite creyentiaí diga, naimiena: “Mare” raitimaci.

3 Pablodi Timoteona uiacade, naimie diga jaillena. Timoteo moo micori griego imiena jira, naimie abina nia detatañede; iadedi nainomo ite judíuai illa jira, Moisés micori luua isoi, Pablo Timoteo ie abina dete. Judíuñedimie naimaci motomo ia, naimaci motomo inide.

4 Naga nairaimo naimaci jaillanona, Jerusalémo siadogacinona creyentiaímo lloste. Jerusalémo Cristo oretagano, creyentiaína sedaraini diga, navui naicinona siadotimaci. Creyentiaí naie lluaana ñnollena, iena llocana jaidimaci.

5 Ie jira creyentiaí ñnocana jaidimaci. Nagarui ailluena comini creyentiaína jaidimaci.

Pablo nicairilla ra isoidena ciua rafue

6 Jusiñamui Joreño Asia railla eniruemo ie uaina naimaci llofuiana rairuilla jira, Frigia railla eniruemo macaricana jaidimaci. Iemona Galaciamo jaidimaci.

7 Misiamo naimaci rillano, Bitiniamo jaiacade; iadedi Jesús Joreño dane imaci jaillana rairuide.

8 Ie jira Misiamona ecido jaillano, Troas railla nairaimo jaidimaci.

9 Nainomo naie naiona Pablo nicairilla ra isoidena cide. Daje Macedonia imiedi uicomo naidaita naimiemo jica-jicanode. Raite: “Macedoniamo ruica o bi. Caina canuai bi”.

10 Naiena Pablo ciua mei, naie facaisemona Pablo diga jaidicue. Lucadicue. Ie jira bie rafuena raise uiñoticue, iena omo cuellena. Macedoniamo ruica dine cai jaille botena jenodicai. Comecina facadicaí: “Jusiñamuidi caina uaidote, nainomo ie mare rafuena cai llollena”.

Filipomo illa rafue

11 Ie jira Troamona Samotraciamo monaillaido atona ie mamedo jaidicai. Ie icoitidiruido Neápolis railla nairaimo ridicai.

12 Dinomona Filipomo duide naisodo jaidicai. Macedoniamo ite. Naie enirue facaise ie nanoca nairai Filipos. Naie nairaidi Romamona bitino nairai. Diga irui nainomo iticai.

13 Sábadoruido naie nairaimona nasedo jino jaidicai. Comecina facajamona: “Dinomo nibaí comini oficabidimaci, Jusiñamuimo jillena”, ille fuemo jaidicai. Nainomo dañaiñorie riñoniaí billanona, dinomo ana raicicai, naiñaiñuaimo Cristo rafuena llollena.

14 Naimacimona dañaiño cai llofuiana eo cacade. Naiñaiño mamecidi Lidia. Tiatira railla nairai íñaiño. Naiñaiñodi jiduirede iniruena fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño comeci naie lluaana feiñotade. Naie facaise creyentena jaide.

15 Naiñaiño ie jofomo itino diga bautizaja mei, caimo lloste:

—Cuedi cai Namana cue jai ñnuana omoi uifñuamona, cue jofomo mai bi, nainomo omoi fiebillesa. —Duere caina uai-uaidode.

¹⁶ Jusiñamuimo jiranomo jairuido jaidicaimo, daje jitaiñomo dafaifidicai. Naiñaiñodi jiañumona ibacañaiño. Janaba anamo naiñaiño jiai ite. Iemona naiñaiño jairuido sulle rafuena llouide. Naie rafuena luana ibatajano, naiñaiño namaiaidi ailluena ucubena feiñouidimaci.

¹⁷ Naiñaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omoi jilluana omoimo llocabitimaci.

¹⁸ Diga irui naiñaiñodi iese cuiri-cuirisoide. Icirillamona, Pablo abido dobaidacaida, naiñaiñomo ite Janabamo llote:

—Cue Nama Jesucristo uaido naiñaiñomona oni jai. —Iemona oni jaide.

¹⁹ Naiñaiño llumona ucubena jai ofenana naiñaiño namaiai jai uifñua jira, Pablo, iaimaiai Silas diga, gaitadimaci. Iaimaiaina plazamo illaicomini illanomo sonocana uitimaci.

²⁰ Dinomo iaimaiaina illaicomini dine atidimaci. Iese iaimaiaina llogidotimaci:

—Naie iaimaiaidi cai nairaiaina uri itatañediaimaiai. Iaimaiai judíuai comini.

²¹ Romanuai cominina cai illa jira, iaimaiai llogacinuaina cai ñnoia, iedo cai jaia, marañede.

²² Iena cacajano, nana comini naie iaimaiaina fanaisitimaci. Illaicominidi naie iaimaiai iniroina cuaranuanona duiñode. Rasi diga, iaimaiaina diga icaiño fatatatimaci.

²³ Iaimaiaina eo faja mei, cárcelmo jonetimaci. Cárcelna sedaraimamo iaimaiaina raise sedallena llotimaci.

²⁴ Iese llua jira, iaimaiaina llaveracomo fo iaimaiaina uite. Donoramo iaimaiai eilliai ñuitajano, raise donode.

²⁵ Naiona daferui facai Pablo, iaimaiai Silas diga, Jusiñamuimo ifuerillacinona ro-rodiaimaiai. Jiai jidíiaimaiai. Jiaie llavecana naiena cacadimaci.

²⁶ Jamai ebena illacinomona ñuisañodi suide. Cárcel illanodi jaidisite. Naie facaiseconi nana nasiaidi ecocorinaite. Ie dacaño nana llavecana imaci donua radi oni ecoride.

²⁷ Cárcelna sedaraima casidemo, cárcel ie nasia ecocorinaillana ciode. “Llavecano jai aisidimaci” raillamo naimie comecina facade. Ie jira ie lloesi aiñoicaida, dama abi faitaacade. “Illaicomini bia, ¿bue lloiticue?” raillamona comecina facade;

²⁸ Iadedi Pablodi eo riire cuirioide:

—¡O abina dama meineñeno! Bene nana iticaisa.

²⁹ Lamparina atillena cárcelna sedaraima jicajanona, jarire fo jaide, Pablo iaimaiai Silas dine. Jacinaillano, naimie abidi docaillamona, iaimaiai uicomo caiñici ifodo ana rainadate.

³⁰ Iaimaiaina jino ua mei, nai iaimaiaimo jicanote:

—¿Buena fñojiticue, cue jeacinomona cue jilloillena?

³¹ Uai otiaimaiai:

—Coco Nama Jesúsna ñno. Iese na o jofomo ite comini diga o jilloillesa.

³² Temei naimiena Jesús ie rafuena llofuetiaimaiai, nana ie jofomo itino diga.

³³ Naie facaise iaimaiai bofellañona jocode. Iemei naimiedi, nana ie comini diga, bautizaga.

³⁴ Guillena, ie jofomo naie iaimaiaina uite. Jusiñamuina jai ñnua jira, na ie comini diga, naimie caimare ite.

³⁵ Ie oni monaidemo, illaicomini di dajerie policiana cárcelmo oretatimaci, nai iaimaiaina jino orellena.

³⁶ Cárcel sedaraimadi naie rafuena Pablomo llote. Raite:

—Omico jaillena, illaicomini di omicono oredimaci. Mai marena jai.

³⁷ Iadedi policiamo Pablodi llote:

—Cocodi romanuai cominidicoco; iadedi cocomo ite rafuena raise uifnoeno cocona marefodo fatimaci. Cárcelmo cocona jonetimaci. Jai bainino cocona jino oretaiacadimaci. Iese jino jaiñeiticoco. Naimacimo llono: “Cocona jino ollena bi”.

³⁸ Illaicomini mo policias naiena lluaibitemo, illaicomini di naiena cacajanona, eo jacinaiete, romanuai cominina iaimaiaina jira. Cai nanoca illaicomini di romanuai nairai cominina jamai ebena duere finuana rairuidimaci.

³⁹ Ie jira naie iaimaia di illaicomini di jaidimaci, iaimaiaina: “Dama dino iesede” raillena. Jino atia mei, nairaimona jino iaimaia jaillena oredimaci.

⁴⁰ Cárcelmona jino billano, Lidia jofomo fo jaidiaiaiaia. Creyentiaina ciuano, naimaci comeiaina ocuifnotallena, naimacina dane llofuetiaiaiaia. Ie mei oni jaidiaiaiaia.

17

Pablo, iaiaiaia Silas diga, Tesalonicamo illa rafue

¹ Anfipolis railla nairaimo macaritiaiaiaia. Apolonia railla nairaimo macaritiaiaiaia. Ie mei Tesalónica railla nairaimo ridiaiaiaia. Dinomo judiaia ofiracodi ite.

² Pablo fibilla isoi, nainomo fo jaide. Daje amani sábadoruimo Jusiñamuina cuegafuaiaimona naimacina llofuate.

³ Iese naimacina llofuate:

—Cristo legi cacaite. Fiodaillamona naimie jilloite. Naimiedi Jesús.

⁴ Naiena cacadinomona ailluena inotimaci. Pablo, Silas iaiaiaia dibeimo jaidimaci. Jusiñamuina inote grieguaimona ailluena comini creyentiaina jaidimaci. Ie emodoconi ailluena nanocañaiñuaia di creyentiaina jiai jaidimaci;

⁵ Iadedi judiaia di uradoillano, jamai itinomona eo marañede iñiaina uaiduanona, ailluena cominina ofitatimaci. Ie jira naie nairai uri inedimaci. Iaimaiaina comini uicomo uillena, Jasón jofomo binaisite.

⁶ Iaimaiaina baiñenano, Jesóna, jiaie creyentia diga, illaicomini illanomo aifnoicaida uitimaci. Cuirisite:

—Naga nairaimo cominina uri itatañediaiaiaia. Benomo jai bitiaiaiaia. Jai benomo billanona, Jasón ie jofomo iaiaiaiaina feiñote.

⁷ Cai nanoca illaia ie llogacinona jai inofedimaci. Ie anamo jai iaicañedimaci. Raitimaci: “Jiaie illaia anamo itica. Jesús raillamie anamo itica”.

⁸ Judiaia ies llumona, comini di uri inedimaci. Illaicomini di jiai uri inedimaci.

⁹ “Naie iaiaiaia dane biñeitiaiaiaia” illaicomini mo creyentia raillano, illaicomini di Jasón jiaie creyentia diga, jino oretatimaci.

Bereamo Pablo, iaiaiaia Silas diga, illa rafue

¹⁰ Naie naio creyentiaia di Pablona, iaiaiaia Silas diga, Bereamo raire oretatimaci. Dinomo rillano, judiaia ofiracomo jaidiaiaiaia.

11 Nainomo ite judúuai eo mare. Tesalónicamo ite judúuai isoiñedimaci. Bereamo itinodi Cristo rafuena iocire feiñotimaci. Niedi uanaicinoni railanona, nagarui Jusiñamuina cuegafuina facadimaci.

12 Ie jira naimacimona ailluena inotimaci. Judúuaiñedinomona ailluena nanocañaiñuái inotimaci. Ailluena inñiai jiai inotimaci;

13 iadedi Bereamo Pablo Jusiñamui ie uaina jai lluana Tesalónicamo ite judúuaidi fidiano, dinomo jaidimaci. Cominina fuemo faillena, jaidimaci.

14 Naie facaise creyentiaidi Pablona oni oretatimaci. Monailai fuemo duide naisona oretatimaci. Silas, iaímaiaí Timoteo diga, fiebidiaímaiaí.

15 Pablo uigamací naimie diga Atenamo jaidimaci. Dane abido Bereamo jaidimacimo, naimacimo Pablo llote:

—“Silas, iaímaiaí Timoteo diga, raire cue dine billesa” llono.

Atenamo Pablo illa rafue

16 Atenamo iaímaiaí rillena Pablo sedademo, naie nairaimo ailluena jiraraiaína cide. Iena ciuanona, Pablo comecidi jeareficaide.

17 Naíena ciua mei, judúuai ofiracomo judúuai diga coniniri Jusiñamui rafuena siadote. Jusiñamuina jai inote judúuaiñedino diga coniniri iena jiai siadote. Plazamo nagarui jamai itino diga coniniri iena jiai siadote.

18 Jamai comecina facadinomona damierie naimie diga jiai ñaitimaci. Epicúreo railla rafuedo jaisoidimaci. Estoico railla rafuedo jiai jaisoidimaci. Damierie naimacimona raitimaci:

—¿Buena nai ñaillareuidimie caímo lloiacade?

Jiaíno raite:

—Jiaie nairai jusiñamuillaicaímo lloiacade isoide.

Jesús fodaillamona jilluana Pablodi llouilla jira, iese raitimaci.

19 Ie jira naimiena naimaci siadouillanomo uitimaci. Naie illano Areópagona mameciredede. Jicanotimaci:

—¿Nie isoide o comocinuai? Caímo llono, caí uñollena.

20 Eo feiredicinuaína cacadicaí. ¿Buena nai llofuaiacinodi llote? Iena uñoiacadicaí.

21 Nana Atenamo ite comini, jiaie illanomona bitino diga, jamai ailli como imaci fidia rafuena ñai-ñaidimaci. Jamai ailli fidia rafuena caca-cacadimaci. Jiaie rafuena finoñedimaci.

22 Jicanua mei, Areópago railla illanomo Pablo naidacaida llote:

—Atenas imaci, omoímo rafuena lloiacadicue. Omoí jusiñamuillaína eo sedacabidomoi.

23 Cue macarillamona, omoí jusiñamuillaína sedaja jiraraína ciodicue. Daje jiraraí abímo iese cuega: “Uiñoñega Jusiñamuina sedadicaí” cuega. Uiñoñeno naimiena sedadomoi. Ja omoímo naimiena lloiticue.

24 Jusiñamui biniéna jaie finode. Ie emodoconi Jusiñamuidi nana biniémo itinona jiai finode. Naimiedi mona ie Nama. Enirue ie Nama. Ie jira iima finoca jofomo naimie inede.

25 Naga jitaille rana naimiémo illa jira, naimiéna canonicicaí. Naimie nana cominina comuitate. Jiai nagarui jafaici caí uadi caímo iga. Uanai nana rana caímo iga.

26 Damiedemona nana cominina jebuitate, nana eniruemmo naimaci illena. Naimaci illa dinori naimie jonega. Naimaci illanomo naimie jiai jonega.

27 Iese jonega, naimaci naimiéna jenollena. Jenuano, nibai naimiéna baitimaci. Caímona naimie are inede.

²⁸ Naimie jaca illa jira, cai jiaí iticai. Jiaí cajedicai. Ie isoi omoi rafue lloraini jiaí llotimaci: “Naimie ie uruiaidicai”.

²⁹ Naimie caina comuitaja jira, Jusiñamuidi jirarai isoiñedena uiñoticai. Jusiñamuidi oromona finoca ra isoiñede. Platamona finoca ra isoiñede. Noficimona finoca ra isoiñede. Iima ie onolli diga finoca ra isoiñede.

³⁰ Cominidi abi uiñoñeno jeacino jae finouidimaci. Jusiñamui naimacina nia janafeñede; iadedi jai birui Jusiñamuidi nana cominina naga illanomo naimaci comeciai uai meidollena jitaide.

³¹ Naimaci comeciai uai naimaci meidoñenia, naimie jai lloga facaise, naimacina duere finoite. Naimacina duere finollena, ie Jitona jai fetode. Naimaci finoca rafuena naimie raise uiñuamona, naimacina duere finoite. Fiodaillamona Jesúsna naimie jai jilloitaja jira, iena uiñoticai.

³² Fiodaillamona Jesús jilluana cacajano, damierie jaisitimaci. Ieconí jianodi raite:

—Jiairuido o lluana dane cacajiticaí.

³³ Iemei naimaci motomona Pablo jino jaide.

³⁴ Naie cominimona damierie naimie dibeimo jaidimaci. Inotimaci. Naimacimona damie Areópagomo siadoudimie. Ie mamecidi Dionisio. Jiaíñaiño inote. Naiñaiño mamecidi Dámaris. Daje facaiseconí jiaie cominidi inotimaci.

18

Corintomo Pablo illa rafue

¹ Atenamona Corinto railla nairaimo Pablodi jaide.

² Nainomo Aquila raillamiena baisaide. Naimiedi judío imie. Ponto railla eniruedi naimie comuillano. Ie ai mamecidi Priscila. Naiñaiño diga Romamona como bitiaimaiaí. Romamona Claudio nana judíuai cominina jai oretate. Ie jirari bitiaimaiaí. Roma ie nanoca illaimadi Claudio.

³ Pablo iaímaiaí daje isoi maijia jira, Pablo iaímaiaí jofomo fiebide. Iaímaiaí conima diga maijide. Chivos itiraiaí ie nilla iniroina tiforisoidimaci, naiemona jofona finollena.

⁴ Naga sábadoruimo judíuai ofiracomo llofuete, judíuaina inotallena, judíuaiñedinona iena jiaí inotallena.

⁵ Macedoniamona Silas, iaímaiaí Timoteo diga, bitemo, Pablodi nagarui Jusiñamui uaina llofueuide. Judíuaimo: “Jesúdi cai Jilloitaraíma” llouide;

⁶ Ia naimie uaina inosiñedimaci. Jiaí naimie jinafomo jeare ñaitimaci. Naimaci comeciai jeare ciua jira, Pablo ie iniroina jaidinote, naimacina raillano:

—Daní omoi muidona Jusiñamui omoína duere finojite. Cue muidonañeite. Jai judíuaiñedino dine jaiticue, naimacina cue llofuellena.

⁷ Iese raillano, oní jaide. Justo jofomo jaide. Naimiedi Jusiñamuina inouidimie. Ie jofu judíuai ofiraco ecimo ite.

⁸ Crispodi, nana ie jofomo itino diga, cai Nama Cristona inote. Naimiedi judíuai ofiraco ie sedaraíma. Ailluena Corintomo ite comini creyentiaína jaidimaci. Ie meí naimacidi bautizaga.

⁹ Daje naíona Pablo nicairilla isoidemona, Pablomo cai Nama Jesucristodi lote:

—Mai jaciruiñeno. Faicaiñeno cue rafuena llocana jai.

¹⁰ O diga iiticue. Budi ona maraiñeno finoñeite. Bie nairaimo ailluena cominidi cue dibeimo jaitimaci.

11 **I**e jira daje año ie emodo seis fivui dinomo Pablodi fiebide, naimacimo Jusiñamui uaina llofuellena.

12 Corinto railla nairaidi Acaya railla eniruemo jainaiaside. Naie facaise Acaya ie gobernadori Galión. Naie facaiseconi damierie judíuai comini Pablona faiacadimaci. Galión dine naimiena uitimaci.

13 **Raitimaci:**

—Cai illaíma llogacino isoi bimiedi cominina Jusiñamuina sedallena llofueñede.

14 **Pablo uai oiacademo, judíuaimo Galióndi lote:**

—Judíuai, cacarei. Naimie marañede rafuena finodena, naimie omoina jifuetena, omoi lluomo nia cacarefidicue;

15 **iadedi jamaí naimie uaillai cuemo llotomoi. Omoi usumatiai micoriai mameciai cuemo jiai llotomoi. Omoi einamací llogacinuaina cuemo jiai llotomoi. Iena omoi coniniri siadotomoi. Bie isoide rafuena siadoiacañedicue.**

16 **Jemona naimiedi nainomona naimacina oni orede.**

17 **Ie mei Sóstenena gaitadimaci. Sóstenes ofiraco ie sedaraíma. Naimiena gobernador uicomo fanaisite; ia naifuena Galión niese nibañede.**

Antioquíamo Pablo abido jailla rafue

18 **Naífue suilla mei, nainomo Pablo are fiebide. Ie mei creyentiaína facaduano, Priscila iaímaiai Aquila díga, Siria railla eniruemo botedo jaide. Ie uai raise finuana uiñollena, Moisés micori llua isoi, Cencreamo rillano, ie ifogina rijiruda garetate.**

19 **Efesomo rillanona, iaímaiaína faínonocaide. Judíuai comini Jusiñamui rafuena siadollena, Pablodi judíuai ofiracomo fo jaide.**

20 **Are naimaci motomo fiebillena naimiemo jicanotimaci; iadedi Pablo dina uai ote:**

—Fiebiñeiticue—

21 **Naimacina facaduano, llote—. Jerusalémo jaiticue; iadedi Jusiñamui jitaia, dane omoi dine abido riiticue. —Iemei Efesomona jaide.**

22 **Cesareamo sijiano, Jerusalémo macarite. Creyentiaí dine jaide. Ie mei Antioquíamo jiai macarite.**

23 **Nainomo are fiebilla mei, Pablo dane jaide. Galaciamo macarite. Ie mei Frigiamo macarite. Nana creyentiaí imaci comeциаína ocuiñotacana jaide.**

Apolos illa rafue

24 **Ie facaise Efesomo Apolos raillamie Alejandría railla nairaimona ride. Judíuimie. Naimie eo raise llofueuidimie. Naimiedi Jusiñamui facaina lloraini micoriai cuegafuiai raise uiñote.**

25 **Naimiedi Jesús ie rafuena navui jai cacade. Ie começimona iena eo llote. Jesús rafuena raise llofue; iadedi naimie dama Juan micori ie bautizajana uiñote. Nana Jesús finoca rafuena nia uiñoñede. Jusiñamui Joreño feiñuana jiai uiñoñede.**

26 **Judíuai ofiracomo naimie llofuia, jacitaíñeno llofue. Priscila, iaímaiai Aquila díga, naíena cacadiáímaiai. Ie jira naimiena oni eneno uitiaímaiai. Ie uiñoñega rafuena eo raise naimiena llofuetiaímaiai.**

27 **Acayamo Apolodi jiaacana jira, creyentiaidi naimie começina ocuiñotajano, naimiena oresite. Acayamo ite creyentiaimo rabemo cuetimaci. Jusiñamui naimacina dueruilla jira, creyentiaína jai jaidimaci. Naimiena marena feiñollena iese cuetimaci. Nainomo naimie rillanona, creyentiaína eo canode.**

²⁸ Judíuai diga marefodo jiai eo ñaite. Iemona naimaci uai ollinodi iñede. Naimiedi Jusiñamui cuegafuiaimona Jesúdi cai Jilloitaraimana llofuate.

19

Efesomo Pablo illa rafue

¹ Corintomo Apolo nia ítemo, nairaiaí onifedo joide naído jailla mei, Pablo Efesomo ride. Dinomo rillanona, creyentiaína baite.

² Naimacimo jicanote:

—¿Cristona omoi ñnuaruímo Jusiñamui Joreñona feiñotomoi?

Uai otimaci:

—Jusiñamui Joreñona nia jaca cacaiñedicaí.

³ Dane jicanote:

—¿Ñie isoi omoi bautizagaomoi?

Uai otimaci:

—Juan micori lloga rafue facaina bautizagacai.

⁴ Pablo uai ote:

—Mare. Juan llote: “Omoi comeciaí iuaina meido. Iemei bautizallomoi”. Ie ifo meidoitímiena comini ñnollena llote. Jesúna ñnollena llote. Jesús rafuena omoímo raise lloiticue.

⁵ Iena cacajano, cai Nama Jesús díbeido bautizadimaci.

⁶ Naimacimo Pablo ie onollina joniamona, Jusiñamui Joreñona feiñotimaci. Ie mei naimaci uiñoñega nairaí uaido ñaitimaci. Jusiñamui Joreño naimacimo llua rafuena jiai llotimaci.

⁷ Nibai nana naimacidi doce iññiaí.

⁸ Sábadoruímo judíuai ofiracomo fo jaillano, naimie anamo naimaci illana Jusiñamui jitailla jira, Jusiñamui díbeimo naimaci comeciaí iuaina meiduana Pablodi jacitaiñeno eo llouide. Nainomo daje amani fivui fiebide.

⁹ Naimacimona jiaínodi Pablo uaina uaitatimaci. Jiai ñnoiacaíñedimaci. Naimaci ñnoñena íra, ofiracomo bitinomo: “Cristo rafuedi maraiñede” llouidimaci. Ie jira Pablodi creyentiaí diga naimacimona eneno oni jaide. Tiranno ie lloracomo nagarui Pablodi llofueuide.

¹⁰ Mena fiemona iese llofueuide. Ie jira diga Asia raila eniruemo ite cominidi cai Nama ie uaina cacadimaci. Judíuai cacadimaci. Judíuaiñedino jiai cacadimaci.

¹¹ Jusiñamuidi Pablona siño rafuena finotate.

¹² Duidinomo cominidi naimie jetaca pañueluaina uitimaci. Duidinomo naimie jetaca iniroina jiai uitimaci. Naiena jetajamona, duidinodi jil-lodimaci. Janaba anamo ítinodi jiai jillodimaci.

¹³ Naie facaise jamai macarisoidino ridimaci. Judíuai imaci. Naimacidi icoriraini. Jesús mameci llinuano, jananiaí anamo ítinomona jananiaína oni oretaiacadimaci. Jananiaímo raitimaci:

—Pablo llua isoi, Jesús muidona bimacimona oni jai.

¹⁴ Esceva ie siete jitotiaidi iese finoacadimaci. Escevedi Jusiñamui diga ñairaima.

¹⁵ Janabana oni oretaiacadimacimo, Janaba dinena uai ote:

—Jesúna uiñoticue. Pablona jiai uiñoticue; iadedi omoina uiñoñedicue.

¹⁶ Ieconí Janaba anamo ítimie naimaci emodomo daiacaide. Riire nana naimacina emodoficaide. Ie jira naie jofomona taímiaína jino aisidimaci. Naimacidi bofellaiaí diga jino aisidimaci.

17 Nana Efesomo itino iena fididimaci. Judíuái, judíuáiñedino diga, naifuena fididimaci. Naifuena fidianona, eo jacinaitimaci. Iemona cai Nama Jesús mamecidi are soride. Comini dinena: “Jesús uai eo siño” raitimaci.

18 Ie jira ailluena creyentiaidi billano, imaci navui marañede finoca rafuena Jusiñamuimo llotimaci. Icorilla rafuena finouidimaci. Iena marefodo llotimaci.

19 Ailluena icorilla rafuiai illabiaí atianona, marefodo jobaidimaci. Niga raifi rabiai jobaillana facadimaci. Cincuenta mil ucube diese facai rabiaína jobaidimaci.

20 Cai Nama Jesús uaina eo llocana jaide. Cominidi naie uai siñonana uiñotimaci.

21 Naie rafue illa mei, Pablodi começina facajano raite: “Macedoniamos cue macarillamona, Acayamos cue jiai macarillamona, Jerusalémo riacadicue”. Ie emodoconi naimiedi raite: “Nainomona Romamos jiai jaiacadicue”.

22 Naimie nia Asiamos nano nigarui illanona, mena canoraímana Macedoniamos oretate. Timoteona, iaímaiaí Erasto diga, oretate.

Efesomos ite comini marañede rafue finoacadimaci

23 Naie facaiseconi Pablo nia oni jaiñenia, Jesucristo rafue muidona Efesomos ite cominidi marañede rafuena comuitatimaci.

24 Demetrio raillamie platamona diga rana finouide. Naimiedi Diana ie jofe joreñuaina finouide. Naimie anamos ailluena majiuidimaci. Dianadi naimaci jusiñamui.

25 Naimie isoi majiuidinona Demetrio uaidote, nana naimaci danomos ofilena. Ie mei raite:

—Jai danomos ofidicai. Bie majiamona cai ucubena uana raise uiñotomoi;

26 iadedi Pablo raillamiedi diga cominina jai llofuite: “Comini finoca ranaíadi jusiñamuillaíñede”. Naie llofuiamona ailluena comini naimie díbeimos jaidimaci. Dama Efesomos iese suiñede; iadedi ua nana Asiamos iese suide.

27 Ie jira abina rairuicadicai, cai majiille faifi raillano, comini Diana jofona jiai sofeí raillanona. Cominidi naiñaiñona ebiruillana feítaitimaci. Naiñaiñori rajicaiñeitimaci. Dianadi eo ebirede jusiñamui. Nana Asiamos ite comini naiñaiñona sedacabidimaci. Uanaí nana bie eniruemos ite nairaídi naiñaiñona sedacabidimaci. Ie jira abina rairuicadicai.

28 Iena cacajano, eo iciritimaci. Riire cuiiriidimaci:

—¡Efeso ie Diana eo ebirede!

29 Danirie siaduamona, nana comini eo failliñaidimaci. Iemos nana comini dajena naimaci ofiracomo fo raire jaisite. Gayona, iaímaiaí Aristarco diga, gatajano uitimaci. Naie iaímaiaídi Pablo ie nabai iaímaiaí. Iaímaiaí comuilanodi Macedonia.

30 Pablo ofiracomo jiai fo jaiacade; iadedi creyentiaídi naimie fo jaillana rairuidimaci.

31 Illaicominimona damierie nabaiñiaí naimiemos fo jaillana jiai rairuidimaci.

32 Fo itinomona damierie daje rafuena ebena cuiiriidimaci. Jiaíno jiaífuena ebena cuiiriidimaci. Eo failliñaidimaci; ie iadedi bue ñellena naimaci ofillana raise uiñofñedimaci.

33 Comini motomona judíuái dinena damie uicomos oredimaci. Ie mamecidi Alejandro. Cominina llicaitallena, ie onolli jaidianona, cominimos lloiacade;

34 iadedi naimie judío imièna naimaci uiñuanona, nana daacaíño cuiiriidimaci. Mena horas raifi curi-curiidimaci:

—¡Efeso ie Diana eo ebirede!

³⁵ Iemei naie nairai rabe cueraimadi cominina llucaitatate. Naimaci llucaila meinoconi, naimie llucacinona cacadimaci. Raite:

—¡Cacareil! Cai nairaidi Dianana sedacabidicai. Naiñaiño ebirediñaiño. Naiñaiñona eruaide jiraraidi monamona jaie uaide. Iena jiai sedacabidicai. Nana bie eniruemo ite comini iena uiñotimaci. Bu naiena uiñonedimiena jaca iñede.

³⁶ Bu cue lluana jaca uaitañeite. Ie jira omoi llucai. Comeciai facañeno buena finoño.

³⁷ ¿Bue ñellena Gayo iaimaiai Aristarco diga, benomo atidomoi? Iaimaiaidi cai jusiñamui joreñoña ñaiñediiaimaiai. Naiñaiñona jeare finoñediiaimaiai.

³⁸ Demetrio, ie maijiraini diga, iaimaiaina llogidoiacania, cominina llogidoraco ite. Diga jueces jiai ite. Coniniri nainomo iena siado;

³⁹ iadedi jiai nicino omoimo ia, cai illaicomini ofia, buena siaduano, caimo lloitimaci.

⁴⁰ Birui bie rafue cai finua jira, illaicomini nibai caina duere finoitimaci. ¿Niese cai nibaille? Illaicomini caimo buena jicanoia, ¿niese raiticai?

⁴¹ Naie llua mei, ofidinona jino orede. Iemei jai jono tuudimaci.

20

Macedoniamo Pablo dane jailla rafue

¹ Efesomo ite rafue suilla mei, Pablodi creyentiaina uaidote. Naimaci comeциаina ocuiñotafuena llote. Iemei naimacina naimie facaduano, Macedonia railla eniruemo jaide.

² Nainomo ite nairaiaimo macarite. Comecina ocuiñotallena, naimacina llofuecana jaide. Iese Macedoniamona Grecia railla eniruemo risaide.

³ Nainomo daje amani fivui illa mei, Siriamo botedo abido jaiacade; iadedi judiuidi naimiena meineiacanana Pablo fidiano, Macedoniamo abido macarite.

⁴ Jiaino naimie diga jaidimaci. Sópater jaide. Naimiedi Berea nairai imie. Pirro jito. Aristarco, iaimaiai Segundo diga, jaide. Tesalónica nairai imie iaimaiai. Gayo naimie diga jiai jaide. Gayodi Derbe nairai imie. Timoteo naimie diga jiai jaide. Tíquico, iaimaiai Trófimo diga, jiai jaidiiaimaiai. Asia imie iaimaiai.

⁵ Coco uicodo naimaci jaillano, Troamo cocona sedadimaci.

⁶ Llomenico guillaruillai railla rafue fuilla mei, Filipomona jaidicoco. Monaillaido dabecuirorui coco jailla mei, Troamo naimaci diga dane danomo dafaifidicoco. Nainomo siete digarui fiebidicoco.

Troamo Pablo illa rafue

⁷ Domingoruimo Jesús fiodaillana começillena, danomo ofidicaimo, Pablodi caina llofuede. Icoiti naimie jaiacana jira, Pablo are ñaite. Naiona jitoma daferui illa facai nia ñaite.

⁸ Cai ofillanomo ailluena lampariniai ite.

⁹ Pablo are ñaia jira, daje coniruemo iniaicidi suide. Naie conirue mamecidi Eutico. Naimiedi ventanamo raide. Naimie eo inia jira, ventanamona ana uaide. Tercer pisomo a iticai. Nainomona eniruemo naimiedi uaide. Ana jibuisaibidemo, naimiena meniñocaidemo, naimie jai fiodaillana ciodimaci.

¹⁰ Ie jira Pablo ana jaide. Naimie emodomo jitadacaida, naimiena meniñote. Cominimo llote:

—Omoi rucaicueriño. Naimie cajede. Jafaicina nia faite.

11 Abido a jaidimaci. Jesús fiodaillana começillena, llomeniconona tairuano, cominimo Pablo fecade. Guilla meinomo, naimaci diga naimie are ñaite, monaiacademo. Ie mei oni jaide.

12 Nainomona conirue jai cajede uitimaci. Ie jira nana naimaci naimieri eo iobidimaci.

Mileto railla nairaimo Pablo jailla rafue

13 Pablodi Troamona Asón railla nairaimo arido jaiacana jira, botedo jaidicai. Iese uicomo Asónmo jaidicai. Nainomona Pablona botedo uia-cadicai.

14 Ie jira Asónmo naimiena cai baillanona, cai diga botemo bite. Ie mei Mitilene railla nairaimo jaidicai.

15 Nainomona dane monaillaido cai jaillano, ie areruido Quío railla nairaimo ruicafebellemo jaidicai. Dane ie areruido Samos railla nairai mamedo atona jaidicai. Ie areruido dane cai jaillano, Miletomo sijidicai.

16 Abi juarenia, Pentecostés railla rafue suilliruiamo naimie Jerusalémo iacade. Pentecostés trigo ua ie rafue. Pascua rafue illa meinocóni, cincuenta digarui illanona bie rafue ite. Asia railla enruemo naimie are iacaiñena jira, Pablo começina facade: “Efeso ecido monaillaido jaiticai”.

Efesomo ite creyentiai sedarainimo Pablo llua rafue

17 Creyentiaina sedarainina uaidollena, Miletomona Efesomo Pablo cartana orede.

18 Naimie dine naimaci rillanona, Pablo naimacimo llote:

—Asiamo nano cue rillaruimona, niese omoi diga nagarui cue illana uiñotomoi.

19 Cai Nama diga abina iedoñeno maijiuidicue. Eecana sure maijidicue. Judíuai cuena duere uiñodosia jira, ie facaiseconí dueredicue.

20 Cuemo ite marecinona omoimo jaca janoñedicue. Nana Jusiñamui rafuena omoimo jai lloticue. Omoi ofillanomo omoina llofueuidicue. Omoi jofuemo omoina jiai llofueuidicue.

21 Judíuaiña llofueticue. Judíuaiñedinona daje isoi llofueticue. Jusiñamui díbeimo omoi começiai iuaina meiduana lloticue. Cai Nama Jesúna omoi ñnuana jiai lloticue.

22 Jusiñamui Joreñodi cuena jai jaicaitaja jira, Jerusalémo birui jaiticue. Nainomo ramo cue jirille rafuena uiñoñedicue;

23 iadedi Jusiñamui Joreño naga nairaimo cuemo llote: “Llaveracomo ona gaitajano ona jonesite. Duere sefuitio”.

24 Cue ille ñnori are illemo começina facañedicue. Dama cue ille ñnori fuidoiacadicue. Cai Nama Jesúmona cue feiñoaga maijiana fuidoiacadicue. Mare rafuena omoimo lloiacadicue. Jusiñamui omoina duenaillana jiai lloticue.

25 Jusiñamui anamo omoi illa rafuena omoimo jai lloticue. Jai dane cue uiecona cioñeitomoi. Iena uiñoticue.

26-27 Cue uaina jaca janoñedicue; ia nana Jusiñamui uai omoimo lloticue. Ie jira cuemona omoi diga cue começi mare. Jusiñamui uaido omoi jaiñenia, cue muidonañeite.

28 Mai omoi abi rairui. Jusiñamui Joreñodi omoina creyentiaina sedatate. Naimacina raise seda. Jusiñamui díbeimo itinona llofue. Naimie Jito fiodailla muidona, naimacina ote, naimie iena.

29 Naimacidi toica llaudaiai isoidimaci. Nia abina raise uiñoñedimaci. Cue jailla meinocóni, taino llorainidi, janallari isoi, omoimo biite. Naimaci nana

omoi sedaca cominina ramo faite, danomo abido naimaci jaillena, jiconiai laudaiai gaitaja isoi.

³⁰ Omoimona uanaifediconona llorainidi iite. Creyentiaina ramo faitimaci, omoi llucinona fainonocaillena, naimaci dibeimo illena.

³¹ Ie jira abina rairui. Bie rafuena feitañeno. Daje amani fiemona nana omoina jai llofueticue. Naiona omoina llofueticue. Aremona omoina jai llofueticue. Omoina cue duenaillamona, eianona omoina llofueticue.

³² Mai. Cai Nama illa anamo omoina fainonocaiticue. Naimie uaimona naimie omoina duenaillana jai uiñotomoi. Naie uaidi omoina jai ocuiñotaite. Iemona Cristona iinocana jaitomoi. Nana naimie fetocano diga naimie illanomo ico jaca iitomoi.

³³ Jiaino ie ucubena jaca nicidoñedicue. Bu ie iniroillaina jaca jai oiañedicue.

³⁴ Cue jitaille rana dama cue maijiano oticue. Cue diga jaidino imaci jitaille rana jai dama cue maijiano oticue. Iena nana omoidi uiñotomoi.

³⁵ Iese cue illamona omoina llofueticue. Iese maijiano duerede cominina canocana jaiacadicaí. Cai Nama Jesús ie llogacinona uiñoticaí. Naimie raite: “Raruiaina cai feiñoia, iobidicaí; iadedi cai eo iobiacania, jiaonomo raruiaina fecadicaí”.

³⁶ Naie llua meino, naimaci diga caiñici ifodo rainadajano, Jusiñamuimo jide.

³⁷ Nana naimacidi eo eedimaci. Pablona caimaduanona, naimiena libanotimaci.

³⁸ “Cuena dana cioñeitomoi” naimacimo llua jira, eo sunaitimaci. Ieconí naimie diga botemo jaidimaci.

21

Jerusalémo Pablo jailla rafue

¹ Naimacina cai facadua meinoconi, suiñodicaí. Cos railla nairaimo atona jaidicaí. Ie are Rodas railla uiasimo ridicaí. Iemei Pátara railla nairaimo ridicaí.

² Nainomo Fenicia railla eniruemo jaiacade botena baiticaí. Nai botemo cai jailla mei, suiñodicaí.

³ Chipre railla uiasina cai ciojia, cai nabei dibeimo ite. Iemei Siria railla eniruemo jaidicaí. Tiro railla nairaimo sijidicaí. Botedo uiga raruiaina nainomo joneacadimaci.

⁴ Tiromo ite creyentiai cai baillanona, siete digarui naimaci diga iticaí. Jerusalémo naimiena judíuai meineñellena, nainomo naimie jaiñellena, Jusiñamui Joreño naimacina Pablomo llotatate.

⁵ Digarui illa meinomo oni jaidicaí. Naie nairaimona nana naimaci cai diga jaidimaci. Riñoniai, naimaci uruiaí diga, jaidimaci. Caiñici ifodo monaillai fuemo ana rainadajano Jusiñamuimo jidicaí.

⁶ Naimaci facadua meinoconi, botemo jaidicaí. Naimaci imaci jofuemo abido jaidimaci.

⁷ Tiromona Tolemaida railla nairaimo jaidicaí. Creyentiaina uaiduano, darui naimaci diga iticaí.

⁸ Ie are jaillano, Cesareamo cai ria, Felipe jofomo jaidicaí. Felipedi Jesucristo ie rafuena lloraima. Jerusalémo diáconuaina creyentiai jaie fetua faaise, Felipena fetodimaci.

⁹ Naimie dinomo fiebidicaí. Naimiemo cuatro jisa ite. Naiñaiñuái nia iima abina uiñoñede. Jusiñamui naiñaiñuaimo llucinona llocabitimaci.

¹⁰ Digarui nainomo cai illamo Judeamona damie bite. Naimie mameci Agabo. Jusiñamui facaina lloraima.

¹¹ Caimo ria, naimiedi Pablo cinturóna aiñode. Naie diga ie eillina maite. Ie onollina jiai maite raillano:

—Jusiñamui Joreño raite: “Jerusalémo judíuai illaicomini bie cinturón jainaoide iimana daje isoi maítimaci. Judíuaiñedinomo naimiena fecajitimaci” raite.

¹² Naiena cai cacajano, naie comini diga, Pablona caididicai, naimie Jerusalémo jaiñellena.

¹³ Pablo uai ote:

—¿Bue ñellena eedomoi? ¿Bue ñellena cue comecina ocuiñotañedomoi? Cue maiana jaca jitaídícue. Ua cue fiodaillana jaca jiai jitaídícue. Cue Nama Jesús muidona cue fiodaiadedi, damamai fiodaítícue.

¹⁴ Cai lloga uai naimie iñoñena muidona, raiticai:

—Cai Nama jitaílle rafuena finuana jitaídícai. —Iemei llicaidícai.

¹⁵ Nano nigarui illanona, cai raruaiana finuano, Jerusalémo jaidícai.

¹⁶ Cesareamo ite creyentiaimona jiaíno cai diga jaidímaci. Mnasón jofomo caina uitímaci. Naimiedi Chipre railla uiasi imie. Naimiedi nano bie rafue tainiamona creyente.

Jacobo diga Pablo ñaia rafue

¹⁷ Jerusalémo cai ria, creyentiaídi caina caimare uaidotímaci.

¹⁸ Ie are Pablo, cai diga, Jacobo dine jaide. Nana creyentiaína sedaraini nainomo jai ofidímaci.

¹⁹ Uaidua mei, Pablo nagacinuaido Jusiñamui judíuaiñedinomo finoca rafuena llote:

—Cue llofuiamona ailluena judíuaiñedinó creyentiaína jaidímaci —llote.

²⁰ Naie rafuena cacajano, Jusiñamuimo iobillacinona fecadímaci. Iemei naimiemo llotímaci:

—Ama, ero, judíuaiimona ailluena comini jai creyentiaína jaidímaci; ia nana naimaci Moisés micori llogacinodo eo jaidímaci.

²¹ O finoca rafuena jai fididímaci. Ona comini ñaiana jai fididícai. Jiaie nairai motomo ite judíuaiina Moisés micori llogacinona faínonocailana llofuetio. Naimaci uruiai abina deñenana llofuetio. Moisés micori llogacinuaido jaiñellena llofuetio.

²² Ie jira ¿niese nibaitícai? O rillana jai fididímaci.

²³ Ie jira omo cai lluaña fino. Cai ecimo cuatro iima jai ite. Nie isoide rafuena Jusiñamuimo jai llotímaci.

²⁴ Jusiñamui jofomo naimacina uiño. Naimaci diga Moisés micori llua isoi, o abi fino. Naie rafuena raise fuidollena, Jusiñamuimo fecallena, toica ocainaiaína naimaci facaina iba. Naie rafue omoi fuiduanona, omoi ifogina rijiruda gareitomoí. Ie mei nana comini mare rafuena o finocana jaillana uiñoitímaci. Moisés micori llogacinodo o nia jaillana uiñoitímaci. Iese omo lloiacadícai.

²⁵ Judíuaiñedinó Moisés micori llogacinodo jaillena lloñeitícai. Naimacimona creyentiaína jaidinomo navui cuetícai: “Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede iima diga iñeno” cuetícai.

²⁶ Pablo “Jee” raillanona, nai cuatro iima diga ie are Moisés micori llogacinona finuano, Jusiñamui jofomo jaide, naimie ie finoca rafue fuillarui

llollena. Jusiñamuimo nagamíai rana fecajaruina jiaí llote. Siete digarui illanona, Moisés micorí llua isoi, naie rafuena fuidoiacadimaci.

Pablona gaitaja rafue

²⁷ Naie siete iruillaí fuiacanuillaímo Asiamona damíerie judíuaidi bitimaci. Jusiñamui jofomo Pablona ciuano, comíni comeciaina feidocana uitimaci. Pablona gaitajanona,

²⁸ cuirriidimaci:

—Caimaci, caina cano. Bimie naga illanomo llofuiamona, comínina raise itatañede. Moisés micorí llogacínuaído jaiñede. Bifona raise sedañede. Judíuainedino bifomo atiano, bie mare jofo naimie jai jeare finode.

²⁹ Iese ite: Jerusalémo Trófimo diga Pablona ciodimaci. Trófimodi Efeso nairai imie. Judíuñedimie. Pablo naimiena Jusiñamui jofomo uillamo comecina facadimaci; iadedi uiñede. Judíuai comínimona judíuñedimie Jusiñamui jofomo jaillana marañede.

³⁰ Asiamona bitino cuirillamona, nana Jerusalémo ite comíni icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena jino sonodimaci. Ie mei Jusiñamui jofona sedaraini nasena ibaidimaci.

³¹ Pablona meineiacania, soldaduai ie comandantedi nana comíni ieillana fidide.

³² Ieconí naimiedi, ie soldaduai diga, nana ie illaicomíni diga, comíni dine aisicana bitimaci. Ie jira comínidi naimacina ciuano, Pablona fajana faionocaidimaci.

³³ Comandante naimiemo iaíreicaia, Pablona gaitade. Naimiena mena lloeo diga maillena llote. Jicanote:

—¿Bu naimiedi? ¿Bue ñete?

³⁴ Nana íeidinodi jiaíforie llotimaci. Ie jira naie rafuena naimie jaca uiñede. Ie muidona cuatelmo naimiena uillena llote.

³⁵ Cuartel tidabacuimo naimaci ria, comíni jarire jailla jira, soldaduai Pablona uitimaci.

³⁶ Ailluena comíni racadimaci. Ocuioisite:

—¡Naimiena meine!

Pablo ie abi riidua llua rafue

³⁷ Cuartelmo jaiacania, Pablo comandantemo llote:

—O diga ñaiacadíue.

Raijicaillamona, naimie uai ote:

—Griego uaido ñaitio—

³⁸ Jiaí llote—. Egipto imieñedio. Navui jobaime finodio. Jofue íñenanomo, cuatro mil comínina meinetinona uitio.

³⁹ Pablo uai ote:

—Naimieñedíue. Judío imiedíue. Ciliciamo ite Tarso railla nairaimona bitíue. Naie nairai mamecidi are soride. Comínimo cue llollena, omo jicanoíacadíue.

⁴⁰ —Jee —raite. Pablo tidabacui muidomo naidaide. Comínina llícaitallena, ie onollina jaidide. Comíni llícailla mei, Pablo judíuai uaido naimacimo llote:

22

¹ —Caimaci, einamaci, cue abi riiduacínomo mai omoí cacarei.

² Naimie judíuai uaido lluaana naimaci cacajano, llícaidimaci. Ie jira Pablo llote:

³—Judío imiedicue. Ciliciamo ite Tarso railla nairaimo jeicigacue. Bene omoi nairaimo escuelamo jaidicue. Gamalielmona fueoticue. Moisés micori llogacinuaina eo raise facadicue. Jusiñamui rafuedo birui omoi isoi jaidicue.

⁴ Jesucristo inotinona jaie eo duere finodicue. Diga creyentiaina maianona, cárcelmo joneticue. Iñiaina duere finodicue. Riñoniaina jiai duere finodicue.

⁵ Jusiñamui diga nanoca ñairaima cuena uiñote. Nana omoi illaicomini cuena uiñotimaci. Creyentiaina duere finollena, naimacimona dajerie cartana jaie feñoticue. Damasco ite judíuaimo cuetimaci. Damasco jaidicue, nainomo ite creyentiai maiano, Jerusalémo atianona, naimacina duere finollena.

*Pabloti Jesúna inuana llua rafue
(Hch 9.1-19; 26.12-18)*

⁶ Omoimo bie rafuena lloiticue. Jerusalémona jaidicue; iadedi Damasco cue iaieicaia, jitoma naidai iacania, ieconi monamona damie cue abina eo quetiñote.

⁷ Eniruemo ana uaidicue. Monamona damie cuemo llua cacadicue: “Saulo, Saulo, ¿bue ñellena cuena duere finodio?”

⁸ Jicanoticue: “¿Budío?” Monamona damie uai ote: “Nazaret ie Jesúsicue. Cuena duere finodio”.

⁹ Cue diga itinodi cue quetiñua rana cidimaci; iadedi cue diga ñaitimiena cacañedimaci.

¹⁰ Raiticue: “Nama, ¿bue ñeiticue?” Cai Nama cuena raite: “Naidadajanona, Damasco jai. Nainomo o finolle rafuena omo lloiticue”.

¹¹ ‘Cuena eo quetiñua jira, cioñedicue. Cue diga itino cue onollido llinocaida, Damasco cuena uitimaci.

¹² Nainomo Ananías raillamiedi ite. Jusiñamuina eo inote. Moisés micori llogacinuaido eo jaisoide. Nainomo ite judíuaidi naimiena: “Mare” raitimaci.

¹³ Naimie cuemo bite. Cuemo llote: “Saulo, ama, mai oni eroda”. Ieconi dane erodajanona, naimiena cidicue.

¹⁴ Naimie raite: “Cai usumatiai micoriai ie Jusiñamuidi ona fetode, naimie jitaille rafuena o uiñollena, ie mare Jitona o cioillena, naimie uaina o cacareil-lena.

¹⁵ Nana cominimo naimiena lloitio. Nana o ciua rafuena lloitio. Nana o cacaja rafuena jiai lloitio.

¹⁶ Mai cue llua ino. Naidadajanona, o jeacino oni dotallena, Jusiñamuimo jica. Ie mei bautiza” raite.

Judíuainedimonio Pablo jailla llua rafue

¹⁷ Ie mei Jerusalémo abido cue billa mei, Jusiñamui jofomo Jusiñamuimo cue jiaia, nicairiticue isoidicue.

¹⁸ Cai Namana cidicue. Cuemo llote: “Jerusalémona raie mai jai. Cominidi o cuena llua feiñoñeitimaci”.

¹⁹ Uai oticue: “Nama, naga judíuai ofiracomo ona inotinona fauidicue. Cárcelmo naimacina joneuidicue. Nama, Jerusalémo itino iena uiñotimaci.

²⁰ Esteban micori fiodailla facaiseconi nainomo iticue. Naimie o facaina lloraima. Naimie fiodailla jira, iobidicue. Naimiena meinetino iniroina sedadicue”;

²¹ Iadedi cue Nama cuemo llote: “Mai jai. Judíuainedimonio ona are oretaiacadicue”.

Comandante anamo Pablo illa rafue

22 Bie lloga dinori comini Pablo lluana cacadimaci. Iemei cuiroidimaci:

—Bie isoide ima illana benomo jitañedicaí. ¡Naimiena meine!

23 Cuirillamona naimaci iniroina jaidisite. Icirisiano enirruena jiaí fadosite.

24 Judíuai uaido cominimo Pablo llua jira, comandante iena cacaiñede; iadedi comini icirillana cuanona, naimie llote:

—Naimiena cuartelmo uño. Naimiena fano. Naimiemo ite rafuena caimo naimie lollena, naimiena duere fino.

25 Naimiena maiano naimiena fallena, Pablodi nainomo ite capitámo jicanote:

—¿Juez nia lloñenia, romano nairai imiema fajana mare? Romano nairai imiedicue.

26 Capitán iena cacajano, comandante dine jaide. Iena llote. Jicanote:

—¿Niese nibaiticaí? Bimie romanuai nairai imie.

27 Iena cacajano, comandante bite. Pablomo jicanote:

—¿O Romano nairai imiedio?

Pablo uai ote:

—Jii.

28 Comandante dinena raite:

—Romanuai nairai imiema cue jaillena, eo ibadícue.

Pablo uai ote:

—Romanuai nairai imiema jeicigacue.

29 Ieconí naimiena duere finoacadino naimiemoná raire oni jaidimaci. Pablo romanuai nairai imiema jira, naimiena jai ebena maia jira, comandante jiaí jacinaite. Comecina nibai facade: “Iese naimiemo cue finua jira, ie ibana ollena, cue illaimamo cuena jiaí llogidoite”.

Illaicomini motomo Pablo illa rafue

30 Comandantedi judíuai Pablona llogiduana ua raise uñoiacade. Ie jira ie are Pablona suiñollena llote. Jusiñamui diga nanoca ñairaini, nana judíuai illaicomini diga, ofillena llote. Pablona atiano, naimaci motomo uillanona, naimiena naidanete.

23

1 Ie abina riidollena, Pablo naie judíuai illaicomini motomo ite. Naimacimo eruaillano, Pablo raite:

—Caimaci, cuemoná nana cue illa dinori Jusiñamui jitailla rafuena finocabidícue. Naimiemoná cue comece mare.

2 Ananíadi Jusiñamui diga nanoca ñairaima. Pablo lluana naimie gaiñenamona, Pablo ecimo itinona Pablo fuena farotate.

3 Pablo dinena naimiemo llote:

—Jusiñamui o fuena faroite. Mareuidimiena abina caitadio. Moisés micori llogacínuaí muidona benomo itio, cuemo lollena; iadedi cue finoca rafuena raise o uñoñeno cue fue ebena farollena llotio.

4 Nainomo itino raite:

—Jusiñamui diga nanoca ñairaimamo jeare ñaitio.

5 Pablo uai ote:

—Moisés micori iena jaie cuiana uñotícue. “Illaicominina jeare ñaiñeno” cuete. Caimaci, naimie Jusiñamui diga nanoca ñairaima illana uñoñedícue. Uñotícuedena, naimiemo iena lloñedícue.

6 Cominimo Pablo eruaillamona, saduceuai railla comini nainomo illana ciode. Fariseuai railla comini nainomo illana jiaí ciode. Ie jira naimacimo ado llote:

—Caimaci, fariseo imiedicue. Fariseo imie jitodicue. Fiodaillamona ico jilluacino mo ocuriticue. Ie jira bene cuena llogidoiacadomoi.

⁷ Naimie iena lloia, naimaci comeciái daje isoi lloifedimaci.

⁸ Saduceuai cominidi fariseuai comini isoi inoñedimaci. “Fiodaillamona jilloñeticái” saduceuai comini raillana inoside. “Jusiñamui jaienisái ifede. Comini joreñuái ifede” raillana inoside; iadedi fariseuai comini dinena nana naie rafue illana inotimaci.

⁹ Ie jira eo faillifaidimaci. Fariseuai motomona jiaíno nidadajanona, llote:

—Bimiemo jeacino ifede. Jusiñamui jaienici naimiemo nibai jaie llua mona, bie rafue naimiemo ite.

¹⁰ Naimaci iese riire faillifaidimaci. Naimaci Pablona llagui raillano, comandantedi soldaduaimo cuartelmo naimiema uillena llote.

¹¹ Ie are naiona cai Nama Pablomo bairede. Raite:

—Comecina ocuiño. Jerusalémo cuena o llua isoi, Romamo cuena jiaí lloitio —raite.

Pablona meineiacana rafue

¹² Monaidemo, judíuaimona jiaíno comeciaina facadimaci: “Pablona nia cai meineñenia guñeticái. Jiroñeticái”.

¹³ Cuarenta baifemo ite comini iese comeciaina facadimaci.

¹⁴ Naimaci judíuai illaicomini dine jaillano, raitimaci:

—Dani comeciaina facadicaí: Pablona nia cai meineñenia, jaca buena guñeticái.

¹⁵ Omoi dine Pablona atillena, naimiemo eo raise jicanua isoi, comandantemo jicano. Pablo iaírei bia, naimiema cai meinellena, ocuidoiticaí.

¹⁶ Pablo enaise naie rafuena fidiano, cuartelmo jaide, Pablomo llollena.

¹⁷ Iena cacajano, Pablodi capitána uaidote. Raite:

—Bie coniruena comandante dine uiño. Naimie diga ñaiacade.

¹⁸ Ie jira naimiema uite. Raite:

—Cuartelmona Pablo cuena uaidote. Bie conirue omo atillena cuemo jicanote. O diga ñaiacade.

¹⁹ Naimie onollina comandante llinocaida, bai ie atianona, naimiemo jicanote:

—¿Bue cuemo lloiacadio?

²⁰ Naimie uai ote:

—Ico are Pablona illaicomini dine uillena, naimiemo eo raise jicanua isoi, omo jicanollena, judíuai dani comeciaina facadimaci.

²¹ Naimaci jitailla isoi finoñeno. Cuarenta digamie baifemo naimiema reiduaño sedadimaci. Llotimaci: “Guñeticái, jiroñeticái, Pablona nia cai meineñenia”. Naimacidi omo jicanolle rafuena o finollena sedadimaci.

²² Comandante coniruena facaduano raite:

—Jaca bumo cuemo o llua nalloñeno.

Félix dine Pablo oretaja rafue

²³ Comandante mena capitána uaidote. Llote:

—Doscientos soldaduaina uaido, imaci raruiaí finollena, Cesaremo navuida baife imaci jaillena. Setenta caballuaido jaitino uaido. Doscientos ducirainina jiaí uaido.

²⁴ Jiaie caballona ati, naie emodomo rainadacaida Pablo jaillena. Félix railla gobernador dine naimiema raise uiño —llote.

²⁵ Cartana jiaí cuete. Iese cuete:

²⁶ “Félix, omo cueticue. Claudio Lisiasdicue. Cai mare gobernadorio. ¿Nigacino? Cue uai o dine oredicue.

²⁷ Damie o dine oredicue. Judíuai naimiena meineiacana jira, soldaduai diga naimiena gaitataticue. Naimiena gaitataja mei, naimiedi romanuai nairai imienana fididicue.

²⁸ Judíuai illaicomini dine naimiena uiticue, naimaci llogiduacinona raise cue uifollena.

²⁹ Naimaci einamaci llogacinuai muidona naimiena llogidotimaci. Iena fididicue. Naimie jaca buena finoñede. Naimiena meinellena, naimie cárcelmo jonellena lloiacañedicue.

³⁰ Jiaíno naimiena dane meineiacanana fididicue. Ie jira o dine naimiena oretaticue. Ie llogidotino o dine jaillena jiaí lloiticue. Naimaci naimiena omo lloitimaci” cuete.

³¹ Comandante llua isoi, soldaduai naiona Pablona Antípatrismo uitimaci.

³² Ico are eillido jaide soldaduai cuartelmo abido bitimaci; ia Pablo cabaluaído jaidino diga oni jaide.

³³ Cesareamo railla nairaimo rillanona, gobernadormo cartana fecadimaci. Naimie dine Pablona jiaí uitimaci.

³⁴ Gobernador cartana facade. Ie mei Pablomo ie nairai illanona jicanote. Pablo uai ote:

—Cilicia.

³⁵ Gobernador dinena raite:

—O llogidotino bia, o rafuena cacajiticue.

Soldaduaímo jiaí llote:

—Omoi anamo Herodes railla illaíma micori jofomo naimiena seda.

24

Félix dine Pablo riidua rafue

¹ Dabecuirorui illa mei, Ananías bite. Naimiedi Jusiñamui diga nanoca ñairaima. Jiaie illaicomini diga bite. Tértulo raillamie jiaí bite. Naimiedi llogidoraima. Gobernadormo Pablona llogiduaíbitimaci.

² Pablona uaidua mei, gobernadormo Tértulo Pablo finoca rafuena llote:

—Félix, bie rafue omo lloiticue. Eo mareuidimiedio. O muidona eo uri iticai. Cai nairaina canollena, diga mare rafuena finodio.

³ Iobillamona, nana cai iena feiñoticaí.

⁴ Ona iciaañedicue; iadedi o fue maria jira, cue lluomo dallu cacarei.

⁵ Bimiedi eo cai abina aruire finode. Nana eniruemo ite judíuaina uri itatañede. Naimiedi Jesús raillamie rafuedo jaidino illaíma.

⁶ Jusiñamui jofona jeare naimie finoiacana jira, naimiena gaitadicaí. Moisés micori llogacinuaído naimiena duere finoacadicaí;

⁷ Iadedi comandante Lisias ride. Caímona naimiena riire bairode. Naimiena cai llogidollena, o dine cai billena caímo llote.

⁸ Pablomo o jicanoiacania, naimiemona bie rafuena uifioitio. Nana naimiena cai llogiduacinona uifioitio.

⁹ Judíuai illaicomini, Tértulo llua isoi, dacinodo llotimaci.

¹⁰ Iemei gobernador dinena Pablomo llote:

—Mai o facaina o ñaino.

Ie jira Pablo ñaite:

—Diga años cai nairai o anamo iticai. Ie jira cue abina riiduacinona omo marefodo lloiticue.

¹¹ Doce digarui illanona, Jerusalémo como birui ridicue. Iena uifioiacadiosa jiaie cominimo jicano. Jusiñamuina sedallena, Jerusalémo iticue.

12 Bu diga conima uaina jaca uaitañedicue. Jusiñamui jofomo uaina uaitañedicue. Judíuai ofiracuaimo uaina jiaie uaitañedicue. Naisomo uaina jiaie uaitañedicue. Cominina uri itatañenana lloñedicue.

13 Nie isoide rafuena cue finuana cioñedicue. Ie jira cuena raise llogidonidimaci;

14 iadedi jiaie rafuena lloiticue. Cai usumatiaie Jusiñamuina sedadimaci. Naimiena jiaie sedadimaci. Nana Moisés llogacinuaina inoticue. Nana Jusiñamuina lloraini micriai cuegafuaina inoticue. Bimacimona jiaie llogacinuaido jai jaidicue. Bimacimona uanañedicinodo jaidicue.

15 Fiodaillamona comini ico jilloillena inoticue. Jusiñamuina inotino jilloitimaci. Jusiñamuina inoñedinodo jiaie jilloitimaci. Beno itino iena jiaie inotimaci.

16 Ie jira marena iacadimaci, “Marañede rafuena Pablo finode” comini lloñellena, “Marañede rafue Pablo finode” Jusiñamui lloñellena.

17 Diga años Jerusalémo abido biñedicue. Jerusalémo ite dueredinona canollena, ucubena birui atidicue. Jusiñamuina jiaie sedajaibidicue.

18 Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue diga inede. Cominina iciritañedicue.

19 Naie facaise Asiamona jiaie judíuai bitimaci. Cuemo nicino ia, ¿bue ñellena naimaci bene biñedicue, cuena llogidollena?

20 Naimaci biacañenia, ¿bue ñellena bene itino bie rafuena raise lloiacañedicue? Naimaci motomo Jerusalémo cue ia, marañede rafuena cue finuana lloñedicue.

21 Navui naimaci motomo cue lloticue: “Fiodaillamona comini ico jilloitimaci”. Iena birui ñaitimaci. Ie jira cuena llogidoiacadimaci.

22 Félixdi Jesús dibeimo itino rafuena raise uñua jira, Pablo rafuena nairuido siadoiacañede.

—Comandante Lisis bia, dane omoi rafuena siadoiticue —raite.

23 Félix capitámo Pablo cárcelmo sedajana lloite. Naimiena mañellena jiaie lloite. Naimiena canollena, naimie nabaiñiaie naimie dine jaillena nairuñede.

24 Diga irui illa mei, Félix, ie ai diga, bite. Naiñaiño mameci Drusila. Naiñaiñodi judía inaiño. Pablona uaidua mei, Pablo llofuiana cacadiiaimaiaie. Jesúsna inuana cacadiiaimaiaie.

25 Jeacino finoñellena, dama ie jitaila rafuena finoñellena, jiairuido Jusiñamui ricaillafue anamo inellena cacadiiaimaiaie. Pablo llofuiamona Félix jacinaita. Ie jira raite:

—Jai macaibaite. Cue abi juarelliruido ona dane uaidoiticue.

26 Pablo jino jaille iballe ucubemo ocuride. Ie jira diga icaiño naimiena uaidote, naimie diga ñaillena.

27 Mena años illa mei, Porcio Festodi Félix ifo meidote. Félixdi judíuaina iobitaicana jira, cárcelmo Pablona fañonocaide.

25

Festomo Pablo llua rafue

1 Naie provinciamo darui amani rilla mei, Cesareamona Jerusalémo Festo jaide.

2 Nainomo Jusiñamui diga nanoca ñairainidi, jiaie judíuai illaicomini diga, Festomo Pablona llogidotimaci.

3 Festomo daje rafuena jicanotimaci, naimaci iena. Pablona Jerusalémo atillena jicanotimaci. Naiso motomo naimiena meinellemo comeciaina facadimaci.

⁴ Festo uai ote:

—Pablo Cesareamo fiebiite. Raire nainomo abido jaiticue.

⁵ Omoi illaicominimona damierie cue diga jaitimaci, nicino naimiemo ia, naimiena llogidollena.

⁶ Nibai ocho, nibai diez diga irui nainomo illa mei, Cesareamo naimie abido jaide. Ico are ie cominimo llouillanomo raide. Pablo atillena llote.

⁷ Pablo billa mei, Jerusalémona bite judíuái naimie ecimo ofidimaci. Diga fododicinona naimiena llogidotimaci; iadedi tainuaido llogidotimaci.

⁸ Pablo uai ote:

—Judíuái llogacinuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiai finoñedicue.

⁹ Iena cacade; iadedi Festo judíuaina iobitaacana jira, Pablomo jicannote:

—¿Jerusalémo cue diga jaiacadio? Nainomo nana bie rafuena siadoiticue.

¹⁰ Pablo uai ote:

—Llogidoracuo jai iticue. Cai nanoca illaíma facaina cominimo llotio, naimacina duere finollena. Benomo cue llotte. Judíuáimo jaca buena finoñedicue. Iena raise uiñotio.

¹¹ Romanuái railla nairái illaicomini llogacinona cue iñoñenia, damamei jearede rafuena cue finoia, cue fiódaillemo jaca ocuiridicue; iadedi cuemo nicino iñenia, cuena meinellena bu cuena judíuáimo fecañeite. Cue rafue naimie siadollena, Romamo cai nanoca illaíma dine jaiacadicue.

¹² Ie ecimo ite canoraini diga Festo ñaía mei, Festo raite:

—Cai nanoca illaíma dine o jaiacana jira, nainomo jaitio.

Agripamo Pablo lua rafue

¹³ Diga irui illa mei, Agripadi Festo dine, ie miriño Berenice diga, Cesareamo bitiaímaiaí. Agripadi naie enirue illaíma.

¹⁴ Diga irui nainomo itiaímaiaí. Naimiemo Festodi Pablo ie rafuena llote:

—Félix Pablona cárcelmo bene faínonocaide.

¹⁵ Jerusalémo navui cue ia, Jusiñamui diga nanoca ñairaimadi, judíuái einamací diga, naimiena llogidote. Naimiena duere finollena cuemo jicannotimaci.

¹⁶ Naimaci uai oticue: “Cai Romanos cominidi llogidogamiéna jamai tainomo duere finoñedicaí; iadedi llogidogamiéni ie llogidotino uai nano cacareiticaí. Ie mei ie abi riidollicinomo jiai cacareiticaí”.

¹⁷ Te jira naimaci cue dine benomo navui bia, ie are cominimo cue llouillanomo raideicue. Pablona cue dine uaidoticue.

¹⁸ Naimiena llogidotinodi lloia, naimiena marañede finoca rafue cue facaja isoi, llogidoñedimaci.

¹⁹ Dani naimaci iñuacina llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite.

²⁰ Bie rafuena raise cue uiñoñenia, naimiemo navui jicannoticue: “¿Jerusalémo jaiacadio, nainomo bie rafuena siadollena?”;

²¹ iadedi Pablo nainomo jaiacañede. Cai nanoca illaíma dine jaillena jicannote. Nainomo ie rafuena siadollena jitaide. Ie jira naimie sedajana lloticue, cai nanoca illaíma dine naimiena cue nia oretañenia.

²² Agripadi Festomo llote:

—Naimie ñaiana cacacadicue.

Festo uai ote:

—Ico are naimie ñaiana cacareitio.

²³ Ie jira ie are Agripa, iaímaiaí Berenice diga, gobernador ofiracomo bitiaímaiaí. Finobillano ebire bitiaímaiaí. Soldaduái imaci illaicomini jiai

bitimaci. Naie nairaimo ite nanoca comini jiai bitimaci. Ofilla mei, Festo Pablona atillena llote.

²⁴ Festo llote:

—Agripa, nana beno itino, bimiena ciodomoi. Jerusalémo ailluena judíuai naimiena llogidotimaci. Bene cue dine jiai bitimaci. Naimie meiniana eo jitaídamaci;

²⁵ íadedi naimiemo nicinodi iñenana jai uiñotícue. Naimiena meinellena cue llollena, nicinodi naimiemo iñede. Augusto dine naimie jaillena naimie jicánua jira, naimiena oretaitícue.

²⁶ Nicinodi nia iñede, cai illaímamo cue cuellena. Ie muidona omoi dine naimiena jai atidícue. Agripa, naimie ñaíamo raise cacarei. Naimiemo cai jicánua mei, nibai nicino naimiemo illana uiñotícaí. Iemona Augustomo cueíticai.

²⁷ Augusto dine llavecamié cue oretaia, naimiemo nicino iñenia, cuemona maraiñede.

26

Pablo ie abina dane riidua rafue

¹ Naie facaise Agripa Pablomo llote:

—Mai llono. O abi riiduacinona cacacadicue.

Pablo: “Jí” raillanona, ie onolli a ñuitade. Raite:

² —Agripa, bene o illa jira, cuemona mare. Cue fue baillafuedo o uicomo cue abina riidoítícue. Judíuai cominidi diga rafuena cuena llogidotimaci.

³ Nana cai judíuai rafuena raise uiñotío. Nana cai einamaci rafuena jiai uiñotío. Cuemo raise cacarei.

⁴ Jerusalémo naimaci motomo cue illa jira, diga judíuai cue coniruenamona cuena uiñotímaci.

⁵ Cuena naimaci lloiacania, fariseo imiena cue illana are uiñotímaci. Jiaie comini baífemo fariseuaidi cai einamaci llogacínuaína ñnotímaci.

⁶ Jusiñamuidi cai usumatíai micoríaimo fiodaillamona comini íco jilloillena jaie llote. Ie suillemo jai ocuiridícue. Ie jira llogidoracomu birui jai íticue.

⁷ Nagarui Jusiñamuina naimaci eo sedajamona, cai doce nairaidi naie llogacino suillemo jiai nia ocuiridímaci. Ore illaíma, bie ocuirillacino muidona judíuai illaicomini cuena llogidotímaci.

⁸ ¿Bue ñellena Jusiñamuidi comini fiodaillamona jillotajana ñnoiacaíñedomoi?

⁹ Jaie ie isoidícue. Nazaret ie Jesúsna ñnotinona diga jearede rafuena jaie finoacadicue.

¹⁰ Jerusalémo iena finodícue. Cárcelmo ailluena Jesúsna ñnotinona jonetícue. Jusiñamui diga nanoca ñairaini uaido iena finodícue. Naimacina meinelle cai illaicomini raia: “Jee” raisoidícue.

¹¹ Diga judíuai ofiracomu, diga icaiño, naimacina duere finodícue. Naimaci Jesúsna jeare ñaiana jitaídicue. Naimaci diga cue eo icirilla jira, jiaie eníruemo ite nairaimo jiai jaidícue, naimacina duere finollena.

Pablodi Jesúsna ñnuana llua rafue

(Hch 9.1-19; 22.6-16)

¹² Ie jira Damascocomu jaidícue. Jusiñamui diga nanoca ñairaini uaido jaidícue.

¹³ Ore illaíma, jitoma naidai ia, monamona quetiñotena ciodicue. Naidi jitoma baífemo quetiñote. Cue abina quetiñote. Cue diga itino abina jiai quetiñote.

14 Eniruemo cue ana uaiá, damie lluaana cacadicue. Judíuái uaido cuemo llote: “Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, riicaillamona raise maiga jurareta suíñoacana isoi. Ie isoidio. Riicaillamona, cuena duere finoacadio”.

15 Uai oticue: “¿Budiota?” Cai Nama cuemo llote: “Jesúdicue. Cuena duere finodio.

16 Mai a naidacai. Cue rafuena o llofuellena ona fetodicue. O birui cúa rafuena lloitio. Ona cue uíñotalle rafuena jiai lloitio.

17 Naimaci ona duere finoia, omoí comínimona ona jillotaiticue. Judíuáiñedinomona ona jiai jillotaiticue; iadedi judíuáiñedino dine ona oretaiticue,

18 naimaci comeciai tainomo iñellena. Tai fe anamona Jusiñamui anamo naimacina itataitio. Jeacino anamo naimaci birui illa jira, jitiredinomo jai itimaci isoidimaci. Jusiñamuina uíñuamona, useredinomo iitimaci isoidimaci. Iemei Jusiñamui naimaci jeacinona dotajite. Cuena naimaci iñuamona, nana cuena iñnotino diga cue illano ico jaca iitimaci”.

19 Ore Agripa, monamona cue cacaja rafuena iñnoticue. Jesúdi Jusiñamui Jitona iñnoticue.

20 Damasco itinomo iena nano lloticue. Ie mei Jerusalémo itinomo iena jiai lloticue. Diga Judeamo itinomo iena jiai lloticue. Judíuáiñedinomo iena jiai lloticue. Lloticue: “Omoí comeciamos iticinona meido, Jusiñamui díbeimo omoí illena. Omoí comeciamos iticinona omoí meidua mei, mare rafuena finocana jai”.

21 Ie jira judíuái illaicomíni Jusiñamui jofomo cuena gaitadimaci. Cuena meineiacadimaci;

22 iadedi Jusiñamui cuena canode. Ie jira birui bene iticue. Illaicomínimo beno nia lloticue. Illaicomíniñedinomo jiai nia lloticue. Dama Jusiñamui facaina lloraini micoriai ico suille cuegafuena birui lloticue. Dama Moisés micori ico suite cuegafuena jiai birui lloticue. Jiaie rafuena lloñedicue.

23 Jai e cuetimaci: “Cristo llegi cacajite. Fiodaillamona jilloite. Naimiedi nano dofoconi jilloitimie. Iemona cai judíuái comíni jeacinomona jilloillena uíñoitimaci. Iemona judíuáiñedino jeacinomona jilloillena uíñoitimaci”. Ie jira bie rafuena llocana jaidicue.

Creyentena Agripa jaillena Pablo jitaila rafue

24 Iese Pablodi abi riiduano, Festo riire llote:

—Pablo, odi uairico isoidio, eo comecina o facaja jira.

25 Pablo uai ote:

—Uairicoñedicue. Festo, odi cue illaimadio. Cue llucacinoi uanaicino. Ebena ñai-ñaiacaiñedicue.

26 Agripa cue lloga rafuena raise uíñote. Nana bie rafuena naimie jai uíñua jira, naimie diga marefodo ñaiticue. Bainino suiñede.

27 Ore Agripa ¿Jusiñamui lloraini cuegafuina iñnotio? omo jicanoticue. Iena o iñnuana jai uíñoticue.

28 Agripa dinena uai ote:

—Dallu o ñaiamona, cuena creyentena nibai itataiacadio.

29 Pablo uai ote:

—Nibai dallu ñaiticue. Nibai are ñaiticue; iadedi cue isoi o jaillana jitaidicue. Ua nana cue ñaiana cacadino cue isoi jaillana jitaidicue; iadedi omoí bie lleo diga maiana jitaiñedicue.

30 Iemona Agripa naidacaide, Festo diga, Berenice diga. Nana raídino jiai naidacaidimaci.

³¹ Jino jaillano, Pablo joreñona siadotimaci:

—Bimie jaca buena finoñede, naimiena cai meiniana lollena. Buena finoñede, cárcelmo illena.

³² Agripa Festomo llote:

—Naimie cai nanoca illaïma dine jaillana jicanoñedena, niadedi naimie jino marena oreca.

27

Romamo Pablo jailla rafue

¹ Italamo Augusto dine Pablo oretajana Festo llua mei, Pablona jiaie llavecano diga capitámo fecade. Naie capitádi Julio. Augustona mameciredede batallómo jainaïade.

² Adramitiomona bite botemo jaidicai. Naie bote Asia railla enirue igobiaïmo sijicana jaiacade. Aristarco cai diga jaide. Macedonia enirue imie. Naimie nairaidi Tesalónica. Suiñodicai.

³ Ie areruido Sidón railla nairaimo ridicai. Nainomo Juliodi Pablona marena sedade. Ie nabaiñiai dine Pablo ari jaillana rairuiñede. Ie jira naimacimona ie jitaille rana ote.

⁴ Iemei nainomona suiñodicai. Aifidi abido caina ati-atina jira, aifi raise iñenanomo, Chipre railla uiasi cai jarifebeïmo illa ecido jaidicai.

⁵ Cilicia railla enirue ecido monaillaido jaidicai. Panfilia railla enirue ecido jiai jaidicai. Mira railla nairaimo ridicai. Naie provincia mameci Licia.

⁶ Naie bote Roma dine jaifena jira, capitádi jiaie botena jenode. Capitádi Alejandríamona bite botena baite. Naie bote Italamo jaiacade. Ie jira naie botemo cai jonecaida, caina uite.

⁷ Diga irui fecuise sefuire jaillano, Gnido railla nairai iaïreïse ridicai. Aifidi abido caina ati-atina jira, Creta railla uiasimo jaidicai. Aifi raise iñenanodo Salmón railla nairai dine jaidicai.

⁸ Uiasi iaïreïse iese sefucana jaillanona, Maregobe railla illanomo ridicai. Lasea railla nairai jiai ianori ite.

⁹ Digarui cai faifilla jira, noci deïsoïlla facaise jai illa jira, jaillena eo jaciredede. Ie jira botemo maijidinomo Pablo llote:

¹⁰ —Nabaiñiai, cai jaillena eo jacirenana uiñoticue. Eo maraiñeno caïmo sefuiticai. Cai raruaïna nibai faifiticai. Botena jiai nibai faifiticai. Cai nibai jiai faifiticai —llote.

¹¹ Iese llote; iadedi naie bote piloto oni jaiacade. Naie bote nama jiai oni jaiacade. Capitán iaïmaïai lluaña Pablo lluaña baïfemo ïnote.

¹² Igobe maraiñena jira, rollime facaise illa jira, aïlluena comini nainomona jaiacadimaci. “Fenice railla nairaimo niedi riiticaï” raillano jaiacadimaci. Nainomo rollime facaiseconi iacadimaci. Fenice Cretamo ite. Naie igobedi jitoma billa beici dine eruaide.

¹³ Beici ñinena aifidi bia, “cai jitaïlla aifidi bite” raillanona, suiñodicai. Creta iaïrei monaillai fuemo jaidicai.

¹⁴ Ie mei raïre cai dine eo riïre aifi bite. Naie aifi noci deïsoïlla ñinena bite.

¹⁵ Botena oni uite. Botena atona eronenidicai. Ie muidona jamai ebena jaidicai. Aifidi caina iese uite.

¹⁶ Janorede uiasi fuemo aifi raise iñenanomo jaidicai. Nai uiasi mameci Claua. Faifinellena bote ie janorede nocae sefuire a aïñodicai.

¹⁷ A aïñua mei, rao diga botena ruica maiticai. Sirte railla conillie illanomo cai joodai raillano, velaïaïna ñuiñodicai. Iemei aifi jamai uigacai.

18 Ie areruido aifi riire illa jira, cargana oni dotadicaí.

19 Dane ie are bote ie raruiaí, caí onolli diga, oni dotadicaí.

20 Diga irui jitoma bainide. Diga irui ucuai jiaí bainide. Aifi eo riire nia ite. Cai jillobiñellemo jai ocuiriñedicaí.

21 Diga irui caí guiñena mei, Pablo naimacimo llote:

—Nabaiñiaí, cue uaina navui ñnotiomoidena, niadedi bie isoi sefuiñedicaí. Cretamo caí fiebidicaina, bie isoi sefuiñedicaí.

22 Omoi comeciaina ocuiño. Bie botedi faifite; iadedi caímona jaca buna faifiñeite.

23 Jaive naiona Jusiñamui jaienici di cuemo bairedi. Jusiñamuimo jainaiadicue. Naimiena sedadicue.

24 Naie jaienici cuemo llote: “Pablo, jaciruñeno. Romamo o nanoca illaima dine iitio. Jusiñamui ona duenaila jira, nana o diga jaidino jilloitimaci”.

25 Ie jira omoi comeciaina ocuiño. Cuemo llua isoi, naimiedi bie rafuena suitaiti. Jusiñamui iena finuana ñnoticue.

26 Nibai uiasimo jutadaiticaí.

27 Catorce digarui naio illamona, Adria railla monaillaimo jamai caí jaia, naiona daferui facai marineruaidi: “Enirue iaire ite” raillanona comeciaina facadimaci.

28 Ie jira ie afoředinona facadimaci. Veinte brazas aforede. Iemei nano nie dinori illamona, dane facadimaci. Quince brazas aforede.

29 Nofici illanomo naimaci bai raillano, fairillaillena, ie jillacimona cuatro lloelluna faitimaci. Mona monaille sedadimaci.

30 Naie faicase marineruaidi botemona aisiacadimaci. Ie jira botemo ite nocaena ana monaillaimo dotadimaci, bote jillacimona lloelluna faia isoi.

31 Iena ciuano, Pablo capitámo llote. Soldaduaímo jiaí llote:

—Botemo bimaci fiebiñeniadedi, jilloñeitomoi.

32 Ie jira soldaduaídi nocae maia raona jaitadimaci. Jai dinomo nocaena faínonocaidimaci.

33 Nia monaiñenia, Pablo nana caímo llote:

—Guiño. Catorce digarui illanona, jai guiñedomoi.

34 Ie jira guiño, omoi mairillesa. Ua faifiñeitomoi.

35 Iese naimie raillanona, Jusiñamuimo iobillacinona fecade, nana comini illa uicomo. Llomenicono tairuano, guite.

36 Nana naimaci comeciái ocuiñoacada, jiaí guitimaci.

37 Botemo doscientos setenta y seis diese iticaí.

38 Cai monillamona, fiebide trigona monaillaimo oni fadodicaí, bote meenaiñellena.

39 Ie oni monaidemo, erodatemo, naie eniruena uiñoñedicaí. Igobemo conillici illana ciodicai. Nainomo jamai ebena sijiacadicaí.

40 Ie jira lloelluna nainomo oni faínonocaidicaí. Datarabe maiana suiñodicaí. Vela aifimo sebiñoticaí. Monaillai fuemo enirue dine jai jaidicaí.

41 Iemei jaiciridifomo ridicaí. Eniruemo jodate. Bote muido eniruemo jai aire jodate. Eo baguamona jillaci taicosite.

42 Naimaci iamona jillobi raillano, soldaduaí llavecana meinea-cadimaci.

43 Pablona jillotaicana jira, capitán iena rairuide. Llote:

—Nano iana uiñotino diese monaillaimo ana daia. Eniruemo jai.

44 Jiaíno bote ie rabiçido juicaida icana jai. Jiaíno bote ie raruiaido juicaida icana jai. —Iese eniruemo nana marena ridicaí.

28

Maltamo naimaci illa rafue

¹ Jai cai jillua mei, Malta railla uiasimo cai illana uiñotícaí.

² Nainomo ite cominí caína marena feiñotímací. Iraina bonotatímací. Noci deilla jira, rosirena jira, irai ecimo agaillena caína uaidotímací.

³ Pablo reiena ua mei, iraimo jonete. Joniamona, jaio usirenamona, reigaimona jino bite. Naimiena ainide.

⁴ Jaio naimie onollido lliillana Malta cominí ciuano, coniniri ñaitímací:

—Ñibai bimie comena meinetímie. Monailaimona jillobide; iadedi jai bu naimeno ibadi oga.

⁵ Jaiona ciuanona, Pablo iena iraimo dotade. Iemei naimiemo jaca bue isoide rafue suiñede.

⁶ Comeciaina facadímaci: “Naimie onolli raire sirite. Iemei raire fiodaite”. Are sedaja mei, naimiedi jaca niese iñede. Ie jira dane comeciaina facajano raitímaci:

—Naimiedi ñibai Jusiñamui.

⁷ Naie illanomona uiasi illaíma enirue iaire ite. Naimie mamecidi Publio. Caína marena feiñote. Darui amani ie jofomo caína marena itatate.

⁸ Publio moo duide biide. Abi cuaride. Jeraina feide. Ie jira naimie dine Pablo jaide. Jusiñamuimo jia mei, ie onolli naimiemo joniano, naimiena jillotate.

⁹ Bie rafue suilla jira, naimie dine nana uiasimo ite duidino bi-bidímaci. Naimacina jillotate.

¹⁰ Ie jira caimo iobillacinona eo fecadímaci. Cai oni jaiadedi, cai jitailla ra caimo fecadímaci.

Romamo Pablo rilla rafue

¹¹ Daje amani fivui illa mei, Alejandriamona bite botedo jaidícaí. Naie uiasimo nana rollime facaiseconi naie bote ite. Mena jusiñamui iaímaíai joreño bote muidomo ite. Damie Cástorna mameciredede. Jiaímie Póluxna mameciredede.

¹² Naie botedo oni cai jaillanona, Siracusamo sijidícaí. Darui amani nainomo itícaí.

¹³ Nainomona jaillano Regiomo sijidícaí. Darui illa mei, aifi beici dinena billa jira, ie areruido Puteolimo ridícaí.

¹⁴ Sijia mei, nainomo creyentiaína baitícaí. Naimaci diga siete digarui cai illana jitaídímaci. Ie mei Roma dine jaidícaí.

¹⁵ Romamo nia cai riñenia, nainomo ite creyentiaí cai billana fidídímaci. Cai dine bitímaci. Foro de Apio railla nairaimo damierie bitímaci. Jiaíno Tres Tabernas railla nairaimo bitímaci. Naimacina ciuano, Pablodi Jusiñamuimo iobillacino fecade. Ie comecina jiaí ocuiñote. Cai diga Romamo jaidímaci.

¹⁶ Romamo cai ria, capitán llavecánona ie illaímamo fecade. Cárcelmo Pablona naie illaíma oreñede; iadedi Pablo ie íbauiga jofomo eneno oni orede. Aisii raillano, daje soldado nainomo naimiena sedade.

Romamo Pablo llofuiá rafue

¹⁷ Darui amani illa mei, Pablo Romamo ite nanoca judíuaína uaidote. Danomo ofilla mei, naimacimo llote:

—Caimaci, jaca buena cai cominimo finoñedicue. Cai einamací llogacínuaína jaca ñnotícue;

18 iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaillafue cuemo iñena jira;

19 iadedi judíuai: “Dama ite” railla jira, cai nanoca illaíma dine jaillena jicanoticue; iadedi cue nairai diga jaca iciriñedicue.

20 Omoi diga ñaillena, omoína cioacadicue. Fiodaillamona ico comini jillollena cue llofuecabilla jira, bie lloeo diga maigacue.

21 Uai otimaci:

—Judeamona jiaíno ona cuega cartana jaca feiñoñedicai. Caimo o rafuena llolena, jaca buna biñede. Bene jaca bu ona jeare ñaiñede.

22 Ie jira omona naie rafuena cacaacadicai. Naga illanomo comini o llofuiana uaitajana uiñoticaí. Creyentiaina jeare ñaitimaci. Iena fididicaí. Ie jira caimo iena raise llono.

23 Naimie dine dane billiruina llotimaci. Ie mei ailluena comini naimie jofomo bitimaci. Naimie anamo naimaci illana Jusiñamui jitailla jira, Jusiñamui díbeimo naimaci comeciái iuaina meiduana llofue. Moisés micorí llogacinuaimona, Jusiñamui facaina lloraini micoríái cuegafuaimona, Jesúsna llofue.

24 Jiaíno naimie llofuiana ñnotimaci. Jiaíno ñnoñedicaci.

25 Nana naimaci comeciaina daje isoi lloñedicaci. Iemona oni jaidimaci. Nia jaiñenia, naimacimo Pablo llote:

—Jusiñamui Joreñodi Isaías micorína cai usumatiamo raise llotatate. Omoi usumatiai micoríái illa isoi nia itomoi. Isaías micorídi omoína jai cuega rafue jai suide. Naimie micorí cuete:

26 Jusiñamui llote: “Bie comini dine mai jai.

Llono: ‘Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

27 Omoi comeciái jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisínidomoi isoidomoi. Siño rafuena jai cioiacaiñedomoi. Iena jai uiñoiacaiñedomoi.

Cue díbeimo iacaiñedomoi, omoína cue jilloitai raillanona’ ”.

28 Jusiñamui rafuena omoi ñnoñena muidona, judíuaiñedinodi Jusiñamui naimacína jilloitaiacanana jai fididimaci. Naimaci iena cacareitimaci.

29 Iese naimie llua mei, judíuaiði coniniri siadocana abido jaidimaci.

30 Mena años Pablo ie jofomo ite. Ie illa dinori naie jofona íbauide. Nainomo nana naimie dine bite cominína feiñote.

31 Naimie anamo naimaci illana Jusiñamui jitailla jira, Jusiñamui díbeimo naimaci comeciái iuaina meiduana llofue. Marefodo llofue. Naimiedi cai Nama Jesucristo rafuena llofue. Jaca budi naimie llofuiana rairuiñede. Teofilo, jaca digacino omo jai lloticue. Mai. Lucadicue.

ROMAMO ITE CRISTONA HNOTINOMO PABLO ORETAGA RABE

Romamo ite creyentiaimo Pablo cartana orede

¹ Romamo ite creyentiai, omoi dine cartana oredicue. Pablodicue. ¿Nigacino? Jesucristo dibeimo maijidicue. Jusiñamui fetocamiedicue. Ie mare rafuena cue llollena, cuena orede.

² Jusiñamuidi naimie facaina lloraini micoriaido bie rafuena jaie lloste. Naimaci micoriai iena jaie jiai cuega. Iemona birui facacabidicai.

³ Bie rafuedi Jusiñamui Jitona lloste. Naimie jaie ite usumadi cai illaïma David micori.

⁴ Naimie Jusiñamui Jitonana uifnoticai. Jusiñamui Joreño di siño rafuedo caina iena uifnotade. Jusiñamui Jito fiodaïllamona, Jusiñamuidi ie Jitona jillotate. Jusiñamui Jitodi Jesucristo. Cai Nama.

⁵ Caina duenaïllanona, caina oretate, naga nairaïaina naimiena ñnotallena, naimiena naimaci iobitallena.

⁶ Naimacimona itomoi. Naimiemo omoi duïllena, Jesucristo omoïna jai fetode.

⁷ Romamo ite creyentiai, Jusiñamui isiruiriganodomoi. Naimie isoi mareuidinona omoi illena, fetocanodomoi. Cai Moo Jusiñamui, cai Nama Jesucristo diga, omoïna duenaite. Iena uifnocana mai omoi jai. Iaïmaïai omoïna uri jai itatatiïaïmaïai. Iena omoi uifnocana mai omoi jai.

Roma dine Pablo jaiacade

⁸ Diga comini, diga illanuaïmo, Jesucristona omoi ñnuana jai fididimaci. Ie jira nano dofoconi omoi facaina Jesucristomo iobillacinona feaacadicue, Jusiñamuimo iena naimie fecallena.

⁹ Jusiñamuimo cue jiaïa, omoïri jiidicue. Jusiñamui iena uifnote. Naimie Jito rafuena cue lluanona, cue comecimona naimiena sedadicue.

¹⁰ Jusiñamuimo cue jiaïa, naimiemo jicadicue, cuena canollena. Naimie jitaïa, omoi dine ja mudomo cue riiticue. Iena jicadicue.

¹¹ Omoïna eo cioacadicue. Jusiñamui Joreño uai cuemo illamona, omoi comeciaina ocuifnotaiacadicue.

¹² Jesucristona omoi ñnuamona, naimiena cue ñnuamona, coninina cai comeciaina ocuifnotaiticai.

¹³ Cue amatiïaï, diga icaiño omoi dine jaiacadicue. Iena omoi uifnuana jitaïdicue. Jaiacadicue; iadedi nia jainidicue. Cuemona Jesucristo rafuena cacajamona, dajerie jiaïe nairaïai jai ñnotimaci. Omoi dine Jesucristo rafuena lluaïacadicue, iena omoïmona dajerie ñnollena.

¹⁴ Nana comini dine Jusiñamui oretagacue. Ie jira griego uaido ñaitinomo Jesucristo rafuena lloiacadicue. Griego uaido ñaïñedinomo iena jiaï lloiacadicue. Abina uifnotinomo iena lloiacadicue. Abina uifnoñedinomo iena jiaï lloiacadicue.

¹⁵ Ie jira omoïmo Jesucristo rafuena eo lloiacadicue.

Jesucristo rafue siño

¹⁶ Jesucristo rafueri iobidicue. Naie rafuedi siño. Jusiñamuidi naga iena ñnotinona naimaci jeacinomona jillotate. Juduaïdino nano iena cacadimaci. Ie mei juduaïñedinomo iena jai cacadimaci.

17 Naie rafuemonā Jusiñamui caina feiñuana uiñoticaí. Jusiñamui caina marebicaitajana uiñoticaí. Naimiēna cai ñnuamona iēna uiñoticaí. Jusiñamui facaina lloraima micorí jaie cuela: “Jusiñamuina ñnuamona marebicaidimiedi Jusiñamui ñbeimo ico jaca iite” cuela.

Comini jeacinona ñnoiadedi, dani naimaci muidona

18 Nana Jusiñamuina jitaññedinodí naimiē duere finollifue anamo jai itimaci. Iēna uiñoticaí. Jusiñamui caina iēna uiñotade. Maraññede rafue naimaci ñnuanona, Jusiñamui ie uanaicinona jamaidimaci.

19 Jusiñamui naimacina naimiēna uiñotaja muidona, imaci comeciāmona Jusiñamui illana uiñotimaci.

20 Enirue ñnuā facaisēmona naimiē ñnuca ramona naimiē illana uiñotimaci. Naimiēna cionidimaci; iadedí naimiē ñnuca ramona naimiēna uiñotimaci. “Naimiēna uiñotimaci” omoí raia, naimiēdí bu. Naimiē uai jaca siñonana uiñotimaci. Ie jira: “Jusiñamuina uiñoññedicaí” rainidimaci.

21 Jusiñamui uiñotimaci; iadedí naimiē uaina ñnoññedimaci. Naimiēmo comeciāna facaññedimaci. Naimiēmo iobillacinona fecaññedimaci; iadedí ebena comeciāna facacabidimaci. Naimaci comeciā jai tañnomo ite isoide. Jai marebificaññedimaci.

22 “Abina uiñoticaí” raitimaci; iadedí abina uiñoññedimaci. Jamai ebe isoidimaci.

23 Jusiñamui jaca ite. Naimiē uai siño. Naimiēna sedaacaññedimaci; iadedí jaie rana sedaacadimaci. Fiodairuide ñmana eruaide jiraraina ñnodimaci. Ofomana eruaide jiraraina ñnodimaci. Ocainana eruaide jiraraina ñnodimaci. Jaiona eruaide jiraraina ñnodimaci. Naie isoide jiraraina sedauidimaci.

24 Ie jira Jusiñamui naimacina ñañonocaide, naimaci jitailla jearede rafuena imaci finollena. Ie mei conini ñga eo meirede rafuena ñnuoidimaci.

25 Jusiñamui ie uanaicinona jitaññedimaci. Uañññedícinodo jaidimaci. Jusiñamui ñnuca rarí iobidimaci; iadedí naie rana ñnodimieri iobññedimaci. Ero, dani Jusiñamuimo iobillacinona jaca cai fecacabillasa. Uanaicinona lloticue.

26 Iese naimaci illa jira, naimaci jitailla meirede rafuena finollena, Jusiñamui naimacina ñañonocaide. Coniñona añfuedotimaci.

27 Naimaci jitailla jira, conimana añfuedotimaci. Naimaci maraññede ñnuca rafuemonā duere sefeuillemonā ñbana feiñotimaci.

28 Jusiñamuina naimaci uiñoiacaññena jira, maraññede rafuemo naimaci comeciā facallena, Jusiñamui naimacina ñañonocaide. Naimaci ñnorainiga rafuaina ñnuca jaidimaci.

29 Naga isoide maraññedícinona ñnuoidimaci. Naga isoide jearedícinona ñnuoidimaci. Jaie comini rana ññidoidimaci. Jaie cominina duere ñnuoidimaci. Jaia raconí uradoisoidimaci. Cominina jaca meinetimaci. Fuiriruidimaci. Jifuerisoidimaci. Jaie cominina jeare ñnuoidimaci. Eo ñaññaredimaci.

30 Jaie comini joreñona ñañoidimaci. Jusiñamuina jaca gaññedimaci. Cominina jeare ñañoidimaci. Abina iedoidimaci. Abina biríuidimaci. ñga jearede rafuemo comeciāna facauidimaci. Naimaci moo uaina ñnorainidimaci. Naimaci ei uaina ñnorainidimaci.

31 Ebena itimaci. Naimacina lloga uaina ñnorainidimaci. Jaie cominina isiruirainidimaci. Naimacina jai dueruirainidimaci. Iese jaisoidimaci. Iese ña jaicabidimaci.

³² Jusiñamuidi jaiie llote: “Bie isoide rafuena finodino iraimo jaca duere sefuitimaci. Cue illanomo jaca iñeitimaci” llote. Jusiñamui lluana uiñotimaci; iadedi naie rafuena finocana jaidimaci. Iena jaiie comini finoiadedi, iobillanona, “Macai mare iese imaci finua” raitimaci.

2

Jusiñamuidi maraiñede rafuena finodinona duere finoite

¹ Ero, omoi judíuaimona damie comecina nibai facade: “Bie isoide maraiñede rafuena finoñedicue. Iena finuamona, jaiie comini Jusiñamuimona duere sefuitimaci. Cue duere sefuiñeiticue” raillamo naimie comecina facade; iadedi naie isoide maraiñede rafuena naimie finua jira, Jusiñamui naimiena jiai duere finoite.

² Jusiñamuidi uanaicinona uiñuamona, maraiñede rafuena finodimiena duere finoite. Iena uiñotici.

³ “Jusiñamui duere finollicino anamona jilloñeitimaci” comecina facadio. Naimacimo o comecina o facaja isoi, naimaci isoi o finua jira, Jusiñamui ona jiai duere finoite.

⁴ Ona naimie duenaillamona, ona naimie duere finoacaiñellemona, o comecimo iticino marecinona meiduana naimie jitaide. Naimie dibeimo o illana naimie jitaide. Naiena jamaiñeno.

⁵ O comeci jaiairena jira, o comeci Jusiñamui dibeimo meidoiacaiñedio. Ie jira ico eo duere sefuitio. Ie riicaillifuemona Jusiñamuidi nana naimiena iñoñedinona duere finoite. Iena Jusiñamui finoia, Jusiñamuimona mare.

⁶ Nagamiai imaci finua ille dinori Jusiñamui naimacina duere finoite.

⁷ “Mare rafuena finocana jaidino cue illanomo jaca iitimaci” llote. Naimaci naimie isoi ebire iacania, naimiemona iobillacino naimaci jitaia, naimie illanomo naimaci jaca iacania, iese Jusiñamui llote.

⁸ Maraiñede rafuedo jaidino Jusiñamui duere finollicino anamo iitimaci. Dani imaci abina isiruitimaci. Uanaicinona iñoñedimaci.

⁹ Jusiñamui naga jeacinona finodimiena eo duere finoite. Judíuai comini ua duere finoite. Judíuaiñedinono cominina jiai duere finoite;

¹⁰ iadedi Jusiñamuidi naga mare rafuedo jaidimiena ebire itataite. Iobitaite. Uri itataite. Judíuaimo iese ua finoite. Judíuaiñedinomo iese jiai finoite,

¹¹ naga nairaina daje isoi naimie finua jira.

¹² Judíuaiñedinodi Moisés micori llogacino anamo iñedimaci; iadedi jeacinona naimaci finua jira, Jusiñamui naimacina duere finoite. Judíuai Moisés micori llogacino anamo itimaci; iadedi iena naimaci iñoñena jira, jiai jaca daje isoi duere sefuitimaci.

¹³ Moisés micori llogacinona cacajamona, Jusiñamuimona jaca buna marebicaide; iadedi iena iñuamona marebicaide.

¹⁴ Judíuaiñedinodi Moisés micori llogacino anamo iñedimaci; iadedi naimaci comeciai facajamona, marecinona finuana uiñotimaci. Marecinodo jaillana jiai uiñotimaci.

¹⁵ Moisés micori llogacino anamo naimaci illa isoi, naimaci comeciainona marecinona naimaci finoiadedi, iena uiñotimaci. Ie jira maraiñedinona naimaci finoiadedi, iena jiai uiñotimaci.

¹⁶ Biena llofuecabiticue. Ico Jusiñamui llua jira, Jesucristodi cominimo imaci comeciamo iticinona juez isoi llote. Maraiñedinona finouidinomo duere finollicinona llote. Marecinona finouidinomo duere finollicinona lloñeite.

Moisés micori llogacínodo judíuai comini raise jaiñedimaci

17 Abina iedumona, omoimona damierie raitomoi: “Judíuai imacídicaí. Moisés micori llogacínodo anamo cai illa jira, duere finollicinomona jilloiticaí. Jusiñamui cai diga ite” raitomoi. Iena omoi raillamona, abina iedotomoi.

18 Naimie jitailla rafuena uiñotomoi. Moisés micori llogacínodo omoi uiñuamona, marecinona finuana uiñotomoi.

19 Jusiñamuina uiñoñedinona llofueiacadomoi. Naimiena naimaci uiñoñena jira, jítiredinomo itimaci isoidimaci. Uanaicínodo naimacímoo omoi llumona, naimaci comeciaina lligaiñoiacadomoi. Naimacína uanaicínodo uiñotaicadomoi.

20 Jusiñamuina raise uiñoñedinona llofueiacadomoi. Naimacína abina uiñotaicadomoi. Naimie rafuena nia raise uiñoñedinona llofueiacadomoi. Moisés micori llogacínodo nana uiñuacínodo illa jira, naiemo uanaicínodo illa jira, iese iacadomoi.

21 Jiaie cominina llofueiacadomoi; iadedi ¿niese omoi comeciaino fueoiaicainedomoi? “Rana fiñeno” llotomoi; iadedi fiñdomoi.

22 Omoi aiñede riño diga iñenana llotomoi; iadedi ie isoi finodomoi. Jusiñamuina eruaide jiraraina gaiñedomoi; iadedi naie ra illanuaimona naie jiraraina fiñdomoi.

23 Moisés micori llogacínodo abina iedotomoi; iadedi iena omoi iñoñena jira, Jusiñamuina jeare finodomoi.

24 Iena Isaías micori jiaie cuete: “Omoi muidona judíuaiñedinodi Jusiñamuina jeare ñaitimaci” cuete.

25 Jusiñamui díbeimo jai omoi illana jiaie comini uiñollena, omoi abina detatadomoi. Moisés micori llogacínodo omoi iñoiadedi, omoi abina detatajadi mare; iadedi naicinona omoi iñoñena, abina detatañedino isoi jai itomoi. Jusiñamui díbeimo iñedomoi.

26 Moisés micori llogacínodo judíuaiñedino iñoiadedi, naimaci abina detatañena, Jusiñamuimona naimie díbeimo ite judíuai isoidimaci; iadedi abina detatañedimaci.

27 Moisés micori llogacínodo uiñotomoi. Omoi abiaína detatadomoi; iadedi Moisés micori llogacínodo judíuaiñedinodi iñua jira, Moisés micori llogacínodo omoi iñoñena jira, Jusiñamuimona omoi baifemo uaidimaci.

28 Omoi jeiciamona Jusiñamui ua cominiñedomoi. Omoi abiaína detatajamona, Jusiñamui ua cominiñedomoi;

29 iadedi omoi comeciái marena illamona, Jusiñamui ua cominidomoi. Abi detataja jira, Jusiñamui cominiñedomoi; iadedi omoi comeciái marena illa jira, Jusiñamui cominidomoi. Raise naimiena iñotinodi cominimona iobillacínodo feiñuana jitañedimaci; iadedi Jusiñamuimona iobillacínodo jitañedimaci.

3

1 Bie cartana omoi feiñuana, iena facallemona, damierie comeciaina faicite: “Judíuidicaí; ia naiemona, ¿niese jiaie comini baifemo faiticaí? Cai abiaína detataticaí; ia naiemona jaca buena oñedicaí”.

2 Ie jira omoimo lloiacadicue: “Judíuaina cai illana eo mare”. Jusiñamuidi dani caimo ie rafuena llote. Jiaie cominimo lloñede.

3 Cai cominimona dajerie Jusiñamui rafuena iñoñedimaci; iadedi Jusiñamuidi ie lloga rafuena jaca finode.

4 Comini tainona llotimaci; iadedi Jusiñamuidi uanaicínodo jaca llote. David micori iena jiaie llote:

O lloga uaimona uanaicínodo o llouillana uiñoticaí.

O finoca rafuena jiaie comini uaitaia, o dinena jaca anafenodio.
Iena uiñoticaí.

⁵ Dane damierie comecina facaite: “Jusiñamuidi mareuidimie. Cai baifemo uaide. Cai maraiñedinona cai finuamona caina Jusiñamui jitaia, jiaie cominidi Jusiñamui jaca mareuillana uiñoitimaci. Cai illa muidona Jusiñamuina iese uiñotimaci. Ie muidona naimiedi cai jeacino facaina caina duere finoñena, jiaie cominina naimiena cai uiñotaja jira”. Omoimona iese dajerie comeciaina facadimaci;

⁶ iadedi iese iñede. Cai jeacino facaina caina duere finoñeniadedi, Jusiñamuidi jiaie cominina jiai duere finonite.

⁷ Taino cue lloia, iena naimie oni dotaia, naimiedi mare rafuena finuana cominidi uiñotimaci. Ie mei naimiemo iobillacinona fecadimaci. Ie muidona Jusiñamui cue jeacino facaina cuena duere finoñena.

⁸ Omoimona dajerie cuena ñaitimaci: “Bimie raite: ‘Jusiñamui marecinona finuana raise cai uiñollena, maraiñedinona finocana cai jailla’”. Iese cue lloñena jira, Jusiñamui naimacina duere finoia, cuemona mare.

Jeacinona nana cai ñnodicaí

⁹ Judíuaidicaí; iadedi jeacinona nana comini finua jira, jiaie nairai baifemo faiñedicaí. Judíuaidicaí; iadedi jeacinona ñnodicaí. Judíuainñedinodi jeacinona jiai ñnodimaci.

¹⁰ Jusiñamui facaina lloraini micoriai iena jaie cuete: Marebicaidino jaca iñede. Nana comini maraiñedinomaci.

¹¹ Jaca buna Jusiñamuina raise uiñoñedinomaci. Naimiena raise uiñoicaiñedinomaci.

¹² Mare rafuedo nana jaiñedinomaci. Maraiñedinona ñnooidimaci. Jaca buna marecinona ñnoñedinomaci.

¹³ Jeare ñaicabitimaci. Tainona llocabitimaci. Naimaci ñaiamona diga jearede rafue comuicabide.

¹⁴ Naimaci fuiaí eo borede.

¹⁵ Icirillamona jiaie cominina raire meinetimaci.

¹⁶ Níne naimaci jaia, diga maraiñede rafuena comuitatimaci.

¹⁷ Uri illana uiñoñedinomaci.

¹⁸ Jusiñamuina jaciruiñedinomaci jaie iese cuete.

¹⁹ Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uiñuamona, dani abi imaci riidolle uai iñede. Nana comini Jusiñamui duere ñnollicino anamo itimaci. Iena uiñoticaí.

²⁰ Moisés micori lloga uaina ñnuamona, Jusiñamui jitaila isoi, jaca buna marebicaíñeite; iadedi naie lloga uaina cai uiñuamona, jeacinona cai finuana uiñoticaí.

Jesucristona cai ñnuamona jillobidicaí

²¹ Jusiñamuidi birui caina marebitatajana jai uiñotade. Moisés micori lloga rafuedo iena birui uiñoñedinomaci; iadedi Moisés micori iena jaie llote. Jusiñamui facaina lloraini micoriai iena jiai llotimaci.

²² Jesucristona cai ñnuamona, Jusiñamuidi caina marebicaitate. Nana Jesucristona ñnotinona marebicaitate. Nie isoide cominina cai ia, caina marebicaitallena, caina daje isoi feiñoite.

²³ Nana caidi jeacinona ñnodicaí. Jusiñamui caina jitaila isoi, marena iñedinomaci.

²⁴ Caina naimie duenaillamona, naimie jitailla jira, Cristo Jesúsna cai ñnuamona, caina marebicaitate.

²⁵ Jesucristo nia biñena facaise ite cominimo jeacino facaina Jusiñamuidi ñbana oñede. Naimaci jeacino facaina Cristo Jesús fiodaillena, cai facaina naimie fiodaillena, Jusiñamui naimiena oretate. Naimiena birui cai ñnoia, caina duere finoñeite. Jusiñamuina mareuidimiena uiñoticaí.

²⁶ Naimiena iese oretajamona, Jesúsna ñnotimiena Jusiñamuidi marebicaitaja jira, Jusiñamuina mareuidimiena uiñoticaí.

²⁷ Cai jeacinomona marena cai illena, buena finoñedicaí. Ie jira cai finuamona abi iedoñedicaí. Buena finoñedicaí; iadedi Jesucristona cai ñnuamona, jillobidicaí. Ie jira cai finoca rafueri abina iedoñedicaí.

²⁸ Moisés micori lloga uaina cai ñnuamona, marebicaiñedicaí; iadedi Jesucristona cai ñnuamona marebicaidicaí.

²⁹ Jusiñamuidi dani judíuai imaci Mooñede; iadedi naimiedi nana comini imaci Moo.

³⁰ Cai Moodi jaca damiena jira, naimiena naimaci ñnua jira, judíuaina marebicaitate. Naimiena naimaci ñnua jira, judíuaiñedinona jiai marebicaitate.

³¹ Cai ñnuamona cai marebicailla jira, Jusiñamui facaina lloraini micoriai jai lloga uaina caitañedicaí; iadedi iena ua ñnocana jaidicaí.

4

Abraham micorimona fueoticaí

¹ Abraham micori rafuena ja ñaiacadícue. Naimie marebicaillafuena omoimo lloiacadícue.

² Ie finoca rafuemonona naimie micori marebicaidena, naimie micori abina iedote; iadedi ie finoca rafuemonona naimie micori marebicaiñede. Ie jira Jusiñamuimona naimie micori abina iedoiacaiñede.

³ Iena Moisés micori jai euega: “Jusiñamuina Abraham micori ñnua jira, Jusiñamuidi naimie micorina jeacina jaca finoñedimiena isoitate. Naimie micorina marebicaitate” euega.

⁴ Maijillena buna damie ocuiadedi, ñbajana jamai fecañeite; iadedi maijia facaina fecaite.

⁵ Ero, ie maijiamona jaca bu jeacina jaca finoñedimiena isoicaiñede. Jusiñamuina naimaci ñnua jira, Jusiñamuidi maraiñedinona marebicaitate.

⁶ Bie rafuena David micori jai jai euega: Ie maijiamona bu marebicaiñena jira, Jusiñamui marebicaitagamiedi iocire iite.

⁷ Naimaci maraiñedinona Jusiñamui dotajamona, iocire iitimaci. Jusiñamui naimaci jeacina dane abido ietañeite.

⁸ Naie jeacinomo Jusiñamuidi comecina dane facañeite. Naimiedi jai feitaite.

Ie jira iocire iitimaci.

⁹ Dani abina detatino iocire illena lloñede; ia abina detatañedinomo iena jai lloite. Jusiñamuina Abraham micori ñnua jira, Jusiñamui naimiena marebicaitate.

¹⁰ Naimie micori abina nia detatañena, naimie micori marebicaide.

¹¹ Naimie micori marebicailla mei, Jusiñamui dinena Abraham micorimo abi detatajana lloite. Abraham micori ie abina detatajamona, Jusiñamuina naimie micori ñnuana uiñoticaí. Ie abina detatajamona, judío imiena jai jai; iadedi Jusiñamuina ñnuamona, naimie micori marebicaide. Ie jira

Abraham micoridi nana Jusiñamuina ñnotino moo. Nana comini abiaina detatadimaci; iadedi naimaci ñnua jira, Jusiñamui naimacina marebicaitate.

12 Cai comini abiaina detatatimaci; iadedi cai moo Abraham micori isoi naimaci ñnua jira, Abraham micori isoi marebicaidimaci. Ie jira Abraham micori nana naimaci moo.

Abraham micori ñnuamona, Jusiñamui lloga uaidi suide

13 Abraham micorimo Jusiñamuidi: “Nana enirue omo iiticue” lloste. “O uruaimo iena jiai iiticue” lloste. Moisés micori llogacinona Abraham micori ñnua jira, iese Jusiñamui lloñede; iadedi Jusiñamui lloga uaina Abraham micori ñnua jira, iese Jusiñamui lloste. Abraham micori ñnua jira, Jusiñamuidi naimiëna marebicaitate.

14 Moisés micori lloga uaina ñnotinomo: “Nana eniruena omoimo iiticue” Jusiñamuidi llotena, Jusiñamuina ñnotino tainona ñnotimaci. Jusiñamui lloga uai jiai jai saide; iadedi iese iñede. Dani naimiëna ñnotinomo: “Nana eniruena omoimo iiticue” lloste.

15 Moisés micori lloga uaina naimaci raise ñnoñenia, Moisés micori lloga uaido jaidino Jusiñamui riicaillifue anamo itimaci; iadedi Moisés micori lloga uai iñedena, Jusiñamuimona buna duere sefuiñeite.

16 “Eniruena omoimo iiticue” naimiëna ñnotinomo Jusiñamuidi lloste. Duenaillamona lloste. Nana Abraham uruia; micoriaimo iena lloste. Dani Moisés micori lloga uaido jaidinomo lloñede; iadedi Abraham isoi ñnotinomo jiai lloste. Abraham micori isoi cai jailla jira, naimiedi cai moo.

17 Jusiñamui iena jaie lloste: “Ona diga nairai imaci moona jai itataiticue” lloste. Jusiñamui fiодaitinona jilloitarede. Nia iñede rana ie uaido jiai comuitate. Ie jira Jusiñamui Abraham micorimo lua isoi, suide. Jai fiодaitino illa isoi Abraham micori abi illa jira, Jusiñamui naimie abina mairitate. Ie ai oiniñomo urue comuillena lloste.

18 Jusiñamui Abraham micorimo jiai lloste: “Ailluena uruia; omo iite. Diga nairai omona jebuite” lloste. Abraham micoridi naie ñnorainiga rafuena ñnote.

19 Jaca ñnote; iadedi cien años naimie micorimo illamona, naimie jai eirroma. Naimie micori aidi, Sara micoridi, oiniñona jira, nairaiñi uruedi comuñede.

20 Abraham micoridi Jusiñamui llua ñnote. ñnocana jaillano, iobilacinona Jusiñamuimo fecade.

21 Abraham micoridi Jusiñamui lloga uaina finuana eo ñnote.

22 Ie jira Jusiñamui naimiëna marebicaitate.

23 Naie rafue jaie cuela; iadedi dama Abraham micorimo duiñede;

24-25 iadedi caimo jai duide. Jusiñamuina ñnotinona marebicaitate. Cai Nama Jesús fiодaillamona, Jusiñamuidi naimiëna jillotate. Cai jeacino facaina fiодaite. Caina marebicaitallena, naimiëna jai jillotate.

5

Jai cai marebicaidicai

1 Jusiñamuina cai ñnuamona cai marebicaila jira, Jusiñamui diga uri iticai. Cai Nama Jesucristo finoca rafue muidona, Jusiñamui diga uri iticai.

2 Jesucristo muidona Jusiñamui caina duenaillamona, caina marebicaitate. Naimie ebirena isoi cai illemo caimare ocuridicai;

3 iadedi duere cai sefuiadedi, jiai iobidicai. Duere sefuillamona, cai comeciai ocuñocana cai jaillana uifnoticai.

⁴ Cai comeciaí ocuiñuamona facacifidicai. Facacifillamona, Jusiñamuimo ocuridicai.

⁵ Jusiñamui caina isiruilla jira, tainomo ocuriñeiticai. Ie Joreño caimo fecade. Ie Joreño cai comeciaimo illa jira, ie Joreño Jusiñamuidi caina naimie caina isiruillana uñotade.

⁶ Cai jeacinomona daní jillonidicaimo, Cristo cairi fiodaite. Maraiñedicai; iadedi naie facaiseconi cairi fiodaite.

⁷ Maraiñedimie facaina caimona jaca buna fiodaiacaiñede. Caimona nibai damie maremie facaina fiodaite; iadedi nana comini iese fiodaiacaiñedimaci. Maraiñedimie facaina jaca buna fiodaiacaiñede;

⁸ iadedi nia maraiñedicaimo, Jusiñamui caina isiruillamona, Cristo cairi fiodaite.

⁹ Cristo cairi fiodaillamona, jai marebicaidicai. Ie muidona Jusiñamui caina duere finuacinomona Cristodi caina jillotaite.

¹⁰ Cai dinena Jusiñamuina cai enoilla facaiseconi naimie Jito cairi fiodailla muidona, ie Jito jillua muidona, Jusiñamui caina jai nabaide. Naimie caina nabailla jira, cai ico jilloillena raise uñoticaí.

¹¹ Cai Nama Jesucristo muidona, Jusiñamui iobidicai. Cristo muidona Jusiñamui diga uri iticai.

Adán micori finoca rafue

¹² Bie rafue jai suide. Adán micori jeacina finuamona, nana caimo jeacinodi jai comuide. Jeacino caimo illa muidona, cai jeacino ite diga nana fiodaicana jaidicai.

¹³ Moisés micori llogacino nia iñenia, jeacina finodimaci; iadedi Moisés micori llogacino nia iñenia, Jusiñamuidi jeacino facaina ibana ofede.

¹⁴ Moisés micori llogacino nia iñenia, Adán micori facaisemona Moisés micori facaisemo naimaci jeacino ite diga nana comini fiodaicana jaidimaci. Adán micori isoí jeacina finodimaci; iadedi fiodaicana jaidimaci. Adán micoridi Cristo isoíñede. Adán micori finoca rafuemona jeacino comuide. Cristo finoca rafuemona Jusiñamui cai jeacina oni dotade.

¹⁵ Adán micori finoca rafuedi Jusiñamui finoca rafue isoíñede. Adán finoca rafuemona cai jeacino ite diga nana cai fiodaicana jaidicai; iadedi Jusiñamui finoca rafue Adán micori finoca rafue baifemo faite. Jusiñamui jitailla jira, caina naimie duenaillamona, cai dine Jesucristona orede, nana cai jilloillena.

¹⁶ Dama Adán micori jeacina finuamona, Jusiñamuidi nana caina duere finollicino anamo itatate; iadedi Jesucristo fiodaillamona, Jusiñamui jitailla jira, caina marebicaitate. Ailluena jeacina finodicai; iadedi marebicaidicai.

¹⁷ Dama Adán micori jeacina finuamona, cai jeacino ite diga nana cai fiodaicana jaidicai. Jusiñamui caina eo duenaillamona, Jusiñamui caina marebicailamona, dama Jesucristo muidona, Jusiñamui diga jaca iticai.

¹⁸ Dama Adán micori muidona, nana comini duere finollicino anamo itimaci; iadedi dama Jesucristo finoca mare rafuemona Jusiñamui diga naimaci jaca illena, nana comini marebicairidimaci.

¹⁹ Adán micori Jusiñamuina iñoñenamona, nana comini jeacina finodimaci. Jesucristo Jusiñamuina iñuamona, ailluena comini marebicaitimaci.

²⁰ Jusiñamui Moisés micorimo rafuena llote. Iena comini iñoñenamona, diga jeacina naimaci finuana uñotimaci. Jeacina finocana jaidimaci; iadedi Jusiñamuidi naimacina eo duenaite.

²¹ Jeacino anamo jaie nana cai illa jira, cai jeacino ite diga fiodaicana jaidicai; iadedi Jusiñamui duenaillacino anamo birui iticai. Ie jira cai mare-bicaillamona, cai Nama Jesucristo muidona, Jusiñamui diga jaca iiticai.

6

Jesucristomo cai duillamona, jeacino anamo jai iñedicai

¹ Jeacino anamo jai iñedicai; iadedi omoimona damierie comecina facaite: “Naga icaiño jeacino cai finoia, caina Jusiñamui duenaillamona, cai jeacinona oni dotade. Naimie caina duenaicabillana raise cai uiñollena, jeacino eo finocana jaiticai. Iemona cai jeacinona oni dotajamona, naimie caina duenaillana eo raise uiñoiticai”.

² Iese comecina facañeno. Jeacino anamo jai cai iñena jira, jeacinona finocana cai jaiñena.

³ Biena uiñotomoi. Cristo Jesús díbeimo cai illamona, nana caidi bautizagacai. Cristo fiodailla jira, cai comeciáimo ite jearedicino anamo jai iñedicai.

⁴ Cristo fiodailla jira, raiafomo naimiena jonetimaci. Cristo fiodaillamona ie Moo uaido jillode. Naimie díbeimo cai illamona, cai jeacino anamona jillodicai. Cai comeciáimo jiaie rafue birui illa jira, jiaie rafuedo jai jaidicai.

⁵ Cristo fiodaite; iadedi naiemona jillode. Naimie díbeimo cai illanona, cai comeciáimo ite jearedicino anamona cai jillua jira, Cristo ie mare rafue anamo birui iticai.

⁶ Cristo fiodailla jira, cai comeciáimo ite jearedicino anamo jai iñedicai. Caimo jai jainaiañena jira, jeacino finocana cai jaiñena.

⁷ Jeacino anamo jai cai iñena jira, jeacinona finocana cai jaiñena.

⁸ Cristo fiodaite; iadedi jillode. Naimie fiodailla jira, cai jearedicino anamo jai iñedicai. Naimie jillua jira, jiaie rafuedo birui jaidicai.

⁹ Fiodaillamona Cristo jillua jira, naimiedi dane fiodañeite. Naimie fiodaitemo, cai jeacino facaina naimiedi jai fiodaite. Jai dane fiodañeite.

¹⁰ Jeacino facaina jeacinona oni dotallena, naimie dcañño fiodaite; iadedi ie Moona jaca lobitajonona, naimie ie Moo díbeimo jaca iite.

¹¹ Ie jira jeacino anamo iñenanomo omoi comeciáina faca. Cristo Jesús díbeimo jai omoi illanona, Jusiñamui jitailla rafuena finollemo omoi comeciáina faca.

¹² Jeacinona finocana jaiñeno. Omoi comeciáie jeacinona finoacania, iena iinoñeno.

¹³ Jeacinona omoi finoñellena, omoi comeciáina ocuiño. Mare naimie jitaillacinona omoi finollena, Jusiñamuina iino. Jeacino anamo jaie omoi illa jira, naimiemo omoi nia duiñena jira, Jusiñamuimona fiodaiteño isoidomoi; iadedi jeacino anamo birui omoi iñena jira, naimiemo omoi jai duilla jira, Jusiñamuimona fiodaillamona jai jillodino isoidomoi. Jaie naimiemo duiñedomoi; ia birui naimiemo jai duidomoi.

¹⁴ Moisés llogacinuai anamo omoi jai iñena jira, jeacino anamo jai iñedomoi. Jeacinona finocana omoi jaiñellena, Moisés micori llogacinodo jaiñedomoi; iadedi jeacino omoi finoñellena, omoína Jusiñamui duenaillamona, naimie omoína birui canocabide.

Patrón anamo itinomona cai fueolle

¹⁵ Moisés micori llogacino anamo jai iñedicai; iadedi omoimona damierie comecina facade: “Moisés micori llogacino anamo cai iñenamona, jeacino cai finoia, Jusiñamui caina duere finoñeite”. Iese comecina facañeno. Jeacinona finocana cai jaiñena.

¹⁶ Biena uññotícaí. Patrón anamo bu ia, ie patrón comeci jitailla rana finode. Ie ocuica rana ñnote. Ie isoide. Jeacino anamo omoi ia, jeacinona finocana jaidomoi. Jeacino omoi finuamona omoi jeacino ite diga fiodaicana jaidomoi. Ie jira Jusiñamui illanomo ico ññeitomoi. Jusiñamui anamo omoi ia, Jusiñamui jitailla rafuena finocana jaidomoi. Naimie illanomo ico iitomoi.

¹⁷ Jeacino anamo jaie itomoi. Iemei omoi: jaie comini Jesucristo rafuena jai llotimaci. Iena cacajanona, iena raise ñnotomoi. Ie jira Jusiñamuimo iobillacinona fecadicue.

¹⁸ Jeacino anamona jai jillobillamona, marecinona finocana jai jaidomoi.

¹⁹ Cue lluna omoi raise cacailena, bie isoide rafuena lloticue. Omoi comeciai railla jira, jeacinona navui finodomoi. Maraññedicinona finocana navui jaidomoi. Cristo ñibeimo omoi jai illa muidona, marecinona omoi finocana birui mai omoi jai. Iese omoi jaillamona, omoi comeciai Jusiñamui jitailla isoi marena iitomoi.

²⁰ Jeacino anamo navui omoi ia, Jusiñamui jitailla isoi, marecinona finofedomoi.

²¹ Jeacinona navui omoi finuamona mare rafuena ofñedomoi. Ie jira iena birui meiruitomoi. Jeacinona finocabidino fiodaillamona, Jusiñamui illanomo ico ññeitimaci.

²² Jeacino anamona jai jillobidomoi. Jusiñamui anamo omoi jai illa jira, naimie ocuica rafuena finodomoi. Iena omoi finuamona, Jusiñamui jitailla isoi, marecinona finocana jaitomoi. Ja muidomo naimie diga iitomoi.

²³ Jeacinona finocana omoi jaia, omoi jeacino ite diga fiodaítomoi. Jusiñamui illanomo ico ññeitomoi; iadedi cai Nama Jesucristona omoi ñnuamona, Jusiñamuidi omoi: naja itataite. Naimie illanomo ico iitomoi.

7

Inirede riñomona cai fueolle

¹ Cue amatiai, Moisés micori llogacinuaina uññotomoi; iadedi iena nia raise cacaiññedomoi. Ie fiodailla mei, jaca buna Moisés micori llogacinuai anamo ññede. Ie fiodailla mei, jai ññena jira, nainomo ñññede.

² Ie isoide. Nana naimie ille ññori, inirede riñie ie inimo ññide. Iese Moisés micori jaie llote. Ie ini fiodailla mei, ie inimo jai ñññede. Naimie anamo ñññaiño jai ññena jira, jaiamiena ñññaiño oia, ie inina illena, Jusiñamuimona mare.

³ Ie ini nia fiodaññenia, jaiamié diga ñññaiño ia, ie ini abimo jeacinona jai finode, Moisés micori lloga uai ñññaiño ñññena jira. Ie ini fiodailla mei, naimie anamo ñññaiño jai ññena jira, jaiamiena ie inino ñññaiño oia, jeacinona jai finofede.

⁴ Ie isoide. Cristo fiodailla jira, Moisés micori llogacinuai anamo jai ñññedícaí. Iemo jai ñññedícaí. Ie jira Cristomo jai ñññedícaí. Jusiñamui jitailla rafuena finocana cai jaillena, fiodaillamona Cristo jai jillode.

⁵ Jusiñamuina nia cai ññññenia, cai jitailla rafuena finocana jaidícaí. Moisés micori llogacinona uññotícaí; ia cai maraññede jitailla rafuena finocana jaidícaí. Cai jeacino ite diga fiodaicana jaidícaí;

⁶ Ia Moisés micori llogacino jai saide. Caimo jai ñññede. Navui ie anamo itícaí; iadedi birui ie anamo jai ñññedícaí. Jusiñamuina cai sedajamona, Jusiñamui Joreño rafuedo jai jaidícaí. Moisés micori ciegafuiaido jai jaiññedícaí.

Cue comecimo ite maraññedicino

7 “Moisés micori llogacino maraiñede” lloñeitica; iadedi naie llogacino iñedena, jeacinona uiñoñedicue. Jiaimie mo ite rana cue niciduana maraiñenana jaie uiñoñedicue. Moisés micori jaie llote: “Jiaimie mo ite rana nicidoñeno” llote. Ie jira naiemona niciduana maraiñenana uiñoticue.

8 Naie llogacino muidona cue começi jeacinona finoacade. Ie muidona rana nicidotucue. Naie llogacino iñedena, jeacino finuana uiñoiacaiñedicai. Naie llogacino iñedena, jeacino anamo iñedicai.

9 Moisés micori llogacinona nia cue uiñoñenia, caimare uri itucue. Naiena cue uiñuamona, jeacino cue finuana uiñoticue. Ico Jusiñamui diga cue iñenana uiñoticue.

10 Nano cue começina facaducue: “Naiedo cue jaillamona, Jusiñamui diga ico jaca iitucue”. Iese cue começina facaducue; iadedi naie llogacinona cue uiñuamona, Jusiñamui dibeimo cuena jaca itatañede.

11 Naie llogacino muidona cue começi jeacinona finoacana jira, cue jitailla rafuena oñedicue. Ico Jusiñamui diga jaca cue illena oñedicue; iadedi duere cue sefuillicinona otucue. Naimie dibeimo Moisés micori llogacino cuena itatañede; ia naimie dibeimona cuena itatate.

12 Iese ite; iadedi Moisés micori llogacinodi mare. Jusiñamuimona ite.

13 Naie llogacino mare. Naie rafue muidona fiodañeitucue; ia jeacino muidona fiodaitucue. Jeacinona cue finua jira, Jusiñamui illanomo ico jaca iñeitucue. Ie mare llogacinomona jeacino cue finuana eo maraiñenana uiñoticue.

14 Jusiñamui Joreño Moisés micorina naie llogacinona cuetatate. Ie jira naicino mare; iadedi cue jitailla rafuena cue finua jira, cuemo jeacino illa jira, jeacino finoraimana itucue.

15 Cue finua rafuena raise uiñoñedicue, cue mare jitailla rafuena cue fiñoña jira. Cue gaiña maraiñede rafuena finocabiducue.

16 Cue maraiñede finoacaiñega rafuena cue finojade, Moisés micori llogacino marenana uiñoticue.

17 Cue começi iena dama finoñede; iadedi cue começimo ite jeacino cuena finotate.

18 Cue começimo marecino iñede. Mare rafuena finoacaducue; iadedi iena finoniducue.

19 Cue mare finoacaga rafuena finoñedicue; iadedi cue maraiñede finoacaiñega rafuena finoducue.

20 Cue finoacaiñega rafue cue finojade, cue começi iena dama finoñede; iadedi cue começimo ite jeacino cuena iena finotate.

21 Biese cuemo suicabide. Mare rafuena cue finoacaniadedi, jeacinona finocabiducue.

22 Cue começi Jusiñamui lloga uaina gaide;

23 iadedi cue começimo maraiñede rafuena illana uiñoticue. Cue começina namataacade. Cuena jeacinona finotaiacade.

24-25 Eo duereducue. Jusiñamui lloga uaina cue começimona finoacaducue; iadedi cue começimo ite maraiñede rafue cuena jeacinona finotaiacade. Jeacino finocana cue jaia, duere sefuitucue. Jusiñamui illanomo ico jaca iñeitucue. Naiemona jaca buna cuena jillobitañede. Dama Jusiñamui cuena jillotaite, cai Nama Jesucristo muidona. Ie jira Jusiñamuimo cue iobicabillasa.

1 Cristo Jesúmo duidinodicaí. Ie jira Jusiñamuidi caína duere finoñeite.

2 Jeacino anamo jai cai iñena jira, caína duere finoñeite. Jeacinona cai finuamona, Jusiñamui illanomo ico jaca iñeiticai. Duere sefuiticai; iadedi naiemona Jusiñamui Joreño caína jai jillotate. Jesucirstomo cai duillanona, caína jaca ítataite.

3 Moisés micori llogacinona cai raise iñoñena jira, jeacinomona dani jilonidicaí. Ie jira Jusiñamuidi ie Jitona orede, iimana naimie jaillena. Cai isoi naimie jaide; iadedi naimiedi jeacinona finoñede. Jeacinona finorainidicaí. Cai jeacino facaina fiodaillena, naimiena orede. Naimie uaidi cai jeacinona anafetitate. Ie jira jeacino anamona jai caína jillotate.

4 Iese finode, cai marena illena, Moisés micori llogacino llua isoi. Ie jira cai comecimo ite maraiñede jitailla rafuedo jai jaiñedicaí; iadedi Jusiñamui Joreño jitailla rafuedo jai jaidicaí.

5 Cai comecimo ite maraiñede jitaillacinodo cai jaiadedi, naiemo cai comeciaina facadicaí. Iena finodicaí; iadedi Jusiñamui Joreño jitailla rafuedo cai jaiadedi, iemo cai comeciaina facadicaí. Naimie jitailla rafuena finodicaí.

6 Maraiñede jitaillacinomo comeciaina facacabidinó Jusiñamui diga ico jaca iñeitimaci; iadedi Jusiñamui Joreño jitailla rafuedo jaidino Jusiñamui diga jaca iitimaci. Jiai jaca uri iitimaci.

7 Jiaíno Jusiñamuina enoidimaci. Jusiñamui lloga uaina jitaiñedimaci. Iena iinonidimaci.

8 Iese itino Jusiñamuina iobitanidimaci.

9 Iese iñedomoi; iadedi Jusiñamui Joreñomo jai duidomoi. Naimie omoimo ite. Bumo Jusiñamui Joreño iñenia, Cristomo nia duiñede.

10 Jeacinona omoi finua jira, fiodaitomoi; iadedi Cristo omoimo illa jira, omoi joreñuai Jusiñamui illanomo jaca iitimaci, Jusiñamui omoína marebitajaja jira.

11 Cristo Jesús fiodaillamona, Jusiñamuidi naimiena jillotate. Omoimo ie Joreño illa jira, omoi fiodaiade, Jusiñamuidi ie Joreño uaido omoi abiaína jiai jillotaite.

12 Cue amatiai, iese caimo suite. Ie jira cai comeciaino ite maraiñedincinodo cai jaiñelli.

13 Naicinodo cai jaiá, Jusiñamui illanomo ico jaca iñeiticai; iadedi Jusiñamui Joreñodi caína canuamona, naicino anamona cai jilluanona, Jusiñamui illanomo ico jaca iiticaí.

14 Nana Jusiñamui Joreño namatadinodi Jusiñamui uruiái.

15 Jusiñamui Joreña feiñoñedomoi, naimiena omoi jaciruillena; iadedi Jusiñamui uruiaina omoi jaillena, naimiena feiñotomoi. Duere sefuillacinona navui jaciruitomoi; iadedi birui: “Cai Moo” raillanona, Jusiñamuina uaidotomoi. Ie jira naimiena jai jaciruñedomoi.

16 Cai comeciaina Jusiñamui Joreño uññotajamona, cai comeciainona Jusiñamui uruiaidicaina jai uññoticaí.

17 Naimie uruiaidicaina jira, ie uruiaino feacaacalle ra caimo jai duide, Cristomo jai duilla isoi. Naimie dibeimo cai illanona, Cristo isoi cai duere sefuilla jira, naimie isoi ie Moo illanomo ico iiticaí.

18 Biena uññoticue. Bene birui duere sefuidicaí; iadedi iemo cai comeciaina cai facañena, monamo ico eo marena jaca cai illena jira.

19 Iese cai illemo nana Jusiñamui finoca radi iocire birui ocuiridimaci.

²⁰ Nana eniruemmo ite Jusiñamui finoca radi mare; iadedi Adán micori jeacino finua jira, Jusiñamui llua jira, naimaci faidobidimaci. Iese suide; iadedi ico dane marena naimaci illemo ocuridimaci,

²¹ naimaci rifaillamona ico naimaci jillua jira. Ie mei Jusiñamui uruiaidicaina isoi marena iitimaci. Dane fioidañeitimaci.

²² Biena uifnoticai. Nana Jusiñamui finoca radi danomo eo duere sefuicana nia jaidimaci. Marena illemo nia ocuridimaci.

²³ Dani naimaci duere sefuicana jaidimaci; iadedi jiai duere sefuidicai. Jusiñamuidi ie Joreño caimo fecaja jira, ico cai marena illena uifnoticai. Monamo Jusiñamui uruiaina ico cai illemo ocuridicai. Cai fiodaia, fiodaillamona cai abiaina jillotaite. Jiaifo eruaite cai abiaimo meidollemo ocuridicai. Ie mei cai abiai dane fioidañeitimaci.

²⁴ Naiemo cai ocurillamona, cai jeacinomona navui jillobidicai. Bumo ie jitailla ra ia, iemo naimie ocuriñede. Ie feiñoñega ramo ocuriride. Ie isoidemo ocuridicai.

²⁵ Caimo suiñede rafuemo cai ocurilla jira, iemo fecuise ocuridicai.

²⁶ Birui duere cai sefua, ico marena cai illemo ocuridicai. Jusiñamui Joreño caina jiai canode. Jusiñamuimo cai jiaia, naimiemo cai jicanua rafuena cai raise uifñoñenia, ie Joreño cai facaina ñaite. Naimiedi cai jino botanide uaina Jusiñamuimo llote.

²⁷ Jusiñamui cai comeciaina uifnote. Naimie jitaillacinona ie Joreño jia jira, iena uifnote. Jusiñamui cominidicai. Ie Joreño cai facaina ñaiana cacade.

Jusiñamui caina isiruite

²⁸ Jusiñamuina isiruitinodicai. Naimie jitailla jira, naimie caina fetode. Jusiñamuidi caimo suide rafuena marena suicana jaitate. Iena uifnoticai.

²⁹ Caína isiruillanona, caína fetode. Nano dofoconimona caína naimie Jito isoi cai illena itatate. Naimie Jitodi cai ama doforamiena.

³⁰ Caína iese jaie itatajamona, birui caína uaidote. Caína uaiduanona, caína jeacinona jaca finoñedino jai isoitate. Caína jeacinona jaca finoñedino jai isoitajamona, naimie illanomo ico cai ia, ebire iiticaí.

³¹ Iese caína itataja jira, Jusiñamuidi cai facaina illa jira, bu cai facaina iñellena, damamai iesedicai.

³² Jusiñamuidi ie Jitona duere sefuillamona jillotañede; iadedi naimie jitailla jira, cai facaina ie Jitona orede, cairi fiodaillena. Ie muidona naimie díbeimo marena cai ille rafuena caimo jiai iite.

³³ Jeacinona navui finodicai; iadedi Jusiñamuidi caína jeacinona jaca finoñedino jai isoitaja jira, Jusiñamui fetocanodicaina jira, jaca buna cai jeacino facaina naimiemo llogidoñeite.

³⁴ Ie jira cai jeacino facaina jaca buna caína duere finotañeite. Cristo Jesús jaie fiodaite; iadedi fiodaillamona naimie jillode. Jusiñamui beicimo naimiedi birui ite. Cai facaina naimie ñaite.

³⁵ Cristo caína isiruite. Jaca buna Cristo caína isiruillacinona baíronide. Jiaie comini duere caína finoia, caína jeare finoia, aime cai guia, cai iniroinia, jacirede rafue caimo ia, jiaie comini caína meineia, Cristo caína nia isiruite.

³⁶ Iena Jusiñamui facaina lloraíma micori jaie cuega: Jusiñamui muidona caína jaca meinetimaci, mercadomo toica llaudaiaí fallena illa isoi cuega.

³⁷ Cristo caína isiruilla jira, caína naimie canuamona, naga bie isoide rafue caimo sua, cai comeciái ocuiñocana cai jailla.

³⁸ Jusiñamui caina isiruite. Naimiemona jaca budi caina baironide. Cai fiodaia, cai nia ia, Jusiñamui caina nia isiruite. Jusiñamui jaienisaïdi, Taifedi, Janabadi Jusiñamui isiruillacinomona caina baironidimaci. Birui diga isoide rafue caimo suide; iadedi Jusiñamui caina nia isiruite. Ico diga isoide rafue caimo sua, Jusiñamui caina nia jaca isiruite. Jaca buna ie uaido Jusiñamui isiruillacinomona caina baironide.

³⁹ Monamo ite radi Jusiñamui isiruillacinomona caina baironide. Eniruemo ite radi Jusiñamui isiruillacinomona caina baironide. Nana Jusiñamui finoca radi Jusiñamui isiruillacinomona caina baironide. Cai Nama Cristo Jesúmo cai duilla jira, Jusiñamui caina isiruillana uifnoticai.

9

Jusiñamuidi judúuai railla cominina fetode

¹⁻² Jiaie rafuena nia lloiticue. Cue comecidi eo sunaite. Cristomo cue duilla jira, tainona lloñedicue. Jusiñamui Joreño cue comecina uifnotajamona, iena uifnoticue. Cue cominiri sunaiticue.

³ Cue comini Cristo rafuena inoiacaiñedimaci. Ie muidona Jusiñamui ricaiillifue anamo birui itimaci. Naimemona naimaci jilloillena, naimaci duere sefuillicino ifomo cue iticuedena, cuemona mare. Naimacidi cue amatiaia.

⁴ Israel railla cominidimaci. Jiaicidi judúuai railla cominidimaci. Jusiñamuidi naimacina fetode, ie uruiaia. Jusiñamui siño finoca rafuena cioidimaci. Iena naimaci inollena, Moisés micorimo Jusiñamuidi rafuena jiaï llote. Naimiena sedallena jiaï llote. Naimaci dine naimaci jilloitaraïmana oretallena jiaï llote.

⁵ Naimaci jaiagaidi Abraham micori, Isaac micori, Jacob micori. Naimacimona comuide nairaimona Cristodi comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaidicue.

⁶ Cai cominimo Jusiñamuidi ie uaina llote; iadedi nana cai comini iena inoñena jira: “Jusiñamui ie lloga uaina finoñede” raiñeiticai. Jusiñamuina naimaci raise inoñena muidona, nana Israel micorimona comuide cominidi Jusiñamuimo duiñedimaci.

⁷ Nana Abraham micorimona comuidinodi naimiemo duiñedimaci. Jusiñamui iena jai llote: “Dama Isaacmona comuidinodi ua Abraham uruiaï”.

⁸ Naie lluamona nana Abraham micorimona comuidinona ie uruiaiañenana uifnoticai. Jusiñamui lloga uaina inotinodi naimie ua uruiaia.

⁹ Jusiñamuidi Abraham micorimo jai llote: “Jiaie año bie facaiseconi o dine abido biiticue. Naie facaiseconi o ai Saradi jitona jocoite” llote. Ie mei iese suide.

¹⁰ Ie mei Isaac micoridi Rebeca micorina ote, naimie aina. Ie mei naiñaiño micoridi gorasana iaïmaiaï micorina jocode. Nano doforamiedi Esaú micori. Jaiamedï Jacob micori.

¹¹⁻¹³ Naiñaiño micori nia jocoñenia, Jusiñamuidi naiñaiño micorimo llote: “Nano doforamie ie ama anamo jaca iite” llote. Jusiñamui facaina lloraima micori Jusiñamui lluaana jiaï cuete: “Jusiñamui llote: ‘Jacobna eo isiruiticue; iadedi Esaúna janore isiruiticue’ llote”. Naie iaïmaiaï micori nia jeicifñenia, iaïmaiaï micori marecinona nia finoñenia, iaïmaiaï micori maraiñedicinona nia finoñenia, Jusiñamuidi iaïmaiaï micorina iese llote. Ie finoca rafuemona Jacob micorina fetoñede; iadedi Jusiñamui jitailla jira, Jacob micorina fetode.

¹⁴ “Jusiñamuidi dama Jacob micorina fetuana maraiñede” raiñeiticai. Jusiñamuidi maraiñedicinona jaca finoñede.

15 Jusiñamui bie isoide rafuena Moisés micorimo llote: “Cue dinena cue jitaillanona duenaiticue; ia cue dinena cue jitaifñenanona duenaiñeiticue” llote.

16 Comini naimiena jitaillamona, Jusiñamui naimacina duenaiñede. Naimaci rafue finuamona, naimacina duenaiñede; iadedi naimie jitailla jira, naimacina duenaite.

17 Jusiñamuidi bie isoide rafuena Faraón micorimo llote. Moisés micori illa facaise Egipto railla enirue illaimadi Faraón micori. Naimiemo llote: “Ona illaimana jai itataticue. O uicomo siño rafuena finodicue, cue uai siñonana jiaie comini uifñollena, nana cominido cue mameci sorillena”.

18 Jusiñamui iese ite. Naimie dinena ie jitaillanona duenaite. Naimie jitailla jira, jiaie cominina naimiena ñnotañede.

19 Nibai comeaiaina facadomoi: “Cominina iese Jusiñamui itataia, ¿bue ñellena naimacina duere finoacade?”

20-21 Iese comeaiaina facañeno. ¿Ñiese nainona naimiemo ducaitomoi? Ero, jññoramona nogona finodiñaiñodi ie jitailla dierise nogona finode. Dajerie ebirede nogona finode. Dajerie jamai nogona finode.

22 Ie isoide. Nana comini dajena eruaiñedicaí. Ie jitailla isoi, jiaiforie Jusiñamui caina comuitate. Jusiñamui ie jitailla rafuena finode. Jeacinona comini finua jira, Jusiñamuidi naimacina duere finoacade. Naimacina ie uai siñonana jiai uifñotaacade; iadedi naimacina nia duere finoñede.

23 Cominina Jusiñamuidi jiai duenailla jira, naimacina ie siño uai ebirenana uifñotaacade. Naimie illanomo nanomona naimaci marena iitimaci. Iese naimie naimacina itatate.

24 Jusiñamui caina iese itatate. Da judíuaina iese itatañede; ie iadedi judíuaiñedinona jiai iese itatate.

25 Jusiñamui iena jaiie lluaana Oseas micori jaiie cuete: Cue cominiñedinodi cue cominina jaitimaci. Isiruiñeganona isiruiticue.

26 Dane jiai cuete:

Navui cue cominiñedomoi; iadedi jiaie comini omoína ico lloitimaci: “Naimacidi jaca cajede cai Jusiñamui ie uruaiidimaci” lloitimaci cuete.

27 Isaías micori railla lloraima jaiie cuete: “Monailai fuemo conillie eo ite. Ie isoi Israel micori uruai eo jebuitimaci; iadedi Jusiñamuidi nana naimacina jillobitañeite. Dajeriena jillotajanona,

28 jianomo ie lloga uaina raire finoite. Naimacina duere finoite” cuete.

29 Isaías micori jiai cuete:

Jusiñamuidi anamo nana ra ite.

Jusiñamuidi Sodómamo ite comini micoriaina jaiie cuenode.

Gomórramo ite comini micoriaina jiai jaiie cuenode.

Naimaci micoriai isoi iñedicaí, nana cai cominina naimiedi duere finoñena jira.

Judíuaidi Cristo rafuena jitaifñedinomaci

30 Biemo comeaiaina faca. Judíuaiñedinodi Jusiñamui jitailla isoi, marena illana navui uifñoiacaiñedinomaci; iadedi iena jai uifñotimaci. Jesucristona naimaci ñnuamona, marena illana jai uifñotimaci.

31 Jusiñamui jitailla isoi marena naimaci illena, judíuaidi Moisés micori llogacinodo jaidimaci; iadedi Moisés micori llogacinona naimaci raise ññoñena jira, marena illana jaca uifñedinomaci.

32 Naimaci finoca rafuemonona marena iacadimaci. Marena naimaci illena, Jesucristona ñnoiacaifñedinomaci. Naimie muidona marena iñeitimaci.

³³ Isaías micori iena jaie cuete:

Jusiñamui llore: “Ero, Jerusalémo cue Jitona oretaiticue.

Naimie muidona cominidi jilloñeitimaci.

Naimiena naimaci ñnoñenia, faifitimaci;

iadedi naimiena ñnotinodi tainona ñnoñeitimaci.

Suubicaiñeitimaci” llore.

10

¹ Cue amatiai, judíuai comini jilluana eo jitaidicue. Jusiñamui diga cue ñaia, iena jicadicue.

² Jusiñamui jitaillacinona eo finoacadimaci. Iena uiñotícue. Iena finoacadimaci; iadedi iena finuana raise uiñoñedimaci.

³ Jusiñamui naimacina marena itatallena uiñoñedimaci. Naimaci finoca rafuemonona marena iacadimaci. Jusiñamui llua isoi jaiacaiñedimaci.

⁴ Nana Cristona ñnotimiedi Moisés micori llogacinodo naimie marena illena jai jaiñede. Cristona ñnuamona, Jusiñamui jitailla isoi, naimie marena jai ite.

⁵ Moisés micori jaie cuete: “Naimie marena illena, cue lluado jaidimiedi jaca iite, cue lluana naimie raise ñnoia” cuete.

⁶ Iese jaie cuete; iadedi jaca buna iese ñnoñede. Cristona ñnuamona, marena Jusiñamui jitailla isoi, birui iticai. Jusiñamui uai llore: “Omoi comeciaina facañeno: ‘Cristona cai baillena, naimiena bene cai atillena, monamo jaiticai.

⁷ Fiodaitino dine jaiticai, Cristona cai jillotallena’. Iese comeciaina facañeno” llore. Cristodi eniruemo jaie bite. Fiodaite; ia naiemona jai jillode.

⁸ Jusiñamui uai llore: “Naie rafue cai dine jai ite. Iena jai uiñoticai”. Cai jilloillena Cristona cai ñnuana birui lloticai.

⁹ Jiaie cominimo: “Cristodi cai Nama” omoi lloia, Cristo fiodaillamona Jusiñamui naimie jillotajana omoi ñnoia, jilloitomoí.

¹⁰ Cai comecimona cai ñnua jira, Jusiñamui caina marena illana itataite. “Cristodi cai Nama” cai lloia, Jusiñamui caina jillotaite.

¹¹ Isaías micori iena jaie cuete: “Cristona ñnotinodi tainona ñnoñeitimaci. Suubicaiñeitimaci” cueda.

¹² Naie rafuedi nana cominina ñaite. Judíuaina ñaite. Judíuaiñedinona jiai ñaite. Jusiñamui anamo nana cominidi itimaci. Nana naimiemo jicanotinona jaca duenaite.

¹³ Cristodi naga naimiemo jicanotimiena jillotaite;

¹⁴ iadedi Cristona naimaci ña ñnoñenia, naimiemo jicanonidimaci. Cristo naimaci facaina fiodailla rafuena naimaci ña cacaiñenia, naimiena ñnonidimaci. Naimacimo naie rafuena jiaie comini lloñenia, iena cacaiñeitimaci.

¹⁵ Jusiñamui ie rafue llorainina jai orede. Isaías micori iena jaie cuete: “Mare rafuena llotino cai dine billano, eo iobidicai” cuete.

¹⁶ Iese cuete; iadedi ailluena comini naie rafuena ña jitañedimaci. Isaías micori iena jiai jaie cuete: “Jusiñamui, ailluena comini cai llua ñnoiacañedimaci” cuete.

¹⁷ Cai lluaamona Cristo rafuena cacadimaci. Cristo rafuena cacajamona, damierie naimiena ñnotimaci.

¹⁸ Judíuai comini naie rafuena jai cacadimaci. Jusiñamui facaina lloraima micori iena jaie cuete:

Naga eniruemo ite cominimo Jusiñamui lloraini micoriaidi naie rafuena jai llotimaci

cuete.

¹⁹ Judíuái comíni naie rafuena cacadímaci; iadedi iena ñnoñedímaci. Moisés micorí iena jaie cuete:

Jusiñamuidi llote: “Cue rafuena naimaci feiñua jira, judíuáiñedino diga uradoitomoí.

‘Naimaci abína uíñoñedímaci’ raitomoí;

iadedi cue rafuena naimaci feiñua jira, naimaci diga icíritomoí.” llote.

²⁰ Isaías micorí marefodo jiai cuete:

Jusiñamui llote: “Cuená jenoñedino cuena jai baitímaci.

Naimacína cue jilloitallena cuena jicanoñedíno jai bairedícue” llote.

²¹ Jusiñamui judíuái comínina jiai llote: “Naimacína cue díne jaca uaidotícue; iadedi ñnoiacaíñedímaci. Cuená jítaiñedímaci” llote.

11

Judíuái comínimona dajeríe ñnoítímaci

¹ Jusiñamuidi judíuáina fáinonocáillamo omoi comeciáina facañeno. Judío imíedícue. Abraham uruíai micoríaiimona comuidícue. Benjamín railla nairái imíedícue.

² Naimacína jaie naimíe fetua jira, Jusiñamui judíuáina fáinonocáíñede. Elíamo jaie ite rafuena uíñotomoí. Jusiñamuimo naimíedi judíuáina llote:

³ “Cue Nama, o facáina lloráini micoríaina meinetímaci. Ona caí sedajanona judadímaci. Dama cue fiebidícue. Cuená jiai meineiacadímaci”.

⁴ Jusiñamui dínena uai ote: “Dama íñedio. Siete mil íñíai cue díbeimo nia eenotícue. Baal railla jíraráina jaca sedañedímaci. Cuená nia sedadímaci” llote.

⁵ Biruí ie isoide. Naimacína duenaíllamona, naimacína Jusiñamui fetua jira, dajeríe Jusiñamui díbeimo ítímaci.

⁶ Naimacína duenaíllamona, naimacína fetode. Naimaci finoca rafue muidona naimacína fetoñede. Naimaci finoca rafue muidona naimacína fetodena, naimacína duenaíllamona naimacína fetoñede.

⁷ Ie jira iena íese lloítícue. Aílluena judíuáidi marena Jusiñamui jítaiíla isoí íllana oñedímaci; iadedi Jusiñamui fetocano iena otímaci. Aílluena comíni iena ñnoiacaíñedímaci.

⁸ Jusiñamui facáina lloráini micoríai iena jaie cuela: “Jusiñamuidi naimacína abína uíñotañede. Jusiñamui finoca rana naimaci cíoiá, iena uíñoñedímaci. Jusiñamui rafuena naimaci cacajía, iena cacáíñedímaci. Biruí íese nia ítímaci” cuela.

⁹ David micorí iena jiai llote:

Naimacímoo aillue ra íllamona, Jusiñamui naimacína duere fínoite.

¹⁰ Naimaci comeciái Jusiñamui rafuena uíñoñeítímaci.

Naimaci finoca rafue anamo duere sefuícana jaca jaitímaci.

Judíuáiñedínomona dajeríe ñnoítímaci

¹¹ Naimíe rafuena judíuái comíni jítaiñena jira, Jusiñamui naimacína duere finode; iadedi naimacína sofeñede. Jusiñamuína judíuái ñnoñena jira, Jusiñamuidi judíuáiñedínona jai jillotate. Naimacína jai jillotate, judíuái dínena judíuáiñedínona uradoíllena. Uradoíllamona Jusiñamuidi naimaci naimíena ñnollena jítaiíde.

¹² Crístoná judíuái jítaiñena jira, Jusiñamuimona judíuáiñedínodi diga marecínona biruí feiñotímaci. Crísto díbeimo íco judíuái ía, Jusiñamuimona judíuáiñedíno ailluena feiñoítímaci.

13 Judúuaiñedino, omoimo rafuena lloiacadicue. Omoi dine Jusiñamuidi cuena orede. Cue maijari eo marena ñaiticue,

14 cue comini cuena uradoillena, Cristona dajerie ñnotallena.

15 Cristona naimaci nia ñnoñena jira, judúuaiñedino jai ñnotimaci. Cristona ico judúuai ñnoia, Jusiñamui diga jaca iitimaci.

16 Janore jisa juillirufu marena, nana juilliruaidi mare. Riara ie jainauai marena, nana ie igaillai mare. Judúuaiði ie isoidimaci. Naimaci jaiagai micoriai jainauai isoidimaci. Naimaci jaiagai marena, naimacidi jiai mare. Birui ite judúuaiði igaillai isoidimaci.

17 Taide igaillaiði ie amenamo jai duiñede. Ie isoidimaci. Naimacimona Cristona jiaño ñnoñena jira, Cristomo jai duiñedimaci. Sotaca riara isoi, naimaci ifomo itomoi. Ie jira Jusiñamuimona rafuena jai feñocabitomoi.

18 Naimaci ifomo omoi illa jira, abina uradoiñeno. Igaillaimona jinao cajellena, ie ijina oñede; iadedi iemo duilla jira, jinaomona igaillai cajellena, ie ijina ote. Ie isoide. Naimiemo omoi duilla jira, Jusiñamuimona rafuena jai feñocabitomoi.

19 Comeciaina facadomoi: “Taide igaillai ifomo iticai isoidicai. Jusiñamui judúuaina oni dotade, caina fetollena”.

20 Uanaicinona comeciaina facadomoi. Naimaci ñnoñena jira, Jusiñamuidi naimacina oni dotade. Omoi ñnua jira, naimaci ifomo itomoi. Ie jira abina uradoiñeno; iadedi Jusiñamuina omoi jacirui.

21 Naimiema naimaci ñnoñena jira, judúuaina duere finode. Naimiema omoi ñnoñena, daje isoi omoina duere finoite.

22 Biemo comeciaina faca. Naimiema ñnoñedinona jai duere finode; iadedi omoina duenaite. Naimiema ñnocana omoi jaia, naimie omoina nia duenaite. Iese omoi jaiñena, naimie omoina dotaite.

23 Judúuai Cristona ñnoñeno navui jaidimaci; iadedi Cristona naimaci birui ñnoia, naimie dibeimo Jusiñamui naimacina itatarede, igai riaramo sotaja isoi.

24 Ailli riarana cueticue. Naie amenamo nano duiñedomoi. Judúuai nainomo nano duidimaci. Jusiñamui jitailla jira, sotaca igai isoi, naimaci ifomo omoina jai itatate. Ie jira Jusiñamui jitaia, nainomo nano naimaci duilla jira, naimiedi judúuaina abido oite.

Eo ailluena judúuai jilloitimaci

25 Bie rafuena omoi uñuana jitaidicue. Iena navui uñoñedicai. “Judúuai baifemo faiticai” omoi raiñellena, biena omoimo lloticue. Diga judúuai Cristona birui ñnoiacañedimaci. Jusiñamui jitailla diese judúuaiñedino jillua facaisena, iese iitimaci.

26 Ie mei eo ailluena judúuai jilloitimaci. Jusiñamui facaina lloraini micoriai iena cuetimaci:

Jerusalémona cai Jilloitaraima biite.

Jacob micori uruaimona jeacinona dotaite.

27 Naimaci jeacinona oni dotajanona, Jusiñamui jai lloga uai suite.

28 Cristona birui ñnoiacañedimaci. Jusiñamuina enoidimaci. Jusiñamuina naimaci jitaiñena jira, naimie omoina fetode. Ie jira jillodomoi; iadedi Jusiñamuidi judúuaina nano jai fetode. Naimaci jaiagai micoriaimo ie lloga uaina jira, naimacina nia isiruite.

29 Jusiñamui ie lloga uaina saiñede. Naimacina fetua jira, naimacina fainonocaiñeite.

³⁰ Jusiñamuina navui ñnoñedomoi; iadedi Jusiñamuina naimaci ñnoñena jira, Jusiñamui omoína jai duenaite.

³¹ Jusiñamuina jai ñnoñedimaci; iadedi omoína naimie duenailla isoi, Jusiñamuidi naimacina ico jiai duenaite.

³² Jusiñamui nana cominina naimiena ñnoñenana uiñotade, naimacina naimie duenaillena.

³³ Jusiñamui caina eo duenaite. Eo abina uiñote. Naga rana uiñote; ie iadedi naimie lloga uaina raise cacaiñedicaí. Naimie finoca rafuena raise jiai uiñonedicaí.

³⁴ Jusiñamui facaina lloraima micori iena jai e cuete: “Jaca buna cai Nama Jusiñamui comeci facajacinona uiñofede. Jaca buna naimiemo ie finoca rafuena lloñede.

³⁵ Jaiiruido ibana feiñollena, jaca buna naimiemo rana fecañede” cuete.

³⁶ Naga ra naimiemo illa jira, naga ra naimiemona bite. Naga rana finode. Naimiemo iobillacinona cai fecacabillasa. Iena jitaídícué.

12

Jusiñamui anamo raise omoi i

¹ Cue amatiai, omoimo bie rafuena lloiticue. Jusiñamui caina duenailla jira, omoi jeanide comeciámona, naimie jitaílle rafuena omoi finuamona naimie anamo raise omoi i. Naimie jitaílla isoi omoi i. Naimiedi omoi iese illana gaide. Omoi comeciámona naimiena raise omoi seda.

² Cristona uiñofedino isoi omoi iñeno; iadedi omoi comeciá iuaina meidunona, jiaie rafuedo mai omoi jai. Ie mei Jusiñamui jitaílla rafuena finuana uiñoitomoi. Mare rafuena finuana uiñoitomoi. Naimiena iobitajacinona jiai uiñoitomoi. Eo mare rafuedo jaíllana uiñoitomoi.

³ Jusiñamui cuena duenaillamona, bie rafuena omoimo cue lollena, naimie uai cuemo ite. “Jiaie comini baífemo faitícué” raíllamo o comecina facañeno; iadedi: “Ñie isoidimídicue” o raíllamo o comecina raise faca. Jusiñamuimona o feiñoga díese ñnuacinomo o comecina faca.

⁴ Nagamie ie abimo diga ra ite. Ie onolli ite. Ie uisi ite. Ie jebe ite. Díga jiaie ra ite. Rana cai finollena, naga ra cai abimo ite. Cai abimo jainaiáide.

⁵ Ie isoide. Cristona jai ñnoticaí. Aillosiedicaí; iadedi daajena naimiemo jainaiáidicaí. Dani caimo jiai jainaiáidicaí.

⁶ Jusiñamuidi daje isoide uaina naimie díbeimo cai maijillena, caimo fecañede. Ie jitaílla díese caimo fecade. Ie jira omoi feiñoga uaido naimie facaina maiji. Rafuena omoimo Jusiñamui lloia, iena raise lloño. Roracomo omoi maijillena Jusiñamui lloia, nainomo raise maiji. Omoi llofuellena Jusiñamui lloia, naimie rafuena raise llofue.

⁷ Roracomo maijiacinona uiñotimiedi nainomo raise maijia. Llofuiacinona uiñotimiedi raise llofua.

⁸ Comeci ocuiñotajacinona uiñotimiedi comini comeciáina ocuiñotacana jaílla. Rana fecajacinona uiñotimiedi rana caidíñeno fecaja. Cominina sedajacinona uiñotimiedi cominina raise sedaja. Dueredinona canodimiedi dueredinona iocire canua. Cristomo daajena cai jainaiáíllamona, iese coninina canocana jaíticaí.

Cristo rafuedo cai jaílla

⁹ Omoi comeciámona nana cominina isirui. Maraiñedícinona gaiñeno; iadedi mare rafuedo omoi jai.

10 Coninina isirui, omoi cominina omoi isiruilla isoi. Omoina jiaimie nia iobitañenia, naimiena raire omoi iobita.

11 Cristo rafuena sefuiruiñeno finocana omoi jai. Cai Namana iocire seda.

12 Naimie dine omoi illemo iocire omoi ocuiri. Duere omoi sefuia, omoi comeciaina ocuiño. Jusiñamui diga ñaicabillanona omoi jai.

13 Jiaie creyentia rania, naimacina cano. Omoi jofuemo creyentia ría, naimacina nafue.

14 Jusiñamui dibeimo naimaci marena illena, omoina duere finodinona Jusiñamuimo jii. Naimaciri marena ñaino. Naimacina faidoñeno.

15 Iobidino diga omoi nabairillena, omoi iobi. Sunaitino diga omoi nabairillena jiai omoi sunai.

16 Daje isoi omoi comeciá lloillamona uri omoi i. Abina birioicaiñeno. Jamai bue isoidino diga nabairi. "Jiaie comini baifemo uiñoticai" raiñeno.

17 Jiaie comini omoina jeare finoia, naimacina daje isoi jeare finoñeno. Hbana oñeno. Omoi marena illana jiaie comini uiñollena, marena omoi i.

18 Omoimona rafuena suiñoñeno. Nana comini diga uri omoi i.

19 Cue isiruigano, bu omoina jeare finoia, ibana oñeno. Jusiñamui naimacina duere finoite. Moisés micori iena jai e cuete: "Cai Nama llote: 'Cominina duere finodicue. Hbana oiticue'" cuete.

20 Hbana oñeno. Jusiñamui facaina lloraima iena jai e cueta: "Omoi enoigamie aimetaia, naimiena eca. Naimie jiroiacania, naimiena jirote". Ie mei naimie meire omoimo eruaité.

21 Jiaie comini omoina jeare finoia, iciriñeno; iadedi naimacimo mare rafuena fino. Iese omoi finoia, naimacina omoi dibeimo itataitomoí.

13

1 Nana illaicominina naimaci ifomo Jusiñamuidi itataja jira, illaicomini lloga uaina nana cai ñnuá.

2 Illaicomini uaina bu ñnoñenia, Jusiñamuina jiai ñnoñede. Ie mei Jusiñamui naimiena duere finoite.

3 Mare rafuena finodinodi illaicominina jaciruiñedimaci; iadedi marañede rafuena finodino naimacina jaciruitimaci. Omoina duere finoñellena, mare rafuena finocana omoi jai. Iese omoi jaia, omoina marena ñaitimaci.

4 Jusiñamui facaina omoina canodimaci. Marañede rafuena omoi finoia, naimacina jacirui. Omoina duere finollena, naimacimo uai ite. Marañede rafuena finodimiena Jusiñamui facaina duere finoitimaci.

5 Ie jira naimaci uaina ñno, Jusiñamuimona omoi duere sefuiñellena. Omoina: "Mare" jiai raitimaci.

6 Gobierno omoina ibataia, Jusiñamui facaina naimaci maijia jira, iena iba. Naimaci raise maijillena, iena iba.

7 Gobierno omoina ibataia, iena iba. Illaicominimo iobillacinona feca.

8 Ra omoi oia, ibaño jaiñeno; iadedi coninina omoi isirui. Jiaie cominina isiruitimiedi nana Jusiñamui lloga uaina jai finode.

9 Moisés micori diga lletarafuena jai e cuete: "O añede riño diga iño. O iniñede ima diga iño. Jiaimiena meineño. Rana fiñeno. Jiaimimo ite rana nicidoño" cuete. Jai lletarafue ite: "Dani omoi abiaina omoi isiruilla isoi, jiaie cominina omoi isiruilla". Bie lletarafuena omoi ñnoia, nana lletarafuena jai ñnotomoi.

10 Jiaie cominina omoi isiruia, naimacina jeare jai finoñedomoi. Jiaie cominina omoi isiruia, nana Jusiñamui lloga uaina jai ñnotomoi.

11 Iena birui cai finua. Jesucristo billiruidi iairei jai ite. Naimiena cai nano inua facaiseconi, naimie billiruimo cai comeciaina facadica; iadedi nagarui naimie billirui iairei inoicaide.

12 Jesucristo nia dane biñena jira, eniruemo cai illa jira, jiti redinomo iticai isoitica. Naimie bia, naimie diga cai illemona, useredinomo raire ja iticai isoitica. Ie jira jeacinona finocana cai jaillana mai cai fainonocailli. Jesucristo rafue anamo raise cai illesa.

13 Cai marena illana nana comini uinollena, mare rafuena finocana cai jailla. Jearede rafuena cai finoñena. Cai jifaiñena. Cai aiñede riño diga cai iñena. Cai fuiriñena. Cai abina uradoiñena.

14 Iese cai iñena; iadedi naimie caina namatallena, cai Nama Jesucristona raise cai nabailli. Cai jearede navui jitaillacinona finoacanamo cai comeciaina facañena.

14

Jiaie creyentena jeare ñaiñeno

1 Cristona innotimiena omoi dine biade, naimiena raise feiño. Naimie Cristona nia raise inoñenia, naimiena nafue; iadedi omoi isoi naimie inoñenia, conima uina caitañeno.

2 Dajerie naga rana gutimaci; iadedi jiaimie difai guiga rana guite. Naimie riñede. Ie comecina facade: “Cue ría, jeacinona jai finoiticue”.

3 Naga rana guinodimiena miñeno. Naga rana gutimiena miñeno. Jusiñamuidi naimacina jai feiñote. Ie jira miñeno.

4 Omoi facaina maiñedimaci. Jusiñamui facaina maijidimaci. Jeacinona naimaci finoia, Jusiñamui naimacina duere finoite. Jeacinona finoi railanona, Jusiñamuidi naimacina canoite.

5 Dajerie creyentia comeciaina facadimaci: “Judíuai rafue finuaruilla; Jusiñamuina sedajitica; nairuilla; jairuilla; baifemo uaila jira”. Jiaino raitimaci: “Nagarui daje isoide” raitimaci. Nagamie ie comecina raise facajamona,

6 cai Namana iobitallena, nagamie ie jitaillaruimo cai Namana sedaite. Naga rana gutimie iobillacinona Jusiñamuimo fecajano, cai Namana iobitate. Naga rana guinodimie iobillacinona Jusiñamuimo fecajano, cai Namana jiai iobitate.

7 Cristomo cai duilla jira, dani cai jitailla rafuena finonidica. Cai fiodailliruina jiai llonidica.

8 Naimiedi cai finolle rafuena ocuide. Cai fiodailliruina jiai lloite. Naimiemo cai duilla jira, iese iticai.

9 Cristodi fiodaite. Ie mei jillode. Ie jira naimie anamo iticai. Cai cajenia, naimie anamo iticai. Cai fiodaia, naimie anamo jiai iticai.

10 Naimie baifemo omoi iñena jira, jiaie creyentena miñeno. Naimie uaina caitañeno. Naimiedi Cristo dibeimo ite. Jusiñamui uicomo nana ico iticai. Jusiñamuidi marañedinona duere finoite. Maredinona duere finoñeite.

11 Isaías micori jiaie iena cuete:

Jusiñamuidi llote:

“Cue jaca illa jira, nana comini cue uicomo cuena sedajanona, cuemo iobillacinona fecaitimaci” llote.

12 Nainomo Jusiñamuimo nana cai finouiga rafuena lloitica. Ie jira jiaie creyentia diga marena omoi i.

Jiaie creyentena jeacino finoi raillano, mare rafuedo cai jailla

¹³ Ie jira jiaie cominina cai miñena; iadedi mare rafuedo cai jailla. Jiaimiena jeacinona cai finotai raillano, mare rafuedo cai jailla.

¹⁴ Cai Nama Jesúmo cue duilla jira, naga riga radi cuemona mare. Iena raise uiñoticue. Iena cue ríia, jeacinona finoñedicue. Iena uiñoticue; iadedi jiaimie comecina facade: “Biena cue ríia, jeacinona jai finodicue”. Naimie comecina iese facajamona, iena naimie ríia, naimiemona jeacinona jai finode.

¹⁵ O riga ra muidona jiaie creyente comeci marañeno jaia, naimiena jai isiruñedio. Cristo naimieri fiodaite. Ie jira naie isoide rana riñeno, naimiena Jusiñamuina fañonocaitañellena.

¹⁶ Ie jira o jitailla rana finoñeno. Jiaie comini ona miñellena, naie rana riñeno.

¹⁷ Jusiñamui cominina cai illamona, cai guille ramo cai comeciaina cai eo facañena; iadedi marena cai illamo cai comeciaina cai facaja. Uri cai illamo cai comeciaina jiai cai facaja. Iocire cai illamo cai comeciaina jiai cai facaja. Jusiñamui Joreño caimo illa jira, iese caina itataite.

¹⁸ Iese cai jaia, Cristona raise sedadicaí. Jusiñamuina iobitadicaí. Jiaie comini caina marena jiai ñaitimaci.

¹⁹ Ie jira uri icana cai jailla. Dani cai comeciaina ocuiñocana cai jailla.

²⁰ Omoi ríiacaga ra muidona, jiaie cominina Jusiñamuina fañonocaitañeno. Naga radi mare, rillena; iadedi bue isoide omoi ríia muidona, jiaimie Jusiñamuina fañonocai, jeacinona jai finodomoí.

²¹ Bue isoide omoi ríia muidona, jiaimie jeacino finoi raillanona, iena riñeno. Bue isoide omoi jirua muidona, jiaimie jeacino finoi raillanona, iena jiroñeno. Bue isoide omoi finua muidona, jiaimie jeacino finoi raillanona, ie isoide omoi finoñeno. Naimiedi Cristomo jai duide.

²² Mare ra omoi finoia, omoi comeciaimona iena uiñotomoí. Jusiñamuidi omoi comeciaina uiñua jira, iena marefodo lloñeno. Omoi comeciaimona jeacinona omoi finoñenana uiñotomoí. Ie jira iocire itomoí.

²³ “Nie isoide ra cue ríia, jeacinona finoñedicue” raillanomo bu iese comecina facaia, iena naimie riñena. Iena naimie ríia, Cristona naimie raise ñoñena jira, jeacinona jai finode. Jiaimiena jeacinona cai finotai raillano, mare rafuedo cai jailla.

15

Jiaie creyentena cai canua

¹ Cristo rafuedo raise jaidicaí; iadedi jiaino Cristo rafuedo cai isoi nia jaiñedimaci. Naimacina cai canua. Ie jira dani cai jitaille rafuena finoñeticai;

² iadedi Cristo rafuedo naimaci raise jaillena, jiaie cominimo cai comeciaina cai facaja, naimacina cai canollena.

³ Eniruemo navui naimie ia, Cristo ie jitailla rafuena jiai finoñede; iadedi Jusiñamui jitailla rafuena finode. Naimiedi duere sefuide. Jusiñamui facaina lloraima micori Cristo ñaiana jiai cuete: “Jusiñamuina jeare ñaiacadimacimo, cuena jiai jeare ñaitimaci” cuete.

⁴ Naiemona cai fueollena, naiemona cai comeciái ocuiñotallena, Jusiñamuina jiaie cuegafuiaiði caimo ite. Naiemona Jusiñamui illanomo cai illemo ocuridicaí.

⁵ Jusiñamui cai comeciaina ocuiñotade. Naimie coniniri omoína uri itatajana jitaidicue. Cristo Jesús llua isoi, omoi uri illana jitaidicue,

⁶ daje isoi omoi comecia: lloillamona, Jusiñamuina omoi iobitallena. Cai Nama Jesucristo Moona Jusiñamui illamona, Jusiñamuina omoi iobitajana jitaidicue.

Judíuaiñedinodi Cristo rafuena jiai cacadimaci

⁷ Jaiie illanomona creyente omoi roracomo bia, Cristo caína feiñua isoi, Jusiñamuina iobitallena, naimiēna raise omoi feiño.

⁸ Iena nia lloiticue. Judíuaina canollena, Jusiñamui lloga uaina fuidollena, Cristodi bite. Jusiñamui tainona lloñede. Jusiñamui naimaci jaiagai micoriaimo ico suille rafuena jaiie llote. Eniruemo billanona, Cristo iena fuiduaibite.

⁹ Judíuaiñedino Jusiñamuina iobitallena, Jusiñamui naimacina duenailla jira, Cristodi bite. David micori Cristo lluana jaiie cuete: Judíuaiñedino motomo cue illamona ona iobitaitimaci. Ruamona cue muidona ona jiai iobitaitimaci.

¹⁰ Moisés micori jiai cuete:

Judíuaiñedino, Jusiñamuimo duide comini diga iobi.

¹¹ David micori jiai cuete:

Nana judíuaiñedino, Jusiñamuimo iobillacinona feca.

Nana comini naimiemo iobillacinona fecacabillasa.

¹² Isaías micori cuete:

Isai micori uruiaimona damie comuitajamona, naimiedi judíuaiñedinona sedaite.

Naimie naimacina jillobitallena, naimiemo ocuiritimaci.

¹³ Jusiñamui iemo omoína ocuiritate. Naimiēna omoi ñnuanona, naimie omoína caimare itatajana jitaidicue. Uri itatajana jiai jitaidicue. Iemei Jusiñamui Joreño naimie siño uai diga omoi jilluamo omoína ocuiritaite.

¹⁴ Cue amatiai, omoína uñoticue. Eo maredomoi. Cue lloga rafuena eo uñotomoi. Coninina llofueredomoi.

¹⁵ Iena omoi comecillena, dafuerie rafuena omoimo marefodo cueticue. Jusiñamui cuena fetuanona, ie rafuena cue llollena, cuena orede.

¹⁶ Judíuaiñedinomo Jusiñamui ie mare rafuena cue llollena, Cristo Jesús facaina maijidicue. Jusiñamui dibeimo naimacina cue itatajanona, Jusiñamui naimacina feiñollena, naimacimo lloticue. Jusiñamui Joreñodi naimacina jiai maretaite.

¹⁷ Jusiñamui dibeimo cue maijia jira, Cristo Jesús muidona cue maijiari iobidicue.

¹⁸ Cue maijiana marefodo lloiticue. Judíuaiñedinona Jusiñamuina ñnotallena, Cristodi cuena canode. Cue lluana cacadimaci. Cue illana ciodimaci.

¹⁹ Cristodi cuena siño rafuena finotate. Jusiñamui Joreño uaido cuena finotate. Iemei Cristona jai ñnotimaci. Jerusalémona Ilírico railla enirue dinomo Cristo ie mare rafuena ailluena cominimo raise jai lloticue.

²⁰ Nainomo Cristona nia uñoñedino dine navui cue jaiacana jira, nainomo Cristo rafuena lluidicue. Jai cacadino illanomo cue jaiacaiñena jira, nainomo lluaiñedicue.

²¹ Isaías micori buena jaiie cuete:

Cristo rafuena nia cacaiñedinodi iena cacaitimaci.

Naimiēna uñoitimaci cuete.

Romamo Pablo jaiacade

²² Nainomo cue maijiacana jira, Romamo omoi dine nia jaiñedicue.

²³ Diga nairaimo Cristo rafuena bene jai cue llua jira, cue maijille bene jai iñede. Diga años omoi dine cue jaiacana jira.

²⁴ Españamo cue jaia, omoi dine jaiticue. Omoi diga nano nigarui caimare ñaiticue. Ie mei Españamo cue jaillena, cuena canoïtomoï.

²⁵ Omoi dine jaiticue; iadedi Jerusalémo ite creyentiaïna cue canollena, nainomo nano jaiticue.

²⁶ Macedoniamo ite creyentiaïdi ucubena ofitatimaci. Acayamo ite creyentiaïdi ucubena jiaï ofitatimaci. Jerusalémo ite duerede creyentiaïna canoacadimaci. Jerusalémo ite creyentiaïna canollena, iena birui uiticue.

²⁷ Iena fecaacadimaci. Judúuaiñedimaci; iadedi judúuaïna canoacadimaci, naimacimo Cristo rafuena navui judúuai llua jira. Ie jira naimacina birui canodimaci.

²⁸ Naimacimo bie ucubena raise cue fecaja mei, Españamo cue jaillemona, omoi dine nano jaiticue.

²⁹ Omoi dine cue ria, naimie rafuena cue llollena, Cristo cuena raise canoite.

³⁰ Cue amatiaï, cai Nama Jesucristomo omoi duilla muidona, Jusiñamui Joreño coninaña omoïna isiruitaja muidona, Jusiñamui omoi jiiïa, cue facaina jiaï omoi jii.

³¹ Judeamo ite creyenteñedinomona cue jillobillena, Jerusalémo ite creyentiamo cue feaacalle ucubena naimaci raise feiñollena, cue facaina omoi jii.

³² Jusiñamui jitailla isoi omoi dine iocire cue rillena, iese omoi jii. Iemei omoi diga cue illemona, jafaicina oiticue.

³³ Jusiñamui omoïna uri itatajana jitaïdicue.

16

Romamo itinomo Pabloci ie uaina orede

¹ Febe raillañaïño omoi dine jaite. Naiñaïña omoi uïñuana jitaïdicue. Naiñaïñodi creyente. Cencrea railla nairai iñaïño. Cristo dibeïmo maijiano, nainomo ite creyentiaïna canocabide.

² Cristomo omoi duilla muidona, jiaïe creyentiaïna cai feiñoiacacabilla isoi, naiñaïña raise feiño. Diga comina naiñaïño canua jira, naiñaïño jitaïlle diese cano. Curna jiaï canode.

³ Priscila dine cue uaina oredicue. Naiñaïño ini Aquila dine cue uaina jiaï oredicue. Cristo Jesús facaina cue diga maijidiïaimaïaï.

⁴ Cue facaina niadedi fiodaitiaïmaïaï. Ie jira iaïmaïaïri iobidicue. Diga nairaimo judúuaiñede creyentiaï itimaci. Cuemona Cristo rafuena cadimaci. Cue facaina iaïmaïaï niadedi fiodailla jira, iaïmaïaïri jiaï iobidimaci.

⁵ Iaïmaïaï jofomo rollena bitino dine cue uaina oredicue. Epeneto dine cue uaina jiaï oredicue. Cue isiruigamie. Asia railla eniruemo itinomona naimiedi Cristona nano ñnotimie.

⁶ María dine cue uaina oredicue. Omoïna canollena, omoi motomo maijide.

⁷ Andrónico dine cue uaina oredicue. Junias dine cue uaina oredicue. Naïe iaïmaïaïdi cue comini. Cárcelmo danomo navui iticai. Jesucristo oretaganodi iaïmaïaïna marena ñaitimaci. Naimiena nia cue ñnoña facaise Cristona ñnotiaïmaïaï.

⁸ Amplias dine cue uaina oredicue. Cristomo naimie duilla jira, naimiedi cue isiruigamie.

⁹ Urbano dine cue uaina oredicue. Cristo facaina cai diga maijicabide. Estaquis dine cue uaina oredicue. Cue isiruigamie.

10 Apeles dine cue uaina oredicue. Cristomona naimiedi mare rafuedo jaicabide. Aristóbulo jofomo itino dine cue uaina oredicue.

11 Herodión dine cue uaina oredicue. Naimiedi cue comini. Narciso cominimona dajerie inotimaci. Naimaci dine cue uaina oredicue.

12 Trifena dine cue uaina oredicue. Trifosa dine cue uaina oredicue. Cai Nama facaina maijidiañuui. Pérsida dine cue uaina oredicue. Cue isiruiñañño. Cai Nama facaina eo maijide.

13 Rufo dine cue uaina oredicue. Cai Namana eo raise inote. Naimie ei dine cue uaina jiai oredicue. Naiñaññodi cue ei isoide.

14 Asíncrito dine cue uaina oredicue. Flegonte dine cue uaina oredicue. Hermas dine cue uaina oredicue. Patrobas dine cue uaina oredicue. Hermes dine cue uaina oredicue. Naimaci illanomo ite creyentiai dine cue uaina oredicue.

15 Filólogo dine cue uaina oredicue. Julia dine cue uaina oredicue. Nereo dine cue uaina oredicue. Naimie miriño dine cue uaina oredicue. Olimpás dine cue uaina oredicue. Nana naimaci illanomo ite creyentiai dine cue uaina oredicue.

16 Conini caimare omoi uaido. Diga nairaimo creyentiai itimaci. Nana naimacidi omoi dine naimaci uaina oredimaci.

17 Cue amatiai, daje rafuena nia lloiticue. Omoi comeciai daje isoi lloitañedino diga nabairiñeno. Uai uaitacabidino diga nabairiñeno. Omoi jai cacaja rafuena lloñedimaci; iadedi jiaie rafuena llotimaci. Naimaci diga nabairiñeno.

18 Cai Nama Jesucristo facaina maijiñedimaci; iadedi dani naimaci jitailla rana maijicabidimaci. Mare isoide llumona abina raise uiñoñedinona jifuetimaci.

19 Ailluena cominidi Cristona omoi inuana uiñotimaci. Ieri iobidicue. Marecinona finuana raise omoi uiñuana jitaidicue. Maraññedicinona omoi finuana jitañedicue.

20 Jusiñamuidi omoína uri itatate. Naimie omoína canoite, Taiñena anafetallena. Cai Nama Jesucristo omoína duenaillesa.

21 Omoi dine Timoteo ie uaina orede. Cue diga jiai maijicabide. Lucio ie uaina jiai orede. Jasón ie uaina jiai orede. Sosípater ie uaina jiai orede. Naimacidi cue comini.

22 Terciodicue. Pablo facaina bie cartana omoimo cueticue. Cai Namamo cue duilla jira, omoimo cue uaina oredicue.

23 Gayodi ie uaina jiai orede. Naimie jofomo ricabidicue. Creyentiaidi naimie jofomo rocabitimaci.

24 Erasto ie uaina orede. Naimiedi bie nairai ie ucube eenoraíma. Cuarto ie uaina orede. Naimiedi jiai creyente.

Jusiñamuimo iobillacinona jaca cai fecajasa

25 Cue mare rafue llua isoi, Jusiñamui omoi comeciaina ocuiñotarede. Jesucristo rafuena llocabiticue. Jusiñamuidi cominimo naie rafuena jaie uiñotañede;

26 iadedi Jusiñamui caina iena birui jai uiñotade. Nana comini iena uiñollena, Jusiñamui facaina lloraini micoriai iena jaie cuetimaci. Jusiñamui llua jira, Cristona comini inollena, nana cominido bie rafuena llocana birui jaide. Jusiñamuidi jaca ite.

27 Jusiñamuidi naga rana uiñote. Naimiemo Jesucristo mamecido iobillacinona jaca cai fecajasa. Mai. Macaibaite. Pablodicue.

CORINTOMO ITE CRISTONA HNOTHINOMO PABLO NANO ORETAGA RABE

Corintomo ite creyentiaimo Pablo cartana orede

¹⁻² Corinto railla nairaimo ite creyentiai, ¿nie isoidomoi? Pablodicue. Carta omoimo oredicue. Jusiñamui jitailla jira, Jesucristo rafuena cue lollena, cuena fetode. Sóstenes cue diga illa jira, omoi dine coco uaina oredicoco. Jesucristo dibeimona naimiedí cai ama. Jai Jusiñamui cominidomoi. Jesucristomo omoi duilla jira, Jusiñamui omoína jai marebicaitate. Jusiñamui omoína fetode, naimie iena. Ua nana cai Nama Jesucristona sedadinodicaídi Jusiñamui iena.

³ Cai Moo Jusiñamui, cai Nama Jesucristo diga, omoína jai duenaite. Iena uiñocana mai omoi jai. Iaimaiaí omoína uri jai itatatiiaímaiaí. Iena omoi uiñocana mai omoi jai.

Cristo muidona Jusiñamuimona ailluena feiñotícaí

⁴ Jusiñamui diga cue ñaia, omoi facaina iobillacinona jaca fecadicue. Jesucristomo omoi duillamona, Jusiñamui omoína jai duenaite. Ie jira naimiemo omoi facaina iobillacinona jaca fecadicue.

⁵ Jusiñamui omoína duenaillamona, ie rafuena omoi lollena, naimiemona ailluena uaina feiñotomoi. Cristomo omoi duillamona, naga icaiño Cristo rafuena omoi jino lloia, omoína eo canode. Omoína naimiemo ite rafuena raise uiñotade.

⁶ Ie muidona Cristo rafuena raise ñnotomoi. Cristo rafuena cai jino lluamona, naimiemo raise ñnofidomoi.

⁷ Ie muidona Jusiñamuimona omoimo jaca buena fiebiñede, naimie dibeimo omoi raise maijillena. Naimie dibeimo omoi raise maijiamona, naimie dibeimo jaiie creyentiaina raise itatacana jaidomoi. Cai Nama Jesucristo abido billemo iocire omoi ocurillanona, Jusiñamuimona ailluena rafuena feiñotomoi.

⁸ Jeacinona omoi finocabi raillano, naimie nia abido biñelle dinori Jesucristo omoi comeciaina raise sedaite. Cai Nama Jesucristo abido bia, nicino omoimo iñena muidona, omoína duere finoñeite. Naimie bia, naimacimo jeacino nia illa jira, naimiena ñnoñedinona duere finoite.

⁹ Jusiñamui ie lloga uaina jaca finoite. Naimie ñnogamie. Naimie Jitona omoi nabaillena omoína fetode. Naimie Jitodi cai Nama Jesucristo.

Naimaci comeciái daje isoi lloñedimaci

¹⁰ Cue amatiai, omoimo rafuena lloiticue. Cai Nama Jesucristomo omoi duilla jira, iena lloiticue. Omoi comeciái daje isoi lloillana jitaídícué. Daje isoi omoi comeciái facajana jitaídícué.

¹¹ Cloé raillamie cominimona bie rafuena cue fidia jira, iese omoimo lloiticue. “Omoi comeciái daje isoi iñedomoi” naimie llote.

¹² Omoimona damierie raitomoi: “Dani Pablo llofuia dibecinodo jai jaidícaí”. Damierie raitomoi: “Dani Apolos raillamie llofuia dibecinodo jai jaidícaí”. Damierie raitomoi: “Dani Pedro llofuia dibecinodo jai jaidícaí”. Damierie raitomoi: “Dani Cristo llofuia dibecinodo jai jaidícaí” raitomoi. Nana iese itomoi. Iemona omoi comeciái daje isoi iñedomoi. Cloé cominimona iese fididícué.

13 Ero, diga omoi jilloitaraini iñede. Omoi jeacinomona omoi jillobillena, dama Cristo illa. Omoi facaina cruzmo cuedi fiodañedicue. Cue dibeimo omoi illena cue bautizañegaomoi.

14 Omoína cue bautizañena jira, omoimo ite rafue cuemona comuiñena jira, iobidicue. Dama Cristina bautizadícue. Gayona jiai bautizadícue.

15-16 Estéfnas jofomo ite cominina bautizadícue. Jiaie cominina cue bautizajana comeciñedicue. Ie muidona: “Pablo facaina bautizadícaí” llonidomoi. Daje isoi omoi comeciái lloñenia, cue muidonañede.

17 Ailluena cominina cue bautizallena, Cristodi cuena oretañede; iadedi naimie rafuena cue llofuellena, cuena oretate. Eo abina uiñoraima isoi omoimo cue llofueticuedena, cue lloga rafuemo omoi comeciaina facañedomoi. Ie jira eo abina uiñoraima isoi omoimo llofueñedicue. Cristo fiodaillamona, omoi jeacinomona naimie omoína jillotate. Iena omoi feitañenana jitaidicue.

Cristo finoca rafuemonu Jusiñamui uai siñonana uiñotícaí

18 Cristona ñnoñedinomona cruzmo Cristo fiodailla rafuedi jamaifue. Naimacidi faificana jai jaidimaci. Jusiñamuimona naie rafue illa jira, caimona naie rafuedi siño. Naie uaidi diga comini comeciái meidorede. Caídi naie rafuena ñnotinodícaí.

19 Ero, Jusiñamui facaina lloraima micori Cristona ñnoñedinona jai eute: Jusiñamui llote: “Abina uiñoraini imaci uiñuacinona saitaiticue. Abina baitadino imaci baitajacinona saitaiticue” llote. Ie muidona naie isoide comini jilloñenana jai uiñotícaí.

20 Naie isoide comini uiñuacinomona jaca jillonidícaí. Abi uiñoraima uiñuacinodi Cristo fiodailla rafue baifemo fañede. Moisés micori cuega-fuena uiñoraima uiñuacinodi Cristo fiodailla rafue baifemo fañede. Uaina uaitatimie birui ite uiñuacinodi Cristo fiodailla rafue baifemo fañede. Jusiñamuidi naimiena uiñoñedino imaci abi uiñuacinona jai jamaitate. Iena naimie jamaitajamona, naimaci uiñuacinodo naimaci jilloñenana jai uiñotícaí.

21 Ie jitaillacino diese Jusiñamui finua jira, naimaci abi uiñuacinomona naimiena ñnoñedimaci. Ie jira naimie mare jitaillacinomona, naimiena ñnotinona jai jillotate. Naimaci jeacinomona naimacina jai jillotate. Cristo rafuena caí lluamona ñnotimaci. Jusiñamuina ñnoñedinodi naie rafuena: “Jamaifue” raitimaci.

22 Siño rafuena naimaci cioacana jira, judíuai railla cominidi iese raitimaci: “Siño rafuena Jusiñamui finoa, omoi lloga rafuena ñnoitícaí” raitimaci. Grieguai railla comini dinena raitimaci: “Omoi lloga rafuena caí abina uiñuacino ie isoi itena, iena ñnoitícaí” raitimaci;

23 Iadedi Cristo rafuena llocana jaidícaí. Cruzmo naimie jai fiodaillana llotícaí. Ie jira judíuaidi caí lloga rafue muidona iciritimaci. Naiena oiacañenano iciritimaci. Damie naimaci illaimana jaillemo ocuridimaci. Naimaci ocurillamie fiodaillamo naimaci comeciaina facañedimaci. Cristo fiodailla jira, raitimaci: “Naimiedi caí ocuriñenamie” raitimaci. Judíuaiñedino dinena raitimaci: “Omoi lloga rafuedi jamaifue” raitimaci. Ailluena comini caí lloga rafuena jitaiñedimaci;

24 Iadedi Jusiñamui damerie judíuaina jai fetode. Dajerie judíuaiñedinona jiai jai fetode. Cruzmo Cristo fiodaillamona, jeacino anamona naimaci jillua jira, naie fetocano dinena Jusiñamui uai siñonana uiñotimaci. Cristo finoca rafuedo naimaci jilluamona, Jusiñamui abina uiñuana jiai uiñotimaci.

²⁵ Jusiñamui Cristona orede, cai jeacino facaina naimie fiodaillena. Jusiñamuina ñinoñedinomona Cristo finoca rafuedi jamaifue. Ebinidifue. Caimona Cristo finoca rafuedi Jusiñamui ñinoñedino uiñuacino baifemo faite.

²⁶ Cue amatiai, Jusiñamui omoina navui fetode; iadedi ¿nie isoidomoi? Jamai bue isoidomoi. Omoi comeciaina iemo faca. Jusiñamuina ñinoñedinomona abina uiñoñedomoi. Omoi creyentiai dibeimo eo abi uiñotino raise iñedimaci. Omoi creyentiai dibeimo illaicomini raise iñedimaci. Omoi creyentiai dibeimo ucuberedino raise iñedimaci. Jusiñamui ie isoidinona eo fetofede;

²⁷ iadedi abina uiñoñedino raillanodomoina fetode, eo abina uiñotino dinena meidaillena. Illaicominiñedinona jiai fetode, illaicomini dinena meidaillena.

²⁸ Jamai bue isoidinona fetode, jamai bue isoñedino baifemo faillena. Jusiñamuimona jamai bue isoñedinodi jamai comini.

²⁹ Ie muidona jaca buna Jusiñamui uicomona abina iedoñena.

³⁰ Caina ie cominina Jusiñamui jaitaja jira, Jesucristomo duidicai. Cristomona Jusiñamuina uiñoticai. Cristo fiodailla jira, Jusiñamui cai jeacinona faitate. Iemona jeacino cai finoñellena, caina canocabide. Jusiñamuidi jeacino anamona caina jiai jai jillotate.

³¹ Jusiñamui facaina lloraima micori iena jaie cuete: “Bu abina iedoiacania, nana Cristo finoca rafue diga naimie abina iedua” cuete.

2

Pablodi cruzmo Cristo fiodailla rafuena llocabite

¹ Cue amatiai, omoi dine navui cue rillamona, Jusiñamuimona cue feñoga rafuena llofueticue. Omoi baifemo eo abina uiñoticuedena, iese niade llofueñedicue.

² Daje rafuemo cue comecina facacabidicue. Ie jira omoi mo dama Jesucristo rafuena llofueiacadicue. Cruzmo naimie fiodailla rafuena llofueiacadicue.

³ Omoi motomo navui cue ia, meiruiocaillamona jacinaioidicue. Jusiñamui facaina cue raise jino lloñeni raillano jaciruioidicue.

⁴ Comini abi uiñuacinodo omoi mo llofueñedicue; iadedi omoi jeacinomona omoi jilluamona, Jusiñamui Joreñodi omoina cue lloga rafue siñonana uiñotate.

⁵ Jusiñamuidi cue iese llofuiana jitaide. Comini abina uiñuacinona omoi cacajamona, Cristona ñinoñedomoi; iadedi Jusiñamui omoina jillotaja jira, jai ñnotomoi.

Jusiñamui Joreñodo bie rafuena uiñoticai

⁶ Comini abi uiñuacinodo llofuecabiñedicue; iadedi Jusiñamuimona ite abi uiñuacinodo llofueticue. Cristona raise ñnofidinomona abi uiñuacinodo llofueticue. Cristo facaina llorainidi cue iso jai llofuecabitimaci. Cominimo jai ite uiñuacinodo llofueñedicai. Illaicomini uiñogacinodo llofueñedicai. Ico fañitimaci. Ico jiai uainicaitimaci. Ie jira naimaci uiñogacinodo llofueñedicai;

⁷ iadedi Jusiñamuimona abi uiñuacinona cai feñuamona, iedo llofueticai. Nano dofoconi, enirue nia finoñenia, naimie comeci iena uiñote. Monamo naimie ebirede illanomo ico cai illena jitaide. Iena jaie cai uiñoñedicai. Jusiñamui jaca buna iena jaie uiñotañede.

⁸ Birui ite illaicominidi Jusiñamuimo ite rafuena nia uiñoñedimaci. Iena uiñotimacidena, cruzmo cai ebirede Namana meineñedimaci. Naimie uai

ebirede. Nana ra naimie jai finua jira, naimie uai siño. Jusiñamui rafuena raise uiñoñedimaci; iadedi Jusiñamui caina iena uiñotade.

⁹ Jusiñamui facaina lloraima micori iena jaie cuega:

Jaca buna naimiena ñnotino facaina Jusiñamui finoca rafuena cioiñede.
Jaca buna iena cacaiñede.

Jaca buna iemo comecina facañede

cuega. Jusiñamui rafuena uiñoñedinona naie rafuena jaca uiñoñeitimaci; iadedi naimiena isiruitino naie rafuena uiñotimaci.

¹⁰ Birui Jusiñamui caina iena uiñotade. Ie Joreño do caina uiñotade. Ie Joreño naga rafuena uiñote. Nana Jusiñamui comecimo iticinona jiai uiñote.

¹¹ Jaca budi jiaimie comecimo iticinona uiñoñede. Dama naimie iena uiñote. Ie isoide. Jaca budi Jusiñamui comecimo iticinona uiñoñede. Dama naimie Joreño iena uiñote.

¹² Jusiñamuimona ie Joreño na jai feñoticaí. Jiaie cominimona naie Joreño feñoñedicaí. Jusiñamui Joreño dî caina Jusiñamui caimo caidiñeno fecaca rafuena uiñotade.

¹³ Omoimo naie rafuena llofuecabiticaí. Cominimona fueoga uaido llofueñedicaí; iadedi Jusiñamui Joreño caimo llofuiua uaido llofueticaí. Ie jira Jusiñamui Joreño ite cominimo naie rafuena llofuecabiticaí.

¹⁴ Jusiñamuina ñnoñedinodi Jusiñamui Joreño mona iticinona feñoñedimaci. Naimacimona naie rafue jamaifue. Iena cacaiñedimaci. Iena jiai uiñoñedimaci. Dani Jusiñamui Joreño illa cominidî naiemo cacarefidimaci.

¹⁵ Nana Jusiñamui jitailla rafue diese cacadimaci. Jusiñamuina ñnoñedinodi Jusiñamui Joreño illa cominî illa rafuena jiai raise uiñoñedimaci.

¹⁶ Jusiñamui facaina lloraima micori iena jaie cuega: “Jaca buna Jusiñamui comecimo iticinona uiñoñede. Budi naimiena jiai llofuenide” cuega. Ero Cristo comecimo iticinona cai uiñua jira, Jusiñamuina ñnoñedinodi caina raise uiñoñedimaci. Caina jiai llofuenidimaci.

3

Danomo Jusiñamui dibeimo maijidimaci

¹ Cue amatiaí, Jusiñamui Joreño anamo itinona omoi raise itomoidena, omoina llofueñedicue. Omoi jitaillacinodo nia omoi jailla jira, omoina llofueticue. Cristo rafuedo janore jai jaidomoi. Jusiñamui uruiaina jai jaidomoi; iadedi monoi ijina jirode urue isoidomoi. Jusiñamuimona nia moonaiñedomoi isoidomoi. Creyentiaina omoi jailla mei, Cristo rafuedo eo jaiñedomoi.

² Feinide rafuena navui llofueticue. Eo feirede rafuena omoimo llofueñedicue. Omoina iena nia llofueñedicue. Omoi uruiaí janore moonaila mei, guitimaci. Ie isoide. Cristona cai ñnua mei, naimie rafuena ñnocana cai jailla; iadedi omoi raise jaiñena jira, Jusiñamuimona nia moonaiñedinona isoidomoi.

³ Nia omoi jitaillacinodo jaidomoi. Jusiñamui Joreño anamo nia raise iñedomoi. Coninina abina uradoidomoi. Omoi comeciaí daje isoi lloñedomoi. Jusiñamuina ñnoñedinona isoi nia itomoi. Jamaí ebe isoi nia itomoi.

⁴ Omoimona damierie: “Pablo llofuiua dibecinodo jaidicaí” raitomoi. Jiaino: “Apolos raillamie llofuiua dibecinodo jaidicaí” raitomoi. Iese omoi raia, Jusiñamuina ñnoñedinona isoi itomoi. Ie jira iese raíñeno.

⁵ Jamaí bue isoidicue. Apolos jiai jamaí bue isoide; iadedi Jusiñamui dibeimo coco maijiamona, Cristo rafue coco llofuiamona, iena ñnotomoi. Jusiñamui cocomo llua isoi, ie rafuena lloticoco.

⁶ Naie rafuena cue llofuiamona nano ñnotomoi. Ie mei Apolos iena dane llofuefe. Iese llofueuidicoco; iadedi dama Jusiñamui omoïna naie rafuena ñnotacana jaide.

⁷ Ie muidona naiemona cai fueua. Jamai bue isoidicoco. Jusiñamui coco baifemo faite. Ie jira naimie omoïna ñnocana jaitate.

⁸ Daje uaina Apolos diga maijidicue. Coco maijia diese Jusiñamuimona coco ñbana feiñoticoco.

⁹ Jusiñamui facaina maijidicoco; iadedi naimiedi omoïna ñnocana jaitate. Naimiedi omoi comeciaina marena itatacana jaitate.

¹⁰ Jusiñamui cuemo llua isoi, naimie cuena cranua diese, Cristo rafuena llofueticue. Cristo rafuena eo cue uiñuamona, Cristo rafuena omoïmo navui llofueticue. Cue luamona Cristona ñnotomoi. Birui jiaimie omoïna naie rafuena jai llofuefe. Omoi comeciaino naie rafue raise itabillena, omoïna llofuefe. Bu omoïna llofueia, omoi comeci marena illacinomo naimie comecina facajanona, omoïna naimie llofuecabilla.

¹¹ Omoi jeacinomona omoi jilloillena, jaca daje rafue ite. Jiaie rafuedi iñede. Iena omoïmo jai llofueticue. Naie rafuedi Jesucristona ñaite.

¹² Iena raise atona bu llofueia, uanaicinona jaca llofuiamona, cominina Cristona ñnocana jaitate. Naie rafuedi naimaci comeciaino raise itabide. Iena raise atona bu llofueñenia, uanaicinona jaca llofueñenia, cominina Cristona ñnocana jaitañede. Naie rafuedi naimaci comecimo raise itabiñede.

¹³ Jusiñamuidi nagamie ie llofuiacinona ico lloite. Jesucristo abido bia, Jusiñamui nie isoidicinodo naga naimie facaina maijidino llua lloite. Naimaci llogacinona eo facaciite.

¹⁴ Ie mei Cristo rafuena raise atona llotinodi Jusiñamuimona ñbana feiñoitimaci.

¹⁵ Cristo rafuena raise atona lloñedinodi Jusiñamuimona ñbana feiñoitimaci. Naimaci niade jiai faifitimaci; iadedi faifititimaci. Jusiñamui diga jaca iitimaci; iadedi tainomo maijidimaci.

¹⁶ Jusiñamui ie illano omoi comeciaino illana uiñotomoi. Naimie Joreño omoïmo illa jira, Jusiñamui ie illanodi omoi creyentiaia.

¹⁷ Cristo ñibeimona omoi creyentiaina bu abido danomo itataia, Jusiñamui naimiena duere finoite. Jusiñamui omoïmo jai illa jira, naimiemo jai duidomoi. Ie jira naimie ñibeimona omoïna itatatimiena duere finoite.

¹⁸ Bie rafuedo omoi raise jaillena, dani omoi abiaïna jifueñeno. Creyenteñedino uiñuacinodo jaiñeno. Omoïmona bu iedo jaiacania, naimiemo llono: “Naie isoide rafuedo o jaiñeno”. Iedo naimie jaia, creyenteñedinomona abina uiñote; ia Jusiñamuimona abina uiñoteite. Jusiñamuimona abina uiñotinona omoi jaillena, creyenteñedino uiñuacinodo omoi jaiñeno.

¹⁹ Jusiñamuimona naimiena ñnoñedino uiñuacinodi jamaifue. Jusiñamui facaina lloraïma micori jaie cuela: “Jusiñamuidi comini abi uiñuacinona uiñuanona, naimacina jai emodofide. Naimacina jai duere finode”.

²⁰ Jiai cuela: “Jusiñamuidi abi uiñotino railla comini imaci comeciaino facajacino jamaifuena uiñote”.

²¹ Ie jira omoi llofuerainiri abi iedoñeno. Jusiñamuimona nana rafue omoïmo jai illa jira, naimaci abi uiñuacinodo abina iedoñeno.

²² Marena omoi comeciaino illacino jitai raillano, Cristo omoi ñine caina oretate. Cuena oretate. Apolona oretate. Pedrona oretate. Naiemona omoi ra ollena, omoi jitai raillano, eniruedi ite. Omoi jitai raillano, birui nana omoïmo ite rafuedi suide. Omoi jitai raillano, jiairuido nana omoïmo

iite rafuedi suite. Nia omoi fioidaifienia, Cristo omoina canoite. Omoi fioidaia, naimie dine jaitomoi. Naiemona marena omoi comeciai illacino jitai raillano, ua nana rafue omoimo jai ite.

²³ Cristomo omoi jainaiailla jira, naimie anamo itomoi. Jusiñamuimo Cristo jainaiailla jira, naimie Jusiñamui jitailla rafuena jaca finocabide. Ie jira naimie jitaillacinona finocana omoi jai.

4

Cristo fetocano naimie dibeimo maijide

¹ Caimo omoi comeciaina faca. Cristo dibeimo maijidicai. Jusiñamui rafuena llocana jaidicai. Iena jaie uiñoñedicai; iadedi naimie caina uiñotaga rafuena birui llofueticai.

² Ero, naga patródi naimie dibeimo maijidino naimie lloga uaina ñnuana jitaide. Ie isoide. Jusiñamuidi ie facaina lloraini naimiena naimaci ñnuamona naimie rafuena raise luana jitaide.

³ Cue uaina omoi uaitañenia, iena omoi uaitaia, jiaino iena uaitaia, iemo comecina facañedicue.

⁴ Cuemo nicino ia, iena uiñoñedicue; iadedi Cristomona cue comecimo jeacino nibai ite. Ia, naimie cuemo lloite. Iemona cuena duere finoite.

⁵ Ie jira: “O lluacino mare” cuemo lloñeno. “O lluacino marañede” cuemo jiai lloñeno. Cai Nama nia abido biñenia, iena cuemo omoi lloñeno. Naimie bia, nana comini comeciaino ite rafuena uiñotaita. Naimaci comeciaino ite jitaillacinona uiñotaita. Iemona naimaci maijia dinori Jusiñamuimona iobillacinona feiñoitimaci. Naie facaise cuemo ite rafuena lloite. Ie jira nia cuemo lloñeno.

⁶ Cue amatiai, naie rafuena omoi raise uiñollena, Apolona ja ñaiticue. Cocomona omoi fueollena, cuena jiai ja ñaiticue. Omoi facaina ñaiticue. Jusiñamuina cuegafue llua isoi, omoi illana jitaidicue. Omoi llorainiri tainomo iobiñeno. Omoi Cristo facaina llorainimona damie jiaie lloraima baifemo faiamo omoi comeciaina facañeno.

⁷ Nana omoi llofuerainidi daje isoidimaci. Jusiñamuimona nana naimacimo ite uaina feiñotimaci. Dani naimaci comeciainona iena naimaci oñena jira, ie diga abina iedoñeno.

⁸ “Nana Jusiñamuimona iticinona jai feiñoticaí. Jusiñamuimona nana cai jitaillacinona caimo jai ite. Jusiñamui sedajanomo illainina isoi jai iticai” omoi comeciaina facadomoi; iadedi nia iese iñedomoi. Nainomo itomoidena, nainomo coco jiai illa jira, cuemona eo mare. Nainomo iticocodena, cuemona eo mare; iadedi jiaie rafuemo cue comecina jai facadicue.

⁹ Jusiñamuidi nana omoina cue baifemo faitatate raillanomo cue comecina facadicue. Cristo rafuena llorainidicai; iadedi cue baifemo omoi faiamo cue comecina facadicue. Omoimona jamai bue isoidicai. Nana comini duere cai illamo raise eruaidimaci. Jusiñamui jaienisaídi duere cai illamo jiai eruaidimaci.

¹⁰ Cristo rafuena cai llua muidona, omoimona ebe isoidicai. “Cristo rafuena raise ñnuanona, iedo raise jaidicai” raillanomo omoi comeciaina facadomoi; iadedi Jusiñamuimona iese iñedomoi. Omoimona cai uaidi raise baiñede. “Cai uaidi caimo raise baite” raillanomo omoi comeciaina facadomoi; iadedi Jusiñamuimona iese iñedomoi. Omoimona jamai bue cai isoilla jira, cairi jaisitomoi. “Jiaie comini cairi iobidimaci” raillanomo omoi comecina facadomoi; iadedi Jusiñamuimona iese iñedomoi.

11 Cai guille buedi jaca iñede. Iniroinidicai. Jiaie comini caina duere finodimaci. Jofonidicai.

12 Cai ra ollena, cai onolli diga duere maijidicai. Comini caina jeare ñaitimaci; iadedi ibana oñedicai. Naimaci diga marena ñaiticai. Caina duere finodimaci; iadedi uai oñeno ibana oñedicai.

13 Cai joreñona jeare ñaitimaci; iadedi cai ñinena naimaci diga marena ñaiticai. Naimacimona jamai bue isoidicai. Iese caimo naimaci comeciai nia facadimaci; ia Cristo ñibeimo ie rafuena nia llocana jaiacadicai.

14 Bie carta cue cuiamona, omoína meiruitaiaicaiñedicue; ia omoína nia llofueiacadicue. Isiruiga uruiaidomoi isoidomoi. Ie jira bie rafuena omoi raise uñuana jitaidicue.

15 Omoína Cristo rafuena llofuellena, diga lloraini omoimo ite; iadedi cuemona Cristo rafuena omoi nano cacaja jira, omoi moo isoidicue. Cue uruiaina jai jaidomoi isoidomoi.

16 Ie jira omoimo cue llogacinodo mai omoi jai.

17 Iedo omoi jaillena, omoína canollena, omoi ñine Timoteona jai oredicue. Naimiena isiruiticue. Naimiedi Cristo ie ñinogamie. Cuemona Cristo rafuena naimie cacajanona, iena ñinote. Ie jira naimiedi cue jito isoide. Creyentiai illanomo cue ia, Cristo rafuena jaca llofueticue. Naie rafuedo cue jitailla isoi, iedo omoi raise jaillena, naimiedi omoína llofueite.

18 “Pablo caina jaciruilla jira, naimie cai ñine biñeite” raillanomo omoi comeciaina facajamona, omoimona damierie jai abina biridomoi.

19 Iese comeciaina facadomoi; iadedi Jusiñamui jitaia, omoi ñine raire jaiticue. Ie mei ñie isoide uai naie abina biridinomo illana uñioiticue. Naimaci ñaiacinodo iena uñioñeiticue; iadedi naimaci finoca rafuemona iena uñioiticue.

20 Ero, jamai ñaiamona, Jusiñamui anamo naimie jitailla isoi iñedicai; iadedi naimie finoca rafuedo cai jaillamona, naimie jitailla isoi iticai.

21 Omoi ñine ico cue ria, ¿ñiese omoi diga ñaiticue? Cuemo llono. Cue llwana omoi ñinoñenia, omoimo riire lloiticue. Cue llwana omoi ñinoia, omoína cue isiruillamona, omoimo fecuise lloiticue. Ie jira cuemo llono.

5

Pablo eo jearede rafuena finodimienna riire llote

1 Jiaie rafuena omoimo lloiticue. Eo jearede rafue omoi motomo jai illana jai fididicue. Jusiñamuina ñinoñedino naie isoide rafuena finoñedimaci; iadedi omoimona damie ie eicañona ote, ie aina.

2 Jearede rafue omoi motomo ite; iadedi nia abina iedotomoi. Naie isoide rafue omoi motomo navui suilla jira, ¿bue ñellena sunaiñedomoi? Omoi rocabillacomu naimie bia, naimie fo billana rairui.

3 Omoi ñine iticuedena, bie rafue ñani omoi siadollena, omoi ñanomo ofillena lloiticue. Omoi ñine cue iñena jira, cue comecidi omoi ñine ite. Bie rafue omoi comecina facaoidicue. Bie rafue omoi diga are siadoñeiticue; iadedi naie rafuena finodimienna cue ñaiana jai uñioiticue.

4 Cai Nama Jesús facaina cue ñaiamona, naimienna ñaiticue. Ofillanona bie rafue omoi siadollena, omoi diga cue iacanana omoi comeci. Omoína canollena, cai Nama Jesucristo omoi diga ite.

5 Taifemo jearede rafuena finodimienna sofe. Taife anamo naimie jai illa jira, duere sefuite; iadedi naiemona fueoite. Duere sefuillamona, Cristo ñibeimo dane iite. Cristo ico abido bia, naimiedi Cristo ñibeimo dane raise illa jira, Cristo naimienna duere finoñeite.

⁶ Jearede rafue omoi motomo illa jira, ¿buena abina iedotomoi? Janorede siritate ra juilliruaimo fajamona, nana naie juilliruai sircana jaitate. Iena uifotomoi. Ie isoide. Janorede jearede rafuemona, eo ailluena jearede rafuena oni jaide. Omoimo ite jearede rafuemona oni omoi i, naiemona jearede rafuedo omoi jaisa.

⁷ Judiuai railla cominidi pascua railla rafuena finoacania, nana siritate ra naimaci jofuemona oni dotadimaci. Ie isoide. Cristo jitaille isoi omoi illena, omoi comeciaino ite jeacinona fainonocai. Jeacino anamo omoi jai illa jira, iena fainonocai. Pascua rafue facaiseconi judiuai cominidi toica llaudaijai fajamona, naimaci jeacino facaina Jusiñamui ibana ofiede. Cai facaina Cristo jai fiodailla jira, cai jeacino facaina Jusiñamui ibana ofeite; iadedi iemona naimiena nabaidica. Ie jira jeacinona finocana cai jaiñeno.

⁸ Cai facaina Cristo fiodailla jira, cai jeacinona fainocailanona, Jusiñamui jitaille isoi mai cai i. Jeacinona finocana cai jaiñelli. Uanaicinodo mai cai jaiñi.

⁹ Jiaie cartana omoimo navui oredicue. Imaci aiñede riñoniai diga itino diga nabairiñellena lloticue. Naiñaiñuui iniñede iñiaai diga itiañaiñuui diga nabairiñellena lloticue.

¹⁰ Nibai iena raise cacaiñedomoi. Ie jira iena dane lloticue. Cristona iñoñedinona ñaiñedicue. Naimaci aiñede riñoniai diga ia, naiñaiñuui iniñede iñiaai diga ia, naimaci rana nicidoia, rana naimaci fiaa, jiraraina naimaci sedajia, naimaci diga omoi nabairiñenana ñaiñedicue. Iena rairuiñedicue. Iena cue rairuidicuedena, naganomo Jusiñamuina uifoiñedinno illa jira, ¿ninomo niadedi iticai?

¹¹ “Cristona iñoticaai” raitinona ñaiticue. Naimaci aiñede riñoniai diga naimaci ia, naiñaiñuui iniñede iñiaai diga naiñaiñuui ia, rana naimaci nicidoia, jiraraina naimaci sedajia, jiaie cominina naimaci jeare ñaia, naimaci jifaicabia, rana naimaci ficabia, naimaci diga nabairiñeno. Naie isoidino omoi jofuemo feiñoñeno.

¹²⁻¹³ Cristona iñoñedinona ñaiñedicue. Naimaci rafue cuemo duiñede; iadedi maraiñedicinona naimaci finoia, Jusiñamui naimacina duere finoite; iadedi Cristona iñotino maraiñedicinona finoia, naimacimo riire llono. Omoi motomo ite jearede rafuena finodimiena omoi rocabillacomo bia, naimie fo billana rairui.

6

Cristona iñoñede juezmo jiaie creyentena llogidoñeno

¹ Jiaie omoi finoia rafuena fididicue. Jiaie creyentedimie diga omoi nicino ia, ¿bue ñellena jiaie creyentiaai dine jaiñedomoi, naicinona siadollena? ¿Bue ñellena Cristona iñoñede juez dine naimiena meiruiñeno llogidotomoi?

²⁻³ Jesucristo abido bille mei, Cristona iñotindicaicadi Cristona iñoñedinona duere sefuillena lloticai. Taiñe comini duere sefuillicinona ico jiaai lloticai. Iena uifotomoi. Naimacimo omoi ico llua jira, ¿bue ñellena birui omoimo ite rafuena dani omoi raise finonidomoi?

⁴ Nicino omoimo ia, ¿bue ñellena Cristona iñoñedinno dine jaidomoi? Omoimona naimaci jamai bue isoidimaci. Naie isoide jueces omoimo ite rafuena raise uifoiñedimaci.

⁵ Omoi meidaillena, iena omoimo jai lloticue. Naie nicinona raise omoi siadollena, iena raise finollena, omoimona nibai damie ite, iena raise finollena.

6 Iese finocabiñedomoi; iadedi nicino omoi creyentiaimo ia, Cristona iñofedimie mo jiaie creyentena llogidocabitomoi.

7 Jiaie creyentena omoi llogidoia, Cristo dibeimo raise iñedomoi. Naicino raise omoi finoñenia, uai oñeno anamo ee. Naimiemona omoi duere sefuia, dama ite.

8 Iese iñedomoi; iadedi dani conini jiaie creyentiaina duere finocabidomoi. Naimaci rana fiidomoi. Omoi amana duere finodomoi.

9 Jusiñamui sedajanomo naimiena iñofedino duiñeitimaci. Naimaci isoi nia iacadomoi; iadedi Cristo dibeimo omoi illa jira, naimaci isoi inidomoi. Ie jira naimaci illamo omoi abina rairui. Bie isoidino Jusiñamui ie cominina sedajanomo jaca duiñeitimaci: imaci aiñede riño diga itino, imaci iniñede iima diga itino, jiraraina sedacabidino, daje isoide iima diga conima aifiedotino, daje isoide riño diga conifño aifiedotino,

10 rana bainino fiicabidino, rana nicidocabidino, jifaicabidino, jiaie cominina jeare ñaicabidino, cominimona rana bairodino. Nana naie isoidino Jusiñamui ie cominina sedajanomo duiñeitimaci.

11 Omoimona dajerie iese jaie itomoi; iadedi jiaie rafuedo birui jaidomoi. Cai Nama Jesucristo fiodailla jira, Jusiñamuidi omoi jeacinona jai oni dotade. Iena jai feitate. Ie Joreño uaido omoina ie cominina jai jaitate. Ie muidona naimiemona jai marebicaidomoi.

Jearede rafuemona abina rairui

12 Cristo dibeimo omoi illa jira, ¿nie se dani omoi jitaillacinodo jaiacadomoi? Diga Jusiñamui rairuiñega rafue ite. Creyentia iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Dajerie rafuena cai finocabiñelli, naie rafue anamo cai i raillano. Dani Cristo rafue anamo cai illi.

13 Raitomoi: “Nie isoide guille cai guiacania, nie isoide rafue cai finoacania, caimona mare” raitomoi. Ero, diga rafuena finoredicai. Naiemona jeacino cai oñena jira, aimetaia, guiredicai. Jusiñamuidi cai aimetaillafue ico saitaite. Dajerie rafuena cai finoñena, naiemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai iniñede iima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite.

14 Cristo fiodaite; iadedi fiodaillamona, Jusiñamui na ie abi diga naimiena jillotate. Cai fiodaia, ie uaido na cai abiai diga caina ico jillotaite. Cai abi jaca illa jira, jearede rafuena birui cai finoñena.

15 Cristomo jainaiaidicai. Iena uiñotomoi. Omoi ainiañede riño diga omoi ia, naiñaiñuaimo jai duidomoi. Cristo naie isoide riñomo jaca duiñena jira, naiñaiño diga iñeno.

16 Ie aiñede riño diga bu ia, ie ai illa isoi, jai dajena jaidiaimaiai. Ie jira Jusiñamui jaielote: “Riño diga iima illa jira, jai dajena jaidiaimaiai” lloite.

17 Cai Nama Cristomo bu duia, dajena jai jaidiaimaiai. Jusiñamui Joreño iaimaiaimo illa jira, iaimaiai comeci daje isoi jai lloide.

18 Ie jirari naie jearede rafuemona abina rairui. Iesede bu finoia, jearede rafue ie abimo jai finode. Caimanide rafue ie abi diga finode. Jiaie maraiñede rafue bu finoia, naimie abimo jearede rafue finoñede.

19 Naimiemo omoi duillanona, Jusiñamui Joreño omoimo illana uiñotomoi. Ie illanodi omoi creyentia. Jusiñamuimo jai jainaiaidomoi. Ie muidona omoi jitaillacinodo jaiñeno.

²⁰ Omoi jeacino facaina Cristo fiodailla jira, Jusiñamui cominina jai jaidomoi. Ie jira omoi finoca rafuemona Jusiñamuina eo iobita.

7

Pablodi iima ie aina ua rafuena ñaite

¹ Dajerie rafue cuemo jicanollena, carta cuemo navui oredomoi. Iena ja ñaiticue. Iima ie aina uana jicanotomoi. Faidaima jaca dama iacania, cuemona mare. Faidaiño jaca dañu iacania, cuemona jiai mare;

² iadedi jeacino omoi finoi raillano, nagamie ie aina otena, jiai mare. Nagañaiño ie inina otena, jiai mare.

³ Naga ini ie ai diga iniacania, naimiemona naiñaiño ie abina caidiñena. Naga ai ie ini diga iniacania, naiñaiñomona naimie ie abina caidiñena.

⁴ Naiñaiño abi dañofede; iadedi dañu ie ini abimo jiai duide. Naimie abi damañede; iadedi dama ie ai abimo jiai duide.

⁵ Ie jira: “Danomo iniñeiticoco” lloñeno. Jusiñamui diga o raise ñaillena, naimiemo o comecina raise o facallena, iemo omico comeci daje isoi lloillamona, diga irui illamona danomo omico iniacaiñenia, jiai mare. Naie facaise fuilla meinomo riño diga o iacanamona, dane danomo ini, Taife omicomo ramo fai raillano.

⁶ Dane lloiticue. Jeacinona omoi finoi raillano, nagamie ie aina otena, mare. Nagañaiño ie inina otena, jiai mare. Iese omoimo lloiticue; iadedi iese ocuiñedicue.

⁷ Ainidicue. Cue illa isoi omoi illana jitaidicue; iadedi daje isoiñedicai. Jusiñamui caina itataja diese iese iticai. Dajerie ainidimaci. Dajerie airedimaci. Dajerie ininidimaci. Dajerie iniredimaci.

⁸ Nia ainidinomo lloiticue. Nia ininidinomo lloiticue. Feciñuaimo jiai lloiticue. Ainidicue. Cue illa isoi omoi iacania, cuemona mare;

⁹ iadedi omoi ocuiñeniadedi, aina ono. Jiaie riño diga illemo o comecina facañellena, daje riñona ono, o aina. Jiaie iimamo o comecina facañellena, daje iimana ono, o inina.

¹⁰ Creyentaimo nia lloiticue. Airedinomo lloiticue. Iniredinomo jiai lloiticue. Cue uaido lloñedicue; iadedi cai Nama jaie llote: “Riño ie inina sofeño.

¹¹ Iima ie aina sofeño” llote. Iese llote; iadedi nie riño ie inina sofeia, jiaie iimana naiñaiño oñena. Iimana naiñaiño oiacania, ie ini diga dane abido illasa.

¹² Nia lloiticue. Cai Nama buena jaie lloñede; iadedi iena birui cue lloiticue. Omoi nairaimona creyentena damie jaide; ia naimie ai creyentena nia jaiñede. Naimie creyentena illa jira, naimie diga naiñaiño nia iacania: “Naiñaiñoña dotaño” naimiemo llono.

¹³ Omoi nairaimona creyentena dañaiño jaide; ia naiñaiño ini creyentena nia jaiñede. Naiñaiño creyentena illa jira, naiñaiño diga naimie nia iacania: “Naimiema dotaño” naiñaiñomo llono.

¹⁴ Ie ini nia creyentena jaiñenia, ie ai creyentena illamona, naimie diga naiñaiño nia iacania, jeacinona finoñede. Ie ai nia creyentena jaiñenia, ie ini creyentena illamona, naiñaiño diga naimie nia iacania, jeacinona finoñede. Naie creyente muidona, naie iaimaiai uruiaina, jiaie creyente iaimaiai uruiaiai isoi, omoi roracomo feiño.

¹⁵ Ie inina creyenteñede ai sofeiacania: “Naiñaiñoña dotaño” naimiemo llono. “Naiñaiño jaillena rairuiño” naimiemo llono. Ie aina creyenteñede ini sofeiacania: “Naimiema dotaño” naiñaiñomo llono. “Naimie jaillena rairuiño” naiñaiñomo llono. Sofeia mei, jai dajemo duñediiaimaiai. Jusiñamui naga creyente uri illana jitaide;

16 iadedi ie ini diga ie ai fiebia, ie ini creyentenamona, naiñaiño nibai creyentena jaite. Ie ai diga ie ini fiebia, ie ai creyentenamona, naimie nibai creyentena jaite.

17 Iena lloticie; iadedi Jusiñamuimona ie feiñoga uaido nagamie jailla. Creyentiaina omoi jailla facaiseconi, omoi maijiuilla ramo nia raise omoi maiji. Naga creyentia illanomo biena llofuecabiticue.

18 Nia creyentiaina omoi jaiñenia, judiua isoi omoimona dajerie omoi abiaina detatatomoi. Naie detatafuemo omoi comeciaina birui facañeno. Omoimona dajerie omoi abiaina nia detatañedomoi. Iemo omoi comeciaina birui facañeno;

19 iadedi Jusiñamui uaina omoi inuamo omoi comeciaina birui faca. Jiaie rafue baifemo faite.

20 Creyentiaina omoi jailla facaiseconi, omoi maijiuilla ramo nia raise omoi maiji.

21 Creyentiaina omoi jailla facaise omoimona dajerie patrón anamo itinodomoi. Nia patrón anamo itino isoi omoi jai. Iemo omoi comeciaina jarire facañeno. Jiairuido omoi patrón: “Cue anamo iñedomoi” raia, naimie anamona oni omoi jai; iadedi Cristo rafuedo jaca omoi jai.

22 Cristona omoi inua facaise, patrón anamo omoimona damierie navui itomoi; iadedi Jusiñamui omoina fetode. Naimiena omoi inuamona, omoi jeacino anamo jai iñedomoi. Patrón anamo omoimona damierie navui iñedomoi; iadedi Jusiñamui omoina fetode. Ie jira naimie anamo jai itomoi.

23 Omoi jeacino facaina Jesucristo fiodailla jira, Jusiñamui omoi jeacinona oni dotade. Iena jai feitate. Naimie cominina jai jaidomoi. Ie jira comini jitaillacino anamo iñeno; iadedi Jusiñamui jitaillacino anamo i.

24 Cue amatai, creyentiaina omoi jailla facaiseconi omoi maijiuilla ramo nia raise omoi maiji. Jusiñamui omoina canuanona, jearede rana omoi maijiñenia, nie isoide rana omoi maijia, Jusiñamuimona mare.

25 Navui cuemo cartana oredomoi. Faidaiñua; illa rafuena uñoiacadomoi. Cai Nama naie rafuena jaielloña jira, iena birui lloticie. Naimie cuena duenailla jira, naimie uaina inoticie. Ie muidona comini inogamiedicue.

26 Birui duere omoi sefuilla facaise illa jira, omoi illa isoi omoi i.

27 Omoimona bu airenia, naiñaiñoa dotaña. Bu ainia, dama ainide. Riñoa oña;

28 iadedi o aina illena ininide riñoa o otiodena, jeacinona finoñedio. Omoimona o inina illena ainide imana o otiodena, jeacinona finoñedio; iadedi aina bu ua mei, inina bu ua mei, eo duere maijite. Iese omoi duere sefuiñellena, omoimo iena lloticie.

29 Cue amatai, biemo omoi comeciaina faca. Jesucristo abido dane billirui iaiei ite. Naimie jitailla rafuena omoi raise finollena, omoi ainiaimo ite rafuemo omoi comeciaina facaja; iadedi Cristo rafuemo omoi comeciaina eo facaja.

30 Omoimona damierie sunaia, damierie camare ia, iemo omoi comeciaina eo facañeno. Damierie raruaina ibaia, naieri eo iobiñeno.

31 Omoimona damierie bene ite rana ebiruimaci; iadedi iemo omoi comeciaina eo facañeno. Iemo omoi comeciaina eo facaia, abi juanide, Cristo rafuena omoi finollena. Cristo rafue nano inuamo omoi comeciaina eo faca.

32 Omoi comeciaina jarire iñenana jitaidicue. Nia ainidimie abi juarede, dama Cristo rafuena maijillena. Naimiena iobitaiacade;

³³ iadedi aireðimie bene ite rafuemo ie começina facade. Ie aina iobitaiacade. Naiñaiño ite rafuemo naimie começina facade. Cristo rafuemo ie começina jiai facade;

³⁴ iadedi mena rafuemo ie começina eo facallemo abi juanide. Ininidñaiño abi juarede, ðaño Cristo rafuena maijillena. Nana naiñaiño começimona naimiena iobitaiacade; iadedi inirediñaiño bene ite rafuemo começina facade. Ie inina iobitaiacade. Naimiemo ite rafuemo naiñaiño começina facade.

³⁵ Aina uana rairuiñedicue. Inina uana jiai rairuiñedicue; iadedi omoi raise illena, naie rafuena lloticue. Cristo rafuedo omoi raise marena jaillana jitaidicue. Dani Cristo rafuemo omoi começiaina facajana jitaidicue.

³⁶ Ero, omoimona naiñaiño oiacaga iimamo ie moo, ie jisa caidiño fecaca. Naiñaiño jai moonaila jira, naiñaiño jitailla jira, naiñaiño feca. Fecaia, ie moo jeacinona fiñoede;

³⁷ iadedi inina naiñaiño oiacañenia, naimie comeci llumona, ie começina eo facajamona, ie jisa feacaaiñenia, jiai mare.

³⁸ Ie jisana fecaia, mare. Cristo rafuena naiñaiño eo maijillena, ie jisa fecañenia, jiai mare.

³⁹ Jiaie rafuena lloticue. Riño ie ini nia fiodañenia, naiñaiño naimiemo jaca duide. Ie ini fiodaille mei, jiaie iimana ie ini ifomo naiñaiño oiacania, mare; iadedi creyentedimiena naiñaiño ua.

⁴⁰ Naie feciñodi iimana ie inina oñenia, naiñaiño abi juarenite, Cristo rafuena eo maijillena. Ie muidona inirediñaiño baifemo caimare iite.

8

Jusiñamuina eruaide jiraraimo llicisi fecaja rafue

¹ Cuemo cartana navui oredomoi. Jusiñamuina eruaide jiraraimo fecaca llicisina jicanotomoi. Naie isoide llicisidi omoi riana uiñoiacadomoi. Iena ja ñaiticue. Naie jiraraina naimaci navui sedaja jira, omoimona damerie naie isoide llicisi riana: “Maraiñede” raitimaci. Creyentiaimona Jusiñamuina eruaide jirarai jamai rana illa jira, damerie naie llicisi riana: “Mare” raitimaci. Bu iese uiñoia, mare; iadedi iena uiñuamona naimie abi iedoia, naimie começina raise facañede. Iena naimie rii, jiaie creyentiaimo começina facañede. Jiaie creyentiaina bu isirua, naimacimo ie começina facade. Cristo rafuedo jiaie creyentiaie raise jaillana jitaide.

² “Eo abina uiñoticue” ie começina bu facaia, nia eo raise abina uiñoñede;

³ iadedi Jusiñamuina ua cai isiruillamona, jiaie creyentiaina cai isirua, jai abina uiñoticaí. Jusiñamui dinena caina jiai uiñotaacade.

⁴ ¿Ñiese Jusiñamuina eruaide jiraraimo fecaca llicisina ñaiticaí? “Jusiñamuina eruaide jirarai jaca cajeñenana uiñoticaí” raitomoi. “Jusiñamui jaca ðajede. Iena uiñoticaí” raitomoi;

⁵ iadedi “Monamo ðiga sedalle ra ite” dajerie comini raitimaci. Jitomana sedacabidimaci. Fivuina sedacabidimaci. “Eniruemo ðiga sedalle ra ite” dajerie comini raitimaci. Taifena sedacabidimaci. Janabana sedacabidimaci.

⁶ Iena sedacabidimaci; iadedi cai dani Jusiñamuina sedacabidicaí. Naimiedi cai Moo. Naimiedi nana rana finode. Nana cominina comuitate. Cai Nama Jesucristo uaido iena finode. Jesucristo caina jillotate. Naimiena cai sedallena, Jusiñamui caina finode.

⁷ Jusiñamuina eruaide jiraraidi jamai rana nana creyentiaie uiñoñedimaci. Jusiñamuina eruaide jirarai naimaci sedauilla jira, naie jiraraimo birui fecaca

llicisi naimaci ríia: “Naie jirarai sedadicaí” naimaci comeciaina facadimaci. Naie rafue naimaci raise uññoñena jira: “Jeaçinona finodicaí” raitimaci.

⁸ Ero, nie isoide llicisi cai riamona, llicisi cai riñenamona, Jusiñamui caina feiñoñede. Naimiena cai ñnuamona caina feiñoñote. Buena cai riñenia, buena cai ríia, jeaçinona finoñedicaí. Naiemona marecinona jiai finoñedicaí.

⁹ Naie llicisina riredomoi; iadedi omoi ama nibai Cristo ðibeimo raise iñede. Naie llicisi omoi ríia, naimiemona jeaçinona jai finodomoi. “Jusiñamuina eruaide jiraraina omoi nia sedadomoi” raillanomo naimie comecina facaite. Iena naimie comecina facajanona, Cristo ðibeimo raise jaiñeite. Abido danomo naimie dane jaite.

¹⁰ Nibai abina uññotomoi; iadedi Jusiñamuina eruaide jirarai illanomo omoi guillena omoi jailla jira, omoina nia Cristo ðibeimo raise iñedimie cioia, nainomo jiai guisaite, comecina facajano: “Cue ama Jusiñamuina eruaide jiraraina nia sedaja jira, naiena jiai nia sedaiticue”.

¹¹ Omoi ama abido danomo jaia, omoi muidona. Cristo naimie facaina fiodaite; iadedi omoi finoca rafue muidona, omoi ama abido danomo jaite.

¹² Iese omoi finoia, omoi amana jeaçinona finotatomoi. Naimie comecina ocuiñoñañedomoi. Ie muidona Cristomo jeaçinona jiai finodomoi.

¹³ Cristomo jeaçino cue finoi raillano, Jusiñamuina eruaide jiraraimo fecaca llicisina riñeiticue. Cue ama abido danomo dane jai raillano, naie llicisina jaca riñeiticue.

9

Cristo facaina llorainidi naimaci jitailla rana jamai feiñua

¹ Cue jitaillacinona finoredicue; iadedi Jesucristo jai oretagamiena cue illa jira, naimie jitaillacinona finoacadicue. Cuena jaie fetua facaise cai Nama Jesúna ciodicue. Creyentiaina omoi jailla jira, cai Nama facaina cue maijiana uññotomoi.

² Jiaie comini Jesucristo oretagamiedicuena nibai uññoñedimaci; iadedi omoi iena uññotomoi. Cristona omoi ñnua jira, Jesucristo cuena oretajana uññotomoi.

³ Cue llofuiacinona bu uaitaia, iese cue llofuiacinona riidoticue.

⁴ Jesucristo rafue lloraimana cue illa jira, omoi ðine cue macaria, cue jitailla rana cuemo jamai omoi illa. Jiaie rafuena cue maijiñena motomona cuemo jamai omoi illa.

⁵ Cue ai cuemo itena, omoi ðine naiñaiño cue ðiga macaria, coco jitailla rana cocomo jamai omoi illa. Omoi ðine jiaie Jesucristo oretagano naimaci ainiairi macaria, omoi ðine Jesucristo amatai macaria, omoi ðine Pedro macaria, naimaci jitailla rana naimacimo jamai fecauidomoi. Ie jira, ¿niese cue jitailla rana cuemo jamai fecañeitomoi?

⁶ Jiaie llorainimo naimaci jitailla rana jamai fecacabidomoi; iadedi cue onolli ðiga cue maijiana nibai nia jitaidomoi. Bernabé ie onolli ðiga naimie maijiana nibai nia jitaidomoi.

⁷ Ero, soldadodi ie guille ðbañede. Iena jamai feiñoñote. Naga illimo maijuidimie ie illimo maijide, naiemona naimie guillena. Naga toiniaina sedauidimied; naimacina sedade, naimacimona ucube ie ollena. Omoi motomo cue maijia jira, cuena omoi nafuia, omoimo Cristo rafuena llocabiticue.

⁸ Jamai comini uaido naiena llofueñedicue; iadedi Moisés micori cuela-fuiaimona iena fueoticue.

⁹ Naimie micori jaie cuela: “Jusiñamui llote: ‘Jurareta trigo oni juillena saisíia, iemona ie guillesa, ie fuena maiñeno. Maiñenia, ie maijia fuemona

guite' lloete". Ie isoide. Omoï motomo cue maijia fueмона cue jitailla rana cuemo jamai omoï illa. Iena Jusñamui lloia, dama juraretamo ie comecina facade; iadedi caimo ie comecina ua facade.

¹⁰ Cristo rafuena cue llofuecabilla jira, cue llua fueмона cue jitailla rana jamai cue feñua. Iemo ocuridicue. Ie isoide. Ie illimo bu maijia, naiemona riana ollena, nainomo maijide. Iemo ocuride.

¹¹ Omoï motomo Cristo rafuedo omoï raise jaillena, navui llofueticue. Ie jira cue jitailla raruiaï omoïmona jamai cue ua.

¹² Omoïmona raruiaïna jiaie lloraini feñocabilla jira, cuemona Cristo rafuena nano omoï cacaja jira, cue jamai jiaï feñua; iadedi omoïmona raruiaïna jicañedicue.

Cue jitailla raruiaï cue ollena, cue onolli diga duere maijidicue. Ie jira nana cue jitailla raruiaïna oñedicue. Cristo rafuena omoï cacaiacaiñeni raillano, omoïmona raruiaïna jicañedicue. Raruiaïna cue jicaia, omoï comeciaina nibai facaitomoi: "Raruiaï oiacanano Cristo rafuena naimie llocana uite". Ie mei Cristo rafuena cacaiacaiñeitomoi. Ie jira omoïmona raruiaïna jicañedicue.

¹³ Ero, Jerusalémo judiaï comini Jusñamuina sedauilla jofo ite. Nainomo naie comini toinaïna atuidimaci, Jusñamuimo fecallena. Moisés micori jiaie llua isoi, naimaci jeacino facaina toinaïna fajanona fecadimaci. Nainomo maijudino comini atica toinaïmona naimaci rillena, ibajanona ocabitimaci. Iena uñotomoi.

¹⁴ Ie isoide. Cristo rafuena llorainidi naimaci rafuena ñnotinomona naimaci jitailla rana imaci ua. Cristo iena jai lloete.

¹⁵ Omoïmona raruiaïna jaca jicañedicue. Raruiaï birui cue ollena, bie cartana jiaï cueñedicue. Dama cuemo ite ra diga iiticue. Omoïmona iena feñoticedena, meiruioicaida feñoticue. Omoïmona cue feñoñena jira, omoï facaina Cristo rafue cue llua mona, abina iedoticue. Raruiaï cuemo jamai omoï fecaia, ¿niese abina iedoiticue?

¹⁶ Jiaie lloraini rana feñua isoi cue feñoia, Cristo rafuena cue llua mona abina iedoñeiticue. Jusñamui cuena oretaja jira, naie rafuena lloticue. Iena cue lloñenia, Jusñamui cuena duere ñnoite.

¹⁷ Dama cue comeci jitaillamona Cristo rafuena cue lloiacania, Jusñamuimona ibana feñoiticue. Dama cue comeci jitaillamona lloñedicue; iadedi Jusñamui cuena oretaja jira, iena llocana jaidicue.

¹⁸ Ie jira, ¿niese ibana feñoiticue? Ibana nibai feñoiticue; iadedi omoïmo Cristo rafue cue lloia, cuemona mare. Omoïmona cue jitailla rana cue oñenia, cuemona mare.

¹⁹ Omoïmona raruiaïna cue feñoñena jira, omoï anamo ññedicue; iadedi dama cue jitaillacinodo jaiñedicue. Creyenteñedino diga cue nabairillena, Cristo rafuena naimaci raise cacaillena, nana naimaci mare finocana uiga rafuedo jaidicue. Iese jaidicue, ailluena comina Cristo dibeimo cue itatallena. Iese jaiñedicuedena, eo janore comini Cristo dibeimo nibai jai itaticue.

²⁰ Judiaï comini diga cue ia, naimaci diga cue nabairillena, naimaci mare finocana uiga rafuedo jaidicue. Cristo dibeimo naimacina cue itatallena, naimaci diga nabairiacadicue. Moisés micori llogacino anamo naimaci illa jira, naie llogacinodo jaidicue; iadedi naie llogacinodo cue jilloitañena jira, naie llogacino anamo ññedicue.

²¹ Judiaïñedino diga cue ia, naimaci diga cue nabairillena, Moisés micori llogacinodo naimaci jaiñena jira, naiedo jiaï jaiñedicue. Naimaci mare

finocana uiga rafuedo jaidicue; iadedi Jusiñamui lloga uaido jiai jaidicue. Cristo lloga uaido jiai jaidicue. Naimacina Cristo dibeimo itataiacadicue.

²² Naimaci diga cue nabairillena, Cristo rafuena nia raise inoñedino diga cue ia: “Omoi baifemo Cristo rafuena uifnoticue” raifñedicue. Naimacina iciaicañedicue, naimacimo jeacinona cue finoi raillano. Naimacina cue isiruillamona, naimacina canoacadicue. Naimacina Cristo rafuena raise inuana itataiacadicue. Nana cominina cue canoacana jira, naimaci mare finocana uiga rafuedo jaidicue. Cue comecina facadicue: “Cue muidona damierie Cristona nibai inoitimaci”.

²³ Cristo rafuena ailluena comini inollena, iese jaidicue. Iena llocana jaidicue. Naimaci inua jira, iobidicue.

²⁴ Ero, dani cai jitaillacinodo cai jaiñena. Iemona omoi fueollena, jiaie uaido lloiticue. Riire aisia rafuena omoi comini jifanoia, raire uicodo ridimie rana ote. Ailluena comini aisidimacimona, damie naie rana ote. Ie isoide. Cristo rafuena inocana mai cai jailli, ico Jusiñamui illanomo monamo ibana nana cai feiñollena.

²⁵ Naga aisidimie riire aisillena, ie abina mairitallena, ie abina eenote. Mairillena, ie abina nagarui jiai facatacabite. Ibana feiñollena, iese finode. Ibana bu oia, dallu iobide. Ero, jeacinona cai finoi raillano, cai abiaina cai enua. Naimie jitailla isoi cai illena, Cristo rafuemo jiai cai facacabilla. Monamo cai rillanona, ibana cai feiñollema, jaca iobiticai.

²⁶ Riire aisiacadimie ebena aisifñede. Onolli diga mena ia:maia: jamai jifanoia, jafaicina jamai ducoifñedia:maia:; iadedi conimana ducoidia:maia:. Ie isoide. Cristo rafuedo raise cue jaicania, jamai ebena jaiñedicue; iadedi nana cue comecimona iedo jaidicue.

²⁷ Cue comecina raise sedadicue. Dama Cristo rafue anamo iacadicue. Dama iena inoiacadicue. Ja muidomo ibana cue feiñollena, iese finodicue. Jiaie cominimo Cristo rafuena llofuecabiticue; iadedi monamo ibana cue feiñollena, cue comecina raise sedadicue. Iemona omoi fueua.

10

Jiraraina sedañena rafue

¹ Cue amatia:, bie rafuena feitaño. Cai jaiagai micoria: finoca rafuemona fueoitica:. Egipto railla eniruemona naimaci billa mei, jofue iñenanomo naimaci macaria, naie diga naimacina ifollena, Jusiñamuidi monamo uillie itatate. Naie uillie anado nana jaisoidimaci. Jiairede railla monaillai ruica naimaci jaicania, Jusiñamuidi naie monaillai oni ñajitate, safefodo nana naimaci ruica jaillena.

² Naie isoide rafue nana naimacimo suillanona, Moisés micori dibeimo raise duidimaci. Naimie anamo itabidimaci.

³ Jofue iñenanomo naimaci illa jira, Jusiñamui nana naimacina ecade. Nainomo guille iñena jira, monamona bite guille rana nana guisoidimaci.

⁴ Nainomo jinui jiai iñena jira, Jusiñamui llua jira, Moisés micori nificina butajamona, toide jinua nana jirodimaci. Naimaci nine macaria, Cristona cioifñedimaci; iadedi naimaci diga naimie jaca ite. Naimaci diga naimie illa jira, nana naimaci facaina, diga siño rafuena finocabide;

⁵ iadedi Jusiñamuina naimaci inoñena jira, naimiedi naimaci diga icirite. Naimaci diga naimie icirilla jira, jofue iñenanomo Jusiñamui ailluena naimaci micoriaina fioidatade.

⁶ Cai jaiagai finoca rafuemona cai fueua. Maraiñede jearede rafuena naimaci finua isoi ebruiño. Abimo omoi oño.

⁷ Jusiñamuiñedimiena sedaño. Cai jaigaimona damierie juraretana eruaide rana jaie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo gutimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoioño. Jusiñamuiñedimiena omoio sedaño.

⁸ Naimaci jearede rafuena finodimaci. Naimacimona damierie naimaci añede riñonñai diga itimaci. Ie jira naimacimona daruidemo veintitrés mil comini fiodaitimaci. Jusiñamui naimacina fiodaitade. Naimaci finoca rafue isoi abimo cai oño.

⁹ Cai jaigaimona damierie Jusiñamui Joreñoña ñaitimaci. Naimaci guisoiga radi Jusiñamuimona bite. Naiena ñiamona, Egiptomo ite guillemo comeciaina facadimaci. Ie muidona naimiena ricaitadimaci. Ie jira Jusiñamuidi jaioniaina naimacina ainitate. Iemona ailluena fiodaitimaci. Naimaci finoca rafue isoi abimo cai oño. Jusiñamuina ricaitañeno. Cristona cai nia ñnoñena facai finoca rafuemo cai comeciaina facañeno.

¹⁰ Cai jaigaimona damierie Jusiñamui facaina lloraini joreñuaina ñaitimaci. Ie jira Jusiñamuidi ie jaienicina oretate, naimacina meinetasillena. Naimaci finoca rafue isoi abimo cai oño. Jusiñamui facaina lloraini joreñuaina cai ñañeno.

¹¹ Nana naie rafue naimacimo suide. Cai facaina Moisés micori iena jaie cuete. Iemona birui cai fueua, naimaci isoi cai finoi raillanona.

¹² Naie isoide rafue omoimo suiñellena, omoio abiaina rairui. Omoio comeciaina nibai facadomoio: “Cristona cai eo raise ñnua jira, iena finoñeticai” comeciaina facadomoio; iadedi omoio abiaina omoio rairuiñenia, jeacinona finoitomoio.

¹³ Taife ramo omoimo faicabilla isoi, nana jiaie creyentiaimo ie isoi ramo faicabite. Iena feitaño. Jusiñamuidi ñnogamie. Ie muidona omoio comeciaina ocuillacino baifemo Jusiñamuidi Taife omoimo ramo faiana rairuite. Naiemona omoio jilloillena, Taife uai omoio ñnoñellena, Jusiñamuidi omoioina canoite.

¹⁴ Cue amatiaí, Jusiñamui omoioina canuamona, Jusiñamuiñedimie facaina finoca rafuemonona oni i.

¹⁵ Abina uiñotomoio. Ie jira omoimo cue llucinona omoio cacaja mei, iemo omoio comeciaina omoio faca.

¹⁶ Ero, Cristona cai sedallena, roracomo danomo oficabidicai. Naimie fiodailla rafuena cai comecillena, janore vino jiruanona, janore llomenicono guticai. Jusiñamuimo iobillacinona nano fecadicaí. Ie mei janore vino juridicai. Iena cai jiruamona, Cristona cai nabaillana uiñoticai. Cruzmo Cristo fiodailla jira, naimiena nabaidicai. Naie facaise llomenicono cai tairuñuamona, naimiena cai nabaillana uiñoticai. Cristo fiodailla jira, iese iticai.

¹⁷ Diga creyentiaidicai; iadedi daje llomenicomona jaca guticai. Daje llomenicomona cai guilla jira, dajena Cristomo cai duillana uiñoticai.

¹⁸ Ero, judíuai railla cominimona cai fueua. Naimaci jeacino facaina iba oñellena, toiniaina faja mei, Jusiñamuimo fecacabidimaci. Ie mei iena ritimaci. Iena naimaci riamona, Jusiñamuina nabaidimaci. Jusiñamuina iobitadimaci.

¹⁹ Omoio illanomo Jusiñamuina ñnoñedinodi Jusiñamuina eruaide jiraraimo guillena fecacabidimaci. Cai creyentiaidicaimona naie guilledi jamai guille. Naie jiraraidi jamai ra. Cajeñede;

²⁰ iadedi Jusiñamuina ñnoñedinomona jamai rañede. Naimacimona nanoca ra. “Iemo rille cai fecajia, cai moona sedadicaí” raitimaci; iadedi naie

ramo naimaci comeciaina facañedimaci; iadedi imaci moomo comecina facadimaci. Ero, Jusiñamuiñedimie mo comecina fecadimaci. Taifemo naie guille fecacabidimaci. Taifena iobitadimaci. Jusiñamuimo fecañedimaci. Naimaci diga omoi jaia, Taife diga jai nabairitomo. Taife diga omoi nabairilana jitaiñedicue. Taifemo omoi duillana jitaiñedicue.

²¹ Rollena omoi ofia, Cristo fiodaillana omoi comecillena, nainomo omoi jiruamona, nainomo omoi guillamona, Cristona nabaidomo. Comini rafue dine omoi jaillamona, Taifena nabaidomo. Cristo diga, Taife diga, daje facaina nabairinidomo. Iese omoi finoia, marañede.

²² Iese omoi finoia, Jusiñamuina jai iciritaitomo. Naimiena omoi icia, ¿niese naimie riicallafuemona jilloitomo? Jaca jilloñeitomo.

Jiaie creyentiaina canocana cai jailla

²³ Ero, Jusiñamui dibeimo omoi illa jira, ¿niese dani omoi jitaillacinodo jaiacadomo? Diga Jusiñamui rairuiñega rafue ite. Creyentia iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Iena cai finoia, cai amana Cristo dibeimo itatañedica. Iena cai finoia, cai amana Cristo rafuena ñnotacana jaiñeitica. Naimiena ramo faicana uitatatica.

²⁴ Omoimona nagamie dama naimie mo ite rafuemo comecina facañena; iadedi naga jiaie creyentemo ite rafuemo ie comecina jiaie facaja.

²⁵ Ero, ninena o llicisina omoi ibaia, Jusiñamuiñedimie mo naie llicisina fecajana jicanoño; iadedi jicanoño iena jaricitaiño rino.

²⁶ Iena David micori jiaie cueda: “Jusiñamui bie eniruena finode. Nana rana finode. Cai guillena, cai guille rana nana comuitaga” cueda. Ie jira ¿niese fimaitica? Naimie mare finoca rana cai ria, jeacinona finoñedica.

²⁷ Ero, naimie diga o guillena Cristona ñnoñedimie ona uaidoia, naimie dine o jaiacania, naimie dine guisai. Nana omo eaja guillena guiño. Jamai uainino guiño. “¿Ninena ibadio bie llicisina?” jicanoño. O comeci jarire finoño;

²⁸ iadedi Cristona raise ñnoñedimie nainomo jiaie gitemo, omo lloia: “Bie llicisidi Jusiñamuiñedimie jai fecaca llicisi”, iena o riño. Iena o ria, Cristona raise ñnoñedimie comecina facaite: “Jecinona finodio. Taifemo fecaca llicisina ritio. Creyentemie iena riñede” comecina facaite. O isoi naie llicisimo naimie comecina facañede. O raitio: “Naie llicisidi jamai llicisi” raitio; iadedi naimie raite: “Naie llicisi Taife ie” raite. Ie jira naie creyentena o canollena, naiena riño.

²⁹ Naimie comecina facajacinodo cai jaiñenamona, nana Jusiñamui comuitaga guillena guiredica; iadedi Cristona nia raise ñnoñedimie mona nana guinidica; iadedi naimie comecina facajacinodo jaiñedica.

³⁰ Cai guia, Jusiñamuimona naie guille comuitaja jira, Jusiñamuimo iobilacinona fecadica; iadedi cai guillamona damierie cai joreñoña ñaiamona, iena guiñeitica.

³¹ Omoimo iena nia lloiticue. Nie isoide rana omoi guia, nie isoide rana omoi ria, nie isoide rana omoi jiroia, nie isoide rafuena omoi finoia, naieri Jusiñamuina iobita.

³² Jusiñamuina nia ñnoñedino canocabi, naimie uaina naimaci cacaillena. Jusiñamuina jai ñnotinona jiaie canocabi, naimaci abido danomo uaiñellena.

³³ Buena cue finoia, nana cominimo cue comecina facadicue. Ie jira nararui cue jitaillacinodo jaiñedicue; iadedi Cristo rafuena naimaci ñnollena, nana cominina canocana jaidicue.

11

¹ Cristo lloga rafuedo jai jaidicue. Cue isoi omoi jai.

Roracomo riñoniai illa rafue

² Cuena nia feitañedomoi. Cristo oretagano jaie llogacinona omoina llofueticue. Cue llofueuillacinodo nia jaidomoi. Ie jira omoiri iobidicue;

³ iadedi jiaie rafuena nia lloiacadicue. Cristo ie Moo anamo ite. Naga iima Cristo anamo jiai ite. Nagamie ai ie ini anamo ite. Omoi afemo itino uaina omoi iinoñenia, marañede.

⁴ Roracomo omoi comini oficabia, ie ini anamo ie ai illa jira, omoi comini finocabilla isoi, naga riño ie ifogimo iniroina bicuano jailla. Iese naiñaiño bicoñenia, ie ini anamo naiñaiño iñede isoi eruaide. Jusiñamui diga nie iima ñaia, Jusiñamui uaina nie iima jino lloia, naimie ie ifogi icona jitañeno, Cristo anamo naimie illa jira. Naie facaiseconi ie ifogi icona jitajia, Cristo afemo itena eruaide.

⁵ Nie riño Jusiñamui diga ñaia, Jusiñamui uaina nie riño jino lloia, ie ifogimo iniroina bicoñeno jaia, iima isoi naiñaiño iacana jira, ie ini afemo illana eruaide. Ie ini anamo iacaiñena jira, ie inino meidaítade.

⁶ Nie riño ie ifogimo iniroi bicoñeno jaicania, iima isoi eruaillena, ie ifogidi rijiruda gareca. Iemona naiñaiño meidaillamona, ie ini anamo illamona, ie ifogimo iniroina bicuano naiñaiño jaite.

⁷ Jusiñamui diga naimie ñaia, Jusiñamui anamo naimie illa jira, iima ie ifogi icona jitañena. Jusiñamui naga iimana comuitate. Iimana naimie finuamona, naimiena cai iobitajamona, Jusiñamui cai afemo illana uiñoticaí. Ie inina iobitajamona, naiñaiño afemo ie ini illa jira, riño ie ifogimo iniroina bicuana jailla.

⁸ Ero, Eva micorimona Adán micori comuiñede; iadedi ie ini micorimona ie ciraiofemona naiñaiño micori comuide.

⁹ Naiñaiño anamo illena naimie comuiñede; iadedi naimie anamo illena naiñaiño comuide. Naimie uai inollena, naimiena canollena, naiñaiño comuide.

¹⁰ Ie ini anamo naiñaiño illa jira, riño ie ifogimo iniroina bicuano jailla. Naiñaiño iese ia, naiñaiño naimaci cianona, Jusiñamui jaienisaimona jiai mare.

¹¹ Naga riño ie ini anamo ite; iadedi Cristona cai inua jira, riño baifemo imadi fañede. Iima baifemo riño jiai fañede; iadedi daimaiaí conimana iaimaiaí canua. Cristo naga iimana, naga riño na daje isoi feiñote.

¹² Naga comini Jusiñamui comuitaga. Nano facaiseconi Adán micorimona Eva micorina jaie comuitate; iadedi birui naga iima riñomona comuide.

¹³ Biemo omoi comeciaina omoi faca: Omoi roracomo Jusiñamui diga nie riño ñaia, omoi einamací finocabilla isoi, ie ifogina bicoñeno jaia, ¿ni ese omoi comeciadi raite? Cue comeci: “Marañede” raite. Ie ini anamo naiñaiño iñedena eruaide.

¹⁴ Nana omoi biesedena raicabitomoi: “Nie iima ie ifotirai eo areniadedi, cai cominimona marañeno cide;

¹⁵ iadedi nie riño ifotie eo arenia, mare” raicabitomoi. Naiñaiñuai ieri iobidimaci. Jusiñamui iena sicutajamona, naiñaiño ifotie ie ifogina raise ibaide.

¹⁶ Iena jaca llofuecabiticue. Jiaie creyentiaí illanomo cue isoi comeciaina lloidimaci. Omoimona bu cue llogacinona uaitaiacania, damamei ite.

Cristo fiodailla rafuena raise comeciñedimaci

¹⁷ Jiaie rafuena lloiticue. Omoï maraiñede finocabilla rafuena jai fididicue. Cristona sedallena omoï oficabia, Cristo rafuena ñinocana jaiñedomoï; iadedi naiemona maraiñede rafue comuide.

¹⁸ Rollena omoï oficabia, omoï comeciaina daje isoi lloïñenana jai fididicue. ¿Bue ñellena omoï comeciaina daje isoi lloïacaiñedomoï? Naie rafuena omoï diga ja ñaiacadicue. Omoï oficabia, nagamiiai guillena aticabidomoï. Mare; iadedi danomo guiñedomoï. Omoïmona damierie ucuberena jira, dueredino diga guiacaiñedomoï. Omoï guille caididomoï.

¹⁹ Omoï iese illana jitaiñedicue; iadedi daje isoi omoï comeciaina lloïñenamona, Jusiñamui dibeimo raise itinodi uññoga. Omoïmona damierie danomo omoï guillamona, Jusiñamuina omoï isiruillana uññoticaï.

²⁰ Cristona sedallena omoï oficabia, guitomoï; iadedi vino jiruanona, llomeniconna guillanona, cai Nama fiodailla rafuena raise comeciñedomoï. Maraiñede rafuena omoï finua jira, iena nia lloiticue.

²¹ Nagamiiai guillena aticabidomoï. Dani coniniri raise guiñedomoï. Danirie omoï atica guillena guitomoï. Jiaïnona guillena iñedomoï. Damierie omoïmo ailluena guille ite. Damierie omoïmo guille raise iñede. Jiaïnona guillena omoï iñena jira, damierie jaca aimetaïtmaci; iadedi jiaïno monidimaci. Damierie guilla motomo jiaï jifaidimaci. Conini nabaiñedomoï. Ie jirari Cristo fiodailla rafuena raise comecinidomoï.

²² Ero, omoï jofue ite, jamai guillena. Omoï oficabia, ¿bue ñe guillaredomoï? ¿Bue ñe jiaïnomomo guille fecacaiñedomoï? Jiaie creyentiaïna omoï isiruïñenamona, Jusiñamuina jiaï isiruïñedomoï. Janore guille itinona duere finodomoï, naimacina omoï eacacaiñena jira. Iese omoï illa jira, omoïri obiñedicue.

Cristo fiodailla rafuena llofuiaçino

²³ Navui omoïna biena llofueticue; iadedi omoï raise ñinoñena jira, iena dane llofueticue. Cai Nama iena cuemo jaie llote. Cai Nama Jesús ie gaitatajarui facaiseconi, ie llofueoicaigano diga ia, naimaci guïa, llomeniconna llinote.

²⁴ Iena llinuanona, Jusiñamuimo iobillacinona fecade. Ie mei iena taiñuanona raite: “Mai, biena guïño. Bie llomenicodi omoï guillamona, cue fiodaillana omoï comeci. Cue fiodaillmona omoï jeacinomona jilloitomoï. Biena omoï guillamona cuena comeci. Bie llomenicodi cue abi facai ie. Cue llua isoi iena omoï finocabi” raite. Ie mei iena guitimaci.

²⁵ Ie mei jiroracomo jai totaca vino Jesús llinuanona, Jusiñamuimo iobillacinona fecade. Ie comecina facade: “Adán micori facaisemona cominina imaci jeacino facaina Jusiñamui duere finoñellena, toïniaina atiuïdimaci, naimiemo fecallena”. Iemo ie comecina facajano, raite: “Cue fiodaillmona, dama cue diaillmona, Jusiñamuidi omoïmo jiaie rafuena birui llote. Omoï jeacinona oni dotajana llote. Bie vinodi naie rafue facai ie. Cue llua isoi, bie vinona omoï jiruamona, cuena comeci. Mai, iena jiro” raite. Ie mei jirodimaci.

²⁶ Naga icaïño Cristo facaina llomeniconna omoï guïa, Cristo facaina vinona omoï jiroïa, omoï jeacino facaina cai Nama fiodaillana uññotomoï. Naimie nia abido dane bille dinori naiena comeci.

Cristo fiodailla rafuena raise comeciacadicaï

²⁷ Cristo fiodailla rafuena raise comeci. Naie llomeniconna Cristo rafuedo raise jaiacaiñedimie ebena guïa, Cristo rafuedo raise jaiacaiñedimie naie

vino ebena jiroia, iena jamaide. Naimie jeacinomona Cristo naimie jilluana naimie #noñena jira, Cristomo jeacinona finode.

²⁸ Jeacino omoi comeciaino illamo omoi comeciaina faca. Jeacino omoi comeciaino ia, iena guiño. Iena jiroño. Jeacino omoi comeciaino iñenia, iena guiño. Iena jiro. Jeacino ia, Jusiñamui iena lloño. Jiaimie diga nicino ia, iena raise fino. Ie mei iena guiño. Iena jiro.

²⁹ Jeacino naimie comecimo nia illamona, iena guia, iena jiroia, marañede. Naimie jeacino facaina Cristo fiodailla jira, Cristo fiodaillana naimie jai jamaide. Ie muidona Jusiñamui naimiena duere finoite.

³⁰ Ie muidona omoimona ailluena irareside. Ie jira omoimona damierie fiodaite.

³¹ Cai comeciaina raise cai facajamona, jeacinona cai fainonocaia, Jusiñamui caina duere finoiteite.

³² Jusiñamui caina birui duere finoia, caina naimie dibeimo raise illena itataiacade. Jesucristo abido bia, naimiena #noñedinona duere finoite. Naimaci diga cai duere sefuiñellena, birui caina duere finode.

³³ Cue amataia, Cristo fiodailla rafuena omoi comecillena omoi ofia, daacaiño omoi guillesa, jiaino riñedinona seda.

³⁴ Bu eo aimetaia, jofomo nano guilla. Guillanona omoi ofillinomo bi. Dani coniniri raise omoi guiacaiñenia, Jusiñamui omoina duere fino raillano, jofomo guiño. Nana naie rafuena nia lloñedicue; iadedi omoi dine dane cue ia, iena lloiticue.

12

Cristo facaina raise majillena, Jusiñamui Joreño naga creyentena canode

¹ Cue amataia, jiaie rafuena cuemo jai jicanotomoi. Iena ja ñaiticue. Jusiñamui mona diga uaina feiñoticaia. Naimiemona naimie facaina majia uaina feiñoticaia. Naimie facaina cai majillena, jiaie creyentiaia cai canollena, naimiemona cai oga uaina ñaiticue. Iena omoi raise uiñuana jitaidicue.

² Ero, Cristona nia omoi #noñenia, Jusiñamuiñedimiede jiraraina sedaudomoi. Iedo jaie tainodo jai-jaisoidomoi. Taife iedo omoina jifuate.

³ Ie jira biena omoi raise uiñuana jitaidicue. Jusiñamui Joreño uaido nie creyente ñaia, Jesús Joreña jeare ñañeite. “Jesúdi Jusiñamui Jitoñede” rañeite; iadedi Jusiñamui Joreño uaido nie creyente ñaia: “Jesúdi Jusiñamui Jito” raite. “Jesús cue Nama” raite. Naie isoide creyentedi Jusiñamui ie. Naimiemo cacarei; iadedi iese rañedinona cacareiñeno.

⁴ Jusiñamui Joreño caimo jai illa jira, Jusiñamui Joreñomona cai majia uaina oticaia. Naga creyente daje iso oñedicaia.

⁵ Naga creyente Cristo facaina daje isoide uai diga majiñedicaia; iadedi Cristo facaina nana majidicaia.

⁶ Jusiñamuidi diga uai lla motomo naga creyentena majitate, naimie jitailla rafuena naimaci finollena.

⁷ Jusiñamui Joreño naga creyentemo jai illanona, naga creyentemo ie uaina itatate. Conini naga creyentena naimaci canollena, ie uaina itatate. Iemona Jusiñamui Joreño caimo jai illana uiñoticaia.

⁸ Damierie creyentemo Cristo rafue jino lolle uaina itatate. Damierie creyentemo Cristo rafue llofuelle uaina itatate.

⁹ Damierie creyentemo Jusiñamui siño rafue finuana #notaja uaina itatate. Damierie creyentemo duidinona jillotaja uaina itatate.

¹⁰ Damierie creyentemo siño rafuena finua uaina itatate. Damierie creyentemo jino lolle uaina itatate. Naimacimo Jusiñamuidi ie rafuena llocabite, jianomo jino lolllena. Dajerie creyentemo uaina itatate, nie isoide uaido Cristo rafuena railla lloraima lluaana uiñollena. Jusiñamui Joreño uaido nie lloraima lloia, iena uiñote. Taife uaido nie lloraima lloia, iena jiai uiñote. Damierie creyentemo naimaci uiñonega uaido ñaia uaina itatate. Damierie creyentemo naie uiñonega uai oni dobañolle uaina itatate, comini iena raise uiñollena. Iena naimaci nia dobañoneña, iena jiai raise uiñonedimaci.

¹¹ Naga creyentemo itatate uaina Jusiñamui Joreñomona bite. Naimie jitailla isoi, naga creyentena ie uaina itatate.

Cristomo dajena duidicai

¹² Cai abimo diga ra ite. Cai jefo ite. Cai uisi ite. Cai onolli ite. Cai eilli ite. Diga ra ite; iadedi cai abidi jaca dajede. Dajemo duide. Ie isoide. Diga creyentaidicai; iadedi dajena Cristomo duidicai.

¹³ Dama Jusiñamui Joreñodi dajena Cristomo nana creyentaidicai; duidicai. Dajerie judiuidicai; dajerie judiuiñedicai; dajerie patrón anamo iticai; dajerie patrón anamo iñedicai. Diga nairaidicai; iadedi dajena Jusiñamui Joreñona nana feiñotica.

¹⁴ Cai raise maijillena, cai abimo diga ra ite. Naga ra dama oni eneno inide. Ie isoide. Cristomo dajena cai duillanona, diga creyentaidicai; iadedi Cristo facaina dajena maijidicai.

¹⁵ Ero, cai abimona cai eilli nibai facaite: “Onolli isoñedicue. Onolli cue baifemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Onolli eilli baifemo faiñede. Dafoconi ite.

¹⁶ Ero, cai jefo nibai facaite: “Uisi isoñedicue. Uisi cue baifemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Uisi jefo baifemo faiñede. Ie isoide. Dajena Cristomo omoi duilla jira: “Jiaimie baifemo iticue” raiñeno. Jiaie creyentena abina uradoiñeno.

¹⁷ Ero, dama uisi cai abimo itena, cai jefo iñedena, jiaie ra cai abimo iñedena, ¿niese rana cacaiticai? ¿Niese niadedi ra sorillana cacaidicai? Ie isoide. Dajena Cristomo omoi duilla jira, naga creyentena jitaidomoi, Cristomo dajena inocana omoi jaillena. Jiaie creyentena uaitaño.

¹⁸ Jusiñamui cai abimo diga rana comuitate. Naimie jitailla isoi, cai abimo naga rana comuitate.

¹⁹ Cai abimo diga ra iñedena, ¿buedo cajenitica?

²⁰ Diga ra cai abimo ite; iadedi jaca dajede cai abi.

²¹ Rana cai cioillena, cai uisi ite; iadedi cai onolli iñedena, cai ciua rana llinonidicai. Ra feitañellena, cai comeci ite; iadedi cai eilli iñedena, macarinidicai. Ie isoide. Cristomo dajemo cai duilla jira, naga creyentena dajena inocana jaillana jitaidicai. Jiaie creyentemona abina iedoño.

²² Naga cai abimo ite rana jitaidicai, raise cai illena. Naga cai abimo ite ra jiaie ra baifemo iñede. Nana dajede isoi itena, mare;

²³ iadedi dajerie ra ebire eruaillena, cai abi jifollena, iniroina jitaidicai. Meiruiñellena, cai abi bainillena, iniroina jiai jitaidicai.

²⁴ Cai uiecomo meiredino iñena jira, iena jifoñedicai. Ero, Jusiñamui cai abina finode. Dajerie ra jiaie ra baifemo iñede.

²⁵ Jusiñamuidi naga cai abimo ite ra dajena maijiana itatate. Dajena maijicana jaide.

²⁶ Cai abimona dajera isireniadedi, nana cai abi daacaiño isirede; iadedi cai abi caimare marena ia, nana iobidicai. Ie isoide. Cristomo dajena duidicai.

Jiaie creyente duere sefuia, naimiena cai canoia, Cristo dibeimo caimare marena iticai. Naimiena cai canoñenia, caimare marena iñedicai.

²⁷ Ero, caidi naimie cominina jira, Cristomo dajena nagasaiai duidicai.

²⁸ Ie jira Jusiñamuidi naimiena ñnotinomona damieriena nano fetuanona, Cristo naimacina oretate, ie rafuena lollena. Ie mei jianona fetode, naimacimo ie rafuena llua mei, jianomo ie rafuena jino lollena. Jianona fetode, ie rafuena llofuellena, cominina ie rafuena raise uññotallena. Jaino ie uaina itatate, naimie facaina naimaci maijillena, jiaie creyentiaina naimaci canollena. Damierie creyentemo siño rafuena finua uaina itatate. Damieriemo duidinona jilloitaja uaina itatate. Damieriemo jiaie cominina canua uaina itatate. Damieriemo jiaie cominina sedaja uaina itatate. Ja muidomo damieriemo naimaci uññoñega uaido ñaia uaina itatate. Iese omoina fetode, naimie facaina dajena nana omoi maijillena.

²⁹ Ero, Jusiñamui nana omoina fetoñede, ie rafuena jino lollena. Damieriena fetode. Nana omoina fetoñede, ie rafuena llofuellena. Damieriena fetode. Nana omoina fetoñede, siño rafuena finollena. Damieriena fetode.

³⁰ Nana omoina fetoñede, duidinona jilloitallena. Damieriena fetode. Nana omoina fetoñede, omoi uññoñega uaido ñaillena. Damieriena fetode. Nana omoina fetoñede, naie uññoñega uai jino dobaññollena. Damieriena fetode.

³¹ Naga creyentemo Jusiñamuidi ie maijia uaina itatate; iadedi damierie uai jiaie uai baifemo ite. Iena omomimo illena, Jusiñamui jica; iadedi jiaie rafuena omoi ollena, omomimo lloiticue. Nana jiaie rafue baifemo ite. Jiaie cominina omoi isiruillena lloiticue.

13

Nana jiaie cominina cai isiruillafue

¹ Cai uññoñega uaido ñaia uaina cai ñaia, Jusiñamui jaienisaí isoi cai ñaia, cominina cai isiruiñenia, jamai ñaiafuena ñaiticai.

² Jusiñamui rafue jino lolle uaina caimo ia, nana Jusiñamui caina uññotaga rafuena cai uññoia, nana Jusiñamuimo ite rafuena cai uññoia, Jusiñamui siño rafuena finuana cai eo ñnoia, cominina cai isiruiñenia, Jusiñamuimona jamai bue isoidicai.

³ Jiaie cominina cai canollena nana caimo ite rana cai fecaia, Cristo rafuena cai lollena cai niadi fodañacania, cominina cai isiruiñenia, jaca buena oñedicai. Jusiñamuina jaca iobitañedicai.

⁴ Cominina cai isiruia, naimaci diga raire iciriñedicai. Naimacina canocabidicai. Naimaciri abina uradoñedicai. Abina birioicaiñedicai.

⁵ Cominina cai isiruia, abina iedoñedicai. Naimacimo cai comeciaina facabidicai. Cai rana caidicabiñedicai. Naimaci diga iciricabiñedicai. Naimaci caina jeare finoia, ibana ocabiñedicai.

⁶ Cominina cai isiruia, naimaci jeare finoca rari iobicabiñedicai. Naimaci uanaí mare finoia rari iobicabidicai.

⁷ Cominina cai isiruia, naimaci caina duere finoia, ibana ocabiñedicai. Cai joreñona bu ñaia, caina taino lloia, iena ñnocabiñedicai. Cai marena illamo ocuiridicai. Cai comeciaina ocuiñocana jaidicai.

⁸ Jusiñamuidi cominina jaca cai isiruillana jitaide; iadedi caimo ie rafuena jino lolle uaina jaca itatañeite. Naie uaidi ico saite. Caimo cai uññoñega uaido ñaia uaina jaca itatañeite; iadedi naie uai ico saite. Caimo ie llofuelle uaina jaca itatañeite; iadedi nai uai ico saite.

⁹ Nana Jusiñamui caina uifnotagacinona nia raise cacaiñedicai. Nana Jusiñamui rafuena nia raise jino lloñedicai;

¹⁰ iadedi Jesucristo dane abido bia, Jusiñamui Joreño caimo itataja uaidi saite. Naimie diga cai illemona naimiena raise uifnoticai. Naimiemo ite rafuena jiai raise uifnoticai.

¹¹ Jiaie rafuedo iena llofueticue. Jaiie nia cue uruenia, urue isoi ñaiticue. Urue isoi comecina facadicue; iadedi eimiena cue jaillamona, urue isoi jaiñedicue. Cue uruenamona ite rafuena fainonocadicue. Eimie comecina facajacinodo birui jaidicue. Urue isoi Jusiñamui rafuena birui janore uifnoticai; iadedi monamo cai ia, eimie isoi iena raise uifnoticai.

¹² Ero, jacaie acaranimona cai joreñodi raise bainide. Ie isoide. Jusiñamuimo ite rafuena nia raise uifnotedicai. Iena raise cacaiñedicai; iadedi Cristona ico cioiticai. Naimiemo ite rafuena birui janore cacadicue; iadedi naimie dine cue ria, Jusiñamui cuena jai uifua isoi, jiai raise uifnoticue.

¹³ Ja muidomo lloiticue. Jesucristo billanona, Jusiñamui Joreñomona caimo ite uaidi saite; iadedi Jusiñamui llogacinodo jai abina ñnoticai. Naimie llogacino suillemo jai ocuiriticai. Jusiñamuina cai isiruillamona, jiaie cominina jiai isiruiticai. Naie isiruillacino jiaicino baifemo faite. Ie jira coninina isiruicana omoi jai.

14

Omoi uifnoñega uaido omoi ñaia rafue

¹ Nana cominina isiruicana mai omoi jai. Jusiñamui Joreñomona bite maijia uaina uana omoi nicido. Jusiñamui rafuena jino lolle uaina ua nicido.

² Ero, omoi uifnoñega uaido ñaia uaina omoi ñaicabia, jaca buna omoina cacaiñena jira, cominina canollena ñañedomoi; iadedi Jusiñamuina iobitallena ñaitomoi. Omoi uifnoñega rafuena omoi comeciainomona ñaitomoi.

³ Jusiñamui rafuena jino omoi lloia, cominina canodomoi. Naimacina Jusiñamuina ñnotadomoi. Naimie dibeimo raise itatatomoi. Naimaci comeciaina ocuifnotadomoi.

⁴ Nana creyentiaina canodomoi; iadedi naie uifnoñega uaido omoi ñaia, dani omoi comeciaina canodomoi.

⁵ Rollena omoi oficabia, naie uifnoñega uaido omoi ñaia, cuemona mare; iadedi Jusiñamui rafuena jino omoi lloia, cuemona ua eo mare. Naie jino llua uaidi naie uifnoñega uai baifemo faite. Naie uifnoñega uaido omoi ñaia, nana creyentia iena raise cacareillena, iena omoi oni dobaifnoia, cuemona jiai mare. Ie mei naie ñaiamona, Jusiñamui rafuena naimaci cacajamona, creyentiaina canodomoi.

⁶ Cue amatiai omoi dine cue jaiacanana uifnotomoi. Omoi dine cue ria, cue uifnoñega uaido cue ñaiticuedena, omoina canoñedicue; iadedi Jusiñamui cuemo jai lloga rafuena omoimo cue lloticuedena, omoina canodicue. Jusiñamui rafuena raise cue jai uifua jira, omoina cue llofueticuedena, omoina jiai canodicue.

⁷ Ero, quena jamai tainuaido bu fia, ie figana uifnoñedicai. Guitarra bu jamai tainuaido taia, ie taillana uifnoñedicai.

⁸ Ejércitomo trompetana jamai tainuaido fia, soldaduai maijillena raise uifnoñedimaci.

⁹ Ie isoide. Cai cacaiñena uaido omoi ñaia, omoi ñaiana uifnoñedicai. Iese omoi ñaia, jamai tainona ñaite isoi cacadicai.

¹⁰ Eo ailluena nairaii ite. Naga nairai ie uai ite dani naimaci ñaillena;

11 Iadedi nie nairai ie uaina cue uiñoñenia, naimacimona jiaie nairai imiena eruaidicue. Cuemona naimaci jiaie nairaina eruaidimaci. Conini diga ñaiana cacaiñedicaí.

12 Te isoide. Jusiñamui Joreño mona bite ñaia uaina omoi eo jitaillanona, diga uaina Jusiñamuimo jica, daní conini Cristo rafuena inocana omoi jaillena. Jusiñamui Joreño mona daní daje uaina nicidoñoeno; iadedi nana nicido.

13 Te jira ie uiñoñega uaido bu ñaia, ie oni dobañña uaina naimiemo illena, jiaie creyentiaí iena cacaillena, Jusiñamuimo jicaja.

14 Jusiñamui diga cue uiñoñega uaido cue ñaia, Jusiñamui Joreño cuena ñaitatate; iadedi iena cacaiñedicue. Iena uiñoñedicue.

15 Te jira, ¿niese cue nibaille? Jusiñamui diga cue ñaia, cue uiñoñega uaido ñaiticue; iadedi comini cue ñaiana raise uiñoñena, Jusiñamui diga jamai cue uaido jiaí ñaiticue. Jusiñamuimo cue roia, cue uiñoñega uaido roiticue; iadedi comini cue ruana raise uiñoñena, Jusiñamuimo jamai cue uaido jiaí roiticue.

16 Iobillacinona Jusiñamuimo omoi fecajano, omoi uiñoñega uaido omoi ñaiana, ¿niese omoina cacaiñedinó: “Jee” raitimaci?

17 Iobillacinona Jusiñamuimo raise fecadomoi; iadedi omoina cacaiñedinona Jusiñamuina uiñoñañedomoi. Te jira omoi uiñoñega ñaia uaina oni dobaññotimie omoi roracomo inenia, naie uaido ñaíño.

18 Cue uiñoñega uaido cue ñaicabilla jira, Jusiñamuimo iobillacinona fecadicue. Omoi baífemo naie uaido cue ñaiana uiñoñicue;

19 Iadedi roracomo cue ia, cominina raise cue llofuellena, janore cue ñaiadi, mare; iadedi eo are cue uiñoñega uaido cue ñaia, cominina Jusiñamui rafuena cue llofueñenia, cuemona marañede.

20 Cue amatiaí, omoi uiñoñega ñaia uaido daní jai jaidomoi; iadedi jiaie Jusiñamui Joreño itataja uaimo omoi comeciaina facañedomoi. Omoi abina jai uiñuamona, jiaie uaimo omoi comeciaina faca.

21 Jusiñamui facaina lloraima micori jaie cuela: “Jusiñamui llote: ‘Cue comini dine jiaie nairaina cue oretajamona, cue cominina cuena inotallena, naie jiaie nairai uaido cue cominimo lloiticue; iadedi iena jitañeñitimaci. Cuena jaca uiñoñeñitimaci’ llote”.

22 Te isoide. Uiñoñega uaido omoi ñaiana, Cristona inoñedinó iena raise cacaiñedimaci; iadedi Cristona inotino iena cacadimaci. Iemona fueotimaci. Jusiñamui rafuena omoi llofuiamona, Cristona inoñedinó iena cacajamona, Cristona inoñedimaci; iadedi Cristona inotinona canodomoi.

23 Danomo nana omoi ofia, omoi uiñoñega uaido nana omoi ñaia, Cristona inoñedinó iena cacajanona, omoina; “Uairico” raitimaci;

24 Iadedi omoi ofia, Jusiñamui rafuena omoi jino lloia, iena Cristona inoñedimie cacajamona, naimiedi jeacino naimie comecimo illana uiñoite. Naie rafue naimiemo riire baite.

25 Naimie comecimo ite jearede rafue naimie uiñuamona, Jusiñamuimo ie jeacinona lluanona, Jusiñamuina inoite. Te muidona raite: “Uanaí, Jusiñamui omoi motomo ite”.

Roracomo omoi ia, raise marena omoi i

26 Cue amatiaí, rollena omoi oficabia, ¿niese omoi nibaille? Iena ja ñaiticue. Omoi ofia, omoina damierie nibai roite. Jaiimie Cristo rafuena llofueite. Jaiimie naimiemo Jusiñamui como lloga rafuena jino lloite. Jaiimie ie uiñoñega uaido ñaite. Jaiimie naie uaina oni dobaññoite. Cristo dibeimo creyentiaína raise itatallena, nana omoi finua rafuena raise fino.

27 Uiñoñega uaido bu ñaia, damie amani naiedo ñaite. Damierie ñaite. Jaiimie ñaile ifomo jaiimie ñaite. Te mei damie naie ñaiana oni dobaññoite.

²⁸ Naie ñaiana oni dobaiñotimie iñenia, naie uiñoñega uaido ñaitimie roracomo ñaiñena; iadedi naimie ñaiacania, Jusiñamuimo dama ie jofomo ñaia.

²⁹ Jusiñamuimona ite rafuena bu jino lloiacania, damie amani iena lloite. Damierie lloite. Jiaino llorainidi Jusiñamuimona naie llucino billana uifuanona llua.

³⁰ Jusiñamui rafuena bu nia lloia, naimie ecimo jiaimiena rafuena Jusiñamui Joreño llotataia, nano llotimie raire llucaila. Iemei jiaimie lloite.

³¹ Iese damierie nana lloitomoi, naie lluamona Jusiñamui rafuena raise omoi uiñollena, omoi comeciai jiai ocuiñollena.

³² Naga llotimiedi ie uiñua diese llua na uiñote. Ie jira jiaimie nia lloia, iena cacarei. Iemei jiaimie llua.

³³ Iese iñenia, daacaiño omoi lloia, buna Jusiñamui rafuena raise cacaiñeite. Omoi raise illena Jusiñamui jitaila jira, omoi uri illena Jusiñamui jitaila jira, cue llucinodo omoi jai.

³⁴⁻³⁵ Jiaie creyentiai illanuaimo isoi omoi roracomo riñoniaidi uaina uaitañena. Nainomo lloga rafuena nainomo naiñaiñuai siadoñena; iadedi naiñaiñuai jofomo rillanona, naiena ie inimo jicanoitimaci. Roracomo naiñaiñuai ia, Moisés micorí jaie llua isoi, naiñaiñuai ini anamo naiñaiñuai illa jira, nainomo ite lloraima uaina naiñaiñuai uaitañena. Roracomo naiñaiñuai uaina uaitaia, maraiñede, nainomo ite jino lloraima uaina naiñaiñuai raise cacaiñena jira.

³⁶ ¿Ñiese cue llucinodo jaiacaiñedomoi? Jusiñamui rafue omoi mona comuiñede. Dani omoi mo naie rafue duiñede; iadedi nana creyentiaimo duide. Dani omoi mo Jusiñamui ie rafuena lloñede. Nana creyentiaimo iena llote.

³⁷ “Rafuena Jusiñamui cuemo llote” omoi mona ie comecina bu facaia, “Jusiñamui Joreño ie ñaia uaina cuemo itatate” ie comecina bu facaia, “Cai Namamona ite uaina omoi mo cueticue” naimiedi uiñote;

³⁸ iadedi naimie iese uiñoñenia, Jusiñamui Joreñomona naimie uai iñenana uiñoticaí.

³⁹ Cue amatiai, Jusiñamui omoi mo ie rafuena llua uaina naimiemo jica; iadedi naimaci uiñoñega uaido jiaie creyentiai ñaia, iena rairuiñeno.

⁴⁰ Omoi ofia, cue llua isoi, Jusiñamuina raise marena seda.

15

Fiodaillamona Cristo jai jillode

¹ Cue amatiai, iena omoi feitañellena, bie rafuena dane lloiticue. Cristo ie mare rafuena omoina navui llofueticue. Fiodaillamona Cristo jilluana llofueticue. Cue llofuiacinona feiñotomoi. Iena inocana jaidomoi.

² Naiena omoi inuamona, Jusiñamui omoi jecinomona omoina jillotate. Naiedo nia omoi jaia, iena raise omoi inoia, jai jillobidomoi.

³ Nanoca rafuena omoina llofueticue. Jiaie creyentiaimona biena jai cacadicue. Jusiñamui facaina lloraini micoriai jaie cufaguaia isoi cai jecino facaina Cristodi fiodaite.

⁴ Raiafomo naimiedi jonega. Darui amani illanona naiemona Jusiñamuidi naimiena jillotate, Jusiñamui facaina lloraini micoriai jaie llua isoi.

⁵ Ie mei Pedro naimiena ciode. Ie mei ie once llofueoicaigano naimiena ciodimaci.

⁶ Ie mei quinientos naimiena inotino naimiena daruido ciodimaci. Naimacimona damierie jai fiodaitimaci; iadedi ailluena nia fiodaiñedimaci. Cristo jilluana uiñotimaci.

7 Ie mei Jacobo naimiena ciode. Ie mei nana ie oretagano naimiena ciodimaci.

8 Ie mei naimiena jiai ciodicue. Ie jira fiodaillamona naimie jilluana uiñoticaí. Ie doce llofueoicaigano fetua mei, diga años illanona, naimiena nia cue uiñoñena facaise cuena fetode. Ie mei ie rafuena cue lollena, cuena oretate.

9 Ailluena creyentiaína jaiie cue duere finua jira, nana jiaie Cristo oretagano cue baifemo faitimaci. Jamai bue isoidicue; iadedi Cristo cuena fetode.

10 Jusiñamui cuena duenaillamona, Cristo oretagamiena jaidicue. Jusiñamui cuena jamai tainomo duenañede. Nana jiaie Cristo oretagano baifemo Cristo rafuena llofuecabiticue. Dama cue comecimona llofuecabiñedicue; iadedi Jusiñamui cuena canuamona, iese llofuecabiticue.

11 Jiaie oretagano Cristo rafuena llofueia, iena cue llofueia, daje isoide rafuena llocana jaidicaí. Naie rafuena omoi cacajamona, iena ñnotomoi.

Fiodaillamona nana creyentiaí ico jilloitimaci

12 Fiodaillamona Jusiñamui Cristona jillotajana llofuecabiticaí; iadedi omoimona dajerie raitomoi: “Fiodaillamona, nana comini imaci abiaí diga ico jilloñeitimaci”.

13 Ero, omoi llua isoi fiodaillamona comini ico jilloñedena, ie isoi Cristo jiai nia raiafomo ite. Niade jilloñede.

14 Cristo jilloñenia, naimiena jai tainona lloticaí. Naie rafuena jiai tainona ñnotomoi.

15 Cristo fiodaillamona Jusiñamuidi naimiena jillotajana llofuecabiticaí. Fiodaillamona creyentiaína ico Jusiñamui jillotañenia, Cristona jiai niade jilloñaede. Jusiñamui rafuena tainona jai llofueticaí.

16 Fiodaillamona nana creyentiaí ico jilloñenia, Cristo jiai jaiie jilloñede.

17 Cristo nia jilloñenia, naimiena tainona ñnotomoi. Jusiñamui omoi jeacinona niadedi oni dotañede.

18 Cristona ñnuanona jai fiodaitinodi jiai jai faifidimaci. Jusiñamui illanomo jaca iñeitimaci; iadedi iraimo jaca iitimaci.

19 Nana cai ille ñnori ñani Cristo caina jilloitallemo cai ocuria; iadedi naimie jilloñenia, jai duere iticaí. Jai tainomo ocuridicaí.

20 Ero, tainomo ocuriñedicaci; iadedi fiodaillamona Jusiñamui Cristona jai jillotate. Naimie jillua mei, naimiena ciodicaí. Ailluena fiodaitino jai itimaci; iadedi Cristo jai jillode. Ie jira nana jai fiodaite creyentiaí jiai jilloitimaci.

21 Adán micori jeacinona finua jira, fiodaite. Fiodaillamona jilloñede. Jeacino naimie finua jira, fiodaicana jiai jaidicaí; iadedi fiodaillamona Cristo jai jillua jira, fiodaillamona ico jiai jilloiticaí.

22 Adán micorimona cai comuilla jira, nana fiodaicana jaidicaí; iadedi Cristomo cai duilla jira, jilloiticaí, naimie diga jaca cai illena.

23 Cristo jai jillode. Cai fiodailla mei, naimiemo cai duilla jira, ico dane abido naimie bille facaise jilloiticaí.

24-25 Ie mei naimie ñnena nana naimie ñbeimo iñedinona anafefitaite. Nana naimie ñbeimo iñede joreñaína jiai anafefitaite. Illaímana Cristo illamona, nana naimie ñbeimo iñedinona anafefitaite. “O uai cuemo o illamona, nana o jitaiilla rafuena jai fuidodicue” ie Moomo lloite.

26 Nana naimie ñbeimo iñedino naimie anamo jai illa mei, Cristo muidona naimie comini jai jilluamona dane fiodañeitimaci.

²⁷ Jusiñamuidi nana cominina Cristo anamo itataite. Ie muidona creyentiaidicai dane fiodañeiticai; iadedi Cristo anamo Jusiñamui iñeite. Cristona oretaja jira, Cristo anamo Jusiñamui iñede.

²⁸ Naga ra Cristo anamo illa mei, ie maijia fuilla mei, Jusiñamui ie Moona jira, Jusiñamui anamo Cristo jiai iite. Jusiñamui nanocamiēna jira, nana naimie finoca ra naimie anamo iite. Nana comini naimie anamo iitimaci.

²⁹ Cristo jilloñedena, fiodaillamona jilloñeitomoidena, ¿niese bautizagaomoi? Fiodaillamona omoi jilloñenia, ¿bue ñellena bautizagaomoi? Tainomo jai bautizagaomoi; iadedi iese iñnoñedomoi. Dajerie creyentiai marena illamona, omoimona dajerie creyentiaina jaidomoi. Naimaci jai fiodaitimaci; iadedi fiodaillamona ico jilluana iñnotimaci. Iena omoi iñnuanona, bautizagaomoi.

³⁰ Cristo jilloñenia, cue jilloñedicuedena, ¿bue ñellena nagarui Cristo rafuena cue llofuiamona, eo jacirede ramona niadedi fiodaicabiticue?

³¹ Cue amatiai, cai Nama Jesucristomo omoi duilla jira, omoi ri iobidicue; iadedi nagarui niadedi fiodaicabiticue. Cristo rafuena omoimo cue llocabilla jira, jiaie comini iciritimaci. Icirillamona, cuena meineiacadimaci.

³² Efeso railla nairaimo birui cue illamona, diga comini cue lloga uaina eo uaitaside. Duere sefuidicue. Cristo jilloñenia, cue llumona jaca buena oñeiticue. Ie muidona fiodaillamona cai jaca jilloñeiticaidena, Cristo rafuena fañonocaida, ico raire jamai cai fiodailla jira, jamai ua jai jaicaillafuena cai jaiaicaiticai. Ie ia iese iñede. Cristo jai jillode.

³³ Ie jira omoi abiaina jifueñeno. “Jilloñeiticai” railla comini diga omoi nabairia, naimaci llogacinodo jiai jaitomoi. Ie muidona naimaci diga nabairiñeno.

³⁴ Ie jira raise abina uiñuanona, mai jai. Jeacinona finocana jaiñeno. Omoimona dajerie Jusiñamuina raise uiñoñena jira: “Jusiñamuidi cominina jillotañeite” raitimaci. Omoi meidaillena, omoimo iese lloticue. Jusiñamui rafuedo raise mai omoi jai.

¿Niese creyentiai jilloitimaci?

³⁵ Omoimona damie nibai jicanoite: “¿Niese fiodaillamona creyentiaidicai jilloitica? Naimaci abiai nibai jai rifaidimaci. ¿Nie isoide abiai diga dane iitica?”

³⁶ Iese bu jicanoia, raise comecina facañede. O illimo buena o ria, janore sicua meinoconi, o riga radi jai abidi rifaide.

³⁷ Nie isoide icoñona o ria, nie isoide ijina o ria, nie isoide idona o ria, naie ra sicua mei, jai jiaifor eruaide. O riga rana eruañede.

³⁸ Naga riaru daje isoi eruañede. Jusiñamui jitailla isoi, jiaiforie eruaide. Ie isoide. Naga fiodaitimie jillua mei, Jusiñamui jitailla isoi, ie abina jiaiforie itataite.

³⁹ Diga isoide cai abiaina Jusiñamui jai comuitate. Naga abi isoide ite. Cai maijillena, comini abi ite. Eniruedo macarillena, ocaina abi ite. Fellena, silli abi ite. Jinuimo illena, lliciai abi ite. Ua diga isoide abi ite. Jusiñamuidi cai jiaiforie eruaite abiaina finorede.

⁴⁰ Jusiñamui dine ico cai ia, cai abiai iite, nainomo cai illena. Bene cai abiai jiai ite, bene cai illena. Monamo cai ia, ebireniticai. Bene cai ia, jiai ebire iticai; iadedi daje isoi ebire iñedicai.

⁴¹ Jusiñamuidi monamo ite rana finode; iadedi daje isoi lligaiñoñede. Jitoma fivui isoi lligaiñoñede. Fivui ucua; isoi lligaiñoñede. Naga ucua; daje isoi lligaiñoñede. Monamo cai ico illena, naimie jitailla diese cai abiai caimo iite.

42 Ie isode. Fiodaillamona cai jillua mei, cai abiaí jiaífo eruaite. Cai fiodaillamona cai abiaí rifaide; iadedí cai jilluamona, cai abiaí dane jai rifaiñeite.

43 Cai fiodaillamona cai abiaí jai ebinide; iadedí cai jilluamona, cai abiaí ebirenite. Fiodaicana cai jailla jira, cai abiaí birui raise mairiñede; iadedí ico cai jilluamona, cai abiaí mairite. Nana Jusiñamui jitailla rafuena finoreniticaí.

44 Cai fiodaia, come abiaí isoi caimo birui ite; iadedí cai jilluamona monamo ico caimo cai abiaí jiaí iite. Enirue iena cai abiaí birui caimo ite. Ie jira monamo cai jiaífo eruaite abiaí caimo iite.

45 Adán micori comuilla rafuena Moisés micori jaie cuega: “Jusiñamuidi nano comuidimie dofomo jafaicina firaiñuamona, naimie micori comena jaide” cuega. Naimiemona cai comuilla jira, fiodaiticaí. Fiodaillamona Cristo jillua jira, ico cai jiaí jilloille jira, caína jiaífo eruaite abiaína ico itataite.

46 Eniruemo birui cai illa jira, caimo birui ite abiaí diga iticaí. Fiodaillamona ico cai jillua mei, monamo cai ia, jiaífo eruaite abiaí diga iiticaí.

47 Adán micoridí enirue ie. Imuicimona Jusiñamuidi naimiëna finode. Cristodí eniruemo billanona, imana jaide; iadedí Jusiñamui dinena monamona naimie bite.

48 Imuicimona Adán micori finua jira, naimie fiodailla mei, dane imuicina jaide. Naimiemona cai comuilla jira, cai fiodaia, jiaí imuicina jaiticaí; iadedí Cristomo jiaí duidicaí. Cai jillua mei, naimie isoi ico iiticaí.

49 Adán micorimona cai comuilla jira, naimiëna eruaidicaí. Eniruemo Cristo jaie ia, naimie abí ite. Fiodaillamona naimie jillua mei, naimiemo jiaífo eruaite abí naimiemo ite. Cai jillua mei, Cristona eruaiticaí.

50 Cue amatiaí, biena lloticue. Caimo jai ite abiaí diga monamo Jusiñamui ie cominina sedajanomo iñeíticaí. Cai abiaí rifailla jira, cai fiodailla facaise naie isode abiaí diga nainomo jaca iñeíticaí.

51 Ero, Jusiñamui cuena uñnotaga rafuena omoimo ja lloticue. Iena navui jaca uññoñedicaí. Nana creyentiaídicaí fiodaiñeíticaí; iadedí Jusiñamui cai abiaína jiaífo meidotaite.

52 Omoí uisí jarire cuirorilla isoi, iena ua raire meidotaite. Ie trompeta fillanona, jai fiodaite creyentiaína Jusiñamuidi jillotajanona, naimaci abiaína meidotaite. Nia fiodaiñedinodicaí cai abiaína jiaí meidotaite. Dane fiodaiñeíticaí.

53 Cai abiaí birui rifaiacade. Ie jira birui fiodaicana jaidicaí. Jusiñamuidi cai abiaína ico meidoite. Ico monamo jiaífo abiaí caimo ia, cai abiaí rifaiñeite. Fiodaiñeíticaí.

54 Iese caimo sua, Jusiñamui facaina lloraima micori jaie cuega uai jiaí suite. Cuega: “Nairuimona creyentiaí jaca fiodaiñeítimaci”.

55 Cai jaca illa jira, fiodaicana jaiñeíticaí. Fiodaillana jaciruiñeíticaí, dane cai fiodaiñeíticaina jira.

56 Jeacino illa jira, birui fiodaicana jaidicaí. Moisés micori jaie llogacino illa jira, iena cai raise finonina jira, jeacino caimo illana uññoticaí;

57 iadedí cai jeacino facaina cai Nama Jesucristo fiodailla jira, jeacino anamo jai iñedicaí. Cai fiodailla mei, dane fiodaiñeíticaí. Jusiñamui caína imona jai jillotate. Ie muidona naimieri cai iobillasa.

58 Cue amatiaí, fiodaillamona nana creyentiaí ico jillua jira, Cristo rafuena inocana jai. Naganomo iñeno; iadedí Cristo rafuena llocana omoí jai. Naimie jitailla rafuena finocana omoí jai. Naimie facaina omoí maijia, tainona maijiñedomoí. Naiemona diga mare rafue comuite. Iena jai uññotomoí.

16

Jerusalémo itinomo ucubena oredimaci

¹ Jiaie rafuena cuemo jicanotomoi. Jerusalémo ite creyentiaimo ucubena oretaiacadomoi. Galaciamo ite creyentiaimo cue llua isoi, omoimo lloiticue.

² Naga domingo omoi ucubemona daje diese eneno oni eeno. Omoi maijia bailla diese ucubemona cue bille dñori iena eeno. Iese naga domingo omoi eenoñenia, ico cue bia, ¿niese dacaiño ofrendamo ailluena ucubena joneitomoi?

³ Omoi dine cue rilla mei, omoi eenoga ucubena uillena, Jerusalémo ite creyentiaimo omoi fetocanona oretaiticue. Cartana jiai oretaiticue, omoi fetocano mareuidinona Jerusalémo itino uiñollena.

⁴ Jerusalémo cue comeci jiai jaiacania, cue diga jaitimaci.

Pablo jai macariacade

⁵ Macedonia railla eniruemo nano jaiticue. Creyentiaina cioillena, dajerie nairaimo jaiticue. Ie mei omoi dine jaiticue.

⁶ Diga irui omoi diga nibai iiticue. Nana rollime facaise omoi diga nibai iiticue. Nibai daje amani fivui iiticue. Ie mei cuena omoi canollemona oni jaiticue. Omoi dñomona cue jaia, cue jaillinona nia uiñoñedicue.

⁷ Omoi dine birui nia jaiñeiticue. Omoi dine birui cue jaia, dallu omoi diga iiticue; iadedi jairuido omoi dine cue jaia, cai Nama jitaia, omoi diga are iiticue.

⁸ Beno Efesomo nia iiticue.

⁹ Beno diga comini Cristo rafuena cacaacadimaci. Naimacimo iena llofueiacadicue. Diga comini cue lluana uaitatimaci. Cue lluana jitañedicue Ie jira bene nia lloiacadicue. Pentecostés railla rafue fuille mei, jaiticue.

¹⁰ Omoi dine Timoteo ria, naimiena raise marena nafue. Cue isoi cai Nama facaina naimie maijicabide.

¹¹ Ie muidona naimie llucacina jamaiñeno. Omoimona naimie jaiacania, cue dine abido naimie raise rillena, naimiena raise cano. Naimie jaiacania, naimie caimare caimaduano oreta. Jiaie creyentia diga naimie billemo ocuridicue.

¹² Apolona jicanotomoi. Jiaie creyentia diga omoi dine naimie jaillana naimiemo lloticue; iadedi naimie comeci nia jaiacaiñede. Jairuido abi juarenia, omoi dine jaite.

Fuiduacino

¹³ Jacinomona abina rairui. Cristo rafuena ñnocana omoi jai. Eimie isoi omoi comeciaina ocuiño.

¹⁴ Jiaie cominina omoi isiruillamona, nana omoi finoacalle rafuena fino.

¹⁵ Cue amatiai, Acaya railla eniruemo Estéfanadi, ie comini diga, nano creyentiaidimaci. Iena uiñotomoi. Naimaci jitailla jira, jiaie creyentiaina canocabidimaci.

¹⁶ Naie isoidino lloga uaina cacarei. Naga Cristo dibeimo maijidino uaina cacarei. Iedo omoi jai.

¹⁷ Omoimona cue dine Estéfanas bite. Fortunato diga, Acaico diga naimie billa jira, iobidicue. Cue dine iñedomoi; iadedi naimaci billa jira, omoi isoi cuena canodimaci.

¹⁸ Naimaci billamona cue comeci caimataide. Omoi comeciai jiai caimataide. Naie isoidinomo: “Marena maijidomoi” omoi railla.

¹⁹ Diga creyentia Asia railla eniruemo itimaci. Imaci uaina oredimaci. Aquila, ie ai Priscila diga, ie uaina jiai orediaimaia. Iaimaiai jofomo dajerie

creyentiaí rocabitímaci. Cristomo naimaci duilla jira, omoina isiruillanona, nana naie creyentiaí imaci uaina jiaí oredimaci.

²⁰ Nana bene ite creyentiaí imaci uaina oredimaci. Nana creyentiaína eo caimare uaido.

²¹ Omoimo cue uaina jiaí oredicue. Cuena canollena, naimiemo cue llua isoi, jiaimie bie carta cuega; iadedi cue mameci bene dama cueticue. Nana iena iino. Pablodicue.

²² Omoimona Cristona bu isiruiñenia, Jusiñamui naimiena duere finollesa. Cai Nama abido dane billesa.

²³ Cai Nama Jesús omoina duenaillasa.

²⁴ Jesucristomo cai duilla jira, omoina cue isiruillana omoi uiñuana jitaídicue. Mai. Macaibaite.

CORINTOMO ITE CRISTONA HNOTINOMO IE EMODOMO PABLO ORETAGA RABE

Corintomo ite creyentiaimo Pablo cartana orede

¹ ¿Nigacino? ¿Nie isoidomoi? Pablodícue. Corintomo ite creyentiaí, omoi díne bie carta oredícue. Nana Acaya railla eníruemo ite creyentiaimo bie carta jiaí oredícue. Jusiñamui jitailla jira, ie rafuena cue jino llollena, Jesucristo oretagamíedícue. Cue díga Timoteo illa jira, naimíe ie uaina omoi díne jiaí orede.

² Cai Moo Jusiñamui, cai Nama Jesucristo díga, omoína duenaite. Iena uñocana maí omoi jai. Iaimaiaí omoína uri jai itatate. Iena omoi uñocana maí omoi jai.

Pablo ie duere sefuilla rafuena cuete

³ Cai Moo Jusiñamuimo iobillacinona cai fecacabillasa, naimíedí cai Nama Jesucristo ie Moo illanona. Jusiñamui cai Moo illanona, caina jaca duenaite. Cai comeciaina jaca ocuñotade.

⁴ Nie isoide rafuemoná cue duere sefuia, nie isoide ramo cue jiria, naimíe cue comecina jaca ocuñotade. Ie jira jiaínona canoredícue. Nie isoide rafuemoná naimací duere sefuia, nie isoide ramo naimací jiria, Jusiñamui caina ocuñotaja isoi, naimací comeciaina ocuñotaredícue.

⁵ Cristomo jai cue duilla jira, naimíe isoi cue duere sefuia, naimíe cue comecina ocuñotade. Iemoná jiaíno comecina ocuñotajana raise uñotícue.

⁶ Duere cue sefuillamona, omoína canoredícue. Jusiñamui jitaillacino omoi finocana jaillana jitaídícue. Cuená naimíe ocuñotajamona, Cristona omoi faínonocaiñellena, cue isoi omoi duere sefuia, omoína ocuñotaredícue.

⁷ Cue isoi omoi duere sefuia, cue isoi Cristo omoi comeciaina ocuñotaite. Iena raise uñotícue.

⁸ Cristomo cai duillamona, cue amatiaí isoi itomoi. Asia railla eníruemo jaie eo duere sefuídícue. Iena omoi raise uñollena, ie rafuena dane omoímo lloiacadícue. Eo duere cue sefuilla jira, cue comeci niadedí ocuñoñedícue. Niadedí fiódaitícue.

⁹ “Naie facaise fiódaitícue” raillanomo cue comecina facadícue. Cue finoca rafuemoná dama jillonidícue; ía Jusiñamui uai siñona jira, naimíe cuena jillotate. Fiódaitínona naimíe jillotarede. Niadedí fiódaitínona jiaí jillotarede. Naimíedí naimíe cuena jillotajana cue ínuana jitaide.

¹⁰ Naie facaise eo duere sefuillamona cuena jillotate. Íco cue duere sefuia, íemoná dane cue jilloillena ínotícue.

¹¹ Iena cue facaina omoi jicabí. Jusiñamui faíríua meinomo, ailluena comíní cue facaina Jusiñamuimo iobillacinona fecaitimací. Cuená Jusiñamui canua jira, iobillacínona fecaitimací.

Pablo Corintomo navui jaiñede

¹² Cuená gaiñedíno cuena nibaí jeare ñaitimací; ía daje rafueri abina íedotícue. Cue comecínona íena uñotícue. Cristona íñoñedínona marena finodícue. Omoína marena finodícue. Jusiñamui jitaillacino finocana jaidícue. Jusiñamuimona jeacínona finoñecana jaidícue. Cue comecina facacínomona íese jaiñedícue; ía Jusiñamui cuena canuamona, íese jaidícue.

13 “Iese cuetio; iadedi o comecimo jiaie rafue ite diga caimo cuetio” rait-
omoi. Omoina jifueiacaiñedicue. Cue cueda cartaiaina jai facadomoi. Cue
cueda rafue omoi raise cacajana jitaidicue.

14 Cuen a nia eo raise uiñoñedomoi; ia cuena uiñoñocana omoi jaillanona, cueri
omoi iobillana jitaidicue. Cai Nama Jesús abido bia, omoiri cue iobilla isoi,
cueri omoi iobillana jitaidicue.

15 Omoimo iese cue comecina facajamona, omoi dine navui jaiacadicue.
Macedoniamoi cue jaiacadicuemo, raise omoina cue iobitallena, omoi dine
nano navui jaiacadicue.

16 Macedoniamona cue abido bia, omoi dine navui dane jaiacadicue.
Judeamo cue diga jaillena, omoina damieriena omoi oretajana jitaidicue.
Iese cue jaillamo navui comecina facadicue.

17 Omoi dine cue jaiñena jira, cue comeci naganomo illa isoi, comeciaina
facadomoi. Damierie ie lloga uaina jaca finoñedimaci. Dani naimaci rafuemo
comeciaina facadimaci. “Ji” raitimaci; ia: “Dama ite” comeciaina facadimaci.

18 Iese iñedicue. Jusiñamui uanaicinona jaca llua isoi, cue comeci
naganomo iñede. Omoimo cue lloga uai finodicue.

19 Jusiñamui Jito Jesucristo rafuena omoimo navui lloticue. Cristo ie
llogacinona jaca meidoñede. Silvano iena jiaie llofuede. Timoteo iena jiaie
llofuede. Nagarui daje isoide rafuena llofueticai. Jiairuido jiaie Cristo rafuena
llofueñedicai.

20 Nana Jusiñamui jai lloga uai Cristo finoca rafuemonona suocabide.
Jusiñamuina cai sedaia: “Cristo ie rafuena raise finode” cai lloia, Jusiñamuina
iobitadicai.

21 Jusiñamui Cristo dibeimo caina jai itatate. Ie rafuena cai lloia, caina
jai fetode.

22 Ie cominina caina itatate. Iena cai uiñoñocana, ie Joreño caimo jai itatate.

23 Jusiñamui cue uanaicinona llua uai uiñoñe. Uanaicinona cue lloñena,
Jusiñamui cuena duere finuana jitaidicue. Omoi finoca rafue jai cue
uiñoñamona, omoimo cue riire lloia raillano, omoi dine navui dane jaiñedicue.

24 Cristona jai omoi inuana uiñoñedicue. Cristona inuana omoi jailla jira,
omoi finolle rafuena lloñedicue; ia omoi iocire illana jitaidicue.

2

1 Omoi dine nia cue jaiñelmo comecina facadicue. Omoi dine navui cue
ia, iocire coniniri iñedicai.

2 Omoina jai icidicue. Cueri omoi iobillana jitaidicue; ia omoina cue dane
icia, coniniri iocire iñeticai.

3 Omoimo cartana navui oredicue. Omoi dine ite rafuena raise finollena,
iena oredicue. Cuen iobitajana uiñoñotomoi. Omoi dine ite rafuena omoi raise
finoia, coniniri iocire iiticai. “Cuen iobitaitomoi” raillanomo cue comecina
facadicue.

4 Cue comeci eo sunaillamona, cue comeci eo eiamona, carta navui
oredicue. Omoina iciacaiñedicue; ia omoina cue eo isiruillana omoi uiñoñana
jitaidicue. Ie jira omoi dine ite rafuena raise fino.

Maraiñede rafuena finodimie rafuena feita

5 Maraiñede rafue navui damie finua jira, sunaiticai. Naimie muidona cue
comecido duere jaide; ia daje isoi omoi comeciai jiaie duere jaide.

6 Omoi nabei dine ite cominimona naimie jai duere sefuilla jira, dama
iesede. Naimiena dane duere finoñeno;

7 ia naimie finoca rafuena mai feita. Iena dane llinoñeno. Naimie comecina ocuiñota. Naimiena iese omoi canoñenia, omoimona duere sefuillamona, abido danomo jaite.

8 Ie jira: “Ona nia isiruiticai” naimiemo llono. Iena eo jitaidec.

9 Nana cue llwana omoi ñnuana cue facacillena, carta omoi dine navui cueticue.

10 Naimie finoca rafuena omoi feitaia, iena cue jiai feitaicue. Cristo rafuena omoi ñnocana jaillana cue jitailla jira, naimie rafuena feitaicue. Cristo cuena uiñuamona, iena feitaicue.

11 Taife ramo cai faiana uiñotica. Cristo rafuedo cai raise jaiñellena, naimie jitaillana uiñotica. Cristo ñbeimona caina Taife itañenia, omoi motomo itimie finoca rafuena feitaicai.

Troamo navui Pablo ia, uri ñede

12 Troamo navui jaidicue. Cristo rafuena cue lollena jaidicue. Cai Nama comini comeciaina jetajamona, naimie ñbeimo cue maijiamona, ie rafuena lloticue.

13 Tito nainomo cue cioñena jira, uri ñedicue. Naimiedi cue ama isoide. Ie jira nainomo ite creyentiaina facaduanona, Macedoniamos jaidicue.

Jusiñamuidi Cristo ñbeimo ñedinona anafesitaite

14 Jusiñamui fue eo mare. Cristo ñbeimo ñedinona naimie anafesitanona, Cristo comina cai illamona, naimie rafuena uicana jaidicai. Ie rafuena cai lloia, iena comini ñnoia, Jusiñamui naimacina jai caimare itatate.

15 Cristomo cai duillamona, ie rafuena cai lloia, Jusiñamuina iobitadica. Cai llwamona, damierie jillodimaci. Iena jitañenamona, damierie faifidimaci.

16 Iena cacajamona, damierie faificana jaidimaci. Jusiñamui illanomo jaca ñeitimaci. Iena cacajamona, jaino Jusiñamui illanomo jaca itimaci. Jamai fue isoidicue; ia bie rafue llocana jaidicue.

17 Damierie Jusiñamui rafuena llwamona, ucubena oiacadimaci. Omoimo comecina facañedimaci; ia iese llofueñedicue. Omoimo cue comecina facajanona, bie rafue cue llwamona, buena oñedicue. Jusiñamuimona cue llogacinona oticue. Jusiñamui cuena ciua jira, Cristomo cue duilla jira, uanaicinona jaca lloticue.

3

Cristo caimo lloga rafuedo birui jaidicai

1 Omoi dine damierie llofueraini jaja, cartaiaina uicabitimaci. Naimiaci cartaiamo jainodi: “Bie llofueraini mare” raillanona cuetimaci. Omoimona jaino cuela cartaiaina: “Bie comini mare” raillana jitañedicue. Cuemona jaino cuela cartaiaina: “Pablo mare” raillana jiai jitañedomoi.

2 Omoi marenana jai uiñotocue. Cue marenienana jai uiñotomoi. Carta isoidomoi. Jusiñamui ñbeimo omoi comeciameidumona, cue comecimona omoina raise uiñotocue. Omoi birui illamona, omoina fidiama, nana comini omoina raise uiñotimaci. Ie jira jainodi: “Bie comini mare” raillana omoimona jitañedicue.

3 Cristo rafuena omoimo lloticue; ia Cristo omoi comeciaina jai meidotaja jira: “Omoi mare” raillanona naimie jai cuedadena, nana comini uiñotimaci. Tinta diga naimie cueñede. Jusiñamui Moisés micorimo jai lloga rafue jamai noficimo cuela. Cai cajede Jusiñamui birui iese cueñede; ia naimie Joreño uaido omoi comeciaina birui meidote.

4 Cristomo cue jai duilla jira, Jusiñamuina cue ñnuamona, omoïna iese lloticue.

5 Cue finoca rafuemona iese lloñedicue; ia Jusiñamui uai cuemo illamona, iese omoïmo lloticue.

6 Jiaie rafuedo birui cue jaillena, Jusiñamui cuena fetode. Ie uai cuemo illamona, cuemo lloga rafuena llocabiticue. Moisés micorïmo lloga rafuena birui lloñedicue. Moisés micorïmo lloga rafue ñnuamona, Jusiñamui illanomo jaca buna itatañede. Jusiñamui Joreño llotataga rafuena birui llocabiticue. Iena cai ñnuamona, Jusiñamui Joreño Jusiñamui illanomo caïna jaca itatate.

7 Moisés micorïmo lloga rafuedo jaillamona, Jusiñamui dine buna jaca iñena. Noficïmo Jusiñamui cuela. Moisés micorïmo Jusiñamui llua mei, Jusiñamui uai ebirena jira, Moisés micorï uieco eo quenirecaide. Jusiñamuimona naimie abido bia, Israel comini Moisés micorï uiecomo eruainidimaci. Nagarui Jusiñamui diga naimie ñaiñenia, naimie micorï uieco ja muidomo queninide.

8 Jusiñamui Moisés micorïmo jiaie lloga uai ebirede; ia Jusiñamui Joreño birui caïmo lloga uai baifemo ebirede.

9 Moisés micorï rafuedo bu jaia, faïcana jaide; ia naie rafue ebirede. Birui ite rafuedo bu jaia, Jusiñamuimona marebicaide. Ie muidona birui ite rafue jiaie ite rafue baifemo ua eo faïte.

10 Moisés micorï rafue jiaie ebirede; ia jiaie rafue birui illa jira, Moisés micorï rafue jai birui ebinide.

11 Birui ite rafue jaca saiñena jira, ua eo ebirede.

12 Tena cai uñnuamona, bie rafuena marefodo jaciruiñeno lloticue.

13 Ñiroi diga, Moisés micorï isoi cue uiecona ñbaiñedicue. Naimie micorï ie uieco ñbaide, ja muidomo ie uieco quenirena feioicaillana comini cioïñellena; ia cue lloga rafuena marefodo llocabiticue.

14 Moisés micorï comini Jusiñamui rafuena jaca ñnoñedimaci. Naimaci comeciaï jitañena jira, ñnoñedimaci. Moisés micorï rafuena birui judiaï comini facaia, iena nia raise cacaiñedimaci. Dani Cristona ñnuamona, naimaci comeciaï raise cacareitimaci.

15 Cristo rafuena birui naimaci ñnoñena muidona, Moisés micorï rafuedo nia jaidimaci.

16 Cai Nama dibeïmo bu jaia, naimie comeci raise cacade. Moisés micorï rafuedo naimiedi cai jaiñenana raise uññote.

17 Cai Nama Joreño lloticue. Cristo dibeïmo cai jaia, naimie Joreño caïmo jiaï ite. Cristona cai nabaillamona, jecino anamo jai iñedicaï. Moisés micorï rafue anamo jai iñedicaï.

18 Cristomo jai cai duilla jira, naimiena cai comeciaïmona raise uñña jira, ie ebirede uaina uññoticaï. Acaranimo cai eruailamona, cai abina ciodicaï. Ie isoide. Cai illamona jiaie comini Cristona uññotimaci. Cai Nama Joreño caïna canuamona, naimie ebirena isoi cai illena, icana jaidicaï.

4

1 Jusiñamui cuena duenaillamona, cue comecina ocuiñocaida, Cristo rafuena llocana jaidicue.

2 Meïrede rafuena llofueñedicue. Iena bainino llofueñedicue. Jifuianona omoïna llofueñedicue. Omoïri iobitallena, Jusiñamui rafuena meidoñedicue.

Jusiñamui cuena ciuana cue uññuamona, naimie rafuena uanaicinona llofuecabiticue. Cue llofuiana bu raise cacaia, uanaicino cue llofuecabillana uññoite.

³ Faificana jaidinodi cue mare lloga rafuena raise cacaiñedimaci.

⁴ Taife anamo naimaci illamona, naimie naimacina cacarefitañede. Cristo uai ebirede. Jusiñamui isoi naimie ite. Taifedi Cristo rafuena naimaci raise uññuana jitañede.

⁵ Cue finoca rafuena llofueñedicue; ia Jesucristodi cai Namanana llofuecabiticue. Naimie dibeimo cue maijiamona, omoina canollena, naimie rafuena llofuecabiticue.

⁶ Enirue finua facaise Jusiñamui llote: “Jitiredino nana eniruemo iñellena, useredino mai iite”. Naimiena cue nia uññoñenia, jeacino anamo cue illamona, cue comeci jitiredinomo ite isoide. Naimiena cuena naimie jai uññotaja jira, cue comeci useredinomo jai ite isoide. Jesucristo monamo illanona jaie cue ciuanona, Jusiñamui uai ebirede siñonana llofueticue.

Cai comeciai ocuiñocaida ñnocana jaidicai

⁷ Enirue ie imuicimona comuidicue; ia Cristo ie mare ebirede rafue cuemo jai ite. Iemona cue lloga rafue cuemona iñenana uññotomoi; ia ie uai siñonana illamona, Jusiñamui illana uññotomoi.

⁸ Bie mare rafue cue llofuiamona, navui duere sefuidicue; ia nia llofuecana jaidicue. Iena sefuiruiñedicue. Naga cuemo suide rafuemo raise cacarefñeno comecina ocuiñocana jaidicue.

⁹ Damierie cuena duere finodimaci; ia Jusiñamui cuena fañonocaiñeno cuena canode.

¹⁰ Eniruemo jaie Jesús ia, duere sefuillamona, ja muidomo fiodaite. Jesús isoi duere sefuicana cue jaia, naiemona niadedi nagarui fiodaiticue. Iemona cuena naimie jillotaja muidona, Jesús siño uaina uññocana jaidicue.

¹¹ Jesús rafuena cue llua muidona, nagarui damierie cuena meineiacade. Iemona cue jillocabilla jira, Jesús siño uaina uññotomoi.

¹² Naimie rafue cue llua muidona, cuena meineiacadimaci; ia bie rafuena omoi ñnuamona, Jusiñamui illanomo jaca iitomoi.

¹³ Jusiñamui facaina lloraïma jaie cuela: “Cue ñnua jira, iena llofueticue”. Naimie isoi cue ñnua jira, bie rafuena jai llofuecabiticue.

¹⁴ Jesús fiodaillamona Jusiñamui naimie jaie jillotate. Iena cue uññuamona, cai fiodaille mei, caina jai jillotaite. Jesúmo cai duilla jira, naimie illanomo danomo caina ico itataite.

¹⁵ Omoi facaina nana cue rafue finodicue. Cristo rafuena comini uññollena, duere sefuidicue. Iemona Jusiñamui naimacina duenaillana uññoitimaci. Jusiñamui dibeimo naimaci illamona, naimiemo iobillacinona fecacabitimaci. Ieri naimiena iobitaitimaci.

¹⁶ Ie jira iena sefuiruiñedicue. Cue mañrici fuicana nagarui jaide; ia cue comeci nagarui ñnocana ocuricana jaidicue.

¹⁷ Birui duere sefuidicue; ia iemo cue comecina eo facañedicue. Cristo rafue muidona birui duere cue sefua, Jusiñamui illanomo ico cue ia, nainomo ebire marena iiticue. Iemo cue comecina eo facadicue.

¹⁸ Cuemo birui suide rafuemo comecina eo facañedicue. Jusiñamui illanomo cue nia cioñña rafuemo comecina eo facadicue. Bene ite rafue fuite; ia monamo ite rafue jaca fuiñeite. Bene cue duere sefuillacino fuite; ia nainomo cue Nama diga iocire jaca iiticue.

5

1 Caïmo ite abi rifaillemona, Jusiñamui illanomo cai illemona, Jusiñamui jiaie isoide abi caïmo itataite. Nainomo cai abi jaca rifaiñeite.

2 Birui cue duere sefuillamona, Jusiñamui cuemo ico itatalle abina eo oiacaducue.

3 Cue fiodailla mei, Jusiñamui cue joreñomo jiaie isoide abina itataite.

4 Cue jiaie isoide abi cuemo illena, cue jamai fiodiaicaiñedicue; ia iena eo oiacaducue. Jusiñamui cuemo jiaie isoide itataiacade abina eo oiacaducue. Cue fiodailla abi ifomo jaca ille abina cuemo iite.

5 Jusiñamuidi ie Joreño caïmo itatajamona, cai abiaïna iese jiaï itatajana uïñoticaï.

6 Iena cue uïñuamona, nie isoide rafue ia, ñnocana jaca jaidicue. Nia cue fiodaïñenia, cai Nama illa ecimo nia iñedicue.

7 Naimïena birui cioiñedicue; ia naimïena ñnocana jaidicue.

8 Iese jaidicue. Cue Nama diga cue illena, fiodiaicadicue;

9 iadedi nia cue fiodaïñenia, naimïena jaca iobitaicadicue. Cue fiodaia, naimïena jiaï jaca iobitaicadicue.

10 Naimïe llua jira, Cristo uicomo ico nana iiticaï. Cai bene finoca rafuena uïñotaitaite. Maraiñede rafuena cai bene finua diese, naimïemona ïbana feiñoñeiticai. Mare rafuena cai bene finua diese, naimïemona ïbana feiñoñeiticai. Ie muidona naimïe jitaillacinona jaca finoacaducue.

Jusiñamui diga cai uri illafue

11 Cue Nama uicomo ico cue illemona, iena cue jaciruillamona, naimïe ðibeïmo cominina jai itatacana jaidicue. Jusiñamui cue illana raise uïñote. Cue illana raise omoi uïñuana jitaidicue.

12 “Cuedi maremedicue” lloñedicue; ia cue abi facaina omoi riidollena, bie rafuena lloticue. Omoi motomo damïerie llofueraini naimaci llofuiacino diga abina iedotimaci; ia naimaci comeciaino iticino diga abina iedoñedimaci.

13 “Naimïedi uairico” cuena raitimaci. Iese cue iticuedena, Jusiñamui facaina iese iticue; ie iadedi uairicoñedicue. Omoïna llofuellena, omoi facaina maijaidicue.

14 Nie isoidicuenta, Cristo cuena isiruillana cue uïñuamona, jaca llofueiacadicue. Nana comini facaina damïe fiodaillana jai ñnoticue. Naimaci jeacino ifomo naimïe jai fiodaite.

15 Nana cai facaina naimïe fiodaite. Fiodaillamona Jusiñamui naimïena jai jilloitate. Naimïena nia cai ñnoñenia, dani cai comeciaino ite rafue diga iobidicaï; ia naimïena jai cai ñnua mei, dani cai comeciaino naimïena cai iobitajana naimïe jitaide. Ie jira cue illana jai uïñotomoi.

16 Damïerie llofuerainidi jiaïnomo eruailamona, naimaci comeciaina facajamona: “Naimaci mare” raitimaci. Jiaïcaino: “Naimaci maraiñede” raitimaci; iadedi Cristona cue ñnua facaisemona iese cominimo eruaiñedicue. Naimïena nia cue ñnoñenia, Cristona jaiie raise uïñoñedicue. “Naimïedi jamai ïma” raillamo comecina facadicue; ia iese naimïemo birui comecina facañedicue.

17 Cristona cai ñnua mei, naimïemo jai cai duillamona, cai comeciainuaina meidoticaï. Jai jiaie isoidicaï. Jiaie rafuedo jai jaidicaï. Jai caïmo ite rafuedo jai jaiñedicai.

18 Jusiñamui cai comeciainuaina meidotade. Cristo fiodaillamona, Jusiñamui ðibeïmo caina itatate. Iemona naimïena jai nabairedicaï. Naimacimo ie rafuena lloïllena, cuena fetode, jiaie cominina ie ðibeïmo itatallena.

¹⁹ Cristo finoca rafue muidona, Jusiñamui dinena cominina nabaiacade. Naimaci jeacino facaina ibana jai oiacañede. Bie rafuena lollena, cuena jai fetode.

²⁰ Cristo cuena oretajamona, naimie facaina llofuecabiticue. Cue llogacinomona Jusiñamui uñotomoi. Omoimona naimiena bu nia ñnoñenia, Cristo facaina cue illa jira, Jusiñamuina omoi nabaillanona, naimie diga uri i.

²¹ Cristo jeacino jaca finoñede; ia cai jeacino facaina, Jusiñamui jitailla jira, jeacino finodimie isoi jaide. Naimiemo cai duillamona, Jusiñamui jitailla isoi, jai marebicaidicai.

6

¹ Bie rafuena nia lliacadicue. Jusiñamui facaina cai maijiamona, naimie ñibeimo cominina itataticai. Naimie caina duenailana uñoticue. Iena omoi ñnocana jaillana jitaidicue.

² Jaie Jusiñamui cuetatate:

Cue jitailla facaise omoi jitaillacinona jai cacadicue.

Omoi jilloillena, omoina jai canodicue.

Ero, Jusiñamui birui omoina cacacade. Birui omoina canuanona, omoina jillotaiacade. Ie muidona naimiena ñnocana jai.

³ Bie rafuena omoi ñnoñellena, cue llofuiacinona omoi jamaiñellena, bu diga rafuena comuitaicaiñedicue.

⁴ Jusiñamui ñibeimo cue maijiamona, nie isoide rafuemona ramo cue jiria, cue illamona naimiedi: “Mare” cuena raillana jitaidicue. Eo duere sefuidicue. Diga icaiño damierie cuena duere finodimaci. Diga icaiño ramo jiridicue.

⁵ Damierie cuena fatimaci. Cárcelmo cuena jonetimaci. Naimaci illanuaimona cuena riire dotadimaci. Eo cue maijia jira, diga icaiño eo raise ññedicue. Aime guisoidicue.

⁶ Jearede rafuena ebruiñedicue. Cristo rafuena uñocana jaidicue. Icirñedicue. Jiainona canocabidicue. Jusiñamui Joreño anamo iticue. Cominina raise isiruiticue.

⁷ Uanaicinona llocabiticue. Jusiñamui uai cuemo illamona, llofuecabiticue. Cue comecina riidollena, Taifena emodofillena, Jusiñamui jitailla isoi, marecinona finocana jaidicue.

⁸ Damierie cuena marena jai ñaitimaci. Jiaino cuena jeare nia ñaitimaci. Damierie cueri jai iobidimaci. Jiaino cue joreñoa jai ñaitimaci. Damierie: “Caina jifuetio” cuena raitimaci; ia nia uanaicinona llocabiticue.

⁹ Damierie: “Jamai bue isoidio” cuena raitimaci; ia jiaino cuena raise uñuamona, naimaci dinena jamai bue isoñedicue. Nagarui niadedi fio-daicabiticue; ia nia iticue. Duere sefuicana jaidicue; ia Jusiñamui cue comecina ocuiñotacana nia jaidicue.

¹⁰ Sunaiticue; ia iocire jaca iticue. Duereidicue; ia ailluena comini comeciaina eo camaretadicue. Buenidicue; ia Jusiñamuimona ailluena marecinona feñotitcue. Iese jaca jaidicue. Cue illamona: “Naimiedi mare” cuena omoi raillana jitaidicue.

¹¹ Corintomo itino, cue nabaiñiai, cue comecimo ite rafuena marefodo jai lloticue. Cue comecimona omoi diga marena iacadicue.

¹² Cuemona omoina raise isiruiticue; ia omoi dinena nia cuena eo isiruiñedomoi.

¹³ Cue uruiai omoi isoilla jira, omoi diga ñaiticue. Omoina cue isiruilla isoi, cuena omoi isirui.

Jusiñamui cai comeciaino illanodica

14 Creyentedimie jearede ramo faitatai raillano, daje isoide rafuedo iaimaijai jaiñena jira, daje isoi rafuena iaimaijai comeci lloñena jira, creyente creyenteñedimie diga daje rana namatañena. Aina illena, creyentena iñediñaiñona creyentedimie oñena. Inina illena, creyentena iñedimiena creyentediñaiño oñena. Marecinodo jaiacadimiedi maraiñedicinodo jaiacadimie daje isoi diga nabairinide. Jusiñamuina uanaicinona uñotimiedi useredinomo jai ite isoide. Jeacino anamo nia itimie jitreñedinomo nia ite isoide. Cristo rafuena naimie uñiñede; ia Cristo rafuena omoi uñuamona, useredinomo jai itomoi isoidomoi.

15 Cristodi Taife diga jaca nabairinide. Creyentemiedi creyenteñedimie diga daje isoi inide. Daje isoi comecina facañede.

16 Creyenteñedimiedi Jusiñamuina sedañede; ia jiraraina sedade. Creyente comecimo Jusiñamui illamona, Jusiñamuina sedade. Nana creyentia comeciaino Jusiñamui ite. Iena jai Jusiñamui llote: Comini motomo iiticue.

Naimacina nabaiticue.

Naimaci Jusiñamuiniticue. Cue comininitimaci.

17 Ie muidona cuena iñiñedino diga daje rana namatañeno.

Naimaci jearede jetaca rafuena abimo oñeno.

Iemona omoina raise feiñoiticue.

18 Omoi Moona iiticue. Cue uruiaina jaitomoi.

Siño jitodicue.

7

1 Cue isiruganodomo. Bie llogacino Jusiñamui caimo jai llua jira, naga marañede rafuena fañonocaida, cai jailla. Naga cai comeciaina jearetade rafuena fañonocaida, mai cai jailla. Jusiñamuina cai jaciruillamona, nana naimie jitaillacinona finocana mai cai jailla.

Pablo cartamo cuegacino diese finodimaci

2 Omoi comeciainomona cuena raise feiño. Buna jeare finoñedicue. Buna jifueñedicue.

3 Marañede rafuena jai omoi finuana lloñedicue. Omoimo cue comecina nagarui facadicue. Iena ailli lloticue. Nia cue ia, raire cue fiodaia, omoina jaca ubiñocabiticue.

4 Cue llucina omoi iñuana raise uñotiticue. Omoiri iobidicue. Omoi diga jai uri iticue. Duere sefuidicue; ia iocire iticue.

5 Macedoniamoi navui cue jaidicue, cue comeci uri iñede. Cue dibeimo iñedinomona nagarui duere sefuillamona, cue comeci jarire ite. Cristo dibeimona creyentia naimaci itatallemo cue comeci jarire ite.

6 Comeciaina ocuiñedinona Jusiñamui ocuiñotacabilla isoi, Tito billamona, Jusiñamui cue comecina ocuiñotade.

7 Cue dine naimie ria, iocire iticue. Omoimo ite rafue cue cacajamona, jai iocire iticue. Cuena omoi cioacanana llote. Cue comeci jarire illari sunaitomoi. Cuena riidoiacadomoi. Iena cue cacajanona, iocire iticue.

8 Carta omoi dine navui oredicue. Iena omoi feiñua mei, sunaitomoi; ia iena cue oretajari birui sunañedicue. Navui ieri sunaiticue; ia iena omoi feiñua mei, iemona dallu omoi sunailla jira, jai iocire iticue.

9 Omoi sunaillana jitañedicue; ia iemona Jusiñamui dibeimo omoi comeci iuai omoi meidua jira, iocire iticue. Cue cuega carta muidona iciriñedomoi; ia Jusiñamui jitailla isoi sunaitomoi.

¹⁰ Jusiñamui jitailla isoi, ie jeacino facaina bu sunaillamona ie comeci iuai Jusiñamui dibeimo meidoia, sunañede; ia bu jamai sunaillamona ie comeci iuai Jusiñamui dibeimo meidoñenia, faifite. Jusiñamui diga jaca iñeite.

¹¹ Jusiñamui jitailla isoi omoï sunaillamona, omoï comeciaina raise finodomoi. Marañede rafue dibeimo iacaiñedomoi. Iena eo jitaiñedomoi. Jusiñamui duere sefuitallicino anamo iacaiñedomoi. Cuenā dane cioacadomoi. Jusiñamui jitaillacinona eo finoacadomoi. Jusiñamui dibeimo naimie illena, marañede rafuena finodimiena duere finodomoi. Nana bie rafuena raise fuidodomoi.

¹² Carta navui omoï dine cue oretaiā, marañede rafuena finodimie mo cue comecina eo facañedicue. Naimiemona duere sefuidimie mo cue comecina eo facañedicue. Cuemo omoï comeciaina facajana omoï uifollena, navui cueticue. Jusiñamui iena uifote.

¹³ Ie jira cue comecina ocuifoticue. Tito jiaie iocire illa jira, dane iobidicue. Naimie comecina caimare omoï itataja jira, iobidicue.

¹⁴ Omoï dine Tito nia jaiñenia, naimie mo omoïna lloticue. “Naimaci ona feiñoitimaci. Naimaciri iobidicue” naimie mo navui lloticue. Iese naimiena omoï feiñua jira, ieri meidaiñedicue. Omoïmo uanaicinona jaca lloticue. Naimie mo cue llua isoi jiaie suide.

¹⁵ Naimie llofuaci mo omoï ñnoiacana jira, naimie omoïna birui raise isiruite. Meiruoicaida, comeciā jarire illamona, naimiena feiñotomoi.

¹⁶ Omoïna raise uifoticue. Cristo ñnocana omoï jaillana raise ñnoticue. Omoïri iocire iticue.

8

Creyentiaie Jusiñamuimo ucubena fecaja rafue

¹ Cue amatiaie, omoïmo jiaie rafuena lloiacadicue. Jusiñamui naimacina canuamona Macedoniamoi ite creyentiaina omoï uifuaana jitaidicue.

² Eo duere sefuidimaci. Jiaie eo dueredimaci; ia iocire illamona, jiaie creyentiamoi ucubena caidiñeno fecacabidimaci.

³ Naimacimo ite ucube die se fecadimaci. Iena uifoticue. Naimaci jitailla jira, naie baiemo fecadimaci. Naimacimo iese fecajana jaca lloñedicue.

⁴ Naimacimo iese lloñedicue; ia iena naimaci eo fecaacana jira, jiaie creyentiaina canollena, cuemo iena eo jicanotimaci. Ucube diga jiaino creyentiaina naimaci canuana cue lluaana eo jitaidimaci.

⁵ Cue comecina facaja isoi, fecañedicue. Ucubena fecadimaci; ia: “Cai Nama dibeimo maijacadicaie” jiaie llotimaci. Nie isoide rafuena naimaci fñuana cue ocuillena, Jusiñamui jitailla isoi, jitaidimaci.

⁶ Omoï dine Tito dane jaillana jitaidicue. Omoï dine naimie navui ia, ucube omoï uana naimie canode. Iemona janore tainedomoi. Jiaie creyentiaina omoï canuana raise fuiduana jitaidicue.

⁷ Cristona ñnocana jaidomoi. Iena jiaïnomoi llocabitomoi. Cristo rafuena raise uifotomoi. Cristo jitaillacinona eo finocana jaidomoi. Cuenā jiaie isiruitomoi. Ie muidona omoï ucube diga, jiaie creyentiaina omoï raise canuana jiaie jitaidicue.

⁸ Omoïna iese riire lloñedicue. Macedoniamoi ite creyentiaina eo canuana omoï uifuaamona, jiaie creyentiaina omoï canoia, Cristona omoï isiruillana uifoticaie.

⁹ Cai Nama Jesucristomona cai fueua. Naimie cana duenaillana uifotomoi. Ie Moo ecimo naimie nano illamona, naga ra naimie mo ite; ia eniruemoi ie

billamona, cana canollena, imana jaillanona, duere ite. Iemona Jusiñamui rafuena cai cacaja jira, duere iñedicai.

¹⁰ Te jira omoimo bie rafuena lloiacadicue. Navuidi año ucube eenuana tainedomoi. Iena finoacadomoi. Te fuiduana jai jitaedicue.

¹¹ Omoi jitaillamona bie rafuena fuido. Omoimo ite ucube diese feca.

¹² Ailluena ucubena omoimo iñenia, dama iesede. Omoi jitailla jira, omoimo ite ucube diese omoi fecaia, Jusiñamuimona mare;

¹³ ia omoi jitailla rana omoi ollena, omoi ucube iñeni raillano, omoi jitailla baifemo omoi fecajana lloñedicue.

¹⁴ Jiaie creyentiaimo ra birui raise iñena jira, naimacina omoi canuana jitaedicue. Omoi ra ico iñenia, naimaci dinena omoina canuana jitaedicue, nana omoimo daje isoi omoi ra illena.

¹⁵ Moisés micori illa facaise ite cominimona cai fueua. Naimacina jai iesee cueda: “Jusiñamui oretaga guiga ramona ailluena guillena, nagarui damierie iraiuidimaci. Jiaino janore guillena, iraiuidimaci; ia coniniri fecajamona, imaci jitailla diese nagarui nana gutimaci”. Te muidona omoimo ite ucubemona naimaci jitailla ra illena, jiaie creyentiaimo omoi fecajana jitaedicue.

Pablo Titona ñaite

¹⁶ Omoi dine Tito dane oretaiadicue. Cue isoi naimie omoimo comecina facade. Omoina canoacade. Naimie comecina Jusiñamui iese itataja jira, Jusiñamui iobidicue.

¹⁷ Omoi dine jaillena naimiemo lloticuemona, naimie dinena: “Jee” raite. Naimiemo nia iese cue lloñenia, omoina naimie eo canoacana jira, naimie omoi dine jaillena ie comecina facade. Omoi dine raire jaite.

¹⁸ Naimie diga jiaimie oretaiticue. Naga nairaimo ite creyentiaidi: “Cristo rafuena eo raise llofuecabite” naimiema raitimaci.

¹⁹ Cue diga jaillena, naimiema fetodimaci. Dueredinomo omoi ucubena cue uillena, cue diga naimie jaite. Iemona cai Namana iobitaitica. Iemona nana creyentiaidi naimacina cue canuana uiñoitimaci.

²⁰ Omoi ucubena raise cue sedajana jitaedicue. Iemona: “Pablo cai ucube fiide” omoi llua jitañedicue. “Iena Pablo raise fecañede” omoi llua jitañedicue.

²¹ Iena raise marena sedaadicue. Jusiñamui iena uiñote. Nana creyentia iena uiñuana jai jitaedicue.

²² Iaimaia diga jiaimiena jai oretaiticue. Naimie Cristona eo inucana jaillana raise uiñoticue. Omoi rafuena naimie fidiano, jiaie creyentia omoi canuana naimie inuanona, omoi dine naimie eo jaiacade.

²³ Omoimo Titona bu jicanoia, naimacimo naimiema raise llono. Danomo Cristo debeimo maijiticoco. Cue diga omoina canode. Jiaie iaimaia bu jicanoia: “Jiaie creyentia iaimaia fetuamona bitiaimiai” llono. Cristona iobitaiacadiaimaia.

²⁴ Cuena omoi isiruillamona: “Omoi mare” omoina cue llua, naimacina raise nafue. Nana cue jitailla rafuena omoi finuana naimaci uiñuana jitaedicue. Omoi ucubena eenuana raise fuiduana jitaedicue. Iena omoi finuamona, abido naimaci bia, naimacina oretaga creyentiaimo iena lloitimaci.

9

Jiaie creyentia canollena, omoi ucube olle rafue

¹ Bie rafuena omoi jai uiñua jira, iena dane lloñeiticue.

² Ucubena omoi jai feacaana uñotícue. “Benomo Macedoniammo ite creyentiammo omoiri iobidícue” llocabitícue. “Navuidi añomona feaacadommo” llocabitícue. “Acaya railla provinciammo ite creyentiai feaacadimaci” llocabitícue. Iese omoi illamona, bene ite creyentiai jiaino creyentiaina jiai canoacadimaci.

³ Iese uñotícue; ia omoína cue canollena Titona oretaitícue, cue jitaillacino omoi raise fuidollena. Ucubena dajena uana raíre jitaídícue.

⁴ Omoi díne Macedoniammo ite creyentiai díga cue rillanona, omoi ucube dajena nia iñenia, iese omoína cue lluaconi meidaitícue. Omoídí jiai meidait-
omoi.

⁵ Ie muidona Tito idai jaillana jitaídícue. Ucube dajena uana omoi llua isoi, omoína canoite. Omoi ucube dajena uana lloiacañedicue; ia omoi comeciamona jiaino creyentiaina canuana omoi jitailla jira, iena jitaídícue.

⁶ Jiaie rafuedo iena lloítícue. Janore iduaina bu ria, janore llisillana oite. Ailluena iduaina bu ria, ailluena llisillana oite. Cue llua jira, omoi ucube dajena oia, eo caimare iñeitomoi; ia omoi comeciai jitaillamona omoi ucubena dajena oia, eo caimataitomoi.

⁷ Ucube dajena omoi oia, nagamie ie comecina facajamona fecaja. Naimie jitaíñena fecañena. Naimie jitailla jira, naimie fecaja. Jiaimie omoína ñai railano, “Cai ucubena fecaíticai” raíñeno; ia o jitaillamona iena feca. Comeciai iocire illamona omoi fecaia, Jusiñamuina iobitadomoi. Iena Jusiñamui jitaide.

⁸ Jusiñamui omoi jitailla baífemo omoímoo fecarede. Nana omoi jitailla ra omoímoo naimie illamona, jiaínomoo omoi fecaia, naimacina canorenitomoi.

⁹ Jusiñamui facaina lloraíma micorí iena jaie cueda: “Jusiñamuina iñotimie dueredinona canocabide. Mare rafuena finocana jaide”. Ie omoi finollemo, Jusiñamui omoína canoite.

¹⁰⁻¹¹ Ero, illímo maijirainímo Jusiñamui iduaina itatate. Iena sicuamona, monaillamona, nainomoo maijirainídí naiemona guicabite. Ie isoide. Omoímoo Jusiñamui nana omoi jitailla rana jaca itataíte. Iemona jiaie creyentiaina raise canorenitomoi. Omoi ucubena cai uia, iena jiai creyentiai feiñoia, Jusiñamuimo iobillacinona eo fecaitimaci.

¹² Ucubena omoi oretai, duerede creyentiaina canodomoi. Omoi muidona naimaci Jusiñamuimo iobillacinona jiai fecadimaci.

¹³ Iemona Cristona omoi raise iñuana uñoitimaci. Ieri Jusiñamuimo iobillacinona fecaitimaci. Omoi iga ucube facaina iobillacinona Jusiñamuimo fecaitimaci. Naimacina canoitomoi. Iemona nana jiaie creyentiaina canoit-
omoi.

¹⁴ Omoi facaina Jusiñamuimo jiiítimaci. Omoína naimaci isiruillamona, Jusiñamui omoína eo canuana naimaci uñuamona, omoi facaina jiiítimaci.

¹⁵ Jusiñamui caina eo canua jira, iobillacinona naimiemo cai fecallena, cai uai raise iñede. Uainicaídícaí. Naimie eo mare. Naimiena cai iobillasa.

10

Cai Nama Pablona fetua jira, ie uai Pablommo ite

¹ Jiaie rafuena lloiacadícue. Omoímoo damíerie llotimaci: “Cai díne Pablo ia, naimíedí caina jacíruite. Ríre caímoo naimie rafuena lloñede; ia cai díne naimie iñenia, ríre caímoo naimie rafuena llote” llotimaci. Ero, Cristo icírícaíñena isoi icadícue. Naimie isoi omoímoo lloiacadícue.

² Ríre omoímoo lloiacañedicue. Omoímoo damíerie cuena raitimaci: “Pablodí Cristona iñoñedímie isoi icabite”. Naimaci iese nia lloia, omoi díne cue ria, naimacímoo jacíruiñeno ríre lloítícue.

³ Comena iticue; ia comini diga cue rafue iñede.

⁴ Taife dibeimo itino diga cue rafue illa jira, jamai cue uai diga naimacina llicaitañeiticue; ia Jusiñamui uai diga naimacina llicaitaiticue.

⁵ Cristo uai diga Jusiñamui dibeimo iñedino llucinoconi uainicaitaticue. Abina iedotimaci; ia Jusiñamuina uiñoiacaiñedinona uainicaitaticue. Naimaci comeciaina facajacinona uainicaitaticue, naimacina Cristo rafuena cue iñotallena.

⁶ Cristo anamo omoi raise ia, cue lloga uaina omoi raise iñocana jaia, omoimona raise iñofedinona duere finoiticue.

⁷ Cominimo jamai eruailmona: “Naimaci mare” raitomoi. Jiaicaño: “Naimaci marañedimaci” raitomoi; ia naimaci comeciaina uiñoñedomoi. Omoimona damie nibai comecina facade: “Cristomona cue uai illamona, Pablo baifemo faiticue”. Cue dinena raiticue: “Cristomona cue uai illamona, daje isoidicoco. Cue baifemo naimie faiñede”.

⁸ Abina iedoñedicue; ia cue abi iedoia, ieri meidaiñedicue. Cristomona cue uai illa jira, cue uai ite, naimie dibeimo omoi raise itatallena. Omoina cue canollena cue uai ite. Cristo dibeimona omoina itataiacaiñedicue.

⁹ Omoimo riire lollena cue uai ite; ia cue carta diga omoina jacinaitaiacaiñedicue. Omoina canoicadicue.

¹⁰ Omoimona damierie cuena raitimaci: “Cartana Pablo cueia, eo riire caimo llore; ia cai motomo naimie ia, ie uai riinide. Cristo rafue raise luana raise uiñoñede”.

¹¹ Iese iñedicue. Omoi motomo cue ia, cartana cue cueia, daje isoi llofuecabiticue.

¹² Omoimona damierie coniniri raitimaci: “Maredicai”. Iese coniniri naimaci comeciaina facaia, abina uiñoñedimaci. Naimaci isoi cue illemo cue comecina facañedicue.

¹³ Jusiñamui cue maijiana cuemo llore. Naimie luu baifemo jaiñeiticue. Omoi dine ie rafue cue llofuellena, naimie jitaillanona, omoi dine navui jaidicue.

¹⁴ Jusiñamui jitailla rafue baifemo jaiñedicue. Cristo rafuena omoi motomo nano llofueraimadicue.

¹⁵ Jiaie llofueraini llofuiamona buena oiacañedicue. Cristo rafuena omoi iñocana jaillamona, omoi motomo cue illamona, Jusiñamui jitailla diese omoina canoicadicue.

¹⁶ Jiaie nairaii illanuaimo Cristo rafuena nia lloicadicue; ia nainomo jaiel llofueraima llofuiamona buena oiacañedicue.

¹⁷ Bu abina iedoiacania, cai Nama finua rafueri naimie abina iedua.

¹⁸ Te llofua diga bu abina iedoia, Jusiñamui naimie llofuiacinona: “Mare” raiñeite; ia Jusiñamui finoca rafueri bu abina iedoia, Jusiñamui naimiena: “Mare” raite.

11

Pablo: Cristo oretaganona abi caitadinona llore

¹ Abina cue raise uiñoñenia, cue diga iciriñeno. Cue lluomo nia cacarei.

² Omoimo Jusiñamui comecina facaja isoi, omoimo comecina facadicue. Cue muidona Cristo rafuena omoi cacaja jira, Cristona uiñotomoi. Iima diga nia iñediñaiño, ie inina illena, ie jitaillamiemo ie moo fecaja isoi, Cristomo omoina feaacadicue. Omoimo jeacino iñena isoilla jira, omoina Cristomo feaacadicue.

3 Jiaie rafuemo omoi comeaiina facacana omoi jaillamo jacinaiticue. Jiaie jaiona eruaillamona, Taife Eva micorina jifujete. Jiai llofueraini Cristo rafuedo omoi raise jaiñenana itatajamo jacinaiticue.

4 Diga llofuerainina feiñotomoi. Jesús rafuena jiaiforiedo llofuecabitimaci. Cristo rafuena cue isoi llofuecabiñedimaci. Jusiñamui Joreño omoimo illana cue isoi llofuecabiñedimaci. Cue mare lloga rafue isoi llofuecabiñedimaci; ia naimacina jaca feiñotomoi. Ie jira Cristo dibeimona omoi jaillemo jacinaiticue.

5 “Cristo oretaganodicai” raitimaci; ia naimaci cue baifemo faiamo cue comecina facañedicue.

6 Naimaci isoi rafuena jino lluana eo uiñoñedicue; ia Cristo rafuena eo raise uiñoticue. Nana cue finoca rafuemonona omoina iena diga icaiño uiñotadicue. Uanaicinona omoina jaca llofuecabiticue.

7 Omoimo Jusiñamui rafuena navui cue lloia, omoina ibatañedicue. Omoimona ucubena jicañedicue. Cue ucube ollena, dama jiaie rana maijidicue. Iese cue illa jira, damierimona marañede rafuena finodicue; ia cuemona eo mare rafuena jai uiñotomoi. Iemona abina jai uiñotomoi.

8 Omoina cue canollena, jiaie creyentiamona ucubena feiñoticue. Omoi facaina naimacimona feiñoticue.

9 Rana cue jitailla facaise omoimona ucubena jicañedicue; ia Macedonia-bite creyentiai cuena canodimaci. Omoimona navui ucubena cue oñena jira, birui cue oñena jira, cuemona ibana oñeitomoi.

10 Cristo cue illana uiñuamona, naimie uanaicinodo cue jaillamona, nana Acaya railla provinciamona iena jaca lloiticue.

11 Omoina cue isiruilla jira, ucubena omoina jicañeticue. Jusiñamui cue comecina raise uiñote.

12 Abina iedumona omoi motomo damierie: “Pablo isoi llofueticai” raitimaci. Ucubena omoimona feiñotimaci. Naimaci isoi iacaiñedicue. “Daje isoi maijidicai” naimaci raiñellena, ucubena omoimo jaca jicañeticue.

13 Cristo oretaganona abi caitadinodimaci. Cristo dibeimo raise maijiñedimaci. “Cristo caina oretate” raicabitimaci; ia Cristo naimacina oretañede. Jifuecana jaidimaci. Cristo oretajanona itimacina jaidimaci.

14 Ieri rajicaiñedicue. Cominina jifuellena, Taifedi Jusiñamui jaienicina abi caitadimiena jaicabide.

15 Taife dibeimo itinodi Jusiñamui ie mare rafuena llofuerainina jaicabidimaci. “Cai lloga rafuedo omoi jaja, Jusiñamuimona marebicaitomoi” llofuecabitimaci. Naimaci finolle rafue diese Jusiñamuimona duere sefuitimaci.

Cristo oretagamiena naimie illa jira, Pablo duere sefuide

16 “Pablo abina uiñoñedimie” raillamo omoi comeaiina facañeno; ia iese cuena omoi comeaiina facaia, cue lluamo nia cacarei. Omoi motomo ite llofueraini abina iedua isoi, iacaiñedicue; ia janore cuemo iticino diga abina iedoticue.

17 Abina iedumona cue lloia, cai Nama Cristo isoi lloñeticue. Naimie cuemo llua jira, iena lloñeticue; ia abina uiñoñedimie isoi lloiticue.

18 Omoi dine damierie llofueraini naimaci illa diga abina iedua isoi lloiticue.

19 Abina uiñoñedimaci; ia: “Abina eo raise uiñotici” omoi llumona, naimaci llofuiacinona cacacabidomoi.

20 Naimaci anamo omoina itataiacadimaci. Omoimo ucubena jicabidimaci. Omoina ocuicabidimaci. Icirillamona, omoi uiecuaina

bofedimaci. Iese omoına finocabidimaci; iadedi buena naimacimo finoñedomoi. Ibana oñedomoi.

²¹ Iese omoimo finoñedicue, omoına cue jaciruilla jira.

Cue illana omoimo ja lloiticue. Nibai abina raise uiñoñedicue; ia naie llofueraini isoi cue illa diga abina iedoiticue.

²² Omoi motomo ite damierie llofuerainina ja lloiticue. Judúuai uaido ñaitimaci. Iena jiai ñaiticue. Judúuai nairai imaci. Daje isoidicue. Judúuai nairai imiedicue. Abraham micori uruiaidimaci. Jiai naimie micori uruedicue.

²³ “Cristo dibeimo maijidicai” raitimaci. Abina uiñoñedimie isoi lloticue; ia naimaci baifemo Cristo dibeimo maijidicue. Naimaci baifemo duere sefuidicue. Diga icaiño cárcelmo iticue. Diga icaiño fajamona duere sefuidicue. Diga icaiño niadedi fiodaicabiticue.

²⁴ Judúuai comini cinco digacaiño cuena fatimaci. Naga icaiño treinta y nueve digacaiño rao diga cuena jicuidimaci.

²⁵ Dacaiño amani radosi diga cuena fatimaci. Nofici diga cuena dacaiño fairnotimaci. Dacaiño amani bote diga namo anabaiticue. Darui naio monaillaimo botedo jamai fuiri baiticue.

²⁶ Eo jacirede illedo jaicabidicue. Firiruidino eo illa jira, jaciruioicaida jaicabidicue. Cue judúuai cominimona duere sefuicabidicue. Judúuaiñedinomona duere sefuicabidicue. Naimaci illanuaimo cue ia, diga icaiño duere sefuidicue. Naisodo cue macaria, duere sefuicabidicue. Monailaido cue jaia, duere sefuicabidicue. Cristo rafuena llorainina abi caitadnomona jiai duere sefuicabidicue.

²⁷ Cue ucube ollena, duere maijicabidicue. Diga icaiño raise inñedicue. Diga icaiño aime guiticue. Rollimemona duere sefuicabidicue. Iniroinamona jiai duere sefuidicue.

²⁸ Diga jiaie rafuemona duere sefuicabidicue. Duenaillamona naga creyentia illanuaimo cue comecina nagarui eo facadicue. Iemo nagarui cue comecina cue facaia, duere sefuicabidicue.

²⁹ Nie creyente Cristo rafuedo nia raise inñenia, naimiemo cue comecina eo facadicue. Nie creyentena jiaimie jeacino finotaia, naimiemo cue comecina facadicue.

³⁰ Cue abina iedoiacania, jamai bue isoidimiedicuena lloiacadicue.

³¹ Cai Nama Jesús Moona Jusiñamui illanona, Jusiñamuimo jaca cai iobillasa. Naimiedi uanaicinona cue llwana uiñote.

³² Cue illana nia lloiacadicue. Damasco mo jaie creyentena cue jailla facaise cuena gaitatallena, Aretas railla illaima anamo ite gobernadori nairai llaiga nasena sedatate;

³³ Iadedi llaigafo ecimo ite jofa a ite ventanamona cirigai isoide diga ana jaillanona, naiemona jillodicue.

12

Pablo nicairilla isoide rafuena ciodo

¹ Abina iedoiacaiñedicue; ia cue illana janore nia lloiticue. Iemona bue oñeiticue; ia cue illa abina riidoiacadicue. Cristo cuemo acataga rafuena lloiacadicue. Cristo cuemo jai llua rafuena jiai lloiacadicue.

²⁻³ Cristomo cue duillamona, catorce años jaie illanona, monamo naimie illamona, naimie dine Cristo cuena uite. Nicairilla isoi cue joreño, cue abi diga, uillana raise uiñoñedicue. Nibai dama cue joreña uite. Dama Jusiñamui iena uiñote. Naimie mare illanomo iticue.

⁴ Nainomo cue ñainina rafuena cacadicue.

⁵ Ie diga abina iedoñeticue. Cue jamai bue isoidimie diga abina iedoiticue.

⁶ Uanaicinona cue luamona cue abina iedoiacania, tainona abina iedoñeticue. Omoi cuena ciuamona, cue lloga rafuena omoi cacajamona, cuena uiñotomoi. Ie baifemo cuena omoi comeciaina facajana jitaiñedicue.

⁷ Naimie rafuena cuemo acataja jira, bie rafuena cue cacaja jira, ie diga eo abina cue iedoñellena, tagairede ra cuemo illa isoi Jusiñamui cuemo illamona, duere sefuidicue. Taife jaienici cuena duere finua isoi, duere sefuicabidicue.

⁸ Cuemona iena naimie oni oretallena, cai Namamo dacaño amani jiidicue;

⁹ ia cuemo llote: “Ona jillotañeticue; ia cue ona duenailacinodo jaca ocuiñoitio. O abi eo mairiñenia, ona cue canuana raise uiñoitio” llote. Cue abi eo mairiñenia, ieri iocire iobiticue. Naimie uaido cue jaillamona, cuena naimie canuana raise uiñoiticue.

¹⁰ Cristo muidona duere cue sefua, cue comecina ocuiñoiticue. Cue jamai bue isoia, cuena bu jeare ñaia, bumona duere cue sefua, cuena bu duere finoia, cue comecina ocuiñoiticue. Cue duere sefua, cue Nama cuena eo canode.

Pablo Corintomo ite creyentiamo comecina eo facade

¹¹ Abina uiñoñedimie isoi iticue. Cue illana cue cuia jira, abina uiñoñedimie isoi iticue; ia iese cuena itatatomoi. Cuena riidoñedomoi; ia jiano eo mare railla llofuerañina raise feiñotomoi. Jamai bue isoidicue; ia naimaci cue baifemo faiñedimaci.

¹² Omoi motomo siño rafuena cue finua jira, Jusiñamui cuena oretajana uiñotomoi. Cristo rafuena sefuiruiñeno omoi motomo iticue.

¹³ Cuemona duere sefuiñedomoi. Jiaie creyentia omoi baifemo faiamo cue comecina facañedicue. Nibai iese omoi comeciaina facadomoi. Omoimo ucubena cue jicañena jira, jiaie creyentia isoiñedomoi. Iena omoi gaiñenia, iena feita. Cue diga iciriñeno.

¹⁴ Menacaño navui omoi dine jaidicue. Omoi dine dane jaiacadicue. Omoimo ucubena jicañeticue. Omoi rana jitaiñedicue; ia Cristo dibeimo omoi illana, naimiena omoi raise iñuana jitaidicue. Cue uruia isoidomoi. Rana eenoñedomoi, omoi mootiai iena; ia omoi mootiai rana eenotimaci, omoi ena. Ie isoide. Cue uruia isoi omoi illamona, omoimona rana jitaiñedicue; ia omoimo rafuena iacadicue.

¹⁵ Nana cuemo ite ra omoimo fecaacadicue. Nana cue comecimo iticinona omoimo jiai iacadicue. Omoina eo isiruiticue; ia cuena janore isiruitomoi.

¹⁶ “Caimona ucubena jicañedio; ia jifuecana caimona otio” raicabitomoi.

¹⁷ Ero, omoi dine menamiēna cue oretajamona, omoimona ¿nie isoide rana otiaimaiaia? ¿Niese omoina jifuetiaimaiaia?

¹⁸ Omoi dine Titona oretaticue. Jiaisie creyente imiēna Tito diga oretaticue. ¿Niese Tito omoina jifue? Omoimo coco comecina daje isoi facadicoco. Daje rafuado jaca jaidicoco. Omoina jaca jifueñedicoco. ¿Niese omoi comeciaina raitomoi?

¹⁹ “Caimona ie abina riidote” cuemo nibai comecina facacabidomoi. Jusiñamui cuena uiñuamona, Cristomo cue duillamona, bie rafuena lloticue. Cue isiruiganodomoi. Cristo dibeimo omoi raise illena, naimiena raise omoi iñollena, bie rafuena llocabiticue.

²⁰ Omoi dine cue ria, cue jitailla isoi omoi iñenamo jacinaiticue. Iese omoi ia, omoi diga cue illana jiai nibai gaiñeitomoi. Ieri cue comeci jarire ite. Nibai nia uaina uaitatomoi. Nibai nia abina iedotomoi. Nibai nia iciricabitomoi.

Nibai nia omoi rana caidicabidomoi. Nibai nia jiaisona jeare ñaicabitomoi. Nibai nia jaino joreña ñaicabitomoi. Nibai nia abina uradoidomoi. Nibai daje isoi comeciaina nia lloñedomoi. Omoi iese illari cue comecidi jarire ite.

²¹ Omoi dine dane cue ria, omoi muidona Jusiñamui cuena meidaitajamo jacinaiticue. Cristo dibeimo omoi raise iñenia, sunaiticue. Jearede rafuena omoi nia fainonocaiñenia, omoi añede riño diga illana omoi fainonocaiñenia, omoi iniñede ñima diga illana omoi fainonocaiñenia, sunaiticue.

13

Iraicaiño Pablo naimacina llofuate

¹ Menacaiño omoi dine navui jaidicue. Omoi dine dane jaiticue. Coninimo omoi rafue ia, iena raise fino. Moisés micori jaie llote: “Mena iaiaiaia daje isoi lloillamona, daje amani daje isoi lloillamona, marañedicinona finodimiena duere finua”.

² Marañede rafue finodinomo navui riire lloticue. Nana omoimo riire lloticue. Omoi dine navui cue illa isoi, iena dane riire lloiacadicue. Omoi dine cue ria, naimaci comeciai iuai nia meidoñenia, naimacina duere finoiticue.

³ Iemona Cristo uai cuemo illana uiñotomoi. Naimiena omoi ñnuamona, naimie uai siñonana uiñotomoi. Jamai uaido naimie omoina jillotañede; ia ie siño uaido omoina jai jillotate.

⁴ Jamai bue isoidimie isoi cruzmo naimie fiodaite; ia fiodaillamona Jusiñamui uaido jillode. Cristomo cue duillamona, jamai bue isoidimiena iticue; ia Jusiñamui uai cuemo illamona, omoimo ite rafuena raise finoiticue.

⁵ Cristona ñnocana omoi raise jaillemono omoi comeciaina faca. Cristo jitaillacino omoi finollemo comeciaina faca. Cristomo omoi duillamona, Cristo omoi diga illana uiñotomoi. Cristomo omoi duiñenia, naimie omoi diga nia iñede.

⁶ Cristo omoi diga illana omoi uiñuamona, Cristo uai cuemo illana jiai uiñotomoi.

⁷ Marañedicino omoi finocana jaillana jitañedicue. Jusiñamuimo iena jaiticue. Omoi comeciai iuai omoi meidoñenia, Cristo uai diga omoina duere finoacaiñedicue. Omoi comeciai iuai meiduana jitañedicue; ia Cristo uai diga omoina cue duere finoñenia, Cristo uai cuemo illana nibai uiñoñeitomoi.

⁸ Cristomona cue uai illana omoi uiñollena, marañedicino omoi finuana jitañedicue. Mare rafuena omoi finocana jaillana jitañedicue. Iena finocana jiai jiaicadicue.

⁹ Cristo rafuena ñnocana omoi raise jaia, iobidicue. Omoimo cue riire lloñenia, iobidicue. Cristo jitaillacino eo raise finocana omoi jaillena jicabidicue.

¹⁰ Birui bie rafuena cueticue. Omoi dine iñedicue; ia bie cartana omoi feiñua mei, omoi comeciaina raise finuana jitañedicue. Cai Namamona cue uaina feiñoticue. Iedo omoimo riire lloiacaiñedicue; iadedi iedo naimie dibeimo omoi raise itataicadicue.

¹¹ Cue amatiai, bie carta cuiana jai fuidoacadicue. Marena omoi i. Omoi comeciaina raise fino. Cue lloga rafuemo raise cacarei. Nana omoi creyentiai comeciai daje isoi lloicana jai. Coniniri uri omoi i. Iemona Jusiñamui omoina isiruillana uiñotomoi. Jusiñamui omoina uri itatajana uiñotomoi.

¹² Nana creyentiaina eo caimare uaido.

¹³ Nana cue diga ite creyentiai imaci uaina oredimaci.

¹⁴ Cai Nama Jesucristo omoina jaca duenaite. Jusifñamui omoina jaca isiruillamona, coninina omoi isirui. Naimie Joreño omoimo illamona, coninina omoi nabai. Iese jitaicue. Mai. Macaibaite. Pablodicue.

GALACIAMO ITE CRISTONA HNOTINOMO PABLO ORETAGA RABE

Uaiduacino

1-2 Galaciamo ite creyentiai, omoi dine bie carta oredicue. Pablodicue. ¿Nigacino? ¿Nie isoidomoi? Omoimo cue uai oredicue. Nana cue diga ite creyentiaidi imaci uaina jiai oredimaci. Jesucristo fetocamiedicue. Cai Moo Jusiñamui jiai fetocacue. Jesucristo fiodaillamona, Jusiñamuidi naimiena jillotate. Mare rafuena cue lllollena, cuena orediaimaiai. Comini cuena oreñedimaci. Cue lloga uaina cominimona jiai oñedicue.

3 Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Omoina uri jai itatataimaiai. Iena omoi uiñocana mai omoi jai.

4 Cai Moo Jusiñamui jitailla isoi, birui ite marañedicinomona cai jilloillena, cai jeacino facaina Cristo fiodaite.

5 Cai Moona jaca cai iobillasa. Iena jitaidicue.

Pablo lloga rafuedi jaca dajede

6 Jusiñamuina raire omoi fañonocaillari rajicaidicue. Cristo díbeimo omoi illena, omoina Cristo duenaillamona, Jusiñamui omoina jai uaidote; iadedi omoi jeacinomona omoi jilloillena, jiaie rafuedo jai jaidomoi.

7 Jiaie mare rafue jaca iñede; iadedi Cristo rafuena jiaiforiedo llofuiamona dajerie omoi comeciaina uri itañedimaci.

8 Jesucristo rafuena omoimo jaie lloticai. Jiaie rafuena lloticaidena, Jusiñamui riicaillafue anamo nia cai illasa. Jusiñamui jaienici jiaie rafuena llotena, Jusiñamui riicaillafue anamo jiai naimie illasa.

9 Omoimo jaie iese lloticue. Dane ja lloiticue. Cai llua isoi Cristo rafuena omoimo bu lloñenia, Jusiñamui riicaillafue anamo naimie illasa.

10 Comini cueri iobillana jitañedicue; iadedi Jusiñamui cueri iobillana jitaidicue. Cominina iobitaiacaducua, Cristo díbeimo nia maijñedicue.

Ie oretagamiena jaillena, Cristo Pablona fetua rafue

11 Cue amatiai, cue lloga rafuena omoi raise uiñuana jitaidicue. Omoi jeacinomona omoi jilluana jaie lloticue. Bie rafuena comini comeciai facacinomona oñedicue.

12 Cominimona oñedicue. Bu jaca cuena iena llofueñede; iadedi Jesucristo cuena uiñotade.

13 Jesucristona nia cue iñoñenia, cue judíuai einamaci lloga rafuedo cue jaillana jai fididomoi. Cristona iñotinona jaie eo duere finodicue. Naimacina fuidoacaducue.

14 Cue einamaci jaie llua isoi, Jusiñamuina raise iñoticue. Naimaci llogacinuaido eo duere cue jailla jira, daje facai cue diga itino baifemo iñoticue;

15 iadedi nia cue jeiciñenia, Jusiñamui cuena fetode, naimie iena. Cuena duenaillanona, cuena uaidote.

16 Omoi judíuaiñedomoi naie Jito rafuena cue lllollena, cuemo ie Jitona jaie bairetate. Naie facoise cuemo jai suide rafuena bu diga ñañedicue;

17 ia Arabia railla enirruemo jaidicue. Nainomo comini iñena jira, cuemo jai suide rafuemo comecina facadicue. Jerusalémo Jesucristo nano oretagano dine jañedicue. Cuena Jesucristo nia oretañenia, naimacina orede, ie uai

lollena. Arabia railla eniruemo cue illa mei, Damasco railla nairaimo abido jaidicue.

¹⁸ Cristo cuemo bairia facaise tres años illamona, naimiena cue uiñollena, Jerusalémo Pedro dine jaidicue. Naimie dinomo quince digarui iticue.

¹⁹ Naie facaiseconi nana Jesucristo oretaganona cioñedicue. Pedrona ciodicue. Jacobona jiai ciodicue. Naimiedi cai Nama ie ama Jiaïnona cioñedicue.

²⁰ Omoïmo nana cue ciegacïnodi uanaicino. Tainona cueñedicue. Tainona cue cueia, Jusiñamui cuena duere finuana uiñoticue.

²¹ Jerusalémo cue illa mei, Siria railla eniruemo jaidicue. Cilicia railla eniruemo jiai jaidicue.

²² Judeamo ite Cristona ïnotinodi cuena nia cioñedimaci.

²³ Cuena iese fididimaci: “Navui caina duere finocabidimiedi Jesucristo rafuena jai llote. Jesucristona cai ïnuana navui jitaïfede. Caina fuidoacade”. Jiaie cue finoca rafuena fidiñedimaci.

²⁴ Ie fidiamona, cueri Jusiñamuïmo iobillacïnona jai fecadimaci.

2

Jerusalémo Pablo jailla rafue

¹ Catorce años illanona, Jerusalémo dane jaidicue. Bernabé cue diga jaide. Titona uiticue.

² Jusiñamui cuemo lua jira, nainomo ite creyentiaïmo jaidicue. Judiaïñedino Cristo rafuena jai ïnuana cue lollena, jaidicue. Cue llofuiana naimaci raise uiñollena, creyentiaï illaïcomïnomo anado nano lloticue. Cue llofuiana: “Mare” naimaci raillana uiñoiacadicue. Tainona Cristo rafuena cue lloi raillanona uiñoiacadicue. Naimaci diga cue ñaia mei, cue llofuiana: “Mare” raitimaci.

³ Tito cue diga ite. Naimiedi judío nairai imieñede; iadedi naimaci abina detacabilla isoi, creyentiaï illaïcomïni ðinena naimie abi detatajana lloñedimaci.

⁴ Creyentiaïna abi caitadino billa jira, Tito abina detatajana siadoticaï. Naimacina cai uaidoñeno bitimaci. Moisés micori llogacïnuaï anamo cai ïnenana naimaci uiñollena, bitimaci. Cristo Jesús cai ïnua jira, Moisés micori llogacïnuaïdo jai jaiñedicaï. Moisés micori llogacïnuaï anamo caina dane itatallena, iena uiñoiacadimaci.

⁵ Cai mare rafuena jiaïna jaca meidoñellena, naimaci ñaïana dallu cacareñedicaï. Uanaicïnona omoï uiñuana jitaïdicaï.

⁶ Naie creyentiaï illaïcomïni omoïmo lollena, cuemo jiaie rafuena lloñedimaci. Illaïcomïnina raillanodimaci; iadedi cuemona jamai bue isoidimaci. Jusiñamui nana comïni daje isoi feiñua jira, naimaci uai cue uai baïfemo faïñede.

⁷⁻⁹ Cue llofuiana rairuiñedimaci; iadedi creyentiaï illaïcomïni cuena Bernabé diga marena feiñotimaci. “Daje isoi começaina facadicaï” raillamona, cue llofuiana: “Jai mare” raitimaci. Creyentiaï illaïcomïnidi Jacobo, Pedro, Juan digamie. Judiaï dine Pedrona Jusiñamui oretaja isoi, cue llamona judiaïñedino dine Jusiñamui cuena oretajana uiñotimaci. Pedro llamona Jusiñamuidi ailluena judiaïna creyentiaïna itatate. Cue llamona, Jusiñamuidi ailluena judiaïñedinona creyentiaïna jiai itatate. Iemona Jusiñamui uai cuemo illana jai uiñotimaci. Judiaïñedinomo Jesucristo rafuena llocana nia coco jaillana jitaïdimaci; iadedi judiaïmo Jesucristo rafue llocana nia jaidimaci.

¹⁰ Daje rafue cocomo llotimaci. “Duerede creyentiaina canocabi” llotimaci. Iena iocire finoacadicue.

Antioquíamo suide rafue

¹¹ Antioquíamo cue jailla mei, Pedro nainomo jiai jaide. Nainomo Pedro bia, marañedifue naimie finua jira, naimie uiecomo naimiemo riire lloticue.

¹² Nainomo Pedro nano rilla mei, nana creyentiaí diga nainomo naimie guisoide. Judíuái creyentiaí diga, judíuáiñede creyentiaí diga, danomo guisoide. Iemei Jacobo dinena damierie bitimaci. Moisés micori llogacinodo jaisoidimaci. Moisés micori llogacinodo Pedro jai jaiñede; iadedi naimaci billa mei, naimacina naimie jaciruilla jira, judíuáiñede creyentiaí diga Pedro jai guíñede. Ie inoga rafuedo naimie jai jaiñede.

¹³ Naimie iese illamona, judíuái creyentiaídi judíuáiñede creyentiaí diga jai jiai guíñedimaci. Pedro illa isoi, Bernabé iedo jiai jaide.

¹⁴ Naimaci iese illa jira, Jesucristo rafuedo raise jaiñedimaci. Uanaicinodo jaiñedimaci. Iena cue uñua jira, nana comini uicomo Pedromo lloticue: “Judío nairai imiedio; iadedi o jeacinomona o jilloillena, cai einamaci llucacino birui jaiñedio. Ie jira, ¿bue ñellena judíuáiñedino cai einamaci llucacino jaillana jai jitaideo?”

Judíuáidi creyentiaina jailla mei, Moisés micori llogacinuaido jai jaiñedimaci

¹⁵ Nia lloticue: Judíuáiñedinodi Moisés micori lloga uaina jaie uiñoñedimaci. Caidi judíuaina jeicigacai. Ie muidona Moisés micori llogacinuai anamo jaie jeicigacai.

¹⁶ Iese iticai; iadedi Moisés micori llogacinuaido jaillamona, Jusiñamui jitailla isoi, jaca bu marebicaiñede. Jusiñamui jitailla isoi, Jesucristona inuamona marebicaidicai. Iena uiñoticaí. Ie jira Cristo Jesúsna inoticaí, cai marebicaillena. Cai marebicaillena, Moisés micori llogacinuaina inoñedicaí. Moisés micori llogacinuaina inuamona, jaca buna marebificainide.

¹⁷ Jusiñamui mona cai marebicaiacallena, Cristona cai inuamona jeacino finorainiedicaí. “Cuena inuamona, marebicaitomo?” Cristo iese llofueuide. Naimie lua isoi cai marebicaiñenia, cai jeacinomona nia cai jilloñenia, Cristo muidona; iadedi iese iñedicaí.

¹⁸ Moisés micori llogacinuai jai jamaiñocaidicue. Ie jira naicinuai dane abido cue oia, iena birui cue inoñena jira, jai jeacino finoraimiedicue.

¹⁹ Temona cue marebicaiñena jira, Moisés micori llogacinuai cuemo jai duiñede. Ie anamo jai iñedicue. Ie muidona Jusiñamui llogacinuaido jai jaidicue. Cristo anamo jai iticue.

²⁰ Naimie dibeimo jai iticue. Cristo cuemo ite. Cristo cuena namatade. Jusiñamui Jitona cue inocana jai jaidicue. Cuena isiruillamona, naimie jitaillamona, cueri fiodaite.

²¹ Jusiñamui caina duenaillana jamaiñedicue. Jusiñamui jitailla isoi, Moisés micori llogacinuaina cai inuamona marebicaidicaina, Cristo tainomo niade fiodaite.

3

Jesucristona inuamona judíuáidi Jusiñamui Joreñona feiñotimaci

¹ Gálatas imaci, abina jai uiñoñedomoi. Jiaíno omoina birui jifuete. Omoimo Jesucristo cruzmo fiodailla rafuena jaie marefodo lloticue. Iena raise cadomoi.

² Ie jira omoimo biena jicanoiacadicue: ¿Niese Jusiñamui Joreñoña jaie feiñotomoi? Moisés micori llogacinuaido jaillamona iena feiñoñedomoi. Jesucristo rafuena omoi cacajamona, ñnotomoi. Ie mei Jusiñamui Joreñoña feiñotomoi. ¿Niese birui abina uiñoñedomoi?

³ Omoi marebicaillena, Jusiñamui Joreño omoimo jai ite; iadedi Moisés micori rafuena dane omoi jaicanamona, omoi jiaie finolle rafuemona jai marebicaiacadomoi.

⁴ Jusiñamui Joreñoñomona diga marecinuaina feiñotomoi; iadedi iena jai jitañedomoi. Iese omoi illana ñnoñedicue.

⁵ Dane jicanoiticue: ¿Niese Jusiñamuidi ie Joreño omoimo fecade? ¿Niese siño rafuena omoiri finode? Moisés micori llogacinuaido omoi jaillamona ie Joreño omoimo fecañede. Moisés micori llogacinodo omoi jaillamona, siño rafuena omoiri finoñede; iadedi Jesucristo rafue omoi cacajamona, iena omoi ñnua jira, ie Joreñoña fecade. Iemona siño rafuena omoiri jiai finode.

Abraham micori Jusiñamuina ñnua muidona marebicaide

⁶ Abraham micori ie rafuena lloiticue. Naimie micorimona fueoiticai. Moisés micori naimiena cuete: “Abraham micori Jusiñamuina ñnua jira, Jusiñamuimona naimiedi marebicaide”.

⁷ Iena cai cacajamona, Abraham micori isoi cai ñnuamona, naimie ua cominina cai illana uiñoticai.

⁸ Jusiñamuidi judiuaññedino ico marebicaillena jaie uiñote. Naimiena ico naimiaci ñnollena jaie jiai uiñote. Iena uiñuamona, Jusiñamuidi ico suille rafuena Abraham micorimo jaie llote. Mare rafue naimiemo llote: “Nana cuena o isoi ñnotinona marebicaitaicue” llote.

⁹ Abraham micoridi ñnote. Jusiñamui naimiena marebicaitate. Ie isoide. Nana Jusiñamuina ñnotinona marebicaitate;

¹⁰ iadedi nana Moisés micori llogacinuaido jaidino jai faidobidimaci. Moisés micori iena jaie cuela: “Nana cue lloga uaido jaiññedino jai faidobide”. Buna nana naie lloga uaido jaiñena jira, nana faidobidicai.

¹¹ Biena uiñoticai. Moisés micori llogacinuaido jaillamona, Jusiñamuimona jaca buna marebicaiñede. Jusiñamui facaina lloraima iena jaie cuete: “Jusiñamuina ñnuamona marebicaidimaci. Ie mei jaca iitimaci”.

¹² Moisés micori llogacinuai daje isoñede. Nana Moisés micori llogacinuaina finuamona comini marebicaide. Moisés micori iena jaie cuela: “Cue lloga uai finuamona, marebicaidimaci. Iemei jaca iitimaci”. Jusiñamuina ñnuana lloñede: ia ie lloga uai finollena cominimo llote. Nana ie lloga rafuena finuamona, cominidi marebicaidimaci.

¹³ Moisés micori llogacinuai anamo jaie cai illa jira, faidobidicai; iadedi cai facaina naimie fiodailla jira, Cristodi iemona caina jillotate. Cruzmo Cristo cuinaja jira, cai facaina naimie jai faidobide. Moisés micori iena jaie cuela: “Cruzmo cuinacame Jusiñamuimona jai faidobide”.

¹⁴ Jusiñamuina naimie ñnua jira, Abraham micori jaie marebicaide. Jesucristo fodailla muidona, naimiena judiuaññedino ñnuamona, Abraham micori isoi marebicaidimaci. Jusiñamuidi ie Joreñoña caimo fecallena jaie llote. Ie muidona Jesucristona ñnuamona, Jusiñamui Joreñoña birui feiñoticai.

Jusiñamui lloga rafue

¹⁵ Cue amatiai, bie rafuemo comeciaina faca. Nie isoide rafuena menamie finoacania, naie rafuena feitañellena, rabemo cuetiiaimaiai. Iaiimaiai

mamecina nainomo cuia mei, jiairuido damie naie rafuena jiaifo dama meidonide.

¹⁶ Ie isoide. Jusiñamuidi Abraham micorimo ico suille rafuena jaielote. Iena naimie llua jira, iena meidonide. Ie uruiaimo ico suille rafuena lloñede; ia daje uruemo ico suille rafuena lloste. Cristona ñaite.

¹⁷ Biena lloiacadicue. Naimie jilloillena, Jusiñamuina naimie ñnuamona, Jusiñamui Abraham micorimo rafuena lloste. Cuatrocientos treinta años illanona, Moisés micorimo Jusiñamuidi jiaie rafuena lloste; iadedi Abraham micorimo jaielloga rafuena meidoñede.

¹⁸ Jusiñamui llua jira, Abraham micorimi jillode; iadedi Moisés micorimi llogacinuaido cai jaillamona, cai jilloiadedi, Abraham micorimi isoi jilloñedicai.

¹⁹ Iese itena, ¿bue ñellena Jusiñamui Moisés micorimo jiaie rafuena lloste? Naiemona jeacinona cai uiñollena, iena lloste. Naie rafue ite, Cristo eniruemo nia biñenia. Jusiñamuidi Abraham micorimo lloga rafue Cristomo duide. Naimie billamona Moisés micorimo lloga rafuena oñedicai. Jusiñamuidi ie jaienisaimo naie rafuena lloste, Moisés micorimo iena llollena. Ie mei Moisés naie rafuena cominimo lloste;

²⁰ iadedi Jusiñamuidi Abraham micorimo ie rafuena atona lloste. Jiaimie mo iese lloñede, Abraham micorimo iena llollena.

²¹ Moisés micorimo Jusiñamui rafuena lloste; ia naiemona Abraham micorimo llogacino nia saiñede. Cai jilloillena, cai jaca illena, Moisés micorimo Jusiñamuidi rafue finuana llotena, naie rafuena cai finuamona marebicaidicai;

²² iadedi Moisés micorimi cuegafuiaidi nana comini jeacino anamo illana lloste. Moisés micorimi llogacinuaido jaillamona, jeacino anamona jilloñedicai. Jesucristona cai ñnuamona Jusiñamui llua isoi, jeacino anamona jilloidicai.

²³ Jesucristona ñnuana nia cai uiñoñenia, Moisés micorimi llogacinuai anamo iticai. Jesucristo billamona, naimiena ñnuana uiñoticai.

²⁴ Moisés micorimi llogacinuaidi cai lletarafue. Cristo ñibeimo cai illena caina lletade. Cristona cai uiñuamona, naimiena cai ñnuamona, marebicaidicai.

²⁵ Naimiena ñnuana jai cai uiñuamona, naie lletarafuena jai oñedicai.

Abraham micorimi ua uruia

²⁶ Cristo Jesúsna ñnuamona, nana omoi Jusiñamui cominidomoi.

²⁷ Cristo ñibeimo omoi illamona, bautizagaomoi. Iemona naimie Moodi jiaimoi Moo.

²⁸ Jusiñamuimona dajena itomoi. Naimiedi nana cominina feiñote. Judíuaina omoi illamona, omoína feiñote. Judíuainedinona omoi illamona, omoína feiñote. Mullaiaína omoi illamona, omoína feiñote. Mullaiaíñedinodomoidena, omoína feiñote. Hiñiaína omoi illamona, omoína feiñote. Riñoniaína omoi illamona, omoína feiñote. Jesucristona omoi ñnuana jira, jaca damacidomoi.

²⁹ Cristomo omoi jai ñuidedi, Abraham micorimi cominidomoi. Ie jira Jusiñamui Abraham micorimo lloga rafuemo jiaimoi jainiaidomoi.

4

Jusiñamui uruiaína jaidicai

¹ Moisés micorimi llogacinona dane lloiticue. Jiaie rafuedo iena lloiticue. Riaimoi uruiaimoi mo fiodailla mei, ie mo raruaiaimoi nano doforamiemo fiebide. Naie nano doforamie uruenia, naimie mamecido naimie mo jide. Naimie mo nia raise jiiñede. Naimiedi nia jamai ite isoide. Naimie ie jofomo mullaiaimoi isoi ite.

² Naimie moo llua dinori jiaino anamo naimie ite. Ie moo raruiaí jiaino anamo jiaí ite. Naimie jai eimiena illemona naimie moo raruiaídi naimiemo raise jai duite.

³ Jaie daje isoidícaí. Uruiaí isoidícaí. Cai jaiagai llogacínuaí anamo itícaí;

⁴⁻⁵ íadedí ie jitaillíruimo Jusíñamuidí ie Jítone orede, naicínomona cáina jilloitallena. Jusíñamui uruiaína cai jaillena, ie Jítodí naicínano anamo ríñomona jeicíga.

⁶ Naimie uruiaídicáina jira, Jusíñamuidí ie Jíto Joreño cai comeciáimo orede. Naimiema cai feiñuanona, naimiedí cáina Jusíñamuina: “Cai Moo” raitatate.

⁷ Ie jírari jiaíno anamo jai íñedomoí; íadedí Jusíñamui uruiaídomoí. Jusíñamui uruiaídomoína jira, nana naimie lloga rafue omoímo jai duide.

Moisés micorí llogacínuaí anamo omoí jaia, danomo abído jaidomoí

⁸ Jaie Jusíñamuina nía omoí uíñofñenia, ua jusíñamuillaíñede ra anamo itomoí. Naie isode rana sedauídomoí.

⁹ Jusíñamuina jai uíñotomoí. Naimie omoína jai uíñote. ¿Bue ñellena omoína marebicaitañede rafuedo dane jaiacadomoí? Omoína jilloitañede rafue anamo dane íacadomoí.

¹⁰ Judíuaí comíní rafuena finocabíllaruimo jiaí finocabídomoí. Iemona: “Marebicaitícaí” raíllanona íese finocabídomoí.

¹¹ Cue lloga uai omoí finoñena jira, omoímo táinona jai llotícue. Níbaí jai táinomo maíjídícue.

Pablo naimací díga íllana uibíñote

¹² Cue amatíai, omoí díne nano cue jaia, Moisés micorí llogacínano anamo íñedomoí. Naie llogacínano anamo jaie itícue; ía bíruí íe anamo íñedícue. Bíruí cue ílla ísoí omoí íllana jiaí jítaídicue. Omoí díne cue nano ía, cuena raise feiñotomoí.

¹³ Cristo rafuena omoímo nano cue llua facaiseconí dúídicue. Iena uíñotomoí.

¹⁴ Cue dúico omoímona jacíre eruaíde; íadedí cuena jearuíñedomoí. Jusíñamui jaíenící omoí díne bílla ísoí, cuena feiñotomoí. Jesucrísto omoí díne bílla ísoí, cuena jiaí feiñotomoí.

¹⁵ Jaie caímare itícaí. ¿Níese bíruí cue díga caímare íñedomoí? Cuena omoí canoítana, cuemo fecallena, omoí uísí jaie jíno juiconoíacadomoí.

¹⁶ Omoímo jícanoíacadícue: ¿Uanaicínuaí omoímo cue llua jira, omoí enoíllamíena jai jaídicue?

¹⁷ Moisés micorí llogacínuaído jaídíno omoína eo nabairítímací; íadedí mare rafuena fínocacíñedímací. Naimací díga omoí nabairíllena, cue díga omoí nabairíllana jai jítaíñedímací.

¹⁸ Mare comeciáímona cuena omoí jaca jítaía, eo mare. Omoí díne cue ía, íese omoí jítaía, mare. Omoí díne cue íñenia, íese omoí jítaía, jiaí mare.

¹⁹ Cue uruiaí, Cristo omoí comeciáína raise namataja dínorí, omoírí cue comecí eo dúere dane lílídáíte.

²⁰ Omoí díga ja íacadícue, omoí díga atona raise ñaíllena. Omoímona are cue ílla jira, dane raise cai nabairíllena, omoímo cue llua raise uíñofñedícue.

Jesucrísto rafue Moisés micorí llogacínuaí baífemo faíte

²¹ Moisés micorí llogacínuaí anamo íacadíno, omoímo daje rafuena jícanoíacadícue: ¿Moisés micorí cuegafuíána raise cacadomoí?

²² Moisés micori jaie cuega: “Abraham micorimo mena jito ite. Daje jito ie mullaiñomona comuide. Jiaie jito ie mullaiñediñaiñomona comuide. Naiñaiñodi ie nanoca ai.

²³ Abraham micori jitaila jira, ie mullaiño jitona comuitate; iadedi ie mullaiñediñaiño jito comuide, Jusiñamui llua jira”.

²⁴⁻²⁵ Naie rafuemona cai fueolle. Ie iañuaidi mena jai lloga rafue isoidiañuai. Abraham micori mullaiño mameci Agar micori. Naiñaiñodi Sinaí railla anedumona lloga rafue isoide. Arabia railla eniruemo Sinaímona Jusiñamuidi Moisés micorimo rafuena llote. Naiñaiño mullaiñona jira, ie urue mullaimana jeiciga. Ie nama anamo jaca ite. Ie isoide. Moisés micorimo llogacínuaído jaidinodi naie rafue anamo itimaci. Jerusalémo itino Moisés micori llogacínuai anamo jai nia illa jira, Agar micori Jerusalén railla nairai isoide.

²⁶ Jiañaiñodi jiaie lloga rafue isoide. Naiñaiño Abraham micori ai. Naiñaiñodi Sara micori. Naiñaiñodi monamo ite Jerusalén isoide, naiñaiño mullaiñoñena jira. Nainomo jainaiaidicai, Moisés micori llogacínuai anamo jai cai iñena jira.

²⁷ Isaías micori iena jaie cuete:

Oiniño, mai iobi.

Urue nia jocoñediñaiño, ado iobi.

Enirediñaiño baifemo eo uruaiarenitio.

Iemona Moisés micori llogacino anamo iñedinomona Cristona inotinona ailluena jaillana uiñoticai.

²⁸ Cue amatiai, bie rafue omoimo duide. Jusiñamui llua jira, Abraham micori jito Isaac micori comuide. Ie isoide. Jusiñamui llua jira, caidi ie uruaiaina jaidicai.

²⁹ Ero, mullaiño jitodi mullaiñediñaiño jitona jaie duere finouide. Daje isoi Moisés micori llogacínuai anamo itinodi Jusiñamui Joreño anamo itinona birui duere finocabidimaci.

³⁰ ¿Niese cai nibaille? Moisés micori Sara micori llua jaie cuete: “Mullaiñona, naiñaiño jito diga, oni dota. Ie moo fiodailla mei, mullaiño jito ie moo raruiaina feiñoñeite. Dama mullaiñediñaiñoñede jito ie moo raruiaina feiñoite’ llote”.

³¹ Ie jira mullaiño urue isoifedicaí Moisés micori llogacínuai anamo jai cai iñena jira, mullaiñediñaiño urue isoidicai.

5

¿Nie isoide rafuedo jaitomoi?

¹ Moisés micori llogacínuai anamona Cristodi caina jai jillotate. Ie jira omoi comeaiaina ocuiño. Jaie omoi illa isoi, dane jaiñeno. Omoi marebicaitañede rafue anamo jaie itomoi. Ie jira Moisés micori llogacínuai anamo iñeno. Iemona marebicaiñeitomoi.

² Jeacínomona omoi jillobillena, Moisés micori llogacínodo omoi jaiacanamona, omoi abiaina omoi detataia, Cristo rafuena jai jitañedomoi.

³ Dane lloiticue: Jeacínomona omoi jillobillena, naga abina detatagamie nana Moisés micori llogacínuaína inua. Nana iena inoñenia, naimie jilloñeite.

⁴ Moisés micori llogacínuaína inuamona omoi marebicaiacania, Cristo rafuena jai duiñedomoi. Jusiñamui caina duenaillamona, Cristona jaie cai dine orede. Moisés micori llogacínodo omoi jaiacania, Cristo rafuena jai jitañedomoi.

5 Moisés llogacínuaína ñnuamona marebicaiñedicai; iadedi Jesucristona cai ñnuamona, Jusiñamui Joreño caína canuamona, cai marebicaillemo iocire ocuiridicai.

6 Abina detatajamona, cai jeacinomona jilloñedicai. Abina cai detatañenamona, jiai jilloñedicai. Dama Cristona cai ñnuamona jillobidicai. Naimiëna cai ñnua jira, nana cominina isiruicana jaidicai.

7 Cristo rafuedo navui marena jaidomoi; ia damierie uanaicinona omoi ñnuana jai jitaññedimaci.

8 Jusiñamuimona naimaci uaina oñedimaci. Jusiñamui omoiña navui uaidote, naimie dibeimo omoi illena.

9 Jiai rafuedo iena lloiticue: Janore jisa siritate ra ifecimo joneia, jai nana siritate. Ie isoide. Damie jiaie rafuedo jiaia, diga cominina jifuerede, naimie jailla dibeido jaillena.

10 Jiaie rafuedo omoi jaiñellemo cue começina jai facadicue. Cai Nama cue ñnua jira, cue lloga uaido omoi jaillemo cue começina jai facadicue. Omoi começina naganomo itatatiniena uiñoñedicue; iadedi Jusiñamui naimiëna duere finoite.

11 Cue amatiai: “Abina detataja” omoimo cue lloiadedi, cuena jai duere finoñedomoi, omoi jilloillena Jesucristo fodailla rafuena jai cue lloñena jira.

12 Omoi começiai naganomo itatatinodi raitimaci: “Janore jisa abina detatajamona, cai jeacinomona jillobidicai”. Iese itena, Jusiñamuina uiñoñedino finua isoi, namiëna naimaci abiai diana jiai jitaidicue.

13 Moisés llogacínuai anamona Jusiñamui omoiña jai jillobitade; iadedi maraññede rafuena omoi finollena jillobiñedomoi. Omoi jillobilla jira, naimaçina omoi isiruilla jira, jiaie cominina cano.

14 Moisés micori iena jiaie llote: “O abi o isiruilla isoi, o ecimo itinona isirui”. Iena omoi finoia, nana Moisés micori llogacínuaína jai finodomoi.

15 Iese omoi finoñenia, conima diga omoi riire iciria, jaca danomo iñeitomoi.

Jiaie cominina omoi isiruilla rafue

16 Omoimo nia lloiticue. Jusiñamui Joreño omoi começiamo namatajano omoi i. Omoi começiamo ite maraññedicinodo omoi jaiñeno.

17 Cai começiamo ite maraññedicinodi Jusiñamui Joreño jitaillacinodo daacinodo jaiñede. Conima abido jaide, cai jitailla ra cai finoñellena;

18 iadedi Jusiñamui Joreño anamo omoi raise ia, naimie lluna omoi raise ñnoia, Moisés micori llogacínona jai jitaññedomoi.

19 Ero, maraññede começiamo iticinodo omoi jiaia, bie isoidicinona finocabidomoi: aññede riño diga illacina, iniñede ñima diga illacino, jeare ñaiacino, diga eo jearede rafuena finuacino,

20 jiraraina sedajacino, aimara finuacino, comena enoillacino, uaina uaitajacino, abina uradoillacino, icirillacino, dama ie abi ramo começina facajacino, nana cominina uaitaillacino, damacina iñenacino,

21 dama abina uradoillano, rana bairuacino, comena meiniacino, jifaillacino, aifuerillacino, ie isoidicino. Omoimo jiaie lloiticue. Dane lloiticue: Bie isoide rafuena bu finocabia, naimie cominina naimaci iñena jira, Jusiñamui ie cominina sedajanomo jainaiñeite.

22 Jusiñamui Joreño omoi começiamo namataia, bie isoidicinona finocabidomoi: nana comini isiruillacino, começi caimare illacino, uri illacino, raire iciriraininacino, duenaillacino, jiaie cominina canuacino, ie lloga uaina finuacino,

²³ uai oñenacino, abina eenuacino. Moisés micori llogacinuai bie isoidicinona ñaiñede.

²⁴ Cristo Jesús mo jainaiadinodi naimaci maraiñede comeciai jitaillacino anamo iñedimaci.

²⁵ Jusiñamui Joreño caimo illa jira, naimie cai comeciaina namatajacinodo cai jaillesa.

²⁶ Temona abina cai birifñellesa. Abina jiai cai iedoñellesa.

6

Jiaie llofuiacino

¹ Cue amatai, omoimona damie ebena jamai jeacinona finoia, dane Jusiñamui dibeimo naimie raise illena, naimiemo fecuise icifñeno lloño. Omoi cominimona Jusiñamui Joreño comeciaino raise namatadinodi iese naimiemo llofuellesa. Jeacino finoi raillano, nagamiiai abi rairuillesa.

² Bu duere sefua, bu Taife ramo faia, coninina cano. Iese omoi canoia, Cristo llogacinuaina jai innotomoi.

³ “Cueno iese suiñeite. Dama abina sedadicue. Jamai bue isoifñedicue” comecina facadimie dama abina jifueite. Naimie jamai bue isoide.

⁴ Maraiñeni raillano, ie finoca rafueconi iobillena, nagamiiai ie finoca rafuena abido facaja. Dama ie maijia rafueconi iobilla. Dama ie maijia rafuedi naimiemo duide. Jiaimiemo ite maijia rafuedi naimiemo duifñede.

⁵ Naimie finoca rafuena nagamie jeacinona finoia, dama naimie muidona.

⁶ Naga Jesucristo rafuena fueotimiedi ie llofuegamiemo mare ra fecalle.

⁷ Dama o abina jifueñeno. Budi Jusiñamuina jifuenide. Jeacinona bu finoia, Jusiñamui ibana jaca oite. Marecinona bu finoia, Jusiñamuimona iba feifñeite.

⁸ Ie comecimo ite maraiñede jitaillacino finodimiedi ie abina faifite. Fiodaite; iadedi Jusiñamui Joreño jitaillacinona finodimiedi monamo jaca iite. Faifñeite.

⁹ Jusiñamui Joreño jitaillacinona finuana sefuiruiñeno. Cai comeciai cai ocuiñoia, Jusiñamui jitailla facaiseconi ibana feifñoitica.

¹⁰ Ie jira nana cominina canocabi. Nana creyentaina ua eo canocabi.

Facaduacino

¹¹ Ero, jerie cuiano omoimo bie facaimo cueticue.

¹² Jiaie cominimona iobillacinona omoi abiaina detatajana jitaicino feifñoiacana jira, omoi abiaina detatajana jitaicimaci. Cristo rafue lloticinadedi: “Cristo rafuena uifñedimodi niade duere caina finodimaci” raillanomo comeciaina facajamona, iese jitaicimaci.

¹³ Omoi abiaina detatajana jitaicimodi Moisés micori llogacinodo raise jaiñedimaci. Nana iena inofñedimaci. Omoiri abina iedoiacana jira, omoi abiaina detatajana jitaicimaci;

¹⁴ iadedi Jusiñamuidi jiaie rafueri abina cue ieduanana jitaifñede. Dama Cristo cueru fiodailla rafueri abina iedoticue. Ie jira Jusiñamuiñede rafuemo jainaiñedicue. Naie rafue anamo jai iñedicue.

¹⁵ Abina diamona cai jeacinomona jilloñedica. Abina deñenanomona jaca jilloñedica; iadedi Jusiñamui Joreño caina comonori comuitajamona jillobidica.

¹⁶ Jusiñamuidi nana bie llucacinodo jaidino uri itatatesa. Naimie naimacina duenailasa. Jusiñamui cominidi ua jaca iese illasa.

¹⁷ Bie isoide rafue illamona, cuena duere finoño. Jesucristo rafuena cue llua jira, diga icaiño cue abimo bofellañoa jai oticue.

¹⁸ Cue amatiai, cai Nama Jesucristo omoína duenaillasa. Mai. Pablocicue.

EFESOMO ITE CRISTONA HNOTINOMO PABLO ORETAGA RABE

Efesomo ite creyentiaimo Pablo cartana orede

¹ Efeso railla nairaimo ite creyentiai, Pablociue. Bie carta omoi dine oredicue. Ie rafue lollena, Jusiñamui jitailla jira, Jesucristo oretagamiedicue. Naimiemo omoi jai jainaiilla jira, Jesucristona hnocana jai jaidomoi.

² Cai Moo Jusiñamui, cai Nama Jesucristo diga, omoina duenaicabillana uiñocana mai omoi jai. Iaimaii omoi comeciaina uri itatajacabillana uiñocana mai omoi jai.

Cristomo jai cai jainaiilla jira, Jusiñamui marena itatajacinona feiñoticaí

³ Cristomo cai jainaiilla jira, Jusiñamui caina eo marena itatate. Ie jira cai Moo Jusiñamuimo iobillacinona cai fecacabillasa, naimiedi Cai Nama Jesucristo ie Moo illanona. Cristomo cai jainaiilla jira, cai comeciái marena itatajacinona Jusiñamuimona jai feiñoticaí.

⁴ Iena ja lloiticue. Enirue nia iñenia, Jusiñamui nana naimiena hnotinona jaie fetode. Cai facaina Cristo ico fiodaillena naimie uiñuamona, caina jaie fetode. Naimiemona cai marebicaillena, jeacinona cai finoñellena, caina fetode.

⁵ Caina isiruillamona caina fetode. Naimie eo jitailla jira, naimie uruiaina cai jaillena, caina fetode. Jesucristo fiodaillamona Jusiñamui uruiaina jaidicaí.

⁶ Naimie caina fetuamona, naimie caina duenaillana jai uiñoticaí. Iemona naimiedi eo mareuidimiena jai jai uiñoticaí. Ie isiruiga Jitomo cai jainaiilla mona iena uiñoticaí. Naimiemo buena cai finoñenia, caina duenaite. Naimiena cai iobitallena, caina fetode.

⁷⁻⁸ Caina eo duenaillanona, ie Jito fiodailla jira, Jusiñamuidi jeacino anamona caina jai jillotate. Cai jeacino oni dotajamona, ibana jai oiñeite.

⁹ Naimiena cai raise hñollena, caina abina jai uiñotade. Jusiñamui caina naimie nana caina birui jilloitaiacanana jai uiñotade. Cai cominidi iena jaie uiñofedimaci; iadedi Jusiñamui jitailla diese Cristo finoca rafuedo caina iena jai uiñotade.

¹⁰ Naimie jitailla facaiseconi, nana caimo ie finoacalle rafue fuiduanona, Cristo anamo naimie nagamiena raise itataite. “Cristo cai Nama” raitimaci.

¹¹ Ie jira naga suide rafue suicana jaide, Jusiñamui jitaillacinona fuidollena. Nana naimie jitailla diese, naimie comeci jitailla jira, nana iena finode. Nano facaiseconi naimie cominina cai jaillana naimie uiñuanona, caina jaie fetode. Ie muidona naimie cominina jai jaidicaí.

¹² Naimie caina fetuanona Cristona jaie hñoticaí. Naimie diga ico jaca cai illemo birui ocuridicaí. Naimiena cai iobitallena caina fetode. “Naimie fue eo mare” cai raillena caina fetode.

¹³ Cristona jai birui hñotomoi. Uanaicino rafue omoi jai cacajamona, naie mare rafue omoi cacajamona, omoi jeacinomona jai jillobidomoi. Jusiñamui Joreño omoimo illano, navui Cristo llua isoi, naimie dibeimo omoi illana uiñotomoi.

¹⁴ Jusiñamui Joreño caimo jaca illa jira, Jusiñamui diga ico cai jaca illena uiñoticaí. Jusiñamuidi caina ie cominina jai jaitate, naimiena cai iobitallena. “Naimie fue eo mare” cai raillamona, naimiena iobitaiticaí. Naimiemo

cai jainaiaila jira, naimiemona nana cai comeciai marena itatajacinona feiñoticaí.

Naimaci facaina Pablo jüde

¹⁵ Cai Nama Jesúna omoi ñnuana jai fididicue. Nana jiaie creyentiaina omoi isiruillana jiai fididicue.

¹⁶ Ie jirari Jusiñamuimo cue jüia, omoína feitañedicue. Omoi facaina naimiemo iobillacinona jaca fecadicue.

¹⁷ Cai Nama Jesucristo Jusiñamuimo duilla jira, cai Moo Jusiñamui uai siñonana jira, naimiemo cue jüanona, omoi facaina jicanoticue. Naimie Joreño uaido naimie rafue raise uiñocana omoi jaillena jicanoticue. Naimiena raise uiñocana omoi jaillena jicanoticue. Iese omoi facaina jicanocabiticue.

¹⁸ Naimie dibeimo omoína naimie jai uaidua jira, naimie diga ico jaca omoi illemona, iena omoi raise uiñuana jitaídicue. Naimie cominina omoi jai jailla jira, naimie illanomo ico eo marena iocire iitomoi. Iena omoi raise uiñuana jitaídicue.

¹⁹ Naimie uai ua eo siñonana omoi uiñuana jitaídicue. Naimiena cai ñnua muidona, ie uaido naimie caina canorede. Iena omoi raise uiñuana jitaídicue.

²⁰ Fiodaillamona Cristona ie uaido Jusiñamui jai jillotaja jira, naimie uai siñonana uiñotomoi. Fiodaillamona Cristo jillua mei, monamo Cristo abido jailla mei, ie ecimo Jusiñamuidi Cristona illaimana dane itatate.

²¹ Ie jira Cristo nana Jusiñamui jaienisaí afemo ite. Ua nana comini afemo naimie ite. Taife afemo naimie ite. Janaba afemo naimie ite. Naie iaímaiaí isoide joreñuai afemo naimie ite. Birui iese ite. Ico iese nia iite.

²² Jusiñamuidi naga ra Cristo anamo ua jai itatate. Cristona nana creyentiaí imaci illaimana jai ua jai itatate.

²³ Cristomo daajena nana cai creyentiaídicaíduidicaí. Naimie anamo cai illanona, naimie nana caina ocuicabide. Ie jira marena cai illena naimie jitailla isoi, naimie nana caina birui canocabide.

2

Jusiñamui caina isiruilla jira, cai jeacinomona jai jillobidicaí

¹ Jusiñamuina jaie omoi nia ñnoñenia, naimiemo omoi duiñena jira, naimiemona fiodaitino isoidomoi. Jeacino anamo omoi illa jira, naimiemona fiodaitino isoidomoi. Jeacino finocana jaidomoi. Marañedicinona finocana jaidomoi.

² Jeacinona ebiruitomoi Jusiñamui dibeimo iñedino rafuedo jaidomoi. Taife dibeido jai jaisoidomoi. Jusiñamuina oiacaíñedino Taife jitailla rafuedo jaisoidimaci.

³ Naimaci isoi jaie nana iticaí. Cai comeciaino ite jearede jitaillacinona finodicaí. Iedo jai jaisoidicaí. Ie jira Jusiñamui riicaillafue anamo jaie iticaí. Iese jaie nana iticaí.

⁴⁻⁵ Jeacina jaie cai finua jira, jeacino anamo iticaí. Jusiñamuina ñnoñedicaí; iadedi Jusiñamui caina eo duenaillanona, caina eo isiruillamona, naimie diga ico jaca cai illena, naimie dibeimo caina itatate. Fiodaillamona Cristona Jusiñamui jillotaja jira, jeacino anamona caina jai jillotate. Ie muidona monamo ico iiticaí.

⁶ Cristona jillotaja mei, Jusiñamui ie ecimo naimiena dane itatate. Cristomo cai jai jainaiaila jira, Jusiñamui nainomo caina jiai jainaiatate.

⁷ Cristo finoca rafuemona caina iese jai itatate. Caina iese jai itatajamona, nana cominidi Jusiñamui caina eo duenaillana uiñoitimaci.

⁸ Naimie caina duenailanona, caina jai jillotate. Jaca buena cai finuamona jillobiñedica; iadedi naimie jitailla jira, naimie caina jai jillotate.

⁹ Cai jilloillena jaca buena cai finoñena jira, abina iedoñedica.

¹⁰ Jesucristomo cai jainaiailamona, ie cominina cai jaillamona, cai illa isoi naimie caina itatate. Iese cai illamo Jusiñamui comeci jaie facajano, mare rafuena finocana cai jaillena, naimiedi cai comeciaina marena itatate.

Cristomo jai cai duilla jira, jiaie nairai ai diga birui uri iticai

¹¹ Omoi jaie isoillana uiñotomoi. Iena comecitomoi. Jusiñamuina jaie uiñofedomoi. Judíuaiñedinona omoi jeiciñena jira, cai judíuai comini isoi abiaina detañedomoi. Ie jira cai cominimona marañedomoi.

¹² Omoi jeacinomona Cristo omoina jilloitaicanana naie facaiseconi uiñofedomoi. Cai judíuai nairaimo jainaiñedomoi. Ie muidona Jusiñamui cai judíuai cominimo jaie lloga rafuena uiñofedomoi. Jusiñamuina nabaillana uiñofedomoi. Jusiñamui diga omoi ico jaca illena uiñofedomoi. Jusiñamuina omoi uiñofena jira, naimiena seditañedomoi.

¹³ Naimie dibeimo jaie jaiñedomoi; iadedi Jesucristomo birui duidomoi. Jusiñamui jaie iñofedomoi; iadedi Cristo jai fiodailla jira, naimiena birui iñotomoi. Naimiena omoi jai iñuamona, cai diga naimie dibeimo jai itomoi.

¹⁴ Naimie omoi comeci jai uri itatate. Cai comeci jai jai uri itatate. Cai judíuai omoina jaie jearuíticai. Iese jaie iticai; iadedi Cristo muidona dani coninina nana birui nabaidicai.

¹⁵ Cristo fiodaillamona Moisés micor; jaie llogacino anamo jai iñedica. Naie llogacino dani cai judíuaimo duilla jira, Jusiñamui dibeimo jaie iñedomoi; iadedi Cristo finoca rafue muidona, birui daajena jaidicai. Omoina jaie cai gaiñena jira, omoina jaie nabaiñedica; iadedi Cristomo daajena cai duilla jira, birui nabairedica.

¹⁶ Cruzmo Cristo fiodailla jira, Jusiñamui dibeimo cai illamona, mena nairaimona caina daje nairaina jai itatate. Ie jira daje nairaina uri iticai.

¹⁷ Cristo jaie billanona, mare rafuena llote. Omoi judíuaiñedinomo, cai judíuaimo, comeci uri illana llote. Nana caina jilloitaicanana llote.

¹⁸ Naimie muidona Jusiñamuina jai nabairedica. Jusiñamui Joreño caina canuamona, naimie diga birui nabairedica.

¹⁹ Jusiñamui cominina omoi jai illa jira, nana naimiena iñotino diga Jusiñamuimo daajena duidomoi. Caimona birui jiaie cominiñedomoi.

²⁰⁻²² Jofa isoidicai. Jofona cai finoacania, naie ibiri nano finodicai. Ie mei diga rana cai atiamona, iena niticai. Ie isoide. Diga jiaie isoide cominiaina iticai; iadedi Cristomo daajena jai duidicai. Naimiedi birui nana cai Nama. Cristo facaina llorainimona naimie rafuena jai cacadicai. Jusiñamui Joreño caina canuanona iena iñoticai. Iena cai iñuamona, naimie jitailla isoi, mare rafuena finocana jaidicai. Cai diga Cristomo omoi jai duillamona, Jusiñamui Joreño nana cai comeciaino jai ite.

3

Judíuaiñedinomo Pablo Cristo rafuena llofuet

¹ Jesucristo rafuena omoi judíuaiñedinomo cue llofueuilla jira, cárcelmo iticue.

² Omoina naimie duenailanona, omoina llofuellena, Jusiñamui cuena oretate. Iena jai uiñotomoi.

³ Jusiñamui cuemo jaie uiñoñega rafuena jai llote. Naie rafuena janore como jai cueticue.

4 Bie carta omoi facaia, Cristona jaie uiñoñega rafuena cue jai uiñuana uiñoitomoi.

5 Jusiñamuidi cominimo iena jaie raise uiñoñade; iadedi ie Joreñodo Cristo facaina llorainina iena birui jai uiñotade.

6 Iena lloiticue. Judíuaiñedomoi; iadedi Jusiñamui cuemo jaie llote: “Judíuaiñedino Cristona ñnuanona, omoi judíuai isoi jilloitimaci” llote. Omoi facaina Cristodi fodaite. Naimiëna omoi ñnoia, omoina ie uruiaina cai isoi jai itatate. Naimiedi nana cai Moo. Jai daje nairaidicai. Cristomo daajena duidicai. Cristo rafuena omoi ñnuamona, naimie jai llua isoi, Jusiñamui diga ico jaca itomoi. Jusiñamui cuena iena jaie uiñotade.

7 Jusiñamui jitailla jira, cuena naimie duenailanona, naimie uai cuemo illamona, naie mare rafuena llofuecabiticue.

8 Creyentena nia cue jaiñena facaiseconi, creyentiaina jaie cue duere finouilla jira, jamai bue isoidicue. Nana jiaie creyentiaie cue baifemo faitimaci; iadedi Jusiñamui cuena duenailanona, ie rafuena cue llollena, cuena oretate. Cristo caina eo raise marena canocabillana llofuecabiticue.

9 Naie jaie uiñoñega rafuena nana comini birui uiñollena, cuena oretate. Jusiñamui naga rana finode; iadedi naimie jitailla jira, naie jaie uiñoñega rafuena jaca buna jaie raise uiñoñade. Nana comini iena birui raise uiñollena, cuena oretate.

10 Judíuaiñedino judíuai diga creyentiaina jaillamona, Jusiñamui jaienisaie naimie uai siñonana uiñoitimaci. “Naimie fue eo mare” raitimaci.

11 Jusiñamui jaca jitailla isoi, naie rafue suicana jaide. Cai Nama Jesu-cristona naimie oretajanona, cai facaina Cristo fodaite. Iemona Jusiñamui jitailla rafuedi suide.

12 Cristona cai ñnua jira, Jusiñamui diga jaciruiñeno birui jai ñairedicai. Naimie caina cacajana jiai uiñoticai.

13 Cristo rafuena omoimo cue llua jira, birui duere sefuidicue. Cárcelmo cue duere sefuilla jira, Cristo rafuedo jaillena omoi comeciãie sefuiruisiñeno; iadedi Cristo rafue omoimo cue lluanona cue duere sefuiã, iobicana omoi jai.

Cristo caina eo isiruite

14 Cai Moo Jusiñamui caina eo canocabillanomo cue comecina facaia, naimiemo jüdicue.

15 Naimiedi nana creyentiaie imaci Moona jira, naimiemo jüdicue.

16 Naimiemo cue jüanona, omoi facaina jüdicue. Naimiemo eo ebirede siño iticino illamona, ie Joreñodo naimie omoi comeciãina raise ocuiñotallena jicanoticue.

17 Cristona omoi ñnuamona, naimie omoi comeciãina raise namatallena jicanoticue. Jusiñamuina omoi isiruicana jaillana jüdicue. Jiaie cominina omoi isiruicana jaillana jiai jüdicue.

18-19 Cristo caina jaca eo isiruillana, nana jiaie creyentiaie diga jaca eo isiruillana, omoi eo raise uiñuana jüdicue. Naimie caina eo isiruillacino cai comeciãie facajacino baifemo uailla jira, naimie caina eo isiruisoillacinona jaca raise uiñoñedicai; iadedi iena janore cai uiñuamona, Jusiñamui omoi comeciãina namatallena jüdicue. Iese omoi facaina jücabidicue.

20 Ie jira Jusiñamuimo iobillacino cai fecajasa. Ie uaido cai comeciãie marena icana jaitate. Naimiemo cai jicajacino baifemo naimie fecarede. Cai comeciãie facajacino baifemo naimie jiai finorede.

²¹ Ie muidona naimiemo iobillacinona nana cai creyentiaidicaidi fecacabillasa. Jesucristo finoca rafue muidona iobillacinona jiai cai fecacabillasa. Mai.

4

Jusiñamui Joreño jai caimo illa jira, cai comeci daje isoi lloide

¹ Cárcelmo nia cue illamona, omoimo rafuena nia lloiticue. Cristo rafuena cue llofuia jira, cárcelmo iticue. Creyentiaina omoi jai jailla jira, Cristo jitailla isoi omoi i. Jusiñamui omoina jai fetode naimie jitailla rafuena omoi finollena.

² Ie muidona abina jaca iedoñeno. Raire iciriñeno. Jiaimie ona duere finoa, ibana ofeno; iadedi uai ofeno naimiena jaca isirui.

³ Jusiñamui Joreño omoimo illamona, omoi comeciai daje isoi lloicana jai. Daje isoi omoi comeciai lloillamona, omoi jitaillamona daní uri omoi i.

⁴ Iena nia lloiticue. Cristona cai inuamona, daajena naimiemo jainaiidicai. Jusiñamui Joreño nana caimo illamona, daní omoi comeciai lloicana omoi jai. Jusiñamui caina jai fetode. Ie muidona naimie diga jaca cai illena, naimie isoi cai illemo ocuiridicai.

⁵ Jaca dajede Nama sedacabidicai. Caina jilloitallena, da naimiena inoticaí. Dama naimie facaina bautizaganodicai.

⁶ Cai Moo Jusiñamui jaca dajede. Jaca dajede Jusiñamuina nana cai creyentiaidicaidi sedadicai. Naimie anamo nana iticai. Naimie jitaillacinona cai finollena, caina canocabide. Caina canollena, naimie Joreño caimo jaca ite.

⁷ Naimie jitailla diese, caina fetuanona, naimie facaina cai maijillena, ie uai caimo fecade. Jiae creyentiaina naimiemo inotacana jaillena, ie uai caimo fecade.

⁸ Iena cai raise uiñollena, David micori jiae cuegafuemona fueoiticaí. Naimie cueba: “Monamo abido naimie jaillanona, illaimana naimie illamona, ie cominina naimie ifuanona, naimacimo rana fecade”. Cristona ñaite. Iemona Cristo cai maijiacino caimo illana uiñoticaí.

⁹ Biemo omoi comeciaina faca. Monamo abido naimie jailla jira, monamona eniruemo Cristo nano billana uiñoticaí.

¹⁰ Eniruemo bite; iadedi monamo abido jaide. Nana cominina birui sedade. Naimie baifemo jaca buna iñede.

¹¹ Ie jira caimo ie uai jai fecajanona, caimona ie llofueoicaiganona fetuanona, ie rafue raise llofuellena, naimacina oretate. Damieriemo ie facaina ie rafuena jino llollena, ie uaina fecade. Ie rafuena nia inoñedinomollollena, damieriemo ie uaina fecade. Creyentiaina ie rafuena llofuellena, damieriemo ie uaina fecade.

¹² Iese ie uaina fecade, naimie facaina raise cai maijillena, nana jiaie creyentiaina cai canollena, ie mei Cristo rafuena daajena inocana jaiticaí.

¹³ Iena cai inuamona, Jusiñamui Jitona raise uiñocana jaiticaí. Cai comecidi daje isoi lloicana jaiticaí. Naimie jitaillacinodo raise jaiticaí. Naimie marena icana illa isoi jaiticaí.

¹⁴ Cai uruiái facaise cai comeciai naganomo ite. Naie facaise nie isoide rafuena cai cacajia, iena raire inoticaí. Cristo inocana cai jaillamona, uruiái isoi cai icaiñena. Damierie naga llofueraima uaido jaidimaci. Damierie llofueraididi Cristo rafuena raise llofueñedinacaci; iadedi jifuetimaci. Tainona llotimaci. Iedo cai jaiñena;

15 iadedi jiaie cominina cai isiruillamona, uanaicinodo cai jailla. Cristo isoi icana cai jaillamona, abina uifioitica. Cristodi cai illaimana jira, caina ocuide.

16 Naga creyente naimiemo jainaiaside. Aillosiedicai; iadedi daajena naimiemo jainaiaidicai. Daajena naimiemo cai jainaiailamona, naimie jitaillacino cai finoia, naimiena inocana jaiticai. Iemona dani coninina isiruicana jaiticai. Daajena naimiemo cai jainaiaila jira, cai comeciai daje isoi lloicana cai jailla.

Cristomo jai cai duilla jira, naimie rafuedo birui jaidicai

17 Omoimo nia lloiticue. Cai Namamo cue duilla jira, buena lloiticue. Jusiñamuina inoñedino isoi dane omoi ifeno. Jaiie naimaci isoi itomoi. Naimaci comeciadi tainomo jai jaide isoide. Cacarefiacañedimaci.

18 Jusiñamui rafuena uifioñedimaci. Iena cacañedimaci. Abina naimaci uifioñena jira, Jusiñamui dibeimo illana jaca uifioñedimaci. Uanaicinona uifioiacañedimaci.

19 Jearede rafuena naimaci finoia, meiruiñedimaci. Naimaci comeciai oiicana rafuedo jai jaidimaci. Naga jearede isoide rafuena eo finocana jaidimaci;

20 iadedi Cristo rafuena omoi cacajamona, naimiena omoi raise uifiamona, naimaci isoi omoi illena fueoñedomoi. Cristo rafuena omoi cacajamona, jiaiena illena jai fueotomoi.

21 Naimiena cacajana iena inotomoi. Naimiena cue llofuiamona, naimiena Cristo facaina lloraini llofuiamona, danomo omoi roracomo omoi ofia, Cristo uanaicinona cacadomoi.

22 Biena omoina llofuecabiticue. Cristona jaiie nia omoi inoñena isoi, omoi jaiñeno. Omoi comeciaino jaiie iticinodo jaiñeno. Naga jearede rafue omoi comeciai oiacanamona faificana jaiie jaidomoi. Iedo birui jaiñeno;

23 iadedi Cristo dibeimo omoi jai illanona, naimiemo omoi comeciai facajano, Jusiñamui omoina canuamona, omoi comeciai iuaillaina meidocana jai.

24 Cristo rafuena birui inotomoi. Naimie jitaillacinodo omoi mai jai. Jusiñamuidi jeacino finocana omoi jaiñenana jitaide. Naimie marena isoi, marena icana omoi jaillana jitaide.

25 Ie jira tainona lloñeno. Cristomo daajena jai jainaiaila jira, coninimo uanaicinona jaca omoi llono. Jiaionona omoi jifueñeno.

26 Marañedicinona bu finoia, naimiemo raire llono; iadedi iese o lloia, naimiena jeare ñaiñeno. Jiaimie ona iciaa, naimiena jeare ñaiñeno. Naimie diga o rafue ia, naie rafue nairuido marena fino,

27 Taipe ramo o fai raillano. Bu diga o nicino ia, iena raire marena o finoñenia, ibana oiacanitio. Naie raire o feitañena jira, Taipe ona jeacinona finotaite. Iese suiñellena, naicino raire marena fino. Iena feita. Iena dane abido llinoñeno.

28 Naimiemo ra illena, fiaimona omoimona navui bu ia, creyentena naimie jai jailla jira, naimie dane fiañena; iadedi ra naimie jitaia, naimie maijiite. Ie maijiamona ie ra ollena, ucubena feiñoite. Ie mei dueredinona naimie jaii canoite.

29 Jeare ñaiñeno; iadedi nie isoide rafue ia, marecinona ñaino. Ie mei naiemona jiaie cominina canoitomoi, Jusiñamui dibeimo naimaci raise illena.

30 Jusiñamuimo omoi jai jainaiaila jira, jeacinona finoñeno. Jeacino omoi finoia, Jusiñamui Joreñodi sunaite. Naimiena sunaitañeno. Naimie caimo illamona, caina jillotajana uifioitica. Cristo dane abido billemona, naimie dine cai jaca illena, caina jai jillotate.

³¹ Jiaie cominina iciñeno. Icirñeno. Uaina uaitañeno. Jiaie cominina jeare ñaiñeno. Naimacina duere jeare finoñeno;

³² iadedi coninina canua. Jiaie cominina duenai. Jiaimie diga omoi nicino ia, naimie finoca rafuena feitajanona, naimie diga marena ñaino. Naie rafuena dane abido linoñeno. Cristo finoca rafue muidona, Jusiñamui omoi jeacinona jai feitaja isoi, jiaimie diga omoi rafue ia, naifuena omoi feita.

5

Jusiñamui cominina jai cai illamona, naimie jitaillacinona finoiticaí

¹ Jusiñamui isiruiga uruiaidomoi. Naimie marecinona finua isoi, omoi fino.

² Cristo caina isiruilla isoi, coninina isiruicana omoi jai. Naimie jitailla jira, caina isiruillamona, cai facaina naimie fiodaite. Cai jeacino oni dotallena naimiedi fiodaite. Naimie iese fiodailla jira, Jusiñamuina eo iobitade.

³ Jusiñamui cominidomoi. Omoi aiñede riño diga iñeno. Omoi iniñede ima diga iñeno. Rana nicidoñeno. Jearede rafue finuamo omoi comeciaina facañeno.

⁴ Jearede rafuedo jaiñeno. Jamai ebena ñaiñeno. Meiredicinona ñaicana jaiñeno. Naie isoide rafuedo creyentedi jaiñena; iadedi Jusiñamuimo iobil-lacinona fecacana omoi jai.

⁵ Ie aiñede riño diga icabitimiedi Jusiñamui illanomo duiñede. Cristo ie cominina sedajanomo duiñede. Ie iniñede ima diga icabitñaiñodi Cristo ie cominina sedajanomo jai duiñede. Ie rana Jusiñamui ifomo naimie sedaja jira, rana nicidocabitimiedi Cristo ie cominina sedajanomo duiñede. Cue lloga rafuena jai raise cacadomoi.

⁶ “Creyente naie isoide rafuena finorede” bu lloia, naimie omoina jifueiacade. Naimie iese lluana ñnoñeno. Jusiñamui naie jeacinona finocana jaidinona duere finoite.

⁷ Ie jira naimaci jearede finoca rafuedo jaiñeno. Naimacina nabaiñeno.

⁸ Jusiñamuina jaiie omoi uiñoñena jira, jiti redinomo itomoi isoidomoi; iadedi cai Namamo omoi duillamona, uanaicinona ñnocana omoi jai.

⁹ Jusiñamuina omoi jai uiñoia, jeacinona omoi fañnonoçia, Jusiñamui jitaillacinona finocana jaitomoi. Uanaicinona llocana jaitomoi.

¹⁰ Buena o finoacania, Jusiñamui jitaillacinona o finuacinomo o comecina nano faca. Cai Nama jai lloga uaido omoi jaicabillamona, naimie jitaillacinodo jaca jai.

¹¹ Jiti redinomo nia itino finoca rafuedo omoi jaiñeno. Naimaci finoca rafuemono marecinodi jaca comuiñede. Naimacimo: “Maraiñede” llono.

¹² Iena cue meidailla jira, naimaci jearede bainino finoca rafuena ñaiacaiñede cue.

¹³ Marecinona omoi jaca finuamona, jiaie comini naimaci finoca rafue eo maraiñenana raise uiñotimaci.

¹⁴ Cai ofia, naiena rocabiticaí:

Mai casi. Inñeno.

Jai fiodaitino isoidomoi;

iadedi omoi comeciaina Cristo jai lligaiñoite.

¹⁵ Ie jirari omoi marena illena, abina rairuicana omoi jai. Jusiñamuina ñnoñedinno ebena jaicabidimaci. Naimaci isoi jaiñeno.

¹⁶ Diga maraiñede rafue birui comuicabilla jira, cominina Cristo ñibeimo raise omoi itatajallena, nagarui Cristo jitaillacinona finocana omoi jai.

¹⁷ Ie jira ebe isoi jaiñeno; iadedi Cristo jitaillacinona uiñocana omoi jai.

18 Iocire omoi iacania, naiemona diga marañede rafue comuilla jira, jifañeno; iadedi omoi comeciaina naimie namatallena, Jusiñamui Joreño anamo raise omoi mai i. Iemei naiemona diga mare rafue comuite. Iocire jia iitomoi.

19 Danamo omoi ofia, nana omoi comeciaina diga isoide ruana iocire ro-rona. Omoi ruamona jiaie creyentia comeciaina ocuñota. Cai Namamo omoi ruamona, omoi fillamona, omoi taillamona, naimiena iobitaitomoi.

20 Cai Nama Jesucristomo omoi duillamona, nie isoide rafue omoimo ia, cai Moo Jusiñamuimo iobillacinona jaca fecá.

Cristomo jai cai duilla jira, cai comini diga marena iacadica

21 Cristo anamo omoi illa jira, jiaie creyente baifemo omoi faiacinomo omoi comeciaina facañeno; iadedi conina nagamaina cano.

22-23 Iniredinañu, omoimo rafuena lloiacadicue. Cai Nama Cristomo omoi jainaiilla jira, naimie jitailla jira, omoi iniñia anamo raise omoi i. Naimaci uaina raise ñno. Cristo nana creyentia afemo illamona, naimacina naimie sedaja isoi, naga ini ie ai afemo illamona naiñia sedaja. Cristodi nana creyentia imaci jeacinomona jillotajamona, naimie anamo itimaci.

24 Cristo anamo nana creyentia illa isoi, naiñiañu iniñia uaina jaca ñnua.

25 Airedino, omoimo jia lloiticue. Nana creyentia Cristo isiruilla isoi, omoi aina isirui. Nana caina naimie isiruillamona, naimie jitailla jira, cai facaina naimie fiodaite. Ie isoi omoi aina omoi isirui.

26 Nana creyentia marena illena naimie fiodaite. Jusiñamui jitailla isoi, caina marebicaitate. Cristo fiodailla jira, Cristo jai lloga rafuena cai ñnuamona, cai jeacinomona jai jillobidica.

27 Fiodaite, nana cai creyentia comecia marena illena. Cai comecia jeaninana jitaide. Cristo abido bille facaisemo, Jusiñamui jitailla isoi cai marenana jitaide.

28 Naimie abi naimie isiruilla isoi, naga ini ie aina isiruilla. Iaimaia daajena jira, ie aina isiruitimiedi ie abina jia isiruite.

29 Jaca bu ie abina enoñede; iadedi ie abina sedade.

30 Naimiemo nana cai creyentia duilla jira, Cristo caina isiruillamona, caina sedade. Ie isoi nagamie ie aina isiruilla.

31 Bie jai lloga uaimona iena uñotica. Moisés micori Jusiñamui lluaña jai cuela: "Ie aina ollena, ñma ie mooná, ie ei diga fañonocáite. Iemei dajena itiaimaia".

32 Naie llofuacinomona jia rafuena fueoitica. Cristona ñaiticue. Creyentia ñaiticue. Naimiemo cai duillamona, daajena itica.

33 Dane lloiticue: Ie abina isiruilla isoi nagamie ie aina isiruilla. Nagañiaño ie ini uai uaitañeno ñnua.

6

1 Uruia, omoimo rafuena lloiacadicue. Cai Nama jitailla jira, omoi eiñia uaina ñno. Omoi mootia uaina jia ñno. Jusiñamuimona marenana jira, iaimaia uaina ñno.

2-3 Moisés micori Jusiñamui lloga uaina jai cuela: "O moo uai ñno. O ei uai ñno. Marena o illena, raire o fiodañellena, iaimaia o isiruillamona, iaimaia uaina ñno" cuela. Jusiñamui diga lletarafuena llote; iadedi bie nanoca rafuena llote.

4 Mootia, omoimo lloiticue. Omoi uruina jama icañeno; iadedi naimacina cai Namana naimaci uñollena llofue. Naimaci ñnoiacañena, abina naimaci uñollena, naimacina isiruillamona, naimacina duere ñno.

⁵ Patrón anamo itino, omoimo lloiticue. Omoi patrones ocuica uaina ñno. Omoi maijiana naimaci ocuia, naimacina iobitallena, jaciruiocaida raise maiji. Omoi comeciaymona naimaci jitailla rana maiji. Cristo iedena, naimaci ocuica uaina ñno.

⁶ Omoimo naimaci eruaia, naimacina iobitallena, marena maiji; iadedi omoimo naimaci eruaiañenia, naimacina iobitallena, nia marena maiji. Naimacina iobitallena maiji; iadedi Cristomo omoi duilla jira, Jusiñamui jitailla jira, omoi comeciañ maiji raillamona, marena omoi maiji.

⁷ Patrón facaina maijiacinomo daní comecina facañeno; iadedi iocire maiji, cañ Nama facaina omoi maijídómoídena.

⁸ Biena uiñoticañ: Marena bu maijia, cañ Nama Cristomona ibana ico feiñoite. Patrón anamo itino iena feiñoitimaci. Patrón anamo iñedino iena jiañ feiñoitimaci.

⁹ Patrones, omoimo lloiticue. Omoi Nama Cristo monamona omoimo eruailla jira, Cristo monamona naimacimo jiañ eruailla jira, omoi anamo itinona marena fino. Naimacina riire ocuiñeno. Naimacina jeare finoñeno. Cristo nana naimie cominimo daje isoi comecina lloide. Ie jira omoi anamo itinona marena fino.

Cristomo jai cañ duilla jira, naimie cañ comeciayna ocuiñotaite

¹⁰ Ie muidona nia lloiticue. Cañ Namamo omoi duilla jira, naimiedi omoi canocabillamona, omoi comeciayna ocuiñotacana omoi jai.

¹¹⁻¹² Ero, Taife caina ramo jifueoicaida faite. Caina anafeditaiacade. Naimie isoidino caina jiañ anafeditaiacadimaci. Naimacidi aillosie. Naimaci anamo nana Jusiñamuiña ñnoñedino jai itimaci. Jitiredinomo naimaci illanona, Jusiñamui dibeimo iñedimaci. Beno eniruelmo itimaci. Jusiñamui illanomo duiñedimaci. Cominina ñaiñedicue. Taifena, Janabana, Dofina, jananiaina, Dusisiñona ñaiticue. Naimaci isoide joreñuaina ñaiticue. Cañ dibeimo iñedimaci. Naimacimona abina omoi rairui.

¹³ Jobaime illa facaiseconi, soldaduñ imaci ra diga imaci abiaina riidotimaci. Cinturón jitadimaci. Lloemamona finoca ra jogobemo jitadimaci. Zapatona jitadimaci. Uico riidollena, naimaci uico riidua rana llinotimaci. Hfogi icona jitadimaci. Lloebina llinotimaci. Ie isoide.

¹⁴ Cristomo omoi comeciañ facajanona, uanaicinona jaca llono. Jusiñamui jitailla isoi, marecinona finocana omoi jai.

¹⁵ Cristo rafuemona omoi comeciañ uri itatajamona, iena meiruiñeno llocana uiño.

¹⁶ Taifemona nana jearede rafuedi comuide. Naimiedi ramo faiacana jai jaide. Cristona omoi ñnuamona, Taife ramo faiacinona jamai.

¹⁷ Jusiñamui caina jai jilloitajana jai uiñotomoi. Iena omoi uiñuamona, Taife ramo faiacinona ñnoñeno. Taifena anafenollena, Jusiñamui Joreñodo Jusiñamui uaimona fueo.

¹⁸ Jusiñamui Joreño omoína canuamona, Jusiñamui diga ñaicabi. Taife ramo omoimo faia, iena omoi ñnoñellena, Jusiñamui omoína canoite. Iese abina omoi rairuia, Taifena anafeditaitomoi. Taife ramo faiacino naimaci ñnoñellena, nana jiañ creyentiañ facaina jiañ jicabi.

¹⁹ Cue facaina jiañ omoi jii. Marefodo nana Cristo ie rafuena cue lluna omoi jii. Cristo nana cominina jilloitaiacanana nia lloiacadicue.

²⁰ Naie rafue cue llollena, Cristo cuena oretate. Naie rafuena cue llua muidona, cárcelmo iticue. Cue jitailla diese iena marefodo cue lluna mai omoi jii.

21-22 Tíquico omoi dine oretaiticue. Naimiedi cue isiruiga ama. Naimiedi ñnogamie. Cristo rafue facaina cuena canocabide. Omoimo cue illana lloite. Cue finoca rafuena lloite. Naimiemona cue rafuena fidiitomoí. Iena cacajamona omoi comeciaí ocuiñoitomoí.

23 Cai Moo Jusiñamui, caí Nama Jesucristo diga, omoína uri itatajamona, Cristona jai omoi ñnuamona, coniniri uri icana jaillana jitaídícue. Iaimaiaí omoína isiruillamona, iaimaiaína omoi ñnuamona, nana jiaíe creyentiaína isiruicana omoi jai.

24 Cai Nama Jesucristona omoi eo isiruilla jira, Jusiñamuidi omoína duenail-lasa. Mai. Pablodícue.

FILIPOMO ITE CRISTONA HNOTINOMO PABLO ORETAGA RABE

Uaiduacino

1-2 Filipomo ite creyentiai, Jesucristomo jai omoi duillamona, bie carta omoi dine oredicue. Pablodicue. Timoteo cue diga ite. Naimie cominina coco illamona, Jesucristo dibeimo maijicabidicoco. Omoimo coco uaina oredicoco. Omoi creyentiai illaicominimo coco uaina ua oredicoco. ¿Nigacino? ¿Nie isoidomo? Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Iaimaiaia omoina uri jai itatate. Iena omoi uiñocana mai omoi jai.

Jusiñamuimo iobillacino fecade

3 Naga icaiño omoina cue comecia, Cristo rafuedo omoi jailla jira, Jusiñamuimo iobillacinona fecadicue.

4 Naga icaiño Jusiñamui diga cue ñaia, omoi facaina caimare juidicue,

5 Jesucristo rafuena cue lluana cuena omoi canua jira. Nano bie rafuena omoi cacajamona, cuena canodomo. Cuena nia canodomo.

6 Jusiñamuidi omoi comeciaina jai marena itataja facaiseconi mare rafuena tainede. Omoi comeciaino mare rafue illicinona tainede. Cristo Jesús dane billiriuimo Jusiñamui bie rafuena fuidoite. Iese fuidollemo ocuridicue.

7 Omoimo iese cue comecina cue facajia, omoina cue isiruilla jira, cuemona mare. Cárcelmo cue illamona, Jesucristo rafuena cue riduano, Jesucristo rafuedi uanaicino cue lluno, Jusiñamui cuena canocabide. Iemona naimie caina duenaillana jai uiñotica.

8 Cuena omoina Cristo Jesús isiruitajamona, nana omoina isiruiticue. Jusiñamuidi uanaicinona cue lluna uiñote.

9 Jiaie cominina eo isi-isirucana omoi jaillena, Jusiñamuina raise omoi uiñollena, nie isoide rafue omoimo ia, abina raise omoi uiñollena, Jusiñamuimo jicabidicue.

10 Iese omoina jitaidicue. Mare rafuedo omoi jaiacanana jitaidicue. Jiairuido Cristo abido biite. Ie jira omoi comeciai jeanillena jitaidicue, Jusiñamui jitailla isoi omoi comeciai marena illena.

11 Jusiñamui jitailla isoi omoi illamona, mare rafuena jaca omoi finuana jitaidicue. Jesucristona omoi inuamona, naimie omoina iena finotarede. Iese omoi finocana omoi jaia, Jusiñamuina eo iobitaitomo.

Cárcelmo Pablo illamona, diga comini Jesucristo rafuena cacadimaci

12 Cue amatiai, bie rafuena omoi uiñuana jitaidicue. Cárcelmo cue illamona, diga comini Jesucristo rafuena cacadimaci.

13 Cai illaima jofomo itino cacadimaci. Nana bene itino jiaie cacadimaci. Jesucristo rafuena cue llua jira, cárcelmo iticue. Iena jai uiñotimaci.

14 Cárcelmo iticue; ia jaciruiño Cristo rafuena nia lloticue. Iemona diga creyentiai naimaci comeciaina ocuiñuana, Jusiñamui uaina jaciruiño marefodo birui cue isoi llotimaci. Navui jaciruitimaci.

15 Cuena uradoillamona, cue afemo iacanamona, damierie Cristo rafuena llofuetimaci. Jiaie llofueraini marecinona finuacanamona llofuetimaci.

16 Cuena naimaci isiruilla jira, llofuetimaci. Cristo rafuena cue riduamona, cárcelmo cue illana uiñotimaci.

¹⁷ Cue afemo iacadino mare comeciaimona llofueñedimaci. Iemona cuena duere finoacadimaci.

¹⁸ Iese itimaci; iadedi uradoillamona naimaci llofua, marecinona finucanamonona naimaci llofua, cuemona damamei iesede. Cristo rafuena llocana jaidimaci. Iena jai iobidicue. Nia iobiticue.

¹⁹ Cueri Jusiñamuimo omoi jiano, Jesucristo Joreño cuena canuano, nana cuemo ite rafuemonona jilloiticue. Iena cue uñuamona, nia iobiticue. Jesucristo Joreño ie Moo diga daje.

²⁰ Cue finolle rafuemonona cue meiruiñellena eo jitaidicue. Jaiie cue finocabilla isoi, Cristona marefodo birui iobitaiacadicue. Cue nia fioldaiñenia, naimiēna iobitaiacadicue. Cue fioldaillemonona naimiēna jiai iobitaiacadicue. Iemona jiaiie creyentiaidi Jusiñamuimo iobillacinona fecaitimaci.

²¹ Nia cue fioldaiñenia, Cristo rafuena nia lloiticue. Mare; iadedi cue fioldaia, naimie dine cue illena jiai eo mare.

²² Nia cue fioldaiñenia, diga cominimo Cristo rafuena nia lloiticue. Ie jira nie isoide cue illana cue comeci niese rainide.

²³ Nia raise uñofñedicue. Jiaicaiño fioldaiacaiñedicue. Jiaicaiño fioldaia-cadicue. Cue comeci Cristo dine jaiacade. Nainomo cue illena cuemona eo mare;

²⁴ Iadedi omoīna cue canollena, nia fioldaiacaiñedicue. Cue nia fioldaiñenia, omoīna nia canoacadicue.

²⁵ Cue comecina jai facajano, raite: “Nia fioldaiñeiticue. Omoi diga nia cue illana uñofñeticue”. Cristona omoi innotacana omoi jaillana jitaidicue. Omoi innuamona, caimare omoi illana jiai jitaidicue.

²⁶ Iemei omoi dine dane cue illa jira, cueri Cristomo iobillacinona eo fecaitomoi.

²⁷ Cue fioldaia, cue fioldaiñenia, Cristo ie mare rafuedo omoi jai. Omoīna cue cioia, omoīna cue cioiñenia, mare rafuena omoi finuana fidiacadicue. Cristo rafuena inocana omoi jaillana, omoi comeciai daje isoi lloillana, Cristo rafuena omoi riuduana fidiacadicue.

²⁸ Omoi dibeimo iñedinona omoi jaciruiñenana fidiacadicue. Iese omoi ia, Jusiñamuidi omoi dibeimo iñedino faifillana uñofñotaite; iadedi naimiedi omoīna omoi jilluana uñofñotaite. Naimie diga omoi jaca illena, omoīna jai jillotate.

²⁹ Jusiñamui Cristona omoi inollena omoīna fetode; iadedi Cristori omoi duere sefuillena omoīna jiai fetode.

³⁰ Omoi nairaimo cue nano illa facaise Cristona inofñedinomona duere sefuidicue. Iena ciodomoi. Cárcelmo birui cue illamona, naimacimona iese nia birui duere sefuidicue. Iena birui fididomoi. Naimacimona cue isoi birui jiai duere sefuidomoi.

2

Jiaiie creyentiai diga raise omoi illacino

¹ Jiaiie creyentiai diga omoi marena illena, dajerie rafuena lloiacadicue. Cristomo omoi duilla jira, coninina omoi comeciai ocuiñotajamona, Cristo omoīna isiruillana omoi uñuamona, Jusiñamui Joreño nana omoīna nabaitajamona, coninina omoi comeciai eo duenaillacino illamona,

² cue comecina caimare itata. Omoi comeciai daje isoi lloillamona, coninina omoi isiruillamona, daje uaido omoi comeciai lloillamona, cue comecina caimare itata.

³ Jaca buena finoñeno, jiaimie afemo jamai omoi illena. Abina ieduumona buena finoñeno. Abina iedoñeno jiaimacimo comeciaina faca: “Naimaci cue baifemo faite”.

4 Omoi abimo ite rafuemo omoi comeciaina faca; iadedi jiaimaci abimo ite rafuemo comeciaina jiai faca.

5 Cristo Jesús illa isoi omoi illa. Ie rafuemo comecina janore facade; iadedi naimacina canollena, jiaie cominimo ite rafuemo naimie comecina eo facade.

6 Naimiedi jaca Jusiñamui; iadedi naimiedi Jusiñamui diga danomo jaca illana jitañede. Naimie comecina iemo facañede;

7 iadedi iena fañonocaida, ie Moo ocuica rafuena finollena, iimana naimie jaide.

8 Jamai bue isoidimiena jaide; iadedi ie Moo uaina ñnote. Ie Moo jitailla jira, fiodaite. Maraiñede rafue finodimie isoi, cruzmo fiodaite.

9 Ie jira, naimie iobitallena, Jusiñamui naimie ecimo naimiena abido ote. Nana jiaie mameci baifemo faite mamecina jitate.

10 Jesúsna nana comini sedallena, naimiemo iobillacinona naimaci fecalena, Jusiñamui naimiena iese iobitate. Jusiñamui jaienisa naimiemo iobillacinona fecaitimaci. Nana comini naimiemo iena fecaitimaci. Fiodaitino jillobillamona, naimiemo jiai fecaitimaci.

11 Nana lloitimaci: “Jesucristodi cai Nama”. Iese naimaci llua jira, cai Moo Jusiñamuina iobitaitimaci.

Maraiñedino comeciaina lligaiñotomoi

12 Cue isiruiga amataidomoi. Ie Moona Jesucristo ñnua jira, cue llua nia ñnocana omoi jai. Jaie omoi diga cue ia, Cristo rafuena raise ñnotomoi. Birui omoi diga ññedicue; iadedi Jusiñamuina omoi ñnua jira, naimie jitailla rafuena jaciruoicaida, finocana omoi jai.

13 Ie jitailla rafuena omoi finollena, Jusiñamui omoi comeciaina birui marena itatate. Naimie omoiina iena finotaiacade. Naimie mare jitaillacinomona, omoiina iena finotaiate.

14 Nana omoi finolle rafuemo abi jafueoicaiñeno fino. Uai uaitañeno fino,

15 jiaie comini omoiñi ñai raillanona, Jusiñamui uruiaina omoi illa jira, omoi comeciaini jeanidemona marena omoi i. Maraiñede comini motomo itomoi. Naimaci comeciaini jearede. Naimaci comeciaina lligaiñotomoi, naimacimo ite jeacinona uññotallena.

16 Jesucristo rafuena llocana uitomoi. Iena naimaci ñnuamona, bie rafue Jusiñamui dine cominina jaca itatate. Cristo dane billirui omoiñi cue iobiacana jira, omoi dine: “Tainona jaie lloticue” cue raillano, Jesucristo rafuena llocana nia omoi jai.

17 Jusiñamuina omoi ñnua jira, naimiemo ailluena ucubena caidiñeno fecadomoi. Ie baifemona cue fiodaillana Jusiñamui jiai jitaia, iobiticue. Omoi diga jiai caimataiticue.

18 Ie muidona caimare iitomoi. Cue diga caimataitomoi.

Pablo Timoteona orede

19 Cai Nama Jesús jitaia, omoi dine Timoteona raire oretaiacadicue. Cue dine abido naimie bia, omoi rafuena cue fidiano jiai iobiticue.

20 Cue dine jiaño naimie isoi ññede. Dama naimie omoi ite rafuemo comecina facade.

21 Jiaño dani naimacimo ite rafuemo comeciaina facadimaci. Jesucristo rafuemo comeciaina facañedimaci.

22 Timoteodi mareuidimiena uññotomoi. Cue jito isoide diga, Cristo rafuena lloticoco.

²³ Cárcelmo cue illa rafuedi nia fuiñede. Iena cue uiñollemona, naimie omoi dine raire oretaiacadieue.

²⁴ Cárcelmona cue jino jaillena cai Nama jitaia, omoi dine jiai raire jaia-cadicue.

Pablo Epafroditona abido orede

²⁵ Epafroditodi cue ama isoide. Danomo Cristo rafuena lloticoco. Danomo Cristo rafuena riidotico. Naimiena oredomoi, cuena canollena. Naimiena omoi dine abido oretaiacadieue,

²⁶ omoi dine naimie illemo naimie comecina facaja jira. Naimie navui duillana omoi fidia jira, naimie uri iñede.

²⁷ Navui niadedi fodiacaanamona jillode, Jusiñamui naimiena duenailla jira. Naimie fodiaillamona, eo cue duere sefuiñellena, Jusiñamui cuena jiai duenaite.

²⁸ Ie jira Epafroditona eo raire oretaiacadieue, naimiena omoi ciuanona omoi iobillena. Iemei jiai uri iiticue.

²⁹ Cai Nama mamecido naimiena eo caimare feiño. Jiaie naimie isoidinona omoi dine ia, naimacina iobita.

³⁰ Cristo facaina navui naimie llofuiamona, omoi facaina cuena canollena, niadedi fodaite. Omoi facaina naimie cuena canuano, cue dine omoi iñena jira, cue muidona niadedi naimie abina faifitate.

3

Moisés micori llogacinuaido jaidinomona abina rairui

¹ Cue amatiai, omoimo nia lloiticue. Cai Namamo omoi duilla muidona, iobi. Omoi bie rafuena dane cue cueia, cuemona sefuinide. Iena dane omoi cacajamona, omoina canoite.

² Jearede rafue finode cominimona abina rairui. Jiconiai isoidimaci. Jillobillena abi diana llofuetimaci; iadedi cuemonadedi jamai ebena tuquica isoidimaci. Naimaci abiaina detatatimaci; iadedi naimaci comeciai nia raise finoñedimaci.

³ Cai abiaina detatajamona, cai comeciai raise finoñede. Cai comeciai raise finuamona, Jusiñamui Joreñodi caina Jusiñamuina raise sedatate. Cristo Jesúri iobidicai. Cai jillobillena, cai abiaina detatañedicai.

⁴ Buena cai finuamona cai illamona jillobidicaidena, cue jilluana raise uiñoticue. Cue cominimona jamai bue isoñedicue.

⁵ Iena ja ñaiticue. Cue jeiciamona ocho digarui illamona, cue abina degacue. Cue eirue jitodi Israel micori. Benjamín isie imiedicue. Cue cominidi judiaui imacina jira, cue uruenamona judiaui uaido ñaiticue. Fariseo cue imiena jira, Moisés micori llogacinuaido fainonocaiñeno iedo eo jaidicue.

⁶ Iena eo cue jitailla jira, Cristona ñnotinona duere finodicue. Nana Moisés micori llogacinuaido eo raise jaidicue. Iena raise finodicue.

⁷ Iese jaie iticue. Cue comeci iena: “Mare” raite; iadedi Cristona jai cue ñnua jira, birui nana bie rafuedi cuemona ieñedicuinai. Naie isoide rafue cuemo illamona, cue jeacinomona jilloñedicue.

⁸ Dane lloticue: Cue Nama Cristo Jesúsna cue uiñoiacana jira, jiaie rafue cuemona ieñedicino. Naimiena cue uiñuacínodi nana jiaie rafue baifemo faite. Jeacuai isoi jai marañena jira, naimie muidona cue jaie illacinona jai sofecadicue. Iena sofeticue, Cristo dibeimo raise cue illena,

⁹ naimiemo raise cue duillena. Moisés micori llogacinuaido cue jillamona marebicaiñedicue; iadedi Cristona cue ñnuamona marebicaidicue. Cristona cue ñnua muidona, Jusiñamui cuena jai marebicaitate.

¹⁰ Cristona raise uifoiacadicue. Naimie fiodaite; ia iemona jillode. Naiemona cue começi marena illena, naimiena jillotate uaina uifoiacadicue. Naimie rafuena cue llumona, naimie isoi duere sefuiticue. Iemona nibai fiodaiticue.

¹¹ Cue fiodaille mei, fiodaillamona naimie isoi cue jilloillemo ocuridicue. Ie jira naimiena uifocana jaiacadicue.

Pablo jitaillacino

¹² Jusiñamui jitailla isoi, nia raise marebicaiñedicue. Nia fiebidicue; iadedi nia jai jaicaidicue, iena illena. Iena cue illena, Cristo Jesús cuena jaie uaidote.

¹³ Cue amatiai, iena nia iñedicue; iadedi jaie cue finoca rafuemo começina fañedicue; iadedi cuemo nia suiñede rafuemo birui eo ocuridicue.

¹⁴ Cue risaillinomo iocire jaidicue, ibana cue feiñollena. Ieri Cristo Jesúsdo Jusiñamui cuena uaidote, monamo cue illena.

¹⁵ Caimona Cristo rafuena raise abina uifocaidino, bie rafue diga cai começiai lloicana mai cai jailli. Dajerie jiaiforie começina lloia, Jusiñamui naimacina unaiçinona raise uifotaitie;

¹⁶ iadedi caimo jai ite uifucinodo mai cai jailli.

Pablo illa isoi cai illa

¹⁷ Cue amatiai, Cristona cue ñnua isoi, naimie rafuedo cue jailla isoi, nana omoi jiai jai. Cai illa isoidinomo omoi eruai, naimaci isoi omoi illena.

¹⁸ Jaie omoimo lluidicue. Cue sunaillamona dane lloiticue. Ailluena comini Cristo fiodailla rafuena birui jitaifñedimaci.

¹⁹ Ja muidomo faifitimaci. Naimaci Jusiñamuidi imaci guille, dan guille ramo naimaci começiai facaja jira. Jearede rafue finuamona, meiruiñeno naie rafueri iobidimaci. Naimaci ecimo ite ramo começiaina facadimaci. Naimaci isoi cai iñena.

²⁰ Monamo ite Jusiñamuimo cai jainaiaila jira, monamona cai Jilloitaraima abido dane billemo ocuridicai. Cai Nama Jesucristodi cai Jilloitaraima.

²¹ Naimie bia, cai fiodaille abina meidoite, naimie ebirede abi isoi cai illena. Nana ra naimie anamo itatate uaido caina iese meidoite.

4

¹ Ie jira Cristo rafuena ñnocana nia omoi jai. Cue amatiai, omoina isiruiticue. Omoina cioacadicue. Omoiri iobidicue. Cue llumona Cristona jaie ñnotomoi. Ie rafuedo omoi jailla jira, iobidicue.

² Evodia raillañaiñomo rafuena lloiacadicue. Síntique raillañaiñomo jiai lloiacadicue. Cai Namamo iaiñuai duilla jira, iaiñuai começi daje isoi lloillana jitaidicue. Coniño diga icirillana jitaifñedicue.

³ Cue mare nabai, omo jicanoticue, iaiñuaina canollena, coniño diga iaiñuai dane marena ñaillena. Cristo rafuena cue diga llotiaiañuai. Clemente diga llotiaiañuai. Cue diga llofueuidino diga llotiaiañuai. Monamo ite rabenicomo nana naimaci mameçiai jai cueda. Jusiñamui diga monamo jaca iite comini mameçiai diese cueda.

Iobillacino, uri illacino diga

⁴ Cai Namamo omoi duilla jira, jaca iobi. Dane lloiticue: Iobi.

⁵ Omoi riininana nana comini uifucana jitaidicue. Cai Nama dane abido billirui iairei ite.

⁶ Ie jira buemo omoi começiaina facajanona, jaca llicidaiñeno. Naga omoi jitaillacino Jusiñamuimo llono. Naimiemo jica. Naimiemo omoi jiaia, naimiemo iobillacinona jiai feca.

7 Iemei Jusiñamui omoi comeciaina uri itataite. Omoi comeciaí facajacino baifemo omoína uri itataite. Cristo Jesúsna omoi ñnuano, omoi comeciaina enoite.

8 Cue amataí, ie muidomo daje rafuena nia lloiticue. Uanaicinomo comeciaina faca. ñogafuemo comeciaina faca. Mare rafuemo comeciaina faca. Ebirede jeanide rafuemo comeciaina faca. Iobillafuemo comeciaina faca. Bie isoide mare rafue ia, iemo comeciaina faca. Nana bie isoide rafuemo comeciaina faca.

9 Nana cuemona omoi fueoga rafuedo omoi jai. Nana cuemona omoi feiñoga rafuedo omoi jai. Nana cuemona omoi cacaja rafuedo omoi jai. Nana cue finoca rafuena omoi cúa rafuedo omoi jai. Iemei omoi comeciaina uri itatajanona, Jusiñamui omoi diga iite.

Filipomo ite comini Pablona eo canodimaci

10 Cai Namari iobidicue, diga irui illamona dane cuena omoi comecia jira.

11 Cuemo comeciaina facadomoi; iadedi bu jaca binide, ucubena cue dine atillena. Bumo cue jitaillacinona lloñedicue. Janore ra cuemo ia, ailluena ra cuemo ia, caimare jai iticue. Cuemo ite ra diga caimare illana jai uiñoticue.

12 Duere cue illana uiñoticue. Duenino cue illana jiaí uiñoticue. Nie isoí cue ia, uri cue illana jai uiñoticue. Cue monia, cue aimetaia, janore ra cuemo ia, ailluena ra cuemo ia, jaca uri iticue.

13 Nie isoide rafue cuemo ia, Cristo cue comecina ocuiñotaja jira, naga rafuena finocana jaiticue.

14 Cue duere sefuillamo cuena omoi duenailamona, cuena omoi canua jira, cuemona mare.

15 Omoimo Cristo rafuena nano cue llamona, cuena canodomoi. Macedoniamona cue jailla mei, jiaíe creyentiaí cuena canoñedimaci. Dani omoi cuena canodomoi. Iena uiñotomoi.

16 Tesalónicamo nia cue ia, diga icaiño ucube cuemo oredomoi;

17 iadedi omoi ucubena ñicidoñedicue; iadedi cuena omoi canuamona, Jusiñamuimona ibana omoi feiñuana jitaidicue.

18 Nana cue jitaille rana jai feiñoticue. Ailluena cuemo ite. Epafrodito-mona cuemo omoi oretaga rana feiñoticue. Jusiñamuimo fecadomoi isoide. Jusiñamui dibeimo cue maijia jira, mare rana finodomoi. Ie jira Jusiñamui iena gaide, caimare soride rana cai gaia isoí. Naimie iena jiaí feiñote.

19 Naimiemo ailluena ite ramona cue Jusiñamui nana omoi jitaille rana fecaita, Cristo Jesúsno cai duilla jira.

20 Cai Moo Jusiñamuimo iobillacino jaca cai fecacabillasa. Iena jitaidicue.

Fuiduacino

21 Cristo Jesús mamecido cue facaina nana creyentiaimo cue uaina lloño. Cue diga amataí imaci uaina jiaí oredimaci.

22 Nana benomo ite creyentiaí imaci uaina oredimaci. Cai illaima César jofomo maijidino imaci uaina ua oredimaci.

23 Cai Nama Jesucristo omoi comeciaina jaca caimare itatajana jitaidicue. Mai. Pablocue.

COLOSAMO ITE CRISTONA HNOTINOMO PABLO ORETAGA RABE

Colosamo ite creyentiaimo Pablo carta oredē

¹⁻² Colosas railla nairaimo ite creyentia, Pablodicue. ¿Nie isoidomoi? Bie carta omoi dine oredicue. Timoteo cue diga ite. Coco uaina oredicoco. Cristomo naimie jia i duilla jira, naimiedi cai amana eruai de. Jusiñamui jitailla jira, ie rafue llo llenna, Jesucristo oretagamiedicue. Naimiemo jai duidomoi. Naimiena raise inocana jaidomoi.

Naimaci facaina Pablo jide

³ Cai Nama Jesucristo Moodi Jusiñamui. Omoi facaina Jusiñamuimo coco jia, naimiemo iobillacinona jaca fecadicoco.

⁴ Jesucristona nia omoi inuana coco fida jira, nana creyentia ina nia omoi isiruillana coco fida jira, iobillacinona jaca fecadicoco.

⁵ Jusiñamui dine ico omoi illemo omoi ocurilla jira, iese icana jaidomoi. Jesucristo rafuena nano omoi cacajamona, Jusiñamui dine illemo ocuridomoi. Omoi jai cacaja rafuedi uanaicino.

⁶ Diga illanomo, diga comi iena jia jai cacadimaci. Iena inuamona Cristo dibeimo naimaci comeci jai meidoga. Iena inuamona marecinodo jai jaidimaci. Ie isoidomoi. Jusiñamui omoi na duenaillana jai uifotomoi. Uanaicinona omoi raise uifumona, iedo jaidomoi. Ie marecinona finocana jaidomoi.

⁷ Epafra llumona naie rafuena cacadomoi. Naimiena isiruiticai. Jesucristo dibeimo coco isoi, naimie jia i llofuiana maijide. Omoi motomo cai inena jira, Cristo dibeimo cai facaina naimie raise maijuide.

⁸ Naimiemono omoi ite rafuena fididicoco. Jusiñamui Joreño omoi na canuamona, jiaie creyentia ina omoi isiruillana fididicoco.

⁹ Ie jirari omoi facaina jaca jidicoco. Omoi rafuena coco fidiamona, Jusiñamuimo omoi finolle rafuena omoi eo raise uifollena jidicoco. Nana naimiemo ite abi uifuacinona omoi eo raise uifuana jitaidicoco.

¹⁰ Cai Nama: "Mare" omoi na raillana jitaidicoco. Naga mare rafue omoi finocana jaillana jitaidicoco. Jusiñamuina raise omoi uifocana jaillana jitaidicoco.

¹¹ Nie isoido ramo omoi jiria, nana naimie siño ebirede uaido naimiedi omoi comeci ina ocuifotajana jitaidicoco. Iocire omoi illana jitaidicoco.

¹² Caina ie comi na naimie jai itataja jira, nana ie comi diga naimie illanomo ico jaca iticai. Ie muidona naimiemo iobillacinona omoi fecacabillasa.

¹³ Jeacino anamo navui cai illa jira, jitre dinomo iticai isoidicai. Jeacino anamona caina Jusiñamui jai jillotajamona, caina ie isiruiga Jito comi na itate.

¹⁴ Naimie Jito muidona cai jeacinomona jillobidicai. Naimiedi cai jeacinona oni dotajamona, naiena jai featate. Naiena ico abido llinofeite.

Cristo muidona Jusiñamui ricailifue anamo inedicai

¹⁵ Jusiñamuina cionidicai; iadedi Cristomona naimiena uifoticai. Jaca bue nia inena, Crsito nano jaca ite.

¹⁶ Cristo uaido Jusiñamui nana rana finode. Monamo ite rana finode. Eniruemo ite rana finode. Cai ciau rana finode. Cai ciofena rana finode.

Cominina finode. Ie jaienisaina finode. Janabana finode. Dofina finode. Taifena finode. Cristo uaido nana rana finode. Cristona iobitallena, nana rana finode.

¹⁷ Nano dofoconi Cristo jaca ite. Naimie uaido naga ra marena icana jaide.

¹⁸ Naimiedi nana creyentiai imaci illaima. Fiodaitinomona naimie nano jillodimienna jira, cai fiodaia, ico jiai jilloiticaí. Naimiedi naga ra baifemo faite. Naimiedi nana comini baifemo jiai faite.

¹⁹ Jusiñamui isoi naimie ite. Jusiñamui jitailla jira, Cristomo nana Jusiñamuimo ite siño uaidi ite.

²⁰ Cristo finoca rafue muidona, Jusiñamuidi nana cominina naimie dibeimo itataiacade. Ua nana naimie dibeimo iñedinona naimie dibeimo itataiacade. Cruzmo Cristo fiodailla jira, Cristo diaillamona, Cristona cai ñnoia, Jusiñamui ricaiillifue anamo jai iñedicaí.

²¹ Jusiñamui dibeimo navui iñedomoi. Naimienna nabaillana jitañedomoi. Omoi comeciainomona naimienna enoidomoi. Maraiñedinona finoidomoi;

²² Iadedi cruzmo naimie abi illanona, nainomo Cristo fiodailla jira, naimiedi naimie dibeimo omoína itatate. Jusiñamuimona mareuidinona omoi illena, omoimo nicino iñellena, Jusiñamui dine ico omoi ia, naimie dibeimo omoína jai itatate.

²³ Naimienna raise ñnocana omoi jaia, danomo abido omoi jaiñenia, iese iitomoi. Cristo rafuena navui cacadomoi. Ie jira Cristo dine omoi illemo ocuridomoi. Diga comini naie rafuena jai cacadimaci. Naie rafuena llocana jaidicue.

Pablo Cristo rafuena llofuecabite

²⁴ Omoimo Cristo rafue cue llua muidona, duere sefuidicue; iadedi iocire nia iticue. Omoi creyentiai facaina Cristo isoi duere sefuidicue.

²⁵ Jusiñamui cuena oretaja jira, naimie rafuena ailluena cominimo eo raise cue llollena, omoi creyentiai facaina llofueticue.

²⁶ Cai jaiagai bie rafuena uiñoñedimaci; iadedi Jusiñamuina ñnotinodi iena birui uiñotimaci.

²⁷ Jusiñamui naimacina iena uiñotade. Naie rafuedi eo ebirede. Juduañedinodomoi; iadedi bie rafue omoimo jai duide. Omoi comeciaino Cristo illana jai uiñoticaí. Ie jira naimie ebirede illanomo ico omoi jaca illemo ocuridomoi.

²⁸ Cristo rafuena llofueticaí. Nana cominimo Cristo dibeimo naimaci iacanana lloticaí. Cristona naimaci eo raise ñnollena, Cristo isoi naimaci marebicaillena, naimaci abi uiñuana lloticaí.

²⁹ Ie jira bie rafuena llofuecabiticue. Nana Cristo cuemo iga uaido eo llofuecabiticue.

2

¹ Omoimo eo comecina facadicue. Iena omoi uiñuana jitaicue. Laodicea railla nairaimo jiai eo comecina facadicue. Diga comini cuena nia cioiñedimaci. Naimacimo jiai eo comecina facadicue.

² Omoi comeciaina ocuiñotallena, iese omoimo comecina facadicue. Dani omoi isiruillamona, ni Jusiñamui rafuena omoi eo raise marena uiñollena, omoimo comecina facadicue. Naie rafuedi Cristona llote.

³ Cristodi nana rafuena uiñote. Eo abina uiñote. Naimie rafue raise cai uiñollena, naimie caina canocabide.

⁴ Naimaci ñaiamona omoína bu jifuei raillanona, buena omoimo lloticue.

⁵ Omoi dine iñedicue; iadedi cue comecidi omoi dine ite. Omoimo cue comecina facadicue. Danomo omoi marena illa jira, Cristona omoi raise iñocana omoi jailla jira, iobidicue.

⁶ Cai Nama Jesucristona omoi iñnuamona, naimie lloga rafue finocana omoi jai.

⁷ Naimie ðibeimo raise icana omoi jai. Naimiena iñocana omoi jai. Omoi lloraini omoina llofuia isoi, naimiena iñocana omoi jai. Jusiñamuimo iobillacino eo fecacana omoi jai.

Cristona cai iñnuano, cai illa rafue

⁸ Jiaie comini naimaci jamai comeciai facajacinomona omoi jifuei railanona, abina omoi rairui. Uanaiñedinomo comeciaina jamai facadimaci. Naimaci einamacimona iena otimaci. Naie rafuedo omoi jaillana jitaiddimaci. Cristo rafuedo omoi jaillana jitaiddimaci.

⁹ Ero, Cristomo nana Jusiñamui uai ite. Eniruemo billanona, Cristo iimana jaide. Naimiemona Jusiñamuina uifoticaí.

¹⁰ Cristomo omoi jainaiailla jira, naimiemona nana omoi jitaillacinona oitomoi. Nana comini naimie anamo itimaci. Nana illaicomini naimie anamo itimaci. Taife naimie anamo ite. Janaba naimie anamo ite.

¹¹ Cristomo omoi duilla jira, omoi comeciaino ite jecino anamona omoina naimie jillotate. Omoi abiaina detatajamona naimie iena finoñede; iadedi omoi comeciaino ite jearede uai meidumona jillobidomoi. Naimie iena finode.

¹² Naimie ðibeimo cai illamona, jai bautizagacai. Naimie ðibeimo cai illamona, cai jecino anamo jai iñedicaí. Cristo fiodaite; iadedi fiodaillamona Jusiñamui naimiena jillotate. Jusiñamuina omoi iñnua jira, jecino anamo jai iñedomoi. Naie anamona Jusiñamui omoina jai jillotate.

¹³ Jecino anamo jai omoi illamona, naimiemona fiodaitino isoidomoi. Omoi marañede jitaillacino anamo jai itomoi. Cristomo omoi jai duillamona, omoi jecinona oni dotajamona, naie anamona Jusiñamui omoina jai jillotate. Cristo ðibeimo omoina itatate.

¹⁴ Moisés micori jai llogacinona jai cai iñnoñena jira, Jusiñamui ricacillifue anamo iticaí; iadedi cruzmo Cristo fiodailla jira, naie llogacino anamo jai iñedicaí. Ie muidona Jusiñamui caimo ibana oñeite.

¹⁵ Cruzmo Cristo fiodailla facaiseconi Taifedi anafefide. Janabadi anafefide. Dofidi anafefide. Dusisiñodi anafefide. Naimie siño rafuena finuamona, Cristo uai naimaci uai baifemo uaillana uifoticaí.

Cristomo ite rafuedo omoi jai

¹⁶ Cristo rafuedo omoi jailla jira, omoi guiga rana bu fimaia, naimaci ñaíamo cacareñeno. Judíuai einamací rafue ðine omoi jaiñenia: “Omoi mareñedomoi” bu raia, naimaci ñaíamo cacareñeno.

¹⁷ Naie isoide rafuedo jai jaidicaí; iadedi iedo birui jaiñedicaí. Cristo rafuedo birui jaidicaí.

¹⁸ Dajerie llofueraini jiaie rafuedo jaidimaci. “Abina iedoñeno” raitimaci. “Jusiñamui jaienisaina seda” raitimaci. Nicairillacinodo jaidimaci. Naimaci isoi omoi jaiñenia: “Marañedomoi” omoina naimaci raia, naimaci ñaíamo cacareñeno. Naimaci illa isoi iñeno. Naimaci llucacino anamo iñeno. Naimaci llucacino omoi jai, omoi jitaillanomo Cristo ðine riñeitomoi. Naimaci comeciaini jearena jira, jamai buena uifoticanano abina iedotimaci.

¹⁹ Cristo rafuedo jaiñedimaci. Cristomo cai duilla jira, naimie caína ocuicabide. Naimiemona cai illena Jusiñamui jitailla isoi, fueoticaí. Jusiñamui

jitailla isoi, naimie dibeimo cai raise illena, naimiena cai raise inollena, naimiemona fueotica. Cristomo cai duilla jira, dan coninina nabaidicai.

²⁰ Cristo fiodaillamona, jiaie rafue anamo jai inedicai. Naimiena inoñedino rafue anamo jai inedicai; iadedi naie rafuedo nia jaidomoi. Damierie llofuera inidi diga rana fimaidimaci.

²¹ “Biena jetañeno. Biena guiñeno” raitimaci.

²² Ero, naie fimaica guille ra ite, cai guillena. Iena cai guilla mei, jai buena inede. Naimaci fimaiduacino cominimona otimaci. Jusiñamuimona oñedimaci.

²³ Naie fimaiduacinodi eo abi uiñuacino isoide. Naiedo bu jaia: “Jusiñamuina eo raise sedadicai” raitimaci. “Abi iedoñedicai. Cai abina isiruiñedicai” raitimaci; iadedi naie isoide llucinodo bu jaia, naimie comecimo ite jeacinomona jilloñede. Naimiedi jeacino finocana nia jaide.

3

¹ Jeacino anamo jaie itomoi. Fiodaillamona Cristo jillua jira, jeacino anamona jai jillobidomoi. Ie jira Cristomo ite rafuedo omoi jai. Monamo Jusiñamui ecimo Cristo ite. Jusiñamui naimieri iobilla jira, naimie ecimo ite.

² Cristomo ite rafuemo omoi comeciaina facacana jai. Bene ite marañede rafuemo omoi comeciaina facañeno.

³ Bene ite marañede rafue anamo jai inedomoi; iadedi Jusiñamui ecimo naimie jai illa jira, Cristomo omoi duilla jira, naimie finoacaga rafuena omoi finollena, omoina naimie canoite.

⁴ Cristomo jai duidomoi. Naimie abido bia, naimie bairenia, naimie cominina omoi illa jira, naimie diga jaca itomoi.

Omoi comeciaino ite jeacinona fañonocai

⁵ Cristomo omoi jai duilla jira, omoi comeciaino ite jeacinona fañonocai. Omoi añede riño diga ineno. Omoi iniñede ima diga ineno. Jeare finoca rafuemo omoi comeciaina facañeno. Omoi marañede jitaillacinodo omoi jaiñeno. Rana nicidoño. Rana omoi nicidoia, Jusiñamuina raise sedañedomoi; iadedi naimie ifomo rana sedadomoi.

⁶ Naie isoidicinona comini finua jira, naimiena naimaci inoñena jira, Jusiñamuidi naimacina duere finoite.

⁷ Naie isoide rafuedo jaie jaidomoi.

⁸ Nana bie isoide rafuedo jaiñeno. Icirñeno. Omoi ecimo itinona jeare finoñeno. Jiaie cominina jeare ñaiñeno. Jearede rafuena ñaiñeno.

⁹ Tainona lloñeno. Omoi comeciaino ite jeacino anamo jaie itomoi. Naicino anamo omoi jai inena jira, naicinodo jaiñeno;

¹⁰ iadedi jiaie rafuedo birui jaidomoi. Bie rafue omoi comeciaina marena itatate. Omoi comeciaino bie rafue itatacana jaillamona, Jusiñamui rafuena uiñocana jaidomoi. Naimie isoi omoi illena, naimie omoi comeciaina iese itatate.

¹¹ Cristo rafuedo birui omoi jailla jira, Jusiñamuimona nana creyentaidomoi; daje isoidomoi. Dajerie judíuai itinodomoi. Dajerie judíuaiñedinodomoi. Dajerie judíuai isoi abina detatatinodomoi. Dajerie abina detañedinodomoi. Dajerie abina uiñotinodomoi. Dajerie abina uiñoñedinodomoi. Dajerie patrón anamo itinodomoi. Dajerie patrón anamo inedinodomoi. Cominimona iese itomoi; iadedi Jusiñamuimona daje isoidomoi. Cristo dibeimo omoi illa jira, jai amatiaina eruaidomoi. Cristomo omoi duillacino jiaie rafue baifemo faite.

¹² Jusiñamui omoína fetode. Omoi comeaiána maretate. Omoína isiruite. Ie jira jiaie cominina duenai. Jiaie cominina cano. Abi iedoñeno. Abi biriñeno. Iciríñeno.

¹³ Dani omoi ibana oñeno; iadedi bu diga omoi icirillafue ia, naiena raise fino. Iena raise finuanona, abido ietañeno. Iena feita. Ie mei naimie diga marena ñaíno. Ero, cai Nama omoi jeacinona oni dotade. Ie muidona omoi ecimo itino diga icirillafue omoi finoia, iena feita.

¹⁴ Coninina omoi isiruicana jai. Isiruillacino nana jiaie lluacino baifemo faite. Coninina omoi isiruia, danomo marena iitomoí.

¹⁵ Jusiñamui omoína fetua jira, Cristomo daajena jai duidomoí. Cristo omoi comeaiána uri itatajamona, nana comini diga uri i. Omoi comeaiá uri illamona, Jusiñamuimo iobillacinona feca.

¹⁶ Cristo rafuena omoi eo iinuana jitaídícue. Naie rafuena coninimo omoi llofue. Iena raise uñollena, coninina omoi cano. Nie isoide Jusiñamui rafuena omoi roia, Jusiñamuimo iobillacinona fecajanona, nana omoi comeaiámona iocire rono. David micori cuela salmos omoi roia, Jusiñamui Joreño omoína birui cuetataga ruana omoi roia, omoi comeaiámona iocire rono.

¹⁷ Buena omoi lloia, buena omoi maijía, cai Namamo omoi comeaiána facajano, iena fino. Cai Nama muidona, cai Moo Jusiñamuimo iobillacinona jiaí feca.

Coniniri creyentiaí illa rafue

¹⁸ Inirediñaiñuái, omoimo rafuena lloiacadícue. Cai Namamo omoi jainaiáilla jira, naimie jitaílla jira, omoi iniñiaí anamo raise omoi i. Naimaci uaina raise iño.

¹⁹ Airedino, omoimo jiaí lloiacadícue. Omoi ainiaína isirui. Naiñaiñuái diga iciricabiñeno. Naiñaiñuáimo riire lloñeno.

²⁰ Uruiaí, omoimo rafuena lloiacadícue. Nana omoi mootiaí uaina iño. Nana omoi eiñiaí uaina iño. Iena omoi iñoia, cai Nama eo iobite.

²¹ Mootiaí, omoi uruiaína jamái icíñeno. Naimacina omoi jamái icía, comeicina facaitimaci: “¿Niese cai mootiaí uaina raise iñoiticaí? Iena eo sefuiruiticaí”. Ie muidona omoi uaina raise iñoñeitimaci.

²² Patrones anamo itino, nana omoi patrones ocuica uaina iño. Omoimo naimaci eruaiñenia, omoi patrones facaina raise maiji. Cai Namana omoi iñua jira, cai Namana raise omoi iobitaiacana jira, omoi patrones facaina raise maiji.

²³ Buena omoi maijía, omoi comeaiámona maiji. Dani comini facaina maijiñedomoí; iadedi cai Nama facaina maijidomoí. Ie jira raise maiji.

²⁴ Naimie jai llua isoi, cai Namamona ibana íco feiñoitomoí. Cai Nama Cristo facaina omoi maijidomoí;

²⁵ iadedi Jusiñamui raise maijiñedinona duere finoite. Jusiñamuimona naga maijidimie ie maijía diese feiñoite.

4

¹ Patrones, omoimo lloiticue. Naimaci omoi anamo illa jira, omoi diga maijidinona raise iba. Naimacina jifueñeno. Omoi Nama monamo illamona, omoimo eruáide. Naimie anamo omoi illa jira, omoi anamo itinona marena raise fino.

² Jusiñamui diga ñaicana jai; iadedi omoi comeaiána facajanona omoi jii. Naimiemo iobillacinona feca.

³ Cristo rafuena llocana cue jaílla jira, cárcelmo birui itícue; iadedi naie rafue nia lloiacadícue. Jusiñamui nana comini Cristo díbeimo jai jitaíllana

lloiacadicue. Ie jira cai facaina omoï jii. Jusiñamuidi comini comeciaina jetajana omoï jii. Naimaci comeciaina Jusiñamui jetajamona, naimacimo naie rafuena lloiacadicue.

⁴ Naimaci iena raise cacaillena, naie rafuena raise lloiacadicue.

⁵ Creyentiañedino motomo omoï ia, marena omoï i. Naimacimo Cristo rafuena llono.

⁶ Bu diga omoï ñaia, caimare ñaino. Nie isoide Cristo rafuena omoïmo bu jicanoia, raise marena fairio.

Damierie ie uaina orede

⁷ Tíquicodi nana cuemo ite rafuena omoïmo lloite. Naimiëna isiruiticai. Naimiedi Cristona eo ñnote. Cristo rafuena eo raise llocabite. Cai Nama facaina cue diga eo maijide.

⁸ Cai illana omoï uñollena, omoï dine naimiëna oredicue. Omoï comeciaina ocuñotaitaite.

⁹ Naimie diga Onésimo jiai oredicue. Naimiedi creyente. Cristo rafuedo raise jaide. Naimiëna jiai isiruiticai. Naimiedi omoï comini imie. Nana bene jai suide rafuena omoïmo lloitiaimaia.

¹⁰ Cárcelmo Aristarco cue diga ite. Omoïmo ie uaina orede. Marcos ie uai jiai orede. Naimiedi Bernabé ama. Omoïmo naimiëna navui lloticue. Omoï dine naimie ria, naimiëna feiño.

¹¹ Jesús ie uai jiai orede. Naimie mameci jiaicidi Justo. Judíuaimona dani naimaci cuena canode. “Naimaci jeacinona naimaci fainonocaillamona, Jusiñamui ie ñibeimo cominina jai jitaide” naimaci llumona, cue comeciina ocuñotadimaci.

¹² Epafraç ie uaina jiai orede. Naimie omoï comini imie. Jesucristo ñibeimo naimie maijide. Jusiñamui diga naimie ñaia, omoï facaina jaca duere jicabide. Jusiñamui rafuedo raise omoï jaillena, ie omoïmo raise itabillena, Jusiñamui jitaillacinona omoï raise finollena, omoï facaina jicabide.

¹³ Omoï facaina naimie eo maijide. Laodiceamo itino facaina eo maijide. Hierápolismo itino facaina jiai eo maijide.

¹⁴ Cai médico Lucas ie uaina jiai orede. Naimiëna isiruiticai. Demas ie uaina jiai orede.

¹⁵ Laodiceamo ite creyentiaïmo cue uaina cue oretajana llono. Ninfasmo cue uaina cue oretajana llono. Naiñaiño jofomo oficabide creyentiaïmo cue uaina cue oretajana llono.

¹⁶ Bie cartana omoï facaja mei, Laodiceamo ite creyentiaïna bie cartana facata. Naimacimo jiaie cartana jiai oredicue. Iena omoï jiai faca.

¹⁷ Arquípmo llono: “Cai Nama fetocamedio. Naimie rafuena llocana raise o jai” llono.

¹⁸ Cue uaina omoïmo oredicue. Dama bie uaina cueticue; iadedi nana bie carta cuemona illana uñotomoi. Cárcelmo cue illana cue facaina feitaño omoï jii. Jusiñamui omoïna duenaioillasa. Mai. Cue cuela rafue jai fuite. Pablodicue.

TESALÓNICAMO ITE CRISTONA HNOTINOMO PABLO NANO ORETAGA RABE

Uaiduacino

¹ Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiai uaina orediaimaiai. Cai Moo Jusiñamuimo, cai Nama Jesucristomo jai jainaiaidomoi. Ie jira iaimaiai omoi duenaillana uifocana omoi jaillana jitaidicai. Iaimaiai omoi uri itatajana omoi uifocana jaillana jiai jitaidicai.

Tesalónicamo ite creyentiai Jusiñamui uaina raise inotimaci

² Jusiñamuimo cai jiaia, naimiemo omoi facaina iobillana jaca fecacabidicai. Omoi facaina jicabidicai.

³ Cai Moo Jusiñamuimo cai jiaia, omoina comeciticai. Jusiñamuina inotomoi. Naimiena isiruitomoi. Ie jira naimie facaina duere maijidomoi. Cai Nama Jesucristo billemo eo ocuridomoi. Iese omoina comeciticai.

⁴ Omoina naimie isiruillamona, Jusiñamui omoina fetuana uifoticaia.

⁵ Jamai cai uaido Cristo rafuena omoina llofueñedicaia; ia siño uaido iena llofueticaia. Jusiñamui Joreño uaido iena llofueticaia. Naie rafuena inuanona llofueticaia. Omoi diga cai jaie ia, nie isoi cai illana raise uifotomoi.

⁶ Cai illa isoi ificaidomoi. Cai Nama illa isoi ificaidomoi. Iemona duere sefuidomoi; ia Jusiñamui Joreño omoina iocire itatajamona, Jusiñamui uaina iocire feifotomoi.

⁷ Ie jira nana Macedoniamoi ite creyentiai omoimona fueotimaci. Nana Acayamo ite creyentiai omoimona jiai fueotimaci.

⁸ Omoimona Macedoniamoi ite comini cai Nama uaina fididimaci. Acayamo ite comini jiai fididimaci. Ailluena nairaiai Jusiñamuina omoi inuana jai fididimaci. Ie jira naimacimo Cristo rafuena omoi inuana jai lloñedicaia.

⁹⁻¹⁰ Omoi dine nano cai ria, caimare caina feifotomoi. Cristo rafuena omoi cacajamona, jiraraina sedajana fainonocaida, cajede nanoca Jusiñamuina jai sedadomoi. Jusiñamui Jito abido billemo birui jiai ocuridomoi. Iese jaiie creyentiai omoina birui ñaicabitimaci. Cristo fiodaillamona Jusiñamui naimiena jaie jillotata. Naimiena cai inuamona, Cristo Jusiñamui ricacillifuemona caina jai jillobitate.

2

Pablo Tesalónicamo llofuia rafue

¹ Cue nabaiñiaia, omoi diga jaie cai ia, tainomoi jaiñedicaia.

² Omoi dine cai nia riñenia, Filipomoi iticai. Nainomoi itinodi caina jeare finodimaci. Iena jai uifotomoi. Caina jeare finodimaci; ia cai comecina Jusiñamui ocuifotajamona, Jusiñamui rafuena omoina llofueticaia. Ailluena comini iena jitaifidimaci; ia iena llofueticaia.

³ Uanaiñedinona jaca llofueñedicaia. Jearedicinona jaca llofueñedicaia. Jifuerillacinona jaca llofueñedicaia;

⁴ Iadedi Jusiñamui uifoganodicaia. Ie jira caina naimie oretajamona, ie rafuena llofueticaia. Cominina iobitallena llofueñedicaia; iadedi Jusiñamuina iobitallena llofueticaia, Jusiñamui cai comecina raise uifua jira.

⁵ Cai llofuiacino diga omoïna bifueñedicaï. Omoïmona ucube ollena, iese llofueñedicaï.

⁶ Cominimona iobillacinona jitañedicaï. Omoïmona jitañedicaï. Jainomona jiaï jitañedicaï; iadedi Cristo oretaganona cai illa jira, cai jitaia, omoïmona iobillacinona jicaredicaï.

⁷ Uruiaïna raise sedarañiño isoi, fecuise omoïna llofueticaï.

⁸ Jusiñamui rafuena omoï raise uifollena, omoïna cai eo isiruillamona, niadedi omoï facaina fiodiacadicaï.

⁹ Omoï motomo cai ucube ollena, jiaie rana maijuiudicaï. Omoïna cai duere fiñoellena, nagarui iese maijuiudicaï. Iena raise uifotomoi. Iese Jusiñamui rafuena omoïna llofueticaï.

¹⁰ Omoï motomo cai illana raise uifotomoi. Jusiñamui jitailla isoi, nainomo iticaï. Marañede rafuena fiñoedicaï. Mare rafuedo jaca jaidicaï. Iena uifotomoi. Jusiñamui iena jiaï uifote.

¹¹ Omoï uruiaï omoï llofua isoi, omoïna llofueticaï. Omoïmo diga icañño Jusiñamui rafuena llofueticaï.

¹² Jusiñamui jitaillacinona omoï finollena, iena llofueuidicaï. Monamo ie cominina sedajanomo omoï jaca illena, naimie omoïna jai fetode. Nainomo ie siño uai anamo jaca iitomoi.

¹³ Jusiñamuimo cai jiaï, omoï facaina iobillacinona fecacabidicaï. Jusiñamui rafuena caimona omoï jaië cacajamona, iena raise feifotomoi. Cominimona cai oga rafue isoi feifotomoi; ia Jusiñamuimona cai oga rafuena feifotomoi. Cai lloga rafue omoï comeciaï iuai meidocana jaide. Ie jira Jusiñamuimo iobillacinona fecacabidicaï.

¹⁴ Judeamo ite creyentiaï isoi duere sefuidomoi. Omoï cominimona duere sefuidomoi. Naimaci judiuaï cominimona duere sefuidimaci.

¹⁵ Judiuaï comini cai Nama Jesúna jaië meinetimaci. Jusiñamui facaina lloraini micoriaïna jiaï jaië meinetimaci. Caina jiaï birui duere finodimaci. Jusiñamuina iobitañedimaci. Jusiñamui rafue dibeimo jiaï ifnedimaci.

¹⁶ Judiuaifnedinomo Cristo rafuena cai llwana jitañedimaci. Jusiñamui judiuaifnedinona jillotajana jitañedimaci. Iese jeacino finocana nia jaidimaci; ia ja muidomo Jusiñamui ricailifue anamo jai itimaci.

Tesalónica comini dine Pablo abido jaiacade

¹⁷ Omoïmona cai billa mei, nigarui illanona, omoïna dane cioacadicaï. Omoïna cioifnedicaï; iadedi omoïmo comecina facadicaï. Omoï dine eo jaiacadicaï.

¹⁸ Ua eo jaiacadicue. Diga icañño jaiacadicaï; ia Taife cai jaillana jitañede.

¹⁹⁻²⁰ Caina omoï jaca iobitaja jira, omoïna cioacadicaï. Jesús abido bia, naie facaise omoïri eo iobiticaï. Iemo ocuiridicaï. Caina iocire itataitomoi. Omoï muidona iobiticaï.

3

¹ Cai comeci jarire illamona, Atenas railla nairaïmo fiebidicoco;

² iadedi Timoteo omoï dine oredicoco. Naimiedi coco ama isoide. Cristo rafuena cai diga Jusiñamui facaina llofuecabite. Cristo rafuena omoï raise ifnotallena, omoï comeciaïna ocuifnotallena, naimiena oretaticoco.

³ Duere sefuillamona bu bie uai sefuiruillana jitañedicaï. Creyentena cai illamona, jaca duere cai sefuillana uifotomoi.

⁴ Omoï motomo jaië cai ia, iena llofueticaï. Omoï birui duere sefuillamona cai llwana raise uifotomoi.

⁵ Cue começi jarire illamona, Cristona omoï ñnuana raise uiñoiacadicue. Omoïna Taiŕe ramo faicabillamona, taiñomo cai maijiana jacinaiticai. Ie jira Timoteona oredicoco.

⁶ Omoïmona Timoteo jai abido billamona, omoïe mare rafuena cocomo lloŕe. Cristona ñnocana jaidomoï naimie lloŕe. Coninina isiruitomoï. Cocona cai mare começitomoï. Omoïna coco cioacana isoi, cocona dane cioacadomoï naimie lloŕe.

⁷ Birui duere sefuidicai; iadedi omoïe rafuena cai cacajano, cai começi marena ite.

⁸ Cristo rafuena ñnocana omoï jaillana jai cai uiñuamona, cai começi marena ite.

⁹ Omoïri eo cai mare jai iticai. Ie jira Jusiñamuimo iobillacinona eo fecaacadicai.

¹⁰ Omoïna dane cai cioillena, naimiemo nagarui juidicai. Naimiena nia omoï raise ñnoñenia, omoïna naimiena raise ñnotaacadicai. Ie jira omoïna cioacadicai.

¹¹ Iese omoï facaina, cai Moo Jusiñamuimo, cai Nama Jesúmo jicabidicai. Omoï dine caina naimie oretajana juidicai.

¹² Cai Nama coninina isiruitacana omoï jaillana jitaïdicai. Caina omoï isiruilla isoi, nana jiañona omoï isiruillana juidicai.

¹³ Omoï começiai ocuiñollena, omoï começiai Jusiñamui jitailla isoi, marena illena juidicai. Nana ie comini diga cai Nama Jesús abido bia, Jusiñamui dine omoï ia, omoï começiai marena illena jitaïdicai. Iese omoï facaina jicabidicai.

4

Naimaci marena illena llofueŕe

¹ Jiaie rafuena lloiacadicue. Cai Nama Jesúmo omoï jai duilla jira, Jusiñamui jitailla isoi omoï illana jitaïdicai. Iese birui itomoï; ia nagarui iese omoï illana jitaïdicai. Ie jira cai lua isoi, omoï jai.

² Cai Nama Jesús jitailla jira, navui iena llofueŕicai.

³ Jusiñamui jitailla isoi omoï marena illena, omoï aiñede riño diga iñeno.

⁴ Nagamiiai riñona ie aina otena, mare; ia maraiñede rafuena finoñeno. Nagamiiai dajena daje riño uana Jusiñamui jitaide. Dañaiño diga iaïmaiai jionaillena jiaï jitaide.

⁵ Naimiena ñnoñedino isoi, omoï ai uana jitaïñede. Naiñaiñuai abina jamai cioillena riñona otimaci.

⁶ Jiaie creyentemo jeacinona finoñeno. Naimie aina jamai aifedoñeno. Naie isoide rafuena bu finoia, cai Nama naimiena duere finoite. Iena navui omoïmo lloticue.

⁷ Jearede rafuena cai finollena, Jusiñamuidi caina fetoñede; iadedi mare rafuena cai finollena caina fetode.

⁸ Bie llofuiacino nie creyente ñnoñenia, cue llofuiacinona jamaide; ia Jusiñamui Joreño naimiemo illamona, Jusiñamui llofuiacinona jiaï jamaide.

⁹ Jiaie creyentiana omoï isiruillana omoïmo eo lloñeiticue. Jusiñamui omoïna coninina isiruillana jai uiñotade.

¹⁰ Nana Macedoniamio ite creyentiana jai isiruitomoï; iade nia isiruicana omoï jai.

¹¹ Uri omoï i. Dani omoïmo ite rafuena omoï uiuicai. Jiaïnomona ucubena jicañeno; ia omoï ucube ollena, omoï onolli diga rairuioicaiñeno omoï maiji.

¹² Ie mei omoï jitailla ra iite. Iemona Cristona ñnoñedino omoïna jiaï mameriñeitimaci.

Jesucristo dane abido billena llote

¹³ Omoï raise uifollena, daje rafuena lloiticue. Omoï creyentiaïmona dajerie jai fiodaitimaci. Jesúna ññoñedinomona bu fiodaia, fiodaillamona jilluamo naimaci ocuiriflana jira, sunaitimaci; iadedi naimaci sunailla isoi, omoï illana jitaifledicue. Fiodaillamona jilluamo jai ocuiridomoi.

¹⁴ Jesús fiodaillamona naimie jilluana ñnoticai. Ie jira Jesús abido billa facaise, jai fiodaite creyentiaïna Jusiñamui jilloitajana jiai jai ñnoticai.

¹⁵ Cai Nama llofuia isoi, bie rafuena lloiticue. Jesús abido bia, jai fiodaite creyentiaï, nia fiodaiflode creyentiaï diga, daacaiño naimie ñine a jaiticai.

¹⁶ Cai Nama Jesús abido bia, Jusiñamui ñinena naimie billanona, caina jidaite. Ie jaienici caina uaidoite. Jusiñamui ie trompeta daacaiño jiai fiite. Jai fiodaitino nano jilloitimaci.

¹⁷ Iemei nia fiodaiflodeñodi como jillodino diga uillie motomo naimiemo dafaifllena, Jesús caina uite. Iemei naimie diga jaca iticai.

¹⁸ Bie llofuiaicino diga conini comeciaina omoï ocuiflino.

5

¹ Bie rafue suilliruina uiflodeñodici. Bie rafuena omoï jai uiflana jira, iena dane eo cueñeiticue.

² Cai Nama abido billana jai uiflodomoi. Fñredimie ñaiona ebena billa isoi, naimie abido biite.

³ “Uri iticai. Marena iticai” Cristona ññoñedino raia, naie facaise naimacimo duere sefuillifue suite. Urue riño jigicomo casilla isoi, ebena suite. Naiemona jilloñeiticue.

⁴ Naie facaise sua, Cristo billena omoï jai uifluamona, fñredimie ñaiona ebena billa isoi, jacinaiñeiticue. Cristona ññoñedino isoi, ifledomoi.

⁵ Uanaicinsona omoï jai uifluamona, Cristo ie cominina jai jaidomoi. Jecino anamo omoï jai iflana jira, Cristona ññoñedino ñibeimo jai ñuiflodomoi.

⁶ Ie jira abina sedacana omoï jai. Abina rairuioicaida omoï jai. Jifaidino isoi ebena omoï jaiñeno.

⁷ Cristona ññoñedino abina sedacana jaiñedimaci. Rairuioicaida ebena jaidimaci.

⁸ Cristo ie cominina jai cai illa jira, ebena cai jaiñena. Imaci abina rñdöllena, soldaduai jogobe icodi ite. Imaci ifogi icodi jiai ite. Ie isoide. Cai comeciaina eenollena, Cristona ñnocana mai cai jailli. Jiaïno isiruicana mai cai jailli. Jusiñamui ñine ico cai illemo ocuiricana mai cai jailli.

⁹ Caina duere finollena, Jusiñamui caina fetoñede; iadedi cai Nama Jesucristo finoca rafue muidona, duere finollemona cai jilloillena, caina fetode.

¹⁰ Cristo cai facaina jai fiodaite. Ie jira birui cai fiodaia, naimie bille facaise nia fiodaiflodeñona cai ie, naimie diga jaca iticai.

¹¹ Ie jira coninina ocuiflodeñodacana omoï jai. Cristo ñibeimo coninina itatacana omoï jai. Iese birui jaidomoi; ia nia iese omoï jai.

Omoï creyentiaïna llofueraïni uaina ñno

¹² Cue amatiaï, jiaie rafuena lloiticue. Omoï creyentiaïna llofueraïni uaina ñno. Cristo jitailla jira, omoï afemo itimaci. Cristo ñibeimo omoïna raise itatallena, omoï facaina llofuetimaci.

¹³ Omoïna naimaci canua jira, naimacina isiruillanona, naimaci uaina raise omoï ñno. Coniniri uri omoï i.

¹⁴ Omoï motomona maijacaiñedinsona imaci maijillesa ocui. Duere sefuillamona jai comeciina ocuiflodeñodina comeciina ocuiflota. Raise ñnollena,

Cristona nia raise #noñedinona jiaí cano. Fecuisse naimacina ui-uillanona, naimacina cano.

¹⁵ Omoína jiaimie duere finoia, ibana oñeno; iadedi naimiemo mare rafuena fino. Nana cominimo mare rafuena fino.

¹⁶ Nie isoide rafue omoimo ia, caimare omoí i.

¹⁷ Jusiñamuimo nagarui jii-jii.

¹⁸ Nie isoide rafue omoimo ia, Jsuiñemui jitailla jira, naimiemo iobil-lacinona feca. Jesucristomona Jusiñamui jitaillacinona jai uiñoticaí.

¹⁹ Jusiñamui Joreñoña jamaiñeno.

²⁰ Jusiñamui Joreño uaido lloraini llofuiana jamaiñeno;

²¹ iadedi Jusiñamui Joreño uaido naimaci llofuiana facaci. Mare rafuedo jaca omoí jai.

²² Nana maraiñede rafuemona eneno oni omoí i. Naie isoide rafuena omoí abimo omoí oñeno.

²³ Te jira Jusiñamuimo omoí facaina jiiitícue. Naimie omoína jai uri itatate. Naimie omoína nagarui marena itatacana jaillana jitaídícue. Iese omoí jaia, cai Nama Jesucristo dane abido bille facaise, naimie jitailla isoi, omoí comeciaí marena iite.

²⁴ Jusiñamuidi #nogamiéna jira, iese omoína finoite.

²⁵ Cue amatiaí, Jusiñamuimo cai facaina omoí jiiicabi.

²⁶ Cue facaido nana creyentiána caimare uaido.

²⁷ Cai Namamo cai duilla jira, naimie jitailla jira, bie cartana nana creyentiái uicomo faca.

²⁸ Cai Nama Jesucristo omoína duenailasa. Mai. Pablodícue.

TESALÓNICAMO ITE CRISTONA HNOTINOMO PABLO IE EMODOMO ORETAGA RABE

Uaiduacino

1-2 Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiaia uaina orediaiaimaia. Cai Moo Jusinamuimo, cai Nama Jesucristomo jai jainaiaidomoi. Ie jira iaimaiaia omoi duenailana uiñocana omoi jaillana jitaiaidicai. Iaimaiaia omoi uri itatajana omoi uiñocana jaillana jiai jitaiaidicai.

Cristo dane abido bia, naimiena inoñedinona duere finoite

3 Jusinamuimo cai jiaia, omoi facaina naimiemo iobillacinona fecacabidicai. Cristona inocana raise jaidomoi. Coniniri isiruicana raise jaidomoi.

4 Ie jira marena omoi illana jiaie creyentiai illanomo llocana uiticai. Duere sefuidomoi; iadedi danomo abido jaiñedomoi. Cristona inocana jaidomoi. Iena llocana uiticai.

5 Jiainomona birui duere sefuidomoi; ia inocana jaidomoi. Iemona Jusinamui omoi facaina illana uiñoticaia. Omoi duere sefuillamona, fueocana jaidomoi. Iemona naimie jitailla isoi, ja muidomo monamo ie cominina sedajanomo iitomoi.

6 Jusinamui omoina duere finodinona ico duere finoite. Omoi facaina ibana oite. Iese naimie finoia, naimiemona mare.

7 Cai Nama Jesús abido bia, duere sefuillamona jilloiticaia. Monamona ie siño jaienisai diga biite. Irai boua isoi ana biitimaci.

8 Jusinamuina inoñedinona diese duere finoitimaci. Cai Nama Jesús rafuena naimiaci inoñena jira, naimacina duere finoitimaci.

9 Inoñena jira, jaca faifitimaci. Jaca legi cacaitimaci. Jusinamui illanomo jaca iñeitimaci. Ie ebirede uaina uiñoñeitimaci.

10 Cristo bille facaise naimiemo iobillacinona fecaiticaia. Naimieri nana naimiena inotino raijicaitimaci. Omoimo cai lloga rafuena omoi jai inua jira, iese iitomoi.

11 Ie jira omoi facaina jicabidicai. Naimie jitailla isoi, omoina naimie marena itatajana jiidicai. Omoina naimie fetuamona, ie uaido mare rafuena finocana omoi jaillana jiidicai. Ie uaido naimiena inocana omoi jaillana jiidicai.

12 Iese omoi jaillemona, naimie abido bille facaise naimiena iobitaitomoi. Omoiri naimie jiai iobite. Jusinamui, cai Nama Jesucristo diga, caina duenailamona iese iiticaia.

2

Jesucristo abido bille rafue

1 Cai Nama Jesucristo abido billena lloiacadicue. Naimiemo ico cai dafaifillena jiai lloiacadicue.

2 “Cai Nama jai abido bite” raillana omoi cacaia, raire jarire iñeno. Rucaicueriñeno. “Jusinamui Joreño iena cuemo jai lote” damie raia, iena inoñeno. Nie lloraima iena lloia, iena inoñeno. “Pablomona cue feiñoga carta iena lote” damie raia, iena inoñeno.

³ Naie isoide rafue diga omoina jiaino jifueiacania, iena inoñeno. Cai Nama nia biñena facaise, eo ailluena comini naimiena enoitimaci. Iemei Taife dinena damie biite. Ja muidomo naimie faifite;

⁴ Iadedi nano jiaie rafuena finoite. Taife dinena naimie billanona, jirarai bai femo iacanite. Jerusalémo Jusiñamui jofomo illanona, “Jusiñamuidicue” raité.

⁵ Omoi dine navui cue ia, bie rafuena omoimo lloticue.

⁶ Jusiñamui Joreño naimie nia billena rairuillana jai uifnotomoi. Jusiñamui jitaillirui facaise naimie biite.

⁷ Taife marañede rafuena birui bainino finotate. Jusiñamui Joreño naimiena marañede rafuena birui marefodo finuana rairuide. Jusiñamui Joreño naimie rairuiñena mei,

⁸ Taife dinena marañedimie biite; ia cai Nama Jesús abido ebire bia, firaiñuamona naimiena meineite.

⁹ Cai Nama Jesús nia abido biñenia, comini jifuellena, Taife uaido bie marañedimiedi diga siño rafuena finoite.

¹⁰ Cominina eo marañedicinodo jifueite. Naie comini ico faifitimaci. Jusiñamui ie uanaicinona naimaci inoñena jira, jilloiacaiñeitimaci.

¹¹ Ie jira Jusiñamui naimacina tainocinona inotaite.

¹² Jusiñamui ie uanaicinona naimaci inoñena jira, marañede rafuena naimaci ebiruilla jira, Jusiñamui naimacina duere finoite.

Jusiñamui omoina jai fetode

¹³ Jusiñamuina inoñedino isoi Jusiñamui omoina duere finoñeite. Naimie omoina jai fetua jira, naimiemo iobillacinona jaca fecacabidicai. Omoi jilloillena, nano dofoconi omoina fetode. Ie Joreño uaido naimie jitaillacinona omoi finollena, naimie uanaicinona omoi inuamona, omoina fetode.

¹⁴ Ie rafuena cai lluamona, Jusiñamui omoina jai jillotate. Iemona cai Nama Jesucristo ebirede illanomo jaca iitomoi.

¹⁵ Ie jira, Cristona inocana omoi jai. Cai llogacinodo omoi jai. Iena caimona jai cacadomoi. Cai cartamona iena jiai cacadomoi.

¹⁶ Omoi facaina cai Nama Jesucristomo, cai Moo Jusiñamuimo, jicabidicai. Naimie caina isiruite. Cai comeciaina jaca ocuifnotade. Caina duenaillamona naimie lloga rafue suillemo raise ocuridicai.

¹⁷ Naimie omoi comeciaina nia ocuifnotallena jidicai. Nie isoide rafuena omoi finoia, naie rafue omoi marena finollena jidicai. Buena omoi ñaia, omoi marena ñaillena jiai jidicai.

3

Cai facaina omoi jiana jitaidicai

¹ Daje rafue nia lloiacadicue. Cai facaina omoi jiana jitaidicai. Cai Nama rafue llocana jaillana jitaidicai. Omoi inua isoi, jiaino inuana jiai jitaidicai.

² Marañedinomona cai jillobillena, omoi jiana jitaidicai. Ailluena comini Cristona inoñedimaci;

³ ia cai Nama jaca inogamie. Omoi comeciaina ocuifnotaité. Marañedicinomona omoina eenoite.

⁴ Cristomo cai duilla jira, cai llogacinona omoi jai inuana jai uifnoticai. Iena nia inoitomoi.

⁵ Cai Nama Jesús omoina Jusiñamui omoina isiruillana uifnotajana jitaidicue. Cristo duere sefuide; iadedi ie Moo jitailla rafuena sefuiruiñeno finocana jaide. Iese Jusiñamuimo omoi facaina juiticue.

Maijuillasa

⁶ Cai Nama Jesucristo jitailla jira, jiaie rafuena nia lloticue. Jiaie creyente maijiacaiñenia, naimie diga eo nabairiñeno. Iena navui omoimo lloticue; ia damierie iese ia, naimaci diga eo nabairiñeno.

⁷ Caimona fueo. Navui omoi motomo iticai; ia cai ucube ollena, jaca maijidicai.

⁸ Guillena ibañoeno guiñedicai; ia nagarui eo maijidicai, omoina duere cai finoñellena.

⁹ Cristo facaina cai maijia jira, omoimona ra jamai cai jicallena, caimo uai ite; iadedi caimona omoi fueollena iese jicañedicai. Omoi ra ollena, omoi maijiana jitaidicai.

¹⁰ Navui omoi motomo cai illa facaise lloticai: “Bu maijiacaiñenia, guiñena”.

¹¹ Omoi motomo damierie jai maijiñenana jai fididicai. Maijiñeno jai itimaci.

¹² Cai Nama Jesucristo cai duilla jira, naie isoidinomo maijillena lloticai. Uainino maijiamona ucube naimaci uana jitaidicai.

¹³ Cue amatiai, nie isoide mare rafuena finollena sefuiruiñeno.

¹⁴ Cue jai cuega cartamo ite rafuena bu ñnoñenia, nana creyentiaina naimiena uñota. Naimie meidallena, naimie diga nabairiñeno.

¹⁵ Naimiena enoiñeno; ia creyentena naimie nia illamona, naimiena fe-cuisse llofue.

Fuiducino

¹⁶ Cai Nama omoi jaca uri itatajana jitaidicai. Naimie omoi diga jaca iite.

¹⁷ Cuenca canollena, naimiemo cue llua isoi, jiaimie bie carta cuega; iadedi cue mameci buone dama cueticue. Nana cartamo iese cue mamecina cueticue. Pablocicue.

¹⁸ Cai Nama Jesucristo nana omoina duenaillasa. Mai. Macaibaite.

TIMOTEOMO PABLO NANO ORETAGA RABE

Pablo Timoteona uaiduacino

1-2 Timoteo, bie carta omo cueticue. ¿Nigacino? ¿Nie isoidio? Pablodicue. Cristo Jesús oretagamiedicue. Ie rafue llollena, naimie cuena orede Naimiena cue cioillena, naimie isoi cue illena, naimie abido billemo ocuiridicue. Jusiñamui cuena jiaí orede. Naimiedi cai Jilloitaraima. Cue llofuiacinomona Cristona o raise inua jira, cue jito isoi cue mamecao. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiiaimaiaí. Iena uiñocana mai o jai.

Cristo rafuena tainona llofueraíni llofuiacinodo jaiñeno

3-4 Macedoniamio jaie jaidicue, Efesomo o fiebicaillena omo lloticue. Nainomo dajerie Cristo rafuena raise llofueñedimaci; iadedi jiaíforie llofuetimaci. Diga igaiaina faca-facadimaci. Imaci usumatiaí mamecido siadocabitimaci. Iemona conini uaina uaitaside. Jusiñamui jitaila isoi comini marena illana llofueñedimaci. Jusiñamuina cai inuamona, marena iticai. Iena llofueñedimaci. Ie jira naimaci uaina llucaita.

5 Jusiñamuina comini isiruillena, jiaie cominina jiaí naimaci isiruillena, Jusiñamui uaina llofueticai. Naimaci comeciaí jeaninana jitaidicai. Jusiñamuina raise naimaci inuana jiaí jitaidicai. Ie jira Jusiñamui rafuena llofuecabiticai.

6 Dajerie llofueraíni iese llofueñedimaci; iadedi jamai ñaitimaci.

7 Moisés micori jaie llogacinuaido llofueiacadimaci; iadedi iena llofuiana uiñoñedimaci. Naie llogacinuaina ua uiñoñedimaci.

8 Iena raise llofuegana, Jusiñamuina uiñoñedinona naimiena uiñotallena, mare. Iena uiñoticai.

9-10 Moisés micori llogacinuaidi mareuidinomo jainaiñede. Jiaínomio jainaiñede: Jusiñamui uaina inoñedinomo lloga uaina inorainidinomo, Jusiñamuina jitaíñedinomo, jeacino finorainimo, jeare ñaicabitinomo, Jusiñamuina enoidinomo, eina meinetinomo, moona meinetinomo, jiaie cominina meinetinomo, aiñede riño diga itinomo, iniñede ima diga itiañuaimo, daje isoide ima diga conini aifuedotinomo, comena fiidinomo, taino llorainimo, taino luana jifueridinomo, uanaí rafue facaisena iñedinomo. Nana Cristo rafue facaina iñedinomo Moisés micori llogacinuai ua jainaiñede;

11 ia naie rafue cuemo jai jainaiñede. Ie mare rafuena cue llollena, Jusiñamui cuena jai orede. Maremiena Jusiñamui illamona, naimie rafue jiaí eo ebirede.

Jusiñamui caína duenailla jira, Pablodi iobide

12 Cuena fetua jira, cai Nama Cristo Jesús iobidicue. Naimiena cue inollena, naimie cuena uiñuamona, cuena fetode, naimie rafue cue llollena. Iena llollena, cue comecina jiaí ocuiñotade.

13 Jiaie naimiena jeare ñaiticue. Naimiena inotinona jiaí duere finodicue. Abina cue uiñoña jira, naie facaiseconi naimiena nia cue inoña jira cuena duenaillamona, naimie cuena fetode.

14 Cuena eo duenaite. Iemona naimiena inotícue. Naimiena jiaí isiruiticue.

¹⁵ Bie lluadi mare cue uiñuamona, nana comini buena ñnuana jitaidecúe. Marañedinona naimaci jeacinomona jilloitallena, eniruemo Jesucristo bite. Ero, nanoca jeacinona finoraímadicúe;

¹⁶ iadedi Jesucristo cuena duenaite. Naimiena cue ñnuamo jaie fecuise ocuride. Nana jeacinona finoraínimo fecuise ocuride, naimiena ñnollena. Naimiena cai ñnuamona, Jusiñamui diga jaca iiticaí. Cuena duenailla jira, biruimona naimiena ñnoitnodi naimie naimacina duenaillana uiñoitimaci.

¹⁷ Jusiñamuidi nanocamié. Jaca fiodaíñeite. Naimiena cionidicaí. Naimie damiede. Jiaiena iñede. Naimiena jaca iobicabillasa. Iena jitaidecúe.

¹⁸ Ero, Timoteo, cue jito, omo rafue lloiacadicúe. Nano o llofueraimana jaiacana facaise ailluena Cristo rafuena llofueraínidi ona jaie llotimaci: “Naimie raise marena llofueite” llotimaci. Iena comecianona, o comeci ocuiñocana o jai, Cristo rafuena riidocana o jaillena.

¹⁹ Cristona ñnocana o jai. O comecina marena finocana o jai. Dajerie naimaci comeciaí iuaimo comeciaína facañedimaci. Ie jira Cristona jai ñnoñedimaci.

²⁰ Iese ite Himeneo. Alejandro jiai jai daje isoide. Jai ñnoñediaímaiaí. Ie meí iaimaiaína Taife anamo jai itabicaítaticúe, duere sefuillena. Iaimaiaí fueollena, Jusiñamuina jeare ñañellena, iese itabicaítaticúe.

2

Nana comini facaina jaiticaí

¹ Diga rafue omo lloiticúe; iadedi daje rafue motomo ite. Nanoca rafue. Iena omo lloiticúe. Jusiñamui diga omoi ñaia, nana comini facaina jii. Naimaciri iobillacinona Jusiñamuimo feca.

² Uri cai illena, Jusiñamuina raise cai sedallena, Jusiñamui jitailla rafuena cai finollena, illaicomini facaina cai jii.

³ Iese cai jiiia, Jusiñamuimona mare. Naimiedi cai jilloitaraima.

⁴ Naimiedi nana comini naimaci jeacinomona jilluana jitaide. Uanaicinona naimaci uiñuana jiai jitaide.

⁵ Nana nairaiaí imaci Jusiñamuidi jaca dajede. Comini diga Jusiñamui facaisena ñairaima jaca dajede. Naimiedi Cristo Jesús. Comini Jusiñamui facaisena naimie ñaicabite. Comini facaisena ñairaima jaca dajede. Naimiedi Cristo Jesús. Naimie imananonona, comini facaisena ñairede. Ie muidona comini diga Jusiñamui jai nabairede. Jusiñamui diga comini jiai jai nabairedimaci.

⁶ Cai jeacinomona cai eneno illena, Jesucristo nana cai facaina jai fiodaite. Naimie jitailla facaiseconi Jusiñamuidi cominina bie rafuena jai uiñotade.

⁷ Bie rafue cue lollena, Jusiñamui cuena fetode. Judíuañedinomo cue lollena, bie rafue naimaci ñnollena, uanaicinona naimaci uiñollena, cuena orede. Tainona lloñedicúe.

⁸ Ie jira naga roracomo ite iñiaí, cai comini onolliaí a ñuitacabilla isoi, comeciaímo jeacino iñenanomona, Jusiñamuimo jii ana jitaidecúe. Naimaci comeciaímo icirillacino iñedemo, Jusiñamuimo jii. Naimaci comeciaímo uaitajacino iñedemo, Jusiñamuimo jii.

⁹⁻¹⁰ Riñoniaímo jai lloiticúe. Roracomo omoi jaia, abi ieduoamo comeciaína facañenamona, omoi ifotiena fino. Jamai ebinai raillano, abi ieduoamona abina finora jitañeno. Jamai ebinai raillano, abi ieduoamona eo raifide iniroina jitañeno; iadedi mare rafuena omoi finuamona, ebinaitomoi. “Jusiñamuina ñnoticaí” omoi raillanona, naimie jitailla isoi, marena omoi finolle.

¹¹ Rollena comini ofia, ñaiñenanomona, uaitañenamona omoi fueo.

¹² Omoi ofia, omoi iñiaina llofuiana jitaiñedicue. Nainomo omoi ñaiñena. fiñiaí omoi anamo illana jitaiñedicue. Iese omoi riñoniaimo lloiacadicue.

¹³ Jusiñamui Adán micorina nano finua jira, iese lloticue. Adán micorin finua mei, Eva micorina jiaí finode.

¹⁴ Taifedi Adán micorina jifueñede; iadedi Eva micorina jifuefe. Ie mei naie riño jeacinona finode.

¹⁵ Iemona jilloite; iadedi uruiaí jococana jaite. Riñoniaídi Jusiñamuina iñoia, jiaie cominina isirua, Jusiñamui jitailla rafuena finoia, ie abina eenoia, jilloitimaci.

3

Creyentiaina sedaraini illa rafue

¹ Bicinodi uanaicino. Creyentiaina llofueraimana bu jaiacania, naimie comecimo mare jitaillacino ite.

² Bie isode llofueraimana jaiacadimiena jitaídicue. Naga comini naimie mare raillamie. Dañaiñona airedimie. Abi eenotimie. Ebena iñedimie. ñnogamie. Jiaie comini naimie jofomo riadedi, raise nafuecabitimie. Jusiñamui uaina raise llofuecabitimie.

³ Jifairuiñedimie. Fuirirainidimie. Raire icirirainidimie. Ucubena nicidoñedimie.

⁴ Naimie cominina raise sedadimie. Naimie anamo naimaci illanona, naimie uruiaí ie uaina raise iñnotadimie. Ie isoidimie llofueraimana jaillana jitaídicue.

⁵ Iese naimie iñenia, ie anamo itinona naimie raise sedañenia, ¿niese jiaie creyentiaina raise sedaite?

⁶ Como creyentena jaidimiena creyentiaina llofueraimana fetoñeno, naie diga naimie abi iedoi raillano. Abi iedumona, Taife isoi jeacino finoite.

⁷ Llofueraimana jaiacadimiena creyenteñedino: “Mare” raiñenia, naimiena fetoñeno. Iese naimiena raiñenia, naimie joreñona jeare ñaitimaci. Iemei Taife ramo jiaí faite, naimie abido danomo uaillena. Ie muidona naimie uaina jaca cacareñiñeitimaci.

Diáconuai illa rafue

⁸ Diáconuai creyentiaí llofueraíni isoi marena illa. ñnouiganona illa. Jifairaieñena. Ucubena nicidoñena.

⁹ Naimacídi Cristona caí iñnua rafuena jeanide comeciaimona iñnua.

¹⁰ Bu omoi fetoacania, naimacina nano facaci. Roracomo jiaie rana nano maijita. Iena raise finoia, diáconuaina jaite.

¹¹ Diáconuai ainiaí jiaí iñnogañaiñuaina illa. Jiaie comini joreñona ñaiñena. Jirorainina. Naga rafuena marena raise finua.

¹² Nana diáconuai aidi dañaiñorie. Diáconuai uruiaí naimací uaina raise iñnua. Diáconuai imací anamo itinona raise sedajana uñnua.

¹³ Diáconuai marena maijia, comini naimacimo iobillacinona fecaitimaci. Cristo Jesúna iñnuano, naimiena marefodo jiaí lloitimaci.

Jusiñamuina iñnotino

¹⁴ Timoteo, raire o dine jaiacadicue; iadedi uicodo bie rafuena omo cueticue.

¹⁵ Are cue riñenia, daní omoí creyentíai díese ofía, Jusíñamui ie comínina marena omoí illana omoí uíñollena, omo cuetícue. Cajede Jusíñamuina jai sedadícái. Uanaicínona riidotícái.

¹⁶ Jusíñamui caina Cristona jai uíñotagafuedí jiaie rafue baífemo faíte. Iena cai uíñuanona, raitícái:

Eníruemo Cristodí íimana jai baírede.

Jusíñamui Joreñodí caina naimíe uai síñonana uíñotade.

Jusíñamui jaienísai naimíena jiaí ciodímaci.

Jiaie nairaiáimo naimíena llotícái.

Iena cacajamona, ailluena comínidí díga nairaimona naimíena biruí ínotímaci.

Monamo naimíe abido jai jaide.

4

Jiaínodí jiaíforíe rafuena lloitímaci

¹ Jusíñamui Joreño cáimo raise lloíte: “Jesucristo nia abido bíñena facaiseconí damíerie creyentíai Cristona faínonocaitímaci. Taife díbeímo íte lloráini lluana cacarefillamona, Janabamona íte llucínodo jaitímaci. Taífemona íte llucínodo jaitímaci”.

² Naíe lloráinidí: “Uanaicínona llotícái” raitímaci; íadedí taino llobaítímaci. Naimací comecíai jai tainomo íite.

³ Fíma riño íe aína ollena rairuitímaci. Riño íima íe ínina ollena rairuitímaci. Dajerie guille rana fímaidoítímaci. Jusíñamui iena fímaidoñede; ía creyentíai uanaicínona uíñuanona, íobillanona guillena, naimíedí naga rana fínode.

⁴ Nana Jusíñamui comuítaga guille radí mare. Íobillano íena cai feíñuanona, guitícái.

⁵ Jusíñamui llua jira, Jusíñamuímo cai jía, nana guille radí jai mare. Íemona maraíñede rafue jaca cáimo comuíñeíte.

Jesucristo rafuedo raise ínocana jai

⁶ Timoteo, cue lluana creyentíaimo o lloía, Jesucristo díbeímo raise maíjídío. Cristo uaina ínocana o jailla jira, mare llogacínodo o jailla jira, raise maíjídío.

⁷ Jamaí rafuemo, jamaí ígaíaimo o comecína facañeno; íadedí Jusíñamui jitailla rafuena fínocana o jai.

⁸ Maírillena o abí llarocaiadedí, mare; íadedí Jusíñamui rafuena o facajía, eo mare. Abí llarocaja baífemo Jusíñamui uaidí eo faíte. Jusíñamui rafuedí o comecína biruí ocuíñotaíte. Jusíñamui díne jiaíruido o jaillena, o comecína marena jiaí raise fínotaíte.

⁹ Bie llucínodí uanaicínó. Íe jira íena cai ínuua.

¹⁰ Cai jillobillena, cajede Jusíñamuímo ocuirídícái. Íe jira duere sefuillano maíjídícái. Jeacínomona Jusíñamuidí nana comínina jillobitacade. Naimíena ínotínona jai jilloíate.

¹¹ Nana creyentíaimo cue lluana raise llofue.

¹² Naimacína o llofueía, coníruena nia o illamona: “O afemo ítícái” naimací raíadedí, damamai íese raitímaci. Mare íllacínodo o jai. Íe meí íese raíñeítímaci. Marena o ñaíamona, marena o íllamona, jiaie comínina o ísiruíllamona, Jusíñamuíno o ínuamona, o jeaníde rafuena o fínoñenamona, naimacídí fueoítímaci.

¹³ O díne nia cue riñenia, creyentíai ofía, Jusíñamuíno cüegafuíaína ado faca. Íena llono. Íena llofue.

¹⁴ Creyentiaina llofueraini navui ofidemo, Jusiñamuimona o baitajacinona o feiñollena, naimaci onolliai o ifogimo jonetimaci onolliai o ifogimo jonetimaci. Naie facaiseconi Jusiñamui naimacina naicinona ona llotatate. Naicinona birui fainonocaiñeno.

¹⁵ Iena eo uiuicai, nana comini Cristona ñnocana o jaillana uifñollena.

¹⁶ O comecina raise eeno. Marena raise llofue. Cristo uaina ñnocana o jai. Iese o jaia, jeacino finuamona jilloitio. Iese ona cacadino jiai jilloitimaci.

5

Timoteo afemo itino diga ie illa rafue

¹⁻² Eimiaiina illamona, o afemo itinona riire llofueñeno; iadedi o moomo o llua isoi, naimacina fecuise llofue. O anafemo itinona o amatiaimo o llua isoi, llofue. O afemo itifaiñuaina o eimo o llua isoi, llofue. O anafemo itifaiñuaina o miriñotiaimo o llua isoi, llofue. Naiñaiñuaimo jeare comecina facañeno.

³ Naiñaiñuaina canollena, feciñuai comini iñenia, naiñaiñuaina cano.

⁴ Feciñomo uruiái ia, naimaci naiñaiñona canua, naiñaiño naimacimo duilla jira. Einamacina illamona, iemona naiñaiñodi ñbana oite. Iese itena, Jusiñamuimona mare.

⁵ Feciñomo uruiái iñenia, da Jusiñamuimo naiñaiño ocuiride, naimie naiñaiñona canollena. Jusiñamuimo nagarui jñcabite. Bie isoide feciñuaina cano;

⁶ iadedi Jusiñamuimo duiñede rana ebiruiga feciñona canoñeno. Jusiñamui anamo naiñaiño jai raise iñenamona, Jusiñamuimona naiñaiñodi jai fioiditñaiño isoide. Fiodaite cominina jaca canoñedicai.

⁷ Ie jira creyentiaimo biena llono, feciñuaina jeare bu ñai raillanona.

⁸ Ie cominina canoñedimie Cristo uaina jai fainonocaide. Naimiedi Cristona ñnoñedimie baifemo eo jearedimie.

⁹ Creyentiaina sedarainina canolle feciñuai mameciaina o joneia, iese jone: jai jionaidiñaiñuai diese mameci jone. Dajede inirediñaiñuai mamecina jone.

¹⁰ Mare rafue naiñaiñuai finocabilla jira, jiaie cominidi naiñaiñuaidi mareñaiñuai raillañaiñuai. Ie uruiái raise sedadiñaiñuai. Cominina nafuecabitifaiñuai. Jiai creyentiaina abina iedoñeno canocabidifaiñuai. Duidinona canocabidifaiñuai. Diese mare rafuena finocabidifaiñuai mameci jone.

¹¹ Feciñuai diese mameci o joneia, nia jionaiñede feciñuai mameciaina joneñeno. Naiñaiñuai nano llotimaci: "Inina dane oñeiticai. Da Cristona sedaitimaci" llotimaci. Ie mei uri iñenanomona, imana niciduamona, inina jitaitimaci. Ie jira naiñaiñuai mameci joneñeno.

¹² Naiñaiñuai navui llucinona jai fainonocaila jira, jiaie comini naiñaiñuai joreñuaina ñaitimaci.

¹³ Naiñaiñuai diga jofomo macariruillamona, rairaiedimaci. Eo ñaillaredimaci. Naiñaiñuai ñaiñenacinuaido ñaitimaci.

¹⁴ Nia jionaiñede itifaiñuai iese iñellena, naiñaiñuai inina dane uana jitaidecua. Ie mei uruiairenitimaci. Naiñaiñuai jofona sedaitimaci. Ie mei budi naiñaiñuaina jeare ñaiñeite.

¹⁵ Cristona dajerie fainonocaida, Taife dibeimo jai jaidimaci.

¹⁶ Creyente cominimona feciño iade, da naimie naiñaiñona canua. Jiaie creyentiaimo naiñaiñona canolle rana jicañena. Ie muidona cominide feciñuaina canorenitimaci.

¹⁷ Creyentiaina llofueraini marena maijia, raise ñbauiga. Naimaci lloia, naimaci jiai llofueia, eo raise ñbauiga.

18 Moisés micori jaie cuegafuia iena llote: “Trigo oni juillena jurareta saisia, ie fuena maiñeno, ie guillena”. Guillamona ibana jai ote. Cristo jaie llote: “Maijidimiedi ibauiga”.

19 Creyentia i llofueraimana damie llogidoia, iena cacarefiñeno. Mena comini, nibai daje amani comini iese naimiena llogidoia, iemo cacarei.

20 Creyentia i llofueraimomona bu jeacinona finocabia, nana creyentia i uicomo naimiemo riire llono, jaie creyentia i daje isoi iñellena.

21 Dacinodo naga jeacino finora imamo llono. Nagamiemo riidoñeno llono. Fecuisse damiemo lloñeno, naimiedi o nabaina jira. Jusiñamui caina ciode. Jesucristo caina ciode. Jusiñamui fetoca jaienisa i caina jia i ciodimaci. Ie jira dacinodo llono.

22 Jeacino naimiemo ia, naimie jeacino facaisena o iñellena, creyentia i llofueraimana jaillena, buna raire fetoñeno. Jeacinomona oni eneno o i.

23 Eo o duia, da jinuina jiroñeno. O duicabilla jira, janore vino jiro, o jebe manllena.

24 Jeacino dajerie finoia, iena uiñotica i, juez isoi Jusiñamui iena nia lloñenia. Jeacino jiaino finoia, iena uiñoñedica i; iadedi jia i ruidio Jusiñamui lloia, iena uiñotica i.

25 Ie isoide. Mare rafue bu finoia, iena uiñotica i; iadedi birui iena cai uiñoñenia, jicarena finoñena jira, jia i ruidio iena uiñotica i.

6

1 Jusiñamuina iinote maijira i nidi naimaci patrones eo iinua. Ie mei Jusiñamuina iinoñedino Jusiñamuina jeare ñaiñeitimaci. Cai llofuiacinona jamañeitimaci.

2 Jesucristona naimaci patrones iinoia, maijira i naimaci uaina jia i iinua. Naimaci comecia i facañena: “Patrón creyentena illa jira, dani conima cai isiruilla jira, raise maijiñeitica i”; ia: “Raise maijiñeitica i” comeciaina facaja.

Uanañedicinona llucino

3-4 Cai llogacinodi uanaicino. Cai Nama Jesucristona llotica i. Bie llogacinomona naimie jitaille isoi cai illanona, raise uiñotica i. Jia i cinodo bu llofueia, abi iedote. Abi uiñoñede. Uai eo uaitaiacade. Ie meinoconi comini abina uradoidimaci. Daajena comeciaina lloñedimaci. Jiaie comini joreña ñaitimaci. Cai fiena bitimaci.

5 Uai uaitatimaci, naimaci comecia i marañeno illa jira. Uanaicinsona jai uiñoñedimaci. “Cristo uai llumona, ailluena ucubena oitica i” raillanomo comeciaina facadimaci. “Iemona caimare iitica i” raillanomo comeciaina facadimaci.

6 Ie iadedi iese iñede. Cristona eo raise cai iinuamona, caimo diese ite ra diga caimare itica i.

7 Cai jeicia i, jaca buenidica i. Cai fiodailla mei, cai rana uiñeitica i. Cai radi benomo fiebicaite.

8 Ie jirari, cai guille ia, cai iniroi ia, caimare bene cai illa.

9 Eo ucuberedinona jiaicadinona Taife eo ramo faite. Taife uaina iinuana ucube ollena, ucuberedinona jiaicadinodi diga marañede ra-fuena finodimaci. Ja muidomo imaci abi faifitimaci.

10 Ucubena ebiruillanona, ucuberedinona jiaicadino naga jeacinona finocaidimaci. Ucube ollena, dajerie Cristona jai fañonocaidimaci. Ie muidona eo duere sefuidimaci.

Jusiñamui uaina i nocana jai

¹¹ Ero, Timoteo, odi Jusiñamui fetocamiedio. Nana cue como lloga rafue-mona oni eneno o i. Mare rafuedo o jai. Jusiñamui jitailla rafuena finocana o jai. Jesucristona inocana o jai. Jiaie cominina isirui. Mare rafue dibeimo o comecina jone. Riicinodo cominina llofueñeno.

¹² Jeacino dibeimo o inellena, Jesucristona inuanona, llocana o jai. Jaca itatajacinona marena raise ino. Jusiñamui ona fetode, o jaca illena. Navui diga cominimo Jesucristona o inuana marefodo llotio.

¹³ Ie isoide Jesucristo. Poncio Pilato dine jaie naimie itemo, marefodo: “Imiedicue” llote. Jusiñamuidi nana rana cajetade. Naimie caina jaca ciode. Jesucristo caina jiai jaca ciode. Ie jira uanaicinona omo lloticue.

¹⁴ Cai Nama Jesucristo nia abido biñenia, nana omo cue llogacinuai ino. Jearede rafuena finoñeno, jiaie comini naie llogacinuaina uaitañellena.

¹⁵ Naimie jitaillirui Jusiñamuidi eniruemo Jesucristona dane oretaitaie. Jusiñamuidi maremie. Nanocamie. Cai nanoca cai moto illaïma. Cai nanoca Nama.

¹⁶ Da jaca naimie fioidañeite. Eo isire lligañote ra dinomo naimie ite. Nainomo jaca bu iaïrei rinide. Bu naimiena jaca cionide. Naimiedi jaca siñonasa. Naimiemo iobillacinona jaca cai fecacabillasa. Iena jitaïdicue.

¹⁷ Eo ucuberedinomo llono: “Abina iedoñeno. Ucubedi fuirede. Ie jira ucubena uamo ocuiriñeno; iadedi Jusiñamuimo ocuiri”. Cai comeciaï jaisillena, naimiedi caïmo rana eo raise fecacabide.

¹⁸ Ucuberedinomo jiai llono: “Omoi ucube diga mare rafuena fino. Jiaie cominimo ucubena caidñeno fecajana cano”.

¹⁹ Ie muidona iese naimaci finoïa, monamo naimaci isiruïga rana iite, jiaïruïdo iena. Iese naimaci jaiïa, jaca itatajacinona marena raise ua uiñoïtimaci.

Fuiduacino

²⁰ Timoteo, cue omo llogacinona fañeno raise uiuicai. Jamai rafuemo cacareñeno. “Uanaicinona eo uiñoïcaï” dajerie raitimaci; iadedi uiñoñedimaci. Naimaci ñaïana cacareñeno.

²¹ Dajerie iena cacajano, Cristona nia uiñoñedimaci. Jusiñamui ona due-naïllasa. Jaca ñinori omo rafuena lloticue. Mai. Pablodïcue.

TIMOTEOMO PABLO IE EMODOMO ORETAGA RABE

Uaiduacino

¹⁻² Timoteo, carta omo dane cueticue. ¿Nigacino? ¿Nie isoidio? Pablodicue. Jusiñamui cuena jitailla jira, Cristo Jesús oretagamiedicue. Cominimo jaca itatajacinona lollena, cuena oretate. Cristo Jesús cai ñnuamona, naimie diga jaca iiticaí. Cue isiruiga jito isoidio. Cai Moo Jusiñamui, cai Nama Jesucristo diga, ona jai duenaite. Iena uñocana mai o jai. Ona jai uri itatatiamaiaí. Iena uñocana mai o jai.

Jusiñamuimo iobillacinona fecade

³ Mare cue comecimona cue usumatiaí micoriaí isoi, Jusiñamuina sedadicue. Timoteo, nagarui Jusiñamuimo cue jiaí, o facaisena iobillacinona fecadicue.

⁴ Cue comeci camareficaillena, ona eo cioacadicue. Navui cue o facadoia, o eiana comeciticue.

⁵ Cristo Jesús o ñnuana dane jiaí comeciticue. O usuño Loidadi ñnote. O ei Eunicedi jiaí ñnote. Ie mei ñnotio. Naimiena o ñnuana jai uñoticue.

⁶ Ie jira o comecina dane ocuiño, Jusiñamui uai o llofuellena. Cue onolli o ifogimo navui joneticue, ona fetollena, naimie uaina o lollena. Jusiñamuimona o baitajacinona naie facaiseconi feiñotio.

⁷ Jusiñamuidi cominina o jaciruillana jitañede. Cai comeciaina ocuiñotajanona, caina jiaie cominina isiruitallena, cai comeciaina eenotallena, ie Joreño caimo fecade.

⁸ Ie jira cai Nama rafuena o lluna meiruiñeno. Cárcelmo cue illa jira, cuena jiaí meiruiñeno. Cristo Jesús rafue muidona duere sefuidicue. Naie rafue muidona duere o jiaí sefuiá, rairuioicañeno i. Jusiñamui o comecina ocuiñotaite.

⁹ Naimie isoi cai marena illena, caina fetuano, jecinomona caina jillotate. Cai finoca rafue muidona caina jillotañede; iadedi naimie jitailla jira, caina jillotate. Enirue nia finoñena facaiseconi caina jaie duenaite. Cristo Jesús caina iena jai uñotade.

¹⁰ Cai Jilloitaraímadi Cristo Jesús. Caimo Jesús jai bairia jira, Jusiñamui caina duenaillana jai uñoticaí. Fiodaillamona naimie jai jillode. Iemona jiaí jilloiticaí. Naimie mare rafuemona naimie caina Jusiñamui díbeimo jaca illacinona jai uñotade.

¹¹ Bie rafuena lollena, cuena fetode. Cuena oretaja jira, biena llofueticue.

¹² Ie jira duere sefuidicue; iadedi cue illana meiruiñedicue. Cue ñnogamiena cue uñua jira, naimie bille dinori naimiedi nana cuemo naimie jai iga rafuena cue llofuellena, cuena raise eenoite.

¹³ Cue llua isoi o i. Uanaicinona lloticue. Cristo Jesús ñnocana o jai. Jiaie cominina isiruicana o jai, Cristo Jesús o jainaiailla jira.

¹⁴ Jusiñamui Joreño caimo illa jira, omo naimie lloga uanaicinona fañonocaiñeno uuiicaí. Uanaicinona o fañonocaiñellena, naimie ona canoite.

¹⁵ Diga Asiamo ite cominidi cuena fañonocaidimaci. Naimacimona Figelo cuena fañonocaide. Hermógenes cuena jiaí fañonocaide.

16 Onesíforo daje isoiñede. Diga icaíño naimie cue começina ocuiñotade. Cuen a meiruñede. Cai Namadi Onesíforo jofomo itino duenaillasa.

17 Romamo Onesíforo navui ria, cuena isire jenuano, cuena baite.

18 Efesomo jaie cue ia, naimie cuena jiai canode. Iena raise uñotio. Cai Nama ico abido bia, cai Namamona naimie iba feiñuana jitaídícue.

2

O maijia rafuena raise fuido

1 Cuen a fainonocaidino isoi iñeno; iadedi cue jito, Cristo Jesús ona canuano, Cristo díbeimo o começina ocuiñocana jai.

2 Diga cominimo cue llua navui cacadio. O uaina inotinomo cue llua lloño, iena jiaie cominina naimaci llofuellena.

3 Cristo Jesús rafue muidona duere o sefua, rairuioicaíño i. Cai Nama rafuena o riidua mona, naimie soldado isoidio.

4 Ie illaíma uai naimie inoiacania, soldadodi soldadoñede rafuena maijiacaíñena. Ie illaíma iobitallena, ie illaíma ocuica rafuena finoacante. Ie isoide. Da Cristo Jesús rafuena o fino, naimiena iobitallena.

5 Reglamentos llua isoi naimie raise jifanoñenia, jifanoraímadí bue isoide rana cioñede. Ie isoide. Ibana o feiñollena monamo o jiaia, Cristo Jesús llua do raise o jai.

6 Illmo duere maijiraímadí maijia jira, naiemona naie guiledí oga. Ie isoide. Duere o maiji, ibana feiñollena.

7 Cue llua mo o começina facacabi. Cai Nama ona canoite, iena uñollena.

8 Jesucristo fodaíllamona jillode. Iena comeci. Naimie usumadi David micori. Jesucristona cue llua jira,

9 marañedimie isoi cárcolmo duere jai sefuidícue; iadedi Jesucristo rafue nia llocana jaide.

10 Ie jira Jusiñamui fetocano facaina duere sefuidícue, Cristo Jesúsna naimaci inuamona naimaci jilloillena, monamo naimaci jaca illena.

11 Bie llua cinodi uanaicino:

Naimie díbeimo cai jaíllamona, naimie diga jaca iiticaí.

12 Naimie muidona cai duere sefua, naimie diga iiticaí, ie cominina naimie sedalle facaiseconi.

Naimiena cai janoia, naimie caína jiai janoite.

13 Naimie raise cai inoñenia, naimie uai meidoñena muidona, naimiedi nia inogamie.

Timoteo illa rafue

14 O cominimo biena dane lloño, iena comecillena. Jusiñamui facaina naimacimo lloño: Uaina jamai uaitañeno, mare rafuena naicinomona comiñena jira, naicinona cacadino comeciaina maretañena jira.

15 Marena maiji, Jusiñamui ori iobillena. O meiruñellena, naimie o maijia jibuia, marena maiji. Uanaicino o uñuamona, naimie uaina marena raise llofue.

16 Jamai ñaiana cacareñeno. Comini jamai ñainoicaia, Jusiñamui jitaílla rafuena finocana jaiñedimaci.

17 Diga rafue naiemona comuide. Mocollonaitate duico cai abimo illa isoi, naie rafue llocana jaide. Himeneo naie rafuedo jaide. Fileto dajedo jiai jaide.

18 Uanaicinona fainonocaidiaímaiaí. Coco inua isoi, llofueñedíiaímaiaí. "Cai fodaia, cai abi ico jilloñeite" llofuetiaímaiaí. "Cristona cai inua facaise

jai jillodicaí. Cai fiodaia, cai joreño jaca iite” llofuetiaímaiaí; iadedi cai abíico jillollena inoñediáimaiaí.

¹⁹ Ie ia Jusiñamui comini jaca inocana jaidimaci. Ie cominimo Moisés micori jaie llumona, iaímaiaí finoca rafuena jaií ñaite: “Jusiñamuidi ie cominina uñote. ‘Jusiñamuina inotícue’ raitimedi marañede rafuemon a eno illasa” llote. Ie jira iaímaiaímon a eno o i.

²⁰ Ero, ucuberedimie jofomo diga guillirue joneuilla ra jai ite. Eo jitairede rana jai ite. Janore jitairede rana jaií jai ite.

²¹ Ie isoide. Jusiñamui díbeimo itinomona naga isoide comini ite; iadedi jeacinomona eno bu ia, Jusiñamui naimiena fetoite, ie eo jitaile rafuena finollena. Jusiñamui díbeimo raise maijiite.

²² Ie jira conirueni comeciái jitailla marañede rafuemon a eno o i. Marena i, Jusiñamui jitailla isoi. Jesucristona inocana jai. Nana cominina isirui. Uri i. Mare comeciáimona nana cai Namana sedadino diga íese i.

²³ Jamai ebena rafuemo íñeno. Naiemona icirillacinodi comuide. Iena uñotio.

²⁴ Jusiñamui facaina llofueraimadi raire iciríñena. Nana cominina nabairilla. Marena fecuise llofuega. Raicaiñena.

²⁵ Naimie uaina jitaíñedinona fecuise llofuega. Ie mei Jusiñamui naimaci comeciái uaina níbaí meidotaite, uanaicino díbeina uñollena.

²⁶ Ie mei abí uñuanona, Taife anamona jilloitimaci. Taifedi naimacina ie anamo jai itatate.

3

Jusiñamui díbeimo íñedinomona abina rairui

¹ Bie llucinomo comecina raise faca. Jesucristo abído bille facaise iaírei ia, creyentena illena eo sefuienite.

² Naie facaiseconi comini dani imaci abina isiruitimaci. Ucubena ollena eo nicidoitimaci. Abina íedoitimaci. Abina biríitimaci. Jusiñamuina eo jeare ñaitimaci. Naimaci moo uaina, naimaci ei uaina inoñeitimaci. Jiaie cominimo iobillacinona jaca fecañeitimaci. Jusiñamuina jaca jitaíñeitimaci.

³ Jiaie cominina duenaíñeitimaci. Comeciaina jaiáreníitimaci. Jiaie comini joreñoa eo jeare ñaitimaci. Naimaci comeciaina enoñeitimaci. Ebe isoi naga rana duere finoítimaci. Mare rafuena jitaíñeitimaci.

⁴ Naimaci nabaiñiaina janofeitimaci. Jiaie cominimo comeciaina facañeitimaci. Eo abina íedoitimaci. Naimaci comeciái jitailla rafuena finoacanítimaci. Jusiñamui rafuena isiruiñeitimaci.

⁵ “Jusiñamuina sedadicaí” raitimaci; iadedi Jusiñamui uaina jamaitimaci. Bie isoide comini diga nabairíñeno.

⁶ Naimacimona dajerie jiaie jofuemo macarítimaci, naie jofuemo ite riñoniaína jifuianona llofuellena. Diga jearede rafuena finuano, naie riñoniaí ebena ítimaci. Naimaci comeciái uaiíllaí raire meidocana uitimaci.

⁷ Naga lloraima llumo naiñaiñuací cacareidimaci; iadedi uanaicinona jaca uñoñedimaci.

⁸ Naimaci comeciái eo marañede. Jusiñamui uaina inoñedimaci. Jannes, Mambres diga, Moisés micori lloga uai jaie uaitatíiaímaiaí. Ie isoi bie comini uanaicinona birui jaií jitaíñedimaci.

⁹ Nana comini naimaci rafue jamai ebe isoi finoca rafue uñuamona, Jannes iaímaiaí Mambres rafue jaie fuilla isoi, naimaci rafue raire fuite.

Timoteo uanaicinona inuanona jailla

¹⁰ Timoteo, cuena uifnotio. Cue llofuiana uifnotio. Cue illana uifnotio. Cue jitailla rafuena uifnotio. Cristona cue inuana uifnotio. Icirifeno fecuise lloticue. Cominina isiruiticue. Duere cue sefua, cue comecina ocuifnoticue. Iena uifnotio.

¹¹ Antioquifamo, Iconiomo, Listramo cuena duere finodimaci. Duere sefuidicue; iadedi nana naiemona cue Nama cuena jillobitade.

¹² Jusiñamui jitailla rafuena finuano, Cristo Jesús uaido jaidinodi duere sefuitimaci.

¹³ Ie facaiseconi marañedindodi marañede rafuena finocana jaitimaci. Jifueraini daje isoi jifuericana jaitimaci. Naimacidi abido naimacina jiai jifueitimaci. Iese jaitimaci;

¹⁴ Iadedi cue llofua uaido inocana odi jai. Cuemona jai fueotio. O usuñomona jai fueotio. O eimona jai fueotio. Ie jira uanaicinona jai e inotio.

¹⁵ O uruenamona Jusiñamuina mare cuegafuiaina cacadio. Naie cuegafuiaini cai jilluana caimo llote. Cristo Jesúsna cai inuamona, jillobidicai. Iena caimo jai llote.

¹⁶ Comini nana naie cuegafuiaina cuetimaci; iadedi Jusiñamui jitailla isoi, naga cuetimie cuete. Ie jira nana naie cuegafuiaini Jusiñamuimona ite. Cominimona inede. Ie jira naie cuegafuiainimona uanaicinona uifnoticai. Cai marañedicinona caimo llote. Cai comeciai marena illena, Jusiñamui jitailla isoi, caimo llote.

¹⁷ Iese llote, naimiemo cai duillamona, nana Jusiñamui rafuena cai raise uifollena. Raise uifnamona, Jusiñamui rafuena raise llofuereniticai. Naga Jusiñamui jitailla rafuena jiai raise finoreniticai.

4

¹ Jiairuido Cristo Jesúsdi illaimana eniruemo abido biite. Illaima isoi ie cominina sedajite. Naimiena inoñenamona nia cajedinona duere finoite. Jai fioidaitinona jillotajanona, naimiena inoñenamona, naimacina duere finoite. Jusiñamuidi birui caina jaca cide. Cristo Jesús birui caina jaca cide. Iena cue uifnamona, bie uai omo lloticue.

² Naimiena inoñedinona Cristo duere finoñellena, naimie rafuena naimacimo jaca llono. Comini o dafaifia, comini ofia, comini o dine ria, naimacimo iena lloitiosa. Naimaci jitaia, llono. Jitaiñenia, jiai llono. Jecinona bu finoia, naimacimo llono. Marena naimaci illena, naimacimo llono. Fecuise jaca llofue.

³ Jiairuido dajerie uanaicinona jitaiñeitimaci. Jiaifuena jaititimaci. Naimacimo dani naimaci cacaacana rafuena lollena, diga llofuerainina jenoitimaci.

⁴ Uanaicinona fañonocaida, ingaiaini icinuaido facajitimaci.

⁵ Timoteo, o comecina eeno. Duere o sefua, rairuioicaiñeno i. Jesucristo rafuena llocana o jai. O llofuiacinona marena fuido.

⁶ Jai iairei ite cue meinellirui.

⁷ Cai Nama rafuena llocana cue jaillano, iena marena jai riidoticue. Cue illa dinori jai fuacade. Cai Namana fañonocaiñedicue.

⁸ Cai Namamona marena cue illa jira, monamo ibana feifnoticue. Iemo jai ocuiridicue. Iena cai Nama cuejena eenote. Naimie abido billiruiimo iena feifnoticue. Caina raise uifnamona, dama cuemo fecañeite; iadedi nana naimie abido billena jitaidinomo ibana jiai fecaite.

⁹ Timoteo, raire cue dine bi.

¹⁰ Biniemo ite rafuena Demasdi eo ebiruilla jira, Tesalónicamo naimie jaillano, cuena fainonocaide. Galaciamo Crescentedi jai jaide. Dalmaciamo Tito jai jaide.

¹¹ Dama Lucas cue diga ite. Marcos o diga ati. Cuena canollena, naimiena jitaidicue.

¹² Efesomo Tíquicona oredicue.

¹³ O bia, cue fiebide iniroina ati. Troasmo Carpio jofomo fiebide. Cue libros ati, cue rabiai diga.

¹⁴ Alejandro raillamie navui cuena jeare finode. Naimiedi lloeomona rana finoraíma. Cai Nama naimiemo iba oite.

¹⁵ Naimiemono o abi rairui. Naimie cue lluaana eo jitaíñede. Iena uaitate.

¹⁶ Illacomini dine cue rafue nano cue riidoia, jaca buna cue facaina riidoñede. Nana cuena fainonocaidimaci. Jusiñamuidi naimacimo iba uana jitaíñedicue.

¹⁷ Cai Nama cue facaina ite. Cue comecina ocuiñotade, nana judiaíñedinomo naimie uai raise cue llollena. Naimie muidona cue fiodaisaillanomonon jillobidicue.

¹⁸ Cai Nama naga marañede rafuemono cuena enoite, monamo ie cominina sedajanomo cue raise rillena. Iobillacino naimiemo jaca fecacabillasa. Iena jitaidicue.

Fuiduacino

¹⁹ Diga cominimo cue uai oredicue: Priscamo, Aquilamo, Onesíforo jofomo itinomo.

²⁰ Corintomo Erasto fiebide. Miletomo Trófimo duide fainonocaidicue.

²¹ Rollime nia iñenia, cue dine bi. Diga comini omo naimaci uai oredimaci: Eubulo, Pudente, Lino, Claudia, ua nana creyentiaí.

²² Cai Nama o comeci ocuiñotajasa. Naimie nana omoína duenaillasa. Mai. Pablodicue.

TITOMO PABLO ORETAGA RABE

Uaiduacino

¹ Tito, omo cartana oretaiacadicue. ¿Nigacino? ¿Nie isoidio? Pablodicue. Naimie cominina cue illamona, naimie jitailla rafuena cue finuamona, Jusiñamui anamo llofuecabiticue. Ie rafuena llofuellena, Jesucristo ie ore-tagamedicue. Jusiñamui fetocanona inotallena, naimacina uanaicinona uinotallena, Jusiñamuina naimaci raise sedallena, cuena oretate.

² Naimie diga jaca cai illemo cai ocurilla jira, Jusiñamuina sedadicaí. Enirue nia inena facaiseconi, Jusiñamuidi cai jaca illena jaie llote. Naimie taino jaca lloñede.

³ Iemei naimie jitaillarui caina ie rafuena jai uinotade. Naie rafuena cue llollena, naimie cuena oretate. Naimiedi cai Jilloitaraíma.

⁴ Tito, bie carta omo cueticue. Cue isoi o inua jira, cue jitona cue mamecao. Coco Moodi Jusiñamui. Coco Jilloitaraímadí Jesucristo. Iaímaíai ona jai duenaitiaímaíai. Iena uinocana mai o jai. Ona uri jai itatitiaímaíai. Iena uinocana mai o jai.

Creventiaína sedaraini illacinuai

⁵ Nainomo ite rafue o fuidollena, Creta railla uiasimo ona faínonocaidicue. Creventiaína sedallena, naga nairaí illanomo llofueraína o fetuana navui omo lloticue.

⁶ Creventiaína llofueraína o fetoia, nagamie bie isoidimiena feto: Nana comini naimie mare raillamie. Dañaiñona airedimie. Nana naimie uruiai creventiaína itimie. Nana comini naimie uruiai mare raillamie. Naimie uruiai ie uaina inotimie.

⁷ Jusiñamui facaina naimie maijia jira, creventiaí sedaraímadí maremiena illa. Abina iedoñena. Raíre iciriñena. Jífairuiñena. Fuiriruiñena. Ucubena nicidoñena.

⁸ Ie jofomo cominina raise feiñua. Mare rafue icinona isiruilla. Ie comecina eenua. Marena illa. Jusiñamui jitailla rafuena finua. Ie abina eenua.

⁹ Naie uai raise llofuiamona comini comeciaina ocuiñotallena, naimie uaina uaitatinona llícaítallena, cai llofuaí isoi uanaicinona inocana naimie jailla.

¹⁰ Ie isoidinona feto, ailluena comini Cristo rafuena raise inoñena jira. Tainocinuaina ñaicabitimaci. Cominina jifuecabitimaci. Judúuai creventiaímona diga comini lese itimaci.

¹¹ Ie jira naimacina llícaíta. Naimacidi diga cominina uri itatañedimaci. Uanaíñedicinona llofuetimaci, ucube bifuiano ollena.

¹² Naimacimona comini rafuena lloraíma navui raite: “Cai Creta cominidi jaca tainona llouidimaci. Naimaci comeciadi jico comeci isoide. Jearedimaci. Guillardimaci. Rairaidimaci” raite.

¹³ Naimiedi uanaicinona llote. Ie jira creventiaímo riire llono, naimaci Jusiñamui uaina raise inollena.

¹⁴ Judúuai ígaaína naimaci inoñellena, comini lletarafuena naimaci inoñellena, naimacimo riire llono. Damierie uanaicinona jitaíñedimaci.

¹⁵ Ero, mareuidinomona naga ra mare. Jusiñamuina inoñedinomona naga ra jearede. Naimaci comeciadi jai jearena jira, jearerie comeciaina facacabidimaci.

16 “Jusiñamuina uifnoticai” raitimaci; iadedi Jusiñamuina uifnoñedimaci. Naimaci finoca rafuemona iena uifnoticai. Jusiñamui naimacina eo gaiñede. Buena ifnoñedimaci. Ie jira mare rafuena finuana uifnoñedimaci.

2

Creyentiai marena illena, uanaicinona llofue

1 Tito, Jusiñamuina ifnoñedino isoi ifeno. Odi uanaicino llofue, naimaci marena raise illana uifollena.

2 Uaicimaina llofue. Canamacina jiai llofue: Jifaiñeno. Inogamiena jai. Uairico isoi ifeno. Jusiñamui uaina raise ifno. Omoi ecimo itinona isirui. Duere omoi sefua, omoi comeciaina ocuifno.

3 Uaicifnuaina llofue. Cañaiñuaina iese jiai llofue: Marena omoi i, Jusiñamui jitailla isoi. Jiaie comini joreñuaina ñaiñeno. Jifaiñeno. Mare rafuedo omoi jaillamona, omoi anafeifaiñuiai mare rafuedo jaitimaci.

4 Naiñaiñuiai inina isiruillena, naiñaiñuiai uruiaina jiai isiruillena,

5 uairico isoi ifellena, jearede rafuena finoñellena, jofomo raise maijillena, cominina duenaillena, naiñaiñuiai inifiai uaina ifnollena, jiaie comini Jusiñamui uaina jamaiñellena, naie cañaiñuaimona fueoitimaci.

6 Einamacimo llono. Coniruenimo jiai llono: Ieñede ramo omoi comeciaina facañeno. Uairico isoi ifeno.

7 Tito, naga rafue o finua diese, mare rafuedo o jai. O llofuaia, uanaicinona llono. Jamaie ebe isoi llofueñeno.

8 Marena llofue. Marena o llofuaia, ¿niese comini o uai uaitaitimaci? Uaitañeitimaci. Iemei o dibeimo ifnedino meidaitimaci, caimo jearede rafue ifenia. Ie jira cairi ñaifiteitimaci.

9 Patrón anamo itinomo iese llono: Omoi patrón uaina ifno. Naimie jitailla rafuena raise fino. Naimie uaina ofeno.

10 Rana fiiñeno. Naimie raruiai raise seda. Iese naimaci ia, naimaci raise maijia, naimaci patrón: “Jusiñamui uai mare” raite. Jusiñamuidi cai jilloitaraima.

11 Jusiñamui caina duenaillena jai cai uifua jira, naicinona llofue. Naimiedi nana cominina jillotaiacade.

12 Naimie uai caimo llote: “Cue dibeimo ifede rafuena eneno faionocai. Maraiñede rafuena jitaifeno. Uairico isoi ifeno. Omoi ecimo itinomo, jiaie cominimo taino lloñeno. Naimaci rana fiiñeno. Jusiñamui uaina ifnocana jai”. Iese cai illana Jusiñamui birui jitaide.

13 Jiai caimo llote: “Jesucristo abido billemo caimare ocuri. Naimiedi ebire biite. Ie uai ifno. Naimiedi cai Jusiñamui. Jiai cai jilloitaraima”.

14 Cairi naimiedi fodaite, cai jearedicinomona cai jilloillena. Naimie cominina cai illena, mare rafuena iocire cai finollena, cai comeciaina marena dote.

15 Naie rafuena llofue. Maraiñede rafue comini finoia, naimacimo llono. Illaia uai isoi llono. Cominidi o uaina jamaiñellena, raise llofue.

3

Creyentiai illacinuai

1 “Omoi illaicomini uai anamo i” creyentiaimo dane llono. Omoi illaicomini luacinona ifno. Mare maijille ia, iena raise fino.

2 Jiaie cominina jeare ñaiñeno. Fuirifeno. Fecuisse uiuicai. Nana comini diga marena ñaino.

³ Jaie cai jiai ebe isoidicai. Jusiñamuina ñnoñedicai. Taife caina jifuate. Dani cai comeciai jitaillacino railla isoi finouidicai. Diga ie jearede rafuena finouidicai. Jiaie cominina jeare finouidicai. Marairainidicai. Abina uradoisoidicai. Cominidi caina enoisoidimaci. Coninina jiai enoisoidicai.

⁴ Ie ia Jusiñamuidi maremienana jai fididicai. Naimie caina isiruillana jiai fididicai.

⁵ Ie mei Jusiñamui caina jillotate. Mare rafuena cai finoñedicai; iadedi caina duenaillamona, caina jillotate. Cai jeacinona oni dotajanona, cai comeciaina dote. Ie jira naimie ðibeimo cai comeciaina dobañnoticai. Jusiñamui Joreño cai comeciaina marena finode.

⁶ Ie Joreño caimo raise fecade, Jesucristo finua muidona. Jesucristo cai jilloitaraima.

⁷ Ie jira naimiemona marebicaidicai. Caina duenaillamona, marebicaidicai. Caina ie cominina itatate. Iemona naimie diga jaca illemo ocuridicai.

⁸ Tito, cue llucinodi uanaicino. Jusiñamuina ñnotino marena maijillena, cue llucinona llo-llocai. Cue llucino mare. Ie jira nana cominidi iena cacacabillasa.

⁹ Ebena ñañño. Omoi usumatiai mameciaina jamai sia-siadoño. Moisés micori llogacinuaina uaitaño. Naicino diga buena oñedicai, Jusiñamui jitaillacinona cai finollena.

¹⁰ Roracomo comini comeci jiaifocaitatimie ia, naimiemo llono: “Iena finoño”. Dacaiño o llumona naimie ñnoñenia, dane llono. Ie mei ñnoñenia, naimie diga omoi ñañño. Naimie diga omoi nabairiño.

¹¹ Uanaicinodo naimie jai jaiacañede. Jeacinona jai finode. Naimie iena jai uñnote.

Fuiduacino

¹² Artemas o dine cue oretaia, Tíquico o dine cue oretaia, Nicópolis railla nairaimo are sedaño raire bi. Nainomo rollime facaiseconi cue comeci illana jitaide.

¹³ Zenas railla abogado Apolos iaimaiai diga cano, iaimaiai oni jaiacana jira. Iaimaiai jitaile rana fecade.

¹⁴ Dueredino ia, naimacina canollena, creyentiaimo: “Marena maiji” jiai llono. Naimaci jamai ññellena, iese llono.

¹⁵ Cue diga itino naimaci uaina omo oredimaci. Jesucristona cai ñnua jira, caina isiruitinomo cue uaina llono. Jusiñamui nana omoina duenaillana uñnocana omoi jaillana jitaidecua. Mai. Pablodicua.

FILEMÓMO PABLO ORETAGA RABE

Filemómo Pablodi carta orede

¹ Filemón, bie carta o dine oredicue. ¿Nie isoidio? Pablodicue. Jesucristo rafue cue llamona, cárcelmo iticue. O dine cue uai oredicue. Timoteo cue diga ite. Ie uai jiai orede. Cai Moo Jusiñamui jai cai jainaiailla jira, naimiedi coco ama. Coco diga Cristo facaina o maijia jira, ona isiruiticoco.

² Coco uaina Apiamo jiai oredicoco. Cristo dibeimo naiñaiño illamona, naiñaiñodi coco miriño. Coco uaina Arquipomo jiai oredicoco. Naimiedi coco isoi Cristo rafuena llocana jaide. O jofomo rollena oficabidinomo coco uaina jiai oredicoco.

³ Cai Moo Jusiñamui, cai Nama Jesucristo diga, omoina jai duenaite. Iena mai uiñocana omoi jai. Iaimaia omoina uri jai itatate. Iena omoi uiñocana mai omoi jai.

Filemón Cristona ñnocana jaide

⁴ Jusiñamui diga cue ñaia, o facaina cue jiaia, naimiemo iobillacinona fecadicue. Mare rafuena o finuana cue fida jira, naimiemo iobillacinona fecadicue.

⁵ Cai Nama Jesúsna ñnocana o jaillana fididicue. Nana creyentiaina o isiruillana jiai fididicue.

⁶ Cristo dibeimo cai illa muidona, naimiemona diga marecinona feiñoticaí. Cristona o ñnuamona, jiaie creyentiaina o nabaia, omona naie marecinona uiñoitimaci. Naga mare ra uiñocana naimaci jaillana jitaídicue.

⁷ Cue ama, creyentiaina o isiruilla jira, iobidicue. O muidona creyentiaí comeciaí caimare uri illa jira, cue comeci iocire ite.

Onésimo facaina Pablo ñaite

⁸ Cue comeci iocire ite; iadedi daje rafuena o diga ñaiacadicue. Cristo uai cuemo illamona ñaiñeiticue;

⁹ iadedi conima coco isiruilla jira, o diga ñaiticue. Jai uaicimadicue. Jesucristo rafuena cue llua muidona, cárcelmona jai ñaiticue.

¹⁰ Onésimo facaina ñaiacadicue. Cárcelmo cue illa facaiseconi, cue muidona Cristona naimie ñnua jira, naimie cue jitona jaide.

¹¹ Omo naimiedi marañede rafue navui finode. O mullaíma naimie illanona, raise maijiñede. Bene aisiamona, Cristona naimie ñnote. Cuen a birui eo canode; iadedi birui o diga raise iacade.

¹² O dine naimiena abido oretaiticue. Dama naimiena oretañeiticue; iadedi naimiena cue eo isiruillamona cue comecina jiai oretaiticue.

¹³ O facaina naimie cuena birui canode. Cue diga naimie fiebillana jitaídicue;

¹⁴ iadedi: “Jee” o nia raiñena jira, iese finoñeiticue. Iena omo jicañeiticue. Omo cue jicanuamona buena o finuana jitaíñedicue; iadedi dama o comeci jitailla jira, mare rafuena o finuana jitaídicue.

¹⁵⁻¹⁶ O anamo naimie nia ite; iadedi Cristona naimie jai ñnua jira, naimie o isiruiga amana feiño. Naimiena isiruiticue. O dine naimie jaca abido illena, o dinena janorena facaise cue dine navui bite. Naimiedi o mullaíma; ia naimiedi jiai birui o ama. Naimiena isiruillanona feiño.

¹⁷ O nabaina iticuen a cuena o feiñua isoi, naimiena feiño.

¹⁸ Naimie marañede rafuena omo navui finode. Omo naimie nia debia, cue facaina jone.

¹⁹ Iena ibaiticue. Bie carta dama cue cuiamona, naimie debiana cue ibajana uiñotio. Omo eo lloñeiticue; iadedi cue muidona Cristona o inua jira, ailluena cuemo debedio.

²⁰ Cue ama, coco Nama Cristomo coco jainaiaila jira, cue jitaile rafuena fino. Ie mei cue comeci uri iite.

²¹ Cue jitailla rafue o finollena uiñoticue. Cue jitailla rafue baifemo o finollena uiñoticue.

²² Jiaie rafuena lloiacadicue. O jofomo daje cuarto cuejena fino. Cue facaina o jia, Jusiñamui jitaia, o dine jaiticue.

Damierie imaci uaina jia orede

²³ Omo Epafras ie uaina orede. Jesucristo rafue llua muidona, cárcelmo cue diga naimie ite.

²⁴ Marcos ie uaina orede. Aristarco ie uaina orede. Demas ie uaina orede. Lucas ie uaina orede. Cristo rafue naimaci lluanona, naimaci cue diga maijide.

²⁵ Cai Nama Jesucristo nana omoi creyentiai comeciaina ocuiñotajamona omoina duenaillasa. Mai. Macaibaite. Pablodicue.

HEBREOS COMINIMO ORETAGA RABE

Jesucristo rafuena jai cai cacajamona, Jusiñamuiña jai uiñoticaí

¹ Jusiñamuidi caina ie rafuena jai uiñotade. Iena omoimo ja lloiticue. Cai jaiagai micoriaimo Jusiñamuidi ie rafuena lloite. Naimacimo ie rafuena lloiena, jiaicaiño ie jaienisaína orede. Jiaicaiño nicai anado Jusiñamui ie rafuena lloite. Iena lloiena, jiaicaiño ie facaina lloraini micoriaína orede;

² iadedi eniruemo ie Jito billamona, Jusiñamui rafuena jai cai cacajamona, Jusiñamuina birui jai uiñoticaí. Ie Jito uaido, mona diga, eniruena jaié finode. Ie Jito uaido nana rana jaié finode. Na comini diga jiaí finode. Jusiñamuidi nana ra, nana comini diga ie Jito anamo ico illena jai lloite.

³ Ie Jito uaido nana naie rana finocana uite. Naimie muidona Jusiñamui marena ebirenana uiñoticaí. Jusiñamui marena naimie illa isoi, naimiemona Jusiñamuina uiñoticaí. Eniruemo billanona, cai comecimo ite jeacino facaina naimie fiodaite. Monamo abido jaillanona, illaimana naimie illamona, Jusiñamui abimo naimie jaide. Naimieri Jusiñamui iobillamona, Jusiñamui abimo naimie jaide. Illaimana naimie dane illa jira, Jusiñamui abimo naimie jaide.

Jusiñamui Jito Jusiñamui jaienisaí baifemo faite

⁴ Jusiñamui Jitona naimie illamona, naimie illano Jusiñamui jaienisaí illano baifemo faite. Ie illanomona naimie Jusiñamui jaienisaí baifemo faiana uiñoticaí.

⁵ Jusiñamuidi: “Cue Jitodio” Cristomo lloite; iadedi ie jaienisaímo iese lloñede. Jiaicaiño lloite: “Naimie Moodicue. Naimie cue Jito” lloite. Ie jaienisaí ie Jito baifemo faíñena jira, ie jaienisaímo iena jaca lloñede.

⁶ Ie dajede Jito eniruemo oretaja facaiseconi Jusiñamui lloite:

Nana cue jaienisaí naimiemo iobillacinona fecaja;

⁷ iadedi jiaie rafuedo ie jaienisaína ñaite:

Cue ocuilla rafuena naimaci finollena, cue ocuilla diese naimacina oretacabiticue.

⁸ Ie Jitona ñaianona raite:

Cue isoi o illa jira, cominina o sedajafue jaca iite.

Eo marecinodo cominina jaca sedadio.

⁹ Mare rafue finuana jitaidio.

Maraiñedicinona finuana jitaiñedio.

Ie jira ona caimare jai itataticue.

Monamo o abido billanona, cue jaienisaí baifemo ona caimare itataticue raite.

¹⁰ Jiaicaiño Jusiñamui ie Jitona raite:

Cue isoi o illa jira, o uai diga nanodofoconi eniruena jaié finodio.

Mona jiaí finodio.

¹¹ Bie eniruedi mona diga ico fuite.

Iniroi fuilla isoi, iñeite;

iadedi odi jaca iitio.

¹² Eniruena mona diga meidotaitio;

iadedi odi jaca daje isoitio.

Jaca iitio

raite.

¹³ Ie Jitomo biena llote; ia ie jaienisaïmona damiemo iese lloñede. Ie Jitomo llote:

Illaimana o illamona, cue nabei ðine ana rai.

Nana o ðibeimo iñedinona o anamo itataitcue.

¹⁴ Ie jaienisaïmo iena lloñede; iadedi naimacina oretacabite, ie Jitona ðnotinona canollena. Ie jira nana naiemona, ie Jito ie jaienisaï baifemo faiana uiñoticaï.

2

Jusiñamui caina jillotaja rafuena cai jamaiñena

¹ Jusiñamui Jito siño jitonana jira, naimie birui lloga rafuena eo raise cai cacajasa. Naiemona abido cai jaiñellena, naiena cai feitañellena, naiena eo raise cai ðnuasa.

²⁻³ Ero, Jusiñamui ie jaienisaïna jaie oretajanona, Moisés micorimo diga rafuena jaie llote. Naie lloga rafuena bu raise finoñenia, iena bu raise ðnoñenia, Jusiñamui naimiena eo duere finode. Jusiñamui jaienisaï lloga rafue mare; iadedi Cristo birui lloga rafue jaienisaï jaie lloga rafue baifemo faia jira, Cristo rafuena cai ðnoñenia, Jusiñamui caina duere finollemona ua jilloñeiticaï. Ero, naimie cai jeacinomona caina jillotaiacade. Naie rafuena cai jamaia, iena cai ðnoñenia, naimie caina duere finollemona ua jilloñeiticaï. Cai Nama Cristo naie rafuena jaie llote. Naimiena cacadinodi caïmo iena jai llotimaci. Cristo rafuedi uanaicinona llotimaci.

⁴ Jusiñamui uai diga jiaiforiède siño rafuena naimaci finuamona, Cristo rafuedi uanaicinona uiñoticaï. Naimie jitailla ðese naga creyentemo Jusiñamuidi ie uaina itatate. Naga creyente naimie ðibeimo raise majillena, ie uaina itatate. Naga creyentemo naie uai illamona, Cristo rafuedi uanaicinona uiñoticaï. Ie jira naie rafuena cai ðnuasa.

Cai isoi illena, Jesucristo ðimana jaide

⁵ Jusiñamuidi ie jaienisaïna oretauide, ie jitailla rafuena naimaci finollena; iadedi naimaci anamo comini ico illena jaca lloñede. Cristo anamo comini ico illena llote.

⁶ Jusiñamuimo David micori iena jaie llote:

Cai jamai bue isoidicaï; iadedi caïmo começina facadio.

Jamai cominidicaï; iadedi caina canodio.

⁷ Caina cominina o finua jira, o jaienisaï isoi iñedicai.

Fiodañedimaci; iadedi nana enirue rana o finuanona, Adán micori anamo iena jaie o itataja jira, caina eo iobitadio.

⁸ Nana rana naimie anamo o itatajana jaie llotio.

Iese llote; iadedi nana naie lloga rafue nia suiñede, jeacinona Adán micori jae finua jira.

⁹ Jesúna dane lloitcue. Naimiena uiñoticaï. Eniruemmo naimie jaie billamona, Jusiñamui ecimona naimie billa jira, Jusiñamui jaienisaï illa isoi, dallu naimie iñede. Comena jaide. Cai facaina duere sefuillanona, naimie fiodaite. Caina Jusiñamui dueruillanona, nana cai facaina Jesús fiodaite. Naimie fiodailla jira, ie abimo naimiena Jusiñamui abido itatajamona, Jusiñamui naimiena iobitade.

¹⁰ Jusiñamui nana rana finode. Nana cominina comuitate. Naimiena iobitallena, nana finode. Naimie jitailla jira, naimiemona marena jira, Jusiñamui ie Jitona orede. Cai facaina fiodaillena, ie Jitona orede. Cai jeacino facaina fiodaite. Ie Jito fiodaillamona, ailluena Jusiñamui cominina jaidicaï.

Naimie illanomo ico iiticaí. Naimie jitailla jira, ie Jito duere sefuillanona fiodaite. Duere sefuillana ie Jito jai uñuamona, naimiena ñnotinodicaína jai raise canorede.

¹¹ Naimie fiodaillamona marebicaidicaí. Naimie ðibeimo jai caí illa jira, daajena mooredicaí. Ie jira naimiedi: “Cue cominidomoi” caina meiruñeno lote.

¹² Jusiñamui facaina lloraini micoriai llogacinomona naie rafue uanaicnona uñnoticaí. Jesús ie ico finolle rafuena jaie llotimaci:

Ie cominimo ie Moo rafuena lloite.

Ie comini diga naimie ofia, daajena Jusiñamuimo roitimaci jaie llotimaci.

¹³ Jesúsna dane ñaitimaci:

Ie comini diga naimiedi Jusiñamuina ñnocana jaite.

Jusiñamui cominina damierie jailla jira, naimacidi jiai naimie comini ñaitimaci. Naimaci ñaia isoi, Jusiñamui cominina birui jaidicaí.

¹⁴ Jusiñamuina ñnotinodi cominina jira, caí isoi naimie illena, Jesúsdi comena jaide. Caí fiodailla isoi, naimie jiai fiodaite. Taife uaina caí ñnoia, jeacino finodicaí. Iemona fiodaicana jaidicaí. Jeacino anamona caina Jesús jai jillotaja jira, Jusiñamuimona Taife uai jai saide. Jusiñamui ðibeimo iñenanomona jai jillodicaí.

¹⁵ Jesús nia fiodañenia, nana caí illa ðinori fiodaillana jaciruicana jaidicaí. Jesús jai fiodailla jira, caina jaciruillacino anamona jillobitade.

¹⁶ Jeacino anamo naimaci iñena jira, Jusiñamui jaienisaimo ie comecina facañede; iadedi Abraham micori isoi ñnotinomo naimie comecina facade. Naimacina naimie jilloitallena, naimiedi comena jaide.

¹⁷ Comena naimie illena, Jusiñamui naimiena orede. Caí isoi naimie duere sefuillena, naimiena orede. Caí isoi ramo naimie Taife faiamona, naimie fueollena, naimiena orede. Caí illana raise uñnote. Iemona caina dueruite. Jusiñamui jitaillacino finuana raise uñnote. Ie jira Jusiñamui diga caí facaina nanoca ñairaimana naimie raise jaide. Ie jira caí jeacinona oni dotajana Jusiñamuimo jicanote.

¹⁸ Naimie duere sefuilla jira, naimie ramo Taife faia jira, caí ramo Taife faia isoi, naimie caina canorede. Taife uai naimie ñnoñena jira, caina canorede. Taife uaina caí finoñellena, caí comeciaina ocuñnotade.

3

Jesús Moisés micori baifemo faite

¹ Cue amatiai, jeacino anamo omoi jai iñena jira, ie ðibeimo omoína Jesús jai fetua jira, naimie siño jitona jira, naimiemo omoi comeciaina faca. Naimiena ja ñaiticue. Ie rafuena lloñena, Jusiñamui naimiena orede. Naimie lloga rafuena jai caí ñnuamona, naimiedi Jusiñamui diga caí facaina nanoca ñairaima.

² Ie Moo cominina naimie raise sedajanona, naimiedi ie Moo uaina ñnuanona, iena finode. Nana Israel cominina naimie sedajanona, Moisés micori Jusiñamui uaina ñnuanona, iena finode.

³ Jusiñamuimona Jesúsdi Moisés micori baifemo faite. Moisés micori mare; iadedi naimie caina jillotañede. Jesús caina jillotaja jira, Moisés micori baifemo Jesúsdi Jusiñamui iobide. Caí jillua jira, Jusiñamui cominina jaidicaí.

⁴ Buena caí finuamona, naimie cominina jaiñedicaí; iadedi naimie caina ie cominina dama itatarede.

⁵ Naimie facaina maijiano, Jusiñamui llua isoi, Moisés micoridi nana hebreos cominina raise sedade. Ie cominimo Moisés micori Jusiñamui naimiemo lloga uaina raise llote. Naimiemona Jusiñamui ico llole uaidi uanaicinona uñoticaí.

⁶ Jusiñamui facaina maijianona, Moisés micori ie cominina sedade; iadedi Cristodi Jusiñamui Jitona jira, naimie ie cominina sedade. Naimiena cai inocana jaia, naimiemo caimare cai ocuria, Jusiñamui ua cominidicaí.

Jusiñamuimona abido cai jaiñellena, bie rafuemon a cai fueua

⁷ Jusiñamui Joreño caimo birui lloia, iena cacarei. Ero, Jusiñamui jaie llua na cuetataste:

⁸ Omoi jaiagai isoi iñeno.

Jofue iñenanomo omoi jaiagai ia, cue uaina inoñedimaci.

⁹ “Naimie uaina raise uñoticaí” raillanona, cuena facacibitimaci.

Cuarenta años cue siño finoca rana ciodimaci; iadedi jaca inoñedimaci.

¹⁰ Naimacimo lloticue: “Omoimo diga iciriticue.

Cue dibeimo omoi illamo omoi comeciaina facañedomoi.

Cue lloga uaido jaiacañedomoi”.

¹¹ Omoi diga cue icirilla jira, nainomo uri illena, omoimo cue lloga eniruemo jaca jaiñeitomoi.

¹² Cue amatiaí, cai jaiagai rafuena cai uñuamona, cai fueua. Uanaí Jusiñamuimona abido omoi jaiñellena, naimie jai lloga rafuena omoi inocana jai. Omoimona bu raise inoiacañenia, naimiemo llono.

¹³ Jusiñamui rafuena omoi raise inollena, nagarui conini omoi comeciaina ocuñota. Omoimona jeacinona ebiruñellemona, jeacino anamo omoi iñellesa, birui Jusiñamui rafuena raise ino. Jeacino anamo omoi dane jaia, Jusiñamui rafuena inoñeitomoi. Iemona naimie riicaillafue anamo dane iitomoi.

¹⁴ Cristomo cai duilla jira, naimie caina jaca canuanona, cai comeciaina marena caimare jaca itataite. Nana cai ille dinori naimiena cai nano inua isoi, cai inocana jaia, marena caimare iiticaí.

¹⁵ Ie jira naimiena ino. Bie jaie cuega:

Jusiñamui lloga uaina birui cacarei.

Jofue iñenanomo cai jaiagai ia, Jusiñamui uaina inoñedimaci cuega. Naimaci isoi iñeno.

¹⁶ Egiptomona Moisés micori anado jaidimaci. Diga icaiño Jusiñamui uaina cacadimaci; iadedi iena raise inoñedimaci.

¹⁷⁻¹⁸ Cuarenta años jofue iñenanomo itimaci; iadedi naimiena naimaci inoñena jira, Jusiñamui naimaci diga icirite. Naimiena inoñena jira, naimacimo Jusiñamui llote: “Omoimo cue lloga eniruemo jaca jaiñeitomoi” llote. Ie jira jofue iñenanomo naimacimo Jusiñamui jai lloga eniruemo jaiñeno fiodaitimaci.

¹⁹ Jusiñamui uaina naimaci inoñena jira, naie Canaán railla eniruemo jaca jaiñedimaci. Naimaci comeciái jaca uri illana uñoñedimaci.

4

¹ Jusiñamui dibeimo raise cai illamona, Jusiñamui cai comeciái birui uri illana jitaide. Naimie lloga uai nia saiñede. Caimona damierie iese iñellesa, cai jaiagai isoi cai iñellena, abina rairuicana mai cai jailla.

² Jusiñamuidi comini comeciái uri illana jitaide. Cai jaiagaimo iena llote. Diga icaiño naie mare rafuena cacadimaci; iadedi iena naimaci inoñena jira, iemona buena oñedimaci.

³ Jusiñamuidi cai comeciai uri illana birui caimo jai llote. Cristo ie mare rafuena jai cacadicai. Naimie uaina cai ñnua jira, cai comeciai jai uri ite. Cai jaiagai comeciai uri iñede. Moisés micori cuiamona iena uiñoticaí. Cuega: Naimaci diga Jusiñamui icirilla jira, naimacimo lloga eniruemo jaiñedimaci Comeciai uri illana jaca uiñoñedimaci cuega. Jusiñamuidi nana comini comeciai uri illana jitaide. Eniruena naimie finocamo, comini comeciai uri illana jitaide.

⁴⁻⁹ Iena Moisés micori jaie cuega:

Seis digarui raifi illanona, Jusiñamui nana rana finode.

Naimiemona nana naimie finoca ra mare.

Naimie comeci caimare uri illamona, siete iruimo jafaici ote cuega. Jusiñamuidi nana comini comeciai uri illana nia jitaide. Moisés micori facaise cai jaiagai comeciai uri illana jitaide; iadedi naimiena naimaci ñnoñena jira, naimaci comeciai jaca uri iñede. Moisés micori fiodailla mei, bie eniruemo Josué micori cai jaiagaina ifode; iadedi naimaci rilla mei, Jusiñamuina naimaci ñnoñena jira, naimaci comeciai jaca uri iñede. Josué micori illa facaisemona diga años illanona, David micori comeciai uri illana jiai llote:

Naimie uaina birui omoi cacaia, iena ñno

llote. Naiemona Jusiñamui cai comeciai uri illana jitaillana uiñoticaí.

Naimiena ñnotinodicaimo naie rafue jai duide.

¹⁰ Jusiñamuina cai ñnuamona, cai comeciai jai uri ite. Cai comeciai uri illena, jaiie rafuede jaiñedicaí. Naimiena cai ñnuamona, naimie illanomo ico iiticaí. Nana naimie finoca rafuena naimie fuidua mei, nainomo uri iiticaí.

¹¹ Cai jaiagai ñnoñedimaci. Cai faifñellena, naimaci isoi cai jaiñena; iadedi Jusiñamui uaina ñnocana mai cai jailli. Jusiñamuina cai ñnuamona, naimiedi cai comeciai uri itatate.

¹² Naimiena cai ñnoñenia, naimie iena uiñote. Naimie jaca ite. Naimie siño. Ie jira naimie lloga uai jaca saiñede. Jaca siño. Cai comeciaino riire baite. Eo jairede lloebi bue isoide jaitaia, iena oni econuanona, nana nainomo fo ite rana bairetate. Ie isoide Jusiñamui lloga uai. Nana cai comeciaino iticinona riire bairetate. Nana cai comeciaina facajacinuaina riire bairetate.

¹³ Jusiñamuimona buna reininide. Jusiñamui nana caina cide. Nana cai finoca rafuena uiñote. Nana cai comeciaino iticinona uiñote. Ie jira naimie uaina ñnocana mai cai jailli

Jesúdi cai facaina Jusiñamui diga nanoca ñairaima

¹⁴ Jesúdi naie uaina cai ñnuamo canoite, naimiedi cai facaina Jusiñamui diga nanoca ñairaimana jira. Ie Jito illamona, monamo Jusiñamui abimo birui naimie illamona, cai facaina Jusiñamui diga naimie ñaicabite. Ie jira naimiena ñnocana jaiticaí.

¹⁵ Taife cai ramo faia, cai comeciai raise cai ocuiñoñenia, Jesús caina canorede. Cai ramo faia isoi, Taife naimie naga isoide ramo faite; iadedi Taife uaina naimie ñnoñede. Iemona Taife ramo faiacinona ñnoñenana naimie uiñua jira, jeacinona oñede. Caina canorede. "Naimacina cano" ie Moomo llocabite.

¹⁶ Cai facaina ie Moo abimo naimie illa jira, cai comeciaina naimie ocuiñotaiacana jira, Jusiñamuina jaciruiñeno naimiemo cai jia. Naimie caina duenaillamona, cai jeacinona feitaite. Cai comeciaina jiai ocuiñotaite.

5

1 Naga Jusiñamui diga ñairaima comini facaina ñaia jira, caina naimie jai feiñua jira, Jusiñamui diga jaciruiñeno jai ñaiticai. Moisés micorimo Jusiñamui jaie llua isoi, Aarón micorina Jusiñamui fetuanona, jeacino facaina comini Jusiñamuimo faga toñiaina fecauidimaci. Cominina Jusiñamui feiñollena, imaci ñairaima Jusiñamui diga ñaite.

2 Nana comini isoi naimiedi jeacino finuamona, comini facaina Jusiñamui diga ñairaima ñaiana raise uñote. Jusiñamui dibeimo raise jaiñedinona feucise canorede.

3 Comini facaina toñiaina fecaude; iadedi naimiemo jeacino illa jira, naimie facaina toñiaina jiai fecaude.

4 Naimie jitailla jira, Jusiñamui diga ñairaimana buna jaiñede; iadedi naimiena Jusiñamui fetua jira, iena jaide. Jusiñamui Aarón micorina fetuana uñoticaí.

5 Cristo jitailla jira, cai facaina Jusiñamui diga ñairaimana naimie jaiñede; iadedi naimiena Jusiñamui fetua jira, cai facaina ñairaimana jaide. Ie Jitona naimie illamona, Jusiñamui naimiena fetode. David micori jaie cuega-fuiaimona iena uñoticaí. David micori Jusiñamui llua jaie cuega: Cue Jitodio. Jai o Moodicue cuega.

6 Ie Jitona jiaicaiño Jusiñamui ñaite:

Melquisedec micori isoi ona comini facaina cue diga ñairaimana jaca itataticue.

7 Eniruemo Cristo ia, imana naimie jailla jira, duere sefuide. Naimie fiodaicana iairei ia, Jusiñamuimo eo jide. Naimie fiodañena Jusiñamui jillotarede; iadedi Jusiñamuimo ado llote: “Cuenalegi cacaitañeno; iadedi cue comeci jitailla isoi finoñeno. O comeci jitailla isoi fino” llote. Jusiñamui uaina naimie raise inua jira, Jusiñamui naimie jiana cacajano fairiote.

8 Naimiedi Jusiñamui jito; iadedi Jusiñamui naimiena llegi cacatate. Iemona Jusiñamuina inocana jaca jaillana naimie uñote.

9 Naimiena ie Moo oretajanona, ie jitailla rafuena naimie raise marena fuidua jira, Jusiñamui ecimo naimaci jaca illena, nana naimiena inotinona jillotaite.

10 Melquisedec micori isoi comini facaina ñairaimana jaca illena, Jusiñamuidi naimiena fetode. Melquisedec micori uai jaca saiñena jira, naimie ifomo illena, jaiamiena jaca fetoñede. Ie isoi Jesús uai jaca saiñede.

Cristo dibeimona abido danomo jaiñeno

11 Bie isoide rafuena omoimo lloiacadicue. Bie rafue irirede; iadedi Cristo rafuena omoi raise cacaiñena jira, omoi comeci iena raise jitañena jira, omoimo iena raise llonidicue.

12 Cristo rafuena are omoi cacaja jira, iedo omoi raise jaidomoidena, llofuerañina jaidomoi; iadedi iedo nia raise omoi jaiñena jira, jaiamie omoina llofuiana nia jitaidomoi. Cristo dibeimo omoina itatate rafuena nia jitaidomoi. Cristona nano omoi cacaja rafuena nia jitaidomoi. Cristo rafuena inocana nia raise jaiñedomoi. Eo janorede janosa monoí ijina jitaicabide. Einamaci isoi guillena nia jitañede. Janosa isoidomoi. Creyentena bu como jaia, Cristo rafuedo nia eo jaiñede. Iena eo uñoñede. Monoí ijina jitaide isoide. Janosa monoí iji jirua mei, jaiie guille guillamona moonate. Cristo rafuena are cacadomoi; iadedi janosa isoi nia itomoi. Nia moonaiñedomoi isoidomoi.

¹³ Janosa monoi ijina nia jitailla jira, naimie nia moonaiñenana uifñoticaí. Naimie nia abina uifñoñede. Jusiñamui jitailla isoi marecinona finuana nia uifñoñede.

¹⁴ Guiledi moonaitimie ie. Ie isoide. Cristo rafuedo raise jaidimiedi Cristo rafuena uifñocana jaide. Iemona marecinona finollena, llofuiana uifñote. Maraiñedicinona finoñellena, llofuiana jiai uifñote.

6

¹ Diga icaiño bie rafuena jai cacadomoi. Cristona nano cai cacaja rafuena raise cai ñnuamona, jiaie Cristo rafuena raise uifñocana mai cai jailla. Cai nano cacaja rafuena cai fueoiacana siadocabiñelli. Cristo dibeimo caina itatañede rafuedo navui jaidicaí; iadedi cai comeciai uai birui jai meidoticaí. Cristo dibeimo itatate rafuedo birui jaidicaí. Jusiñamuina ñnuamona, naimie dibeimo jaidicaí.

² Cristo dibeimo bautizajana jai uifñoticaí. Llofueraimana jaillena fetuana jai uifñoticaí. Creyentiaina naimaci sedallena, naimacimo cai onolli joni-anona, Jusiñamuimo cai jianona, naimaci fetuana jai uifñoticaí. Nana creyentiaí fiodaillamona jilluana jai ñnoticaí. Jusiñamuidi naimiena ñnoñedinona ico jaca duere finollena jai ñnoticaí.

³ Naie isoide rafue mare; iadedi iena cai raise ñnuamona, Jusiñamui jitailla jira, naimie caina canuamona, jiaie Cristo rafuena fueocana mai cai jailli.

⁴ Uanaicinona omoi comeciai uifñuamona, Cristona omoi ñnuamona, Jusiñamui Joreño omoimo illamona,

⁵ Jusiñamui uaina mare omoi uifñuamona, Cristo uai siñonana omoi uifñuamona, abido danomo omoi jaiñellena, abina rairuicana omoi jai.

⁶ Cristo dibeimona omoimona bu sofetena, jiaimie naimiena jillotanide. Jeacinona finocana naimie jaia, Jusiñamui ie jeacino oni dotañeite. Cristona naimie jitañena jira, Cristo fiodaillana jai jitañede. Cristona jeare jai finode. Cristo finoca rafuena jamaide. Cristona naimie jitañenia, ¿ñiese naimie jillobite? Jillobiñeite. Ie jira abido danomo omoi jaiñellena, abi rairuicana omoi jai.

⁷ Ero, iena jiaie rafuedo lloticue. Jusiñamui noci deitacabilla jira, enirue naimie raitacabilla jira, iemo riará sicuanona, iena ie nama raitia, naiemona ie llisillana naimie uamona, Jusiñamui iobide;

⁸ Iadedi naie eniruemona riará sicoñenia, maraiñede. Monaigi cuiraió diga naiemona dama sicoia, maraiñede. Jusiñamui nainomo noci deitate; iadedi naiemona llisillana onide. Naie enirue caimanide. Maraiñede. Ie nama iobiñena jira, iena fañnocaide. Naie enirue isoidomoi. Jusiñamuimona mare rafuena cacadomoi. Iena ñnocana omoi jaia, naimie omoína iobitaite. Iena omoi jitañenia, naimiemona duere sefuitomoi.

Jusiñamui llua jira, cai comeciai ocuiñocana jaidicaí

⁹ Cue isiruigaomoi, abi rairuillicinona omoimo lloticaí; iadedi cai llofuacino omoimo duiñenamo cai comeciaina facañedicai. Cristona ñnocana omoi jaillamo cai comecina facadicaí.

¹⁰ Jusiñamui omoína raise uifñote. Naimiena omoi isiruillamona, jiaie creyentiaina omoi isiruillamona, naimacina navui canodomoi. Naimacina nia canodomoi. Ie jira naimiemona duere sefuiñeitomoi.

¹¹ Omoi comeciainona jiaie creyentiaina omoi canua isoi, Cristo rafuedo nana omoi ille ñnora ñnocana omoi iocire jaillana jitaídicaí. Naimie diga ico jaca omoi ille jira, iese omoi jaillana jitaídicaí.

¹² Cristo rafuedo omoi jaillamona omoi sefuiruifnenana jitaifnedicai. Jusiñamui lloga uaina inocana jaidino isoi, omoi jaillana jitaidicai. Naimiena naimaci inuamona, naimie lloga uai fecuise naimaci ocurillanona, naimie lloga uaina oitimaci. Naimaci isoi omoi jaia, naimie lloga uaina jiai oitomoí.

¹³ Ero, Jusiñamuidi Abraham micorimo lloga uaina uifnotomoí. Naimiedi Jusiñamuina jira, uanaicinona llote. Tainona lloñede.

¹⁴ Abraham micorimo llote: “Ona jaca canoiticue. O diga jaca iiticue. Cue llua jira, o jito comuite. O uruiaina eo jebuitaiticue” llote.

¹⁵ Abraham micori naimie lloga uaina inote. Iena suillemo fecuise ocuride. Ie jito Isaac micori, Jusiñamui llua isoi, comuide.

¹⁶ Uanaicino cai llocabillana jiaie comini uifnollena, Jusiñamui mamecina lliñoticai. “Jusiñamui caina ciode” lloticai. “Uanaicinona cai lloñenia, Jusiñamui caina duere finoite” lloticai. Ie jira cai lloga uaina buna uaitañede.

¹⁷ Ie isoide. Jusiñamuidi ie finolle rafuena caimo jai llote. Naimie lloga uai meidonillana cai uifnuana naimie jitaide.

¹⁸ Naimiedi Jusiñamuina jira, ie uai naimie jai llua jira, naimie tainona llonillana uifnoticai. Ie jira naimie lloga uai naimie finuana uifnoticai. Naimiena cai inuamona, naimie anamo cai illa jira, caina naimie eenua jira, cai comeciai ocuifnocana jaidicai. Naimie illanomo ico cai jaca illemo ocuridicai.

¹⁹ Naie rafuena Jusiñamui llua jira, cai comeciai ocuifnocana jaidicai. Ie lloga uaina naimie finollemo inoticai. Monamo Jusiñamui illanomo ico cai illena eo raise uifnoticai. Nainomo fiebillena, barco ie lloelluna illemo dotaja isoi, cai comeciai naganomo ifnellena, Jesús caina eenote.

²⁰ Jesús nainomo jai illa jira, naimie muidona nainomo jai iiticai. Cai facaina nainomo ie Moo diga ñaicabite. Cai facaina nanoca ñairaimana jaca ite. Melquisedec micori ñaia uai saifnena isoi, Jesús cai facaina ñaia uai jaca saifneite.

7

Melquisedec micori illa isoi, Jusiñamui diga ñairaimana Jesús jaide

¹ Iena omoi raise uibiñollena, Melquisedec micori rafuena omoimo lloiticue. Naimie micoridi Salem railla nairai ie illaíma. Naimiedi comini facaina cai Moo Jusiñamui diga ñairaima. Cinco illaímana Abraham micori anafetitaja mei, ie jofomo Abraham micori abido billano, naisomo naimie dine Melquisedec micori bite. Abraham micorimo marecinona Melquisedec llote: “Birui Jusiñamui ona canode. Naimie ona jaca canollena uifnoticue” llote.

² Jusiñamui diga ñairaimana Melquisedec illa jira, naimiemo Abraham micori dajerie rana fecade. Naie cinco illaímana anafetitajanona, naimaci rana bairuanona, nana naie ramona, riai uaimona ie décima facaina rana Melquisedecmo fecade. Melquisedec micoridi Salem railla nairai illaíma. Melquisedec mameci oni dóbainuamona, “Cominina raise marena sedadimie” railla. Ie cominina raise sedajamona, ie comini uri illa jira, comini illano Salem railla mamecina jonega.

³ Naimie moona, naimie eina, naimie cominina uifnoñedicai. Naimie jeiciaruina uifnoñedicai. Naimie fiodaillaruna uifnoñedicai; iadedi Jusiñamui jito isoi Jusiñamuimona naimie feifoga uai saifnena jira, comini facaina Jusiñamui diga ñairaimana jaca jaide. Naimie ifomo jiaimie ifnena jira, naimie ñairaimana nia ite isoide.

4 Ero, cai cominimona Abraham micori cai jaiagai baifemo faite; iadedi Melquisedec micori Abraham micori baifemo faite. Ie jira naimiemo ie decima facaina rana fecade.

5 Moisés micorimona Abraham micori uruiasi Jusiñamui lloga uaina cadimaci. Naimimono Jusiñamui ie sedaja jofo finuana llote. Nainomo maijidinomo nainomo maijiana llote. Abraham micori uruiaimona Levi railla nairaina fetode. Nainomo maijidino comini facaina Jusiñamui diga ñauidimaci. Jusiñamui ocuica rafue naimaci maijia jira, naimaci comini ramona decima facaina rana feñoudimaci.

6 Melquisedec micorimo Abraham micoridi ie rana fecade; iadedi Melquisedec micori Abraham micori cominiñede. Levi railla nairai imieñede. Naisomo Abraham micori dine Melquisedec micori billanona, Abraham micorimo marecinona llote: “Jusiñamui ona jaca canoite. O diga jaca iite” llote.

7 Melquisedec micori Abraham micori baifemo faia jira, naie marecinona naimiemo llote.

8 Ero, Melquisedec micorimo Abraham micori rana fecade; iadedi Melquisedec micori fiodaillaruiña uifoneidicai. Naimie uai sañena jira, jaiame naimie ifomo jaca ifede. Comini facaina Jusiñamui diga ñairainimo naimaci ramona decima facaina cai judiui cominidi fecauidimaci; ia naie ñairaini fiodaicana jaillana uifotocai. Naimaci uai sailla jira, jaiño naimaci ifomo meidoudimaci.

9-10 Levi micoridi Abraham jito. Levi micorimona Levi railla nairai comuide. Naimacidi Jusiñamui diga ñairainina jaidimaci. Cominimona decima facaina rana feñoudimaci. Levi micori nia comuñenia, Melquisedec micorimo Abraham micori decima facaina rana fecajamona, Abraham micori Levi ie usumana jira, Melquisedec micoridi Levi nairai baifemo faiana uifotocai. Melquisedec micoridi Jusiñamui diga ñairaini baifemo faiana uifotocai. Melquisedec isoi Cristo illa jira, Cristodi Levi baifemo faiana uifotocai. Cristodi nana naie ñairaini baifemo faiana jiai uifotocai.

11 Jusiñamui diga ñairaini finouilla rafuedo Jusiñamui jitailla isoi marebicaiñedicai. Naimaci finouilla rafuedo cai jillobidicaidena, jiaie rafuena jitañedicai. Naie rafuedo cai jillobiñena jira, Jusiñamuidi Cristona orede. Cai facaina Cristo ñairaimana jaillena, naimiema orede. Caina jillobitallena, naimiema orede, jiaie rafuedo cai jillobiñena jira. Jusiñamui Moisés micorimo jaiel lua isoi, comini facaina nano ñairaimadi Aaron micori. Naimiedi Levi railla nairai imie. Naimie jitonaimona comini facaina ñairainina itimaci. Iena uifotomoi. Aaron jitonaimona Cristo ifede. Aaron maijia rafuemo Cristo duiñede; iadedi Melquisedec rafuemo duide.

12 Comini facaina ñairainina jaillana jai meidua jira, Jusiñamuidi naimaci rafuena jiai meidote.

13 Iena lloiticue. Aarondi Levi railla nairaimo duide. Dani Levi nairaidi comini facaina ñairainidimaci. Dani naimacidi comini facaina Jusiñamui rana fecauidimaci. Cristo naie nairaimo duiñede.

14 Cristo jiaie nairaimo duide. Judá nairaimo duide. Judá nairaimona Jusiñamui jito comuillana uifotocai. Naie nairaimona comini facaina ñairaimana bu jaillana Moisés micori jaiel jaca lloñede.

15 Cristo billa jira, Moisés micori lloga rafue meiduana uifotocai. Melquisedec micori illa isoi, comini facaina ñairaimana Cristo jaca iite.

16 Moisés micorí lloga rafue isoi, Cristodi ñairaimana jaiñede; iadedi Jusifñamui uaido ñairaimana naimie jaide.

17 Jusifñamui lloga uaimona iena uifñoticaí. David micorí naimiena jaie cuega:

Melquisedec micorí illa isoi, odi comíni facaina ñairaimana jaca iitio cuega.

18 Comíni facaina ñairaimana jaillena Moisés micorí jaie cuega. Naiemona jilluana comíni ofena jira, naie uai jai saide. Naiedo jaillamona, naimaci jeacinomona jilloñedimaci. Naiedo jaillamona, naimaci comeciaina ocuiñotañedimaci. Naiedo jaillamona, naimaci Jusifñamuina nabaiñedimaci.

19 Naiedo jaillamona, Jusifñamui jitailla isoi marebicaiñedicaí. Iedo birui jaiñedicaí. Jiaie rafuemo birui ocuiridicaí. Cristo finoca rafue muidona, Jusifñamuina cai nabaiillamona, Jusifñamui diga birui ñairedicaí.

20 Jusifñamui llua jira, Cristo cai facaina ñairaimana jaide.

21 Leví micorí jitonaiidi imaci jeiciamona, comíni facaina ñairainina jaidimaci. Naga icaiño Jusifñamuidi naimacina ñairainina jaillana fetofñede; iadedi ie lloga uaina jira, Cristo cai facaina ñairaimana jaide. David micorí Jusifñamui llua jaie cuega:

Cue jai llua jira, cue lluaña fñoitícue.

Cristomo llotícue: “Comíni facaina ñairaimana jaca iitio” cuega.

22 Jesús ñairaimana jaca illa jira, naimie jailla rafue Moisés micorí lloga rafue baífemo uaide.

23 Moisés micorí lloga rafue anamo ailluena ñairainidi itimaci. Naimaci fiodaicana jailla jira, ailluena ñairaini jitaide, fiodaítino ifomo meidollena.

24 Naimie jaca illa jira, Cristo ñairaimana jaca iite. Naimie ifomo jaca buna meidoñeite.

25 Naimie jaca illa jira, comíni facaina Jusifñamui diga jaca ñaicabite. Ie jira Cristodi nana Jusifñamui díbeimo iacadinona, naimaci jeacinomona, ua jaca jillotarede.

26 Caina canollena, naimie isoide nanoca ñairaimana jitaídicaí. Ie Moo isoi naimiedi mareuidimie. Naimiemo jeacino jaca iñede. Jeacino finouidino díbeimo naimie iñede. Jusifñamuidi ie ecimo naimiena itatate. Ie jira naimie caina canorede.

27 Jusifñamuimo fecallena, naimaci jeacino facaina naimie iba ofñellena, Moisés micorí llua isoi, nanoca ñairainidi nagarui toiniaina fatimaci. Dani naimaci jeacino facaina nagarui iese finodimaci. Iemei comíni facaina nagarui iese jiai finodimaci. Cristo naimaci isoíñede. Naimie jitailla jira, comíni jeacino facaina naimie fiodailla jira, comíni facaina dacaiño fiodaite. Naimaci jeacino facaina naimie dane fiodaíñeite.

28 Moisés micorí facai ñairainidi jeacinona finocana jaidimaci. Fiodaicana jiai jaidimaci; iadedi jiaie rafue birui illa jira, ie uaido Jusifñamuidi ie Jitona ñairaimana jaillana jai fetode. Naimiedi jaca mareuidimie. Jeacino jaca fñoñede.

8

Cristo muidona jiaie rafue birui ite

1 Cristomo ite rafuena llotícue. Cai facaina ñairaimana birui naimie ite. Illaimana naimie illa jira, monamo Jusifñamui ecimo ite.

² Jusiñamui illanomo naimie illanona, nainomo cai facaina birui ñaicabite. Moisés micori facaise comini finoca jofomo Jusiñamui diga ñauidimaci; ia birui Jusiñamui finoca illanomo Cristo illamona, cai facaina ñaicabite.

³ Moisés micori naga ñairaima jeacino facaina Jusiñamuimo faga toiniaina fecauillena llote. Cristodi comini jeacino facaina toiniaina fecañede; iadedi naimie jitailla jira, cai jeacino facaina naimie dama fiadaite.

⁴ Moisés micori jaie llua isoi, benomo ite ñairaini faga toiniaina fecauilla jira, eniruemo Cristo nia ia, ñairaimana naimie jainide.

⁵ Comini facaina Jusiñamui diga ñaillena, Moisés micori facaise naie ñairaini Jusiñamui jofomo jaisoidimaci. Iemona Cristo monamo finocabilla rafuena uñoticaí. Monamo cai facaina Jusiñamui diga Cristo birui ñaicabite. Iemo naimie comecina facajanona, Jusiñamui jofona Moisés micori jaie niacania, Jusiñamui naimiena llofuede: “Monamo iticue; ia cue jofu eniruemo jiai finoitomoi. Sinaí railla anedu navui o ia, ona llofueticue. Ona cue llofuia isoi, cue jofona fino” llofuede.

⁶ Eniruemo Cristo birui iñenamona, monamo cai facaina Jusiñamui diga birui ñaicabite. Cristomona cai cacaja rafue Moisés micori facaise ñairainimona cai cacaja rafue baifemo faia jira, Cristodi Moisés micori facaise ñairaini baifemo faite. Cristomona cai cacaja rafuedi cai comeciaí marena itatate. Ie jira, bie rafue jiaie rafue baifemo faite.

⁷ Moisés micori facaina rafuedo jaillamona, Jusiñamui jitailla isoi buna marebicaiñede. Ie jira Jusiñamui jiaie rafue illena llote.

⁸ Moisés micori lloga uaina cai jaiagai ñinoñena jira, Jusiñamui jai llote: Naie cominimo jiaie rafuena ico jiairuido lloiticue.

⁹ Naimaci jaiagaimo cue lloga rafuena jai lloticue.

Naie facaiseconi Egiptomona naimacina canuanona, naimacina atidicue; iadedi Moisés micorimo cue lloga rafuedo jaiñedimaci. Ie jira naimacina fainonocaidicue.

¹⁰ Naimacimo jiaie rafuena ico jiairuido lloiticue.

Iena naimaci uñuamona, cuena raise ñinoitimaci.

Naimaci Jusiñamuidicuenta jira, naimaci cuena sedaitimaci.

Cue anamo raise naimaci illa jira, cue comininitimaci.

¹¹ Nana naimaci cuena uñoitimaci.

Ie jira naimacim: “Cai Namana omoi ñno” buna ñiese lloñeite.

Jamai bue isoidinomona cuena ñinoitimaci.

Jamai bue isoñedynomona cuena jiai ñinoitimaci.

¹² Naimacina cue duenaillamona, naimaci jeacimona jaca feitaicue llote.

¹³ Jiaie rafuena Jusiñamui jai lluaamona, Moisés micorimo lloga rafue jai saillana uñoticaí. Moisés micori lloga rafue caimo jai duiñede. Cristomona jiaie rafuena birui jai cacadicaí.

9

Hebreos comini Jusiñamui jofona eniruemo jaie nitimaci. Monamo Cristo birui illanona, Jusiñamui ecimo naimie ite

¹ Jusiñamuidi Moisés micorimo diga rafuena jaie llote. Naie rafuemona cai fueollena, iena lloiticue. Naimiena sedajana llote. Naimie sedalle jofu finuana jiai llote.

² Jusiñamui llua isoi, hebreos comini naie jofona nitimaci. Jedaciede ñiroimona finoca jofona nitimaci. Naie jofu jeraimo mena cuartos ite.

Nano fo jailla cuartomo Jusiñamuina nagarui sedadimaci. Nainomo lamparín isoide ra ite. Siete diga naie boadi ite. Mesa jiai ite. Nainomo doce llomenoico joide.

³ Mena cuartos illena iniroina sebiñoga. Naie baifemo iticuartodi Jusiñamui illano.

⁴ Naie iniroi facai oromona finoca mesa ite. Nainomo caimare soride rana jobaisoidimaci. Baifemo iticuartomo cajón ite. Ie emodo oro iena jonega. Cajón jeraimo oromona finoca nogo ite. Nainomo ite maná railla fariñana eruaide guille. Aarón micori jiguida nainomo jiai ite. Jusiñamui uaido naie jiguida dacaño llisilla jira, nainomo ite. Jusiñamui cuega nofici ibici jiai ite.

⁵ Cajón emodo ibaillabici di ite. Ie emodomo nagafebei dine oromona finoca mena Jusiñamui jaienici joreño ite. Conimamo fo eruaide. Naie motomo Jusiñamui quenirena baireuide. Naie rafuena raise omoi jai uñua jira, iena omoimo are lloñeiticue.

⁶ Naie isoide rana finodimaci. Iemei Jusiñamui diga ñairainimona damierie nano fo jailla cuartomo nagarui jaidimaci. Moisés micori llua isoi, nainomo ite rafuena finollena, iedo jaidimaci.

⁷ Baifemo iticuartomo jaca jainidimaci. Nanoca ñairaima naga año nainomo darui dama jaide. Jurareta faja mei, fo jaillanona, diruena naie cajón ibaillabici mo llerede. Dama naimie jeacino facaina diruena nano llerede. Chivo fajanona, dane fo jaide, ie comini jeacino facaina diruena llerellena. Iena finuamona, cominina duenaillamona, Jusiñamui naimaci jeacino facaina ibana ofede.

⁸ Jusiñamui Joreño caina llofuiamona, buena birui uiñotica. Naie jofu nia ia, jamai comini fo jainina jira, Jusiñamui diga, cominidi atona nabairinidimaci.

⁹ Bie rafuena birui nia finodimaci. Moisés micori lloga uaido bu jai, ie jeacino facaina faga toiniaina Jusiñamuimo fecallena jobaide. Iena finocabidimaci; iadedi Jusiñamui jitailla isoi, naiemona naimaci comeciaina raise finonidimaci.

¹⁰ Jusiñamuina naimaci raise sedallena, Moisés micoridi diga guille fimaide. Jiruana jiai fimaide. Naimaci abiaina finollena jiai llote. Nie isoide guille, nie isoide jirulle, niese naimaci abiai finollena, nana naie isoide rafuedo jaidimaci. Cristo nia biñena facaiseconi iese jaidimaci, naimaci comeciaina raise finobitallena; iadedi Cristo billamona, jiaie rafue birui ite.

¹¹ Moisés micori finoca jofomo Jusiñamui dine Cristo jaiñede; iadedi Jusiñamui abimo monamo Cristo jai jaide. Nainomo cai facaina Cristodi ñairaimana jai jaide. Ie jira Jusiñamuina jai nabaidica. Cai comeci raise jai finobide.

¹² Naimie fiodailla mei, dane jilluanona, Jusiñamui dine monamo naimie abide jaide. Toiniai diruena Moisés facaise ñairaini fecaja isoi, cai jeacino facaina Jusiñamuimo Cristo naga año fecañede; iadedi dacaño naimie fiodaillamona, naimie diruedo cai jeacino facaina caina jillotate.

¹³ Maraiñede rafuena finoia, Moisés micori llogacino anamo itino Jusiñamuina sedallena, naimie jofomo jainidimaci. Moisés micori jai llua isoi, toiniai diailla mei, jobaide toiniai ie jusefo oni faianona, Jusiñamui jofomo jairedimaci. Nainomo naimiena sedallena, fo jairedimaci. Iemona Jusiñamui naimacina duere finoñede.

¹⁴ Toiniaina fañeno Jusiñamuina birui sedadica. Cristo fiodaicana jira, naimie diaillamona, cai jeacino facaina Jusiñamui caina duere finoñeite. Cristo comeci jitailla jira, Jusiñamui Joreño naimiena oretaja jira, naimie

fiodaite. Cristodi Jusiñamui Jitona jira, naimiemo jeacino iñena jira, cai jeacino facaina naimie fiodaillamona, cai comeciaina raise finobitade.

¹⁵ Cristo jai finoca rafue muidona, Cristo monamo jailla jira, jiaie rafue birui ite. Bie rafuedi comini Jusiñamui diga jaca illena llote. Nana Jusiñamuina inotino ie. Moisés micori lloga uai anamo itinodi jeacina finocana jaidimaci. Naimaci jeacino facaina faga toiniaina Jusiñamuimo jai fecauidimaci; iadedi Cristo jai fiodailla jira, naimiena bu inoia, naimie jeacino facaina Jusiñamui birui ibana ofeite. Nana Jusiñamuina inotinodi naimie jai llua isoi, naimie diga jaca iitimaci.

¹⁶⁻¹⁸ Jusiñamui jofo jaiie finua mei, Moisés micorimo Jusiñamui llote: “Cue lloga rafuena raise finodomoi. Bie jofomo cuena sedallena, faga toiniái dirue diga bie jofona llerca. Nana naiemo ite rana jiaí llerca. Iena o finuamona iobiticue. Cue lloga uai finocana mai o jai” llote. Iese naie rafue jaiie tainede. Cristo fiodailla jira, Jusiñamuimona birui jiaie rafue caimo ite. Cristo diailla jira, Cristo fiodaillamona, bie rafue jai tainede. Bie rafuedo cai jaillamona, cai jeacinomona jai jillobidicai.

¹⁹ Ie cominimo nana naimiemo Jusiñamui lloga rafuena Moisés micori llua mei, faga jurareta dirue diga, faga chivo dirue diga, nana naie lloga rafue cuegabiana llerede. Cominina jiaí llerede. Naie dirue jinui diga nano faite. Febecode ra jiairede iniroi diga maiga. Iemei naie ra diga naie diruena llerede.

²⁰⁻²¹ Jusiñamui jofona dirue diga llerede. Nana nainomo ite rana jiaí llerede. Llote: “Jusiñamui llua isoi, biena finodicue. Naimie llua jira, bie dirue illa jira, naimie caina duere finoite”.

²² Moisés micorimo Jusiñamui llua isoi, raise finobillena, nana rana dirue diga llerede. Toiniái fajamona, dirue illa jira, Jusiñamuidi jeacino facaina ibana ofede; iadedi jeacino facaina iba ofellena, jiaie rafuena Moisés micorimo lloñede.

Cristo fiodailla jira, Jusiñamui cai jeacina oni dotade

²³ Jusiñamuidi Moisés micorimo toiniaina fajana jaiie llote. Naie llua finuamona, Jusiñamui iba ofede. Birui cai jeacino oni dotallena, Jusiñamuidi Cristo fiodaillana jitaide. Cristo fiodaillafue faga toiniái baifemo faia jira, monamo cai jaca illena, jeacina oni dotallena, Cristo fiodaite.

²⁴ Naimie fiodaillamona, cai facaina ñairaimana Cristo jaide. Cai facaina Jusiñamui diga ñaillena, enirue ite Jusiñamui jofomo jaiñede; iadedi monamo Jusiñamui abimo naimie jaillanona, Jusiñamui diga cai facaina ñaicabite.

²⁵ Dacaiño cai facaina monamo Jusiñamui dine naimie jaide. Moisés micori facaise nanoca ñairaima Cristo isoiñede. Naimie naga año Jusiñamui jofomo fo iticuartomo darui jaide. Naimie dirue uiñede; iadedi toiniaina fajanona, ie diruena uite.

²⁶ Cristo iese itena, nano facaisemona diga icaiño comini jeacino facaina naimie fiodaite. Iese iñena jira, eniruemmo birui dacaiño naimie billanona, naimie jitailla jira, naimie dacaiño fiodaite. Jeacino anamo cai iñellena fiodaite.

²⁷ Nana dacaiño fiodaiticai. Iena uiñoticai. Fiodailla mei, Jusiñamui uicomo iiticai. Naimiena cai inoia, caina feiñoite. Naimiena inoñedinona duere finoite.

²⁸ Dacaiño Cristo jai fiodaillana uiñoticai. Comini jeacino facaina dacaiño jai fiodaite. Naimie dane bia, fiodaillena biñeite; iadedi dane bia, naimiedi ie billemo iocire ocuiritina monamo Jusiñamui illanomo uite.

10

¹ Moisés micori facaise naie ñairainidi Jusiñamuimo fecallena, toiniaina fajanona uisoidimaci; iadedi Jusiñamui jitailla isoi, naiemona marebicañedimaci; iadedi Moisés micori lloga uaimona jeacino cai finuana uiñoticaí. Jusiñamui cai jeacino oni dotajana uiñoticaí. Jusiñamui jaca mareuidimiena uiñoticaí. Jusiñamuina nabaillena janore uiñoticaí. Cristo jiaie rafue caimo jai iga. Naimie fiodailla jira, cai jeacino jai feide. Jusiñamuina raise nabairedicaí.

² Naie faga toiniái Jusiñamuimo fecajamona comini marebicaidena, naiena fecarainidimaci. Naimaci jeacino dacaiño dotaiadedi, faga toiniaina dane fecañedimaci; iadedi naimacimo jeacino jaca illa jira, faga toiniaina fecauidimaci.

³ Naiena fecauillamona, jeacinona finocana naimaci nia jaillana uiñotimaci.

⁴ Toiniái dirue illa jira, Jusiñamuidi comini jeacinona jaca feitañede. Dama Jesús dirue illamona, Jusiñamuidi comini jeacinona feitate.

⁵ Eniruemo jaie billanona, Jusiñamuimo iena Cristo llote:

Jeacino facaina toiniái fajana jai jitañedio.

Ie jira eniruemo comena jaillena, comini jeacino facaina cue fiodaillena, cuena oredio.

⁶ Jeacino facaina ailluena faga toiniaina jai jitañedio.

⁷ Iena cue uiñuamona, eniruemo cue billanona, o jitailla rafuena finoiticue.

O facaina lloraini micoriai iena jaie cuetimaci

llote.

⁸ Cristo lluna dane ñaiticue. Cristodi Jusiñamui Moisés micorimo llogacinona ñaite. Jusiñamui jaie llua isoi, naimiemo cominidi jeacino facaina faga toiniaina jaie fecauidimaci. Iena Jusiñamui birui jai jitañede.

⁹ Cristodi: “Jusiñamui jitailla rafuena finuaibiticue” lluamona, Moisés micorimo llogacino jai saillana uiñoticaí. Jiaie rafue birui illana jiaí uiñoticaí.

¹⁰ Jusiñamui jitailla jira, Jesucristona orede. Cai facaina naimie fiodaillena naimiena orede Jesucristo ie Moo jitaillacinona finuamona, cai jeacinomona jai jaca jillobidicaí. Jai marebicaidicaí.

¹¹ Nana Moisés micori llogacinodo jaide ñairainidi nagarui comini jeacino facaina faga toiniaina Jusiñamuimo fecauidimaci; iadedi naie rafue naimaci finuamona, Jusiñamui naimaci jeacinona feitañede;

¹² iadedi dacaiño Cristo fiodaillamona, Jusiñamuidi nana cai jeacinona feitate. Bene naimie finoacaga rafue fuilla jira, illaimana jira, Jesús Jusiñamui ecimo abido jaide.

¹³ Nana naimie dibeimo iñedinona naimie emodofillemo naimie birui ocuiride.

¹⁴ Dacaiño Cristo fiodaillamona, naimiena cai ñnuamona, Jusiñamuimona jaca marebicaidicaí.

¹⁵ Jusiñamui facaina lloraíma micori cuegafuemona Jusiñamui Joreño caina iena uiñotade. Naimie facaina lloraíma micori Jusiñamui lluna jaie iese cueda:

¹⁶ Hebreos cominimo jiaie rafue ico jiairuido lloiticue.

Cue rafuena naimaci uiñuamona, cuena raise ñnoitimaci.

¹⁷ Jiaí cueda:

Naimaci jeacino jaca feitaíticue.

¹⁸ Cristo jai fiodailla jira, jeacinona Jusiñamui jai feitaja jira, faga toiniaina naimiemo fecajana dane jai jitañede.

Jusiñamuina cai nabailli

¹⁹ Cue amatiai, Jesús fiodailla jira, Jusiñamuina jaciruiñeno birui nabairedicai. Naimie cai Moo jai illanona, naimie diga meiruiñeno jaciruiñeno birui jiai ñairedicai.

²⁰ Moisés micori facaise nanoca ñairaima fo iticuartomo jaillena, sebiñoga ñiroi oni dibeimo jaidimaci. Iese Jusiñamui illanomo ridimaci. Jamai comini nainomo jainidimaci; iadedi Cristo jai fiodailla jira, Jusiñamuina atona birui nana nabairedicai. Naimie diga birui atona nana ñairedicai.

²¹ Cristona jai cai ñnua jira, cai facaina nanoca ñairaimana naimie illa jira,

²² cai mare comeciaimona Jusiñamui diga birui cai ñailli. Naimiena eo cai ñnuamona, cai comeciai jeanillamona, naimie dibeimo cai bautizajamona, naimiena mai cai nabailli.

²³ Cristo caina jilluana ñnoticai Monamo naimie diga cai illemo ocuridicai. Jusiñamui ñnogamiena jira, naie rafuena ñnocana mai cai jailli.

²⁴ Jiaie creyentiaimo cai comeciaina cai facaja. Conini cai isiruitacana cai jailli. Coninimo cai mare rafue finocana cai jailli.

²⁵ Rollena omoimona damierie oficabiñedimaci. Naimaci isoi omoi ñño; iadedi Jusiñamuina sedallena oficabi. Abido omoi danomo jaiñellena, conini comeciaina ocuiñotallena, oficabi. Jesucristo abido billirui iaiei illa jira, naimiena raise ñnollena, conini omoi comeciai ocuiñocana mai omoi jai.

²⁶ Cristo finoca rafuena bu uñua mei, iena naimie ñnoñenia, jeacinona naimie finocana jailla jira, Jusiñamui naimie jeacinona feitañeite. Cristo fiodaillana bu jamaia, Jusiñamui ie jeacinona feitañeite;

²⁷ iadedi Jusiñamuidi naimiena duere finoite. Eo jacirede rafue anamo iite. Iraimo Jusiñamui nana naimie dibeimo ññedinona duere finoite.

²⁸ Moisés micori jaie cuela: “Jusiñamui llote: ‘Menaimie naimiena daje isoi lloillamona, Moisés micori llogacinona jamaidimiena dueruiñeno meinega’”.

²⁹ Iese duere sefuillana jaie llote; iadedi birui ite lloga rafue bu jitaiñenia, bai duere sefuite. Jusiñamui Jitona bu jitaiñenia, Jusiñamui birui lloga uaina bu jitaiñenia, Cristo fiodaillana bu jamaia, Jusiñamui Joreñona jeare bu ñaia, Jusiñamuimona naimie eo duere sefuite. Cristo fiodaillamona, Jusiñamui naimiena ñnotimiena marebicaitarede. Jusiñamui Joreño naimiena due-naite; iadedi iena naimie jai jamaitaia, iena naimie jai jitaiñenia, Jusiñamui naimiena bai duere finoite.

³⁰ Ero, Jusiñamui jaie llote: “Maraiñedinona bu finoaia, ibana oiticue. Cuena ñnoñedinona duere finoiticue” llote.

³¹ Jusiñamui duere finollicino anamo bu ia, eo jacirede rafue anamo jai ite. Naie duere finollicino anamo omoi ññellena, Jusiñamui lloga rafuena jamaiñeno.

³² Creyentiaina nano omoi jaillamo dane comeciaina faca. Creyentiañedinomona eo duere sefuidomoi; iadedi Cristona ñnocana jaidomoi.

³³ Omoimona damierie marefomo navui duere sefuidomoi. Omoiri jaisitimaci. Omoina jifanododimaci. Omoina jeare finodimaci. Damieriena meinetimaci.

³⁴ Cárcelmo jonetinona duenaillamona, naimacina canocabidomoi. Cristomo omoi duilla jira, creyentiañedino omoi rana bairodimaci; iadedi omoi comeciai ñia iocire itomoi. Omoi ramo omoi comeciaina eo facañedomoi; iadedi Cristomo jai omoi duilla jira, naimie omoi comeciaina jaca marebicaitaja jira, iemo omoi comeciaina facajamona, iocire itomoi.

³⁵ Jusiñamuimona iba ico omoi feiñua jira, Cristona ñia ñnocana omoi jai.

³⁶ Jusiñamui jitaillacino omoi finollena, monamo jaca omoi illena, nie isoide ramo omoi jiria, Jusiñamuina nia ñnocana omoi jai.

³⁷ Jusiñamui buena llua jira, iese suite:

Cristo abido billirui iaírei illa jira, naimiëna ñnocana omoi jai.

³⁸ Naimie nia abido biñenia, omoína cue jai marebicaitaja jira, cuena ñnocana mai omoi jailli;

iadedi cuena jitaññedinori iobiñedicue.

³⁹ Naie isoidino jillobiñeitimaci. Naimaci isoi ññedicaí. Jusiñamuina ñnocana cai jaillamona, jaca jillobidicaí. Ie jira naimiëna ñnocana mai cai jailli.

11

Jusiñamuina ñnocana jaidicaí

¹ Jusiñamuina cioññedicaí; iadedi naimie illana ñnoticaí. Naimie lloga uaina ñnocana jaidicaí. Naimie lloga uai suillena ñnoticaí. Ie lloga uai suillemo ocuiridicaí.

² Cai jaiagai mona damierie iese ñnocana jailla jira, Jusiñamuimona marebicaidimaci.

³ Jusiñamui finoca rana birui ciodicaí; iadedi jaie nano dofoconi jaca buena ññede. Naie facaiseconi dama ie uaido Jusiñamuidi eniruenta finode. Mona finode. Nana rana finode. Nana rana comutate. Iena ñnoticaí.

⁴ Cai jaiagai rafuena ja lloiticue, naiemona cai fueollena. Abel micori Jusiñamuina jaie ñnuamona, naimiemo faga toica llaudana fecade. Ie feiñuamona, Jusiñamui naimieri iobide. Jusiñamuina ie ama Caín raise ññoñena jira, naimie fecaca rari iobiñede. Iena feiñoñede. Abel micori Jusiñamuina ñnua jira, Jusiñamuimona naimie marebicaide. Abel micori jaie fiodaite; iadedi Jusiñamuina cai raise ñnollena, naimiemona nia fueoiticaí.

⁵ Enoc Jusiñamuina jaie ñnote. Naimiedi Jusiñamuina eo iobitate. Moisés micori cufaguaíamona iena uñnoticaí. Jusiñamuina ñnuamona, Jusiñamuina eo iobitaja jira, naimie fiodaññede; iadedi fiodaññeno monamo Jusiñamui naimiëna naimiëna uite.

⁶ Jusiñamuina cai ññoñenia, naimiëna iobitaññedicaí. Jusiñamuina cai nabaiacania, naimiëna cai raise sedaacania, naimie illana ñnoticaí. Naimiëna cai nabaiacania, cai jitai raillano, caina canollena ñnoiticaí.

⁷ Noé micori Jusiñamuina jaie jiai ñnote. Jusiñamui ico suille rafuena naimiemo llote. Enirue buillena llote. Iena ñnuanona, Noé micori aillue balsa emodomo jofona finode. Enirue buillamona ie comini diga jilloiacana jira, Jusiñamui llua isoi, balsana finode. Jusiñamui lluana Noé micori ñnua jira, jillode. Noé micori Jusiñamui lluana ñnote; iadedi naimie facaise ite comini ññoñena jira, Jusiñamui raicailfue anamo itimaci. Jusiñamuina naimie ñnua jira, Jusiñamui uruena naimie jailla jira, Jusiñamuimona Noé micori marebicaide.

⁸ Abraham micori Jusiñamuina jaie jiai ñnote. Ie moo eniruemona naimie jaianiñllena Jusiñamui naimiemo llote. Are ite eniruem naimie jaianiñllena llote. “Jaie enirue omo iticue” Jusiñamui llote. Abraham micori ñnote; iadedi ie jaillanona uññoñede.

⁹ Jusiñamui lloga eniruemona Jusiñamuina ñnocana jaide. Naie eniruemona ride; iadedi naie enirue naimiemo nia raise duññede. Chivo itiraímona niga ñiroimona sebiñoga jofomo naimie jaca ite. Ie jito, Isaac micori, naie isoide jofomo jiai ite. Jusiñamuidi nana naimacimo daje isoide rafuena llote: “Bie enirue omoimo iticue” llote.

10 Abraham micorí mare jofona finoñede, naie eniruemo naimie jaca iacaiñena jira; iadedi Jusiñamui diga monamo jaca illemo naimie ocuiride. Monamo Jusiñamui mare finolle illanomo ocuiride.

11 Abraham micorí aidi Sara micorí. Jusiñamuina Sara micorí ñnua jira, Jusiñamui naiñaiño abina mairitate. Naiñaiño eo jionaide; iadedi uruesite. Naiñaiño Jusiñamui llua isoi, naiñaiño uruesillana ñnote.

12 Abraham micorí jiai eo jionaide; iadedi jitona comuitate. Naimie jitomona naimie nairai eo jebuide. Facadonide ucuai isoi jebuidimaci. Facadonide conillie isoi jebuidimaci. Ailluena ucuai illa jira, naimaci facadonidicai. Ailluena conillie illa jira, iena facadonidicai. Ie isoide. Eo ailluena Abraham micorí uruai illa jira, naimacina facadonidicai.

13 Abraham micorí, Isaac micorí, Jacob micorí Jusiñamuina ñnocana jaidimaci. Nana naimacimo Jusiñamui lloga uaina suiñedemo fioidimaci. Nia fioidañena, Jusiñamui llogacinona cacadimaci. Iena ñnotimaci. Ie jira bie eniruemo naimaci jaca illemo comecina facañedimaci;

14 iadedi monamo jaca illemo comeciaina facadimaci.

15 Naimaci jaié billa eniruemo comeciaina naimaci facadena, nainomo abido jaidimaci;

16 iadedi jaié illanomo comeciaina facadimaci. Jusiñamuina nabaillemo, monamo Jusiñamui diga jaca illemo comeciaina facadimaci. Naimiena naimaci ñnua jira: “Jusiñamuidi cai Moo” naimaci raia, Jusiñamui naimaciri meidaiñede. Ie jira monamo Jusiñamui naimaci illinona jai finode.

17-18 Jusiñamuina Abraham micorí ñnua jira, ie jitona comuitate. Jusiñamui Abraham micorímo llote: “O jito Isaacmona o nairai eo jebuite” llote. Iemei Jusiñamui Abraham micorina facacite. Abraham micorí naimiena ñnuana raise uñollena, facacite. “O jitona fano” Abraham micorímo llote. Abraham micorí Jusiñamuina ñnuanona, ie jito faiacade.

19 Ie jito fioidaillemona, Abraham micorídi Jusiñamui naimiena jilloitallena ñnote. Isaac micorí fioidaiñede; iadedi fajamona jillode.

20 Isaac micorí Jusiñamuina jiai ñnote. Naimie fioidaiacania, Jusiñamui ie llogacino finollena ñnuamona, mena ie urue iaímaimo ie uaina fecade. Llote: “Jusiñamui llua isoi, jebuicana jaitomíco”.

21 Jacob micorí Jusiñamuina jiai ñnote. Naimie fioidaiacania, Jusiñamuimo jñanona, ie jiguidamo juita naidaidemo, José micorí ie mena urue iaímaimo marecinona llote. Jusiñamui ie llogacino finollena ñnuanona, llote: “Jusiñamui llua isoi, jebuicana jaitomíco. Naimie omícona canoite” llote.

22 José micorí fioidaiacania, ie comínimo llote: “Jusiñamui omoína canuano, Egiptomona íco jaiñruído omoí jaillena ñnoticue. Omoí jaiá, cue illaiciaina omoí diga uñño. Canaán railla eniruemo omoí ria, nainomo cue illaiciaina raino”.

23 Moisés micorí moo, ie ei diga Jusiñamuina jiai ñnotiaímaiai. Hebreos comíni jebuiñellena, naie facaiseconí Egipto illaíma nana hebreos isaíaina meinana llote. Iaímaiai jito jeicia meí, iaímaiai uruena daje amani fivui reidiaímaiai. Jusiñamuina ñnuanona, naimie maresana eruaila jira, jaciruiñeno naimiena jofomo fo reide. Illaíma lluamona Jusiñamui naimiena jillotajana ñnotiaímaiai. Ie jira Faraón jisa anamo comuíde. Faraóní Egipto nairai illaíma.

24 Moisés micorí Jusiñamuina ñnote. Naimie eimienamona, naimiedi Faraón jisa ie jitona mamecireaíñede;

²⁵ iadedi naimiedi Jusiñamui naimiena ie cominina Egiptomona jillotajana ñnote. Jusiñamui naimie fetua jira, ie comini ðibeimo naimie iacade. Ie comini ðiga duere sefuiacade. Jusiñamuina ñnoñedino ðiga ie começi jamai ibotaiacaiñede.

²⁶ Faraón jisa anamo naimie comuilla jira, naimiemo eo aillue rana ite; iadedi Egiptomo ite ebirede ramo ie começina eo facañede. Jusiñamuimona ñba naimie ico feiñoiacana jira, Jusiñamui Jito billemo ie começina facajano, duere sefuide.

²⁷ Ie jira Egiptomona Moisés micori Faraóna jaciruiñeno oni jaide. Jusiñamui naimiena eenuana ñnote. Jusiñamuina cioñede; iadedi Jusiñamui illana naimie ñnua jira, ñnocana jaide.

²⁸ Jusiñamui ie cominina jillotajana Moisés micori ñnua jira, Jusiñamui llua isoi, pascua railla rafuena finode. Ie cominimo toica llauða fallena llote. Ie ðirue nase fuemo jidellena llote. Naie naio Jusiñamui jaienici nana nano doforanina meinesifellena, Jusiñamui llua finodimaci.

²⁹ Egiptomona naimaci billa mei, jiairede railla monaillai ruica ðine jaillena, Jusiñamuina ñnotimaci. Jusiñamui Moisés micorimo llua naimaci ñnuamona, jinui motodo saferedifodo ruica jaidimaci; iadedi Egipto soldaduai daje isoi ruica jaiacadimacimo, nana corobaitimaci.

³⁰ Canaán railla eniruemo hebreos comini rilla mei, Jericó railla nairai ðine ridimaci. Jusiñamuina ñnuanona, Jusiñamui llua isoi finodimaci. Siete ðigarui Jericó ecimo naimaci macarilla mei, Jusiñamui llua isoi, naie llaigafo ana bijide. Naie nairaina emodofidimaci.

³¹ Naie faciseconi Jericómo Rahab micori fiodañede. Naiñaiñodi calirediñaiño. Nana Jericó comini Jusiñamuina ñnoñena jira, fiodañimaci; iadedi jofue iñenanomo, ña Canaámo hebreos comini riñena facaise, Jusiñamui finoca rafuena naiñaiño fidiano, naiñaiño Jusiñamuina ñnote. Mena hebreos comini iaiaiana naiñaiño feiñua jira, Jericó nairaina emodofilla facaise naiñaiño meineñedimaci.

³² ðiga jiaie comini Jusiñamuina ñnocana jaidimaci; iadedi nana naimaci finoca rafuena cue cuellena, abi juanide. Naimacimona damierie mameciaina jamai cueiticue: Gedeón micori, Barac micori, Sansón micori, Jefté micori, David micori, Samuel micori Jusiñamui facaina jaie llorainina jiai eo cueñeiticue.

³³ Jusiñamui naimacina canuamona, ñnotimaci. Ie jira damierie naimaci bacauaina emodofidimaci. Illaia isoi jiaño naimaci cominina raise marena sedadimaci. Jusiñamui llogacino suillana cioidimaci. Leones naimacina riacanamona damierie jillode.

³⁴ Iraimo usillamona damierie jillodimaci. Lloebi ðiga meiniamona damierie jillodimaci. Jiaño jamai bue isoidino; iadedi jamai bue isoiñedinona jaidimaci. Jobaime raise finuamona, jiaño imaci bacauai soldaduaina judaisitade.

³⁵ Dañaiñorie riñoniaimona uruai fiodailla mei, fiodaillamona Jusiñamui damieriena jillotate. Illaicominimona jiaño duere fiodañimaci. Jusiñamuina fainonocaiacaiñena jira, naimacina meinetimaci. Naimaci fiodaiaiania, monamo Jusiñamui ðiga ico jaca illena naimaci ñnua jira, Jusiñamuina fainonocaiñeno fiodañimaci.

³⁶ Jiaño duere sefuidimaci. Naimaciri jaisitimaci. Naimacina jeare ñaitimaci. Rao ðiga naimacina duere fatimaci. Damieriena maianona, cárcelmo jonetimaci.

³⁷ Damierie nofici diga fairinuamona, meinetimaci. Damierie ramo faitimaci. Meinellena, naimacina serrucho diga denaisite. Damierie lloebi diga meinetimaci. Jiaino buenidimaci. Naimaci iniroi jamai igoi ie. Dueredimaci. Naimaci iniroi raise iñede. Aime guisoidimaci. Jiaie cominimona duere sefuisoidimaci.

³⁸ Jiaie cominimona jamai bue isoidimaci; iadedi Jusiñamuimona jamai bue isoifedimaci. Damierie jofonidimaci. Ie jira jamai jai jaicaisoidimaci. Jofue ifenanomo jaidimaci. Eniruemo jamai bita iniuuidimaci.

³⁹ Jusiñamuina inocana jaidimaci. Naimaci finoca rafuemonona Jusiñamui comini naimaci illana uifotici. Jusiñamuina inotimaci; iadedi nana naimacimo Jusiñamui lloga rafue naimaci illa facaise suiñede.

⁴⁰ Jusiñamui jitailla jira, naimaci illa facaise nana naimacimo lloga rafue suiñede; iadedi naimie jitailla jira, fiodaillena Cristona jai orede. Ie cominina birui cai jia; jaillena, Cristona jai orede. Ie jira cai diga danomo monamo Jusiñamuina nabaitimaci. Nana naimie lloga rafue jaca suite.

12

Jesús finoca rafuemo cai comeciaina cai facalli

¹ Cai jaigai Jusiñamuina inocana jaillana uifotici. Ie jira caidi naimaci isoi, Jusiñamuina inocana birui mai cai jailli. Marena riire cai aisiacania, ailluena rana abifedici. Ie isoide. Jeacinona cai finoñellena, naimiena raise cai inollena, jeacino finuacinona mai cai faionocaiilli. Nie isoide rafue caimo ia, Jusiñamui jitaillacinona finocana mai duere cai jailli.

² Jesús finoca rafuemo cai comeciaina cai facalli. Cai jeacino facaina naimie fiodailla jira, cai comeciaina naimie ocuifotajanona, Jesús inotici. Cruzmo marañedimie isoi fiodaite. Fiodaillamona jilluana naimie uifnuamona, naimie fiodaite. Ie Moo ecimo dane illena naimie uifnuamona, iocire fiodaite. Illaimana naimie illamona, ie Moo ecimo birui ite. Jesús mo cai comeciaina facajamona, caimare mai cai jailli.

³ Jusiñamui dibeimo ifedinomona Jesús eo duere sefuide. Ie isoi cai duere sefuia, Jesús mo cai comeciaina facajamona, cai comeciaina ocuifotacana mai cai jailli.

⁴ Jusiñamui dibeimo ifedinomona duere sefuillamona, Jesús isoi duere nia sefuifedimoi. Omoina nia meifedimaci.

⁵ Duere omoi sefuia, bie jiaie cuegafuaina feitaño. Naimie cominina omoi illamona, Jusiñamui llote:

Cue uruiái, omoína cue duere finoía, cuena nia ino.

Duere sefuillamona, cuena faionocaiño.

⁶ Omoína cue isiruillamona, omoína duere finodicue.

Cue dibeimo omoína raise itatallena, omoína duere finodicue.

Nana cue cominina cue llofuecabillamona, naimacina duere finodicue llote.

⁷ Naimie jitaillacinona cai finollena, caina duere finode. Ie uruiaina cai illamona, caina duere finode. Ero, nana ie uruiaina isiruillamona, naimaci ie jitaillacinona finollena, naga eniruemo ite moo ie uruiaina duere finocabide. Ie isoide Jusiñamui. Ie jitaillacinona cai finollena, caina duere finocabide.

⁸ Caina inotallena, Jusiñamui caina duere finoñenia, naimie cominifedici. Naimiedi nana ie cominina duere finocabide.

⁹ Cai eniruemo ite cai mootiai caina duere finoia, naimaci uaina inotici. Ie isoide. Cai Moo Jusiñamui caina isiruillamona, caina duere finoia, naimie uaina cai inua. Naimiena cai inuamona, monamo naimie diga ico jaca iitici.

¹⁰ Naimaci comeciai llua isoi, cai eniruemo ite mootiai dallu caina duere finode. Cai Moo Jusiñamui caina llofuellena, caina duere finode. Naimie illa isoi, mare rafue dibeimo caina itataiacade.

¹¹ Jusiñamuimona duere cai sefuiua, iena gaiñedicaí. Iena jitaiñedicaí; iadedi naiemona cai fueoia, jeacinona dane cai finoñellena, naimie jitailla isoi marecinona finocana jaiticaí.

Jusiñamui rafuena cai cacaiua, iena cai aruiruiñena

¹² Nie isoide ramo caimo jiria: “Jusiñamui caina nibai canoñede” raiticaí. Iemona naimiena fainonocaiacadicaí; ia iemo cai comeciaina cai facañena. Jusiñamui rafuena cai sefuiruua, duere cai sefuiua, nie isoide rafue caimo ia, cai comeciaina ocuiñocana mai cai jailli. Jusiñamui caina canuamona, naimiena cai raise ñnuamona, cai comeciai ocuiñocana mai cai jailli.

¹³ Jiaie rafuedo cai jaiñena; iadedi Cristo rafuedo raise ñnocana mai cai jailli. Iese cai jaia, Cristo rafuedo naimaci jiai raise jaillena, jiaie creyentiaina canoiticaí.

¹⁴ Nana comini diga uri omoi i. Jusiñamui jitailla isoi, marecinona fino. Iese bu iñenia, Jusiñamui jitailla isoi bu marebicaiñenia, Jusiñamui illanomo jaca iñeite.

¹⁵ Jusiñamui caina duenaillamona, nana cominina jillotaiaacade. Omoimona buna Jusiñamui duenaillacinona fainonocailana jitaiñedicue. Omoimo iese suia, iemona conini gaiñenacino comuirede. Iena jitaiñedicue. Omoi comeciai daje isoi lloillana jitaidicue.

¹⁶ Jearede rafuena jaca finoñeno. Esaú micori jaiie finoca rafuena uñnotomoi. Jusiñamui ie moo Isaac micorimo mare rafuena suillena llote. Esaú nano doforamiena illamona, ie moo fiódaille mei, Jusiñamui jai lloga rafue ie moo uai diga, ie moo ra diga, naimie feiñoiacade. Naimie moo nai fiódaiñena facaise dacaiño Esaú aimetailla jira, ie amamona guillena jicade. Iemei naie guille ifomo ie moomona feiñolle uaina ie amamo fecade. Naie facaise dama ie jitailla ramo comecina facade.

¹⁷ Ie amamo ie uaina fecaja mei, ie comeci iuai meidote. Naie uai naimiemo dane illana abido jitaide; iadedi ie moo ie amamo jai fecade. Esaú eo eede; iadedi ie moo ie uai naimiemo jai fecanide. Jusiñamui lloga rafuemo Esaú comecina facañede. Naimie isoi Jusiñamui rafuena omoi jamaiñeno.

¹⁸ Moisés micori facaise cai hebreos cominimo Jusiñamui ie rafuena jaiie llote. Sinaí railla anedumona llote. Iena cacajanona, naie comini eo jaciruitimaci. Jusiñamui naie anedumo billanona, anedumona irai boode. Jiai jitibicaide. Nainomo aifi eo ite. Eo boriuide. Eo gurude.

¹⁹⁻²⁰ Trompeta ficirenana cacadimaci. Iena ciuanona, iena cacajanona, eo jaciruitimaci. Jusiñamui naimacimo jai llote: “Bene cue illa jira, jaca buna bie anedumo biñena. Nainomo bu bia, nie toñiaí nainomo macaria, nofici diga fairinuamona, naimiena omoi meine” llote. Jusiñamui llua cacajamona, eo jaciruitimaci. Moisés micorimo: “Jusiñamui caimo nia llua jai jitaiñedicaí” llotimaci.

²¹ Eo jacirede ra illa jira, nana comini diga Moisés jiai jaciruite.

²² Sinaí anedumona lloga rafuedo birui jaiñedicaí; iadedi jiaie rafuedo birui jaidicaí. Birui Jusiñamuina atona nabaidicaí. Cai hebreos comini isoi, Sión railla anedumo Jerusalémo Jusiñamui jofomo naimiena nabailana jaiñedicaí. Monamo Jusiñamui ite; iadedi birui naimiena atona nabairedicaí. Cai fiódaiua, naimie dine jaiticaí, naimie diga jaca cai illena. Nainomo ie jaienisaí naimiemo iobillacinona fecacabidimaci.

²³ Ailluena comini diga, Cristona birui ñnoticai. Nana caina Jusiñamui fetuanona, cai mameciai monamo ite rabenicomo jai cuega. Jusiñamui nana comini comeciaina uifote. Naimiena ñnotinomona ailluena jai fiodaitimaci; ia naimie ecimo naimaci joreñuai jiai jai itimaci.

²⁴ Jesús fiodailla jira, Jusiñamuina nabairedicai. Naimie fiodailla jira, caimo jiaie rafue birui ite. Naie rafuena cai ñnuamona, cai comeciaini jai marena iticai. Jiai cai jeacinona oni dotade. Iena jiai jai feitate. Abel micori jaie fiodaia, naiemona Jusiñamui buna ie jeacinona feitañede; iadedi Jusiñamui Abel micori meinetimiemo ibana ote.

²⁵ Ero, Jusiñamui rafuena omoi cacaia, iena jamaiñeno. Iena aruiruiñeno. Moisés micori micorimo ie rafue luu facaise, Jusiñamui lloga rafuena cacadimaci. Jaiño iena jitaiñedimaci. Iena ññoñedimaci. Ie jira Jusiñamui naimacina duere finode. Cristomona jiaie rafue birui cacadica. Bie rafuedi Moisés lloga rafue baifemo faite. Jusiñamui duere finollicinomona buna jillobinide. Cai duere sefuiñellena, Cristo rafuena cai ñnuua.

²⁶ Moisés micorimo ie rafue luu facaise, Jusiñamui naie eniruena niraidotade. Jusiñamui jairuido jiai llote: “Eniruena dane niraidotaiticue. Ucuaina, fivua, jitoma diga, jiai niraidotaiticue” llote.

²⁷ Naimie lloga uaimona enirue fullena uifotica. Monamo ite ra fullena jiai uifotica. Nana naie rana naimie fuidoite; iadedi naimiena cai ñnuua jira, naimie caina fuidoñeite. Ico cai illinona jai finode. Iena naimie fuidoñeite.

²⁸ Illaimana naimie illamona, naimie caina sedaite. Ie jira naimiemo iobilacinona cai fecaja. Naimiena cai ñnuamona, naimiena cai raise sedajamona, naimiena cai iobitaja.

²⁹ Naimiena ññoñedinona Jusiñamui eo duere finolle jira, naimiena jaciruillanona naimiena cai ñnuua.

13

Jusiñamuina cai iobitaja

¹ Dani conini jiaie creyentiaina isiruicana omoi jai.

² Abraham micori Jusiñamui jaienisaina uifoiñeno jaie nafuete. Jiaie illanomona jiaie creyentiaia bia, naimaci inillino iñena jira, naimacina nafue. Jusiñamuimona ibana feiñoitomo.

³ Cristo rafue muidona damerie creyentiaia cárcelmo itimaci. Nainomo omoi jiai itomoidena, naimacina feitañeno. Naimacina isiruillamona cano. Damerie creyentiaia duere sefui, naimacina jiai cano. Jairuido naimaci isoi nibai duere sefuitomo.

⁴ Airedimie jiaie riño diga illemo ie comecina facañena. Inirediñaiño jiaie ñima diga illemo ie comecina facañena. Ie añede riño diga bu ia, ie iniñede ñima diga bu ia, marañede. Iena finoñeno. Iena bu finoia, ie jeacino Jusiñamuimo lloñena, Jusiñamui naimiena duere finoite. Naiñaiñoña jiai duere finoite.

⁵ Ailluena ucube ollena, iemo naciñeno. Omoimo ite ra diga caimare i. Iena Jusiñamui facaina lloñaima jaie cuega: “Jusiñamui llote: ‘Omoina jaca canoiticue. Omoina jaca fañonocaiñeiticue’ llote”.

⁶ Naiena cai uifnuamona, cai comeciaina ocuiñoitica. Jaie ciegafue isoi lloitica:

Cai Nama caina canoite.

Ie jira cai comeciaini jarire finoñeiticai.

Buena jaciruiñeiticai.

Jaiñie buena caina jaciruitanide.

7 Cristo rafuena omoimo navui lloganomo omoi comeciaina faca. Naimacimona Cristo rafuena nano cacadomoi. Cristo dibeimo naimaci illamo omoi comeciaina facajanona, naimaci isoi Jesucristona inocana mai omoi jai.

8 Naimie jaca inogamiena uinoticaí. Naimie ie lloga uaina jaie jaca finode. Iena birui finode. Ico iena jaca finoite. Ie jira naimiema cai inua.

9 Cristo ieñede rafuedo jaiñeno. Diga jiaie llofuacino ite; iadedi iedo jaiñeno. Jusiñamui caina canuamona, cai comeciaina birui ocuinocana jaiticaí. Moisés micorimo lloga rafuedo navui jaidicaí. Diga ra fimaide; iadedi naiedo cai jaillamona, cai comeciái raise illena, buena oñedicaí.

10 Cruzmo Cristo fiodaillamona, cai jeacino facaina fiodaite. Moisés micori lloga rafuedo nia jaidino Cristo rafuemo duñedimaci. Naie comini facaina ñairaini Cristo rafuemo duñedimaci.

11 Moisés rafue llua isoi, nanoca ñairaima toiniaina faja mei, naie dirue dacaño naga año fo iticuartomo uite; iadedi naie toi abi naimaci comini illanomona jino uite. Iena jai jitañena jira, nainomo iena jobaide.

12 Ie isoide. Cristona comini jitañena jira, ie comini nairaimona jino uillanona, naimiema meinetimaci. Nainomo jeacino facaina fiodaite, comini comeciaina raise finollena.

13 Ie jira Moisés micori lloga rafuena cai fainonocaida, dani Jesucristo rafuedo cai jailli. Naimiema jeare finodimaci. Caina jeare finoia, naimiema jaca inocana cai jailli.

14 Beno jaca cai illemo ocuriñedicaí; iadedi monamo Jusiñamui diga cai jaca illemo ocuridicaí.

15 Jesús finoca rafue muidona, Jusiñamuimo iobillacinona jaca cai fecaja. Jusiñamuina cai uinuamona, naimiemo iobillacinona jaca cai fecaja.

16 Marecinona finocana mai cai jailli. Jiaie croyente jitai raillano, omoi raruaimona naimiema omoi cano. Iena omoi finoia, Jusiñamui omoi iobite.

17 Omoi llofueraini uaina ino. Naimaci anamo raise omoi i. Cristo dibeimo omoina raise itataiacadimaci. Iese naimaci finoacaiñenia, Jusiñamui naimacina duere finoite. Naimaci uaina omoi inoia, Cristo dibeimo caimare maijitimaci. Naimaci uaina omoi inoñenia, sunaitimaci. Sunailla jira, naimaci llofuacinomona buena oñeitomoi.

18 Jusiñamui diga omoi ñaia, cai facaina omoi jii. Jusiñamuimona cai comeciái marena illana uinoticaí. Naimie jitailla isoi, mare rafuena finocana jaiacicaí.

19 Omoi dine cue raire illena cue facaina Jusiñamuimo eo omoi jii.

Naimaci marena jaca illana jitaide

20 Jusiñamui conini omoi comeciaina uri itatajana jitaide. Cai Nama Jesús fiodailla mei, Jusiñamui naimiema jai jillotate. Jusiñamui llua isoi, Jesús fiodaite. Naimie fiodailla jira, Jusiñamui cai jeacina feitate. Naimie fiodailla jira, naimie anamo cai illamona, caina raise sedarede.

21 Jusiñamui ie jitaillacino omoi finuana canoite. Cristona omoi inuana canoite. Mare rafuena omoi finuana canoite. Jesucristo uaido omoina canoite, naimie jitaillacinona omoi finollena, Jesucristomo iobillacinona cai jaca fecajasa. Iena jitaide.

22 Cue amatiai, bie cartana caimare feño. Eo are rafuena cueñedie. Janore cuetie.

23 Cai ama Timoteo cárcelmona jai jino bite. Cue dine naimie raire bia, omoi dine naimiema atitue.

²⁴ Nana omoi llofuera inimo cue uaina oredicue. Ua nana creyentia inimo cue uaina oredicue. Itiamona bitino imaci uaina jiai oredimaci.

²⁵ Jusiñamui omoi na jaca duena illana omoi uifua na jita idicue. Mai. Macaibaite.

SANTIAGO ORETAGA RABE

Uaiduacino

¹ Caimaci, omoimo cartana oredicue. Santiagodicue. Cue mameci jiaicidi Jacobo. ¿Nigacino? ¿Nie isoidomoi? Jusiñamui jitailla rafuena cue finuamona, bie rafuena llofuecabiticue. Cai Nama Jesucristo facaina jiai llofuecabiticue. Cai doce nairaiamo omoi duillamona, omoi jai judaisilla jira, omoimo cue uaina oredicue.

Ramo omoi jiriadedi, omoi comeciaina mairita

² Amatai, diga ie ramo omoi jiriadedi, eo iobilla.

³ Ramo omoi jiriadedi, Jusiñamui uaina raise omoi iinuana uiñoitomoi. Iemona omoi comeciaina mairillemona, inocana omoi jaitomoi. Biena omoi uiñua jira, iobilla.

⁴ Mairicana omoi comeciaina jaiia, omoi comeciaini marebicaite. Marebicailamona, omoi comeciaini buena fiebicaiñeite. Nana Jusiñamui llogacinuaina ja muidomoi inoitomoi;

⁵ iadedi omoimo rafue ia, niese nibaiana omoi uiñoñenia, Jusiñamuimo jica. Ie mei omoimo naimiedi abi uiñoracinona iite. Jusiñamuidi nana naimiemo llotinomo iena caidiñeno icabilla jira, omoimo iena jiai iite;

⁶ iadedi omoi jicaia, uai inuanona jica. Omoi comeciaina inoñenia, jicañeno. Comecina inoñediñedi aifi betaja jorai isoide. Naimie comeci naganomo iite.

⁷ Naimiedi Jusiñamuimona ra feiñollemono tainona sedaite.

⁸ Naie isoidimiedi nana naimie illa dinori ie comeci naganomo iite.

⁹ Naimie ramo jiriadedi, Jusiñamuimona naimie jamai bue isoñena jira, duerede croyente iobilla;

¹⁰ iadedi ramo jirillamona ie ucubena naimie faifia, Jusiñamuimona naimie ucubedi ieñena jira, ucuberede croyente iobilla. Safia isoi, naimie ico safenaite.

¹¹ Jitoma ia ia, eo ecasillamona, safia safenaite. Lliride. Ie mei jai ebinide. Jai iñede. Ie isoi ucuberedimie safenaite, naimie maijianona. Ie mei naimie ucube bene jamai fiebite; ia Jusiñamui diga naimie jaca illamona, naimie jaca iobite.

Nana mare rafue Jusiñamuimona feiñoticaí

¹² Ramo jiritimiedi ie comeci mairia, caimare iite. Jai naimie facacifilla mei, naimie comeci mairilla mei, Jusiñamuidi naimiema caimare itataite. Jusiñamui jai llote: “Cuenta isiruitinona cue illanomo jaca itataiticue”.

¹³ O ramo bu faia, lloñeno: “Jusiñamuidi cuenta ramo faite”. Maraiñede rafue diñemo naimie iñena jira, naimiedi buna ramo jaca fañede.

¹⁴ Cai comeciño naie jitaillacino illa jira, ramo faia uai inoticaí. Naie facaiseconi caimona ebirena jirari, iena finoacadicaí.

¹⁵ Cai jitailla jira, jeacinona finodicaí. Jeacinona finocabillanona jaillano, faifiticaí.

¹⁶ Ero, cue isiruiga amatai, Jusiñamui omoína ramo faitatañena jira, naimiemono da mare rafue billa jira, dani omoi abina jifueñeno.

¹⁷ Nana mare rafue cai Moomona feiñoticaí. Naimiedi monamo ite lligaiñoraniaina jaiie finode. Naie radi nagarui daje isoi lligaiñofede; iadedi naimie daje isoñede. Naimie comeci jacanano danocni nagarui ite.

18 Naimie jitailla jira, ie uai lluanu, naimie caina ie uruiaina itatate. Ie uruiaimona nano doforanidicai.

¿Nie isoide rafuena finoacadica?

19 Cue isiruiga amatiai, Jusiñamui rafuemo raise cacarei. Ie mei naie uaina uaitañeno. Jiai raire iciriñeno.

20 Icirillamona, Jusiñamuidi cai marena jitailla isoi, buna jaca marebi-cañede.

21 Ie jira nana marañedicinona oni fainonocai. Jusiñamui uai omoi comecimo fecuise abi iedoñeno nagarui feñocana omoi jai. Naimie ie uai omoi comecimo jai itatate, iduai eniruemo cai rilla isoi. Iduai sicuamona, llisilladi ite. Jusiñamui uai cai comeciaino itabillamona, caina jillotarede.

22 Cacajamona iena ñnocana jai. Cacajanona iena omoi ñnoñenia, dani abina jifuetomoi.

23 Bu naie uaina cacajamona ñnoñenia, naimiedi acaranimu eruaidimie isoide.

24 Ie uiecona eruaide. Naimie jailla meinocni, ie eruaila ie uiecona jai raire feitate.

25 Jusiñamui llogacinona bu eo facajia, iena feitañede. Iena ñnote. Naie uaidi jearedicino ie finuamona naimiena marena itatate. Jusiñamui uaina naimie feitañena jira, iena ñnua jira, naimie comeci caimare ite.

26 “Jusiñamuina sedadicue” raillanona ie comecina facadimiedi jeare ñaia, marañeno ñaia, dama naimie abina jifuate. Jusiñamuina taino sedade.

27 Cai Moo Jusiñamuina bu marena raise sedaacania, diga rafuena finoite: Naimiedi moonidinona canoite. Feciñuaina canoite, imaci sure illa facaisec-oni. Jeacinona jiai finoacaiñeite. Jusiñamui dibeimo ñfedino isoi iacaiñeite. Jusiñamui naimie iese sedajia, Jusiñamuimona eo mare.

2

Nana cominimo comeciaina lloitaicadica

1 Amatiai, cai Nama Jesucristo uai eo ebirede. Naimiena omoi ñnua jira, naimacimo daje isoi comeciailloillamona, nana cominina daje isoi nafue.

2 Ero, omoi roracomo mena ñma bia, ¿nie ñmana nafueitomoi? Damie ucuberedimie. Naimiemo oro ie anillos ite. Eo mare iniroina jitade.

3 Ucuberedimiemo llotomoi: “Bai bene bancomo rai”. Dueredimiemo llotomoi: “Bai bene naidai. Raiacania, eniruemo rai”.

4 Iese omoi lloia, damiena jai raise nafuetomoi; ia damiena jai raise nafueñedomoi. Iaimaia iniroimo omoi eruailamona, nafuetomoi. Mare rafuemo comeciaina facañedomoi.

5 Cue isiruiga amatiai, cacarei. Jusiñamuidi dueredinona fetode. Cominimona dueredimaci; ia Jusiñamuimona duenedimaci, naimiena naimaci eo ñnua illa jira. Naimiena naimaci isiruilla jira, naimie cominina jai jaidimaci. Naie isoidinomo jai llote: “Omoimo cue illanona iiticue”.

6 Ero, Jusiñamui dueredinona nafuete; iadedi dueredimiena jai nafueñedomoi. Dueredinomona duere sefuiñedomoi; ia dueredimiena jai duere finodomoi. Ucuberedinomona duere sefuicabidomoi; ia ucuberedimiena raise nafuetomoi. Maijitalena, juez dine ucuberedino omoina uitatimaci, omoina llogidollena. Dueredino iese omoina finoñedimaci; ia ucuberedinodi iena finocabidimaci.

7 Cristomo omoi jainaiailamona, ucuberedino naimiena jeare jiai ñnitimaci.

8 “Cristo llogacino finodicai” raillanomo comeciaina facajamona ucu-beredimiena omoi nafueia, cuemona mare. Cristo naiena iese caimo llote: “O jofo ecimo itinona isirui, dama o abina o isiruilla isoi”. Iese omoi ia, cuemona mare;

9 iadedi nana cominina daje isoi omoi nafueñenia, jeacinona jai finodomoi. Jai Jusiñamui llogacinona ñnoñedomoi. Jusiñamui llogacinomona jai marañeno itomoi.

10 Nana Jusiñamui llogacinuaimona daje llogacinona omoi ñnoñenia, Jusiñamuimona nana naie llogacinuaina jai ñnoñedomoi.

11 Jusiñamui caimo jai llote: “O aññede riño diga iñeno. O ñniñede ñima diga iñeno”. Jai llote: “Jaiñmiena meineñeno”. O aññede riño diga iñedio; iadedi jaiñmiena o meineia, nana Jusiñamui llogacinuai jai ñnoñedio.

12 Jaiñruido Jusiñamuidi juez isoi omoimo llote. Omoi comeciaino iticino diese omoimo llote. Ie jira marena ñaino. Marena i.

13 Ero, omoimo naimie lloia, jaiie cominina omoi birui duenaiñenia, Jusiñamui naie facaise omoina duenaiñeite. Omoimo riire llote. Omoina duere finoite; iadedi jaiie cominina birui omoi duenaia, Jusiñamui naie facaise omoina jai duenaite. Duere sefuillena omoimo lloñeite.

Jusiñamuina cai ñnuamona, diga rafuena cai finua

14 Amatiai, “Jusiñamuina ñnoticue” raitimiedi mare rafuena jaca finoñenia, ¿niese naie ñnoracinodi naimiena jillotaite? Jillotañeite.

15 Niese rafuedo iena lloiticue. Omoimona daje creyente iniroinia, guille iñenia,

16 naie creyente omoi ñine bia, naimiemo omoi lloia: “Mai jai. Rosiruñeno. Marena ailluena guiño”; ia naimiemo jaca buena omoi fecañenia, ¿bue ñellena iese naimiemo raitomoi?

17 Ero, Jusiñamui omoi ñnuamona mare rafuena omoi finoñenia, omoi ñnoracino ieñede.

18 Omoimona damie cuemo ñibai llote: “Jusiñamuina raise ñnoticue”. Jaiñmie cuemo ñibai llote: “Mare rafuena finocabidicue”. Iaimaiaino lloiticue: “Jusiñamuina cai raise ñnoia, mare rafuena finocabiticai. Mare rafuena cai finuamona, Jusiñamuina cai raise ñnuana uifñotitcai”.

19 Dajede Jusiñamuidi illana ñnotio. Iena o ñnuano, mare; iadedi jananiai iena jai ñnotimaci. Ie jira Jusiñamuina jaciruñimaci.

20 “Jusiñamuina raise ñnoticue” ñibai nia raitio. Abina raise nia uifñotedio. Mare rafue o jai finoñenia, dama abi o ñnoracinodi ieñede.

21 ¿Niese Jusiñamuimona cai usuma Abraham micoridi marebicaide? Naimiedi mare rafuena finuamona marebicaide. Jusiñamui jitailla rafuena naimie finuamona, faga ocaina isoi, naimiedi Jusiñamuimo ie jitona fecade. Naimie jitodi Isaac micori.

22 Abraham micori ñnote. Mare rafuena jai finode. Mare rafue naimie finuamona, naimie jai raise ñnote.

23 Temona Jusiñamui ie llogacino suide. Iena Moisés micori cuete: “Abraham micori Jusiñamuina ñnote. Ie jira Jusiñamuimona naimie marebicaide”. Jai cuete: “Naimiedi Jusiñamui nabai”.

24 Abraham micori rafuemona daje rafuena uifñotitcai. Dama ie ñnoracino diga jaca bu marebicañede; iadedi Jusiñamuina ñnuano, mare rafuena finuano, marebicaide.

25 Jaiie rafuedo iena lloiticue. Jaiie Rahab raillañaiño ite. Naiñaiño calirediñaiño. Mare rafuena finuano, naiñaiñodi Jusiñamuimona marebicaide. Naiñaiñodi ie jofomo Josué ie rafuena uiraimaiaina feñote. Naiñaiño nairaidi

iaimaiaina meinellena jenodimaci. Meineñellena, naiñaiño iaimaiaina reide. Ie mei iaimaiaina bainino oretate. Mare rafuena naiñaiño finuamona, Jusiñamuimona naiñaiño marebicaide.

²⁶ Ero, bumo ie joreño jai iñenia, cajeñede. Ie isoide. Mare rafue bu finoñenia, ie ñnoracinodi ieñede.

3

Cai fuiaimona jeacinodi comuide

¹ Amatiai, omoimona diga comini creyentiaina llofuerañina jaiñeno. Jusiñamuidi juez isoi ico lloite. Llofuerañi jiaie comini baifemo uiñuamona, Jusiñamui rafuena naimaci eo raise ñnoñenia, Jusiñamui naimacina jaino baifemo duere finoite. Iese riire naimacimo lluaña jaciruillano, llofuerañina ailluena jaiñeno.

² Nana caidi diga maraiñede rafuena finocabidicai. Maraiñedinona bu ñaiñenia, jai marebicaide. Naimie nana ie comeci namarede.

³ Jiaie rafuedo iena lloiticue. Caballos cai jitailla rana finollena, imaci fuemo lloemamona finoca janorede rana joneticai. Ie mei nana caballo ie abina namatadicai.

⁴ Riire aifi aillue botena ñine uicade; iadedi eo janorede quilla diga, ie jailla dine piloto botena dataoicaide.

⁵ Ie isoide cai fuiai. Eo janorede; iadedi cai fuiaimona diga rafuena comuide. Ero, eo janorede iraimona nana rasillaina bootate.

⁶ Cai fuiaidi irai isoide. Caimo jeacinona eo finotate. Nana cai comeciaina jearetatate. Taifemona ie uai ote. Nana cai ille ñinori caña jearedicinona finotaiacade.

⁷ Nana rana toiredicai: ocainai, sillini, ofomai, eniruemo bicaidino, lliciai. Nana toiredicai;

⁸ Iadedi jaca bu ie fuena namatanide. Cai fuiai jaca eo maraiñede. Iemona eo maraiñede rafue icabite.

⁹ Cai fuiai diga cai Namamo, ua cai Moomo, marecinona lloticai. Caina naimie finuamona Jusiñamuina eruaidicai; iadedi cai fuiai diga naimiena jeare jiai ñaiticai.

¹⁰ Cai fuedi dajede; iade marecinona ñaiticai. Maraiñedinona jiai ñaiticai. Amatiai, iese cai ñaiñena.

¹¹ Ero, daje pozomona mare jinui, erirede jinui diga, oñedicai.

¹² Amatiai, higuera railla riarmona aceitunadi comuiñede. Uvas railla riarmona higo railla riaradi jiai comuiñede. Cuerede jinuiamona mare jinuiña oñedicai. Cai fuiaimona jeacino comuiñellena, cai fuiaina cai namataja.

Ua abi uiñoracino

¹³ Omoimona, ¿bu ua abi uiñote? Naimie ua abi uiñoia, naimie marena illamona, iena uiñoitomo. Abi iedoñoeno mare rafuena naimie finoia, naimiemo ua abi uiñoracino illana uiñoitomo;

¹⁴ Iadedi naimie abi eo uradoia, dama naimiemo ite ramo comeciña facaia, naimie abi uiñoracino diga naimie abina iedoña. Jai tainona llote. Naimie llua isoi iñede.

¹⁵ Naie isoide uiñoracinodi Jusiñamuimona iñede. Bie enirue ie. Comini ie. Taife ie.

¹⁶ Comini abina uradoia, dani naimacimo ite ramo comeciña naimaci facaia, comini uri iñedimaci. Diga maraiñede rafue naimacimo ite.

17 Jusiñamuimona ite ua abi uiñoracinodi mare. Bumo ia, uri ite. Riinide. Comeci jinide. Jiaie cominina duenaite. Mare rafuena finocabide. Cominina raise nafuete. Abi tainona jifueñede.

18 Bu uri ia, jiaie cominina uri itatate. Ie jira naimie marena iite, Jusiñamui jitailla isoi.

4

¿Bue ñellena uri iñedica?

1 ¿Bue ñellena fuiriruidomoi? ¿Bue ñellena iciriruidomoi? Omoi comeциаimo maraiñedicino illa muidona. Omoi comeциаimo maraiñeno jitaillacino illa muidona. Naie jitaillacino omoi comeциаimo namatacana muidona.

2 Rana jitaïdomoi. Iena omoi feiñoñena jira, naimaci rana fiïllena, comena meinetomoi. Eo uradoidomoi. Omoi jitaïlle rana feiñoñena jira, fuiridomoi. Omoi jitaïlle rana Jusiñamuimo omoi jicañena jira, iena feiñoñedomoi.

3 Jiaicaiño Jusiñamuimo jicadomoi; iadedi raise jicañedomoi. Ie jira iena feiñoñedomoi. Dani omoi jitaïlla ra feiñoñllena, omoi comeci jaisillena, jicadomoi.

4 Jusiñamuina birui raise jitaïñedomoi; ia naimie ðibeimo iñedinona jai jitaïdomoi. Bie eniruemo ite rafuena omoi isiruïllamona, Jusiñamuina jai raise nabaiñedomoi. ¿Ñiese iena uiñoñedomoi? Bu naie rafuena isiruïacania, Jusiñamui ðibeimo jai iacaiñede.

5 Jusiñamui cuetatagafuïaina raise facañedomoi. Naiedi caimo llote: “Jusiñamui omoïmo jai fecaca Joreñodi omoi comecina eo raise namataacade”.

6 Caina eo duenailla jira, naimie ðibeimo cai raise illena, Jusiñamuidi caina eo canoacade. Jusiñamui cuetatagafuïai iena llote: “Jusiñamuidi abi iedotimïena canoñede; iadedi abi iedoñedimïena canode”. Naimie ðibeimo iacaiñedimïena ñaite. Naimie ðibeimo iacadimïena canuana jiai ñaite.

7 Ie jira Jusiñamui anamo omoi i. Naimïena raise omoi ñno. Taiße uaina jitaïñenanona, naimie uaina oni caiño. Ie mei omoïmona naimie oni jaite.

8 Jusiñamuina nabaiñllena, naimie ðine iaïre omoi i. Ie mei naimie omoi ðine iaïreno iite. Jeacinona finoraini, omoi comeciai iuaillaina meido. Naganomo omoi comeciaïna facañeno. Omoi comeciaïna marena fino.

9 Maraiñede rafue omoi jai finuamona, omoi sunai. Jaisiñeno, ie ia omoi jeacino facaina omoi mai ee. Caimare iñeno; ia omoi jeacino facaina omoi mai sunai.

10 Jusiñamui ðibeimo abïna iedoñeno omoi i. Ie mei naimie omoi comeciaïna iobitaite.

Jiaino jinafomo jeare ñaiñeno

11 Amatiai, maraiñede rafuena naimaci finoïadedi, jiaino jinafomo jeare ñaiñeno. Creyente jinafomo bu jeare ñaïa, creyentena bu jicoïa, creyentena naimie isiruïñena jira, Jusiñamui uaina raise ñnoñede. Jusiñamui uaina naimie ñnoñenamona, Jusiñamui uaina jiai jamaiñocaïde.

12 Jusiñamuidi maraiñede rafuena finodimïena duere finoite. Cai jeacinomona caina jillotarede. Cai jeacino facaina caina duere finorede. Ie jira jiaïe creyentena jicoñeno.

Ico are caimo suite rafuena uiñoñedicaï

13 Jiaïe rafuena lloïacadicue. Nibaï llotomoi: “Birui jiaïe nairaimo jaiticai. Birui cai jaiñenia, ico are jaiticai. Rana fecajamona ucube cai ollena, nainomo ðaje año iiticaï”.

¹⁴ Iese llotomoi; iadedi nie isoide rafue ico are illena uiñoñedomoi. Cai ille dñori uillie illa isoi iticai. Dallu bene iticai. Ie mei jai iñedicai.

¹⁵ Ie muidona omoi llua: “Cai Nama jitaia, nia iticai. Cai Nama jitaia, nie isoide rafuena finoiticai”.

¹⁶ Iena lloñedomoi; iadedi dani omoi comeciaina facajano llotomoi. Iemona eo abina iedotomoi. Abina ieduardi maraiñede.

¹⁷ Mare rafuena finuana uiñotimiedi mare rafuena finoñenia, jeacino jai finode.

5

Ucuberedinomo llucino

¹ Ucuberedino, daje rafuena omoimo jiai lloiacadicue. Omoimo ramo jirite. Ja eo duere sefuitomoi. Ie jira cuiiri-cuiiri ee.

² Omoi raruiai ja sabite. Omoi mare iniroi ja sabite, ibuisai guilla jira.

³ Omoi ucube ja ieñeite. Ieñena jira, comini omoi faifillana uiñoitimaci. Abina faifitomoi, iraimo ra boa isoi.

⁴ Ero, ailluena ucube irairuillai iena jai eenotomoi. Naie facaisedi jai ride. Omoi maijiraini maijiamona ucubedi omoimo nia ite. Omoi eniruemo maijimidaci; ia naimacina raise ibañedomoi. Jai eedimaci. Cai nanoca Nama iena cacade.

⁵ Omoi illa dñori ailluena raruiai omoimo ite. Nana omoi comeciai jitailla rafuena finodomoi. Omoi comeci jitailla isoi itomoi. Naie iba ollirui jai ride.

⁶ Maredinona duere finodomoi. Nie isoide rafuena omoimo finoñedimaci. Abina ridoñedimaci; iadedi naimacina meinetomoi. Ie jira Jusiñamuimona ja duere sefuitomoi.

Cai Nama billemo fecuise omoi ocuiri

⁷ Amatiai, cai Nama billemo fecuise omoi ocuiri. Cominidi imaci illimona riaru feiñuana sedadimaci. Noci deillemo fecuise ocuiritimaci. Ie mei riaru llisillana otimaci.

⁸ Ie isoi cai Nama billemo fecuise ocuiri. Omoi comeciai rucaicueriñeno, cai Nama bille iaie illa jira.

⁹ Duere omoi sefuia, Jusiñamui juez isoi omoimo lloi raillano, “Jiaie creyente muidona duere sefuidicue” raiñeno. Jusiñamui omoi illana raise uiñote.

¹⁰ Amatiai, Jusiñamuina lloraini micoriaimona cai fueua. Cai Nama dibeimo ñaitimaci. Duere sefuidimaci; iadedi eecuiñedimaci.

¹¹ Naimaci Jusiñamuina fainonocaiñena jira: “Naimaci comeciadi caimare itimaci” raiticai. Job micorina jiai comeciticai. Naimie jaie ite. Naimie eeñeno duere sefuide. Duere sefuide; ia Jusiñamuina fainonocaiñede. Ie mei ja muidomo nie isoide cai Nama naimiena finuana uiñotica. Cai Namadi naimiena duenailla jira, naimiena raise canode. Caina jiai duenaite. Ie jira caina jiai canoite.

¹² Cue amatiai, nanoca rafuena nia lloiacadicue. Omoi lloga uai omoi finollena jiaie comini uiñollena, Jusiñamui mamecina llinotomoi. “Iena cai llinoia, cai lloga uaina cai finoñenia, Jusiñamui caina duere finoite” raitomoi. Omoi lloga uai omoi finollena, Jusiñamui mamecina jamai ebena llinoñeno. Monamo ite ra mamecina jamai ebena llinoñeno. Eniruemo ite ra mamecina jamai ebena llinoñeno; iadedi nie isoide rafuena omoi lluumona, uanaicinsona jaca llono. Iese llono, Jusiñamui omoina duere finoi raillano.

¹³ Omoimona duere sefuidimie ia, naimie Jusiñamuimo jicaja. Comeci caimare itimie ia, Jusiñamuimo iobillacinsona rua.

14 Duidimie ia, naimaci naimieri Jusiñamuimo jillena, creyentiaina sedarainina uaidua. Naimacidi farena naimie abimo gia, cai Namamo jiihana, naimie ie duicomona jilloillena.

15 Inuano jiiia, jilloite. Cai Nama naimiena jillotaite. Naimie finoca jeacinona oni jiai dotajite.

16 Ie jira coninimo omoi maraiñedicinona llono. Ie mei Jusiñamuimo coniaina omoi jii, omoi duicomona omoi jilloillena. Jusiñamuimo marebi-caidimie jiiia, diga rafuena finorede.

17 Eliana comeцитomoi. Jaie ite; ia naimiedi cai isoide. Jusiñamuimo jiiide, noci deiñellena. Ie mei daje amani fiemona abimo atomonado jaca deiñede.

18 Ie mei dane jiiide, noci deillena. Ie jira noci deide. Ie mei riana dane sicode.

19 Amatiai, omoimona damiedi Jusiñamui ie uanaicino dibeimona jiaia, dane Jusiñamui dibeimo naimiena bu itataia, eo mare.

20 Iena bu finoia, naimiena ie uaiñedicinomona itatate. Faiñillemona jai jillotate. Jusiñamuidi naimie jeacinuaia oni dotajamona, iemona jiai jillotate. Mai. Santiagodicue.

PEDRO NANO ORETAGA RABE

Tuude cominimo Pedrodi cartana cuete

¹ ¿Nigacino? ¿Nie isoidomoi? Bie carta omoimo oredicue. Pedrodicue. Jiaie comini motomo birui itomoi. Ponto railla eniruemo itomoi. Galacia railla eniruemo itomoi. Capadocia railla eniruemo itomoi. Asia railla eniruemo itomoi. Bitinia railla eniruemo itomoi. Diga eniruemo omoi tuua jira, bie rafuena omoimo lloiacadicue.

² Naimie jitaillamona, cai Moo Jusiñamui omoina fetode. Naimie Joreñodi omoimo illamona, omoi comeciaina marebicaitate. Jesucristona omoi inollena, omoi jeacinomona omoi jilloillena, Jusiñamui omoina fetode. Jesucristo fiodailla jira, naimie diailla jira, naimie cominina jaidomoi. Jusiñamui omoina duenaillana uñocana mai omoi jai. Jusiñamui omoina uri itatajana uñocana mai omoi jai.

Jesucristo diga jaca cai illemo ocuridicaí

³ Naimiedi cai Nama Jesucristo ie Moo illanona, cai Moo Jusiñamuimo iobillacinona cai fecacabillesa. Naimie caina eo dueruillamona, naimiedi cai comeciaina raise finode. Fiodaillamona Jesucristo jillua jira, naimie diga jaca cai illena, inocana cai jaillamo jiaí ocuridicaí.

⁴ Omoi ocurillafuedi monamo ite. Fafiñeitomoi; ia nainomo caimare marena jaca iitomoi. Jusiñamui iese omoina itataite.

⁵ Jusiñamuina omoi inua jira, naimie illanomo ico omoi illena, ie uaido naimiedi omoina birui sedade. Ico Cristo bia, iena raise uñoitomoi.

⁶ Ieri iobidomoi; iadedi dallu diga rafuemonu duere sefuidomoi.

⁷ Jiaie rafuedo iena lloiticue. Ero, ua oro raise omoi uñollena, orona facacitomoi. Irai emodomo rainajamona, cocuillamona, gajamona, difai oro jai fiebide. Iena “Mare” llotomoi. Oro eo raifide; iadedi jaca inede. Ie isoide. Cristona omoi ua inuana facacillena, diga rafuemonu duere sefuidomoi. Inocana omoi jaillamona, Jesucristo abido bille facaiseconi Jusiñamuidi omoina: “Mare” lloite. Omoiri eo iobite.

⁸ Jesucristona jaca cioñedomoi; iadedi naimiena jai isiruitomoi. Naimiena jaca cioñedomoi; iadedi naimiena jai inotomoi. Ie jira eo iocire itomoi.

⁹ Cristona omoi inuamona, jeacinomona jai jillobidomoi.

¹⁰ Jusiñamui facaina lloraini micoriaidi Jusiñamui omoina jai duenaillana jaiie llotimaci. Jusiñamui omoina jilluana jaiie llotimaci. Iena naimaci raise cacaiñenia, naiemo comeciaina facauidimaci.

¹¹ Cristo Joreño naimacina uñotajamona, Cristona llotimaci. Cristo duere sefuillena llotimaci. Fiodaillamona naimie jilloillena jiaí llotimaci. Monamo naimie abido jaillena llotimaci. Bumo iese ico suillena uñoiacadimaci. Naie facaise illemo comeciaina jiaí facadimaci.

¹² Jusiñamuidi naie rafue naimacimo duiñenana uñotade. Naimacina naie rafue caimo duillana jiaí uñotade. Jusiñamui ie Joreña mona-mona naimacimo oretajanona, ie uaido naimaci llamona, naimie facaina llorainimona bie mare rafuena birui jai cacadomoi. Jusiñamui jaienisai bie rafuena jiaí raise uñoiacadimaci; ia cai isoi iena uñoñedimaci.

Naimie jitaillacinona cai inollena, Jusiñamui caina fetode

¹³ Ie jira omoi comeciái raise marena fino. Ebena jaiñeno. Jesucristo abido bia, Jusiñamui omoina jai jilloitajana ua raise uñoitomoi. Iemo iocire ocuri.

14 Jusiñamuina omoï nia uifñoñena facaise danï omoï comeciai jitaille rafuedo jaisoidomoi. Naimiëna omoï jai inua jira, naimiëna omoï nia uifñoñega facaise finoca rafuedo birui omoï jaiñeno. Mare uruiaï imaci moo uaina inotimaci. Jusiñamui uruiaïna omoï jai illa jira, naimie uaina ino.

15 Jusiñamui ie uruiaïna omoï illena, jai omoïna fetode. Naimie mareuilla jira, marena omoï i.

16 Iena naimiedi jaie cuetatate: “Cue mareuidimiëna isoi, marena omoï i”.

17 Cai Moona Jusiñamui illamona, naimiëmo birui jiidomoi; iadedi juez isoi nagamiëmo ico Jusiñamui llua jira, nana omoï ille dinori jaciruicana omoï jai. Nagamiëna ie maraiñede finoca rafue diese duere finoite; ia maraiñede rafuena finoedimiëna duere finoite.

18 Omoï einamaci rafuedo jaie jaisoidomoi. Naie rafue jamaifue. Naimiëna Jusiñamui omoïna jai jillotate. Hatajamona omoï jeacinomona jillotañede. Ucubedi raire cueruide. Raire cueruide ra diga omoïna jillotañede;

19 iadedi Cristo diruedo naimie daciaño fiodaillamona, omoïna jaca jillotate. Cai comini imaci jeacino facaina mare toica llaudana fauidimaci; ia Cristomo jeacino inena jira, cai jeacino facaina birui daciaño fiodaite.

20 Caina jilloitallena, enirue nia inena facaiseconi Jusiñamui Cristona jaie fetode. Naimiëna omoï uifñollena, birui bene eniruemmo Jusiñamui naimiëna oretate.

21 Cristo muidona Jusiñamuina inotomoi. Cristo fiodaite; ia iëmona Jusiñamui naimiëna jillotate. Ie mei monamo ie ecimo naimiëna dane itatate. Ie jira Jusiñamuina inotomoi. Omoï fiodaia, dane jilloillemo jai jai ocuiridomoi.

22 Uanaicinona omoï inuamona, omoï comeciai jai jeanidimaci. Ie muidona jiaie creyentiaina isiruicana omoï jai. Omoï comeciaina conini omoï isirui.

23 Jusiñamui cominina jai jaidomoi. Naimie uaido iese jaidomoi. Comini uaido iese jaiñedomoi. Naimie uai jaca fuiñeite. Jaca iite. Naie uaido naimie cominina jaca iiticaï.

24 Jusiñamui facaina lloraima micori iëna jaie cuete:

Nana cominidi raiticiaï isoidimaci.

Safia dallu ebirede; iadedi raiticiaï ie safia diga are inede.

Ie isoide. Diga rafuena finuanona, dallu iticaï.

Are inedicai;

25 iadedi Jusiñamui uai jaca ite

cuete. Naie uaidi mare rafue. Naie rafuena birui jai cacadomoi.

2

1 Jusiñamui cominina cai illa jira, jiaie cominina gaiñenacinona fainonocai. Nana jifuiacinona fainonocai. Abina caitajacinona feita. Nana abi uradoil-lacinona feita. Jiaie comini joreñona ñaiñeno.

2 Ero, raise moonaillena, raise ecairellena, janosa monoi ijina jitaide. Ie isoide. Omoï comeciai raise marena illena, Jusiñamui rafuena jitaïdomoi.

3 Cai Nama omoïna duenaillana jai omoï uifñuamona, naimie uaina inocana jai.

Cristodi jofomo ite nanoca nofici isoide

4 Ie cominina raise omoï illena, Jusiñamui rafuena finocana jai. Naimie omoïna jai fetode. Naimiëmo omoï raise duillana jitaide. Iëna omoï raise uifñollena, jiaie rafuedo iëna lloiticue. Naimiedi jofona niacade isoide.

Noficimona niacade. Diga noficina jitaide. Naimie naie noficiaina jai fetode. Nanoca nofici diga naie jofo nillana tainede. Cristodi naie nanoca nofici isoide. Cai nairai Cristona jaie jitaiñedimaci; iadedi Jusiñamui naimie maredimiena jira, Jusiñamui naimiena fetode. Caidi jiaie noficiái isoidicai. Ie jofona nillena isoillena, Jusiñamui caina fetode.

⁵ Naimiena cai jai inua jira, naimie comina jai jaidicai. Naimie diga jai atona ñairedicai. Naimie diga jiaie comini facaina jai ñaicabiticai. Naimiena cai raise sedallena, Jesucristo caina canuamona, Jusiñamui jitaillacinona finocana jaidicai.

⁶ Jusiñamui facaina lloraima iena jaie cuega: Ero, Jerusalémo cue jofona nillena, daje noficina fetoiticue. Eo mare noficina fetoiticue. Cue Jitona ñaiticue. Naimiena jai fetodicue. Naimiedi eo mare. Naimiena inuamona, comini iobitimaci cuega.

⁷ Naimiena omoi inoia, Jusiñamui omoína iobitaite. Naimiena omoi inoñenia, faifitomoi. Jusiñamui facaina lloraima micori iena jaie cuega: Jofona finoraini jitaiñena noficidi nana naie jofomo ite noficiái baifemo jai faiga cuega. Ie isoide. Cai nairai Cristona jitaiñede; iadedi Jusiñamui naimieri eo iobide.

⁸ Dane cuega: Nine naimaci macaria, naie noficimona eicaitallamona, uaitimaci cuega. Cristona cuete. Cristo uaina naimaci inoñena jira, Jusiñamui llua isoi faifitimaci.

Pedro Jusiñamui fetocanona llofuede

⁹ Jusiñamui jai fetocanodomoí. Naimiemo omoi jai duillamona, naimie diga atona ñairedomoi. Jusiñamui ua cominidomoi. Naimiena omoi nia inoñenia, jeacino anamo omoi illa jira, jitiredinomo itomoi isoidomoi. Naiemona omoína jai jillobitade. Naimie anamo jai omoi illamona, useredinomo jai itomoi isoidomoi. Eo mare rafue omoímo naimie finua jira, iena llocana omoi jai.

¹⁰ Jaie Jusiñamui cominiñedomoi; iadedi birui Jusiñamui cominidomoi. Naimie omoína duenaillana jaie uiñofedomoi. Birui iena uiñotomoi.

Pedro Jusiñamui jitaillacinona finocana cai jaillana llofuede

¹¹ Cue isiruiiganodomoí. Jusiñamui illanomo omoi birui jainaiaila jira, eniruemo jaca iñeitomoi. Eniruemo jaca omoi iñena jira, jeacinona finocana jaiñeno. Jeacino omoi comeciaina namataacana jira, iena ebiruiñeno, naie anamo omoi i raillano.

¹² Jusiñamuina inoñedino motomo omoi illamona, mare rafuena finocana jai. Omoína birui jeare ñaitimaci; iadedi omoi marena illana naimaci uifnuamona, Jusiñamuina ico naimaci inoia, naimiemo iobillacinona fecaitimaci.

¹³ Cai Namamo omoi duilla jira, illaicomini anamo raise i. Riaí diga omoi nanoca illaíma uaina ino.

¹⁴ Naimacina omoi illaicomini fetua jira, omoi gobernadores uaina ino. Maraiñede rafue omoi inoia, omoína duere finoitimaci; iadedi mare rafuena omoi inoia, omoi iobitimaci.

¹⁵ Jusiñamuidi mare rafuena omoi finuana jitaide. Iena omoi finua jira, omoína ebena ñaitino uaina llicaitaitomoi.

16 Jusiñamui anamo cai illamona: “Jiaie illaima uaina ñnoñeiticai” raiñeiticai. Cai enirue illaima uaina cai ñnoñenia, jeacinona finodicai. Jusiñamui ðibeimo cai illa jira, naimie jitaillacinona finocana cai jailli.

17 Nana cominimo marena fino. Nana creyentiaina isirui. Jusiñamuina jaciruoicaida ñno. Riaí diga omoi illaima uaina ñno.

Cristo duere sefuilla rafuemonafueoiticaí

18 Patrón anamo damierie itomoi. Omoi patrón ocuica uaina ñnocana omoi jai. Omoi patrón marena fecuise ocuía, naimie uaina ñno. Naimie raire iciria, naimie ocuica uaina jiaí ñno.

19 Maraiñede rafuena omoi finoñenia, omoi patrón omoína duere finoía, Jusiñamuimo omoi comeciaina facajanona, ibana oñeno. Ibana omoi oñenia, Jusiñamuimona mare.

20 Maraiñede rafuena omoi finoía, omoi patrónmona duere sefuitomoi; iadedi maraiñede rafuena omoi finoñenia, omoi patrón omoína duere finoía, ibana omoi oñenia, Jusiñamuimona mare.

21 Duere omoi sefuía, ibana oñeno. Iese omoi illena, Jusiñamui omoína fetode. Cristo cai facaina ibana oñeno duere sefuide. Naimie isoi cai illena, naimie isoi rafuena finocana cai jailli.

22 Naimiedi maraiñede rafuena jaca finoñede. Tainona jaca lloñede.

23 Comini naimiena jeare ñaitimaci; iadedi naimiedi uai oñede. Naimie duere sefuide; iadedi: “Omoína ico duere finoiticue” raiñede. Naimiedi Jusiñamui naimacina ico raise duere finollena uiñote.

24 Cruzmo naimie fiodaillamona jeacino anamo cai iñellena, cai jeacino facaina naimie fiodaite. Jusiñamui jitailla isoi naimie fiodaite. Naimie jai duere sefuilla jira, cai jeacinomona jai jillodicai.

25 Sedañega toica laudaiaí isoi jiaie ebena jaisoidicai. Cai sedaraima anamo jai iticai. Naimiedi cai comeciaina jai eenote.

3

Pedrodí inirediñaiñuaina, airedino diga llofuete

1-2 Inirediñaiñuai, omoimo jai lloiacadicue. Omoi iniñiaí uaina ñno. Nibai birui Cristo rafuena ñnoñedimaci; iadedi omoi marena illamona, Cristo ðibeimo naimacina itaitomoi. Jusiñamui uaina omoi ñnuamona, omoi marena illamona, damierie Cristona ñnoitimaci.

3 Dañaiñorie abina eo finocabidimaci, naiñaiñuaina jiaie comini ebinaillena. Naiñaiñuai ifotiena eo finocabidimaci. Eo raifide rana jitacabidimaci. Eo ebirede raifide iniroina jitacabidimaci. Naie isoide ra comecina marena itatañede; ia Jusiñamui jitaillacinodo jaillamona, comeci marena ite. Jiaie comini omoína ebinai raillano, iese omoi iñeno;

4 iadedi jiaie comini omoína ebinaillena, omoi comeciaí marena fino. Omoi iniñiaí uaina oñeno. Naimaci jitailla rafuena fino. Omoi comeciaí iese ia, Jusiñamuimona eo mare.

5 Cai jaiagai facaise Jusiñamuina ñnotiñaiñuai iese itimaci. Cue birui llofuía isoi, naiñaiñuai abina jiaie finodimaci. Naiñaiñuai iniñiaí uaina ñnotimaci.

6 Iese Sara micori ie ini Abraham micori uaina ñnote. Ie anamo naiñaiño illa jira, ie ocuica uaina jaca ñnote. Mare rafuena finocana omoi jaiá, buena omoi jaciruiñenia, naiñaiño isoi iitomoi. Iemona naiñaiño uruiaína jaitomoi isoitomoi.

7 Airedino, omoimo jai lloiacadicue. Omoi ainiaimo comeciaina faca. Cai isoi naiñaiñuai mañiñena jira, naiñaiñuaina isiruillamona, naiñaiñuaina

marena raise seda. Jusiñamui omoïna duenaillamona, naimie cominina jai jaidomoi. Omoïna jai jillotate. Omoï ainïaina omoï raise sedañenia, Jusiñamuimo daajena raise jïnidomoico.

Cristo ðibeimo cai illa rafue

8 Daje isoi comeciai lloicana jai. Coninina duenai. Naga creyentena isirui. Jïinona cano. Abina ðedoñeno.

9 Omoïna jiaie comini duere finoia, ðbana oñeno. Omoïna naimaci jeare ñaia, ðbana oñeno; iadedi naimaciri marena ñaino. Mare rafuena cai finollena, Jusiñamui caina fetode. Iese cai jaia, Jusiñamui dinena: “Mare” caina raite.

10 Jusiñamui facaina lloraïma micori iena jaie cuela: Marena uri jaca bu iacania, jeare ñaïñeno. Tainona lloñeno.

11 Jearede rafue finuana fainocai. Mare rafuedo jai. Omoï ecimo itino ðiga, uri icana omoï jai.

12 Naimie jitailla rafue omoï finoia, Jusiñamui iena uiñuamona, omoïna raise sedade.

Naimie ðiga omoï ñaia, iena cacade;

iadedi maraiñede rafue bu finoia, Jusiñamui naimie ðiga icirite.

13 Mare rafuena omoï finocana jaia: “Maraiñede rafuena naimaci finua jira, naimacina duere finoiticaï” rainidimaci;

14 ia mare rafuena omoï finuamona omoï duere sefua, Jusiñamui omoïna canoite. Omoïna duere finodinona jaciruiñeno. Jarire iñeno;

15 ia omoï comeciai jitaillamona Cristona seda. Naimiedi cai Nama. “¿Bue ñellena Cristona ðnotomoi?” omoïmo bu jicanoia, uaina raise ono. Fecuisse icirïñeno, uaina ono.

16 Mare rafuena finocana jai. Omoïna jïino jeare ñaia, mare rafuena omoï finocabillamona meidaitimaci. Omoï marena illamona, tainona naimaci lluaana bairenite.

17 Mare rafuena omoï finuamona, Jusiñamui jitaillamona omoï duere sefua, dama iese duere sefuitomoi; ia maraiñede rafuena omoï finuamona omoï duere sefua, omoï muidona.

18 Cristomo omoï comeciaina faca. Dacaiño cai jeacino facaina naimie fiodaite. Naimie mareuidimie; iadedi maraiñedino facaina fiodaite. Jusiñamui ðibeimo caina itataiacade. Naimiena meinetimaci; iadedi naimie Joreño jaca ite.

19 Ie Joreñodo naimie jaillanona, jaie fiodaitino imaci joreñuaï eenoronomo ie finoca rafuena lluaide. Naimaci nia fiodaïñenia, Jusiñamuina jaca ðnoñedimaci; ia Cristo ie finoca rafuena naimaci joreñuaïmo lluaide.

20 Jusiñamui rafuena jaie ðnoñedimaci. Noé micori facaise Jusiñamuidi naimaci naimiena ðnuamo fecuisse ocuiride. Jïnuimona jillobillena, Noé micori ie balsana finode. Ocho ðigamie jillobidimaci.

21 Ie isoide. Omoï bautizaia: “Jusiñamui ðibeimo jai iticai” llotomoi. “Jeacinomona jai jillobidicai” llotomoi. Omoï abïmo ite jearenamona jillobiñedomoi; iadedi omoï comeciai jai marena ite. Fiodaillamona Jesucristo jillua muidona, jillobidicai.

22 Naimie jillua mei, monamo abido jai jaide. Jusiñamui ecimo naimie illamona, Jusiñamui uai naimiemo ite. Nana Jusiñamui jaienisai naimie anamo jai itimaci. Taifena Jesucristo anafefilla jira, Jesucristo anamo naimie ite; ia naimiena nia janafefitañede.

4

Jusiñamuimona cai feiñoga uai diga, naga jiaie creyentena cai canua

¹ Cai isoi naimie illamona, Cristo duere sefuide. Naimie duere sefuide; ia jeacinona finoñede. Duere omoi sefuia, naimie illamo omoi comeciaina faca.

² Nana omoi ille dinori comini jitaillacinodo jaiñeno; iadedi Jusiñamui jitaillacinodo omoi jai.

³ Jusiñamuina uiñoñedinu isoi jai bie isoide rafuena finuidomoi: Omoi aiñede riñoniai diga isoidomoi. Omoi iniñede iñiaia diga isoidomoi. Jearede rafuena eburitomoi. Jifairuidomoi. Jiruana eburitomoi. Jusiñamui rairuica jiraraina sedaidomoi.

⁴ Naie isoide rafuena omoi jai finoñenia, Jusiñamuina uiñoñedinodi omoi ri rajicaidimaci. Omoina jeare ñaitimaci.

⁵ Iese itimaci; iadedi Jusiñamui uicomo ico iitimaci. Naimacina duere finoite. Nia fioidañedinona duere finoite. Jai fioidaitinona jiai duere finoite.

⁶ Naimaci nia fioidañena facaise, Jesucristo rafuena cacadimaci. Jeacino muidona nana fioidaitimaci; iadedi naimaci navui ñnoia, naimaci joreñuai, Jusiñamui isoi, jaca iitimaci.

⁷ Bie enirue raire fuite. Ie jira ebena jaiñeno. Comeciaina raise faca. Jusiñamuimo raise jüllena, iese omoi jai.

⁸ Coninina isiruicana omoi jai. Omoi isiruillacino jiaie rafue baifemo faite. Jiaimie diga nicino ia, naimiena omoi isiruillemona, naicinona raire feitaitomoi.

⁹ Jiaie cominina jafueoicaida feiñoñeno; ia caimare feiño.

¹⁰ Creyentiaina omoi jailla facaise Jusiñamuimona omoi uaina feiñotomoi. Naimie dibeimo omoi maijillena feiñotomoi. Nagamiemo daje isoide uai iñede. Omoi uai diga, naga jiaie creyentena cano.

¹¹ Cristo rafuena bu llofueia, Jusiñamui naimiemo llua isoi, naimie llofuia. Jiaie creyentena bu canoia, naimiena Jusiñamui canuamona, naimie canua. Jusiñamuina cai iobitallena, nana cai finua rafuemona Jesucristo mamecido iese cai jailla. Illaimana naimie illamona, caina jaca sedade. Naimiemo iobillacinona jaca cai fecacabillasa. Iena jitaidecua.

Cristo dibeimo cai illamona, duere sefuitica

¹² Cue isiruiganodomoi. Eo duere omoi sefuia, rajicañeno. Creyentiaina omoi jailla jira, duere sefuitomoi. Jusiñamuidi Cristona raise omoi ñnuana facacite.

¹³ Cristo jai duere sefuide. Naimie isoi omoi duere sefuia, ieri iobi. Naimie dane bene bia, naimie bairiari eo iobitomoi.

¹⁴ Creyentiaina omoi illamona, omoina bu jeare ñaia, caimare omoi i. Iemona Jusiñamui joreño omoimo illana uiñoitomoi. Naimie: “Mare” omoina raite.

¹⁵ Jiaiodi cominina meinetimaci. Rana fiidimaci. Marañede rafuena finodimaci. Naimacimo duide rafuena abimo ofeno. Naie isoide rafuena bu finoia, duere sefuite. Iena omoi finoñeno. Naie isoide rafuena omoi finuamona omoi duere sefuillana jitañedicue.

¹⁶ Creyentiaina omoi illamona omoi duere sefuia, ieri meiruiñeno; iadedi creyentiaina omoi illamona, iobillacinona Jusiñamuimo feca.

¹⁷ Jeacino facaina Jusiñamuidi comini birui duere finocabide. Jeacino facaina ie cominina nano duere finode. Ie mei naimie cominiñedinona duere finode. Naimie cominina cai illamona, caina janore duere finoite; iadedi naimie cominiñedinona cai baifemo eo duere finoite.

18 Jusiñamui facaina lloraima micori iena jaie cuega: “Mareuidinodi niadedi jillobiñedimacimo, ¿niese comeciaina jearedinodi jillobitimaci? ¿Niese maraiñednodi jillobitimaci? Nibai jaca jillobiñeitimaci” cuega.

19 Iena omoi uñuamona, mare rafuedo jai. Jusiñamui jitaillamona duere omoi sefua, mare rafuedo jai. Jusiñamui caimo finuana omoi uñuamona, naimie anamo raise i. Naimie omoina raise eenoite. Ie lloga uaina jaca finoite.

5

Pedro creyentiaina nia llofue

1 Creyentiaina llofueraini, omoimo rafuena lloiacadicue. Cuedi jiai llofueraimadicue. Cristo fioddallana cioticue. Naimie ebire abido bia, jiaie creyentia digi iena cioticue. Iese cue illamona, omoimo lloiacadicue.

2 Omoi anamo ite creyentiaina raise seda. Naimacina raise llofue. Jiaimie railla jira, llofueño; iadedi omoi jitailla jira, llofue. Rana ollena llofueño; iadedi iocire llofue.

3 Omoi anamo itinona riire llofueño; iadedi mare rafuedo omoi jaillamona, naimacina llofue.

4 Cai creyentia nanoca sedaraimadi Cristo. Naimie abido bia, naimiemona ibana feñoitomoi. Naimie diga jaca iitomoi.

5 Conirueni, omoi llofueraini uaina raise iino. Coninimona abina iedoño. Jusiñamui facaina lloraima micori iese jaie cuega:

Bu abina iedoia, Jusiñamuimona marañede;
iadedi bu abi iedoñenia, Jusiñamuimona mare.
Jusiñamui naimiena duenaite
cuega.

6 Iese illa jira, cai Jusiñamui siñona jira, naimie anamo abina iedoño mai raise omoi i. Iemona naimie jitailliruido omoina iobitaite.

7 Nie isoide rafue ia, Jusiñamui omoina canocabillana omoi uñuamona, omoi comeciai jarire finoño. Naimie omoina eenoite.

8 Ebona jaiño. Jeacino finuamo abina rairui. Taife caina ramo faicabite. Janallari ie rille jenua isoi, Taife omoina jenocabide. Jeacino omoi finuana jitaide.

9 Naimie ra faia uaina iñoño; ia Cristona iñocana jai. Omoi duere sefuilla isoi, nana jiaie creyentia duere sefuidimaci. Iena omoi uñuamona, omoi comeciai ocuiñocana jai.

10 Cai Jusiñamui caina eo duenaite. Cristomo jai cai duilla jira, Jusiñamui illanomo ico jaca iitica. Dallu birui duere cai sefua, Jusiñamui cai comeciaina raise finoite. Cai comeciaina raise ocuñotaite.

11 Illaimana naimie illamona, caina jaca sedade. Naimiemo iobillacino cai fecacabillasa. Iena jitaidicue.

Naga creyentiaimo carta oria rafue

12 Silvanona uñotomoi. Naimiena bie cartana cuetataticue. Cristomo naimie duilla jira, cue ama isoi naimie ite. Cuemona naimiedi raise iñogamie. Omoi dine oretallena, janorede cartana cuetataticue. Bie rafuena dane lloiacadicue: Bie rafuedi Jusiñamui ie. Naimie caina duenaillana omoi uñuamona, bie rafuena iñocana jai.

13 Babiloniamo ite creyentia omoi dine imaci uaina oredimaci. Naimacina Jusiñamui jai fetuamona, creyentiaina jaidimaci. Marcos ie uaina jiai orede. Cristomo naimie jai duilla jira, naimie cue jitona eruaide.

¹⁴ Conini omoi isiruillamona, nana creyentiaina eo caimare uaido. Cristomo jai omoi duilla jira, naimie omoi comeciaina uri itatajana uiñocana mai jai. Macaibaite. Pedrodicue.

IE EMODOMO PEDRO ORETAGA RABE

Pedro creyentiaimo carta orede

¹ ¿Nigacino? ¿Nie isoidomo? Bie carta omoimo oredicue. Simón Pedro dicitue. Jesucristo dibeimo maijamona, ie rafuena lloticue. Cuen a oredtajamona, ie lloga uaina finodicue. Cai isoi jai inotomoi. Cai Jusiñamui marena illa jira, Jesucristo marena illa jira, Jesucristo omoina jillotaja jira, jai inotomoi. Jusiñamuimona cai isoi omoi illa jira, bie carta omoi dine oredicue.

² Jusiñamuina omoi uñuamona, cai Nama Jesús omoi uñuamona, iaiaiaia omoina duenaillana uñocana jai. Iaiaiaia omoi uri itatajana uñocana jai.

Creyentia marena illa rafue

³ Jesús siñona illamona, bene cai marena illena, naimiedi nana rafue caimo jai iga. Naimiena cai uñocana jaillamona, caimo ite. Naimie uai ebirede. Naimie jaca mareuidimie. Naimie isoi cai illena, caina jai fetode.

⁴ Naimie iese illamona, eo mare rafuena caimo jai llote. Jiaie rafue baifemo faite. Bie rafue muidona jeacinomona jillobidicai. Cai comeciai jai jitailla jira, faificana jaidicai; iadedi naimie rafuena cai inuamona, naimie illa isoi, icana jaidicai.

⁵ Jesucristona jai inotomoi. Naimiemo omoi duillamona, mare rafuena finocana jai. Jusiñamui jitaillacinona finocana jai. Iemona abina uñocana jai.

⁶ Jearede rafue finocana jaiñeno; iadedi omoi comeciaina eeno. Iena ocuñocana jai. Jusiñamuina sedacana jai.

⁷ Jiaie creyentiaina isiruicana jai. Nana cominina isiruicana jai.

⁸ Naie isoidicinona jitaidomoi. Iedo omoi raise jaia, cai Nama Jesucristona eo raise uñocana jaitomoi;

⁹ iadedi iedo omoi jaiñenia, abina nia raise uñoñedomoi. Omoi jeacinomona jai jilluana jai jai feitatomoi. Mare rafuena finocana jaillena, omoi jeacinomona jillobidomoi. Iena feitaño.

¹⁰ Cue amatiai, naie isoidicinona finocana jai. Iemona Jusiñamui omoina fetuana raise uñoitomoi. Abido danomo jai jaiñeitomoi.

¹¹ Iese omoi jaia, cai Jilloitaraimana naimie illamona, cai Nama Jesucristo ie illanomo omoina eo marena feiñoite. Nainomo naimie anamo jaca iitomoi.

¹² Ie jira bie isoide rafuena diga icaiño omoimo lloticue. Bie rafuena uñotomoi. Bie rafue uanaicinona jai raise uñocaidomoi.

¹³⁻¹⁴ Cai Nama Jesucristo cuemo jai llua jira, raire cue fiodaillena uñoticue. Nia cue fiodaiñenia, bie rafuena omoimo diga icaiño lloticue. Iese omoimo cue lloia, cuemona mare.

¹⁵ Bie rafue omoi raise nagarui uñollena, omoina birui canoiticue. Cue fiodaille mei, nagarui bie rafuena omoi feitañenana jitaidicue. Ie muidona bie rafuena jai cueticue.

Pedro Cristona ebirenana jaie ciode

¹⁶ Jamai rafue omoimo lloñedicai. Omoina jifueiacaiñedicai. Cai Nama Jesucristo siñonana lloticai. Naimie abido billena jai lloticai. Naimiena ebirenana jaie ciodicai.

¹⁷⁻¹⁸ Eniruemo naimie jaie ia, anedu muidomo naimie diga jaidicai. Jusiñamui nainomo jai illa jira, naie illano mare. Naie facaise Jusiñamui llua cadadicai. Jusiñamui naimiena iobitaicade. Ebire llote: “Bimie cue

isiruiga Jito. Naimieri iobidicue”. Iena jaie cai cianona, birui naimie siñonana lloticai.

¹⁹ Naiemona Jusiñamui facaina jaie lloraini micoriai lloga rafue suillena jai raise uiñoticai. Naimaci lloga rafuemo omoi comeciaina faca. Lamparín jitiredinomo lligaiñua isoi, naie rafue cai comeciaina uanaicinona uiñotade. Monairaicuduna cai cioia, iairei monaille ua illana uiñoticai. Ie isoide. Cristo dane baireia, iena raise uiñoticai. Jusiñamui facaina lloraini micoriai rafuena cai uiñuamona, uanaicinona ua uiñoticai.

²⁰ Biena uiñoticai. Dani comeciaina Jusiñamui facaina lloraini micoriaidi naimaci lloga uaina llofueñedimaci.

²¹ Dani naimaci comeciái jamai facajamona naie rafuena oñedimaci; iadedi Jusiñamui Joreño naimacimo illamona, naimacina iena uiñotajamona, Jusiñamui rafuena jino llotimaci.

2

Pedro tainona llofuerainina llotte

¹ Cai jaiaagai facaise tainona llofueraini itimaci. Birui ie isoide. Omoi motomo tainona llofueraini iitimaci. Jusiñamui rafuena raise llofueñeitimaci; iadedi naie rafuemonona omoína itataiacanitimaci. Naimaci facaina Jesucristo fiodaite; iadedi: “Jesucristo cai Nama” raiñeitimaci. Naimaci finolle rafue muidona, raire ebena faifitimaci.

² Naimaci jearede rafuedo ailluena comini jaitimaci. Naimaci muidona, ailluena comini Cristo rafuena jearuitimaci. Cristo rafue uanaicino; ia iese lloñeitimaci.

³ Ucube ollena, naimaci tainona llofuiacinodo omoína jifueiacanitimaci; iadedi Jusiñamui ricicallafue anamo jai itimaci. Jusiñamui naimacina ico duere finoite.

⁴ Naimie ecimo ite jaienisaímona damierie jeacino jaie finua jira, Jusiñamui naimacina jai oni dotade. Naimie ricicallafue anamo naimaci jai illamona, naimacimo ite uaijai ñede. Jitiredinomo jai itimaci. Naimacina duere finoite, nana comini Jusiñamui dine illirui ia.

⁵ Jusiñamui Noé micori facaise ite cominina jaie duere finode. Noé micori Jusiñamui ie mare rafuena naimacimo llotte; iadedi Jusiñamuina ñnoiacañedimaci. Eo noci deitajamona, enirue buillamona, Jusiñamui naimacina duere finode. Naiemona Noé micorina, ie siete comini diga, jillotate.

⁶ Sodoma railla nairai, Gomorra railla nairai diga, Jusiñamuidi bootate. Naimiena naimaci ñnoñena jira, naimacina fuidode. Naiemona naimiena ñnoñedinodi fueua.

⁷ Sodomamona Jusiñamui Lot micorina jillotate. Lot micori maremie. Eo jearede rafuena naie nairai finua jira, Lot micori comeci jarire ite.

⁸ Naimaci motomo naimie illamona, nagarui naimaci marañede rafue naimie ciuamona, naimie comeci uri ñede.

⁹ Naimiena jaie ñnoñedinona Jusiñamui jai duere finode; iadedi Jusiñamui naimiena ñnotino ramo faiamona jilloitajana uiñote. Jusiñamui naimiena ñnoñedino naimie ricicallafue anamo illana jiai uiñote. Ico naimacina duere finoite.

¹⁰ Jearede jitaillacino finocabidinona ua duere finoite. Jusiñamui uaina jamaidinona ua duere finoite. Bie tainona llofueraini marefodo llofuecabitimaci. Naimaci jitaillacinona llofuecabitimaci. Jusiñamui jaienisaína jaciruiño jeare ñaitimaci.

11 Jusiñamui jaienisaí uai naimaci baífemo faíte; iadedi Jusiñamui illanomo naimaci illamona, bie tainona llofuerainina jeare ñañíedimaci.

12 Ocainaiái abina raise uifioñena muidona, cai rillena naimacina faticai. Bie tainona llofueraini ocainaiái isoidimaci. Naimaci raise uifioñega rafuena jeare ñaitimaci. Ocainaiái faifilla isoi, faifitimaci.

13 Jiaie cominina naimaci duere finua dinori duere sefuitimaci. Birui ite rafuena nagarui eburitimaci. Danomo omoi guicabia, naimaci illa jira, raise nabairinidomoi. Jearedimaci. Jearede rafuena naimaci eburuilla jira, raise conini diga nabairinidomoi.

14 Riñona naimaci cioia, naiñaiño diga eo iacadimaci. Jeacinona finocana jaicabidimaci. Cristona nia raise ñinoñedinona jeacinona finotaiacadimaci. Rana eo nicidotimaci. Jusiñamui naimacina duere finoite. Jaca faifitimaci.

15 Cristo rafuena fañonocaillanona, jiaie rafuedo birui jaidimaci. Balaam micori rafuedo jai jaidimaci. Balaam micori Beor micori jito. Ucube ollena, Balaam micori uanaicinona jiaie lloiacañede; iadedi jiaie rafuena lllena, jiaie nairai dine jaide.

16 Naisona naimie jaidemo, ie burra naimie diga ñaíte. Jeacino naimie finoñellena, ie burra naimie diga ñaíte. Uairico isoi Balaam micori jaiñellena, naimie diga ñaíte. Birui bie tainona llofueraini, Balaam isoi, jiaie rafuedo jaidimaci.

17 Omoina canoñedimaci. Jinui iñena pozo isoidimaci. Naiemona buena oñedomoi. Monamo ite uillie isoidimaci. Riire aifi bia, naie uillie oni ñaitade. Bie tainona llofuerainimona buena oñedomoi. Naimaci comeciai daje isoi lloñíedimaci. Jusiñamui naimacina ico duere finoite. Jusiñamui illanomo naimaci iñenano, jitiñedimaci.

18 Jamai ñaia diga abina iedotimaci. Unañíede rafuemona, como Cristomo ñnotinona ramo faitimaci. “Jearede rafue finuana mare” raitimaci.

19 “Cai jitailla rafuena finoredicai” raitimaci. Iese raitimaci; iadedi jeacino anamo jai itimaci. Jeacino finocana naimaci jailla jira, ie anamo jai itimaci.

20 Cai Nama Jesucristo. Naimiedi cai jilloitaraima. Naimiena naimaci jiaie ñnuamona, marañíedicino anamona jai jillodimaci; iadedi marañíedicinona dane finocana jaidimacina, naie marañíedicino anamo dane itimaci. Eo fodo jai jaidimaci.

21 Cristo rafuena jiaie uifioñedimaci. Birui iena uifiotimaci; iadedi naie mare rafuedo raise jaiñedimaci. Iena fañonocaillamona, eo jai fodo jaidimaci.

22 Cai comini iena iese llocabitimaci; “Jico cicuia mei, ie cicuiana dane abido guite. Chanchona cai jocua mei, ie jearede illanomo raire abido jaicabide”. Cristo rafuemona danomo abido jaidinodi daje isoidimaci.

3

Pedro cai Nama Cristo dane billena llofuede

1 Cue isiruiganodomoi. Navui jiaie carta omoimo oredicue. Birui dane cueticue. Bie rafuena jai uifiotomoi; iadedi iena omoi ua raise uifioñellena, iena dane cueticue. Iemo omoi comeciai raise facajana jitaicue.

2 Jusiñamui facaina jiaie lloraini micoriai lloga rafuena jai uifiotomoi. Cai Nama caina oretajanona, ie lloga rafuena omoimo jai lloticai. Naimie muidona jillobidomoi. Bie rafuemo omoi comeciai facajana jitaicue.

3 Biemo nano omoi comeciaina faca. Cristo nia abido biñenia, Cristo rafuena uaitatino iitimaci. Naimaci jitailla rafuedo jaitimaci.

⁴ Jicanoitimaci: “¿Niese Cristo nia abido biñede? Enirue finua facaise mona nana ra daje isoi comuicana jaide. Cai mootiai jai fiodaicana jaidimaci. Cristo jaca biñeite”.

⁵ Iese raitimaci; iadedi iese iñede. Jaie suide rafuemo comeciaina facaa-caiñedimaci. Jusiñamui jaie lluamona, ie uaido mona finode. Enirue jiai finode. Jinuimona iena finuamona, jinuimona eniruedi bairede.

⁶ Jinui diga Jusiñamuidi Noé micori facaise cominina jaie fuidode.

⁷ Jusiñamui mona, enirue diga, ico fuidollena jai llote. Mona, enirue diga, bootaite. Ie jitaillirui Jusiñamui naimiena inoñedinona iese duere finoite. Ie uai jai llote; ia nia suiñede.

⁸ Cue isiruiganodomoí. Biena feitañeno. Ie lloga uai jaca suite. Cai Namamona daruidi mil años isoide. Naimiemona mil añodi daruibicaide isoide.

⁹ Damierie comeciai facadimaci: “Are suiñena jira, cai Nama ie lloga uaina nibai finoñeite”. Iese cai Nama iñede; iadedi comini naimiena inuana fecuise sedade. Comini imaci uai meidollena sedade. Naimaci faifillana jitañede. Ie muidona nia abido biñede. Ie lloga uai nia suiñede.

¹⁰ Firiraima billa isoi, cai Nama ebena abido biite. Naimie bia, mona eo ficirenamona fuite. Jitoma, fivui diga, ucuai diga, bootajamona, fuite. Enirue, nana benomo ite ra diga, bootaite.

¹¹ Bie rafue suillena uiñoticaí. Naie cai uiñuamona, Jusiñamui jitailla rafue finocana cai jailla. Naimiena raise cai sedajasa.

¹² Naie facaise billemo iocire cai sedaja. Raire suillena, naimie jitailla rafuena raise fino. Naie facaise Jusiñamui mona bootajamona, iena fuidoite. Jitoma, fivui diga, ucuai diga bootajamona iena fuidoite.

¹³ Naimie jai llua isoi, jiaie mona, jiaie enirue diga illena sedadicaí. Nainomo Jusiñamui jitailla isoi marena jaca iiticaí. Nainomo mare rafue finocana jaiticaí.

¹⁴ Cue isiruiganodomoí. Bie rafue nia suiñena jira, naimie abido nia biñena jira, jeacino finoñeno i. Uri icana omoi i. Iese omoi ia, naimie abido bia, omoína: “Mare” raite. Omoi iobite.

¹⁵ Raire abido cai Nama biñenia, naimiedi comini naimiena inuamo ocuride. Iena uiñoticaí. Cai isiruiga ama Pablo, bie isoide rafue omoi mo navui cuete. Cristo naimiena uiñotaga rafue diese cuete.

¹⁶ Nana naimie cartaiamo bie isoide rafuena cuete. Naimie cartaiamo diga rafue ite. Dajerie rafue irirede. Cristo rafuena raise uiñoñedino, Cristona raise inoñedino iena tainonana llofuecabitimaci; iadedi iemona faificana jaidimaci. Jiaie Cristona ciegafuaina tainonana llofuecabitimaci.

¹⁷ Bie rafue birui uiñotomoí. Iena omoi uiñuamona, jearede rafue finocabidino rafuedo jaiñeno. Abido danomo omoi jaiñellena, iemona abina rairui.

¹⁸ Cai Nama cai duenaillana uiñocana jai. Naimiedi cai Jilloitarama. Naimiena omoi uiñocana jaillamona, naimiena nabai. Naimiena birui cai iobitajasa. Naimiena ua jaca cai iobitajasa. Mai. Macaibaite. Pedrodicue.

JUAN NANO FUEÑE ORETAGA RABE

Jusiñamui diga cai jaca illena, Juan cuete

¹ Cue uruiaina omoi isoilla jira, omoimo cartana oredicue. ¿Nie isoidomoi? Nano dofoconi itimiena lloiacadicue. Naimiedi Jesucristo. Jiaie llofueoicaigano diga, jaie cai motomo naimie illamona, naimie llofuiana cacadicaí. Naimiena ciodicaí. Naimiena jiai jetadicaí. Caina Jusiñamuina uiñotade. Jusiñamui diga cai jaca illena, jiai caina llofuee.

² Jusiñamui dinena billanona, imana jaide. Naimiena jaie raise cai ciua jira, naimie rafuena birui omoimo lloiacadicue. Ie Moo diga nano jaca ite; ia cai dine naimie billamona, naimiena jai ciodicaí.

³ Cai ciua rafuena, cai cacaja rafuena, omoimo lloiticue. Jusiñamuina cai diga omoi nabaillena jitaídicaí. Jusiñamui Jito Jesucristona, cai diga omoi nabaillena jiai jitaídicaí.

⁴ Omoi comeciaí caimareficaillena, omoimo bie rafuena cueticue.

Jusiñamuidi jaca mareuidimiena jira, useredinomo ite isoide

⁵ Jesucristomona cai cacaja rafuena omoimo ja lloiticue. Jusiñamuidi jaca mareuidimiena jira, useredinomo ite isoide. Naimie comecidi jaca jeanina jira, jitioredinomo iñede isoide.

⁶ “Jusiñamuina nabaidicaí” cai raia, iadedi jeacinona finocana cai jaia, tainona lloticaí. Uanaicínodo nia jaiñedicaí.

⁷ Jusiñamui jeacino jaca finoñede. Naimie isoi jeacino finoñeno cai jaia, coninina nabaidicaí. Jesucristo fiodaillamona, naimie diaillamona, Jusiñamui cai jeacinona oni dotade. Iena feitate.

⁸ “Caimo jeacino jaca iñede” cai raia, dani cai abina jifueticaí. Uanaicínodo nia jaiñedicaí.

⁹ Naimiemo cai finoca jeacino cai lloia, Jusiñamui cai jeacinona dotaite. Nana cai marañedicionona dotaite. Naimie inogamiēna jira, naimie maremiēna jira, iese finoite.

¹⁰ “Omoimo ite jeacino” Jusiñamui llote; iadedi: “Jeacono finocabiñedicaí” cai raia, “Jusiñamui tainona llote” raiticaí. Iemona naimie uaina jai uaitaticaí.

2

Cai facaina riidotimiedi Cristo

¹ Cue uruiái isoi cue mamecaomoi. Jeacono finocana omoi jaiñellena, omoimo birui cueticue. Jeaconona omoi finuana jitañedicaí; ia jeacino bu finoia, Jusiñamuimona naimie facaina riidotimie jai ite. Jesucristo maremiēna jira, cai facaina caina riidoite.

² Cai jeacino facaina naimie fiodaite. Iemona Jusiñamui riicaillifue anamona jillobidicaí. Jesucristo cai facaina fiodaite; ia nana comini facaina jiai fiodaite.

³ Jusiñamui llogacinona cai inuamona, naimiena cai uiñuana jai uiñoticaí.

⁴ “Naimiena uiñoticue” raitimiedi ie llogacinuai inoñenia, naimiedi tainona lloraíma. Uanaicínona uiñoñede;

⁵ ia Jusiñamui llogacinuaina inotimiedi Jusiñamuina eo isiruicana jaite. Naimiena cai isiruillamona, naimiena cai nabaillana jai uiñoticaí.

⁶ “Cristona nabaidicaí” raitimiedi, Cristo isoi, mare rafuena finoite.

Cristo rafuedo jaidomoi

7 Cue isiruganodomo. Creyentiaina omoi jailla facaise bie rafuena cadomoi. Ie jira jiaie rafuena birui omoimo cueñeiticue;

8 ia naicinona abido dane lloiticue. Cristo iedo jaide. Iedo jiai jai jaidomoi. Jeacino anamo omoi jaiie illamona, jitioredinomo itomoi isoidomoi; ia Cristo rafuena omoi jai uifuaomona, useredinomo jai itomoi isoidomoi.

9 “Cristo rafuedo jaidicue” raitimiedi jiaie creyentena enoia, Cristo rafuedo nia jaiñede. Jitioredinomo naimie nia ite isoide.

10 Jiaie creyentena bu isirua, Cristo rafuedo raise jaide. Iedo naimie jaia, jiaimiena jeacinona finotañeite;

11 iadedi jiaie creyentena bu enoia, jitioredinomo nia ite isoide. Jeacino anamo nia ite. Uisimidie ie jaillinona raise uifuaomona isoi, Jusiñamui dine rillena raise uifuaomona. Ie isoi abina uifuaomona.

12 Cue uruia isoi cue mamecaomoi. Cristo muidona omoi jeacino Jusiñamui jai dotajamona, nana omoimo bie cartana cueticue.

13-14 Einamaci, Jusiñamui are omoi jai inuamona, omoimo bie cartana cueticue. Naimie nano dofoconi jaca ite. Conirueni, jeacinona finoñellena omoi comeciaina ocuifuaomona, Jusiñamui uai omoi comeciaino raise itabilamona, marañedimiena omoi jai anafetitaja jira, omoimo bie cartana cueticue. Naimiedi Taife. Uruia, Jusiñamui uaina omoi como inuamona, omoimo bie cartana cueticue.

15 Omoi ecimo marañede rafuena eburuñeno. Iena bu eburua, cai Moo Jusiñamuina isiruiñede.

16 Cai comeciaino ite marañede jitaillacinodi Jusiñamui ieñede. Cai uisido ebire jaide rafuedi Jusiñamui ieñede. Raruia diga, abi ieducinodi Jusiñamui ieñede.

17 Jusiñamui ieñede rafue jaca fuite. Naie isoide rafuedo jaidinodi jiai faifitimaci; iadedi Jusiñamui jitaillacinona finodimie Jusiñamui illanomo jaca ite.

Cristona abi caitadino rafue

18 Cue uruia isoidomoi. Jesucristo abido billirui iaiei jai ite. Nanoca Cristona abi caitadimie billena jai fididomoi. Ailluena Cristona abi caitadino birui jai bairidimaci. Iemona Jesucristo abido billirui iaiei illana jai uifotomoi.

19 Cai creyentia motomo nano itimaci; ia Cristo dibeimo naimaci iñena jira, naimaci llofuiana cai rafueñena jira, cai motomo birui fiebiñedimaci. Caïmona naimaci jailla jira, Cristomo naimaci duiñenana jai uifotomoi.

20 Jesucristomona Jusiñamui Joreña jai omoi feiñua jira, nana omoi Jusiñamui dibeimo ite rafuena jai uifotomoi.

21 Ie jira uanaicinona bu llofueia, iena uifotomoi. Uanañedicinona bu llofueia, iena jai uifotomoi.

22 Tainona llofueraïna ja cueticue. “Cristo cai jilloitaraïmañede” llotinodi taino llofueraïni. “Jusiñamuidi cai Mooñede” llotinodi taino llofueraïni. “Jesúdi Jusiñamui Jitoñede” llotinodi taino llofueraïni.

23 Cristona inoñedinodi Jusiñamuina jai inoñedimaci. Cristona inotino Jusiñamuina jai inotimaci. Jusiñamui Joreño omoimo illamona, iena jai uifotomoi.

24 Ie jira creyentiaina omoi jailla facaise omoi cacaja rafuedo inocana nia omoi jai. Iedo omoi inocana jaia, Jusiñamui Jitona raise nabaitomoi. Jusiñamuina jai raise nabaitomoi.

25 Jusiñamui caïmo jai llua isoi, naimie diga jaca iticai.

²⁶ Omoına damierie jifueiacana jira, bie rafuena jai cueticue.

²⁷ Jusiñamui Joreñoña jai feiñotomoi. Omoına Jusiñamui rafuena naimie uiñotaja jira, jiaie rafuena llofuerainina jai jitaifedomoi. Jusiñamui Joreño uanaicinsona omoına uiñotacabide. Naimie omoına uiñotaja isoi, Cristona nabacana omoi jai.

²⁸ Cristo ico abido biite. Omoi jacinaiñellena, naimiēna omoi meiruiñellena, naimiēna birui raise omoi nabai.

²⁹ Jusiñamui maremiēna cai uiñuamona, nana mare rafuena finocabidino naimiemo duillana jiai uiñoticaí.

3

Juandi Jusiñamui cominina llua rafue

¹ Jusiñamui caina isiruillamona, naimie cominina jai jaidicaí. Iemo omoi comeciaina facajana jitaídicae. Naimiēna naimaci uiñoñena jira, Jusiñamuina ñnoñedino cai uiñoğa rafuena jiai raise uiñoñedimaci.

² Ero, birui Jusiñamui cominídicaí. Cristo dane bia, cai illena nia raise uiñoñedicaí; ia naimie illa isoi cai ico illena jai uiñoticaí. Ico naimiēna cai cioillemona, iena raise uiñoiticaí.

³ Iemo cai ocuirillamona, naimie marena illa isoi, cai comeciái marena itataja.

⁴ Jeacinona finocana bu jaia, Jusiñamui llogacinuaina ñnoñede. Jusiñamui llogacinuaina bu ñnoñenia, jeacinona jai finode.

⁵ Jusiñamui ñnena Cristo billanona, ñmana jai jaide. Cai jeacinona oni dotallena, enirumo naimiedi bite. Naimiemo jeacino jaca iñena jira, jeacino ñbeimo naimie jaca iñede.

⁶ Naimiēna nabaidimiedi jeacino finocana jaiñede. Jeacinona finocana jaidimiedi Cristona nia raise cacaiñede. Naimiēna nia raise uiñoñede.

⁷ Cue uruaí isidomoi. Cristo llua isoi ñnena llofueraini birui itimaci. Jeacino finuana rairuiñedimaci. Naimaci omoına jifueñellena, abina rairui. Jes Cristo jaca maremie. Mare rafuena finocana cai jaia, naimie isoi mareniticaí;

⁸ ia jeacino finocana bu jaia, Taifemo duide. Nano dofomona Taifedi jeacino finocana jaide. Ie jira Jusiñamui Jito bite, Taife rafuena anafeditallena.

⁹ Naimiemo Jusiñamui uai illamona, Jusiñamui cominina jaidimiedi jai jeacinona finocana jaiñede. Jusiñamui cominina jaillamona, jeacino finocana naimie jainide.

¹⁰ Iemona Jusiñamui ñbeimo itinona raise uiñoticaí. Taife ñbeimo itinona jiai raise uiñoticaí. Mare rafuena finocana jaiñedimie Jusiñamuimo ñuñede. Jiaie creyentena isiruiñedimie Jusiñamuimo jiai ñuñede.

Coninina cai isiruilla rafue

¹¹ Creyentiaína omoi jailla facaise: “Coninina isirui” raillana cacadomoi. Jiaie creyentiaína nia omoi isiruiñenia, Jusiñamuimo nia ñuñedomoi.

¹² Caín micorimona cai fueua. Naimie ie amana isiruiñena jira, Taife naimiēna ramo faiamona, ie amana meinete. Ie ama Jusiñamui jitailla rafuena finouide; ia Caín micori Jusiñamui jitailla rafuena ñnoñede. Uradoillamona ie amana meinete.

¹³ Ie isoide. Jusiñamui jitailla rafuena birui cai finuamona, Jusiñamui ñbeimo iñedimodi caina enoidimaci. Ieri jacinaiñeno.

¹⁴ Cristona nia cai ñnoñena facaise jeacino anamo cai illa jira, Jusiñamuimona fiodaitino isoidicaí. Jiaie creyentena cai isirua, Cristomo

jai cai duillana jai uifnoticai; ia jiaie creyentena bu isiruiñenia, jeacino anamo naimie nia ite.

¹⁵ Jiaie creyentena bu enoia, naimiemo ie meinelle uai jai ite. Naie isoidimie Jusiñamuimo nia duiñede.

¹⁶ Cristomona cai fueua. Naimie jitailla jira, cai facaina fiodaite. Iemona jiaie creyentiaina cai isiruillana uifnoticai. Ie jira naimaci facaina naimaci ramo jiriñellena fiodaicaniticaí.

¹⁷ Jiaie creyentiaina cai isiruillamona, naimacina canoiticaí. Omoimo ra ia, jiaie creyentemo ra iñenia, naimiena omoi canoñenia, Jusiñamuina raise isiruiñedomoi.

¹⁸ Cue uruiaí isoidomoi. “Jamai uaido jiaie creyentiaina isiruiticaí” cai raiñena; iadedi cai finoca rafuemona naimacina cai canua.

Jusiñamuimo jaciruiñeno jüredicaí

¹⁹ Jiaie creyentiaina isiruicana cai jaia, Jusiñamui cominina cai illana raise uifnoticai. Jusiñamui muidona cai comeci uri ite.

²⁰ Cai comecimo iticinona uifnoticai. Siñonamiena jira, Jusiñamui iena jiai uifnote.

²¹ Cai comecimo jeacino iñenia, Jusiñamuimo jaciruiñeno jüredicaí.

²² Naimie llogacinona cai iñoia, naimie jitaillacinona cai finoia, naimiemo cai jicaca rafuena birui feifnoticai.

²³ Naimie Jito Jesucristo cai iñuana jitaide. Cristo llua isoi, coninina cai isiruillana jiai jitaide.

²⁴ Naimie llogacinuaína cai iñoia, naimiena nabaidicaí. Caina jiai nabaide. Naimie Joreño caimo illamona, naimie caina nabaillana jai uifnoticai.

4

Juan tainona llofueraína llua rafue

¹ Omoína isiruiticue. Naga llofueraíma uaina iñoñoeno. Ailluena tainona llofueraíni birui illa jira, Jusiñamuimona naimaci feifñoga uaina nica naimacina facaci:

² “Jusiñamui dinena Jesucristo billanona, imana jaide” naimaci lloia, Jusiñamuimona naimaci uaina otimaci;

³ ia “Jusiñamui dinena Jesucristo biñede” naimaci lloia, Jusiñamuimona naimaci uaina oñedimaci. Cristona abina caitadimiemona naimaci uaina otimaci. Naimie billena jai fididomoi. Comini comeciaina feidocana birui jaidimaci.

⁴ Ero, Jusiñamuimo jai cai duillamona, Jusiñamui caimo ite. Taino llofueraíni dibeimo omoi jaiñena jira, naimaci llofuiana oñedomoi. Naie taino llofueraínimo Taife ite; ia Jusiñamui Taife baifemo faite.

⁵ Naie tainona llofueraíni Jusiñamuina iñoñedinomo duidimaci. Naimaci ecimo ite rafuena llofuecabitimaci. Jusiñamuina iñoñedino naimaci llofuiana ebiruitimaci.

⁶ Jusiñamuimo jai duidicaí. Jusiñamuina iñotino cai llofuiana cacacaidimaci; ia Jusiñamuina iñoñedino cai llofuiana cacacaiñedimaci. Iemona Jusiñamui uaina llofueraínina uifnoticai. Iemona tainona llofueraínina jiai uifnoticai.

Jusiñamui caina isiruilla rafue

⁷ Omoína isiruiticue. Coninina cai isiruilla. Jusiñamui caina isiruillamona, caina jainona isiruitade. Ie isoi isiruitinodi Jusiñamui comini. Jusiñamui rafuena uifnocana jaidimaci.

⁸ Jusiñamuimo cai duillamona, caina jia:nona naimie isiruitaja jira, jia:nona isiruiñedimiedi Jusiñamui rafuena nia uiñoñede.

⁹ Jusiñamui caina isiruillamona, ie dajede Jito eniruemo orede. Naimie fiodaillamona, Jusiñamui dine jaca iiticaí. Ie finoca rafuemona Jusiñamui caina isiruillana jai uiñoticaí.

¹⁰ Jusiñamuina cai isiruillana ñañedicue; ia Jusiñamui caina isiruillana ñaiticue. Cai jecino facaina fiodaillena, ie Jito eniruemo orede. Iemona cai jecinona feitate. Iemona isiruillana raise uiñoticaí.

¹¹ Caina Jusiñamui isiruilla isoi, coninina cai isiruilla.

¹² Buna Jusiñamuina jaca cioñede; iadedi coninina cai isiruillamona, Jusiñamui caimo illana jai uiñoticaí. Naimiena isiruicana jiai jaidicaí.

¹³ Naimie Joreño caimo itatajamaona, naimiena cai nabaillana uiñoticaí. Caina naimie nabaillana jiai uiñoticaí.

¹⁴ Bie rafuena jiai uiñoticaí. Jusiñamui ie Jitona eniruemo jaie orete. Naimiena inoñedinona jilloitallena, naimiena oretate. Naimie Jitona ciodicaí. Ie jira iena birui lloticaí.

¹⁵ “Jusiñamui Jitodi Jesús” llotimiedi Jusiñamuina nabaide. Jusiñamui naimiena jiai nabaide.

¹⁶ Ie jira Jusiñamui caina isiruillana uiñoticaí. Caina jia:nona naimie isiruitade. Iedo cai jaillamona, caina nabaide. Naimiena jiai nabaidicaí.

¹⁷ Iemona Jusiñamuina isiruicana jaiticaí. Naimie uicomona ico nana cai ille facaise naimiena jaciruiñeticai. Jusiñamui Jitona Cristo illanona, Jusiñamui cominina cai jiai illanona, naimiena birui jaciruiñedicai.

¹⁸ Jusiñamuina cai isirua, naimiena jaciruiñedicai. Eo raise naimiena cai isirua, ¿niese naimiena jaciruiticaí? Naimiena cai jacirua, naimie caina duere finuana jaciruiticaí. Jusiñamuina jaciruitimiedi Jusiñamuina nia raise isiruiñede.

¹⁹ Nano Jusiñamui caina isiruilla jira, caidi naimiena isiruiticaí.

²⁰ “Jusiñamuina isiruiticue” raitimiedi jiaie creyentena enoia, jai taño lloste. Creyentena ciode; ia naimiena isiruiñede. Jusiñamuina cioñede. ¿Niese ie cioñenamienna isiruite?

²¹ Jusiñamui iena caimo jai lloste: “Cuenta isiruitimie jiaie creyentena jiai isiruite”. Ie jira coninina isirui.

5

Taife ie rafuena anafefitaticai

¹ Jusiñamuimona Jesús billana cai inoia, Jesús cai jilloitaraimana cai inoia, Jusiñamui cominina jaidicaí. Jusiñamuina cai isirua, nana naimie cominina jiai isiruiticaí.

² Jusiñamuina cai raise isirua, naimie llogacinuaina cai inoia, naimie cominina jiai isiruiticaí.

³ Jusiñamuina cai isirua, naimie llogacinuaina jiai jai inoticaí. Naimie uai raise inuamona, iena finollena sefuiruiñedicai.

⁴ Jusiñamui dibeimo itinodi Taife ie rafuena anafefitaticai. Cristona cai inuamona, Taife ie rafuena anafefitaticai.

⁵ Jesúdi Jusiñamui Jitonana cai inuamona, Taife rafuena anafefitaticai.

Jesucristodi Jusiñamui Jito

⁶ Jesucristona dane ñaiticue. Naimiedi Jusiñamui Jitona inoticaí. Naimie bautizajamaona, naimie fiodaillamona naimiedi Jusiñamui Jitonana uiñoticaí.

⁷ Uanaicinona naimie uiñuamona, Jesucristo bautizaja facaise Jusiñamui Joreño caina iena jiai uiñotade.

⁸ Jusiñamui Joreñomona, Jesús bautizajamona, Jesús fiodaillamona, Jesúdi Jusiñamui Jitonana raise uiñotícaí.

⁹ Jesús bautizaja facaise “Jesúdi cue Jito” Jusiñamui caimo llote. Jesúna comini lloia, iena feiñotícaí. Comini llua baifemo Jusiñamui llua faia jira, Jusiñamui llua jiai ua feiñoitícaí.

¹⁰ Jesúdi Jusiñamui Jitonana cai ñnuamona, cai comeciaí daje isoi lloide; ia Jusiñamui ie Jitona llua ñnoñedinodi: “Jusiñamui taino llote” raitimaci.

¹¹ Biena ñaitícue. Jusiñamui naimie diga caina jaca itataiacade. Naimie Jitona cai ñnuamona, iese caina jai itatate.

¹² Jusiñamui Jitona ñnotino Jusiñamui diga jaca iitimaci; ia naimiena ñnoñedino Jusiñamui diga jaca ñfeitimaci.

Jusiñamui caina raise uiñote

¹³ Jusiñamui diga ico omoi jaca illena omoi raise uiñollena, bie cartana jai cuetícue.

¹⁴ Jusiñamuina cai ñnuamona, naimiena jai jaciruiñedicai. Naimiemo cai jiiia, naimie jitailla isoide rafuena cai jicaia, naimie caina cacajana raise uiñotícaí.

¹⁵ Iese cai jiiia, naimie jaca fairuana jiai uiñotícaí.

¹⁶ Jiaie creyente jeacino ñnuana omoi cioia, naimie facaina Jusiñamuimo jii. Iemona Jusiñamui dibeimo naimiena dane itataitomoi. Jusiñamui rafuena jamaidimie facaina omoi jiiiana lloñedicue. Naimie faificana jaiacade.

¹⁷ Jusiñamui llogacinona bu ñnoñenia, jeacino jai finode; ia naimie facaina omoi jiiia, Jusiñamui iena feitaite. Faificana jaiacadimie facaina omoi jiiiana lloñedicue.

¹⁸ Jusiñamui comini jeacinona ñnocana jaiñedinomaci. Naiemona Cristo caina enote. Ie jira Taife caina duere finonide.

¹⁹ Jusiñamuimo jai duidícaí. Naimie anamo jai itícaí; ia naimiena ñnoñedino Taife anamo jai itimaci.

²⁰ Jusiñamui Jito jaiie eniruemo billana uiñotícaí. Iemona caina nanoca Jusiñamuina uiñotade. Naimiena cai ñnuamona, nanoca Jusiñamuimo jai duidícaí. Jesucristomo jiai jai duidícaí. Ie jira Jusiñamui diga ico jaca iitimaci.

²¹ Cue uruai isoidomoi. Daje rafuena nia lloiticue. Jiraramona abina rairui. Jusiñamui iefede rafuedo omoi jaiñeno. Mai. Juandícue.

JUAN IE EMODOMO ORETAGA RABE

Uanaicinona coninina cai isiruilla

¹ Juandicue. Creyentiaina sedaraimadicue. Ñoo, ¿nie isoidio? Cue uaina o dine oredicue. O uruiaimo cue uaina jiai oredicue. Jusiñamui ona jai fetuamona, Cristo ie uanaicinona cue uiñua jira, omoina isiruiticue. Nana naie uanaicinona uiñotinodi omoina isiruitimaci.

² Naie uanaicinona cai uiñua jira, omoina isiruiticai. Iena uiñocana jaca jaiticai.

³ Cai Moo Jusiñamui ie Jito Jesucristo diga, caina jaca duenaite. Iaimaiai caina jaca uri itataite. Uanaicinona cai uiñuamona, iaimaiaina cai isiruillamona, iese iiticai.

⁴ Caimo cai Moo llua isoi, uanaicinado o uruiaimona dajerie jailla jira, iobidicue.

⁵ Ñoo, daje rafue omo lloiacadicue. Bie rafuena navui uiñotio. Cristo rafuena nano cai ñnoia, bie rafuena uiñoticaí. Coninina cai isiruillana ñaiticue.

⁶ Iena ñaiacadicue. Coninina cai isiruillanona, Jusiñamui llogacinona ñnocana jaidicai. Cristona nano omoi ñnoia, Jusiñamui llucacinona cacadomoi. Coninina cai isiruillana cacadomoi.

Diga taino lloraini ite

⁷ Diga taino lloraini illa jira, iena ñaiticue. Jesucristo monamona jai billanona, ñimana jaiñenana llofuecabitimaci. Bu iese llofueia, cominina jifue. Naimiedi Cristona abi caitadimie.

⁸ Cristo rafuedo omoi jailla jira, Jusiñamuimona buena omoi faifñellena, omoi abina rairui. Jusiñamuimona ibana feiñoitomoi.

⁹ Cristo llogacinona bu fainonocaia, Cristo rafuedo bu jaiñenia, Jusiñamuina ua uiñofede; iadedi Cristo rafuedo bu jai, cai Moo Jusiñamuina uiñote. Ie Jitona jiai uiñote.

¹⁰ O jofomo Cristo rafuedo jaiñedimie bia, Cristo rafuena cue llofua isoi naimie llofueñenia, naimiena nafueño. “Jusiñamui ona canuamona, marena o jai” lloño.

¹¹ “Marena jai” o lloia, naimie marañede rafue facaina jai itio.

Rafuena nia lloiacade

¹² Diga rafue ite omoimo cuellena; iadedi aillue cartana cueñeiticue. Omoi dine raire cue illemo ocuridicue. Danomo cai rillamona ñaiticai, cai comeciai caimarecaillena.

¹³ O dine o euiño uruiaidi imaci uaina oredimaci. Naiñaiñodi Jusiñamui fetocañaiño. Mai. Juandicue.

JUAN IE EMODOMO JIAIE ORETAGA RABE

Gayo mare rafue finocana jaide

¹ Juandicue. Creyentiaina sedaraimadicue. Gayo, bie carta o dine oredicue. ¿Nie isoidio? Cristo ie uanaicinona coco uñua jira, ona isiruiticue.

² Cue isiruigamiedio. Nana o finua rafue marena jaillana jitaidicue. O ecairenana jiai jitaidicue. O começi marena illana jai uñotocue.

³ Cue dine dajerie creyentiai bite. Uanaicinodo omoi jaillana llote. Cristo rafuedo omoi jaillana llote. Ie jira iobidicue.

⁴ Uanaicinodo omoi jailla jira, eo iobidicue. Cue muidona Cristona omoi ñnua jira, cue uruiaidomoi isoidomoi. Uanaicinodo omoi jailla jira, eo iobidicue.

⁵ Cue isiruigamiedio. Naga icaño jiaie creyentiaina o canoia, eo mare. Nia o uñoñega creyentiai o illanomo ria, naimacina o canoia, ua eo mare.

⁶ Naie isoidie creyentiaina o isiruillana jiai fididicue. Rollena creyentiai ofia, ona marena ñaitimaci. Naimaci jaillanomo naimaci jiaia, naimacina o canoia, Jusiñamui jitailla isoi, ua eo mare.

⁷ Naimie rafue llua muidona, jai macaritimaci. Jusiñamuina uñoñedinomona jaca buena feiñoñedimaci.

⁸ Creyentiaina cai illa jira, naimacina cai canua jira, uanaicinona llocana jaidicai.

Diótfes marañede

⁹ O dine ite creyentiaimo cartana jai oredicue. Diótfesna janore ñaiacadicue. Naimiedi eo uicoidimie. Naimiedi cue uaina uñoiacañede.

¹⁰ O dine cue ria, naimie finoca rafuena omoimo lloiticue. Cuena jeare ñaite. Jiaie illanomona bite creyentiaina feiñoiacañede. Naimaci feiñuana rairuide. Roracomo naimaci bia, naimacina jino dotade.

¹¹ Jeacino finoraini isoi omoi iñeno; iadedi marecinona finoraini isoi omoi i. Marecino finocabidimiedi Jusiñamui ie. Jeacino finocabidimiedi Jusiñamuina ua uñoñede.

Demetrio marena ite

¹² Nana creyentiaidi Demetriona marena ñaitimaci. Uanaicinodo naimie jai. Iese naimiena jiai ñaiticai. Cai llucinodi uanaicinona uñotio.

Rafuena nia lloiacade

¹³ Diga rafuena cueiacadicue; iadedi cueñeiticue.

¹⁴ Raie ona cue cioillemo ocuridicue. Ie mei ñaiticoco.

¹⁵ Uri o i. Cue dine ite o nabaiñiaidi uaina omo oredimaci. O dine ite cue nabaiñiaimo cue uaina oredicue. Mai. Juandicue.

JUDAS ORETAGA RABE

Judadi Jusiñamui fetocanomo cartana orede

¹ Cue nabaiñiai, bie carta omoi dine oredicue. ¿Nie isoidomoi? Judadicue. Ie rafuena llolena, Jesucristo dibeimo jai maijidicue. Jacobo cue ama. Jusiñamui omoïna jai fetuana cue uiñuamona, bie cartana oredicue. Cai Moo Jusiñamui omoïna isiruite. Jeacinona omoi finoï raillano, Jesucristo omoïna jai sedade.

² Jusiñamui omoïna eo duenaillana omoi uiñocana omoi jaillana jitaïdicue. Naimie omoi comeciaina raise uri itatajana omoi uiñocana omoi jaillana jitaïdicue. Naimie omoïna eo isiruillana omoi uiñocana omoi jaillana jitaïdicue.

Tainocinona llofueraïni ite

³ Cue isiruigano, omoïmo Jusiñamui caina jai jillotaja rafuena iocire cueia-cadicue; iadedi jiaïe rafue birui illa jira, omoïmo cueticue. Jusiñamuimona cai feiñoga rafuena omoi eo riiduana jitaïdicue. Naie rafuena Cristo oretaganomona cacadicaï. Naie rafuena meidonidicaï. Ieconï duide. Jusiñamui jiaïe rafuena lloñeite.

⁴ Caimo ite rafuena omoi eo riiduana jitaïdicue. Cai creyentiaï motomo dajerie tainocinona llofueraïni illa jira, iena jitaïdicue. Uanaicinona llofuencana naimaci illamo cai comeciaina facadicaï; iadedi Jusiñamui jitaïllacinona finoñedimaci. “Jusiñamui caina duenaillamona, jeacino finocana cai jaia, cai jeacinona oni dotaite” llofuecabitimaci. “Cai jeacino facaina caina duere finoñeite” llofuecabitimaci. “Jeacino finocana cai jaiacania, caimona mare” llofuecabitimaci. “Jesucristo cai Namana” llofueñedimaci. Naimie lloga rafuedo jaiacaiñedimaci.

“Naimaci isoidinona duere finoiticue” Jusiñamui jaie llote. Naimie duere sefuillacino anamo jai itimaci.

⁵ Iemona omoi raise fueollena, bie rafuemo omoi comeciaina faca. Bie rafuena navui llofueticaï. Iena raise cacadomoi; iadedi iena dane uibiño. Iena lloiticue. Ero, bie eniruemo naimaci billena, Egiptomona Jusiñamui cai jaïagaina bitatate. Naimiena naimaci iñoñena jira, bie eniruemo riñedimaci; iadedi Jusiñamuidi jofue iñenanomo naimaci fiodaïllena llote. Iemona naimaci fiodaïtimaci. Ie isoide. Naimiena birui omoi iñoñenia, omoïna duere finoite.

⁶ Ero, bie rafuemonona omoi fueua. Jusiñamui ecimo ite jaienisaimona dajerie imaci illanona jaie jitaïñedimaci. Naimie isoi iacadimaci. Naimaci illano naimie ecimo jaie itimaci. Naimaci jitaïlla rafuena naimaci finollena, naimie ecimo illana faïnonocaidimaci. Iemona naimie naimacina jai oni dotade. Naimie illanomo dane iñeitimaci. Naimacimo ite uai jai iñede. Naimie riicaïllafue anamo jai itimaci. Naimie dine nana comini illirui ia, naimacina duere finoite. Naimacimona omoi fueua. Jeacinona Jusiñamui dibeimo itino finoia, Jusiñamui naimacina duere finoite.

⁷ Ero, bie rafuemonona omoi fueua. Sodoma railla nairaï micoriaï maraiñedinona jaie eo finouidimaci. Gomorra railla nairaï micoriaï daje isoidimaci. Nainomo ianori ite nairaïaï daje isoidimaci. Naimaci aïñede riñoniaï diga itimaci. Naiñaiñuaï iniñede iñiaï diga itimaci. Coninina aïñedotimaci. Iemona Jusiñamui naimacina jaie duere finode. Nana naimaci

illanona raise jaie jobaitate. Naimacimona omoi fueua. Jusiñamui nana jeacinona finodinona duere finoite.

8 Naie tainocinona llofueraini daje isoidimaci. Nicairillafuedo jaillamona, ebena jaidimaci. Naimaci abimo jearede rafuena finodimaci. Jusiñamui uaina jamaidimaci. Jusiñamui jaienisaia jeare ñaitimaci.

9 Miguelna mamecireda jaienici isoi ñedimaci. Miguel Jusiñamui nanoca jaienici. Moisés micori fiodailla mei, Miguel Moisés micori abina raicade. Taife diga Moisés micori abina uaitate. Taife Moisés micori abina bairoacade. Miguel iena jiai jitaide. Miguel Taife diga riire ñaite; iadedi Taifena jeare ñañede. Miguel ie comecina facañede: “Cuemo ite uai Taifena oni oretalena”; iadedi naimiemo llote: “Jusiñamui ona duere finoite”.

10 Naie taino llofueraini iese ñedimaci. Jusiñamui jaienisaia jeare ñaitimaci. Ocainai ai imaci comeciai uiñuacinodo jailla isoi, naie taino llofueraini imaci uiñoga rafuedo jaidimaci. Iemona ja muidomo faifitimaci.

11 Cañ micori isoi naimaci illa jira, Jusiñamui naimacina duere finoite. Jusiñamui jitailla rafuena Cañ micori finoacaiñena jira, ie ama micori diga icirite. Icirillamona Cañ micori ie ama micorina jaie meinete. Cañ micori rafuedo naie taino llofueraini jaidimaci. Naimaci jitailla rafuena naimaci finua jira, Jusiñamui naimacina duere finoite. Balaam micori isoi naimaci illa jira, naimacina duere finoite. Ucube ollena, Balaam micori uanaicinona jaie lloñede; iadedi cai judiua cominina jeacinona finotate. Ucube ollena, naie taino llofueraini Balaam micori rafuedo jaidimaci. Uanaicinona jaca llofueñedimaci. Coré micori isoi naimaci illa jira, Jusiñamui naimacina duere finoite. Moisés micori uaina Coré micori ñnoñena jira, Jusiñamui naimie micorina meinete. Jusiñamui uaina naie taino llofueraini ñnoiacañena jira, jiai faifitimaci.

12 Dani omoi nabairillamona danomo omoi guia, naie taino llofueraini jiai bitimaci. Naimaci illa jira, raise nabairinidomoi. Meiruiñeno eo guitimaci. Dani naimaci comecimo ite jitaillacinona finodimaci. Omoina canoacaiñedimaci. Maraiñedimaci. Monamo jamai ite uillie isoidimaci. Aifi naie isoidie uillie oni ñaitade. Ie mei noci deide. Noci deiñenia, enirue saferena jira, buena sicoñede. Maraiñede. Naie taino llofueraini maraiñedimaci. Naimacimo marecino iñena jira, llisiñede riarra isoidimaci. Llisilla facaise riarra llisiñenia, maraiñede. Riarra llisiñenia, iena oni aiñodicai. Maraiñena jira, safenaite. Naimaci maraiñena jira, naie taino llofueraini jiai safenaitimaci.

13 Naie taino llofueraini jearede rana finocabidimaci. Eo bagode monaillai isoidimaci. Monaillai eo bagoia, monaillai fuemo jearede rana oni ñacosite. Ucuaina eruaiñamona naiona cai macarillana uiñotica; iadedi ucudu ana feia, cai macarillana raise uiñofedicai. Naie taino llofueraini ana fede ucudu isoidimaci. Comini uanaicinona uiñotañedimaci. Naimaci llofuiacinomona Jusiñamui jitailla rafuedo cai raise jaillana uiñofedicai. Jusiñamui naimacina duere finoite. Naimie illanomo jaca iñeitimaci. Jitiredinomo jaca iitimaci.

14 Naimacina Enoc jaie llote. Adán micori facaisemona Enoc facaisemo Adán cominimona siete moodi comuide. Enoc llote: “Ero, cai Namadi ie ailluena jaienisaia diga biite,

15 nana naimiena ñnoñedinona duere finollena. Naimie jitailla rafuena naimaci finoñena jira, maraiñedicinona naimaci finua jira, naimiena naimaci jeare riire ñaia jira, naimacina duere finoite” llote.

16 Naie taino llofuerainidi creyentiaia sedarainina uaitaside. Jusiñamuina jeare ñaioidimaci. Dani naimaci jitailla rafuena finoidimaci. Eo abina

biruïdımacı. Jıaie comınımona rana jamai feiñollena, nano naimacına iobıtadımacı. Iobıtajano, rana jamai jıcadımacı. Naimacı isoi omoi iñeno.

Cristona #notınomo llucıno

¹⁷ Cue isıruıga amatıai, caı Nama Jesucristo oretagano jai llogacınona omoi comeı.

¹⁸ Raitımacı: “Jesucristo nıa abıdo bıñena facaiseconi naimıe uaina #noñedıno jaca iıtımacı. Naimacı jearede jıtaillacınodo jaitımacı” raitımacı.

¹⁹ Naıe taino llofueraını comını comeıai daje isoi lloıllana itatañedımacı. Jusiñamui dıbeımo iñede rafuena gaidımacı. Jusiñamui Joreño naimacımo iñede.

²⁰ Cue isıruıgano, naimacı isoi omoi iñeno; iadedı Jusiñamui rafue #nocana maı omoi jai. Naıe rafuedı mare. Jusiñamui Joreño omoına canuacınodo Jusiñamuımo omoi jıı.

²¹ Jusiñamui omoına isıruıllacınona uıñocana omoi jai. Jusiñamui ecımo caı jaca illemo fecuıse ocuıri. Caina caı Nama Jesucristo duenaılla jıra, naimıe ecımo jaca iıtıcaı.

²² Dıga comını naıe taino llofueraını rafuedo jaidımacı. İemona dajerie Jusiñamui uaina raise nıa #noñedımacı. Naimacımo llono: “Maı #no.

²³ Dajerie comınına Jusiñamui duere sefuıllacınomona jıllote”. Taino llofueraını rafuedo naimacı jaılla jıra, nıadı faıfıtımacı. Naıe rafuedo naimacı jaılla jıra, damıerie jeacınona eo finodımacı. Jeacınona naimacı finua isoi omoi finoi raıllanona, naimacına jacıruıoıcaıda duenaı.

Jusiñamuımo iobıllacınona caı fecacabıllasa

²⁴ Jusiñamuidı omoına jeacınona fınoñenana itatarede. Naimıe uıcomo omoına ıco itataıte. Omoına jeacınona omoi jaca fınoñedena nainomo itataıte. Nainomo iocıre iıtomoi.

²⁵ Jusiñamuidı jaca dajede. Caı facaina caı Nama Jesucristo fıodaıllamona, caina caı jeacınomona jai jıllotate. Jusiñamuımo iobıllacınona caı fecacabıllasa. Naimıedi sıño. Naimıe uai ebırede. Nana radı naimıe anamo ite. Naga rana naimıe ocuıllena, naimıemo sıño uaidı ite. Jıaie jaca ıese naimıedi ite. Birui jaca ıese naimıe ite. İco jaca ıese naimıe iıte. Maı. Macaıbaıte. Judadıcue.

JUAN ICO SUILLE RAFUENA CUIAFUE

Jesucristo ico suille rafue lluana cueticue

¹ Jesucristona cueticue. Juandicue. Jesucristo facaina maijicabidicue. Ie dibeimo itinomo iena Jesucristo llollena, Jusiñamui naimiena bie rafuena uiñotade. Jaiiruido ico ebena suille rafuena uiñotade. Cuena iena uiñotallena, iena cuemo llollena, ie jaienici cue dine oretate.

² Jusiñamui cuena birui uiñotaga rafuena jai cueticue. Jesucristo cuemo birui lloga rafuena jai cueticue. Nana birui cue ciua rafuena jai jai cueticue.

³ Bie ico suille rafuena ado facacabidinodi caimare iitimaci. Biena cacacabidino iena inuamona, caimare iitimaci. Bie rafue suillirui iaiei illa jira, iemo raise cacarei.

Siete creyentiai illanuaimo bie carta oredicue

⁴ Asia railla eniruemo ite creyentiai, omoi dine cue uai oredicue. Siete illanomo omoi illamona, bie rafue omoi uiñuana jitaidicue. Iena omoi uiñollena, biena cueticue. Jusiñamui ie Joreño diga, Jesucristo diga, omoina duenaicabide. Omoina uri itatacabite. Iena omoi uiñocana mai omoi jai. Jusiñamui jai jaca ite. Birui naimie jaca ite. Ico jaca iite. Ie Joreño naimie abimo illamona, omoina bie rafuena raise cacataite. Iena inotaite.

⁵ Ie Moo uaina raise inuamona, eniruemo naimie illa facaise Jesucristo ie Moo rafuena raise atona llouide. Naimie fiodaite; iadedi naiemona jillode. Naimie dane fiodaifena jira, nana illaicomini naimie anamo jai itimaci. Caina jaca isiruite. Naimie fiodaillamona caina cai jeacinomona jai jillobitade.

⁶ Naimie fiodaillamona naimie cominina jaidicai. Naimie anamo illaima isoi caina sedallena, caina itatate. Naimie cominina cai illa jira, naimie Moo Jusiñamui diga atona birui ñairedicai. Ie muidona naimiemo iobillacinona jaca cai fecacabillasa. Naimie caina sedajasa. Iena jitaidicue.

⁷ Ero, eniruemo uillie motodo Jesucristo biite. Naimie bia, nana comini naimiena cioitimaci. Naimiena jaiie meinete nairaidi naimiena cioitimaci. Duere sefuillana jacinailamona nana comini eecuitimaci. Iese jaca suite.

⁸ Cai Nama Jusiñamui cuemo llote: “Jaca bue nia ifenia, jai jaca iticue. Nana rana finodicue. Nana ra cue uaido icana jaide. Birui iticue. Nana ra fuilla mei, jaca iticue. Siño jitodicue”.

Juan Cristona ciode

⁹ Daajena Cristomo cai duilla jira, omoi amadicue isoidicue. Cristomo cai duillamona, birui duere sefuidicai. Cominina ico naimie sedaia, nainomo iticai. Naimie cai comeaiena ocuiñotajamona iemo birui ocuiridicai. Jusiñamui uaina cue llua jira, Cristo rafuena cue llua jira, duere cue sefuillena, Patmos railla uiasimo birui iticue. Cárcelmo illa isoi duere sefuillena, illaicomini bene cuena birui oredimaci.

¹⁰ Jusiñamuina cue sedajamona, naimie Joreño cuena namatajamona, iniñenamona nicarilla isoi cue jinafo dine damie ado lluana cacadicue. Trompeta isoi ie uaidi ficirede.

¹¹ Cuemo llote:

—O cioacalle rafuena cueno. O cacaacalle rafuena cueno. Ie mei bie siete illanuaimo iena oreta: Efesomo, Esmirnamo, Pérgamomo, Tiatiramo, Sardimo, Filadelfiamo, Laodiceamo. Diese illanuaimo oreta —llote.

¹² Cuemo llotimiena cue cioillena, jinafo dine erodaticue. Siete oromona finoca lamparíniai ciodicue. Naga lamparín ie oromona finoca rairacomo raide.

¹³ Naie lamparíniai motomo iimana eruaidimiena ciodicue. Naimiedi Cristo. Areroina jitade. Oromona finoca cinturóna jitade.

¹⁴ Naimie ifotirai userede iniroi isoi eo userede. Naimie uisi irai boa isoi eruaide.

¹⁵ Naimie eillidi bronze eo dua isoi quenirede. Naimie uai aillue ille tua isoi eo ficirede.

¹⁶ Ie nabeillimo siete ucuduna lliide. Naimie fuemo nagafebei eo jairede lloebi ite. Naimie uieco eo quenirede, jitoma eo lligaiñua isoi.

¹⁷ Naimiena cue ciuamona, naimie uicomo fiodaitimie isoi ana uaidicue; iadedi ie nabeilli diga cuena jetajamona raite:

—Cuena jaciruiñeno. Siño jitona cue illamona, jaie jaca iticue. Ico jaca iiticue.

¹⁸ Jaie fiodaiticue; iadedi naiemona jaie jillodicue. Jaca iiticue. Dane fiodaiñeiticue. Cue uai siñona jira, comini fiodailliruina lloticue. Cuena iinoñedino fiodailla mei, naimaci joreñuai illinona jai lloticue.

¹⁹ O como ciua rafuena cueno. Omo cue ja lolle rafuena cueno. O ciolle rafuena jai cueno.

²⁰ Ailluena rafue omo lloiticue. Ona iena uiñotaiticue. Cue nabeillimo siete ucuduaina ciodio. Bie siete ucuduaidi bie siete creyentiai llofueraini isoide. Bie siete lamparíniaidi bie siete illanomo ite creyentiai isoide. Bie creyentaina ja ñaiacadicue —raite.

2

Cristo Efesomo ite creyentiaimo lloga rafue

¹ Cristo cuemo lloste:

—Efesomo ite creyentiaimo llolena, nainomo ite llofueraimamo cue lluaena cueno: “Cue nabeillimo siete ucuduai ite. Siete oromona finoca lamparíniai motomo iticue. Omoina ñaiticue. Omoi llofueraima cue anamo ite. Omoi motomo cue illamona, cuena nabaidomoi.

² Omoi motomo cue illa jira, omoi illana raise uiñoticue. Omoi comeciai ocuiñocana iciriñeno itomoi. Maraiñedicinona finoraini diga nabairiñedomoi. Omoi motomo damierie ‘Cristo oretagacai’ raitinona facaciamona, naimaci tainona llorainina uiñotomoi.

³ Omoi comeciai ocuiñocana jaicabidomoi. Cue muidona duere sefuidomoi; iadedi iena sefuiruiñedomoi. Cuena iñocana nia jaidomoi.

⁴ Iese itomoi; iadedi omoi abi rafue cuemona birui janore ite. Creyentaina omoi nano jailla facaise cuena eo isiruitomoi; iadedi birui iese cuena isiruiñedomoi.

⁵ Iemo omoi comeciaina faca. Cue dibeimo dane raise i. Cuena omoi nano isiruilla facaiseconi omoi illa isoi, cue jitaillacinona birui omoi fino. Cue dibeimo omoi comeciai dane raise iñenia, omoina duere finoiticue. Iemona omoi lamparín oni uiticue. Omoi creyentaina ñaiticue. Cue dibeimo raise omoi iñenia, jairuido omoi illanomo creyentiai iñeitimaci.

⁶ Omoina marecinona jai lloiticue. Nicolaítas railla comini finoca rafuena gaiñedomoi. Iena jai gaiñedicue. Eo maraiñede rafuena finocana jaidimaci.

⁷ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jai iñua. Cuena raise iñotonomo Jusiñamui illanomo ite riarana iiticue. Ie lillilemona jaca iitimaci” cueno.

Cristo Esmirnamo ite creyentiaïmo lloga rafue

⁸ Cristo cuemo llote:

—Esmirnamo ite creyentiaïmo llollena, nainomo ite llofueraimamo cue lluana cueno: “Jaie jaca iticue. Eniruemo jaie cue ia, fiodaiticue; iadedi naïmona jai jillodicue. Jaca iiticue.

⁹ Cue cominina omoi illa jira, duere sefuidomoi. Omoi duerenana uiñoticue. Benomo dueredomoi; iadedi Jusïnamuïmona duenidomoi. Naimïe ñine ico omoi ia, buerenitomoi. Damïerie omoina jeare ñaïana uiñoticue. Naimacidi judïuai comini; iadedi cue ñibeïmo iñedimaci. Taife anamo itimaci.

¹⁰ Ico omoi duere sefua, jacïruiñeno. Taife cárcelmo omoïmona damïeriena itataite. Abido danomo omoi jaïllena, iese omoïna duere finoite. Diez digarui duere sefuitomoi. Omoi ille ñinori cuena ñnocana omoi jai. Duere sefuïllamona bu fiodaia, cue diga jaca iite.

¹¹ Jusïnamui Joreñomona cue lloga rafue ite, omoi creyentiaï iena. Bie rafue bu cacajia, iena jiaï ñnua. Jusïnamuidi cuena raise ñnotinona naimaci jeacino facaina ñbana oñeite. Iraïmo faïfiñeitimaci; ia Jusïnamui ñine jaca iitimaci” cueno.

Cristo Pérgamomo ite creyentiaïmo lloga rafue

¹² Cristo cuemo llote:

—Pérgamomo ite creyentiaïmo llollena, nainomo ite llofueraimamo cue lluana cueno: “Nagafebei eo jairede lloebi cuemo ite.

¹³ Omoi illana uiñoticue. Taife anamo itino motomo itomoi; iadedi cuena ñnocana ñia jaidomoi. Omoïmona Antipas micorina navui meinetimaci. Naimïe micoridi cue rafuena raise llofueuide. Naie facaise cuena faïnonacaiñedomoi;

¹⁴ Iadedi cuemona janore rafue omoi diga birui ite. Omoïmona damïeriedi Balaam micori llofuiacïnode jaidimaci. Balaam micori Balac micorimo jaie llua jira, omoi jaiagai jeacino finodimaci. Balac cominimo omoi jaiagai diga nabarillena llote. Ie jira omoi jaiagai jiraraïmo fecaca guïllena naimaci diga guitimaci. Iemei naimacimona aïniaina otimaci. Jusïnamuina ñnoñedinomona aïniaina otimaci. Naiemona jearede rafue comuide. Omoïmona birui damïerie iese isoidimaci. Cuena ñnoñedinomona aïniaina otimaci.

¹⁵ Omoïmona damïerie nicolaïtas railla llofuiacïnode jiaï jaidimaci. Naimaci llofuiacïnodi uanaiñedicino.

¹⁶ Naie llofuiacïnomona eneno mai omoi i. Iedo jaiñeno. Naie llofuiacïnode jaidinomo: ‘Omoi comeciaï uai dane meido’ llono. Iena naimaci ñnoñenia, cue ñibeïmo naimaci raise iacaiñenia, cuemo ite lloebi diga cuena ñnoñedinona duere finoiticue.

¹⁷ Jusïnamui Joreñomona cue lloga rafue ite, omoi creyentiaï iena. Bie rafue bu cacajia, iena jiaï ñnua. Judïuai jaiagaïmo maná railla guille cue illa isoi, cuena raise ñnotinomo monamo jai ite maná isoi iiticue. Biena ñaiticue. Imaci comeciaïna oculiñotajacïnona iiticue. Cue cominina naimaci illamona, naimacimo userede noñicina jiaï iiticue. Nainomo mameci ite. Dani naïena feïñotino naie mamecina uiñoitimaci” cueno.

Cristo Tiatiramo ite creyentiaïmo lloga rafue

¹⁸ Cristo cuemo llote:

—Tiatiramo ite creyentiaïmo llollena, nainomo ite llofueraimamo cue lluana cueno: “Jusïnamui Jitona cue illanona, bie rafue omoïmo lloiacadicue. Cue uisi irai isoi boode. Cue eilli bronce eo dua isoi quenirede.

19 Omoï finoca rafuena uiñoticue. Jusiñamuina omoï isiruillana uiñoticue. Jiaie cominina omoï isiruillana uiñoticue. Cuena omoï ñnuana uiñoticue. Jiaie creyentiaina omoï canocabillana uiñoticue. Duere sefuidomoï; iadedi omoï comeciai ocuiñuana uiñoticue. Navui iese icana jaidomoï. Birui bai lliai jaidomoï;

20 iadedi cuemo omoï diga rafue ite. Omoï motomo maraiñede riño ite. Jezabelna ñaiticue. Naiñaiñona omoï oni dotañena jira, cuemo omoï diga rafue ite. 'Jusiñamui rafuena jino llua uai cuemo ite' naiñaiño lloste. Uanaiñedicinona llofuecabilla jira, omoïmona damieriena jifueete. Jearede rafuena llofuecabite. Omoï aiñede riño diga illana llofueete. Omoï iniñede ñima diga illana llofueete. Jiraraimo fecaca guille guillena llofueete. Iena guilla jira, omoïmona damierie naie jiraraina sedade. Iese naiñaiño llofuecabite.

21 Naiñaiño comeci iuai meidollena are sedadicue; iadedi naiñaiño naie jearede rafuena fainonocaiacaiñede.

22 Naiñaiño duere sefuillena, naiñaiñona duitaiticue. Naimaci comeciai iuai naimaci meidoñenia, naiñaiño llofuiacinodo jaidinona jiai eo duere finoiticue.

23 Naiñaiño dibeimo itinona meineiticue. Nana creyentiaidi nana comini comeciai iuaillaina cue uiñuana jiai uiñoitimaci. Nana comini comeciai facajacinona cue uiñuana jiai uiñoitimaci. Ie jira omoï finolle rafue ñiese cuemona duere sefuitomoï.

24 Jezabel llofuiacinodo jaiñedinomo ja lloiticue. Taife come uiñoñega rafuena uiñote. Iena nia uiñoñedomoï. Omoïmo jiaie rafuena lloñeiticue;

25 iadedi cue nia abido biñenia, cuemona omoï uiñooga rafuena ñnocana mai jai.

26 Cue Moomona cue uaina feiñoticue. Cuena raise ñnuamona, abido cue bia, cue jitaillacinona finocabidinomo cue uaina iiticue. Naie facaise cue uai diga cue anamo ite nairaiaina raise sedaitimaci.

27 Naimacina riire raise sedaitimaci, cue jitailla rafue naimaci finollena. Iena naimaci finoñenia, naimacina duere finoitimaci, lloedosi diga, nogo eo llaila isoi.

28 Cuena ñnotinomo monairaicuduna jiai iiticue.

29 Jusiñamui Joreñomona cue lloga rafue ite, omoï creyentia iena. Bie rafue bu cacajia, iena jiai ñnua" cueno.

3

Cristo Sardimo ite creyentiaimo lloga rafue

1 Cristo cuemo lloste:

—Sardimo ite creyentiaimo llolena, nainomo ite llofueraimamo cue llua cueno: "Jusiñamui Joreño cuemo ite. Naimie Joreño omoïna canocabide. Omoïna sedacabide. Siete ucuduai cuemo jiai ite. Omoï llofueraimana ñaiticue. Omoï finoca rafuena uiñoticue. 'Cristona raise ñnoticai' raitomoï; iadedi omoï comeciaimona raise iñedomoï.

2 Cue dibeimo raise dane i. Cuena dane raise ñnocana jai. Cuena jai fainonocaiacadomoï. Jusiñamui omoï finoca rafueri iobiñede.

3 Cue rafuena jiaie cacajamona, iena ñnotomoï. Iedo dane jai. Omoï comeciai iuaina dane meido. Cue dibeimo dane raise omoï iacaiñenia, firiraima bainino billa isoi, omoïna duere finollena, ebena biiticue. Omoï ñine cue billiruina uiñoñeitomoï.

4 Omoimona damierie jearede rafuena finocana jaiñedimaci. Jusiñamumona naimaci comeciai marena jira, cue dine naimaci illena, userede iniroina jitañimaci.

5 Cuen a ñnocana jaidinodi userede iniroina jitañimaci. Cuemo ite rabenicomona naimaci mameciaina doñeiticue. Cue illanomo jaca iitimaci. ‘Naimacidi cue comini’ cue Moomo lloiticue. Naimie jaienisaimo iena jiai lloiticue.

6 Jusiñamui Joreñomona cue lloga rafue ite, omoi creyentiaia iena. Bie rafue bu cacajia, iena jiai ñnua” cueno.

Cristo Filadelfiamo ite creyentiaimo lloga rafue

7 Cristo cuemo llote:

—Filadelfiamo ite creyentiaima llollena, nainomo ite llofueraimamo cue lluaña cueno: “Mareuidimedicue. Uanaicinona jaca lloticue. David micori jitona cue illamona, illaimana cue illa jira, siño uai cuemo ite. Ie muidona cue jitailla diese cominina feiñoticue. Jusiñamui illanomo naimaci illena, naimacina feiñoticue. Cue jitailla diese cominina feiñoñedicue.

8 Omoi finoca rafuena uiñoticue. Omoina cue canua jira, jaca buna cue rafuena omoi lluaña itatanide. Jamai bue isidomoi; iadedi cue rafuena ñnocana jaidomoi. Cuen a janoñedomoi.

9 Omoi dine damierie Taife anamo itimaci. Naimacidi judiua; iadedi cue dibeimo iñedimaci. Tainona llocabitimaci. Ero, omoi dine naimacina cue bitatajamona, omoina cue isiruillana uiñoitimaci. Cue dibeimo naimaci jailla mei, cuemo iobillacinona fecaitimaci.

10 Nana cuena ñnoñedinona ico eo duere finoiticue. Iemona cuena naimaci ñnoñenana uiñoiticue. Omoi duere sefuiñellena, naie facaisemona omoina jillotaiticue.

11 Eniruemo ebena abido biiticue. Cuemona ibana omoi feiñoñeni raillano, cue dibeimo ñnocana omoi jai. Cue dibeimo raise omoi jaiñenia, cuemona jaiñie omoi facaina ibana feiñoite.

12 Cuen a raise ñnotino comeciaina ocuiñotaiticue. Cue illanomo jaca iitimaci. Cuemo naimaci duilla jira, cue jaiie mamecina naimaci abimo cueiticue. Jusiñamui mamecina naimaci abimo cueiticue. Jusiñamui illano mamecina naimaci abimo cueiticue. Naimie illanodi comue Jerusaléna mameciredede. Naimiemona, monamona ico ana biite.

13 Jusiñamui Joreñomona cue lloga rafue ite, omoi creyentiaia iena. Bie rafue bu cacajia, iena jiai ñnua” cueno.

Cristo Laodiceamo ite creyentiaimo lloga rafue

14 Cristo cuemo llote:

—Laodiceamo ite creyentiaimo llollena, nainomo ite llofueraimamo cue lluaña cueno: “Siño Jitodicue. Cue lloga uaina jaca finocabidicue. Uanaicinona jaca llocabiticue. Cue uaido Jusiñamui nana finode. Nana comuitate.

15 Omoi finoca rafuena uiñoticue. Cue rafuedo jaillana nia fañonocaiñedomoi; ia cue rafuedo eo raise jaiñedomoi. Janore ñnocana jaidomoi.

16 Omoi finoca rafuena cue gaiñena jira, cuemona omoina oni dotaiticue.

17 ‘Ucuberedicai’ raitomoi. ‘Raruiairedicai. Nana cai jitailla ra caimo ite’ raitomoi. Cuemona iese iñedomoi. Cuemona dueredomoi; ia iena uiñoñedomoi. Cuemona caimare iñedomoi. Cuen a omoi raise ñnoñena jira, uisidinno isidomoi. Taimiedomoi isidomoi.

¹⁸ Ie jira omoïna dajerie rafuena llofueitïcue. Cuemona omoï eo duerena jira, omoï comeciã raise iñena jira, omoïmo fiebidicinona cuemo jica. Cuemona ono. Omoï duenillena, cuemona eo mare oro isoide rana ono. Omoï taimieñelle isoïñellena, cuemona omoï meiruiñellena, userede ñiroi isoide ra cuemona ono. Omoï uisina cioille isoïllena, cuemona manue ono. Omoï comeciãina ñaitïcue. Cuena raise omoï ñinoia, buena omoï comeciãimo fiebiñeite.

¹⁹ Cue isiruirgano cue ðibeimo raise illena, naimacimo riire llocabitïcue. Cue uaina naimaci ñnollena, naimacina jiaï duere finocabitïcue. Ie jira cue ðibeimo raise omoï i. Jeacino omoïmo ia, iena fainonocai.

²⁰ Ero, nase tutïcue isoidïcue. Bu cuena cacajia, cue fo billena cuena uaidoia, nasena bu econoia, fo jaitïcue. Naimiena nabaïllanona, naimie diga guitïcue. Omoï comeciãina ñaitïcue. Cue rafuena omoï cacaja mei, iena omoï ñinoia, cuena feiñoitomoi. Iemona conini nabaiticai.

²¹ Eniruemo cue Moo jitaila rafuena jae cue fuidua mei, naimie ecimo abido jai itïcue. Cueri naimie iobillamona, illaïmana cue illamona, naimie ecimo jai itïcue. Ie isoide. Cuena raise ñnotino monamo cue ecimo itatitïcue. Cue cominina naimaci illa jira, naimacina iobitallena, cue ecimo naimacina nabaitïcue.

²² Jusiñamui Joreñomona cue lloga rafue ite, omoï creyentiaï iena. Bie rafuena bu cacajia, iena jiaï ñnua” cueno.

4

Juan Jusiñamui illanomo ciua rafue

¹ Dallu illanona monamo cue eruaia, jiaie rafuena cioidïcue. Nainomo Jusiñamui illanomo econoga nasena cioidïcue. Ailli cue diga ñaitimiedi cuena uaidote. Naimie uai trompeta isoï ficirede. Llote:

—Monamo bi. Jiaïruido sülle rafuena omo acataitïcue.

² Jusiñamui Joreño anamo cue illamona, nicaïrilla isoï Jusiñamui illanona cioidïcue. Nainomo naimie ana raïllana cioidïcue.

³ Naimie eo quenirede. Eo raifide ebirede noficina eruaide. Jaspe railla noficina eruaide. Jaspe enefebecodo ciode. Cornalina railla noficina eruaide. Cornalina jiaïrede. Naie illano ecimo ameona cioidïcue. Ameo mocorena jira, esmeralde railla noficina eruaide.

⁴ Naie illano ecimo veinticuatro raïrabici jiaï ite. Nainomo userede ñiroina jitajanona veinticuatro einamacï ana raïdimaci. Naimaci ifogimo oromona finoca nuicirai ite.

⁵ Jusiñamui illanomona boricabide. Jiaï gurucabide. Bue isoï eo ficirede. Naie illano uicomo siete reitirai boode. Naie reitiraidi Jusiñamui Joreño mamecido nainomo boode.

⁶ Jusiñamui illano uicomo vidriona eruaide joraina cioidïcue. Eo quenirede. Naimie illano ecimo cuatro cajedino ite. Diga uisï naimaci uiecomo ite. Diga uisï naimaci emodomo ite.

⁷ Damie leónna eruaide. Jiaïmie jurareta jitona eruaide. Jiaïmie ie uieco come uiecona eruaide. Jiaïmie feede majaiñona eruaide.

⁸ Nagamiaïmo seis iaico ite. Ailluena uisï naimaci iaicuaïmo ite. Naimaci abïmo uisï jiaï eo ite. Nagarui iniñeno jaca llotimaci:
Mare, mare, mare.

Cai siño Nama Jusiñamuidi eo mareuidimie.
Jae jaca ite. Birui ite. Ico jaca iite.

⁹ Naimaci iese llua jira, Jusiñamuina iobitadimaci. Naimie mo iobillacinona naimaci iese fecaia,

¹⁰ naie veinticuatro einamací Jusiñamui uicomo ana bitadajanona, naimiemo iobillacinona jiaí fecadimaci. Naimieri iobillanona, naimaci nuiciraina naimie dine faianona,

¹¹ rotimaci:

Cai Nama Jusiñamui, ona eo iobitaiacadícai.

Odi mareuidio.

Nana rana comuitatio.

Nana cominina comuitatio.

O jitailla jira, naimaci itimaci.

Ie jira iobillacinona omo fecacabidícai.

5

Juan Jusiñamui illanomo ferinoga rabe illana ciode

¹ Jusiñamui illanomo cue nia eruaia, naimie nabellimo ferinoga rabe illana ciodicue. Nagafebeimo cueda rafue jai ite. Siete nitaca ra illamona, naie rabe raise ibaibide.

² Jusiñamui ie nanoca jaienici ado lluana cacadicue. Naimie jicanote:

—¿Bumo ite uaidi nitaca rabe econollena, naie rabena facallena?

³ Monamo itinomona, enirue itinomona, jai fioidaitinomona, bumio ie uai ifede, naie rabe oni econollena. Naie rabe facanidimaci.

⁴ Jaca bumio naie uai ifena jira, eo eedicue.

⁵ Naie facaise naie veinticuatro einamacimona damie cuemo llote:

—Mai eeñeno. Judá nairai ie Leónna mameciredimiedi iena econorede.

Naimiedi David micori comini imie. Ie dibeimo ifedinona jai emodofilla jira, naimiemo uai ite, naie siete nitaca rana oni suiñollena, naie rabena econollena.

⁶ Naie facaiseconi Toica Llaudana ciodicue. Jusiñamui illano uicomo naimie ite. Naie cuatro cajedino naimie ecimo ite. Naie veinticuatro einamací naimie ecimo jiaí itimaci. Faga llaudana eruaide; iadedi jai jilluamona naidaide. Naie Toica Llaudadi Cristo. Naie Llaudamo siete sigai ite. Siete uisi naimiemo jiaí ite. Naie uisidi Jusiñamui Joreño mamecido ite. Nana cominina canollena, naimacimo Cristodi Jusiñamui Joreñoña jai orede.

⁷ Naie facaise Jusiñamui ie nabellimona naie rabena ote.

⁸ Iena naimie ua mei, naie cuatro cajedino, naie veinticuatro einamací diga, naimiema sedallena, naimie uicomo ana bitadatimaci. Nagamiemo guitarrana eruaide arpa ite. Nagamiemo oromona finoca copa ite. Naga copamo camare soride ra boode. Naie radi Jusiñamuiemo comini jiacino mamecido ite.

⁹ Llaudana sedallena, naimaci arpas taillanona, comue ruana rotimaci:

O marena jira, o uai ite, naie rabe econollena.

Ie nitaca rana oni suiñoitio.

Jiaíno jiaie ona meinetimaci.

O fioidailla jira, o diaillamona, Jusiñamui dibeimo naga nairaimona cominina itatatio.

Naimaci jeacinomona jillotatio.

¹⁰ Naimacina jai fetodio.

O comini naimaci illamona, Jusiñamui diga atona ñaicabitimaci.

Naimie anamo jairuido eniruemo ite cominina sedaitimaci.

Ie jira naie rabena oni suiñoreidio.

¹¹ Iemei dane eruaillamona, naimie ecimo eo ailluena Jusiñamui jaienisaína ciodicue. Naie cuatro cajedino ecimo, naie veinticuatro einamací ecimo itimaci. Diga illa jira, facanide.

¹² Ado llotimaci:

Bie Toica Llauda isoidimie jaie fodaite; ia jai jillode.

Naimie eo mareuidimiena jira, Jusiñamui ie uai naimiemo jai illamona, Jusiñamui nana naimiemo jai illamona, Jusiñamui naimiema eo abina uñotajamona, naimiema jai iobitaiacadicaí.

Naimiema cai ñnuanona, naimiemo iobillacinona feacaadicaí.

¹³ Iie facaise nana comini, nana Jusiñamui comuitaga ra diga, lluaa cacadicue. Monamo itino, enirue itino, jai fodaitino, monaillaimo itino lluaa cacadicue. Llotimaci:

Jusiñamuina jaca cai iobicabillasa. Toica Llauda isoidimiena jaca cai iobicabillasa. Iobillacinona jaca feacaadicaí. Caina jaca sedallena.

¹⁴ Naie cuatro cajedino raitimaci:

—Ie isoi jai lloiacadicaí.

Ie facaise naie Llauda isoidimiena sedallena, naie veinticuatro einamaci ana bitadatimaci.

6

Juan siete nitaca ra oni suiñuana cìode

¹ Toica Llauda isoidimie iobillacinona naimaci feaja mei, Llauda isoidimie daje nitaca ra oni suiñuana cìodicue. Naie cuatro cajedinomona damiedi guraa uai isoi lluaa cacadicue. Naimie llote:

—Mai bi.

² Naimie llua mei, userede caballo billana cìodicue. Caballo emodo itimie sicuira ite. Illaimana jira, naimie ifogimo nuicirai jide. Ie bacauai anafetallena, oni jaide.

³ Iemei Llauda isoidimie jaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

⁴ Naimie llua mei, jiairede caballo billana cìodicue. Caballo emodo itimie are lloebi illamona, Jusiñamui jitaila jira, caballo emodo itimie enirue itonona uri itatañede. Naimaci uri iñena jira, conini icirilla jira, conini meinetimaci.

⁵ Iemei Llauda isoidimie jaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

Naimie llua mei, jitirede caballo billana cìodicue. Aime guille facaise illa jira, caballo emodo itimie onollimo ra facaradi ite.

⁶ Naie cuatro cajedino motomona damie llote:

—Guille raise iñena jira, comini aime guitimaci. Daje kilo trigo ie core darui maijia ua ucube diese raifide. Iemona llomenicono finoia, dacaño guille raifi ite. Tres kilos cebada ie core darui maijia ua ucube diese raifide. Iena damie oia, iemona llomenicono finoia, dacaño amani guille raifi ite. Illimo riarana ite; ia iena iballena ucube baiñede. Ie muidona aime guitimaci —llote.

⁷ Iemei Llauda isoidimie jaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

⁸ Naimie llua mei, liai usereide caballona cìodicue. Ie emodo itimie mamecidi Fiodaitadimie. Jusiñamui uai naimiemo illa jira, naimie jailla mei, ailluena fiodaitino itimaci. Jobairillemona, aime guillemona, duicomona, riirede ocainaiamona fiodaitimaci. Atuedo meinetasiñeite; iadedi eo ailluena meinetasiite. Riaí uaimona ie cuarta facaina comini fiodaitimaci.

⁹ Iemei Llauda isoidimie jiaie nitaca ra oni suiñode. Suiñua mei, Jusiñamuimo caimare soride boode rana jobaisoillanona ciodicue. Naie illano anamo comini joreñuaina ciodicue. Jusiñamui rafuena naimaci llua jira, “Jusiñamui cominidica!” naimaci llua jira, Jusiñamuina ñnoñedino naimacina meinetimaci. Jai fiodaillamona naimaci joreñuai Jusiñamui illanomo jai itimaci.

¹⁰ Jusiñamuimo ado llotimaci:

—Cai Nama, siño jitodio. Mareuidimedio. O uaina jaca finodio. ¿Niruido caina meinetinona duere finoitio? ¿Niruido ibana oitio?

¹¹ Jusiñamui cominina illamona, naimacimo Jusiñamuidi userede areroina jitallena fecade. Llote:

—Janore jisa seda. Ibana nia oñeiticue. Cue dibeimo omo maijia isoi, cue cominina nia meinetimaci. Naimacina meinia mei, ibana oiticue.

¹² Iemei Llauda isoidimie jiaie nitaca ra oni suiñuana ciodicue. Suiñuana, aillue ñuisaño suide. Jitoma eo jitifecaide. Fivuidi druena eruaide. Jiairede.

¹³ Riirede aifi riana ana llutaja isoi, monamona eniruemmo ucuai llude.

¹⁴ Ferinoga rabe oni uilla isoi, mona iñebicaide. Naga anedu, naga uiasi diga jiai oni jaide.

¹⁵ Ie jira illaicomini, jamai bue isoiñedino, ucuberedino, patrón anamo itino, patrón anamo iñedino, ua nana comini jaciruillamona reiritimaci. Damierie notici moto ifomo reiritimaci. Damierie anedu motomo reiritimaci.

¹⁶ Anedumo llotimaci. Noficimo llotimaci:

—Caina ibaillena, cai emodomo ana uai. Jusiñamui ricaillafuemona caina reirita. Llauda isoidimie ricaillafuemona caina reirita.

¹⁷ Iaimaiai ricaillarui jai ite. Naiemona buna jillobinide —llotimaci.

7

Juan ailluena Israel comini Jusiñamui sello diga nitajana ciodie

¹⁻² Naie facaise jiaie ico suille rafuena ciodicue. Cuatro Jusiñamui jaienicina ciodicue. Damie jitoma billanomo ite. Jiamie jitoma jaillanomo ite. Jiaie iaimaiai beicimo itiaimaiai. Aifi biñellena itimaci. Ie muidona monaillai dine aifi iñede. Aifi iñena jira, amenaiai nirairiñede. Eniruena monaillai diga maraiñeno finollena naimacimo uai ite. Naie facaise jiaie jaienici jitoma billanomona billana ciodicue. Naimiedi cai cajede Jusiñamui ie sellona uite. Jiaie jaienisaïmo ado llote:

³ —Eniruena aifi diga maraiñeno nia finoñeno. Monaillaina maraiñeno nia finoñeno. Amenaiaina maraiñeno nia finoñeno. Jusiñamui dibeimo itino ueicuai itofiai sello diga nia cai nitañenia, eniruena maraiñeno finoñeno.

⁴ Ailluena comini sello diga nitade. Ciento cuarenta y cuatro mil diese nitajana cacadicue. Nana naimaci Israel cominimona itimaci.

⁵ Judá micori cominimona doce mil ite. Rubén micori cominimona doce mil ite. Gad micori cominimona doce mil ite.

⁶ Aser micori cominimona doce mil ite. Neftalí micori cominimona doce mil ite. Manasés micori cominimona doce mil ite.

⁷ Simeón micori cominimona doce mil ite. Leví micori cominimona doce mil ite. Isacar micori cominimona doce mil ite.

⁸ Zabulón micori cominimona doce mil ite. José micori cominimona doce mil ite. Benjamín micori cominimona doce mil ite. Diese nitade.

Juan ailluena comini userede ñiroina jitajana ciodie

⁹ Naie facaise ailluena cominina ciodicue. Ailluena jira, naimacina facadonicue. Naga nairaiaimona itimaci. Naga jiaie ñaia uaido ñaitino

itimaci. Jusiñamui uicomo itimaci. Toica Llauda isoidimie uicomo itimaci. Userede iniroina jitadimaci. Naimaci onollimo raforuai ite.

¹⁰ Ado llotimaci:

Bie Llauda isoidimie jaie fiodaillamona, cai jeacinomona Jusiñamui caina jai jillotate.

¹¹ Naie facaise nana Jusiñamui jaienisaí naimie ecimo naidaillana ciodicue. Naie veinticuatro einamací ecimo, naie cuatro cajedino ecimo jiai naidaídimaci. Naie facaise Jusiñamui uicomo ana bitadajanona, naimiena sedadimaci.

¹² Raitimaci:

Bie comíni isoi omo iobillacinona jiai fecaacadicaí.

Odi mareuidimedio. Abina eo uifotio. Odi jaca siño jitodio.

Ie jira iese lloticaí.

Ona jaca cai iobitajasa.

¹³ Naie facaise naie veinticuatro einamacimona damie cuemo jicanote:

—¿Userede iniroina jitadinodi nimaci? ¿Ninena bitimaci?

¹⁴ Uai oticue:

—Uifioñedicue. Cuemo llono.

Naimie uai ote:

—Bimacidi eo duere sefuilla facaise Jusiñamuina ifioñedino meinogano. Naimaci iniroina jai jocoritimaci. Llauda isoidimie jaie fiodailla jira, naimie diruedo jocuamona, naimaci iniroi jai userede. Naimaci iniroina lloticue; ia naimaci começaina jiai ñaiticue. Llauda isoidimie fiodailla jira, naimaci começai jai jeanide.

¹⁵ Ie jira Jusiñamui uicomo itimaci. Nainomo naimiena jaca sedaitimaci. Naimiena jaca iobitaitimaci. Naimie ocuilla rafue jaca fnoitimaci. Naimacina naimie raise nabaillamona, naimacina raise eenoite.

¹⁶ Dane duere sefuiñeitimaci. Nana naimaci jitailla ra naimacimo iite. Aime dane guñeitimaci. Naimaci jiroacalle ra jaca iite. Eo ecasillamona dane duere sefuiñeitimaci. Iemona dane usitañeitimaci.

¹⁷ Jusiñamui illanomona Llauda isoidimie naimacina raise sedaja jira, raise marena iitimaci. Naimacina naimie raise sedajamona, jaca iitimaci. Jusiñamui naimacina raise duenaillamona, duere sefuillamona dane eñeitimaci. Dane sunañeitimaci.

8

Juan Llauda isoidimie iraié nitaca ra oni suiñuanona ciodé

¹ Toica Llauda isoidimie iraié nitaca ra oni suiñuanona, media hora monamo tii raiñoicaide.

² Iemei siete Jusiñamui jaienici naimie uicomo illana ciodicue. Nagamiemo daje trompetana fecade.

³ Naie facaise jiaie jaienici billanona, Jusiñamuimo camare soride ra jobaisoillano ecimo nadaide. Naie jobaisoillanodi oromona finoca. Ie onollimo oromona finoca cucharón eruaide ra ite. Ailluena camare soride ra naimie feñua mei, iena jobaide. Ie facaise nana Jusiñamuina ifnotino jiacino Jusiñamuimo jaide.

⁴ Jobaillamona Jusiñamui uicomo a jaide. Nana Jusiñamuimo jiacino diga a jaide.

⁵ Naie facaise Jusiñamuimo jobaisoillanomona boode reici jaienici uanona, cucharóna eruaide ramo iena jonianona, eniruemo iena ana dotade. Ie jira gurucabide. Bue isoi eo ficirede. Naganomo boricabide. Ñuisaño suide.

Juan trompetas fillana cacade

⁶ Iemei naie siete jaienici naimaci trompetas fillena llinote.

⁷ Damie ie trompetana fite. Filla jira, monamona janorede hielo, boode ra diga, dirue diga, eniruemo uaide. Atuedo enirue boofede; ia ailluena boode. Riai uaimona ie tercera facaina boode. Nainomo nana amenaiai boode. Nainomo nana raiticiño boode.

⁸ Jiaie jaienici ie trompeta fite. Filla jira, Jusiñamui anedu isoide boode ra monaillaimo faite.

⁹ Iemona monaillai diruena jaide. Atuedo iese jaiñede; ia ailluena iese jaide. Riai uaimona ie tercera facaina diruena jaide. Ie muidona ie tercera facaina lliciai fiodaite. Nainomo ite botemona ie tercera facaina jiai anabaite.

¹⁰ Jiaie jaienici ie trompetana fite. Filla jira, monamona aillue boode ucudu eniruemo uaide. Iemona ie tercera facaina illeniai, ie tercera facaina jorainiai diga erifeficaide.

¹¹ Ie muidona naie ucudu Ajenjona mameciredede. Riai uai oni dobañuamona “Eriedimie”. Iemona jinui erifeficaide. Iena jiruamona, ailluena comini fiodaitimaci.

¹² Jiaie jaienici ie trompetana fite. Filla jira, jitoma, fivui diga, ucuai diga, fuiride. Iemona aremona cuatro horas raise usenide. Naiona cuatro horas eo jitirede.

¹³ Iemei jaienici ado cuirioillana cacadicue. Monamo feianona llote:

—Eniruemo itino ua eo duere ja sefuitimaci. Daje amani jaienici imaci trompetana nia fiñede. Iena naimaci fia, comini eo duere sefuitimaci.

9

¹ Jiaie jaienici ie trompeta fite. Filla jira, naie facaise monamona eniruemo damie ucudu mamecido jai uaillana ciodicue. Naimiemo Jusiñamui daje llavena fecade. Enirue eo ana ite ifo nase ie. Nainomo Taife comini, Janaba comini diga itimaci.

² Llave diga naie ifo ie nasena econote. Ie facaise ifomona eo ailluena uillie jino bite. Ie muidona jitoma raise bainide. Mona jitireficaide.

³ Uilliemona fioduaina eruaillanona, Taife comini, Janaba comini diga jino billanona, nana eniruemo bitimaci. Jusiñamui llua jira, acaido isoi fioduai eruaidinodi maitimaci.

⁴ Raiticiño naimaci guillena, ibena naimaci guillena Jusiñamui rairuide. Naimie jitailla jira, naimie sello diga nitañeganona duere finodimaci.

⁵ Jusiñamui jitailla jira, cinco fivui naimacina duere finoitimaci; ia cominina meineñeitimaci. Acaido isoi isire maitimaci. Eo isirenite.

⁶ Iese ico suia, eo duere comini sefuilla jira, fiodaillana jitaitimaci. Naimaci abina meineacanitimaci. Fiodaiacanitimaci; ia fiodainitimaci.

⁷ Fioduaidi jobaime dine jaide caballuaina eruaidimaci. Naimaci ifogimo oromona finoca nuicirai eruaide radi ite. Naimaci uiecuai cominina eruaidimaci.

⁸ Naimaci ifotie arena illanona, riño ifotiena eruaide. Naimaci isiduai leones isiduaina eruaide.

⁹ Naimaci abiaimo ico isoi ra ite. Lloemona finoca rana eruaide. Naimaci feiamona, ailluena caballuaina jobairillanomo jaillena riire sonode carretas isoi ficiredimaci.

¹⁰ Naimaci omacai acaido isoide. Naie diga maillanona, cinco fivui cominina duere finoitimaci.

¹¹ Naimaci illaimadi naie ana ifona sedadimie. Judíuai uaimona naimie mamecidi Abadón. Griego uaimona naimie mamecidi Apolión. Oni dobañuamona naimie mamecidi Cominina Fuidodimie.

¹² Daje duere sefuilla rafue jai fuite. Mena nia suñede.

¹³⁻¹⁴ Naie facaise jiaie jaienici ie trompeta fite. Jusiñamui uicomo ite caimare soride ra jobaisoillano ite. Oromona finoca. Nainomo cuatro sigai ite. Nainomona jaienicimo damie llote:

—Eufrates railla ille fuedo cuatro maiga jaienicina suño —llote.

¹⁵⁻¹⁶ Iena finode. Naimaci anamo eo ailluena soldaduai ite. Doscientos millones soldaduai illana fididicue. Bie facaise, bie hora, birui, bie fivui, bie año, Jusiñamui jitailla facaise ailluena cominina meinetimaci. Atuedo meineñedimaci. Riai uaimona ie tercera facaina meinetimaci.

¹⁷ Soldaduai caballos emodo itimaci. Soldaduai jogobemo ra ite. Daje facaise eo jiairede. Daje facaise mocorede. Daje facaise borarede. Caballos ifogiai leones ifogiaiina eruaide. Naimaci fuemona boode radi, uillie diga, azufre boa isoi jino bite.

¹⁸⁻¹⁹ Naimaci fuemona bite rado ailluena cominina meinetimaci. Ie tercera facaina meinetimaci. Caballos omacai jaiona eruaidimaci. Naimaci omacaimo jaiona eruaide ifogi itimaci. Ailluena cominina jiai duere finodimaci.

²⁰ Iese ie tercera facaina meinetimaci; ia fiebidino naimaci jeacinomona naimaci comeciai iuaina jaca meidoñedimaci. Taifena nia sedaacadimaci. Janabana nia sedaacadimaci. Oromona, platamona, broncezona, noficimona, amenamona finoca jiraraiaina nia sedaacadimaci. Naie isoide radi cajeñena jira, jaca cioñede. Naie isoide radi jamai rana jira, jiai jaca buena cacaiñede. Jaca macariñede. Cajeñede; ia iena sedacabidimaci.

²¹ Conini meinecabitimaci. Aimaniai dine jaicabidimaci. Naimaci aiñede riño, naimaci iniñede iima diga icabitimaci. Rana ficabidimaci. Jeacinona finocana nia jaidimaci.

10

Juan Jusiñamui jaienici, econoga rabenico diga, billana ciode

¹ Ie facaise Jusiñamui illanomona eniruemo jiaie jaienici billana cidicue. Naimiemo Jusiñamui uai eo ite. Uillie motomo naimie ite. Naimie ifogi afemo ameo ite. Naimie uieco jitoma isoi quenirede. Naimie idai eo boode amena isoi eruaide.

² Naimie onollimo econoga rabenico ite. Eniruemo naimie ria, naimie nabei eilli monailai emodomo naidaide. Ie jarifebei eilli eniruemo naidaide.

³ León eo irilla isoi, ado llote. Naie facaise siete gurua ñaia isoidino uai cacadicue.

⁴ Naimaci lluana cacaja mei, iena cueiacadicue; iadedi monamona damie cuemo llote:

—Naie lluana lloño. Iena cueño.

⁵ Naie jaienici ie nabei onolli mona dine ñuitajanona,

⁶ Jusiñamuimo llote:

—Jaca itio. Monana nainomo ite ra diga finodio. Eniruena nainomo ite ra diga jiai finodio. Monailai nainomo ite ra diga jiai finodio. Cue bai femo o faia jira, uanaicinona cue lluana uiñotio. O lloga uaina jaca suite.

⁷ Iraie jaienici ie trompeta ja fite. Filla mei, bie facaise Jusiñamui ie facaina lloraini micoriaimo jae lloga rafue suite. Comini naie rafue jae raise cacaiñedimaci; ia iena ja raise cacaitimaci —llote.

⁸ Monamona cuemo ailli llotimie dane llote:

—Jaienici onollimo econoga ite rabenicono llinuai.

⁹ Ie jira jaienici dine cue jaillanona:

—Iena cuemo ine —lloticue.

Uai ote:

—Iena ono. Iena mai guiño. Ciifo isoi o fuemo iena cacaitio; iadedi o jebemo erirede ra isoi iena cacaitio.

¹⁰ Llinua mei, iena guticue. Ciifo isoi naimerede rana cacadicue; ia guilla mei, erirede ra isoi cue jebemo ite.

¹¹ Cuemo dane llote:

—Omo cue lolle rafuena lloitio. Ailluena cominimo ico suille rafuena lloitio. Illaicominimo ico suille rafuena lloitio.

11

Juan menamie Jusiñamui rafuena lluaana cacade

¹ Cuemo Jusiñamui radosina fecade. Jerusalémo ie jofona facallena, cuemo fecade. Llote:

—Mai jai. Cue jofomo niga metros ite facajai. Atona ruica jiai faca. Nainomo cuemo jobaisoillanona jiai faca. Niga comini naie jofomo ite jiai faca.

² Cue jofo ecimo ite taibirina facañeno. Naie illano judiuañedinomo jainaiaide. Cue jitailla jira, Jerusaléna naimaci emodofillamona, daje amani años abimo atomonado iena duere finoitimaci.

³ Naie facaise menamiemo cue uaina iiticue. Iaimaiiai cue lolle rafuena daje amani años abimo atomonado lloitiaimaiiai. Comini comeci iuai meiduna iaimaiiai jitailla jira, sunaillamona, ebinide iniroina jitaitiaimaiiai —llote.

⁴ Iaimaiiai mena olivos railla riarra mamecido itiaimaiiai. Enirue Namana Jusiñamui illanona, naimie uicomo mena ite lamparin ie rairaco mamecido itiaimaiiai.

⁵ Iaimaiaina duere bu finoacania, naimiena meinetiaimaiiai. Iaimaiiai fuemona boode ra billanona, naimiena meinetiaimaiiai Iaimaiaina duere finodino iese fiodaitimaci.

⁶ Iaimaiiai Jusiñamui rafue lolle facaiseconi noci deitañellena, iaimaiaimo Jusiñamui uai iite. Jinui diruena jaitallena iaimaiaimo uai iite. Iaimaiiai jitaicabilla facaise, diga isoide rafue finuamona cominina duere finoitiaimaiiai;

⁷ Iadedi Jusiñamui rafue iaimaiiai llua mei, eo ana ite ifomona ocainana eruailanona, Taife jino biite. Jino billanona, iaimaiiai diga fuirite. Iaimaiaina anafitaja mei, iaimaiaina meinite.

⁸ Raiafomo joneñeitimaci; iadedi iaimaiiai abi Jerusalén naisomo jamai fiebite. Jerusalén comini jearede rafue finua jira, Jusiñamui rafuena naimaci jitañena jira, Sodoma jaie ite nairai isoidimaci. Egipto jaie ite nairai jiai isoidimaci. Jerusalémo Jesúsna jaie jiai meinetimaci.

⁹ Raiafomo iaimaiiai joniana rairuitimaci. Darui amani abi atomonado ailluena comini, naga nairaiamona iaimaiaina jibuisabitimaci.

¹⁰ Nana eniruemo ite comini iaimaiiai fiodaillari iobitimaci. Iaimaiaimona comini duere sefuilla jira, iaimaiiai jai fiodailla jira, iobitimaci. Rafuena finuanona, dani coninina rana fecaitimaci.

¹¹ Darui amani abi atomonado illanona, fiodaillamona iaimaiaina Jusiñamui dane jillotaite. Ie muidona naidaitiaimaiiai. Nana iaimaiaina cidino eo jacinaitimaci.

¹² Naie facaise monamona damie iaiaiaia uaiduana cacadiiaiaia. Llote:

—Bene mai bi.

Ieconí iaiaiaia enoidimacidi uillie motomo monamo iaiaiaia jaillana ciodimaci.

¹³ Naie facaise aillue ñuisaño suide. Ie jira janore facai Jerusalén goide. Riaí uaimona ie décima facai goide. Naiemona siete mil comini fiodaitimaci. Fiodañedino jacinailamona:

—Jusiñamuidi ua siño jito —lloitimaci.

¹⁴ Mena duere sefuilla facaise jai fuite. Nia daje suiñede; ia raíre suite.

Juan iraié trompeta fillana cacade

¹⁵ Naie facaise jiaie jaienici ie trompetana fite. Monamo itino ado lloitimaci: Jusiñamui, Cristo diga, illaima isoi, eniruemo ite cominina biruimona jaca sedaite.

Naie comini naimie anamo raise iitimaci.

¹⁶ Naie veinticuatro einamaci Jusiñamui ecimo illanona, naimie uicomo ana bitadajanona naimiena sedadimaci.

¹⁷ Llotimaci:

Jusiñamui, cai Nama, omo iobillacinona feaacadicaí.

Siño jitodio. O jitailla rafuena jaca finodio.

O uaido bie cominina jai sedadio.

¹⁸ Ona naimaci ññoñenamona, o diga iciritimaci; iadedi naimacina emodofidio.

Bie facaise jai fiodaitino jillotajamona, ona naimaci ññoñena jira, naimacimona ja ibana oitio.

Jearede rafuena naimaci finua jira, naie facaise ona ññoñedinona duere finoitio.

O dibeimo maijidino, o facaina lloraini, nana ona ñnotino omona ibana feiñoitimaci.

Nibai jamai bue isoidimaci.

Nibai jamai bue isoñfedimaci; iadedi omona ibana feiñoitimaci.

¹⁹ Naie facaise monamo ite Jusiñamui sedajano nase econuana ciodicue. Naie fo ite cajóna ciodicue. Ieconí boricabide. Bue isoi eo ficirede. Gurucabide. Ñuisaño suide. Monamona noci deilla isoi, ailluena hielu ana llude.

12

Juan daje riñona, eo aillue jaijo diga, ciod

¹ Naie facaise monamo daje riñona ciodicue. Naiñaiñona cue ciuamona, Jusiñamuidi eniruemo itinomo ico suille rafuena cue uiñuana jitaide. Naiñaiño ñniroidi jitoma isoi bairede. Naiñaiño eilli anamo fivui ite. Naiñaiño ifogimo nuicirai isoi doce ucuduai ite.

² Jai uruesite. Jocoacana jira, como isirede.

³ Ie facaise monamo jaiamiena ciodicue. Naimiedi Taife. Naimie illamona jiaie rafue suillena uiñoticue. Naimiedi eo aillue jaiona eruaide. Jiairede. Siete ifogi naimiemo ite. Diez sigai naimiemo ite. Naga ifogimo nuicirai ite. Riaí uaimona naimiedi dragón.

⁴ Naimie omacai diga ailluena ucuaína eniruemo ana butade. Riaí uaimona ie tercera facaina butade. Ie uruena gutallena, riño uicomo naidaita naiñaiño jocollena sedade.

⁵ Naiñaiño iimana jocode; ia jaio naimiena gutañede. Nana nairaiái naimie anamo ico illanona, naimacina ie jitaillacinona finotajamona, naimacina eo riire sedaite. Naimacina naimie nia sedañenia, monamo Jusiñamui ie illanomo naimiena uite. Ie ecimo Jusiñamui naimiena itatate.

⁶ Iemei naie riño jofue iñenanomo raire jaide. Nainomo Jusiñamuidi ie illinona jai finode, naiñaiño ie. Daje amani años abimo atomonado naiñaiñona sedaite.

⁷ Naie facaise monamo Jusiñamui jaienisaidi jaiona eruaidimie diga fuiridimaci. Jaiona eruaidimie jaienisai diga jai fuiridimaci. Jusiñamui jaienisai illaíma mamecidi Miguel.

⁸ Naimaci dinena emodofidimaci. Jaio ie jaienisai anafefilla jira, Jusiñamui illanomo naimaci illano jai iñede.

⁹ Eniruemo jaiona eruaidimie ie jaienisai diga dotadimaci. Naie jaiodi Taife. Satanás. Jaiona Taife jaie jaillanona, eo ailluena cominina jai jifuede.

¹⁰ Monamo damie ado lluaña jai cacadicue:

—Jusiñamui lloga uai jai suide. Ie cominina raise jillotate. Naimie uai eo siño. Ie uai Cristomo illanona, Cristodi cominina raise sedaite. Eniruemo Taifena jai dotaja jira, Jusiñamuina bu raise iñoñenia, jeacinona bu finoiá, Jusiñamui uicomo birui naimie finocabilla isoi, Taife caina llogidoñeite.

¹¹ Toica Llauda isoidimie naimaciri fiodailla jira, naimie rafuena naimaci luamona, Taifena emodofidimaci. Fiodaitimacina, naie rafuena llocana jaiacadimaci.

¹² Ie muidona iobi. Monamo omoi illanona, iobi; iadedi eniruemo bu ia, monaillaimo bu ia, eo duere sefuite. Eniruemo Taife jai illa jira, naimiemona duere sefuitimaci. Naimie eo icirite. Nainomo naimie are iñellena uifote. Naimie icirillamona eniruemo itino eo duere sefuitimaci —llote.

¹³ Eniruemo jaiona eruaidimie dotajamona, naiñaiñona duere finollena, naimiedi iimana jai jococa riñona racade.

¹⁴ Naimiemona jilloillena, Jusiñamui mena iaico, majaiño iaico isoi, naiñaiñomo ite. Feianona, jofue iñenanomo daje amani años abimo atomonado illena nainomo jaide. Naiñaiñona Jusiñamui eenollena, nainomo jaide.

¹⁵ Ie facaise jaiona eruaidimie fuemona eo ailluena jinui bite. Ille isoi tote, naiñaiñona corobaitallena;

¹⁶ ia enirue bojuamona, nana jinui nainomo ana jaide. Enirue naiñaiñona canua jira, naiñaiño corobaiñede.

¹⁷⁻¹⁸ Naie facaise jaiona eruaidimie riño diga icirillamona, naiñaiño comini diga jobairiacade. Nana Jusiñamui llogacino iñnotino diga, nana “Jesúmo duidicai” raitino diga, jobairiacade.

13

Juan mena riirede ocainana ciode

¹ Naie facaise monaillai fuemo cue naidailanona, daje riirede ocaina monaillaimona billana ciodicue. Naimiemo diez sigai ite. Naga sigaimo nuicirai raide. Naimiemo siete ifogiai ite. Ie ifogiaimo Jusiñamuina jeare ñaia mameci ite.

² Naie ocaina abi janallarina eruaiide. Ie eilli oso eillina eruaiide. Ie fue león fuena eruaiide. Eniruemo itinona sedallena, naimiemo aillue jaiona eruaidimiedi ie siño uaina fecade.

³ Naimiemo ite ifogimona daje jai bofede. Fiodaitena eruaiide; ia naiemona jai jillode. Naimieri rajicaiillamona, nana eniruemo ite comini naimie díbeimo jaidimaci.

4 Ocainamo ie uaina aillue jaiona eruaidimie fecaja jira, jaiona sedajanona, iobillacinona naimiemo fecadimaci. Ocainana jiai sedajanona, iobillacinona fecadimaci. Raitimaci:

—Naimie siño jito. Naimiena buna emodofinide.

5 Naimiemo Taife uai illa jira, abina uradoillamona, Jusiñamuina eo jeare ñaite. Taife jitailla jira, cuarenta y dos fivui iese nana cominina sedade.

6 Jusiñamuina eo jeare ñaicabite. Naimie illanona eo jeare ñaicabite. Nana Jusiñamui ecimo itinona eo jeare ñaicabite.

7 Taife uai naimiemo illa jira, Cristona eniruemo ite ñnotino diga jobairite. Naimacina emodofide. Iemona nana comini naga nairaiaimona naimie anamo itimaci.

8 Nana Jusiñamui rabenicomo cueñega mameciai diese ocainana sedaitimaci. Jusiñamuidi naimaci mameciaina naimiemo ite rabenicomo eniruena nia finoñena facaise jaca cueñede; ia Toica Llauda isoidimie fiodailla jira, Jusiñamui naimiena ñnotino mameciaina naie rabenicomo jai cuete. Naimie illanomo jaca illena, naimaci mameciaina cuete.

9 Omoi jeforena jira, raise fueollena, bie rafuemo cacarei.

10 Duere sefuillena, naie facaise cárcelmo Cristona ñnotinona joneitimaci. Naimacina meinia mei, naimacina meinetino Jusiñamuimona daje isoi ibana feiñoitimaci. Ie muidona Cristona ñnotino comeci ai ocuiñocaida ñnocana jailla.

11 Naie facaise jiaie rirede ocaina eniruemona billana ciodicue. Toica Llauda isoi naimiemo mena sigai ite. Aillue jai isoi ñaite.

12 Monailaimona bite ocaina uai eniruemona bite ocainamo jiai ite. Ie uai diga, nana cominina monailaimona bite ocainana sedatate.

13 Eo siño rafuena finocabite. Comini cioillena, monamona eniruemo boode ra ana bitatate.

14 Siño rafuena finuamona, Taife jitailla jira, eniruemo itinona jifuete. Iena naimaci sedallena, cominina monailaimona bite ocaina joreño finuana ocuide. Monailaimona bite ocaina lloebi diga navui bofiamona jai jillode.

15 Joreño finua mei, eniruemona bite ocaina iena ñaitatate. Iena bu sedañenia, ocaina naimiena meiniana ocuide.

16 Nana cominimo naimie número cuetatate. Número cuetatañenia, naimie mamecina cuetatate. Ie nabeillimo cuetatañenia, ie uiecomo cuetatate. Jamai bue isoidinomo cuetatate. Jamai bue isoiñedinomo cuetatate. Ucuberedinomo cuetatate. Ucubenedinomo cuetatate. Patrón anamo itinomo cuetatate. Patrón anamo iñedinomo cuetatate.

17 Iese bumo iñenia, rana ibanide. Rana fecanide. Bie mamecidi bie ocaina ie mameci. Mamecina cuetatañenia, naimie ie número cuetatate.

18 Iena raise cacaillena, iemo omoi comeciaina faca. Abina uñotimie bie número uñoitte. Come mamecido iite. Bie número seiscientos sesenta y seis.

14

Juan 144,000 comini ruana cacade

1 Naie facaise Jerusalémo Sion railla anedu muidomo Toica Llauda isoidimie naidaillana ciodicue. Naimie diga ciento cuarenta y cuatro mil comini itimaci. Naimaci uiecuai itofiaimo naimie mameci, ie Moo mameci diga, jai cueba.

² Monamona damie ñaiana cacadicue. Aillue ille surua isoi, eo ficirede. Eo gurua isoi jiai ficirede. Ailluena comini arpas tailla isoi, naimie ñaiana cacadicue.

³ Jusiñamui illanomo bie ciento cuarenta y cuatro mil comini comue ruana rotimaci. Naie cuatro cajedino nainomo ite. Naie veinticuatro einamaci nainomo itimaci. Dani bie ciento cuarenta y cuatro mil comini bie comue ruana rotimaci. Jiaino iena fueonidimaci. Bie ciento cuarenta y cuatro mil comini eniruemona naimaci dibeimo iñedinomona jai jillodimaci.

⁴ Bie ciento cuarenta y cuatro mil comini jearede rafuena ebiruiñedimaci. Llauda isoidimie rafuena ñnocana jaidimaci. Llauda isoidimie fiodailla jira, eniruemo itinomona naimacidi nano jillodino Jusiñamui iena, Llauda isoidimie iena.

⁵ Cristo rafuedo jeacinona finocabiñeno raise jaidimaci.

Juan daje amani jaieniai rafue lluana cacade

⁶ Naie facaise mona motomo jaienici feiana ciodicue. Naga nairaimo, nana eniruemo itinomo mare rafuena lluaide.

⁷ Ado llote:

—Jusiñamuina ñnuanona naimiena seda. Naimiemo iobillacinona feca. Naimiemo ñnoñedinona ja duere finoite. Monana, enirue diga, monaillai diga, ille diga, naimie finua jira, naimiena seda.

⁸ Jiaie jaienici billanona llote:

—Babilonia railla nairai illano eo aillue; iadedi ja iñeite. Nainomo itino ja fuitimaci. Jeacinona nainomo itino eo finua jira, jiaie nairaiaina jeacinona jiai eo finotatimaci. Babiloniamo jai ie itino isoi, Jusiñamuimona duere sefuitimaci.

⁹ Naie facaise jiaie jaienici billanona, ado llote:

—Monaillaimona bite ocainana bu sedaia, ie joreña bu sedaia, ie uieco itofemo, ie onollimo ocaina cuetataga ra bumoa ia,

¹⁰ Jusiñamui riicaillafuemonona, naimacina duenaiñenamona, jaca eo duere sefuitimaci. Irai motomo jaca duere sefuitimaci. Azufre boa isoi irai boode. Jusiñamui jaienisaidi Llauda isoidimie diga, iena cioitimaci.

¹¹ Naie irai illano jaca bouamona, ie uillie jaca baireite. Nainomona naie duere sefuidino jaca jilloñeitimaci. Iese naimaci fiodañeno jaca duere sefuitimaci —llote.

¹² Bie rafue suille facaise Jusiñamui lloga uaina raise ñnuanona, Jesús dibeimo raise illanona, comeciai ocuiñocana naimaci jaille.

¹³ Iemei monamona Jusiñamui Joreño llote:

—Biena cueno: “Biruimona Jesúsna ñnuamona, meinaganodi caimare itimaci. Jesús dibeimo naimaci illamona, navui duere sefuidimaci. Iemona uri iitimaci. Ieri Jusiñamuimona ibana feiñoitimaci”.

Juan Jusiñamui eniruemo itinona duere finua rafuena cacade

¹⁴ Naie facaise monamo cue eruaia, userede uilliena ciodicue. Uillie emodo Cristo raide. ñmana eruaide. Naimie ifogimo oromona finoca nuicirai ite. Ie onollimo jairede lloebi ite.

¹⁵ Jusiñamuina sedajanomona jiaie jaienici billanona, Cristomo ado llote:

—O lloebi diga eniruemo ite riarana cota, iena ollena. Jai einaite —llote.

Iese llote; ia cominina duere finollena ñaite. Naimaci duere finua facaisena ñaite.

¹⁶ Jaienici llua isoi, ie lloebi diga Cristo cotade. Nana iena finode. Cominina duere finode.

¹⁷ Jusiñamuina sedajanomona naie facaise jiaie jaienici bite. Naimie onollimo jairede lloebi jiai ite.

¹⁸ Ieconí Jusiñamuimo jobaisoillanomona jiaie jaienici bite. Eniruemo boode ra dotaja uaidi naimiemo ite. Lloebiredimiemo ado llote:

—Jai einaiilla jira, naimacina o ollena, o lloebi diga illimo ite uvaiaina tino. Iese llote; iadedi cominina duere finollena ñaite.

¹⁹⁻²⁰ Jaienici llua isoi, ie lloebi diga tinode. Uvas ua mei, Jerusalén ecimo iji ollena ifomo dotade. Naie iji jino eo tote. Cominina ñaiticue. Jusiñamui ricaiillafue anamo eo duere sefuitimaci. Eo diaitimaci. Trescientos kilómetros dirue enirue emododo toite. Caballo ifogi facaise a llerite.

15

Juan siete jaienisaí cominina duere finoacana ciode

¹ Naie facaise monamo jiaie rafuena ciodicue. Ieri eo rajicaidicue. Iena cue ciuamona, Jusiñamuidi eniruemo itinomo suille rafuena cue uifnuana jitaide. Siete jaienisaína ciodicue. Nagamie cominina duere finoacade. Naimaci finoacalle rafue diga, Jusiñamuidi cominina duere finuana fuite. Iemona ie ricaiillifue saite.

² Aillue joraina eruaiide rana jiai ciodicue. Quenirede. Uifinide. Boode ra diga tamiana eruaiide. Jorai fuemo monaillaimona bite ocainana emodofidinona ciodicue. Ocaina joreño anamo jai ifnedimaci. Ie cuetataga número anamo jai ifnedimaci. Naimaci onollimo Jusiñamui arpas illanona, naimacina taillanona,

³ jai emodofilla jira, Moisés micori ie ruana rotimaci. Moisés micori Jusiñamui facaina jiaie maijiuide. Jeacinomona naimaci jiai jai jillua jira, Toica Llauda isoidimie ie ruana jiai rotimaci:

Eo siño ebirede rafuena finodio.

Jusiñamuina o illanona, jaca siño jitodio.

Mare rafuena jaca finocabidio. O lloga uai jaca finodio.

Naga nairai o anamo jai itimaci.

⁴ Cai Nama, nana comini ona jaciruillamona, ona inoitimaci.

O marena jira, omo iobillacinona fecaitimaci.

O duere finoca rafue muidona nana comini ona sedaitimaci.

⁵ Jusiñamuina sedajanomo dane eruaidicue. Ie fo iticuartomo ciodicue.

⁶ Naiemona siete jaienisaí billana ciodicue. Nagamie cominina duere finoacade. Eo userede linomona finoca iniroina jitade. Oromona finoca cinturones naimaci jogobemo jitade.

⁷ Naie cuatro cajedinomona damie naga jaienicismo oromona finoca copana fecade. Copamo Jusiñamui eniruemo itinona eo duere finollicino ite isoide. Jusiñamui jaca illa jira, ie lloga uai suicana jaite.

⁸ Jusiñamui ebirede siño uai illamona, ie sedajanomo uillie eo illana ciodicue. Bie siete jaienisaímo ite rafue nia suiñena jira, Jusiñamuina sedajanomo buna fo jainide.

16

Juan eniruemo copas oni totajanona ciode

¹ Ie sedajanomona Jusiñamui naie siete jaienisaímo ado llote:

—Cue ricaiillafue omoi copamo illa jira, eniruemo itinona duere finollena, omoi copas oni tota.

² Daje jaienici iena finode. Eniruemo ite cominina duere finode. Monailaimona bite ocaina cuetataganona jiai duere finode. Ocaina joreña sedadinona duere finode. Naimaci abiamo jodollaiaina comuitate. Iemona duere sefuidimaci.

³ Iemei jiaie jaienici ie copa oni totajamona, monailaina duere finode. Nana monailaidi fiodaitino dirue isoi jaide. Eo jearedena eruaide. Nana nainomo ite cajedino fiodaitimaci.

⁴ Iemei jiaie jaienici ie copa oni totajamona, nana illiai, nana jorainiai diga, duere finode. Diruena jaide.

⁵⁻⁶ Naie facaise nana jinuina sedacabide jaienici llote:

—Jusiñamui, o jaca mareuidimedio. Ona inotinona eniruemo itino meinia jira, o facaina llorainina naimaci meinia jira, naimacina o raise uifuumona, naimacina duere finodio. O cominina naimaci meiniamona, naimaci finua isoi, ibana oitio. O cominina naimaci meinia jira, diruena ja jiroitimaci.

⁷ Jusiñamuimo caimare soride ra jobaisoillanomona jiaie jaienici llote:

—Cai Nama Jusiñamui, ua siño jitodio. Naimaci finocabilla isoi naimacina jai duere finodio.

⁸ Naie facaise jiaie jaienici ie copa oni totajamona, jitomana duere finode. Eo lligaiñotajamona, eniruemo itino eo usidimaci.

⁹ Eo usidimaci; iadedi Jusiñamuina jeare nia ñaitimaci. Naimacina duere finollena, naimiemo uai illana uifotimaci; ia naimie dibeimo naimaci comeciai iuaina meidoiacaiñedimaci. Jeacinona finuana fainonocaiacaiñedimaci. Naimiemo iobillacinona fecaacaiñedimaci.

¹⁰ Naie facaise jiaie jaienici ie copamona ie duere sefuillacinona monailaimona bite ocaina sedajano dine totade. Ie muidona nana enirue jitireficaide. Eo duere sefuillamona, comini imaci ifena ainitimaci.

¹¹ Duere sefuillamona, Jusiñamuina jeare ñaitimaci. Naimaci abiamo ite jodollai isirede; iadedi naimaci comeciai iuaina meidoñedimaci. Jeacinona finuana fainonocaiñedimaci.

¹² Naie facaise jiaie jaienici ie copamona ie duere sefuillacinona Eufrates railla ille dine totade. Ie muidona naie aillue ille safenaite. Safenaillamona, jitoma billanomo ite nairaii illaicomini, imaci soldaduai diga, ruica dine raise birenitimaci.

¹³ Naie facaise aillue jaiio fueмона, monailaimona bite ocaina fueмона, naimie facaina lloraíma fueмона, daje amani jananiai billana cidicue. Nagamiemona daje janaba bite. Nai jananiai jericina eruaide.

¹⁴ Taifemona bite. Siño rafuena finocabite. Nana illaicomini, imaci soldaduai diga uaidollena, naimacina oreite. Danomo ofillena illaicominina uaidoite. Jusiñamui diga jobairillena, danomo ofitimaci. Naimie diga jobairillamona, Jusiñamui ua siño jitona nana comini uifotimaci.

¹⁵⁻¹⁶ Armagedón railla illanomo ofitimaci. Naie illano mamecidi juduai uai macei. Ieconí cai Nama cuemo llote:

—Fíriraíma isoi ebena biitícue. Cue billemo ocuridimie iocire iite. Cue billemo naimie ocuriria, cue bia, naimie cue jitillacinona finuamona, naimie meiruiñeite.

¹⁷ Naie facaise jiaie jaienici jafaici dine ie copamona ie duere sefuillacinona totade. Ieconí ie sedajanomona Jusiñamui llote:

—Bie duere sefuillacino diga, cominina cue duere finoacanacino ja fuite.

¹⁸ Ieconí boricabide. Bue isoi eo ficirede. Gurucabide. Eo aillue ñuisaño suide. Comini comuilla facaisemona iese ñuisaño jaca suiñede.

¹⁹ Iemona nanoca nairai illano daje amani facaina goide. Nana jiaie illanuai jiai goidimaci. Jusiñamuidi Babilonia railla nairaina raise uñuamona, nana ie ricailafuemona iena eo duere finode.

²⁰ Naie ñuisañomona naga uiasi jai cioñena. Naga anedu jiai cioñena.

²¹ Monamona noci deilla isoi, hielu jiai ana jurude. Naga hielu coarenta kilos nibai merede. Cominimo baillanona, eo duere sefuidimaci. Eo duere sefuillamona, Jusiñamuina nia jeare ñaitimaci.

17

Juan eo marañede riñona duere sefuillana ciede

¹ Naie facaise naie siete copas diga ite jaienisaimona cue dine damie billanona cuemo lote:

—Cue diga bi. Eo marañede riño duere sefuillana omo acataiticue. Monailai emodomo naiñaiño jai raide isoide. Naiñaiñodi nanoca nairai illano mamecido ite. Nana illacomini naie nairai anamo itimaci.

² Naiñaiñoa sedajamona, naiñaiño diga, illacominidi jearede rafuena finocbidimaci. Naiñaiñoa nabaillamona, eniruemo ite comini jearede rafuena eo eburuitimaci —lote.

³ Nicairilla isoi, jaienici cue joreñoa uillanona, jofue iñenanomo cue joreñoa uite. Eo jiairede rirede ocaina emodomo naie riño raillana ciodicue. Jusiñamuina eo jearede ñaiacino ocaina abimo eo ite. Ocainamo siete ifogiai ite. Diez sigai jiai ite.

⁴ Naie riño jiduirede ñiroi, jiairede ñiroi diga jitade. Eo raifide quenirede ra diga, naiñaiño abi eo finobide. Dajerie ra oromona finoca. Dajerie perlas railla ramona finoca. Ie diga ie abi eo finobide. Naiñaiño onollimo oromona finoca copana uite. Nainomo eo marañede jearede rafuena finocana uite isoide.

⁵ Jusiñamui naiñaiño finoca rafuena uñotaiacana jira, naiñaiño uiecomo mameci jai cuetataga: “Nanoca Babilonia raillañaiñodicue. Cuemona eo jearede rafue comuicana jaicabide. Cue muidona comini jearede rafuena finocabide”.

⁶ Naiñaiñodi ailluena Jusiñamuimo duidinona, ailluena ua Jesúna ñnotinona meinetajana eo eburuite. Naiñaiñoa cue cioia, eo raificaidicue.

⁷ Jaienici cuemo jicanote:

—¿Bue ñe raificaidio? Naiñaiño mo ite rafuena omo lloiticue. Naiñaiñodi ocaina emodomo raide. Naie ocaina rafuena jiai lloiticue.

⁸ Naie ocaina navui ite; ia birui jai iñede. Ico eniruemonona, eo ana ite ifomona, dane biite; iadedi faifite. Ieri Jesucristona ñinoñedino raificaitimaci. Jesucristona naimaci ñinoñena jira, monamo Jusiñamuidi ie rabenicomo enirue nia finoñena facaise naimaci mameciaña jaca cueñede. Naimie illanomo jaca iñeitimaci.

⁹ Ocaina rafuena omo ja lloiticue. Jusiñamui ona uñotajanona iena cacaitio. Bie siete ifogidi siete anedu mamecido ite. Riño nainomo raide.

¹⁰ Ie siete ifogidi siete illacomini mamecido ite. Naimacimona cinco illacomini jai iñede. Damie cominina birui sedade. Jiaimie cominina nia sedañede. Cominina naimie sedaia, are naimacina sedañeite. Dallu sedaite.

¹¹ Ifomona bite ocainana dane lloiticue. Cominina jiai sedaite; ia bie siete illacomini sedajacinomo dute. Cominina naimie sedaja mei, naimie faifite.

¹² Ie diez sigai diez illacomini mamecido ite. Diez nairaina sedaitimaci; iadedi nia sedañedimaci. Cominina dallu sedallena, ocainamona naimaci uaina feñoitimaci.

¹³ Daje isoi comecina lloitimaci. Ocainana nabaitimaci. Naimie jitailla rafuena finuanona, naimie anamo iitimaci.

¹⁴ Toica Llauda isoidimie diga jobairitimaci; ia Llauda isoidimie ie comini diga emodofite. Llauda isoidimie nana illaicomini baifemo faia jira, nanoca imiena jira, naimacina emodofite. Ie cominina naimie fetode. Naimiena inotimaci. Jai emodofitimaci —lote.

¹⁵ Jaienici nia llote:

—Riño monailai emodomo raillana ailli ciodio. Monailaidi nana comini mamecido ite. Naga nairai mamecido ite.

¹⁶⁻¹⁷ Naie diez illaicomini, ocaina diga riñona enoitimaci. Naiñaiñona duere finoitimaci. Jusiñamui jitailla jira, naimie jitailla rafue fuidollena, naimie lloga uai suillena, naimaci comecina daje isoi lloitaite. Ocaina anamo naimacina itataite. Riñona iese fuidoitimaci. Naiñaiño iniroina oni dotatajanona, naiñaiño taiñaiñona iite. Naiñaiñona meineitimaci. Ie llicisina riitimaci. Ja muidomo iraimo naiñaiñona dotaitimaci. Iese naiñaiñona duere finuanona, naiñaiñona fuidoitimaci.

¹⁸ Bie riñodi nanoca nairai illano mamecido ite. Naie nairai anamo nana enruemo ite illaicomini iitimaci —lote.

18

Juan Babilonia railla nairai illano goilla rafuena ciodo

¹ Ie facaise monamona jiaie jaienici ana billana ciodicue. Naimie uai siño. Naimie uai siñona jira, enruena lligaiñote.

² Ado llote:

—Iena Jusiñamui duere finuamona, Babilonia nairai illano jai nana goide. Comini nainomo jai inedimaci. Nainomo Taife jaienisai birui itimaci. Janaijai nainomo birui itimaci.

³ Nia goiñenia, bie nairai jeacinona eo finuamona, nana nairaijai iena ebiruitimaci. Bie nairaina nabaillamona, nana illaicomini jearede rafuena jiai finocabidimaci. Jearede rafuemonana nana rana fecaraini bie nairaimona ailluena ucubena ganacabidimaci —lote.

⁴ Naie facaise monamona damie llote:

—Cue comini, bie nairaimona birui mai eneno oni i. Jeacinona omoi finoi raillano, naie facaise omoi duere sefui raillano, birui eneno mai oni i.

⁵ Bie nairai jeacino eo finocana jaidimaci; iadedi iena Jusiñamui uinuamona, naimacina jai duere finoacade.

⁶ Jusiñamui, naimaci finua diese ibana ono. Naimacina ua eo duere fino.

⁷ Jeacino finuamona iobidimaci. Iemona abi iedotimaci. Jeacino finuana eo ebiruitimaci. “Illaicomindicai. Nana cai jitailla ra caimo ite. Feciño isoi duere jaca sefuiñeiticai” comeciaina facadimaci;

⁸ Iadedi cai Nama Jusiñamui naimacina ebena eo duere finoite. Duicomona, sure illamona, aime guillamona fodaitimaci. Naimaci jofue booite. Jusiñamui siño jitona jira, naimacina raire fuidoite —lote.

⁹ Bouamona uillie naimaci cioia, sunaillamona, naie nairai diga nabairite illaicomini eo eeditimaci.

¹⁰ Duere sefuillena naimaci jaciruilla jira, aremona lloitimaci:

—Ero, Babilonia eo aillue nairai illano; iadedi duere finuamona ua raire fuite —lloitimaci.

¹¹ Naimaci rana naie nairai jai oñena jira, rana fecaraini eo sunaillamona eo eeditimaci.

¹² Iese fecacabidimaci: oro, plata, abi finollena raifide ra, diga eo mare raifide iniroi, diga caimare soride rabiciai, elefante sigainiai, jofona nille ra, bronce, lloeona, mare nofici,

¹³ guille caimaretade ra, caimare soride ra, vino, guille ie aceite, mare harina, core, juraretaiai, toica laudaiaiai, caballos, carretas, comini. Vendellena, cominina aticabidimaci.

¹⁴ Sure illamona lloitimaci:

—Caimona omoi comeciai jitaille rana ja oñetomoi. Omoi ebiruiga rana ja oñetomoi.

¹⁵ Duere sefuillena naimaci jaciruilla jira, nainomona ucubena jai oñenamona, rana fecaraini aremona ado eo eetitimaci. Sunaitimaci.

¹⁶ Lloitimaci:

—Naie nairai eo duere sefuidimaci. Nia duere sefuiñenia, eo mare rana, mare iniroi diga ebiruitimaci. Eo raifide abina finolle rana eo ebiruitimaci. Oromona finoca ra, perlamona finoca rana eo ebiruitimaci;

¹⁷ iadedi nana naie nairai, ie raifide ra diga, jai raire fuite —lloitimaci.

Nana botes imaci capitanes, nana botemo maijuuidino diga, nainomo jaidino diga, botedo rana fecaraini diga,

¹⁸ aaremona uillena ciuamona, naie nairai bouana fidiano, lloitimaci:

—Naie nairai nana jiai nairaiiai baifemo navui faite. Jiaie nairai ie isoi ebinide.

¹⁹ Sure illamona, naimaci ifogimo imuicina faianona, eetitimaci. Lloitimaci:

—Bie nairai eo duere sefuide. Bie nairaimona boteredinodicaia navui ailluena ganadicaia. Bie nairai jai raire fuite.

²⁰ Naie facaise monamona damie llote:

—Monamo itino, naie nairai fuillari mai iobi. Jusiñamui cominina jai jaidomoi. Naimie facaina navui majidomoi. Naimie rafuena navui llofueuidomoi. Naie nairaimona duere sefuidomoi; iadedi omoi facaina Jusiñamui ibana jai ote.

²¹ Naie facaise jiaie jaienicismo siño uai illanona, eo aillue nofici llinuanona, monaillaimo iena faite. Llote:

—Bie nofici dane cai cioñena isoi, Babilonia railla nairai dane iñeite. Jusiñamui iena eo riire fuidoite.

²² Nainomo buna dane roñeite. Buna guitarrana eruaide arpas jaca taiñeite. Buna firacaina jaca fiñeite. Buna trompetana jaca fiñeite. Nainomo buna rana jaca niñeite. Rana jaca finoñeite. Buna jaca doberiñeite. Llomenicono finollena, buna dane majiñeite.

²³ Nainomo naiona lamparinai dane booñeite. Rafue dane iñeite. Eo caimare iobitaja rafue dane iñeite. Fraisiñeitimaci. Saiñeitimaci. Naie nairai rana fecarainidi navui nanoca fecaraini. Naimacina Taife canua jira, ailluena nairaiaina navui jifuecabidimaci.

²⁴ Naie nairai ailluena Jusiñamuina ñnotinona meinetimaci. Ailluena Jusiñamui facaina llorainina meinetimaci; iadedi naimacina Jusiñamui duere finua jira, ua eo mare —llote.

19

¹ Ie facaise monamo eo ailluena comini ado lluaena cacadicue. Jusiñamuimo llotimaci:

Ona cai iobitajasa. Caina jai jillotatio.

O uai ebirede. Odi siño jitodio.

2 O anamo itinona raise uifua mona, uanaicinona o uifua mona, naimacina duere jai finodio.

Naie jearede rafuena finode rifona jai duere finodio.

Naie rifo ailluena cominina jearede rafuena finotate.

Ailluena o facaina maijidinona jai meinetade;
iadedi iba jai otio.

3 Iemei dane llotimaci:

—Ona cai iobitajasa. Duere sefuillena, naie nairai jaca boode. Naimaci jaca duere sefuitimaci —llotimaci.

4 Naie veinticuatro einamac, naie cuatro cagedino diga, Jusiñamui ecimo ana bitadajanona, naimiena sedadimaci. Llotimaci:

—Omoi llucino mare. Ie isoi jai lloiacadica. Jusiñamuina cai iobitajasa.

5 Jusiñamui illanomona damie llote:

Nana cai Jusiñamuina facaina maijidino iobitajasa.

Nana naimiena inotino naimiena iobitajasa.

Jamai bue isoidino naimiena iobitajasa.

Jamai bue isoinedino naimiena iobitajasa.

Juan Toica Llauda isoidimie aina ua rafuena cacade

6 Naie facaise monamo eo ailluena comini llua cacadicue. Ailluena jinui surua isoi ficirede. Eo gurucabilla isoi ficirede. Llotimaci:

Cai Nama Jusiñamuina cai iobitajasa.

Naimie siño jito. Nana cominina birui jai sedade.

7 Eo iobidica. Naimiemo iobillacinona eo cai fecajasa.

Llauda isoidimie ie aina ua rafue facaise jai suide.

Naiñaiño jai finobide.

8 Mare iniroi naiñaiño jai ite. Eo userede. Quenirede. Jeanide

llotimaci. Iese iniroina llotimaci; ia Cristo, ie comini diga, jaca illena

ñaitimaci. Ie ai diga, ini ie rifo jaca caimare illa isoi, nana naimie comini

diga, naimie caimare jaca iite. Naie mare iniroidi, Jusiñamui jitaillacinona

finuamona, naimie inotino imaci mare finoca rafue isoide.

9 Jaienic cuemo llote:

—Biena cueno: “Llauda isoidimie aina ua rafue dine uaidoganodi caimare iitimaci”. —Iemei llote:

—Jusiñamui iena llua jira, uanaicinona omo lloticue.

10 Jaienic uicomo eillimo ana bitadaticue, naimiena sedallena; ia cuemo llote:

—Dama ite. Cuena sedaño; ia dama Jusiñamuina seda. Jesús ie dibeimo itinona uanaicinona jai uifotade. Ie jira naga o diga naimiena inotino isoi, Jusiñamui facaina jai maijadicue. Naga Jusiñamui facaina maijidimie Jusúna llocabite. Ie muidona dama Jusiñamuina seda.

Juan userede caballo emodomo itimiena cide

11 Naie facaise mona ecorillana cidicue. Nainomo userede cabalona cidicue. Naie emodomo itimieno mena mameci ite. Inogamienda mamecired. Uanaicinona llocabitimiena jai mamecired. Naimacina raise uifua mona, naimie dibeimo inedinona duere finollena, naimaci diga jobairite.

12 Naimie uisidi irai isoide. Illaimana jira, naimie ifogimo ailluena nuicirai ite. Naimiemo cuega mamecina buna uifoned. Dama naimie iena uifote.

13 Naimie jitaca iniroi ie dibeimo inedino diruemo mutaca. Jusiñamuina naimie uifotaja jira, Jusiñamui Uairedimiena mamecired. Naimiedi Jesucristo.

¹⁴ Naimie jinafona soldaduai isoi Jusiñamui facaina itino monamona bil-lana jiai ciodicue. Eo mare userede jeanide iniroina jitadimaci. Userede caballuai emodomo itimaci.

¹⁵ Eniruemo ite nairaiaina emodofillena, naimie fuemo jairede lloebi ite. Naimacina emodofilla mei, naimacina naimie jitaillacinona finotallena, naimacina eo riire sedaite. Jusiñamui siño jitona jira, naimie riicaillifue anamo itinona eo duere finoite.

¹⁶ Naimie iniroimo, naimie idaïmo jai cuega: “Nanoca Illaïma. Nanoca Nama”.

¹⁷ Naie facaise jaienicï jitoma lligaiñuanomo ciodicue. Nana inoniaïna uaidote:

—Llicisina mai riabi. Jusiñamuidi ailluena cominina ja meiniamona rille eo iite.

¹⁸ Naimacina emodofillamona, ailluena llicisi ja iite. Ailluena cominina ja meineite. Illaicomini itimaci. Soldaduai illaicomini itimaci. Caballuai itimaci. Caballuai emodomo jaicabidino itimaci. Diga comini ite. Jamai bue isoidino itimaci. Jamai bue isoifedino itimaci. Patrones anamo itino itimaci. Patrones anamo ifedino itimaci. Naimaci llicisi mai riabi —llote.

¹⁹ Naie facaise monaïllaimona bite riirede ocainadi enirue illaicomini diga ofide. Naimaci soldaduai jiai ofidimaci. Userede caballo emodomo itimie diga, naimie dibeïmo itino diga jobairiacadimaci.

²⁰ Userede caballo emodomo itimie ie dibeïmo itino diga naimacina emodofide. Ocainana gaitadimaci. Naimie facaina tainona lloraimana jiai gaitadimaci. Naie lloraina ocaina uai diga cominina jifuecabite. Siño rafuena finuamona, ocaina cuetataga ra itinona, ie joreña sedadinona jifuecabite. Naie iaimaïna gaitaja mei, eo boode iraimo iaimaïna cajena dotadimaci. Azufre boa isoi irai boode.

²¹ Caballo emodomo itimiedi ie fuemo ite lloebi diga iaimaï soldaduaïna meïnete. Jaienicï llua isoi, inoniaï naimaci llicisina ritimaci. Iemona eo monidimaci.

20

Juan mil años Taife maïana cïode

¹ Naie facaise monamona jaienicï billana ciodicue. Eniruemo eo ana ite ifo llave naimïemo ite. Aillue lloeo ie onollimo ite.

² Aillue jaïona eruaidïmiïna gaitade. Naimiedi Taife. Riaï uaimona Satanás. Jiaïci dragón. Mil años iese illena lloeo diga naimïena maïte.

³ Ana ite ifomo naimïena dotade. Llave diga ifona ibaïde. Cominina ramo faïñellena, naimacina jeacinona finotañellena, naimie uaina itañaïede. Mil años cominina jifuenide. Mil años fuilla mei, dallu naimïena jino oretaite, cominina ramo faïllena.

⁴ Ie mei monamo diga jueces illanuaina ciodicue. Jusiñamui uai diga nainomo itinodi marañede rafue finodinomo jamai duere sefuillicinona lloitimaci. Ie facaise jai meïneganona jiai ciodicue. Eo duere sefuilla facaise “Jesús cominidicai” naimaci llua jira, Jusiñamui uaina naimaci llua jira, naimaci ifogiaina jaitajanona, naimacina meïneganodimaci. Monaïllaimona bite ocainana sedañedimaci. Ie joreña sedañedimaci. Ie cuetataga ra naimaci uiecomo, naimaci onollimo ifede. Navui fiodaïtamaci; ia iemona bie facaise jai jillobitimaci. Imaci abiaï diga Jusiñamui naimacina jillotaite. Cristo diga mil años eniruemo itinona sedaitimaci.

⁵ Naimacidi nano jillodino. Naie mil años nia fuiñenia, jiaie jai fiodaitino nia jilloñeitimaci; ia mil años fuilla mei, jilloitimaci.

⁶ Nano jillodino caimare marena iitimaci! Dane fiodaiñenamona Jusiñamui illanomo jaca itimaci. Faifiñeitimaci. Cominina sedajanona, comini Jusiñamuina raise uifollena, comini Cristona raise uifollena, naimacina canoitimaci. Cristo diga mil años naimacina sedaitimaci.

⁷ Bie mil años fuilla mei, Jusiñamuidi ana ite ifomona Taife jino oretaite.

⁸ Nana eniruemo ite nairaiaina jifuiabite. Gog raila illaicominina, Magog raila nairaii diga, jifueite. Naimaci nairaiaina ofitaite. Eo ailluena naimaci illa jira, conillena cai facadonina isoi, naimacina facadonidicue. Jusiñamuina inotino diga jobairillena, ofitimaci.

⁹ Danomo ofillanona, Jusiñamuina inotinona ciribitaitimaci. Jerusaléna, Jusiñamui isiruiga nairaina, ciribitaitimaci. Naie facaise monamona boode ra billanona, jobairiacadinona fuidoite.

¹⁰ Cominina eo jifuecabite; ia ie facaise Jusiñamuidi Taifena eo boode iraimo dotaite. Azufre boa isoi irai boode. Nainomo monaillaimona bite ocainana jaie dotade. Naimie facaina tainona lloraima jaie dotade. Nainomo ua jaca duere sefuitimaci

Juan aillue rairabicina cide. Nainomona Jusiñamui duere fnollicinona lluaa cacade

¹¹ Naie facaise aillue userede rairabicina ciodicue. Illaimana naimie illamona, nainomo Jusiñamuina jiai ciodicue. Naimie siño illamona, mona enirue diga jai ifñede.

¹² Naie facaise Jusiñamui uicomo nana fiodaitino naidailana ciodicue. Jamai bue isoiñedino itimaci. Jamai bue isoidino itimaci. Naimacimo juez isoi Jusiñamui lollena, itimaci. Ie rabenicuaimo naimaci jai finoca rafuena jibuide. Naimaci finoca rafue nainomo jai cueda. Iemei Jusiñamui jiaie rabenicona jibuide. Naimie diga jaca ille comini mameciai nainomo jai cueda. Naimaci mameciai nainomo iñenia, naimaci finoca rafue diese Jusiñamui naimacimo duere sefuillena lote.

¹³ Monailaimo ite corobaitino abiai, joreñuai diga, jilloitimaci. Raigano abiai joreñuai diga jilloitimaci. Naimaci finoca rafue diese Jusiñamui naimacimo duere finollena lloite.

¹⁴ Naimaci abiai naimaci joreñuai diga iraimo dotaite. Jaca faifitimaci. Naimona jaca jilloñeitimaci. Jusiñamuimona eneno jaca itimaci.

¹⁵ Monamo ite rabenicomo cueñega comini mameciai diese itinona iraimo dotaite.

21

Juan comue monana, comue enirue diga cide

¹ Birui ite mona, birui ite enirue diga jai ifñede. Monailai jiai jai ifñede. Iemei comue mona ciodicue. Comue eniruena jiai ciodicue.

² Comue nairai illanona ciodicue. Comue Jerusaléna ciodicue. Jusiñamui illanomona, Jusiñamuimona bite. Naimiemona billa jira, naie nairai eo mare. Eo ebirede finobide riño ie inina ua facaise isoi, eo ebirede.

³ Jusiñamui illanomona damie ado lloite:

—Comini motomo Jusiñamui illano jai ite. Naimaci diga naimie iite. Naimie comininitimaci.

⁴ Naimaci illanomo naimie iite. Naimacina naimie nabaillamona, naimie jitailla jira, naimacina caimadoite. Dane eeñeitimaci. Fiodaiñeitimaci.

Sunaiñeitimaci. Duere sefuiñeitimaci. Birui ite rafuemo comeciaina naimaci nainomo facañena jira, ie facaise sunaiñeitimaci –llote.

⁵ Jusiñamui llote:

–Ero, nana ra comuena birui finoiticue. Cue llucacino uanaicinona jira, cue llucacinona cue finua jira, bie rafuena cueno.

⁶ Iemei cuemo llote:

–Bie rafue jai fuite. Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. Naimaci illena comini jinuina eo jiroacana isoi, cuena ñnotino comeciue eo caimare itataiticue. Hbatañeno cue diga illena, naimacina jaca itataiticue.

⁷ Cuena raise ñnotinona iese itataiticue. Jaca naimaci Jusiñamuiticue. Naimaci jaca cue comininitimaci.

⁸ Jiaino jaca eo boode iraimo jaca iitimaci. Azufre boa isoi irai boote. Naiemona jaca jilloñeitimaci. Cuemona eneno jaca iitimaci. Diesé nainomo iitimaci: abido danomo jaidino, cuena raise ñnoñedino, jearede rafue finocabidino, cominina meinetino, aiñede riño diga icabitino, iniñede ñima diga icabitino, aiñiniaí, jiraraina sedacabidino, tainona llocabitino –llote.

Juan comue Jerusaléna llote

⁹ Naie facaise naie siete jaienisaimona damie cue dine bite. Naie jaienisaimaci copamo cominina duere finollicinona navui ite isoide. Naimie cuemo llote:

–Cue diga mai bi. Ima ie aina jai ua isoi, Toica Llauda isoidimie ie cominina jai ote. Ie ai isoidimaci. Llauda isoidimie jai oga comini illanona omo acataiticue.

¹⁰ Nicaírilla isoi, Jusiñamui Joreño cue joreñona eo a ite aillue anedumo uite. Nainomona, Jusiñamuimona, monamona Jerusalén billana ciodicue. Jusiñamui iena jira, eo mare.

¹¹ Nainomo Jusiñamui illa jira, naie illano eo quenirede. Eo mare raifide nofici isoi quenirede. Jaspe railla noficina eruaiilla jira, enefebecodo ciode.

¹² Ie llaigafo eo a ite. Eo jedaciede. Doce nasiai ite. Naga nasemo daje jaienici ite. Israel micori uruiái mameciai naie nasaiimo cuega. Doce uruiái illa jira, naga naserie daje mameci cuega.

¹³ Jitoma bicabillano dine eruaide llaigafomo daje amani nase ite. Jitoma jaicabillano dine eruaide llaigafomo daje amani nase ite. Naga beici dine eruaide llaigafomo daje amani nase ite.

¹⁴ Naie llaigafo anamo doce nofici ite. Nainomo Toica Llauda isoidimie ie doce llofueoicaigano mameciai cuega.

¹⁵ Cue diga ñaite jaienicimo oromona ra facara ite. Naie nairai facallena ite. Ie nase, ie llaigafo diga, facallena ite.

¹⁶ Naie nairaina naimie facajamona, nagafebei daje isoi illana uiñoticue. Dos mil doscientos kilómetros nagafebei are ite. Dos mil doscientos kilómetros nagafebei a ite.

¹⁷ Ie llaigafona jiai facade. Sesenta y cuatro metros a ite. Comini facaja isoi, jaienici iena facade.

¹⁸ Ie llaigafo jaspe railla noficimona finoca. Bie nairai difai oromona finoca. Enefebecodo ciode.

¹⁹ Diga eo quenirede noficina eruaide ra llaigafomo ite noficimo jai nitade. Nano jaspe. Enefebecodo ciode. Iemei zafiro. Mocorede. Jiaie ágata. Mocorede. Jiaie esmeralda. Mocorede.

²⁰ Jiaie ónice. Jiairede userede diga faiga. Jiaie cornalina. Jiairede. Jiaie crisólito. Orona eruaide. Jiaie berilo. Mocorede. Jiaie topacio. Borarede. Jiaie crisoprasa. Mocorede. Jiaie jacinto. Jiduirede. Jiaie amatista. Jiduirede. Naie llaigafo anamo ite noficiai doce diga ite.

²¹ Te doce nasiadi perlas. Userede. Naga nase daje perlamona fino. Bie nairai naisuaidi difai oro. Enefebecodo ciode.

²² Bie illanomo Jusiñamuina sedajanona cioiñedicue. Nana bie illanodi naimie sedajano. Cai Nama Jusiñamui, Toica Llauda isoidimie diga, nainomo illa jira, iaímaiaí uicomo sedaiticai.

²³ Jusiñamui siñona jira, nainomo comini jitomana jitaíñeitimaci. Fivuína jitaíñeitimaci. Jusiñamui, Llauda isoidimie diga, iena lligaiñoite.

²⁴ Nana comini iaímaiaína nabaicana jaitimaci. Nana illaicomini iaímaiaí dine billanona, iaímaiaímo iobillacino jaca fecaitimaci.

²⁵ Bie nairai nasiaí jaca ibaíñeite. Nainomo naionadi jaca iñeite.

²⁶ Iaímaiaímo iobillacinona fecallena, nana comini nainomo biitimaci.

²⁷ Nainomo jeacino jaca iñeite. Jearede rafue finodino nainomo biñeitimaci. Tainona lloraini biñeitimaci. Dani Llauda isoidimie ite rabenicomo cuega mameciai itinodi nainomo biitimaci. Bie rabenicomo Jusiñamui illanomo jaca iitino mameciai jai cuega.

22

¹ Naie facaise jaienici cuena daje ille acatate. Nainomo ite jinui jiruamona cominina jaca itataite. Uifinide. Jusiñamui, Llauda isoidimie diga, illanomona tote.

² Nanoca naiso motodo tote. Nagafebelle dine jaca itataite amenaiaí ite. Naga fivui llisillamona, naga fivui llisilla ite. Te ibiaí illamona, comini caimare marena itimaci.

³ Jeacino nainomo iñena jira, Jusiñamui jaca buna duere finoñeite. Jusiñamui, Llauda isoidimie diga illamona, naimie comini naimiena jaca sedaitimaci.

⁴ Naimiena marefodo cioitimaci. Naimiemo naimaci duillamona, naimaci uiecuai itofiaimo naimie mameci cueite.

⁵ Nainomo naionadi iñeite. Lamparína jitaíñeitimaci. Jitomana jitaíñeitimaci. Cai Nama Jusiñamui naimacina lligaiñoite. Illaicomini isoi jaca iitimaci.

Juan Jesucristo billirui iaírei illana cacade

⁶ Jaienici cuemo llote:

—Bie lluacínodi uanaicino. Naimie facaina llorainimo ie rafuena llollena, ie uaina itatate. Naimiena ñnotinona ico suille rafuena ja uiñotaiacade.

⁷ “Raíre biiticue” Cristo llote.

Bie rabenicomo ite ico suille rafuena ñnotinodi caimare iitimaci.

⁸ Juandicue. Bie rafuena cacadicue. Iena ciodicue. Iena cue cacaja mei, iena cue ciua mei, iena cuemo acataga jaienici uicomo ana bitadadicue. Naimiena sedaacadicue;

⁹ iadedi cuemo llote:

—Dama ite. Cuena sedaño. O diga, naimie facaina lloraini isoi, bie rabenicomo ite llogacinona ñnotino isoi, naimie díbeimo jai maijídícue. Dama Jusiñamuina seda.

¹⁰ Bie rafue suillirui iaírei illa jira, iena jino llono. Iena uiñota.

¹¹ Bie rafuena bu ñnoñenia, naimie jitailla jira, marañede rafue naimie finoacania, iena nia finoite. Jearede rafue bu finoacania, iena nia finoite; ia bie rafuena naimie ñnoia, naimie jitailla jira, mare rafue naimie finoacania,

mare rafuena finocana jailla. Jusiñamui jitaillacinona bu finoacania, naimie jitaillacinona nia finocana jailla.

¹² Jesucristo cuemo llote:

—Ero, raire biiticue. Naimie finoca rafue diese nagamiemo ibana fe-
caiticue.

¹³ Jaca bue nia iñenia, jaie jaca iticue. Nana rana finodicue. Nana ra cue
uaido icana jaide. Nana rana fuilla mei, jaca iiticue. Jaca siño jitodicue.

¹⁴ Naimaci iniroina naimaci jocoia, caimare iitimaci. Naimaci comecina
ñaiticue. Ie jeacinona oni dotacemie jaca itataite amena llisillamona lliite.
Cue cominina naimie illamona, Jusiñamui illanomo ie nasedo jaicabite;

¹⁵ ia naimacina jeacinona naimaci fañonocaiñenia, Jusiñamui illanomo
maraiñede rafuena finocabidino, aima dine jaicabidino, aiñede riño diga
icabitino, inñede iima diga icabitino, cominina meinetino, jiraraina seda-
cabidino, tainona llocabitino duiñeitimaci.

¹⁶ Creyentiaina bie rafuena uiñotallena, cue jaienico o dine jai oretaticue.
David micori ie jitodicue. Monairaicudu bairia isoi, Jusiñamui jitaillacinona
cue finollena, baireiticue —llote.

¹⁷ Bie facaise Jusiñamui Joreñodi, Cristo jai oga ai railla comini diga,
naimiena nia inoñedinona uaidote:

—Bie rafuena mai cacarei. Iena mai ino. Iena bu inoia, jaiñimie iena
lluai: Iena mai cacarei. Iena mai ino.

Jiroacadimiemo lloticue:

—Mai jiruaibi. Bie jinua raifiñede. Biena o jiroacania, jaca iitio. Iese
lloticue; ia ie comecina ñaiticue. Bie rafue inuana ñaiticue.

¹⁸ Bie ico suille rafue ite rabenicono bu facajia, naimiemo rafuena lloia-
cadicue. Bie rafue baifemo bu lloia, bie rafuena bu meidoia, bie rabenicomo
ite duere finuacino isoi, Jusiñamui naimiena duere finoite.

¹⁹ Bie rafuena bu jamaia, Jusiñamui naimiena duere finoite. Jaca illena
Jusiñamui ie mamecina ie rabenicono jaca cueñeite. Comue Jerusalémo jaca
duiñeite. Naiena jai lloticue.

²⁰ Cristo raite:

—Bie rafue jaca suite. Ua raire biiticue.

Iena raire suillena jai jitaidicue. Cai Nama Jesús raire billena eo jitaidicue.

²¹ Naimie duenailacinona nana Jesucristona inotino uiñocana jaillana
jitaidicue. Macaibaite. Juandicue.